


# New Testament

Kupsapiny Language



## Kupsapiny - Bible - New Testament

Matayo	3	
Marko	71	
Luka	114	
Yowana	185	
Kiyokik	239	
Romek	306	
1 Korinsoyek	334	
2 Korinsoyek	363	
Kalatiyek	381	
Efesoyek	392	
Filipik	402	
Kolosayek	409	
1 Sesalonyek	416	
2 Sesalonyek	422	
1 Timosewo	426	
2 Timosewo	434	
Tito	440	
Filemon	444	
Puraniyek	446	
Yakopo	467	
1 Petero	474	
2 Petero	482	
1 Yowana	487	
2 Yowana	494	
3 Yowana	495	
Yuta	496	
Doŋutok	498	



# Kupsapiny - Bible - New Testament

## Matayo

### Matayo 1

- <sup>1</sup>Yucu n̄alek ce kicesil ce poru aretap mpo Yesu Kristo. Yesu kunye kikeseniyantetap Tauti oṅnku nye kikeseniyantetap Apram.
- <sup>2</sup>Apram kunye kikwanitap Isaka; Isaka kunye kikwanitap Yakopo; Yakopo kunye kikwanitap Yuta; oko mpo mutakwam alak.
- <sup>3</sup>Yuta kunye kikwanitap Peres oko Sara (nye kikametimwa ku Tamar.) Peres kunye kikwanitap Keseron; Keseron kunye kikwanitap Ram;
- <sup>4</sup>Ram kunye kikwanitap Aminatap; Aminatap kunye kikwanitap Nasyon; Nasyon kunye kikwanitap Salmon;
- <sup>5</sup>Salmon kunye kikwanitap Poas (nye kicekure kamet Rakap;) Poas kunye kikwanitap Opet (nye kicekure kamet Rus); Opet kunye kikwanitap Yese;
- <sup>6</sup>Yese kunye kikwanitap Kinko Tauti. Tauti kunye kikwanitap Solomon (nye kikamet kunye kikorketap Uriya;)
- <sup>7</sup>Solomon kunye kikwanitap Reopoam; Reopoam kunye kikwanitap Apiya; Apiya kunye kikwanitap Asa;
- <sup>8</sup>Asa kunye kikwanitap Yesopat; Yesopat kunye kikwanitap Yoram; Yoram kunye kikwanitap Usiya;
- <sup>9</sup>Usiya kunye kikwanitap Yosam; Yosam kunye kikwanitap Akas, Akas kunye kikwanitap Kesekiya;
- <sup>10</sup>Kesekiya kunye kikwanitap Manase; Manase kunye kikwanitap Amon; Amon kunye kikwanitap Yosiya;
- <sup>11</sup>Yosiya kunye kikwanitap Yekoniya oko mpo mutakwam om pesyosyek cepo yo kicekwere pikap Israel kupa koretap Papulon.
- <sup>12</sup>Nto om letut yu kowo cekwer piko kupa Papulon, kwek Yekoniya kunye kikwanitap Syiltiyel nye kikwanitap Serupapel;
- <sup>13</sup>Serupapel kunye kikwanitap Apiwut; Apiwut kunye kikwanitap Eliyakim; Eliyakim kunye kikwanitap Asor;
- <sup>14</sup>Asor kunye kikwanitap Satok; Satok kunye kikwanitap Akim, Akim kunye kikwanitap Eliut;



<sup>15</sup>Eliut kunye kikwanitap Eriesa; Eriesa kunye kikwanitap Masan; Masan kunye kikwanitap Yakopo;

<sup>16</sup>Yakopo kunye kikwanitap Yosep santetap Mariyam, nto Mariyam kunye kametitap Yesu nye cekure Kristo, nye poru Dapanet.

<sup>17</sup>Kunyo kipuntoy pinutek tokol taman ok amwan kuceke Apram okoy Tauti. Kupuntoy yec pinutek taman ok amwan kuceke Tauti okoy ye kicekwere piko kupa Papulon. Kupuntoy yec pinutek taman ok amwan kuceke ye kicekwere piko kupa Papulon okoy ye kiceye Dapananato.

<sup>18</sup>Yunyi wule kiceyito Yesu Kristo. Nteye kimöce Yosep kule amüt Mariyam kametitap Yesu. Nto kutompo kot komütkey, yoto kutok kule koyat Mariyam lekwet om swametap Muyet Nyetilil.

<sup>19</sup>Yosep nye kimöce kule amüt Mariyam kunye ki cito nye kisiken koromun, kunyo kipuryo kot kumöce kule asornen Mariyam, yoto kusyem kule ayaste mamüt nye puryo kot konkete ci tokol.

<sup>20</sup>Nteye kimate Yosep kusote ñalecata tokol om moyenyi; kucontyi malayketap Mokoryontet om kirwotik kumwoci kule, “Yosep, keseniyantetap Tauti, mente anyokoritu memüt Mariyam kwek korkeñuñ omnye koyat neto lekwet nyepo swametap Muyet Nyetilil.

<sup>21</sup>Mosukucämñkey werit nye meserut nyi kaynenyi Yesu, omnye mosukusop pikyi tokol om miyotyoniñka.”

<sup>22</sup>Kikwiyokis ñalecu tokol sukuñet kwitita kupoyit manta ñalek ce kiñalal Mokoryontet kupunune workoyontet nye kimwoy kule:

<sup>23</sup>“Mosukukoyakay cepto nye mukul nye menket moron oñnkuyi wero, mosicekure kaynenyi Emanuel,” (nye poru kaynana kule, “Cepontekey acek Yiyintet.”)

<sup>24</sup>Ntowo kuñete Yosep rwonto; kwiy kuyu wule kukumwoci malayketap Mokoryontet. Yoto komüt neto Mariyam kwek korkenyi.


<sup>25</sup>Ntene nye kipuryo kot kutuyo tukway okoy kucämñkey Mariyam werinyi. Yoto kurut Yosep cekure kaynet Yesu.

## Matayo 2

<sup>1</sup>Kiceyici Yesu moñetap Peselekem om koretap Yuteya ye ki kinko Erote. Yoto kukwane koñasis piko alake ce muswokikap kokelik okoy kupun Yerusalem,

<sup>2</sup>oñnkwokutep kumwoy kule, “Koçeyici ono Kinko nyelel nyepo Yutayek? Omnye kucekäs acek kokelyenyi nye kutok om koñasis, kunyo kacekwa kule kwocesay.”

<sup>3</sup>Nteye kotolime Kinko Erote ñalecato, kumuy kupotpoten wanak oko piko tokol cepo Yerusalem.



<sup>4</sup>Kukur Erote yoto koruruc tisik cewoyec tokol oko konetikap ntarastinek oṅnkutepe kule, “Mosiceyici ono Kristo nye Ḑapanet?”

<sup>5</sup>Kuwekyi cek kumwoci kule, “Ceyicini moṅetap Peselekem om koretap Yuteya, omnye kisil workoyontet ṅalecu kumwoy kule:

<sup>6</sup>‘Nyi Peselekem om koretap Yuta, puryo kot yiku nyi miniṅ koromun om kwenutap poytoyikap Yuta, omnye mosukucone poytoyintet wule mite nyi, nye mosukupayta pikwani cepo Israel.’ ”

<sup>7</sup>Yoto kukur Erote muswokikap kokelik kukwa oṅnkurwoke wule wuṅat okoy kunket neto topon sawet nye kutoku kokelyet.

<sup>8</sup>Kuyokto neto picoto kupa Peselekem, oṅnkuyomise kunkolontyi kumwoci kule, “Ape waceny lekwet topon, nteye konyoru kwomwowo, saṅet awo mpo ani wasay neto.”

<sup>9</sup>Nteyu kowo kulim cek ṅalekap Kinko, kunomen kupa. Nteye kimite kupeti om aran, kukäs kokelyet nyo kiköse cek om koṅasis. Kuntoci kokelyet cekto okoy wokuyone yepo parak om ye kimite lekwet.

<sup>10</sup>Ntowo kukäs cek kokelyet kuṅerec ṅerekwek ce caṅ.

<sup>11</sup>Kupa koto orit, yoto kukäs cek lekwet oko kamet Mariyam. Kukuruny oṅnkusay lekwet, oṅnkutyac lolonikwa oṅnkukoci lekwet kokotutek cepo sapunek oko pupaninek oko miranik.

<sup>12</sup>Kusow Yiyintet cek om kirwotik kumwoci mente kuketitakey kupa wule mite Erote. Yoto kunomen kupa koremwa kupunte aret ake.

<sup>13</sup>Nto om letut yu kowo kupecikey muswwokik, yoto kucontyi malayketap Mokoryontet Yosep om kirwotik kumwoci kule, “Ḑet näm lekwet oko kamet oṅnkimwey iwo Misiri, oṅnkiwepur wuloto okoy omwowuṅ ani nyi, omnye möce Erote kule aceny lekwet sapakäc kume.”


<sup>14</sup>Kuṅet Yosep oṅnkunäm lekwet oko kamet oṅnkunomen komoy kuwo Misiri,

<sup>15</sup>wule kiwokopur okoy kume Erote. Kikwiyokis ṅalecu sukuṅet kwitita kupoyit manta ṅalek ce kikumwoy Mokoryontet kupunune wule mite workoyontet kumwoy kule: “Kyokur ani werinyu kucone Misiri.”

<sup>16</sup>Ntowo kukäs Erote kule kweperpera muswokik, kunyer koromun. Yoto kumwayta cepakäc lekok tokol ce werin kuceke ce ponto kenyisyek oyeny okoy nye koceyi pate om Peselekem oko wule lekite wuloto. Kiyoyeke pesyosyecoto oko pesyosyek co kimwocini muswokik neto kule kicekäs kokelyet.

<sup>17</sup>Om ṅalecutecu, kuye kwitita kupoyit manta ṅalek ce kimwoy workoyontet Yeremiya kule:

<sup>18</sup>“Kicelim polotet om moṅetap Rama, lokik cepo mesyet nyewo, kurire Racel lekoyi, rire neto, oṅnkupuryo kot kumöce kule ciṅereca, omnye kipok tokol.”



<sup>19</sup>Nto om letut yu kowo kume Erote, kucontyi malayketap Mokoryontet Yosep om kirwotik om Misiri,

<sup>20</sup>oṅnkumwoci kule, “Det nām lekwet oko kamet oṅnkinomen ketitekey koretap Israel, omnye kipok piko co kimöce kule cepakäc lekwet.”

<sup>21</sup>Yoto kuṅet Yosep oṅnkunām lekwet oko kamet oṅnkunomen kuketitakey kuwo koretap Israel.

<sup>22</sup>Ntowo kulim Yosep kule Arkelaus kunye kiker kwan Erote kwek Kinko nyepo Yuteya, yoto kunyokorit ye mowokumiṅis wuloto. Cetosyi yec cisow neto om kirwotik, yoto kuwo koretap Kalilaya,

<sup>23</sup>oṅnkuwo kuminy moṅetap Nasaret sukuṅet kwitita kupoyit manta ṅalek ce kikiṅalale workoyik kumwoy kule: “Mosicekure neto citap Nasaretin.”

### Matayo 3

<sup>1</sup>Kuco Yowana potisonintet om pesyosyecoto oṅnkucec kumwaytat Lokoywek om kiteletap Yuteya kumwoy kule,

<sup>2</sup>“Arenynkey, ayaste miyotyoniwok omnye kacontyok akwek poytoyisyetap torot!”

<sup>3</sup>Yowana kunye neto nyo kiṅolole workoyontet Isaya yo kimwowu kule: “Kapole citake kitela, oyiytoci Mokoryontet arenyi, asat kurotakay arenyi nye mosukupunte!”

<sup>4</sup>Kiloce Yowana yoto siret nye samput nye kicenape kororikap tyonyntake nye cekure nkamiyet oṅnkurate anwet suwenyi, kunyo kikwome talamik oko kumnyatetap samiyita.

<sup>5</sup>Yoto kukwane piko Yerusalem oko ce kikwone koretap Yuteya tokol, oko ce kikwone koret nye lekite tapantap oyinetap Yortan.

<sup>6</sup>Kurenynkey cek kuṅoṅ miyotyoniwa oṅnkupatisan Yowana cekto om oyinetap Yortan.


<sup>7</sup>Ntowo kukäs Yowana Farasayek oko Satusayek ce caṅ ce kimite kukwoni wule mite neto kule cepatisanec, Kumwoci neto cek kule, “Akwek Erenocu! Do nye kwesowok kule omweye nyerunotetap Yiyintet nye karik kuco?”

<sup>8</sup>Kunyo ayiy tukuk ce poru kule kwarenynkey akwek ayaste miyotyoniwok.

<sup>9</sup>Ntene monte cisot omwowu kule, Ceponte Apram nye kukonyo! Omnye komwowok ani kule, muce Yiyintet kunām rwontocu oṅnkuwec kwici Apram lekok.

<sup>10</sup>Kunyo kocenömnci yawut oywet kulekite kirintonokap ketik, nto ket ake tokol nye puryo kot kwiye omik ce toponec, mosiceyep nyo kulul oṅnkyewirci mata orit.

<sup>11</sup>Opotisonenok ani yawut peko kwek pelutyet nye poru kule kwarenynkey. Ntene cono om letumwani citake nye ponto swamet kupëlo nye puryo oyiku topon kot ayem anämata kweyonikyi. Neto nyoto kunye mosukupatisanek Muyet Nyetilil oko mata.



<sup>12</sup>Pontonu neto sweswenyi nye kanäme yewut nye mokuse nkanuk oṅnkururuki cokeniki, oṅnkupele wulo po moriryek mata nye momise.’’

<sup>13</sup>Kunomene Yesu Kalilaya om pesyosyecoto kuwo okoy oyinetap Yortan kule kupatisana Yowana.

<sup>14</sup>Ntene kusyem Yowana kule akerekte neto kumwoy kule, “Omöce ani kule patisana ani nyi, kunyi ye coni nyi yec wuli omite ani?”

<sup>15</sup>Ntene kuwekyi Yesu kumwoci neto kule, “Yaste yawut kwi yokis kuyunyitenyi, omnye om aret nye yunyitenyi ye mosiciy acek ciyitite ṅalek tokol ce möce Yiyintet.’’ Yoto kucäm Yowana.

<sup>16</sup>Yoto pakenke yu kowo cepatisan Yesu, kulonune peko orit. Kuyatakay wulin po torot kukäs neto Muyet Nyetilil nyepo Yiyintet nye kerkey oko swarar oko lakweyet nye kico kurekyi cokopure neto.

<sup>17</sup>Kucone kutit torot kumwoy kule, “Nyi kunye Werimwani camanet, nye oṅerekyini ani koromun.’’

## Matayo 4

<sup>1</sup>Kuntoci yoto Muyet Nyetilil Yesu kukwer okoy kitela, sokuwo wokusyem kulot Setani nyewo nyepo oyik neto.

<sup>2</sup>Nteyu kowo kuwany Yesu pesyosyek artam cepo pet oko pesyosyek artam cepo komoy nye puryo kot kwomisiyi, yoto kwam neto rupet.

<sup>3</sup>Kuco Setaninato wule mite neto oṅnkumwoci kule, “Ye yiku Weritap Yiyintet, mwoci panyi rwontocu kuweckey kwek mukatya?”

<sup>4</sup>Kuwekyi Yesu kumwoci neto kule, “Mwowu silutekap Yiyintet kule, ‘Puryo kot kusope cito mukatya pate nkit, ntene sope ṅolyo tokol nye cone kutitap Yiyintet.’ ”

<sup>5</sup>Yoto kukwer Setaninato Yesu okoy kupunto moṅet nyetilil, oṅnkukoci kuyone kusurut nye koy nyepo kotap Yiyintet.

<sup>6</sup>Oṅnkumwoci kule, “Ye yiku nyi Weritap Yiyintet, wirtekey panyi yu okoy wepir ṅony; omnye mwowu silutekap Yiyintet kule: ‘Mosukumwoci Yiyintet malaykanikiy kukwa kwokutaciṅ nyi, mosukwokunämiṅ kutaceniṅ yewuniyekwa, sukuṅet mente kot kuryac rwontok kerekokuk.’ ”

<sup>7</sup>Kuwekyi Yesu kumwoci neto kule, “Ntene mwowu mpo yec silutekap Yiyintet kule, ‘Mente kot asyem lotu Mokoryontet Yiyinteṅ.’ ”

<sup>8</sup>Yoto kukwer Setani nyewo nyepo oyik, Yesu okoy tulwet nye koy koromun, oṅnkuporci koret tokol kumukul oko woyinwek tokol ce ponto.

<sup>9</sup>Oṅnkumwoci kule, “Mosokoniṅ ani nyi tukucutecu tokol ye kecutumwo ani oṅnkisaya.’’



- <sup>10</sup>Kuwekyi Yesu kumwoci neto kule, “Wete yu nyi Setani! Omnye mwowu silutekap Yiyintet kule, ‘Soye Mokoryontet Yiyintenjuŋ oŋnkiyici yisyet neto nkit pate!’ ”
- <sup>11</sup>Yoto kunomen Setani nyewo nyepo oyik, kukwa malaykanik kwokukalya Yesu.
- <sup>12</sup>Ntowo kulim Yesu kule kucenäm Yowana oŋnkyekerta mopusi, yoto kunomen kuwo okoy Kalilaya.
- <sup>13</sup>Kipuryo kot kuminy Nasaret ntene kuwo wokuminy moŋetap Kapernaum nye mite tapantap tampayayet nyepo Kalilaya om koretap Sapulon oko nyepo Naftali.
- <sup>14</sup>Kiyokis kuyunyoto sukuŋet kwitita kupoyit manta ŋalek ce kikimwoy workoyontet Isaya kule:
- <sup>15</sup>“Om koretap Sapulon oko koretap Naftali, om koret nye tokyinikey ruretyet, om oyinetap Yortan pitonin, Kalilaya nye koretap lamek!
- <sup>16</sup>Piko ce miŋye wule mite menonet, Kukäs cekto kukweny lakweyet nyewo! oko piko ce miŋye koret nyepo menonetap met, kokoluci cekto lakweyet!”
- <sup>17</sup>Kuceke pesyonoto kucec Yesu kumwaytat lokoywekyi kumwoy kule, “Arenynkey ayaste miyotyoniwok! Omnye kacontyok akwek poytoyisyetap torot!”
- <sup>18</sup>Nteye kimite Yesu kuweti kurupe tampayayetap Kalilaya tapan; yoto kukäs piko oyeny ce tupco ce kinömikap purpurunek, coto ku mpo Simon (nye kimulyi cekure kaynet ake Petero) oko mutakwam Antereya ce kimite kuwircini porok tampayayet orit kunöme purpurunek.
- <sup>19</sup>Kumwoci Yesu cek kule, “Akwa anama cepetekey oko ani, mosanetak oyiku nömik ce okweru piko.”
- <sup>20</sup>Pakenke kupakakta cek porokwa cepo purpurunek oŋnkunam kupetakey Yesu.
- <sup>21</sup>Kutosyikey Yesu kuwo tay kuminiŋ, kukäs yec piko alak oyeny ce tupco, coto ku mpo Yakopo oko Yowana werikap Sepetayo. Kimite cek kukepur rapemwa orit kupontokey oko kwan Sepetayo. Kimite yoto kuyiytoy kusate porokwa cepo purpurunek. Kukur Yesu cekto.
- <sup>22</sup>Yoto pakenke kupakakta rapet oko kwan oŋnkunomen kunam kupetakey Yesu.
- <sup>23</sup>Kuwo Yesu kupunte koretap Kalilaya tokol kunetisyoti om korikapkokwonikwa, oŋnkumwoytoti lokoywek ce toponec cepo poytoyisyetap Yiyintet, oŋnkusop piko tokol ce kimnyontos porwonik wok tokol.
- <sup>24</sup>Kutisto ŋalek ce nöme neto kupunte koretap Siriya tokol, yoto kukwer piko pikwa ce kitany ce kiponto oyik ce miyotec oko ce kipoku mewuŋ, oko kipok porwonik. Kusop Yesu picoto tokol.
- <sup>25</sup>Kupa kunamat luket nyewo nyepo piko ce caŋ Yesu, ce kikwone Tekapoli (moŋosyek taman) oko ce kikwone Yerusalem oko Yuteya oko ce kikwone koretap oyinetap Yortan pitonin.





## Matayo 5

- <sup>1</sup>Ntowo kukäs Yesu luket nyepo piko ce caŋ, kulaŋnta kuwo tulwet parak oŋnkupur ŋony. Kukwa konomiky koruruckey komut neto.
- <sup>2</sup>Kucec Yesu kunet piko kumwoci kule:
- <sup>3</sup>“Ponto kupeyoy piko ce nkete kule ce möce koromun swametap Yiyintet om mukuleywekwa, omnye nyimwa poytoyisyetap Yiyintet!
- <sup>4</sup>“Ponto kupeyoy piko co rirtos kumesyi, omnye mosukuŋerec Yiyintet cekto!
- <sup>5</sup>“Ponto kupeyoy piko co toloyec, omnye mosukunyor tukuk co kikirto Yiyintet!
- <sup>6</sup>“Ponto kupeyoy piko co möce kule kwi yokis tukuk ce möce Yiyintet, omnye mosicipiyony cek kupiyonjis!
- <sup>7</sup>“Ponto kupeyoy piko co porcini piko alak tolosyet, omnye mosukukoci Yiyintet kunyor cekto tolosyet!
- <sup>8</sup>“Ponto kupeyoy piko co tililec mukuleywekwa, omnye mosukukäs cek Yiyintet!
- <sup>9</sup>“Ponto kupeyoy piko co yiyisyi kusut kalyet om wule mite piko, omnye mosukukure Yiyintet cekto lekokyi!
- <sup>10</sup>“Ponto kupeyoy piko co kicitaŋany kunyalil omnye yiye ŋalek ce möce Yiyintet, omnye nyimwa poytoyisyetap Yiyintet!
- <sup>11</sup>“Oponte akwek kupeyoy ye kocupok piko oŋnkutaŋanyak kumwowok ŋalek tokol ce miyotec omnye oyiku akwek konomikwani.
- <sup>12</sup>Aŋerec oŋnkopoypoyitu koromun, omnye cemosi koromun musyaremwoŋ nye kicekonorwok om wulin po torot. Omnye kikutaŋany cek workoyik kuyunyitenyi kutompo kot otoku akwek.
- <sup>13</sup>“Oyiku akwek misyontet nyepo koret. Ntene ye komo kunomu misyontet kupuryo aret ake yec nye cewece kot kunom. Komo kuponto nyo latik, kunyo ciswortoy pate kutyikta piko.
- <sup>14</sup>“Akerkeyekey akwek lakweyet nyepo koret. Puryo kot kuwuŋotos moŋet nye kicetec tulwet parak.
- <sup>15</sup>Puryo ci nye pele tarit oŋnkukupuye pesenit, ntene tore kito nye yonje tarit sukuŋet kukweny lakweyet piko tokol ce mite koto orit.
- <sup>16</sup>Kuyunyoto misyini kukweny lakweyet nyimwakwek piko tokol, sukuŋet kukäs cekto tukuk ce toponec ce oyiye akwek, sukukasta Papamwoŋ nye mite torot.
- <sup>17</sup>“Monte cisot kule kyaco ani kule cawirte ntarastinekap Moses oko ŋalekap workoyik. Puryo kot aco kule cawirte, ntene kyaco kule saŋet ayitite awaŋnte ŋalecato.



<sup>18</sup>Komwowok ani akwek ñalek cepo manta kule, ye tokumite kuyonot koret wulin po torot oko koret wuli po ñony, kupuryo kot kupote nyukutet mpo akenke nto mpo kot kupot ntarastit ake tokol nye miniñ om ntarastinek okoy kwiyokis tukuk tokol ce cemöce kule kwiyokis.

<sup>19</sup>Kunyo ci ake tokol nye yirye ntarastit mpo akenke pate nye miniñ, oñnkunet mpo piko alak kwiy kuyunyoto kunye cito nyoto nye mosukwek nye miniñ om poytoyisyetap torot. Ntene ci ake tokol nye keywey kwiyisye ntarastinek oñnkunet piko alak kwiy kuyunyoto, kunye cito nyoto nye mosukwek nyewo koromun om poytoyisyetap torot.

<sup>20</sup>Kunyo komwowok ani kule, ye puryo kot oyiye akwek topon yisyonutepak Yiyintet kupël Farasayek oko konetikap ntarastinek, kupuryo kot owuti mpo kisic poytoyisyetap torot.

<sup>21</sup>“Kyolim akwek kule kicemwoci pikap keny kule, ‘Monte ceporisye, nto ci ake tokol nye koporis cekweru nyoto kuco taytap ketintet.’

<sup>22</sup>Kunyo omwowok ani akwek yawut kule, ‘Ci ake tokol nye konyerci mutakwam, mosicekwer nyoto kuco taytap ketintet.’ Nto ci ake tokol nye kocup mutakwam kumwoci kule, ‘Puryo nyi wol.’ Kumisyini cekwer cito nyoto kuco taytap Kokwet nyewo. Nto ci ake tokol nye kokur mutakwam kule, ‘Solwo nyi.’ Kuweti cito nyoto wule mite mata nye momise.

<sup>23</sup>Kunyo ye karik koyite nyi kokotutyet nye kekoci Yiyintet om yepo otepto nye pele korosek, oñnkisot om yoto kule ponteniñ mutokwomet ñolyo,

<sup>24</sup>Kumisyini pokokyi kokotutyet yoto po taytap otepto nye pele korosek, oñnkiwo lakwar wesat ñalek ocömnyekey oko mutokwomet, nteye kewany weckey cekoyite kokotutyenun nye kekoci Yiyintet.

<sup>25</sup>“Nteye kowosontyiñ citake kukweriñ koti, kumöce kule asat ñalek ocömnyekey lakwar oko cicoto ye tomite opeti om aran kutompo kot opunte koti, sukuñet mente kot kukweriñ okoy taytap ketintet, kuñet nyo kukoytiñ iwo wule sikorintet kukweriñ nyo iwo mopusi.

<sup>26</sup>Komwowun kule, puryo kot mucu nyi kot cone mopusi okoy ye kekonu pesyantet nyepo letut nyepo pesento.

<sup>27</sup>“Kyolim akwek kule kicemwoy kule, ‘Mente asakwayan.’

<sup>28</sup>Kunyo komwowok ani akwek yawut kule ‘Ci ake tokol nye kakäs korko oñnkuocorokyi kule nto kwek nyenyu, kakwiñ cicoto sakwayanat oko korkonoto om mukuleynyi.’

<sup>29</sup>Kunyo ye koñnta nyenun nyepo tay kunye sokyin nyi kot yiy miyotyet, lotu kulot! Oñnkiwirte. Omnye topon om wule mite nyi ye kepot kereryantet ake nyepo porun kusir ye kocewirci porto nyenun tokoe wule mite mata nye momise.



- <sup>30</sup>Nteye yewut nye nyepo let nye sokiŋ nyi kot yiy miyotyey; yepte kuŋet! Oŋnkiwirte! Omnye topon om wule mite nyi ye kepot kereryantet ake nyepo porŋuŋ kusir ye kotoweti porto nyeŋuŋ tokol wule mite mata nye momise.
- <sup>31</sup>“Kicemwoy yec mpo kule, ‘Ci ake tokol nye kakwet korkenyi, kumisyini kusilyi parwet nye kwete.’
- <sup>32</sup>Kunyo komwowok ani akwek yawut kule, ‘Ye kakwet cito korkenyi, tos pate om ŋalekap sakwayanatet, kuponto cicoto lelisto nye kosutyi korkonoto kusakwayan.’ Nto cito nye kemüt korkonoto kakwiŋ cicoto sakwayanat.
- <sup>33</sup>“Kyolim akwek mpo yec kule, kicemwoci pikap keny kule, ‘Puryo kot kumisyini oyirye kawalatet nye kowalkey, ntene misyini oyiye oyititoy kawalemwoŋ om taytap Mokoryontet.’
- <sup>34</sup>Kunyo komwowok ani akwek yawut kule, Monte ciwolikey kawalat nyepo ŋolyo ake tokol. Monte ciwoli wulin po torot, omnye ŋeceretap Yiyintet wuloto.
- <sup>35</sup>Monte mpo ciwolyinikey koret wuli po ŋony, omnye muŋe kerekokyi wuloto. Nto monte mpo ciwolyinikey Yerusalem, omnye moŋetap Kinko nyewo wuloto,
- <sup>36</sup>Mente owolyikey mpo metiŋuŋ, omnye puryo kot mucu nyi kot wec putyontenŋuŋ mpo akenke kulelit nto kutuyit.
- <sup>37</sup>Möce omwowu pate kule, ‘Yunyoto.’ Nto komwowu kule, ‘Puryo kot kuyunyo.’ Omnye ŋolyo ake tokol nye komwowu kukeyte cutecu kucone nyo wule mite oyinoto nye miyat.
- <sup>38</sup>“Kyolim akwek kule kicemwoy kule, ‘Koŋ oko koŋ, kelya oko kelya.’
- <sup>39</sup>Ntene komwowok ani akwek yawut kule, ‘Monte ceyokukey om wule mite citake nye kokwiwok ŋalek ce miyotec. Ye kasyeciŋ citake kwarmatut nyepo tay, wekyi kusyec mpo nyepo let.
- <sup>40</sup>Nteye kokweriŋ citake wokuwosontyiŋ om satiŋuŋ, yaste kusut mpo kotit.
- <sup>41</sup>Nteye kokerciŋ koŋ citake kule tor terekokyi kilometet akenke, tosyikey sut wany kilometet akenke yec.
- <sup>42</sup>Ye kosomiŋ citake kitake kumöce kule koci cicoto kiyoto. Nteye kepeseniŋ citake kitake kumöce kule pesentyi cicoto kiyoto.’
- <sup>43</sup>“Kyolim akwek kule kicemwoy kule, ‘Misyini cäm latyeŋuŋ, oŋnkisenker punikuk.’
- <sup>44</sup>Ntene komwowok ani akwek yawut kule, acäm punikwok, oŋnkosomnci piko co toŋonyok,
- <sup>45</sup>sukuŋet oyiku akwek lekokaŋ Papamwoŋ nye mite torot. Omnye neto nye konu asisnyi kuluci piko ce miyotec oko piko ce toponec kukerkeyitu tokol, oŋnkukoci ropta piko ce yiye ce toponec oko piko ce yiye ce miyotec.





<sup>46</sup>Nteye kacäm akwek pate piko co cömok akwek, asot kule mocenyoru kokotut ne? Omnye yiye mpecek korurukikap mosoret kuyunyoto!

<sup>47</sup>Nteye koñololyi akwek pate coronutekwok, kukaiyy kiy ne nye pciyat nye puryo kot kupo kwak? Omnye yiye mpecek piko co puryo kot kucöme Yiyintet kuyunyoto!

<sup>48</sup>Misyini oyiku pic ce tililec kuyu wulo tilil Papamwoñ nye mite torot!

## Matayo 6

<sup>1</sup>“Oripkey monte oyiye yisyet nyepo tinimwoñ om taytap piko kule sukuñet kukäs piko kito nye oyiye akwek. Ye kaiyy tukucutecu kuköse piko, kupuryo kot cimuce cekonok kokotuyet nye cone wule mite Papamwoñ nye mite torot.

<sup>2</sup>“Kunyo ye kekoci cito nye panan kiy nye kekalya, mente osilkey okurte om taytap piko kuyu wulo yiytoy koperperotik co silekey om korikapkok oko wulo po orustunwek. Yiye cekto kuyunyoto kule sukuñet kuyweyec piko. Komwowok ani akwek ñalek cepo manta kule, kunyor picoto musyaremwa nye yeme.

<sup>3</sup>Nteye mite nyi kocini pononik tukuk ce kekalye, möce rip mekany kot kukäs yewuñuñ nyepo let kito nye yiye yewuñuñ nyepo tay.

<sup>4</sup>Sukuñet Papañuñ nyo köse tukuk ce wuñotin kukoniñ nyi musyaret.

<sup>5</sup>“Nteye mite nyi some, mente akerkeyitu oko kaperperotik co silekey! Co möce kule ciyoñntosi om korikapkok oko sokwonutek kule sukuñet kukäsec piko tokol. Komwowok ani ñalek cepo manta kule! Kunyor picoto musyaremwa nye yeme.

<sup>6</sup>Ntene ye mite some, möce iwut koñuñ orit oñnkiker kurket, oñnkisom Papañuñ nye mite wule wuñat; sukuñet Papañuñ nye köse tukuk ce wuñotin ce yiye nyi kukoniñ musyaret.

<sup>7</sup>“Nteye osome monte aluplupan oyiyisye ñalek ce cañ kuyu piko co menkete Yiyintet, ce sote kule mokulimnci Yiyintet cek om sayet nyepo ñalek ce cañ.

<sup>8</sup>Monte cekerkeyitu oko pico. Omnye nkete Papamwoñ tukuk ce omoce kutompo kot osom akwek neto.

<sup>9</sup>Möce osome kuyunyi kule: ‘Papa nyo nye mite torot, kante ciywey kutililit kayneñuñ,

<sup>10</sup>Kante kuco poytoyisyenñuñ, kante kwi yokis ce möce nyi om koret kuyu wule kiytoy om torot.

<sup>11</sup>Konec omikyo cepo okokoy,

<sup>12</sup>Kalyec leliswekyacek, kuyu wulo cikolyoy co lele om wule ce mite acek.

<sup>13</sup>Mente aroyenec wule mite syemutok, ntene sorunenec wule mite miyotyey.’

<sup>14</sup>Omnye ye kokalye akwek piko alak leliswek ce kukwiwok, mosukukalyak mpo akwek Papamwoñ nye mite torot.



<sup>15</sup>Ntene ye puryo kot omuci kot akalye piko alak leliswek ce kukwiwok akwek, mpo Papa nye mite torot kupuryo kot komuce kot kukalyak mpo akwek leliswek ce kwayiy.

<sup>16</sup>“Nteye omite akwek okire omik, monte cesimiyitu kuyu wule yiytoy kaperperotik, omnye sirinye cek tokoywekwa kusoŋutitu kule sukuŋet kuporkey kutok kule mite cekto kukire omik. Komwowok ani akwek ŋalek cepo manta kule, kunyor picoto musyaremwa.

<sup>17</sup>Ntene ye mite nyi ikire omik, möce wun metiŋuŋ oŋnkiyile mwayta,

<sup>18</sup>sukuŋet mente kot kuporkey kutok om wule mite piko kule mite nyi ikire omik, ntene konkete pate Papaŋuŋ nyo köse tukuk ce wuŋotin ce yiye nyi oŋnkukoniŋ musyaret.

<sup>19</sup>“Monte cekonore mokoryontinek wuli po koret ŋony, wule muce kurwotyeci oŋnkwam solopik, oŋnkuput kucor corik.

<sup>20</sup>Akonore Mokoryontinekwok wulin po torot wule memuce kot kurwotyeci nto mpo kot kwam solopik, wule memuce kot kuput oŋnkucor corik.

<sup>21</sup>Omnye wule mitowune mokoryontinekwok ku wuloto wule mitowune mukuleywekwok.

<sup>22</sup>“Koŋnta kunye tarit nyepo porto. Ye toponec konyek cekuk kuköstoy topon, kuponto porto nyeŋuŋ tokol lakweyet.

<sup>23</sup>Ntene ye puryo kot kuköstoy topon konyek cekuk, kuponto porto nyeŋuŋ tokol menonet. Kunyo ye kaweckey lakweyinto nyo mitowune wule mite nyi kwek menonet, kutuyitu menonet nyoto koromun!


<sup>24</sup>“Puryo ci nye muce kot kwek mutworintet nyepo mokorenik oyeny. Omnye muce kusenker ake oŋnkucäm ake, nto muce kuywey ake oŋnkunyil ake. Puryo kot omuci akwek kot oyici yisyet Yiyintet oko mokoryontit nyepo tukuk cepo koret.

<sup>25</sup>“Yunyoto omne saŋet omwowok ani akwek kule, monte cisot tukuk ce nömok akwek, kuyu omik ce moyam sosopce, nto ce nöme sirok cepo porwonikwok kule mosicilac ne. Puryo kot kupële ne soponto omik? Puryo kot kuponto ne porto latik kupël sirok?

<sup>26</sup>Akäs pa akwek toritek co terertoy, puryo kot kukolsyi oŋnkupuryo kot kukisisyi, nto koruruki mpo omit coken, ntene oŋnkupoye Papamwoŋ cekto. Kunyo puryo kot oponte akwek ne latik kupël toritek?

<sup>27</sup>Do om akwek nye ye komuy oŋnkusot koromun ce nöme sopon nyi, nye muce kot kutosyi kucaŋit kenyisyek alak cepo soponto?

<sup>28</sup>“Kunyo omne sasoti akwek ce nöme sirok? Akäs pa wule pititoy taptok om koret, puryo kot kwiysisi cekto, oŋnkupuryo kot kunope sirok.



<sup>29</sup>Ntene komwowok ani akwek kule, nka mpo Solomon om woyintap mokoryontit nye kiponto, kipuryo kot kulocekey neto topon kuyu akenke om taptocu.

<sup>30</sup>Kunyo nteye muce Yiyintet kot kulac suswek ce mite koret pesyoni nto mite tun cewirci mata kuloy, ku aret ce tya nyun ce muce Yiyintet kulacak akwek! Oyiku akwek pic ce ponto koyenot nye miniŋ pate!

<sup>31</sup>“Kunyo monte cec cisot omwowu kule, ‘Mosikyam ne acek?’ Nto kule ‘Moscilac ne acek?’

<sup>32</sup>Omnye möce mpo piko alake co monket Yiyintet tukucutecu tokol. Nkete Papamwoŋ nye mite torot kule omöce akwek tukucutecu tokol.

<sup>33</sup>Onyosye onyuru kunyo poytoyisyetap Yiyintet oko toponiyeni sukuŋet cetoswok akwek tukucutecu.

<sup>34</sup>Kunyo monte cisot ŋalek cepo pesyetap tun, omnye pesyet nyepo tun oko ŋalek ceci nkit. Ponto pesyet ake tokol wuyinwek ceyemekey oko pesyonoto.

## Matayo 7

<sup>1</sup>“Monte cemutyi piko alak musanku, sukuŋet mente kot kumütwok Yiyintet akwek koyin musanku.

<sup>2</sup>Omnye mosukumutwok Yiyintet akwek musankut kuyu wulo omutyini akwek piko alak. Mosukwiyisye neto ntarastinek co oyiyisye akwek ye omutyini piko alak musankut

<sup>3</sup>Kunyo omne seköse nyi pertet nye kisic nye mite koŋnta nyepo yeyaŋuŋ, oŋnkurok kupuryo kot mucu kās musukyet nyo mite koŋnta nyeŋuŋ nkit?

<sup>4</sup>Nto mucu nyi kulene mwoci yeyaŋuŋ kule, ‘Yeya, kany onumuŋ ani pertet nyo mite koŋnta nyeŋuŋ oŋnkurok ponte nyi yec musukyet nyo mite koŋnta nyeŋuŋ nkite?’

<sup>5</sup>Ye koperperintoni! Nyosye numu kunyo musukyet nyo mite koŋnta nyeŋuŋ!

<sup>6</sup>“Monte cikoci ŋokik tukuk ce tililec, mosukuwekyokey kwamak. Monte cewirci karin nye picuŋ taytap nkururwenik, omnye mosukutyikta ŋony pate.

<sup>7</sup>“Osom mosicekonok akwek, aceny mosonyoru, okonynkony kurket mosiceyotwok.

<sup>8</sup>Omnye ci ake tokol nye kosom, mosicikoci, nto ci ake tokol nye kaceny, mosukunyor, nto ci ake tokol nye kekonynkony, mosiceyoty kurket,

<sup>9</sup>Do om akwek nye mucu kukoci lekwenyi rwantet ye kosom mukatyantet?

<sup>10</sup>Nto kukoci erenet ye kosom purpuryontet?

<sup>11</sup>Kunyo nteye oŋnket akwek piko cu oyiku miyotec okoci lekokwok tukuk ce toponec, ku aret ce tya nyun ce muce kukoci Papa nyepo torot tukuk ce toponec piko co kosom cekto neto!





- 12“Kunyo möce oyici piko alak tukuk ce toponec kuyu wulo omoktoy akwek kule ntoyiwok akwek cekto, omnye poru coto wule yunto ntarastinekap Moses oko cepo workoyik.
- 13“Ape akwek owut orit opunte kurket nye maric, omnye para kurket oṅnkukoy nye para aret nye weti wule mite mata nye momise. Kunyo punte piko ce caṅ aret nyoto.
- 14Ntene maric oṅnkulow oṅnkuwuy aret nye weti wule mite soponto, oṅnkuṅeri pate piko ce mokunyor aranato.
- 15“Oripkey wule mite workoyik co mwiynot, cekwoni wule omite akwek kuyu kecirek om porto wulo po saṅ, ntene om orit kuce suyik co orontoy.
- 16Mosonkete akwek cekto kupuswek cepo yisyet nye yiye. Muce pa kupute piko mokoyek ketik ce ponto kotok?
- 17Yiye ketit nye topon omik ce toponec, kwiye ketit nye miyat omik ce miyotec.
- 18Puryo kot komuce ketit nye topon kot kwiye omik ce miyotec, oṅnkupuryo kot komuce ketit nye miyat kot kwiye omik ce toponec.
- 19Ket ake tokol nye puryo kot kwiye omik ce toponec, ceyepe nyo kulul oṅnkyewirci mata orit.
- 20Kunyo mosonkete akwek workoyik ce mwiynot yisyet nye yiye.
- 21“Puryo kot ku ci ake tokol nyo kuro ani kule, ‘Mokoryontet, Mokoryontet’ nye mosukowut poytoyisyetap torot, ntene nyo yiye pate ṅalek ce möce Papamwani nye mite torot.
- 22Ye kopunto pesyonoto, mosukumwowo ani piko ce caṅ kule, ‘Mokoryontet, kicemwayte acek lokoywekap Yiyintet om kayneṅuṅ, cekwet oyik ce caṅ, oṅnkyiyi tukuk cepo kakitat om kayneṅuṅ!’
- 23Mosomwoci ani picoto kule, ‘Puryo kot oṅnketok ani akwek! Aṅete taymwani cu oyiye ṅalek ce miyotec!’
- 24“Kunyo ci ake tokol nye kalim ṅalekwani cutecu oṅnkurup kuywey, kukerkey nyo oko ci nye ṅom nye katec konyi kupolyi kuwo ṅony topon.
- 25Kuropen ropta, kuyin mokotek oṅnkuwus yomet kuryac koyoto, ntene puryo kot kulul omnye kicetec cepolyi kuwo ṅony topon.
- 26Nto ci ake tokol nye kalim ṅalekwani cutecu oṅnkupuryo kot kurup kuywey, kukerkey nyo oko ci nye perper nye katec konyi yepo ntapca oṅnkupuryo kot kupolyi kuwo ṅony topon.
- 27Kuropen ropta, kuyin mokotek oṅnkuwus yomet kuryac koyoto kulul, kulul koyoto lulot nyewo koromun!’”
- 28Nteyu kowo kumwoy Yesu ṅalecutecu okoy kuwany, kokite luket nyepo piko ṅalek ce kinet neto.



<sup>29</sup>Kinet Yesu cekto kuyu ci nye ponto kamukeywek nye puryo kot kukerkey oko konetikwa cepo ntarastinek.

## Matayo 8

<sup>1</sup>Nteyu kowo kurekune Yesu tulwet, kurup luket nyepo piko ce caŋ neto.

<sup>2</sup>Yoto kuco citake nye kiponto mutyenkenik okoy ye kimate Yesu, oŋnkukutuny oŋnkumwoci kule, “Mokoryontet, ye kecäm nyi nkit mucu sopo ani.”

<sup>3</sup>Koyito Yesu yewunyi oŋnkunäm cicoto oŋnkumwoy kule, “Omöce ani, kunyo sop nyi nyolu!” Yoto pakenke kusopco mutyenkenik ce kiponto cicoto.

<sup>4</sup>Kunkolontyi Yesu kumwoci cicoto kule, “Lim pa, mente womwoci citake tokol, ntene iwo pakenke lakwar wule mite tisintet oŋnkikany kukäsiŋ, nteye kewany koyite korosyontet nyo kimwoy Moses sukuŋet porci ci ake tokol kule kwesop nyi.”

<sup>5</sup>Ntowo kupunto Yesu Kapernaum, yoto kutuye nyewo nyepo sikarekap Romek neto, kuco yepo tay oŋnkusaysay kumwoci kule,

<sup>6</sup>“Mokoryontet, mite mutworintemwani nye koru kwiriri om komwani nye puryo kot kuŋete, nye kasat koromun.”

<sup>7</sup>Kumwoci Yesu neto kule, “Mosowo ani wosop kusop.”

<sup>8</sup>Ntene kuwekyi nyewo nyepo sikarek kumwoci kule, “Mokoryontet, puryo kot kuyunyo, omnye oyiku ani ci nye puryo kot kumisyiniŋ nyi ico komwani, ntene mwowu pate ŋolyo mosukusop mutworintemwani.

<sup>9</sup>Omnye oyiku mpo ani ci nye cepoyto, oŋnkoponte sikarek ce opytoy, omwocini ake kule, ‘Iwo’ kuwo, nto ake omwoci kule, ‘Co’ kuco, nto mutworintemwani omwoci nyo kule, ‘Yiy kiyi’ Kwiy kuyunyoto.”

<sup>10</sup>Nteyu kowo kulim Yesu ŋalecato kokite koromun oŋnkumwoci piko ce kirupe neto kule, “Komwowok ani akwek kule, nka mpo om Israel tokol kumukul, tompo kot anyoru ani ci nye ponto koyenot nyewo nye yunyi.

<sup>11</sup>Komwowok yec kule, mosukukwane piko ce caŋ koŋasis oko raraktay ce mosukwokopure yepo meset wanak oko Apram oko Isaka oko Yakopo om poytoyisyetap torot.

<sup>12</sup>Ntene oŋnkyewirta piko co kiceyito poytoyisyetap Yiyintet kupa saŋ wule mite menonet wule mowokuriry e oŋnkunyyi kelekwa.”

<sup>13</sup>Kumwoci Yesu nyewo nyepo sikarek kule, “Nomen iwo kaŋuŋ, mosukwiyokis om wule mite nyi kuyu wulo keyen nyi nkit.” Yoto pakenke kusop mutworintetap nyewo nyepo sikarek.

<sup>14</sup>Kuwo Yesu okoy kotap Petero, wokunyor cepyosyetap pikoy nyepo Petero kumite kukoru kumnyone yeset.



- <sup>15</sup>Kunäm Yesu yewutap let nyepo cepyosyanato, yoto kusop yeset, kuñet kuyo oñkucec kwici cek omik.
- <sup>16</sup>Ntowo kupunto kosoleny, cekwer piko ce cañ ce kiponto oyik ce miyotec kukwa wule mite Yesu. Kukwetyi Yesu picoto oyik ce miyotec kwiysisye ñolyontenyi oñkusop piko tokol ce kimnyontos.
- <sup>17</sup>Kikwiy kuyunyitenyi sukuñet kwitita kupoyit manta ñalek ce kikimwoy workoyontet Isaya kule, “Neto nkit nye kinum kusut tonkusyonokyacek oñkukesen porwonikyacek.”
- <sup>18</sup>Yoto kukäs Yesu luket nyepo piko ce cañ ce kimite kemut neto, kumwayta kule cipe kyay tampayayet pitonin.
- <sup>19</sup>Kuco konetintet ake nyepo ntarastinek ye kimite Yesu oñnkumwoci kule, “Konetintet, mosanamatiñ ani cepetekey oko nyi om wulyo tokol wule kewo.”
- <sup>20</sup>Kuwekyi Yesu kumwoci neto kule, “Ponto mokoyitinek mwenonik, kuponto toritek korik, ntene puryo kot kuponto Weritap cito wule mokowute metinyi.”
- <sup>21</sup>Kumwoci citake nye kikonointet Yesu kule, “Mokoryontet, kany awo ani kunyo wamuy Papanyu.”
- <sup>22</sup>Kuwekyi Yesu kumwoci neto kule, “Nama ani nyi cepetekey tukway, yaste muswek kumuy muswekwa nkit.”
- <sup>23</sup>Kulany Yesu rapet oñnkupetakey konomiky.
- <sup>24</sup>Yoto pakenke kuwus yomet nyewo koromun om tampayayet okoy kumac kolum peko rapet. Ntene kimite yoto Yesu kukoru.
- <sup>25</sup>Kupa cek ye kimite Yesu oñnkuñet kumwoci kule, “Mokoryontet, sorwec kocemis!”
- <sup>26</sup>Kuwekyi Yesu kumwoci cekto kule, “Omne somuye kuyunyi? Oponete akwek koyenot nye kisic!” Kuñet Yesu kuyo oñnkupolyi yomet oko tampayayet, yoto kuis yomet oko tampayayet tokol.
- <sup>27</sup>Kokite ci tokol om cek oñnkumwoy kule, “Ci ne cito nyi? Omnye limncini yomet neto oko pekap tampayayet!”
- <sup>28</sup>Kuco Yesu kwoy tampayayet pitoni okoy koretap Kerasenik. Yoto kutuye piko oyenku Yesu ce kikwone kepenonik wule cemucini piko. Kiponto picoto oyik oñnkinyekerec koromun, nye kipuryo ci mpo akenke nye kimuce kot kupunte aranato.
- <sup>29</sup>Yoto pakenke kupol picoto kumwoy kule, “Weritap Yiyintet, mokenec ne acek nyi? Keco nyi so kule catañanyec acek kutompo kot kupunto pesyet nyo kicekwey?”
- <sup>30</sup>Kimite ye kilekite yoto kimite cek yeceyap nkururwenik ce cañ ce kimite kwokete.
- <sup>31</sup>Kusom oyik kumwoci Yesu kule, “Ye kekwetec acek nyi, kwetec cipe wociwut yeceyap nkururwenik cut!”





<sup>32</sup>Kumwoci Yesu cek kule, “Ape.” Yoto kuṅetyo oyik kupa wokowut nkururwenik. Kurway kumwey yeceyta tokol nyepo nkururwenik okoy wokoṅirte lakam wokosuci tampayayet kupakäc peko tokol.

<sup>33</sup>Yoto kumwey mesewek ce kyokoy nkururwenik okoy kupunto moṅet oṅnkupa wokumwaytat ṅalek tokol ce kokwiyokis om wule mite piko co kiponto oyik.

<sup>34</sup>Yoto kuwo ci ake tokol nyepo moṅonoto wokukäs Yesu. Nteyu kowo kukäs, kusom cekto Yesu kuṅet kuwete koremwa.

## Matayo 9

<sup>1</sup>Kulany Yesu rapet kuketitakey kway tampayayet okoy kuponto moṅenyi.

<sup>2</sup>Kusutune piko alake kwiririt cito nye kipok kerenkok kuco wule mite Yesu. Ntowo kukäs neto koyenet nyewo nye kiponto picoto, kumwoci cito nye kipok kerenkok kule, “Werunyu titir! Kacikalyiṅ miyotyonyikuk.”

<sup>3</sup>Yoto kaṅalal konetikap ntarastinek alake kwicek nkit kumwoy kule, “Ḍolole cici ṅal ce nyile Yiyintet!”

<sup>4</sup>Kunket Yesu ṅalek ce kisote cek oṅnkumwoci kule, “Omne sasoti akwek ṅalek ce miyotec ceyuco om mukuleywekwok?”

<sup>5</sup>Oṅnkono nye lekit, cemwoy kule, ‘Kacikalyiṅ miyotyonyikuk.’ Nto ye kocemwoy kule, ‘Ḍet wesetote?’

<sup>6</sup>Kunyo mosoporwok ani akwek ṅalek cepo manta kule, ponto Weritap cito kamukeywek kukalya miyotyonyik om koret.” Yoto kumwoci Yesu cicoto kipok kerenkok kule, “Ḍete ṅony, oṅnkitor kwiririṅṅ nomen iwo ka!”

<sup>7</sup>Kuṅet cicoto kuyo oṅnkunomen kuwo ka.

<sup>8</sup>Ntowo kukäs piko tokol ṅalecato, kumuyo cek oṅnkukasta Yiyintet nye kwekoci piko kamukeywek ceyucutecu.

<sup>9</sup>Kunomene Yesu yoto, nteye kimite kuweti kukäs neto korurukintetap mosoret nye cekure kaynenyi Matayo nye kimite kukepur konyi nye cekweye mosoret. Kumwoci Yesu neto kule, “Nama cepetekey oko ani.” Kuṅet Matayo oṅnkunomen kunam kupetakey Yesu.

<sup>10</sup>Nteye kimite Yesu kwomisiyi om kotap Matayo, yoto kukwa korurukikap mosoret ce caṅ oko piko co kicetay, kwokopur ṅony wanak oko neto oko konomikiyi om yepo meset.

<sup>11</sup>Kukäs Farasayek yoto ṅalecato, kumwoci cek konomikap Yesu kule, “Omne sukwomis konetintemwoṅ oko pic ce korurukot cepo mosoro oko pic ce kicetay?”

<sup>12</sup>Kulim Yesu ṅalek ce kimwowu cekto, kuwekyi kumwoci kule, “Puryo kot kumöce piko ce sopcotin cepsakityantet, ntene piko ce mnyontos pate ce möce.



<sup>13</sup>Ntene ape wakäs poru ne silutyetap Yiyintet nyi mwowu kule, ‘Puryo kot omöce ani korosekap tyonjik, ntene omöce poypoyet pate.’ Omnye kipuryo kot aco kule cokur kurenynkey piko co toponec, ntene kyaco kule sukuñet kurenynkey piko co ponto miyotyoniik.’”

<sup>14</sup>Yoto kukwa konomikap Yowana wule mite Yesu oñkwokutep kumwoy kule, “Omne sicekire acek oko Farasayek omik om pesyosyek alak, oñnkurok kupuryo kot kukire omik mpo kisic konomikukyi?””

<sup>15</sup>Kuwekyi Yesu kumwoci cek kule, “Osoti akwek kule muce kunerekis toyek ce coronutepap cito nyo kemütisiyi ye tokupontokey cek cito nyo kemütisiyi? Puryo kot kuyunyo! Ntene mosukupunto pesyosyek ce mosicinumune cekto cito nyo kemütisiyi, yoto ye mosukukir cekto omik.

<sup>16</sup>“Puryo ci nye muce kunäm yokwontetap siret nyelel oñnkunopci siret nye yoswak, omnye muce kupac siret nyelel nyo yoswaket kutok kuwoyit koñnta.

<sup>17</sup>Oñnkupuryo ci nye muce kuroñnkyi finyonik ce mwonec wonkinek ce yoswak, omnye ye kakwiy kuyunyoto, komuce kotolis wonkinek oñnkutumntokey kupa wuy finyonik oñnkworon wonkinek. Ntene ceroñnkyini finyonik ce mwonec wonkinek ce lelac sukopur topon.”

<sup>18</sup>Nteye kimite Yesu kumwocini cek ñalecutecu, kuco poytoyintet ake nyepo kotapkok ye kimite Yesu, oñnkukutuñe yepo taynyi oñnkumwoci kule, “Kotokume cepnyu pantanyi, ntene co nyi oñnkikemer yewuñuñ mosukusop.””

<sup>19</sup>Yoto kuñet Yesu oñnkurup kupetakey cicoto. Kuwetokey neto konomiky.

<sup>20</sup>Kimite yoto korket ake nye kimnyan kukwone korotik kuwany kenysyek taman ok oyeny. Kucone korkonoto letutap Yesu oñnkutwa kunäm tapantap siretap Yesu.

<sup>21</sup>Omnye kimwoy nkit om moyenyi kule, “Ye katway ani sirenyi pate, mososop.””

<sup>22</sup>Kuwekey Yesu kukäs let, yoto kukäs korkonoto oñnkumwoci kule, “Cepnyu titir! Kokusopiñ nyi koyeneñuñ.” Kusop korkonoto om yoto pakenke.

<sup>23</sup>Kuwo Yesu okoy kotap poytoyintet. Ntowo kukäs neto piko ce kikute kurerunekap rirek oko piko tokol ce kirirtos kwome mnyat,

<sup>24</sup>kumwoci kule, “Oñetye opecikey sañ! Puryo kot kume cepto koru pate!” Ntene kurorci picoto Yesu.

<sup>25</sup>Nteyu kowo cekwet piko tokol kukwa sañ, kuwo Yesu ye kimite cepoto oñnkunäm yewut, yoto kuñet cepoto kuyo.

<sup>26</sup>Kutisto ñalecutecu om koronoto tokol.

<sup>27</sup>Kunomen Yesu kuwete yoto, nteye kimite kuweti kurup piko oyenku ce koryotin neto ce kipole kumwowu kule, “Weritap Tauti! Rirenec kalyec acek!””



<sup>28</sup>Ntowo kuwo Yesu koto orit, kukwa pikey koryotin oyenku ye kimite neto. Kutepe Yesu cek kule, “Ocöme akwek kule omuci ani kot ayiy ñolyontoni?” Kuwekyi cek kumwoci kule, “Mokoryontet, cecöme!”

<sup>29</sup>Yoto kunäm Yesu konyekwa oñnkumwoci kule, “Kunyo kante kwiyokis om wule omite akwek kuyu wule yunto koyenemwoñ.”

<sup>30</sup>Kusopco kuñonokis konyekwa. Kunkolontyi Yesu kumwoci cek kule, “Monte cemwoci citake tokol ñalecu!”

<sup>31</sup>Ntene kupa picoto kumwaytat kutisto ñalek ce nöme Yesu om koronoto tokol.

<sup>32</sup>Nteye kimite kunomene picoto, kukwer piko alake wule mite Yesu cito nye solwo nye puryo kot kuñolole omnye kiponto oyinot.

<sup>33</sup>Yoto pakenke yu kowo cekwetyi cicoto oyinot, kucec kuñalal. Kokite ci ake tokol kumwoy kule, “Tompo kot cekäs kenysis ñolyo nye yunyi om Israel!”

<sup>34</sup>Ntene kumwoy Farasayek kule, “Oyinot nyewo nyepo oyik nye kocini neto swamet sukuñet kukwet oyik.”

<sup>35</sup>Yoto kuwo Yesu kupunte moñosyek tokol oko soñwek. Kunetisyote korikapkokwonikwa kumwoytoti lokoywek ce toponec cepo poytoyisyetap Yiyintet, oñnkusop piko ce cañ ce kimnyontos porwonik wok ce cañ oko piko ce kisyen.

<sup>36</sup>Ntowo kukäs Yesu luket nyepo piko ce cañ, kurire om mukuleynyi kukalya cek omnye kikimuyo kucoñonenis pate kuyu kecir ce puryo kot kuponto mesewo.

<sup>37</sup>Yoto kumwoci neto konomikyiki kule, “Cemosi yisyet nyepo kisisyet, ntene ñeri pate piko ce mokukisis.

<sup>38</sup>Kunyo osom Mokoryontet citap mparet sukuñet kuyok piko alake kukwa kwokusis.”

## Matayo 10

<sup>1</sup>Kukur Yesu konomikyiki korurukyiki ye kimite neto oñnkukoci kamukeywek ce muce kukwet oyik ce miyotec oñnkusop porwonik wok tokol oko syenunot ake tokol.

<sup>2</sup>Kaynokap kiyokik tokol taman ok oyeny kucu: Nyepo tayta ku Simon nye cekure kaynet ake Petero, oko mutakwam Antereya; Yakopo oko mutakwam Yowana werikap Sepetayo tukway.

<sup>3</sup>Filipo oko Paturumayo, oko Tomas oko Matayo nye kikorurukintetap mosoret, oko Yakopo weritap Alufayo; oko Setayo,

<sup>4</sup>Simon nyikanet nye poryecini korenyi; oko Yuta Isikaryoti nyo kiñomntoy Yesu.

<sup>5</sup>Kuyokto Yesu picutece taman ok oyeny oñnkuyomis kumwoci ñalecu kule, “Monte kot ape koretap lamek, monte mpo ciwut moñosyekap Samariyek.

<sup>6</sup>Ntene ape pate wule mite kecirek cepo kotap Israel ce kipotyö.





- <sup>7</sup>Ape wamwaytate kule, ‘Kucontyok akwek poytoyisyetap torot!’ Wosop piko ce mnyontos, wosop kotutune met piko ce kipok.
- <sup>8</sup>Wosop piko ceponto mutyenkenik oṅnkakwet oyik. Kicekonok akwek puc pate nye puryo kot ayal, kunyi okoyite mpo akwek puc pate nye puryo kiy nye cekonok.
- <sup>9</sup>Monte cenämata sapunek nto pesan om lolonikwok.
- <sup>10</sup>Monte cenämata om poninekwok munyenkutap somik, nto mpo siret nyepo oyeny, nto mpo kweyonik, nto mpo korokto nye otepenoti. Omnye misyini cito nye yiyisiy kunyor musyarenyi.
- <sup>11</sup>“Nteye kowut moṅet ake tokol nto saṅnta ake tokol, aceṅate ci ake tokol nye topon nye muce kuṅerekyok, oṅnkopur oko cicoto okoy onomene wuloto.
- <sup>12</sup>Nteye kowut koto ake orit, asupay omwoci kule, ‘Purte nyi kalyet.’
- <sup>13</sup>Ye kuṅerekyok akwek pikap koyoto, ayaste kunyor cek kasupoyisyet nyepo kalyemwoṅ. Ntene ye puryo kot kuṅerekyok picoto, oketu kuketkey kasupoyisyet nyepo kalyemwoṅ.
- <sup>14</sup>Nteye puryo kot kuṅerekyok akwek citake tokol nto kutay molimwok ṅalek ce komwowu, aṅete moṅonoto nto koyoto oṅnkopukyi tertitap krenkokwok.
- <sup>15</sup>Komwowok ani akwek ṅalek cepo manta kule, om pesyetap musankut mosukukalya Yiyintet pikap koretap Siton oko cepo Komora kusir piko cepo moṅonoto!”
- <sup>16</sup>Alim pa! Koyoktok ani akwek kuyu kecir ce kapa kwenutap suyik. Kunyo roke oṅnemekitu kuyu erenoy; oṅnkotoloyitu kuyu swororok.
- <sup>17</sup>Oripkey omnye mite piko ce mosukunämak akwek oṅnkukwerok wokuwosontyok om korikapkokwonikwa.
- <sup>18</sup>Mosicekwerok wocewosontyok om taytap poytoyik oko kinkonik omnye ocömo ani akwek, sukuṅet omwoci akwek cekto oko lamek lokoywek ce toponec.
- <sup>19</sup>Ye kocekwerok wocewosontyok, monte cisot kule moceneṅalal ṅal ne, nto kule ceṅololi kulene, ye kopunto pesyonoto, mosicekonok ṅalek ce momwowu om yoto.
- <sup>20</sup>Omnye puryo kot kucikwakwek ṅalek ce moṅalal, ntene mosukukwane wule mite Muyet Nyetilil nyepo Papamwoṅ nye mitowune wule omite akwek nye ṅolole yoto.
- <sup>21</sup>“Mosukuṅomnto piko mpo mutakwam cepakäc kupok, oṅnkuṅomnto mpo kwan lekokwa cepakäc kuyunyoto. Mosukuṅetṅet lekok oṅnkuporye kamwa oṅnkuṅomnto cepakäc kupok.
- <sup>22</sup>Mosukusenkerak kutayak akwek piko tokol omnye kocäm ani. Ntene ci ake tokol nye kasyem kutitir okoy pesyet nyepo letut kunye mosukusop nyoto.
- <sup>23</sup>Nteye kacitaṅanyak akwek om moṅet ake, omwey ape moṅet ake. Komwowok ani kule, puryo kot owonyi akwek yisyonutekwok om moṅosyekap Israel tokol kutompo kot kuco Weritap cito.



- 24“Puryo kot kupële cito nye cinete konetintenyi, oṅnkupuryo kot kupële mutworintet mokoryontenyi.
- 25Kunyo roke kuyem cito nyo cinete kukerkeyit oko konetintenyi, oṅnkuyem mutworintet kukerkeyit oko mokoryontenyi. Nteye kocekure cito nyewo nyepo kayta kule, ‘Pelsepul’ nyewo nyepo oyik, kuporkey kule mosicetoci mpo pikap kayata kaynok ce miyotec ce pëlisyi!”
- 26“Kunyo monte ciywey piko. Puryo kiy nye yelat yawut nye puryo kot ceṅonye koyin kutok, oṅnkupuryo kiy nye wuṅat yawut nye puryo kot ciporu koyin kutok.
- 27Dalek cu omwowok ani om wule wuṅat kuce roke wotosyikey wamwayte ṅalecato ye pet kwen. Nto ṅalek ce kwalime wule wuṅat kuce roke wamwayte okurte ṅalecato korik kisyek.
- 28Monte ciywey piko co poköce porto pate, ntene oṅnkupuryo kot komuce kot kupakäc soponto; ntene aywey Yiyintet nye muce kupakäc tukway porto oko soponto om wule mite mata nye momise.
- 29Puryo kot kyole cek titiyinek oyeny tampurèt? Ntene oṅnkupuryo kot komuce kot kosuci mpo akenke ṅony, ye tompo kot kucämnta Papamwoṅ.
- 30Nto wule omite akwek, nka mpo putekap metewokwok kiciyit tokol.
- 31Kunyo monte cemuye; omnye oponte akwek latik kupël titiyinek!”
- 32“Kunyo ci ake tokol nye kaṅalal kutor om wule mite piko kule oyiku nyimwani, kunye mosaparte otoru ani cicoto om wule mite Papamwani om torot.
- 33Ntene ci ake tokol nye katay meparta kutor om wule mite piko, kunye mosatay ani maparte cicoto om wule mite Papamwani om torot.”
- 34“Monte cisot kule kyaco ani osutu kalyet kuco koret, puryo kot osutu kalyet, ntene kyosutu rotwetap cok.
- 35Omnye kyaco ani capciy, sukuṅet kutay werit kwan, kutay cepto kamet, kutay korketap werit kametitap santenyi.
- 36Mosukwek pikap kayta ake punik cepo citap kayata.
- 37“Ci ake tokol nye kacäm kwan nto kamet kupëlo ani, kunye puryo kot kuponto cito nyoto latik om wule omite ani. Ci ake tokol nye kacäm werinyi nto cepnyi kupëlo ani, kunye puryo kot kuponto cito nyoto latik om wule omite ani.
- 38Ci ake tokol nye puryo kot kukesene murtowontenyi oṅnkuco kutyikyö ani let, kunye puryo kot kuponto nyoto latik om wule omite ani.
- 39Ci ake tokol nye syeme kule osoru sapon nyi, mosukupot cito nyoto sapon nyi. Nto ci ake tokol nye kepot sapon nyi omnye kacäma ani, kunye mosukusor nyoto sapon nyi.”



<sup>40</sup>“Ci ake tokol nye koŋerekyok kutorocak akwek, kukoŋerekyo kutoroca ani cito nyoto, nto ci ake tokol nye koŋerekyo kutoroca ani, kukoŋerekyi kutoroc cicoto neto nyo kiyokwo ani.

<sup>41</sup>Ci ake tokol nye koŋerekyi kiyokintetap Yiyintet omnye kiyokintet, mosukupcicin cicoto kokotutyet oko workoyontet. Nto ci ake tokol nye koŋerekyi kutoroc ci nye topon omnye ci nye topon, mosukunyor cicoto kokotutyetap cicoto topon.

<sup>42</sup>Komwowok ani akwek ŋalek cepo manta kule, ci ake tokol nye kekoci peko ce koyititec akenke om konomikwani ce minkec ceyucu omnye konomikwani, mosukunyor nyoto kokotutyenyi nye kocikoci.”

## Matayo 11

<sup>1</sup>Nteyu kowo kumwoci Yesu konomikyiki taman ok oyeny ŋalecu okoy kuwany, kunomene yoto kuwo kunetisyot oŋnkumwaytat ŋalek om moŋosyek ce kilekite wuloto.

<sup>2</sup>Kulim Yowana om mopusi yisyonutek ce kikwiye Kristo. Kuyok konomikyiki alak kwokutepe Yesu kumwoci kule,

<sup>3</sup>“Nyi cito nyo kimwowu Yowana kule mokuco, nto mocekany acek citake?”

<sup>4</sup>Kuwekyi Yesu kumwoci cek kule, “Ape aketitekey womwoci Yowana ŋalek ce oköse oko ce olime akwek,

<sup>5</sup>Kukästa piko ce kikoryo, pesetoti piko ce kimwolyos, cisope piko ce kiponto mutyenkenik, kuciŋet kotutune met piko ce kipok oŋnkyemwocini pononik lokoywek ce toponec.

<sup>6</sup>Kunyo ŋerekat kuponto kupeyoy ci ake tokol nye puryo kot kunyoruneno ani konokut!”

<sup>7</sup>Nteye kiketitokey piko co keyoku Yowana, kuŋalal Yesu ŋalek ce nöme Yowana kumwoci piko kule, “Kyopeti akwek kitela wulo kimite Yowana kule wocekäs ne? Rostit nye kitimtime yomet?

<sup>8</sup>Ntene kyopeti akwek kule wocekäs ne? Kyopere wocekäs cito nye kelac sirok ce toponec ce kintus? Minye piko co loce sirok ce toponec ce kintus korikap mokorenik.


<sup>9</sup>Ntene omwowo ani pa akwek, kyopeti akwek kule wocekäs ne? Kyopere wocekäs Workoyo? Komwowok ani kule, kyokäs akwek yoto ci nye pële workoyo.

<sup>10</sup>Omnye Yowana kunye cito nyo mwowu silutekap Yiyintet ŋalek ce nöme neto kule, ‘Mosoyoku ani kiyokintenyu, nye mosukusatuj aret om tayŋuj.’

<sup>11</sup>Komwowok ani akwek ŋalek cepo manta kule, om ci ake tokol nye kiyi korko, puryo mpo akenke nyewo kupël Yowana potisonitent. Ntene yec, ci nye miniŋ om poytoyisyetap torot kunye cito nyoto nyewo kupël neto.



- <sup>12</sup>Kuceke pesyosyek co kimwoytoy Yowana lokoywekyi okoy pesyoni, kiceporye citaŋany poytoyisyyetap torot, kunyo syeme piko co kiwuryo kule cenäm poytoyisyyet.
- <sup>13</sup>Kiŋalal workoyik tokol oko ntarastinekap Moses ŋalek ce nöme poytoyisyyet okoy pesyosyek co kitoku Yowana.
- <sup>14</sup>Nteye omöce akwek kule cecäm ŋalekwa, Yowana kunye Eriya nyo kicemwowu kule mosukuco.
- <sup>15</sup>Kunyo ye oponte akwek yitik ce olimnte roke olimnte.
- <sup>16</sup>“Kunyo mosoyuyite ne ani yawut piko cepo pintap pesyosyecu? Kerkey cekto oko lekoy ce mite kepur yepo motepo, sukupole alake kukurcini alak
- <sup>17</sup>kumwowu kule: ‘Kicekutwok acek kurerunek, ntene atay akwek motum! Kicerirye acek kyam mnyat, ntene atay akwek morirye!’
- <sup>18</sup>Omnye kico Yowana oŋnkuco kukir omik nye puryo kot kwomisiyi oŋnkupuryo kot kuye finyonik kumwoy piko kule, ‘Ponto nyi oyinot!’
- <sup>19</sup>Kuco Weritap cito oŋnkuco kwomis oŋnkuyesyo, kumwoy piko kule, ‘Akäs pa cemoyetyontet yeyintetap finyonik oŋnkucorwetap piko co ruruce mosoret oko piko ce kicetay!’ Kunyo kucinket kule po manta ŋomnonetap Yiyintet om yisyonutek cepo ŋalek ce tokunotin.’”
- <sup>20</sup>Yoto kupolyi Yesu kulel moŋosyek ce kikwiye neto ŋalekyi ce caŋ cepo kakitat omnye kitompo kot kurenynkey kwasta miyotyonyik, kumwoy kule,
- <sup>21</sup>“Oyey! Mite kwapi koromun nyi Korasin! Oyey! Mite kwapi koromun mpenyi Pesusayita! Omnye nto kitukuk ce kipo kakitat co kiciye wule mite nyi kuce kiciye coto Tiro oko Siton, nto kirenynkey kenye piko cepo wuloto kulac sirok sarkatinek oŋnkuwastekey arek kupor kule kacerenynkey om miyotyonyikwa.
- <sup>22</sup>Kunyo komwowok ani akwek kule, mosukukaykay Yiyintet toŋoŋutek cepo pikap Tiro oko Siton om pesyetap musankut kupëlok akwek.
- <sup>23</sup>Nto mpenyi Kapernaum! Kimöce nyi kule alaŋntekey osutkey torot? Mosicewirciŋ ŋony wule mite manta nye momise! Omnye nto kitukuk cepo kakitat co kiciwuŋ nyi kuce kicici coto Siton nto mite kutoku okoy pesyoni!
- <sup>24</sup>Kunyo komwowok ani akwek kule, mosukukaykay Yiyintet toŋoŋutek cepo pikap Sotom om pesyetap musankut kupëliŋ nyi.’”
- <sup>25</sup>Yoto kuŋalal Yesu kumwoy kule, “Okostiŋ ani nyi Papa, Mokoryontet nyepo torot oko ŋony, omnye kweporci nyi ŋalecu piko ce puryo kot kuŋomec ce kanetan.
- <sup>26</sup>Yunyoto Papa, omnye kiyiy nyi kwey nkit kuyunyoto om cömisiyeŋuŋ.
- <sup>27</sup>“Kikono Papamwani tukuk tokol. Puryo ci nye nkete kule werit ku ŋo, tos Papa pate nkit nye nkete, oŋnkupuryo ci nye nkete kule Papa ku ŋo, tos werit pate nkit nye nkete oko piko ce kacäm werit kule oŋoŋu oporci Papa.





<sup>28</sup>“Akwa wule mite ani akwek piko tokol co kyocosye kunyikisyok terekok, mosomuŋwok ani.

<sup>29</sup>Onumu mucokimwani oŋnkuwutekey oŋnkanetkey arupa ani, omnye oyiku ani tala, oŋnkutopon mukuleyto, mosonyoru kamuŋnto.

<sup>30</sup>Omnye Kuskus mucokit nye mokonok ani oŋnkukuskusec terekok ce motorwok ani.”

## Matayo 12

<sup>1</sup>Kuwo Yesu om pesyosyecoto kupunte mparosyekap nkanuk ye kipesyetap Sapat. Yoto kwam konomiki rupet, kucec cekto kuput nkanuk oŋnkwam.

<sup>2</sup>Nteye kotoköse Farasayek kuyunyoto, kumwoci cek Yesu kule, “Käs pa, yiye konomikuk yisyet nye yirye ntarastinek cepo pesyetap Sapat!”

<sup>3</sup>Kuwekyi Yesu kumwoci cek kule, “Tompo kot asuman akwek mpo kisic ŋalek ce kikwiŋ Tauti yo kipontokey oko pikyi yo kyome rupet?

<sup>4</sup>Kiwo neto kotap Yiyintet orit oŋnkunum mukatyantet nye kicesoci kupoyit Yiyintet oŋnkwam oko pikyi, nka kot kipuryo kot kucömncini ntarastinek neto oko picoto kwam, ntene tisik pate ce kicecömncini.

<sup>5</sup>Nto tompo kot asuman akwek om ntarastinekap Moses kule tisik kuce yirye okokoy ntarastinek cepo Sapat om kotap Yiyintet oŋnkupuryo kot kuponto cek lelis?

<sup>6</sup>Komwowok ani kule, mite yuteyu citake nye pële kotap Yiyintet.

<sup>7</sup>Nto yunye kwonket akwek kupoyit manta kule poru ne silutekap Yiyintet cu mwowu kule, ‘Puryo kot omoce ani korosek cepo tyoŋik, ntene omoce tolosyet.’ Nto puryo kot omutyini akwek musanku piko alak co puryo kot kuponto lelis.

<sup>8</sup>Omnye Weritap cito kunye Mokoryontet nyewo nyepo pesyetap Sapat.”

<sup>9</sup>Kunomen Yesu kuwete yoto okoy kupunto kotapkokwemwacek ake.

<sup>10</sup>Kimite citake yoto nye kime yewut. Kimite yoto piko alake ce kimöce kule cewosontyi Yesu om ŋalek ce kalel kumwoy. Kutepe cek Yesu kule, “Cöme ra ntarastinekyo cisopsi ye pesyetap Sapat?”

<sup>11</sup>Kuwekyi Yesu kumwoci cek kule, “Nteye ponto citake om akwek keciryet nye kesuci mwenet ye pesyetap Sapat, puryo kot konumu kocut kucone mwenet?

<sup>12</sup>Kunyo ponto cito latik ce caŋ kupël keciryet! Kunyo comwec acek ntarastinekyo ce yiy yisyet nye topon ye pesyetap Sapat!”

<sup>13</sup>Yoto kumwoci Yesu cicoto kule, “Yite yewuŋuŋ.” Kuyito cicoto yewunyi, kusop yewut kunyol kukerkeyit oko yewut nyin ake.

<sup>14</sup>Kumiŋnto Farasayek kupa saŋ wokurwoc aret nye mosukupakäce cek Yesu kume.



- <sup>15</sup>Ntowo Kulim Yesu ñalecato, kunomen kuwete yoto. Kupa piko ce cañ kurup neto. Kusop Yesu piko tokol ce kimnyontos,
- <sup>16</sup>oñnkumwoci kunkolontyi kule monte cemwoci piko alak ñalek ce nōme neto.
- <sup>17</sup>Sukuñet kwitita kupoyit manta ñalek ce kimwoy workoyontet Isaya kule:
- <sup>18</sup>“Mwowu Mokoryontet kule, Okäs oñyi mutworintemwani nye kwakwey, nye akenke pate nye cāmanemwani nye ñerekyini sophonmwani, mosokoci ani neto Muyemwani Nyetilil, mosukumwoy musankunek om wule mite piko cepo yemosyek tokol,
- <sup>19</sup>Ntene puryo kot kutintene, nto mpo kupol. oñnkupuryo kot kuñolole kupol om orustunwek cepo moñet,
- <sup>20</sup>Puryo kot kwirye tekantet nye muryony, nto mpo kot komis mata nye ñwenyñwenye. Mosukutitir okoy kupēlis mutisyet nyepo musankunek cepo manta.
- <sup>21</sup>Mosukukenekey piko cepo yemosyek tokol neto.”
- <sup>22</sup>Yoto kukwer piko alake citake nye korat nye kipuryo kot kuñolole omnye kiponto oyik kuco wule mite Yesu. Kusop Yesu cicoto okoy komuc kot kuñalal oñnkukästa.
- <sup>23</sup>Kokite piko tokol koromun, oñnkutep kumwoy kule, “Ara Weritap Tauti cici!”
- <sup>24</sup>Ntowo kulim Farasayek ñalecato, kuwec kumwoy kule, “Yiyisye cici pate swametap Pelsepul nyewo nyepo oyik sukuñet kukwet oyik.”
- <sup>25</sup>Konket Yesu ñalek ce kisote cekto, yoto kumwoci kule, “Poytoyisyo ake tokol nye kapciykey kwek oyeny oñnkuporyekey nkit kupote kwaran. Nteye kapciykey moñet nto pikap koto ake kwek oyeny oñnkuporyekey nkit, kupote nyo kwaran.
- <sup>26</sup>Kunyo nteye poryekey Setani om poytoyisyenyi, kuporkey kule pciyat Setaninato, kunyo muce kulene kuyo poytoyisyenyi!
- <sup>27</sup>Nteye oyiyisye ani Pelsepul ye sañet akwet oyik, kwiysisye ño konomik cikwakwek ye kwete oyik? Kunyo konomik cikwakwek nkit ce nkete ñalek cepo manta kule puryo kot opoye akwek manta!
- <sup>28</sup>Ntene ye Muyetap Yiyintet nye kono ani swamet ye sañet akwet oyik, kuporukey kupoyit manta kule kucontyok akwek poytoyisyetap Yiyintet.
- <sup>29</sup>“Muce kulene cito kot kuput kowut kotap cito nye nyikan nye ponto swama oñnkunyapan tukukyi, tos pate ye kanyosyo kurat cicoto sukuñet kunyapan tukuk cepo kanyi.
- <sup>30</sup>“Ci ake tokol nye puryo kot ku nyimwani kunye toyo ani cicoto, nto ci ake tokol nye puryo kot kukolyo cirurukisye kecirekwani tukway, kunye cito nyoto nye serete kuseret.



- 31 Om ḡolyontoni, omwowok ani kule, mosicikalya piko miyotyoni alak tokol oko ḡalek ce miyotec ce kaḡalal; ntene puryo kot cimuce kot cikalya ci ake tokol nye kaḡalale kwapi Muyet Nyetilil.
- 32 Mosicikalya ci ake tokol nye kaḡalal ḡolyo nye miyat om wule mite Weritap cito. Ntene puryo kot cimuce mpo kisic kot cikalya ci ake tokol nye kaḡalale kwapi Muyet Nyetilil om pesyosyecu nto om kenysyeyek ce mokukwa.”
- 33 “Ye senyori omik ce toponec, kumöce ponte ketit nye topon, nteye ponte ketit nye miyat mesenyori omik ce miyotec, omnye cinkete ket ake tokol omiky ce yiye.
- 34 Akwek Erenocu! Omuce akwek kulene kot aḡalal ḡalek ce toponec oḡnkurok yec oyiku akwek miyotec. Omnye ḡolole kutit ḡalek ce nyitotin mukuleyto orit.
- 35 Konu cito nye topon ḡalek ce toponec cekwone konorutyenyi nye topon nye mitowune wule mite neto orit, kukonu cito nye miyat ḡalek ce miyotec cekwone konorutyenyi nye miyat nye mitowune wule mite neto orit.
- 36 “Kunyo komwowok ani kule, om pesyetap musankut mosukuḡalal ci ake tokol ḡolyo ake tokol nye miyat nye kiḡalal.
- 37 Omnye mosiciyisye ḡalekuk nkit cemutuḡ musankut kule ponte lelis nto meponte lelis.”
- 38 Yoto kuḡalal konetikap ntarastinek alake Farasayek kumwoci Yesu kule, “Konetintet, ce möce acek kule cekäsiḡ ye yiye pelutyet nyepo kakitat.”
- 39 Kumwoy Yesu kule, “Pic ce miyotec ce menket Yiyintet piko cepo pintap pesyosyecu! Tepeno cekto pelutyet nyepo kakitat? Ntene pelutyet nyepo kakitat nye mocikoci pate ku pelutyet nyepo kakitat nyepo Workoyontet Yona.
- 40 Kuyu wulo kipur Yona moyetap tyonyntap ruretyet kuwany pesyosyeyek somok cepo pet oko pesyosyeyek somok cepo komoy, kuyunyoto mosukupur Weritap cito mwenet kuwany pesyosyeyek somok cepo pet oko pesyosyeyek somok cepo komoy.
- 41 Mosukuyonḡ koyin pikap Nenefi om pesyetap musankut oḡnkuwosontyok akwek piko cepo pinta nyepo pesyosyecu, omnye kirenykey cek kulim ḡalek ce kimwoci Yona. Kunyo komwowok ani akwek kule, mite yuteyu kitake nyewo kupel Yona!
- 42 Mosukuyo koyin korko nye Kinko nyepo makentany om pesyetap musankut oḡnkuwosontyok kumutwok musankut akwek piko cepo pinta nyepo pesyosyecu, omnye kicone neto wule low oḡnkuco cokulim ḡomnonetap Solomon. Kunyo mite yuteyu kitake nyewo kupel Solomon!”
- 43 “Ye kowete oyinoto nye miyat cito, mosukuwesetot kupunte koret wule puryo peko kuceḡoti wule möce kule komuḡe, nteye mnonyor,
- 44 Mosukuketkey kuco, nteye kaco cokunyor puryo ci nye minye, oḡnkicipuc oḡnkyesat topon.



<sup>45</sup>Yoto mosukuwo wokukwer oyik alak tisap ce miyotec kupël neto, kukwa yoto oṅkwokowut orit kumiṅis wuloto. Mosukuwur yoto kopurtap cicoto kupël wule kiyunto kopurnyi nye kipo kunyo. Kunyo mosukuyuyit nyoto om wule mite piko ce miyotec cepo pinta nyepo pesyosyecu.”

<sup>46</sup>Nteye kimite Yesu tokuṅololyini piko, yoto kupun kamet oko mpo mutakwam kwokuyonje saṅ oṅnkutep kule ceṅololyi neto.

<sup>47</sup>Kumwoci citake nye kimite yoto Yesu kule, “Käs pa, mite komet oko mpo mutokwomet keyon saṅ kumöce kule ceṅololuṅ.”

<sup>48</sup>Kuwekyi Yesu kumwoci cicoto kule, “Do nye yeyomwani ṅo ce mpo yeyamwani?” Oṅnkumwoy kule, “Käs pa! Okyu mpo yeyomwani oko mpo yeyamwani!”

<sup>49</sup>Yoto kumwelyel Yesu konomikiy oṅnkumwoy kule, “Käs pa! Okyu mpo yeyomwani oko mpo yeyamwani!

<sup>50</sup>Omnye piko tokol ce yiye ṅalek ce möce Papamwani om torot kuce mpo yeyamwani oṅnku mpo yeyomwani coto.”

## Matayo 13

<sup>1</sup>Om pesyonoto akenke kunomene Yesu koyoto oṅnkuwo okoy kupunto tampayayet tapan. Wokopur kunetis.

<sup>2</sup>Yoto korurukyikey luket nyepo piko ce caṅ ye kimite neto okoy kulany Yesu rapet oṅnkopure. Kuyonje piko tokol tampayayet tapan.

<sup>3</sup>Kwiyisye Yesu tyonkocok kumwoci piko ṅalek ce caṅ. Kumwoy kule, “Kiwo citake wokukolsyo,

<sup>4</sup>Nteye kimite kukolsyi, kusuci kupuswek alake aret tapan, yoto kuterer toritek oṅkwam.

<sup>5</sup>Kosuci kupuswek alake yepo kitawet parak ye kimite teṅek ce ṅeri, kutur lakwar omnye kipuryo kot kumite teṅek ce kipa ṅony.

<sup>6</sup>Nteye ketelucini asista kupël kuyom kupoty omnye kipuryo kot kuponto tikityek ce kipa ṅony.

<sup>7</sup>Kosuci kupuswek alake yepo kotok orit, kupityo kotok oṅkwam kupoty.

<sup>8</sup>Ntene kosuci kupuswek alake yepo teṅek ce toponec, kupityo okoy kwiy kupuswontet akenke kupuswek pokol, nto ake kwiy kupuswek tomonwokik lö, nto ake kwiy kupuswek sosom.”

<sup>9</sup>Oṅnkumwoy Yesu kule, “Kunyo, ye oponte yitik ce olimnte, roke olimnte!”

<sup>10</sup>Yoto kukwa konomik ye kimite Yesu oṅnkutepe kule, “Omnye seyiyisye nyi tyonkocok ye ṅololyini piko?”





- <sup>11</sup>Kuwekyi Yesu kumwoci cek kule, “Kicekonok akwek oṅket ṅomnonet nye wuṅat nyepo poytoyisyetap torot, ntene puryo kot cikoci cekto.
- <sup>12</sup>Omnye ci nye ponto kitake, mosicetosyi cikoci kucanjit sukuṅet kunyor ce caṅ, ntene cito nyo puryo kot kuponto kiy, mosicinumune mpo tukusic ce ponto.
- <sup>13</sup>Kuyunyoto omne soyiyisye ani tyonkocok ye oṅololyini cekto, omnye köstoy cek oṅnkurok yec kupuryo kot kuköse kiy, oṅnkulimntoy, oṅnkurok yec kupuryo kot kusowu kunket kiy.”
- <sup>14</sup>Omnye mite kwititoy kupoyitu manta om wule mite cekto ṅolyontetap Isaya nye kiṅor kumwoy kule: “Mosolimnte akwek oṅnkolimnte, ntene oṅnkupuryo kot osowu oṅket, mosokäste oṅnkokäste, ntene oṅnkupuryo kot oṅnketi,
- <sup>15</sup>Omnye koliliyotin kasoteywekap picu; kiker cek yitikwa, oṅnkomis konyekwa. Nto kopuryo kot kumite cekto kuyunyoto, nto kwemuce kukäste cek konyekwa, oṅnkulimnte yitikwa, oṅnkusowu kunket kasoteywekwa, sukuṅet kuweckey kukwa wule omite ani. Mwowu Yiyintet kuyunyoto. Saṅet ani osop cekto kusopco.”
- <sup>16</sup>“Ntene oponte akwek kupeyoy koromun omnye kostoy konyekwok, oṅnkulimntoy yitikwok!
- <sup>17</sup>Komwowok ani akwek ṅalek cepo manta kule, caṅ workoyik oko pikap Yiyintet ce kimöce kule nto cekäs tukuk cu oköse akwek, ntene kipuryo kot komuc kot kukäs, oṅnkimöce kule nto celim ṅalecu olime akwek, ntene kipuryo kot kulim cekto.”
- <sup>18</sup>“Kunyo alimnte oṅnkonket kule poru ne tyonkocetap kolintet.
- <sup>19</sup>Piko co kalim lokoywek cepo poytoyisyetap Yiyintet oṅnkupuryo kot kunkete topon, kukerkey piko co oko kupuswek co kisuci aret tapan, omnye mosukuco Setani nye miyat oṅnkuṅey kunum ṅalek co kicekol mukuleywekwa.
- <sup>20</sup>Kupuswek co kisuci kitawet parak, kukerkey co oko piko co lime lokoywek oṅnkuṅerekyi kucäm lakwar.
- <sup>21</sup>Ntene oṅnkupuryo kot kowute mukuleywekwa orit, kunyo puryo kot kopure kuloyit nteye kaco wuyinto nto toṅoṅutek ce nöme lokoywek, mosukutoyis cek lakwar.
- <sup>22</sup>Nto kupuswek co kisuci kotok orit, kukerkey co oko piko co kalim lokoywek, ntene kwam kowurta lokoywecoto kasoteywekap pesyosyecu oko cömisyet nyepo mokoryontit, kupuryo kot kwiye kupuswek.
- <sup>23</sup>Nto kupuswek co kisuci teṅek ce toponec kukerkey co oko piko co kalim lokoywek oṅnkunket topon, oṅnkwiyy kupuswontet akenke kupuswek alak pokol, kwiyy ake kupuswek tomonwokik lö, kwiyy ake kupuswek sosom.”
- <sup>24</sup>Kumwoci Yesu cek tyonkocet ake kule; “Kerkey poytoyisyetap torot oko cito nye kikul mparenny kupuswek ce toponec.
- <sup>25</sup>Nto mite pesyet ake komoy ye kimite kukoruy piko tokol; kucopunyonntet oṅnkuco kukol wancet wule mite nkanuk oṅnkunomen kuwecikey.



- <sup>26</sup>Nteyu kowo kupityo nkanuk oṅnkucec kwiy omik, yoto kutok mpo wancet.
- <sup>27</sup>Kukwa mutworik wule mite cicoto oṅnkwokumwoci kule, ‘Mokoryontet, nteyu kikul nyi mpareṅuṅ kupuswek ce toponec! Kicone ono wancet?’
- <sup>28</sup>Kuwekyi cicoto kumwoci cek kule, ‘Puniyontet nye kikwiyy kuyunyi.’ Kuwekyi mutworik kumwoci kule, ‘Möce nyi kule cipe acek woceneṅ wancet?’
- <sup>29</sup>Kuwec cicoto kule, ‘Puryo!’ Omnye ye kaṅey akwek wancet omuci waṅeyte mpo nkanuk.
- <sup>30</sup>Ayaste kupityo tokol okoy cekäs, nteye pesyet nyo cekisisyi mosomwoci ani piko co kisisyi kule, ‘Anyosye kunyo oruruc wancet oṅnkorat oṅnkopël kuloy, oṅnkoruruc nkanuk oṅnkokoci cokenikwani.’ ”
- <sup>31</sup>Kumwoci Yesu yec cek tyonkocet ake kule, “Kerkey poytoyisyetap torot oko kupuswontet nyepo ketit nye cekure kalitarit, nye kisic kusir kupuswek alak tokol,
- <sup>32</sup>nye kinäm citake oṅnkukul mparenyi, nteye kotopite kuwoyit kweku ket nyewo kupël ketik alak tokol, sukuṅet kukwa toritek kwokutec korikwa sarisyekap ketoto.’ ”
- <sup>33</sup>Kumwoci Yesu cek tyonkocet ake yec kule, “Kerkey poytoyisyetap torot oko mumarek ce nöme korket ake oṅnkutankwar oko pusyekap nkanuk cepo tepenik somok, kukut kuwoyit.’ ”
- <sup>34</sup>Kwiysisye Yesu tyonkocok kumwoci piko ṅalecutecu tokol. Kipuryo ṅolyo mpo akenke nye kimwoci neto cekto nye puryo kot kwiysisye tyonkocok.
- <sup>35</sup>Kikwiyy kuyunyoto sukuṅet kwitita kupoyit manta ṅalek ce kimwoy workoyontet kule, “Mosoyiyisye ani tyonkocok ye oṅololyini cek, mosomwoci ṅalek ce kiwuṅotin kuceke ye kicitany koret.’ ”
- <sup>36</sup>Kunomen Yesu kupakakta piko oṅnkuwo koto orit. Kukwa konomikiyi ye kimite neto oṅnkumwoci kule, “Mwowec acek, poru ne tyonkocetap samiyitap mparen?’ ”
- <sup>37</sup>Kuwekyi Yesu kumwoci cek kule, “Cito nyo kole kupuswontet ku Weritap cito nyoto,
- <sup>38</sup>nto mparet ku koret, nto kupuswek co toponec kukerkey co oko piko cepo poytoyisyetap Yiyintet, nto wancet kukerkey co oko piko cepo Setani nye miyat.
- <sup>39</sup>Nto puniyontet nyo kikole wancet ku Setani nyewo nyepo oyik nyo nkit. Nto pesyet nye cekisisyi pesyet nyoto nyepo ye ṅete koret. Nto piko co kisisyi ku Malaykanik coto.
- <sup>40</sup>Kuyu wulo ciruruktoy samiyita nyepo wancet oṅnkyepël kuloy, mosukukerkeyit nyoto om pesyet nyo ṅete koret.
- <sup>41</sup>Mosukuyok Weritap cito Malaykanikiyi, kunyo mosukoruruc konum kukwane poytoyisyenyi piko tokol co nete piko kwiy miyotyey, oko piko tokol co yiye miyotyonyik,



- <sup>42</sup>oṅkuwirici wule mite oṅoṅtit nyepo mata nye loye, wule mowokuriryo om wuloto oṅkunyiy kelekwa.
- <sup>43</sup>Yoto kuye mosukuporkey pikap Yiyintet ce kelackey kulekececis topon kuyu asista om poytoyisyetap Papamwa. Kunyo olimnte ye oponte yitik ce olimnte, roke olimnte.’’
- <sup>44</sup>“Kerkey poytoyisyetap torot oko mokoryonti nye kicewuṅe mparen, nye kinyor citake, nteyu kowo kunyor kuwuny yec topon, Kuwo om ṅerekwek ce kiponto wokwalya tukuk tokol ce kiponto oṅkwale mparanato.’’
- <sup>45</sup>“Kerkey mpo yec poytoyisyetap torot oko ci nye kamonesintet nye ceṅoti karin nye piciy koromun.
- <sup>46</sup>Nteye koto wokunyoru akenke nye piciy kusir karik alak cepo kwak, kuwo wokwalya tukuk tokol ce kiponto oṅkwale karnanato piciy.’’
- <sup>47</sup>“Kerkey mpo yec poytoyisyetap torot oko porok ce cenöme purpurunek ce kocewirici tampayayet orit oṅkunäm purpurunek wok tokol.
- <sup>48</sup>Nteyu kowo kunyiw, kocut piko co nöme purpurunek kuco tampayayet tapan oṅkopur ṅony kulekwel ce toponec oṅnkukoci ntepenikwa oṅkuwirta co moponto latik.
- <sup>49</sup>Kunyo mosukuyuyit nyoto om pesyet nyo ṅete koret. Mosukupa Malaykanik saṅ oṅkoruruc piko ce miyotec kulekwene kwenutap piko ce toponec,
- <sup>50</sup>oṅkuwirici piko ce miyotec wule mite oṅoṅtit nyepo mata nye loye, wule mosukuriryo cek om wuloto oṅkunyiy kelekwa.’’
- <sup>51</sup>Kutepe Yesu kumwoci cek kule, “Konket akwek ra ṅalecutecu tokol?” Kuwekyi cek kumwoci kule, “Ee, Kacinket.’’
- <sup>52</sup>Kuwec Yesu kumwoci kule, “Kunyo poru ṅalecu kule, konetintetap ntarastinek ake tokol nye koweckey kwek konomintet nyepo poytoyisyetap torot kunye kerkey oko ci nyepo kanyi nye kewut konyi nyo konore tukukyi oṅkunum kukwa saṅ tukuk ce lela oko ce yoswakik.’’
- <sup>53</sup>Nteyu kowo kumwoy Yesu tyonkococutecu okoy kuwany, kunomene wuloto,
- <sup>54</sup>kuketitakey kuwo okoy kupunto moṅetap korenyi. Kunetisye kotapkokwemwa okoy kukite piko koromun ce kilim ṅelekyi, kutep cek kumwoy kule, “Kinyorta ono cici ṅomnononi? Nto mpo ṅalecu po kakitat?
- <sup>55</sup>Puryo kot ku weritap koswetintetap pawunek ne nyitenyi? Puryo kot ku weritap Mariyam ne nyitenyi? Nto mpo mutakwam ku mpo Yakopo oko Yosep oko Simon oko Yuta?
- <sup>56</sup>Puryo kot cepontekey acek ce minye tokol oko mpo cekwam? Kinyorta ono ne ṅalecu?’’



<sup>57</sup>Yoto kutay cekto Yesu. Kumwoci Yesu cek kule, “Ciyweye workoyo om wulyo ake tokol, ntene puryo kot ciyweye korenyi, oṅkupuryo kot kuyweye piko cepo kamwa.”

<sup>58</sup>Kipuryo kot kwiy Yesu om wuloto pelutok cepo kakitat ce caṅ, omnye kipuryo kuponto piko cepo wuloto koyenotet.

## Matayo 14

<sup>1</sup>Pesyosyecoto kuye kilime Erote poytoyintetap Kalilaya ṅalek ce kicemwowu ce nöme Yesu.

<sup>2</sup>Kumwoci neto mokorenikiyi kule, “Yowana potisonintet nyitenyi kupoyit manta nye kuṅet kotutune met, kunyi mite yawut kwiyisiyi swamet nye ponto kwiywe ṅalecu.”

<sup>3</sup>Omnye Erote kunye kimwoytoy cenäm Yowana oṅkkyerate nyororonik oṅkkyekerta mopusi, omnye kisac Erotiya korketap mutakwam Filipino.

<sup>4</sup>Kunyo kimwocini Yowana Erote kuwany pesyos ce caṅ kule, “Puryo kot kucöme ntarastinek kot müti nyi neto!”

<sup>5</sup>Kimöce Erote kule apakäc Yowana kume, ntene kuywey piko omnye kicöme piko kule workoyo Yowana.

<sup>6</sup>Nteye kipesyet nyewo nye kiceye Erote, kutum ceptap Erotiya om taytap toyek tokol. Yoto kuṅjerec Erote koromun.

<sup>7</sup>Kuwalkey kukurtoci cepoto kumwoy kule, “Kawalkey kule mosokonij ani nyi kiy ake tokol nye kesomo.”

<sup>8</sup>Om ṅomnonet nye kikoci kamet, yoto kusom cepoto kumwoy kule, “Kono ani om yuteyu pakenke metitap Yowana potisonintet nye mite sanit!”

<sup>9</sup>Kunerec kinko koromun yu kowo kulim ṅalecato, ntene om kawalet nye kokomwoy om taytap toyekyi, yoto kumwayta kule roke ceiyitoci ṅalekyi.

<sup>10</sup>Kumwayta ceyp metitap Yowana om mopusi.

<sup>11</sup>Cesut metit nye mite sanit oṅkwocikoci cepoto, kunäm nyo oṅnkusutyi kamet.

<sup>12</sup>Kukwa konomikap Yowana oṅkwokusut musyontet wokumuy; nto kapok kupa cekto wokumwoci Yesu.

<sup>13</sup>Ntowo kulim Yesu ṅalecato, kulany rapet oṅnkuwo okay surukwenet kwine nkit. Yoto kulim piko, kunomene moṅosyekwa kupete krenkok kurup cekto neto.

<sup>14</sup>Kurekune Yesu rapet om tampayayet tapan, ntowo kukäs neto luket nyepo piko ce caṅ, kurire kukalya om mukuleynyi, oṅnkusop pikwa ce kimnyontos.

<sup>15</sup>Ntowo kuponto pesyonoto kosoleny, kukwa konomik ye kimite Yesu oṅnkumwoci kule, “Nteyu kokwimen koret, kunyi surukwen wuli ce mite, kunyo yomis piko kupecikey wule mite kestonik sukuṅet wokwalat nkit omik ce mokwam.”





- <sup>16</sup>Kuwekyi Yesu kumwoci cek kule, “Puryo kot kuroke kot kupa, okoci akwek nkit kiye mokwam.”
- <sup>17</sup>Kuwec cek kumwoy kule, “Ceponte acek om yu mukatinek mut oko purpurunek oyeny pate.”
- <sup>18</sup>Kumwoy Yesu kule, “Osutu pa akwek kukwa yu omite ani.”
- <sup>19</sup>Yoto kumwoci Yesu piko kupor ñony om yepo suswek, oñnkunäm mukatinekey mut oko purpurunek oyeny oñnkunyal torot oñnkukasta kusomnci Yiyintet oñnkupetec mukatinekey oñnkukoci konomik, kunäm co oñnkupcici piko.
- <sup>20</sup>Kwomis piko tokol okoy kupiyonjis. Yoto koruruc konomik omik ce kakyam kot kujet kunyiw kisok taman ok oyeny.
- <sup>21</sup>Nto piko ce kikwomis kuce kirice kupunto moronik elifunek mut nye mneyitite koruk oko lekok.
- <sup>22</sup>Yoto kumwoci Yesu konomik kulany rapet kupa kuntowonu kway tampayayet pitonin ye kimite neto tokuyomise piko kupecikey.
- <sup>23</sup>Nteyu kowo kuyomis piko okoy kupa, kunomen kwine nkit kuwo lakam wokusom. Ntowo kupunto kosoleny kimite neto yoto wuloto kwine nkit.
- <sup>24</sup>Kimite rapet yoto kukopunto wule low kuceke koret. Kimite yoto rapet kuwulye peko ce kiwosekey omnye kiwuse yomet kuketu kuco let.
- <sup>25</sup>Ntowo kupunto komoy karik kuyec koret, kuco Yesu wule mite cekto kutyikonu peko parak.
- <sup>26</sup>Nteye kotoköse konomik neto kuconi kutyikonu peko parak, kumuyo koromun oñnkupol kumwoy kule, “Oyinot nyi!”
- <sup>27</sup>Yoto pakenke kujololyi Yesu cek kumwoci kule, “Otitir! Ani nyo, monte cemuye!”
- <sup>28</sup>Kuwekyi Petero kumwoci kule, “Mokoryontet, ye nyi nyo, mwowo ani aco wuloto atyikanu peko parak.”
- <sup>29</sup>Kuwekyi Yesu kumwoci kule, “Co!” Yoto kurekto Petero om rapet oñnkucec kutyikat peko parak kuwo wule mite Yesu.
- <sup>30</sup>Nteye kotoköse Petero yomet kumuy oñnkucec kolum peko neto. Yoto kukursyo kupol kumwoy kule, “Mokoryontet, Sorwo!”
- <sup>31</sup>Yoto pakenke kuyokoyto Yesu yewunyi oñnkunäm, oñnkumwoci kule, “Ponte nyi koyenot nye kisic! Omne semun nyi?”
- <sup>32</sup>Nteyu kowo kulany cek tukway rapet orit, yoto kuisis yomet.
- <sup>33</sup>Kukutuny konomik yoto om rapet oñnkusay Yesu kumwoy kule, “Yiku nyi manta Weritap Yiyintet!”
- <sup>34</sup>Kway cekto tampayayet okoy kupunto koretap Kenesaret.



<sup>35</sup>Kunket piko cepo wuloto Yesu. Yoto kuyokto cek cekwer piko ce kimnyontos ce kilekite koronoto kukwa wule mite Yesu.

<sup>36</sup>Kusom picoto Yesu kule kucömnci piko ce mnyontos kutwa mpo pate kototyeta sirenji. Yoto kusopco piko tokol ce kimnyontos ce kitwa sirenji.

## Matayo 15

<sup>1</sup>Yoto kukwa Farasayek oko konetikap ntarastinek ce kikwone Yerusalem okoy wule mite Yesu oṅkwokutepe kule,

<sup>2</sup>“Omne sukwirye konomikuk ntarastinek ce kikonec acek mpo kukonyo, omnye puryo kot kowune yewuniyek ye mokwomis?”

<sup>3</sup>Kuwekyi Yesu kumwoci cek kule, “Omne soyirye mpo akwek ntarastinekap Yiyintet aṅkawoke arup ntarastinekwok cepo keny?”

<sup>4</sup>Omnye mwowu Yiyintet kule, ‘Misyini ywey kon oko komet, nto ci ake tokol nye kaṅalale kwapi kwan nto kamet, kumisyini cepakäc cicoto kume.’

<sup>5</sup>Ntene onetisiyi akwek omwowu kule, ye komwoci citake kwan nto kamet kule, ‘Kwokoyte ani kwek kokotutek cepo Yiyintet pesanik tokol ce kotoyiisye akalyak akwek.’

<sup>6</sup>Kupuryo kot kurok kuywey cicoto kwan. Dalek ceyucutecu ce oyirye akwek ṅolyontetap Yiyintet saṅet arup ntarastinekwok cepo keny.

<sup>7</sup>Oyiku kaperperot! Po manta Isaya yo kiṅore ṅalek ce nömok akwek kumwoy kule:

<sup>8</sup>‘Mwowu Yiyintet kule, Yweyo ani picu om kutuwakwa pate, ntene mitowune mukuleywekwa wule low om wule omite ani.

<sup>9</sup>Puryo kot kuponto cek latik kusaya ani, omnye nete cekto ntarastinek ce kikwiye piko kuyunye po ntarastinek coto Yiyintet!’ ”

<sup>10</sup>Yoto kukur Yesu piko tokol kukwa ye mite neto oṅkwokwoci kule, “Olimnte, oṅkonket!

<sup>11</sup>Puryo kot ku kito nyo wute kutitap cito nye wurtoy cito kumiyatit; ntene kito nye cone kutinyi orit nye wurtoy cito kumiyatit.’ ”

<sup>12</sup>Yoto kukwa konomik ye kimite oṅkwokwoci kule, “Puryo kot nket nyi kule konyer Farasayek om ṅalek co kemwowu nyi?”

<sup>13</sup>Kuwec Yesu kumwoy kule, “Mosaicikor ket ake tokol nye kipuryo kot kutor Papamwani nyepo torot.


<sup>14</sup>Ayaste kwiyat nkit! Kantoyik cekto ce koryotin ce ntocini piko ce koryotin. Nteye kentoci cito nye korat citake nye korat, mosukosuci tukway mwenet.’ ”

<sup>15</sup>Kuwekyi Petero kumwoci neto kule, “Mwowec acek, poru ne tyonkoconi?”

<sup>16</sup>Kumwoci Yesu cek kule, “Tompo kot osowu mpo akwek opël piko alak?”



- 17**Puryo kot oṅket akwek kule kiy ake tokol nye kewut kutitap cito kunye weti moyet orit oṅnkupunte porto kupa saṅ?
- 18**Ntene tukuk ce kwone kutit kukwa saṅ kuce kwone coto mukuleyto orit. Tukuk ceyucoto kuce wurtoy cito kumiyatit.
- 19**Omnye kwone mukuleytag cito orit kasoteywek ce miyotec sukuṅet kuporis, kwiw sakwayanat, oṅnkwiw ṅalek alak tokol ce miyotec, kuyu nyoponisyet, oko mwiynanet, oko ṅomset.
- 20**Tukuk ceyucotecu ce wurtoy cito kumiyatit, ntene puryo kot kowurtoy cito ye komisye yewuniyek ce puryo kot ciwun.”
- 21**Kunomene Yesu wuloto oṅnkuwo okoy kupunto koret nye lekite moṅosyekap Tiro oko Siton.
- 22**Yoto kuco korko nyepo koretap Kanan nye kiminye wuloto wule mite Yesu, oṅnkupol kumwoy kule, “Mokoryontet, Weritap Tauti! Kalya rirena ani! Ponto cepnyu oyinot nye kinām, kunyo mite kwapi koromun.”
- 23**Ntene kuis Yesu nye monowekyi ṅolyo. Kukwa konomikyi ye kimite Yesu oṅnkumwoci kule, “Kwet korkoni kuwecikey, omnye kenamatec oṅnkupolcec kuyunyi!”
- 24**Yoto kuwec Yesu kumwoy kule, “Kiciyokwo ani aco pate wule mite kecirek cepo kotap Israel ce kipoty.”
- 25**Yoto pakenke kuco korkonoto oṅnkukutuṅe yepo kerekokap Yesu oṅnkumwoy kule, “Mokoryontet, kalya ani!”
- 26**Kuwec Yesu kumwoy kule, “Puryo kot kutopon ye kacenām omikap lekok oṅnkyewirci ṅokik.”
- 27**Kuwec korkonoto kumwoy kule, “Mokoryontet, yunyoto manta, ntene nka mpo ṅokik kwome omik ce koṅet ce lelektoy om mesetap mokoryontemwa.”
- 28**Kuwekyi Yesu kumwoci korkonoto kule, “Cepyosyani ponte nyi koyenot nyewo koromun! Kunyo mokwiyokis kuyu wulo moktoy nyi.” Kusop cepnyi yoto pakenke.
- 29**Kunomene Yesu wuloto oṅnkuwo kurup tampayayet Kalilaya tapan. Yoto kulany lakamet parak oṅnkupur ṅony.
- 30**Kukwa luket nyepo piko ce caṅ wule kimite neto ce kikweru piko ce mwolyos, oko ce kikoryo, oko ce kipok kerekok, oko ce kimiṅitu, oko piko alak ce caṅ ce kimnyontos, oṅnkwokutore yepo kerekokap Yesu. Kusop Yesu picoto tokol.
- 31**Kokite piko koromun yu kowo kukās kuṅolole piko ce kimiṅitu, oṅnkusopco piko ce kikipok kerekok. Kupesetoti piko ce kimwolyos, oṅnkukāsta piko ce kikikoryo konyek. Yoto kukasta cek Yiyintetap Israel.
- 32**Kukur Yesu konomik kukwa ye kimite neto, oṅnkumwoy kule, “Orire ani akalye picu tokol, omnye pesyet nyepo somok nyi opontekey oko cekto, kunyo puryo kot



kuponto omik ce mokwam. Puryo kot omöce kule omwoci kupecikey kuponto rupet, omnye muce kumistot om aran ye mite kupeti.”

<sup>33</sup>Kutepe konomik Yesu kule, “Mocenyorte acek ono omik ce mocepaye picu tecu tokol om surukwenoni?”

<sup>34</sup>Kutepe Yesu cek kule, “Oponte akwek mukatinek ata?” Kuwekyi cek kumwoci kule, “Ceponte mukatinek tisap oko purpurunek tukusic ce minkec.”

<sup>35</sup>Kumwoci Yesu piko tokol kopur nyony,

<sup>36</sup>oñnkunäm mukatinekey tisap oko purpurunekey, oñnkuosomnci kukasta Yiyintet, oñnkupetec oñnkukoci konomik, kunäm co oñnkupcici piko.

<sup>37</sup>Kwomis piko tokol okoy kupiyonjis. Yoto kururuc konomik omik ce kojet okoy konyit kisok tisap.

<sup>38</sup>Nto cojintap piko ce kyomis kuce piko moronik elifunek amwan nye mneyitite koruk oko lekoc.

<sup>39</sup>Ntowo kupok, kuyomis Yesu piko kupecikey, oñnkulany rapet kunomen okoy koretap Makatan.

## Matayo 16

<sup>1</sup>Kukwa Farasayek oko Satusayek wule mite Yesu ce kimöce kule cesyem celotu Yesu. Yoto kusom cekto neto kwici cekto pelutyet nyepo kakitat nye cone torot nye poru swameta Yiyintet.

<sup>2</sup>Ntene kuwekyi Yesu kumwoci cek kule, “Ye roroktoy asista, omwowu akwek kule, ‘Mosukunyol koret omnye kararnit koret.’


<sup>3</sup>Nteye kayec korir koret, omwowu akwek kule, ‘Mosukuropen koret omnye katuyit oñnkumite polyet nyewo, koret.’ Oñnket akwek añor tukuk ce mokwiyokis ye kokäs koret parak, oñnkurok kupuryo kot omuci kot añor pelutok ce yiyoktos om pesyosyecu.”

<sup>4</sup>Kutosyi Yesu kumwoy kule, “Piko cepo pinta nyepo pesyosyecu kuce piko ce miyotec, oñnkupuryo kot kuponto koyenot! Osono ani akwek pelutyet nyepo kakitat? Ntene puryo pelutyet ake nyepo kakitat nye mociporci tos pate pelutyet nyepo kakitat nyepo Yona.” Yoto kupakakta Yesu cekto oñnkunomen kuwecikey.

<sup>5</sup>Kukwa konomik okoy kwoy tampayayet pitoni. Yoto kuyutye cek manamat mukatya mpo akenke.

<sup>6</sup>Kumwoci Yesu cek kule, “Oripkey wule mite mumarekap Farasayek oko mumarek cepo Satusayek.”

<sup>7</sup>Yoto kucec konomik kurwoc kwicek nkit kumwoy kule, “Komwoy kuyunyi so, omnye mnacekwante acek mukatinek?”





- <sup>8</sup>Konket Yesu ñalek ce kiñolole cek. Yoto kutepe kule, “Omne sorwoc akwek nkit omwowu kule moceponte mukatinek? Oponete akwek so koyenet nye miniñ!
- <sup>9</sup>Tompo kot osowu akwek okoy kunyi oñket? Puryo kot osoti akwek yo kyopeteci ani mukatinek mut oñkopcici akwek piko elifunek mut. Kyoruruc yoto kunyiw kisok ata?
- <sup>10</sup>Nto mpo mukatinek tisap co kyopcicini akwek piko elifunek amwan? Kyoruruc akwek yoto kunyiw kisok ata?
- <sup>11</sup>Omne sumosowu oñket kule kopuryo kot oñlolwok ani ñalek ce nöme mukatinek? Oripkey wule mite mumarekap Farasayek oko mumarek cepo Satusayek!”
- <sup>12</sup>Kusow konomik yoto kunket kule kopuryo kot kumwocini Yesu cekto kuripkey om wule mite mumarek co cetonkwortoy mukatinek, ntene komwocini kuripkey cek wule mite konetisyetap Farasayek oko Satusayek.
- <sup>13</sup>Yoto kuwo Yesu okoy kupunto koret nye lekite moñetap Kaysariya nyepo Filipi, kutepe neto konomiky om wuloto kule, “Mwowu piko kule Weritap cito ku ño?”
- <sup>14</sup>Kuwec cek kumwoy kule, “Mwowu piko alak kule, ‘Yiku nyi Yowana potisonintet,’ kumwowu alake kule, ‘Yiku nyi Eriya.’ Nto alak kumwowu kule, ‘Yiku nyi Yeremiya’ nto workoyontet ake.”
- <sup>15</sup>Kutepe Yesu cekto kule, “Nto akwek, omwowu akwek kule oyiku ani ño?”
- <sup>16</sup>Kuwec Simon Petero kumwoy kule, “Yiku nyi Dapanet Weritap Yiyintet nye sopot.”
- <sup>17</sup>Kuwekyi Yesu kumwoci neto kule, “Ponte nyi kupeyok Simon weritap Yona! Omnye puryo kot ku ci nye koñonñ nyi ñaleca, ntene Papamwani nye mite torot nye koñonñ.
- <sup>18</sup>Komwowuñ ani kule, yiku nyi Petero (nye poru kule kitawet) kunyo mosatec ani kitawani komwani, coto kuce pikap Yiyintet, nye puryo kot komuce met kenysis.
- <sup>19</sup>Mosokonñ ani nyi funkuwonok cepo poytoyisyetap torot, kunyo kiy ake tokol nye kerat nyi tay om wuli po koret ñony, mosicetay kuratakay kiyoto om wulin po torot, nto kiy ake tokol nye ketyac nyi om wuli po koret ñony, mosicityac kiyoto om wulin po torot.”
- <sup>20</sup>Yoto kumwoci Yesu konomik kunkolontyi kule puryo kot kuroke kumwoci citake tokol kule neto kunye Dapanet.
- <sup>21</sup>Kuceke pesyonoto kuwo tay, kucec Yesu kumwoci kutorci konomik kule, “Misyino ani awo Yerusalem oñkuwatañany toñonñutek ce cañ om wule mite poyik oko tisik cewoyec oko konetikap ntarastinek. Mosicepakäca, nto ye pesyet nyepo somok, mosicineta otutune met.”



<sup>22</sup>Kukwer Petero Yesu kuwo tapan oṅkupolyi kumwoci kule, “Mokoryontet, yaste, puryo kot kuroke kwi yokis ṅolyo nye yunyo om wule mite nyi mpo kisic!”

<sup>23</sup>Kuwekyikey Yesu oṅkumwoci kule, “Wete yu omite ani Setani! Yiku konokut nye kerektoy aremwani, omnye puryo kot kupo kasoteywek cekuk Yiyintet, ntene po piko!”

<sup>24</sup>Yoto kumwoci Yesu konomiky kule, “Ye möce citake tokol kule cepetekey oko ani, kumöce kunyilkey cicoto nkit, oṅkunäm kutor murtowontenyi oṅkuco cokunama cepetekey oko ani.

<sup>25</sup>Omnye ci ake tokol nye möce kule osoru sapon nyi, mosukupot cito nyoto sapon nyi, ntene ci ake tokol nye kepot saponny omnye kacäma ani, mosukusor cito nyoto sapon nyi.

<sup>26</sup>Muce ra kunyor cito latik ne ye keyum koret tokol kumukul, ntene oṅkupot sapon nyi. Nto muce cito kwalya kiy ne sukuṅet kwale soponto.

<sup>27</sup>Omnye mosukuco Weritap cito kucontoy woyintap Papani oko nyepo malaykaniky, oṅkuco cokuyokyi citake tokol kuyu wule yunto yisyonutekyi ce kikwi!

<sup>28</sup>Komwowok ani akwek ṅalek cepo manta kule, mite piko ce keyoṅ yuteyu ce puryo kot kupoku kutompo kot kukäs cekto Weritap cito kuconi om poytoyisyenyi.”

## Matayo 17

<sup>1</sup>Nto om letut nyepo pesyosyek lö, kukwer Yesu Petero oko Yakopo oko mutakwam Yowana kupa tulwet nye koy kwicek nkit.

<sup>2</sup>Nteye kimite cek kuköse om konyekwa, kuwälkey tontap Yesu om taymwacek, kulekecec tokoyta nyenyi kukerkeyit asista, oṅkulekececis sirokyi koromun.

<sup>3</sup>Yoto kukäs konomik coto somoku kuṅolole Yesu oko Eriya.

<sup>4</sup>Kuṅalal Petero kumwoci Yesu kule, “Mokoryontet, kiy nye topon omnye ce mite acek yuteyu, ye kecäm nyi, mosatec ani kisarinek somok, mokwek ake nyeṅṅ, kupoyit ake Moses, kupoyit ake Eriya.”

<sup>5</sup>Nteye kimite Petero tokuṅolole, kuco polyet nyelel koromun oṅnkulum cek, yoto kucone kutit polyet orit kuṅalal kumwoy kule, “Nyi kunye Werimwani nkit Camanet nye oṅerekyini ani koromun, olimnci neto!”

<sup>6</sup>Ntowo kulim konomik kutit, kumuyo koromun okoy koputyi ṅony kukutuny kuwec metewokwa kukäs ṅony.

<sup>7</sup>Kuco Yesu okoy ye kimite cekto oṅkunäm kumwoci kule, “Oṅetye, monte cemuye!”

<sup>8</sup>Yoto kukästa cek ntene kipuryo kot kukäs citake tokol, wokwek Yesu nkit pate nye kikäs cekto.



- <sup>9</sup>Nteye kimate kukwoni kurekune tulwet; kumwoci Yesu kunkolontyi cek kule, “Monte cemwoci citake tokol ḡolyontoni kokäs akwek okoy ye kacinet Weritap cito kotutune met.”
- <sup>10</sup>Kutepe konomik Yesu kule, “Omne sukumwowu konetikap ntarastinek kule, Eriya nye mosukunyosyo kuco kunyo?”
- <sup>11</sup>Kuwekyi Yesu kumwoci cek kule, “Manta, Eriya kunye mosukunyosyo kuco kunyo cokusat tukuk tokol kunyol topon.
- <sup>12</sup>Ntene komwowok ani akwek kule, kico Eriya keny, ntene kipuryo kot kusow piko konket neto, ntene kwici cek neto ḡalek pate kuyu wule kimoktoy.”
- <sup>13</sup>Kusow konomik yoto konket kule ḡololyini Yesu ḡalek ce nöme Yowana potisonintet.
- <sup>14</sup>Ntowo kukwa cek okoy kupun ye kimate piko ce caḡ, yoto kuco citake ye kimate Yesu oḡnkukutuḡe yepo taynyi,
- <sup>15</sup>oḡnkumwoy kule, “Mokoryontet rire kalye werimwani nye me mewuḡ, nye kikotaḡany koromun, wircini mata okokoy oko peko orit.
- <sup>16</sup>Kokweru mpo kuco wule mite konomikuk, ntene puryo kot komuc cek kot kusop.”
- <sup>17</sup>Kuwec Yesu kumwoy kule, “Oyiku akwek pic ce puryo kot kucömisyi oḡnkoyiku mosotin, mosamuyte ani opur okoy pesyo ne? Kweru werit kuco yu omite ani!”
- <sup>18</sup>Kupolyi Yesu oyinot, yoto kuḡet kuwo, kusop weroto om yoto pakenke.
- <sup>19</sup>Yoto kukwa konomik ye kimate Yesu om wule wuḡat oḡnkutepe kule, “Omne simo cimuc acek kot cekwet oyinot kuwo?”
- <sup>20</sup>Kuwekyi Yesu kumwoci cek kule, “Omnye puryo kot oponte akwek koyenot nye yeme. Komwowok ani akwek kule, nto kwoponte akwek koyenotet nyewo nye kerkey oko kupuswontetap ketit nye cekure Kalitarit, nto omuci kot omwoci tulwoni kule, ‘Ḍeyakisye oḡnkiwo wulin! Mosukuḡet kuwo wuloto! Kunyo nto omuci akwek kot ayiy kiy ake tokol.’
- <sup>21</sup>[Puryo aret ake tokol nye cimuce cekwete oyinot nye yunyi, ntene om somet oko kirisyetap omik pate nye muce.] ”
- <sup>22</sup>Nteyu kowo kutuyo konomik tokol om Kalilaya, kumwoci Yesu cek kule, “Karik cenäm Weritap cito oḡnkyikoci kunäm piko.
- <sup>23</sup>Mosicepakäc kume, nteye pesyet nyepo somok ciḡet kotutune met.” Kunyer konomik koromun.
- <sup>24</sup>Ntowo kuco Yesu oko konomiky i okoy kupun Kapernaum, kukwa piko co ruruce mosoret nyepo kotap Yiyintet ye kimate Petero oḡnkutepe kule, “Kweye ra konetintemwoḡ mosoret nyepo kotap Yiyintet?”



<sup>25</sup>Kuwekyi Petero kumwoci cek kule, “Kweye”. Nteyu kowo kuwo Petero koto orit, kunyosye Yesu kuṅololyi neto kumwoci kule, “Simon, soti kulene? Piko oṅnkoco ce kwecini mosoret kinkonik cepo koret? Pikap koret nto piko co toyek?”

<sup>26</sup>Ntowo kuwec Petero kumwoy kule, “Toyek” Kumwoci Yesu neto kule, “Kunyo porukey kule puryo kot kukweye pikap koret mosoret.

<sup>27</sup>Ntene puryo kot ce möce acek kule kunyer picu, kunyo nām rapanet oṅnkiwo tampayayet wenōmisye, nto purpuryontet nye kenyosye nām kuco saṅ, ṅany kutit, mesenyorte pesyantet nye yeme mosoret nyimwani nyepo kotap Yiyintet oko nyeṅṅ. Sutyi cek wekwewec mosorenyo.”

## Matayo 18

<sup>1</sup>Yoto pakenke kukwa konomik ye mite Yesu oṅnkutepe kule, “Do nyewo kupēlis om poytoyisyetap torot?”

<sup>2</sup>Kukur Yesu lekwa nye miniṅ oṅnkukoci kuyone taymwacek oṅnkumwoy kule,

<sup>3</sup>“Komwowok ani akwek ṅalek cepo manta kule, ye puryo kot aweckey akwek akerkeyitu oko lekoy, kupuryo kot omuci mpo kisic kot owut poytoyisyetap torot.

<sup>4</sup>Cito nyewo kupēlis om poytoyisyetap torot kunye cito nye sutekey nkit ṅony kukerkeyit oko lekwani.

<sup>5</sup>Nto cito nye katoroc kuṅerekyi lekwa akenke nye yunyi om kaynemwani kukatoroca kuṅerekyo ani cito nyoto.”

<sup>6</sup>“Nteye kamas kuwec ci ake tokol lekoy ce minkec ce yucu yeno ani kot kwiy lelisto, kuroke ceroty katitap cicoto rwantetap paka nyewo oṅnkyewirci ruretyet orit kusir ye ketewurtoy lekocu.

<sup>7</sup>Mite kwapi koret nyi mite tukuk ce wece piko kwiy miyotyey! Mosukwiyokis tukuk ceyucoto, ntene mite kwapi cito nyo sutu kwiyokis tukucoto!

<sup>8</sup>“Ye yewuṅṅ nto kerenkeṅṅ nye sokyin nyi ye sewurte, yepte kulot oṅnkiwirte! Omnye kaykay ye kewo nyi wule mite soponto nye meponte yewut ake nto kerenket ake kusir ye kerip yewuniyek tukway oko kerekok tukway oṅnkyewircin wule mite mata nye momise.

<sup>9</sup>Nteye koṅnta nyeṅṅ nye sokyin nyi ye sewurte, lotu kulot oṅnkiwirte! Omnye kaykay om wule mite nyi ye kewut wule mite soponto ponte koṅnta akenke pate kusir ye ponte konyek tukway oṅnkyewircin wule mite mata nye momise.”

<sup>10</sup>“Möce okās kule monte cenyil mpo akenke om lekok ce minkec ceyucu, omnye komwowok ani akwek kule, mite malaykanikwa om torot cepure okokoy taytap Papamwani.

<sup>11</sup>[Omnye kico Weritap cito kule cosoru osop piko ce kipoty.]



- 12“Osoti akwek kulene? Mosukwiw kulene citake nye ponto kecirek pokol akenke onkput akenke om coto? Puryo kot kupokoktoy neto cut tomonwokik sokol ok sokol kupokokoyi lakamet komos onkuwo kucejat nyoto akenke nye potot?”
- 13Komwowok ani akwek kule, nteye kanyor kuṅerekyini keciryet nyoto akenke kupel cut tomonwokik sokol ok sokol co puryo kupoty.
- 14Kunyo om aret nye yunyoto kunye poru kule puryo kot kucöme Papamwoṅ nye mite torot kule kupot mpo akenke om lekok ce minkec ceyucu.
- 15“Ye kokwiwuṅ yeyauṅ miyotyey, roke iwo wule mite neto onkiporci lelisnyi, ntene ayiy kuyunyoto om wule wuṅat ye akwek nkit. Nteye kolimuṅ ṅalek kukewec yoto yeyauṅ.
- 16Ntene ye katay molimuṅ, roke kwer opetekey citake nto piko alak oyeny sukuṅet kuporkey kutok ṅolyo ake tokol nyepo manta cepo piko muncururwanik oyeny nto somok, kuyu wulo mwoytoy silutekap Yiyintet.
- 17Ntene nteye katay neto molimnci picoto ṅalek, roke mwoci ṅalecato tokol pikap Yiyintet. Nteye kotepe kot kutay molimnci mpo ṅalek pikap Yiyintet, roke sut nyi neto kwek ci nye lomin, nto kwek ci nye korurukintetap mosoret nye kicetay.
- 18“Kunyo komwowok ani akwek tokol kule, ṅalek tokol ce korat akwek om wuli po koret ṅony, mosicerat ṅalek coto om wulin po torot. Nto ṅalek tokol ce kotyac akwek om wuli po koret ṅony, mosicityac coto om wulin po torot.
- 19“Komwowok ani akwek yec kule, ye kocömcine piko oyenku om ṅolyo ake tokol nye kosom om wuli po koret, mosukwiwok Papamwani om torot.
- 20Omnye om wulyo ake tokol wule keyomekey piko oyenku nto somok om kaynemwani omite ani yoto po kwenumwa.”
- 21Yoto kuco Petero ye kimite Yesu onkutepe kule, “Mokoryontet, omuci akalye yeyamwani aret cetya ye kalel om wule omite ani? Omuci akalye aret tisap?”
- 22Kuwekyi Yesu kumwoci kule, “Puryo kot omwowuṅ kule aret tisap, omwowuṅ kule aret tomonwokik tisap aret tisap.
- 23Omnye kerkey poytoyisyyetap torot oko kinko nye kamac kule oyit pesenutekyi ce ponto mutworiky.
- 24Nteye kimite kuyitisiy, cekwercei neto cito akenke om picoto nye kiponto pesento nyepo pesanik ce caṅ koromun.
- 25Kipuryo kot kuponto cicoto pesanik ce yeme ce mokuyokune pesento. Kumwayta yoto mokoryontenyi kule kyalya cicoto kwek mutworin oko korkenyi oko lekokyi oko tukuk tokol ce kiponto sukuṅet kuyok pesento.
- 26Kukutuny mutworintonoto om taytap mokoryontenyi onkusaysay kumwoci kule, ‘Muytowo ani kuminiṅ, mosoyokuṅ tukuk tokol!’
- 27Yoto kurire Mokoryontet cicoto okay kukalya pesento, onkwasta kuwecikey.





<sup>28</sup>“Kuwo mutworintonoto okoy wokunyor mutworintet ake nye kiyoce neto pesan ce ñeri pate. Kurotyi kunäm nyin katit oñnkuket oñnkumwoci kule, ‘Yokwo ani pesennyu nye ponte!’

<sup>29</sup>Kukutuny mutworintet nyin oñnkusaysay kumwoci kule, ‘Muytowo ani kuminiñ, mosoyokuñ pesenñuñ!’

<sup>30</sup>Ntene kutoyis nyin, kunäm nyin oñnkukoyito cekwer weceroty mopusi kule okoy kuyok pesento.

<sup>31</sup>Ntowo kukäs mutworik cut alake ñalek ce kokwiyokis, kunerekis kunyer koromun oñnkupa wokumwoci mokoryontemwa ñalek tokol.

<sup>32</sup>Yoto kukur mokoryontet mutworintonoto oñnkumwoci kule, ‘Yiku nyi mutworin nye miyat! Kyakalyiñ pesentye tokol yo kisoysoyo ani nyi.

<sup>33</sup>Kunyo puryo kot kurokeniñ rire kalye mutworintet nyin kuyu wulo kyokolyiñ ani nyi?’

<sup>34</sup>Kunyer mokoryontenyi yoto, kunäm oñnkukoyito mutworintonoto wocerat citañany okoy kuyok pesento tokol.’”

<sup>35</sup>Kumwoy Yesu kule, “Kunyo yunyoto wule mosukwiytak akwek Papamwani nyepo torot, ye puryo kot kukolyoy ci ake tokol om akwek yeyanyi om mukuleynyi.’”

## Matayo 19

<sup>1</sup>Yoto ntowo kuñalal Yesu okoy kuwany ñalecato, kunomene Kalilaya oñnkuwo kuketitakey okoy kupunto koretap Yuteya om oyinetap Yortan pitonin.

<sup>2</sup>Kurup luket nyepo piko ce cañ neto. Kusop Yesu cekto om wuloto.

<sup>3</sup>Kukwa Farasayek alake wule mite Yesu oñnkwokusyem kulot kutepe kule, “Cömncini ra ntarastinekyo cito kukwet korkenyi om ñolyo ake tokol?’”

<sup>4</sup>Kuwec Yesu kumwoci cek kule, “Tompo kot asuman akwek silutekap Yiyintet co mwowu kule: ‘Kitany Yiyintet om towunot moron oko korko?’

<sup>5</sup>Oñnkumwoy kule, ‘Om ñolyontoni, kuye sukuñet kupakakta cito kwan oko kamet oñnkuyomokey oko korkenyi, kwek picoto oyenku porto akenke.’

<sup>6</sup>Kunyo komo ku pic oyeny, ntene kokwek porto akenke. Kunyo puryo kot kumisyini kupciy cito piko ce kikoyomo Yiyintet.’”

<sup>7</sup>Kutepe Farasayek neto kule, “Kunyo omne sukukon Moses ntarastit nye muce kusil cito parwet nye kwetisy oñnkukwet korket kuwecikey?’”

<sup>8</sup>Kuwekyi Yesu kumwoci cek kule, “Kicömwok Moses akwet korukwok omnye oyiku wuyec koromun ye mocinetak. Ntene kipuryo kot kuyunyo ikye kunyo ye kicitonye koret.



- <sup>9</sup>Kunyo komwowok kule, ye kakwet citake tokol korkenyi, tos pate ye kasakwayan, oṅnkomüt ake kakwiw cicoto sakwayanat.”
- <sup>10</sup>Kumwoci konomikyi neto kule, “Kunyo ye yunyo kopurto nyepo moron oko korkenyi, kupuryo kot kumisyini cekesyi koruk!”
- <sup>11</sup>Kuwec Yesu kumwoy kule, “Puryo kot kunöme ṅolyontoni ci tokol, ntene po piko pate co kikokoci Yiyintet.
- <sup>12</sup>Omnye mite ṅalek wok ce caṅ omne simokesyi ci tokol. Mite piko alake ce kiceyi kuyunyoto, kumite piko alake ce kikwiw piko sukuṅet kopur kuyunyoto, kumite piko alake ce puryo kot kukesyi omnye kicäm nkit om toponiyet nyepo poytoyisyetap torot. Kunyo möce kucäm ṅolyontoni cito nye cöme nkit.”
- <sup>13</sup>Kukwer piko alake lekok kukwa wule mite Yesu kule sukuṅet kukemer neto yewuniyekyi metewokap lekokoto oṅnkusomnci, ntene kupolyi konomik kukereka picoto.
- <sup>14</sup>Kumwoy Yesu kule, “Ayaste lekok kukwa wule omite ani, monte cekerekte omnye po poytoyisyetap torot lekok ceyucutecu.”
- <sup>15</sup>Kukemer Yesu yewuniyekyi metewokap lekokoto, oṅnkunomen kuwecikey.
- <sup>16</sup>Yoto kuco citake oṅnkutepe kumwoy kule, “Konetintet, mosaiyy ne ani ye sanyoru soponto nye mopoku?”
- <sup>17</sup>Kuwekyi Yesu kumwoci neto kule, “Omne setepena ani nyi ṅolyo nye nöme toponiyet? Mite cito akenke pate nye topon. Rip ntarastinek ye möce kule sonyoru soponto nye mopoku.”
- <sup>18</sup>Kutepe cicoto Yesu kule, “Ntarastinek oṅnkoco?” Kuwekyi Yesu kule, “Mente oporisye, mente asakwayan, mente acorsye, mente operperisye,
- <sup>19</sup>ywey kon oko komet, oṅnkicäm latyeṅuṅ kuyu wulo cömntoykey nyi nkit.”
- <sup>20</sup>Kuwekyi oyiperyontonoto kumwoci neto kule, “Kyorip ntarastinek coto tokol, kiy ne ake yec nye potwo ani?”
- <sup>21</sup>Kumwoci Yesu neto kule, “Ye möce kule onyolu, iwo weyalye tukuk tokol ce ponte oṅnkikoci pesanik pononik; mesenyoru mokoryontit om torot, oṅnkico cenäma cepetekey oko ani.”
- <sup>22</sup>Ntowo kulim oyiperyontonoto ṅalecato, kunomen kunerekat kuwecikey omnye kimokoryo nye kiponto tukuk ce caṅ.
- <sup>23</sup>Kumwoci Yesu konomikyi kule, “Komwowok ani akwek ṅalek cepo manta kule, mosukuwuyit koromun yemo kowut cito nye mokoryo poytoyisyetap torot.
- <sup>24</sup>Komwowok ani akwek yec kule, lekit kupunte nkamiyet koṅntap sintanit kusir ye mokowut cito nye mokoryo nye ponto tukuk ce caṅ poytoyisyetap Yiyintet.”



<sup>25</sup>Nteye kotolime konomik ñalecato, kokite koromun oñkutep kumwoy kule, “Ku ño nyun cito nye cimuce kot cisop?”

<sup>26</sup>Kurotot Yesu cek, oñkuwec kumwoy kule, “Puryo kot komukoktos om wule mite piko, ntene mukoktos kiy ake tokol om wule mite Yiyintet.”

<sup>27</sup>Yoto kuwekyi Petero kumwoci neto kule, “Käs pa, kicepakakte acek tukuk tokol oñkynamiñ nyi. Mosicenyoru acek ne?”

<sup>28</sup>Kumwoci Yesu cek kule, “Komwowok ani akwek ñalek cepo manta kule, om pesyosyek cepo kenyit nyelel, ye mosukupure Weritap cito ñecerenyi nyewo nyepo woyinto, yoto ye mosopure mpo akwek konomikwani cu taman ok oyeny ñecerok oñkomutyi musankunek arosyek taman ok oyeny cepo pikap Israel.

<sup>29</sup>Nto om wule citake tokol nye kapakakta korik, nto mpo mutakwam, nto mpo cekwam, nto mpo kwan nto kamet, nto lekok, nto mosonok, omnye kacäm kaynemwani, mosukunyor cito nyoto cetosyi aret pokolwokik ce cañ, oñknyikoci soponto nye mopoku.

<sup>30</sup>Ntene piko ce cañ ce mite yawut tayta, kuce mosukwokupoyit coto letut, nto piko ce mite yewut letut, kuce mosukwokupoyit coto tayta.”

## Matayo 20

<sup>1</sup>“Kerkey poytoyisyetap torot oko citap mparet nyepo ketik ce cekure sapipunek, nye kimusta kororn kuwo wokusil kopotik ce kepat mparenyi nyepo sapipunek.

<sup>2</sup>Yoto kucömncin cicoto oko kopoticoto kule kukoci neto cekto silinkit akenke om yisyet nyepo pesyet akenke, oñnkumwoci picoto kupa wokopotis mparetap sapipunek.

<sup>3</sup>Kuwo cicoto yec motepo ye kimite sawet somok nyepo kororn, wokunyor piko alak ce kimite keyoñ pate nye puryo yisyo nye yiye.

<sup>4</sup>Kumwoci coto kule, ‘Ape mpo akwek woyiyisye mparetap sapipunek, mosokonok ani pesanik ce yeme.’

<sup>5</sup>Yoto kupa cek. Kwiy cicoto kuyunyoto kuwo sañ ye kimite sawet pet kwen, oko yec ye kimite sawet sokol nyepo kosoleny.

<sup>6</sup>Nteye kimite sawet karik kupunto taman ok akenke nyepo kosoleny kuwo cicoto motepo wokunyor yec piko alak ce kimite keyoñ pate, kutepe kule, ‘Omne sawurte akwek pesyet opurene yu nye puryo yisyo nye oyiye!’

<sup>7</sup>Kuwekyi picoto kumwoci neto kule, ‘Omnye puryo ci nye kokonec acek yisyo nye mokyiy.’ Kumwoci cicoto cek kule, ‘Kunyo, ape mpo akwek woyiyisye mparetap sapipunek.’

<sup>8</sup>“Ntowo kupunto kosoleny, kumwoci citap mparet cinyi nyewo kule, ‘Kur kopotik kukwa oñkkipcici musyaremwa cece piko co kopo letut oñkuwewañnte piko co kopo tay co konyosyi kwiyis.’



- <sup>9</sup>Kukwa piko co kocec yisyet ye kimite sawet taman ok akenke, cikoci ci tokol silinkit akenke.
- <sup>10</sup>Yoto ntowo kukwa piko co konyosyi kwiysis yisyet kule cekonec pesanik, kusot co kule toskoy mocenyoru ce caṅ, ntene cikoci mpecek ci tokol silinkit akenke.
- <sup>11</sup>Ntowo kunäm cek pesanikwa, kuṅunyṅunyis om wule mite citap mparet,
- <sup>12</sup>kumwoy kule, ‘Kokwiyis piko cu kokwoni letut kuwany sawet akenke pate, kunyi keyoyekenec acek koci pesanik cete cicacek oṅnkurok kokyiyisye acek kupelec asis kwimen!’
- <sup>13</sup>Kuwekyi citap mparet kumwoci cito akenke om picoto kule, ‘Corwenyu, puryo kot kukolotuṅ ani, kopuryo kot cecömcine kunyo kule yiy nyi yisyet nyepo silinkit akenke?’
- <sup>14</sup>Kunyo näm silinkit nyeṅṅ oṅkiwecikey kaṅṅ, omöce ani kule akoci cito nyi kocece yisyet letut pesanik cete co kokoniṅ nyi.
- <sup>15</sup>Puryo kot oponte ani ne kamukeywek ce oyiyisye pesanikwani kuyu wule omoktoy? Nto kecoroku nyi so pate omnye kokolyoyisye ani.’ ”
- <sup>16</sup>Kutosyi Yesu kumwoy kule, “Kunyo mosukwokupoyit piko co mite letut tayta, kupoyit piko co mite tayta letut.”
- <sup>17</sup>Nteye kimite Yesu kuweti kuloṅntoy Yerusalem, yoto kukwer konomiky i taman ok oyeny kupa tapan, oṅknuṅololyi cek nkit möt kupeti om aran.
- <sup>18</sup>Kumwoci kule, “Cemite cepeti celoṅntoy Yerusalem wule mowocenäme Weritap cito oṅknyekwer kuwo wule mite tisik cewoyec oko konetikap ntarastinek. Mosukuwosontyi co oṅnkumutyi musankut cepakäc kume,
- <sup>19</sup>oṅknyikoyito kuwo wule mite lamek ce mokucup, oṅkupas oṅknuwuytoci murtowontet, nteye pesyet nyepo somok ciṅet kotutune met kusop yec.”
- <sup>20</sup>Yoto kuco kametitap werikap Sepetayo oko weriky i okoy ye kimite Yesu, oṅnkukutuṅnyki kusom kule cecäma.
- <sup>21</sup>Kutepe Yesu neto kule, “Möce nyi ne?” Kumwoy kule, “Kurtoci mwowu kule, mosukopure werikwani cutecu oyenku ake yewuṅṅ nyepo tay nto ake kopurune yewuṅṅ nyepo let om poytoyisyenṅ.”
- <sup>22</sup>Kuwekyi Yesu kumwoci cek kule, “Puryo kot oṅnketi akwek kito nye osome. Omuci akwek kot opunte toṅoṅutek ce karik opunte ani?” Kuwec cek kumwoy kule, “Cimuci”.
- <sup>23</sup>Kumwoci Yesu cek kule, “Manta mosopunte toṅoṅutekwani, ntene puryo kot oponte ani kamukeywek akwey cito nye mokopurune yewumwani nyepo tay oko yewumwani nyepo let, po pate oteputek co piko co kikwiytoci Papamwani.”
- <sup>24</sup>Ntowo kulim konomik cut tamanu ṅalecato, kunyeri picoto oyeny ce kitupco.



<sup>25</sup>Yoto kukur Yesu cek tokol kukwa ye kimite neto oṅnkumwoci kule, “Oṅnket akwek kule, poytoyik cepo Lamek kuce ponto kamukeywek kupayta piko, kunyo poytoy cek piko.

<sup>26</sup>Ntene puryo kot kuroke kuyuyit nyo om wule omite akwek. Ntene ye möce citake tokol om akwek kule oyiku nyewo, kuroke nyoto kwek mutworintetap piko tokol.

<sup>27</sup>Nteye möce citake tokol om akwek kule oyiku nyepo tayta, kuroke nyoto kwek mutworintemwoṅ.

<sup>28</sup>Kuyu Weritap cito nye kipuryo kot kuco kule cokwiwo piko yisyet, ntene kico cokwiyis oṅnkukoyito sapon nyi kwolis kusop piko ce caṅ.’”

<sup>29</sup>Nteye kimite cek kunomene Yeriko. Kupa piko ce caṅ kurup Yesu let.

<sup>30</sup>Yoto kulim piko oyeny ce kikoryo ce kimite kepur aret tapan kule Yesu nyitenyi nye mite kutile aran. Yoto kupol picoto kumwoy kule, “Mokoryontet, Weritap Tauti! Rire nec kalyec acek!”

<sup>31</sup>Kupolyi piko picoto kule kusiono, ntene kutosyikey kupol koromun kumwoy kule, “Mokoryontet, Weritap Tauti! Rire nec kalyec acek!”

<sup>32</sup>Kuyo Yesu oṅnkukur picoto oṅnkutepe kule, “Omöce akwek kule oyiwok ani ne?”

<sup>33</sup>Kuwec cek kumwoy kule, “Mokoryontet, ce möce kule ṅoṅwec konyekyo!”

<sup>34</sup>Kurire Yesu kukalya cekto oṅnkunäm konyekwacek. Yoto pakenke kukästa cek oṅnkurup kupetakey Yesu.

## Matayo 21

<sup>1</sup>Nteyu kowo kurik cek Yerusalem, kukwa okoy kupun Pesepake om tulwetap ketik ce cekure Seituninek. Yoto kuyokto Yesu konomikiyi oyeny kupa tay

<sup>2</sup>oṅnkumwoci ṅalecu kule, “Ape okoy opunte kayin nyin mite taymwoṅ, mosonyoru pakenke sikiryet nye ratat nye pontokey oko moyinyi. Atyac oṅnkokeru okoy yu omite ani.

<sup>3</sup>Nteye katepenak citake ṅolyo, omwoci kule, ‘Möce Mokoryontet,’ mosukuketwok lakwar.’”

<sup>4</sup>Kikwiyokis ṅalecu sukuṅet kwitita kupoyit manta ṅalek ce kimwoy workoyontet kule:

<sup>5</sup>“Omwoci pikap Siyon, käs cono yawut kinko nyeṅuṅ wule mite nyi, nye tala nye kalany sikiryet, cone moytap sikiryet, nkaryantet nye kotoceye.’”

<sup>6</sup>Yoto kupa konomik kuntoye oṅnkuwokwiy kuyu wulo kokomwoci Yesu.

<sup>7</sup>Kukwer cek sikiryet oko moyita oṅnkuyitoci sirokwa potoyikap sikirok, oṅnkukoci Yesu kulany parak.

<sup>8</sup>Kuyitoci luket nyepo piko ce caṅ sirokwa aran.





- <sup>9</sup>Kucec luket nyepo piko ce kipeti om taytap Yesu oko ce kikwone letut kupol kumwoy kule, “Cikaste Weritap Tauti; Kukoci Yiyintet kupeyok neto nyi coni om kaynetap Mokoryontet! Cikaste Yiyintet!”
- <sup>10</sup>Ntowo kupunto Yesu Yerusalem orit, kunäm polotet moñet tokol kumukul, Kutep piko kumwoy kule, “Do cici?” Kuwec luket nyepo piko kumwoy kule,
- <sup>11</sup>“Workoyontet Yesu nyi nyepo Nasaret om koretap Kalilaya.”
- <sup>12</sup>Kowut Yesu kotap Yiyintet oñnkukwetune orit piko ce kyolyoyisiyo oko ce kyolisysi; kumil mesanikap piko co wöle pesanik, oko ñecerok cepo piko co olyoy swororok,
- <sup>13</sup>oñnkumwoci cek kule, “Kicesil om silutekap Yiyintet kule, ‘Mosicekure komwani koto nye cesome.’ Ntene kunyi kwawec akwek kwek kepenet nye wuñeke corik!”
- <sup>14</sup>Kukwa piko ce kikoryo oko ce kikomwolis okoy ye mite Yesu om kotap Yiyintet. Kusop Yesu cekto kusopco.
- <sup>15</sup>Yoto kunyer tisik cewoyec oko konetikap ntarastinek ye kotoköse tukuk cepo kakitat ce kikwiye neto oko lekok ce kipole oñnkurirtos om kotap Yiyintet kumwowu kule, “Cikasta Weritap Tauti.”
- <sup>16</sup>Kumwoci cek Yesu kule, “Lime nyi ñalek cu mwowu lekocu?” Kuwekyi Yesu kumwoci kule, “Olime manta, ntene tompo kot asuman akwek mpo kisic silutekap Yiyintet ce mwowu kule, ‘Kyonet akwek lekok ce minkec oko ce rerye kukon kakastayenjuñ nye yeme!’ ”
- <sup>17</sup>Kuwo yoto kupakakta cek oñnkuwete moñet okoy kupunto Pesaniya wule kiwo kuru.
- <sup>18</sup>Ntowo kuyekune kororn ye kimite Yesu kuweti moñet, kwam neto rupet.
- <sup>19</sup>Yoto kukäs mokoywet nye kimite aret tapan, kuwo yepo ketoto ntene puryo kot wokunyorta kiy; sokek pate ce kimite. Kumwoci Yesu ketoto kule, “Kime yiye nyi kenysis omit!” Kuyam mokoywet yoto pakenke.
- <sup>20</sup>Kukäs konomik ñalecato, kukite cek koromun oñnkutep kumwoy kule, “Kayam mokoywet pakenke lakwar kulene?”
- <sup>21</sup>Kuwekyi Yesu kumwoci cek kule, “Komwowok ani akwek ñalek cepo manta kule, ye oponte akwek koyenet nye puryo kot oponte yec kasoteywek alak, nto omuci kot omwoci tulwoni kule, ‘Ñeyakisye oñnkiwircikey ruretyet,’ Kwiyakay kuyunyoto.
- <sup>22</sup>Ye koyen akwek mosonyoru kiy ake tokol nye kosom om somsemwoñ.”
- <sup>23</sup>Ntowo kuco Yesu okoy kotap Yiyintet, nteye kimite kunetisiyo, kukwa tisik cewoyec oko poyikap Yutayek ye kimite neto oñnkutepe kule, “Po ño kamukeywek cu yiye nyi tukucu? Do nyi kikonij kamukeywecu?”
- <sup>24</sup>Kuwekyi Yesu kumwoci cek kule, “Mosatepenak ani akwek teputyet akenke, nteye kowekwo ani akwek nyitenyi, mpo ani mosowekwok omwowok wule onyortoy ani kamukeywek ce oyiye tukucu.



- <sup>25</sup>Kicone potisonisyetap Yowana wulin po torot nto kicone wule mite piko?” Yoto kurwoke cek kwicek nkit kumwoy kule, “Mocemwowu kulene? Ye kocemwowu kule, ‘Kicone torot,’ Mosukuwekwec kumwoy kule, omne satay akwek moyen ñalekyi?”
- <sup>26</sup>Nteye kocemwowu kule, ‘Kicone wule mite piko,’ Ciku acek yec nyokorec ñalek ce mucce kwiy piko, omnye cöme piko tokol kule kiworkoyo Yowana manta.’”
- <sup>27</sup>Yoto kuwekyi cek Yesu kumwoci kule, “Puryo kot cinket.” Kumwoci Yesu cek kule, “Mpo ani puryo kot omuci kot omwowok akwek wule onyortoy ani kamukeywek ce oyiye tukucu.”
- <sup>28</sup>“Kunyo osoti akwek kulene? Kimite citake nye kiponto werik oyeny. Kuweci kwan werit nyewo oñnkumwoci kule, ‘Wenyo, iwo pesyoni weyiyisyce mparetap ketik ce cekure Sapipunek.’
- <sup>29</sup>Kuwekyi weroto kumwoci kwan kule, ‘Puryo kot oweti.’ Ntene om letut kuwec kasoteywekyi oñnkunomen wokwiyis mparetap Sapipunek.
- <sup>30</sup>Yoto kuweci kwan werit nyin ake oñnkumwoci kuyunyoto. Kuwec nyo kumwoy kule, ‘Mokoryontet kacäm.’ Ntene oñnkutay mowo.
- <sup>31</sup>Kunyo oñnkono om wericoto oyeny nye kikwiy kito nye kimöce kwan?” Kuwec cek kumwoy kule, “Werit nyewo.” Kumwoci Yesu cek kule, “Komwowok ani akwek ñalek cepo manta kule, mite yawut korurukikap mosoret oko koruk cemonisyekek kupeti kunyosyenok akwek kupa wule mite poytoyisyetap Yiyintet.
- <sup>32</sup>Omnye kico Yowana potisonintet cokuporwok akwek aret nyepo manta nye misyini arup, ntene otay moyen ñalekyi. Ntene kucäm korurukikap mosoret oko koruk cemonisyekek ñalekyi. Nka mpo yu kowokäs akwek ñalecato, kipuryo kot awec kasoteywekwok om letut oñnkocäm ñalekyi.”
- <sup>33</sup>Kumwoy Yesu kule, “Alimnte pa tyonkocet ake. Kimite citake nye kiponto mparenny nye kiwu ketik ce cekure sapipunek, oñnkuker tuyita komut, oñnkupal mwenet nye cirurunye matuntanik, oñnkutec kitarit nye ceripse. Yoto kukoci kopotik kukotesan mparanato, oñnkunomen kuwo toyek.
- <sup>34</sup>Nteyu kowo kupunto pesyosyek ce rurye omikap sapipunek, kuyok cicoto mutworiky kukwa wule mite kopotik kule sukuñet kukoci sapipunek kererya ce kiciyoyekyin.
- <sup>35</sup>Yoto kunäm kopoticoto mutworikap cicoto, kupir ake, kupakäc ake kume, oñnkuwire ake rwontok.
- <sup>36</sup>Kuyok cicoto mutworik alak ce cañ kusir ce kipo tay. Kutañany yec kopoticoto mutworik coto kuyu ce kipo tay.
- <sup>37</sup>Nto om letut kuyokto cicoto werinyi nkit kumwoy kule, ‘Mosukuywey cekto werimwani kupoyit manta!’
- <sup>38</sup>Nteye kotoköse kopotik werit, kurwoc cek kwicek nkit kumwoy kule, ‘Nyitenyi kunye kontiyintet, akany cepakäc kume, sukuñet kwek nyinyacek kontiyisyet!’



<sup>39</sup>Yoto kunäm cek neto oṅkuwunuk kucone mparetap sapipunek oṅnkupakäc kume.’’

<sup>40</sup>Kutepe Yesu cek kule, “Kunyo ye kaco citap mparet, mosukwiye ne kapoticoto?”

<sup>41</sup>Kuwec cek kumwoy kule, “Mosukupakäc kopoticoto miyotec, oṅnkukoci kopotik alak kukotesan mparetap sapipunek, ce mosukukoci neto sapipunek kererya ye koruryo.’’

<sup>42</sup>Kumwoci Yesu cek kule, “Tompo kot asuman akwek mpo kisic silutekap Yiyintet co mwowu kule, ‘Rwantet nyo kitoye tekik kule puryo kot kuponto latik. kunye kiweckey kwek rwantet nye pële tokol nye tiye koto tapan. Mokoryontet nye kikwiye cutecu, kunyo po kakitat om konyekyacek!’ ”

<sup>43</sup>Kutosyikey Yesu kumwoy kule, “Kunyo komwowok ani kule, mosicinumunenok akwek poytoyisyetap Yiyintet oṅnkyikoci piko ce muce kwiye yisyet nyepo poytoyisonoto.

<sup>44</sup>[Ci ake tokol nye kowircikey rwantanato kutirtiroktos cito nyoto, nteye kowircikey rwantanato citake, kunyirnyire cicoto.]’’

<sup>45</sup>Yoto kulim tisik cewoyec oko Farasayek tyonkocokap Yesu oṅnkunket kule koṅolole neto ṅalek ce nöme cekto.

<sup>46</sup>Kusyem yoto kule cenäm neto. Ntene kuywey piko ce caṅ ce kinkete kule workoyo Yesu.

## Matayo 22

<sup>1</sup>Kuṅololyi Yesu yec piko kwiysisye tyonkocok kumwoy kule,

<sup>2</sup>“Kerkey poytoyisyetap torot oko kinko nye kikwici werinyi sakwet nye kemütisye.

<sup>3</sup>Yoto kuyokto mutworikiy kupa wokukur toyek ce kucekur kukwa sakwet, ntene kutoyis makwa.

<sup>4</sup>Yoto kuyokto mutworik alak kumwoci kule, ‘Womwoci toyek kule, akäs pa kayiye ani yawut sakwemwani, kaceyeny yeyikwani oko tuka ce yokwoyec kunyo keceyiya tukuk tokol, akwa sakwet.’

<sup>5</sup>Ntene kukwes pate piko co kucekure oṅnkunomen kupa yisyonutekwa, kuwo ake kamonkesyantinyi.

<sup>6</sup>Kunäm ce kiṅetune yoto mutworikap cicoto kokursyi, oṅnkupir kupakäc kupok.

<sup>7</sup>Yoto kunyer Kinko koromun, kuyokto sikarekyi kupa wokupar kupok poricoto oṅnkupel moṅemwa.

<sup>8</sup>Nto kopok kukur mutworikiy oṅnkumwoci kule, ‘Kaceyiyta sakwemwani, ntene puryo kot kucäm kukwa piko co kwokur ani.



- <sup>9</sup>Kunyo ape yawut wulo po orustunwekap moŋet, oŋnkokur piko tokol ce komuc kot onyuru kukwa sakwet.’
- <sup>10</sup>Kunomen mutworik kupa orustunwekap moŋet, wokoruruc piko tokol ce kimuc cekto kot kunyor; ce miyotec oko ce toponec, yoto kunyiw piko koto nyepo sakwetap komütisyet.
- <sup>11</sup>Kuwo kinko koto orit wokukäs toyek, yoto kukäs cito nye kipuryo kot kuloce sirok cepo sakwetap kamütisyet.
- <sup>12</sup>Kutepe kinko cicoto kule, ‘Corwenyu, kewut nyi koyi kulene yu meponte sirok cepo sakwetap komütisyet?’ Ntene kisis cicoto nye puryo kot kuwec ŋolyo.
- <sup>13</sup>Kumwoci kinko mutworik kule, ‘Arat cici yewuniyek oko krenkok oŋnkuwunukte kuwo saŋ wule mite menonet, wule mowokurire oŋnkunyyi kelakyi.’ ”
- <sup>14</sup>Kumwoy Yesu kule, “Omnye caŋ piko ce cekure, ntene ŋeri pate piko ce cekweye.”
- <sup>15</sup>Kupa Farasayek oŋnkuwokurwoc ŋomnonet wule muce cekto kot kulot Yesu om tintenotet kutepe teputek.
- <sup>16</sup>Kuyokto cek konomikwa alak oko piko alak cepo luketap Erote kupa wule mite Yesu. Kumwoy picoto kule, “Konetintet, cinket acek kule yiku nyi ci nyepo manta, oŋnkineti ŋalekap Yiyintet nyepo manta om wule mite piko tokol, nye puryo kot soti wule yunto piko wulo po porto saŋ.
- <sup>17</sup>Kunyo, mwowec acek, soti nyi kulene? Comwec acek ra ntarastinekyo cekweci mosoret Kinko nyewo nto puryo?”
- <sup>18</sup>Yoto kunket Yesu kasoteywekwa ce miyotec kumwoy kule, “Akwek kaperperoticu! Omne sasyem akwek kule celotwo ceteca ani?
- <sup>19</sup>Oporwo pa pesyantet nye cekweye mosoret?” Kusutyi cek neto yoto silinkit.
- <sup>20</sup>Kutepe Yesu cek kule, “Po ŋo metit nyi oko kaynet nyi silot silinkit?”
- <sup>21</sup>Kuwec cek kumwoy kule, “Po Kinko nyewo.” Kumwoci Yesu cek kule, “Kunyo okocini kinko tukuk cepo Kinko, okocini Yiyintet tukuk cepo Yiyintet.”
- <sup>22</sup>Ntowo kulim cek ŋalecato, kokite koromun oŋnkunomen kupecikey kupakakta neto.
- <sup>23</sup>Om pesyonoto akenke, kukwa Satusayek wule mite Yesu. (Coto ku piko co mwowu kule puryo kot komuce kot kotutune met piko ce kipok.)
- <sup>24</sup>Kumwoy cek kule, “Konetintet, kimwoy Moses kule, ‘Ye kame citake nye puryo kot kuyi lekok, kumisyini konti mutakwam korket nyo musuk, sukuŋet kuyici mutakwam nyo kime lekok.’
- <sup>25</sup>Kunyo kimite piko alake tisapu ce kitupco ce kiceminye acek tokol. Kukesyo nyewo komüt korket, kume nye puryo kot kuyi lekok. Yoto kupakakta korket nye kimüt mutakwam.



- <sup>26</sup>Kuyuyit nyoto kume mpo mutakwam nyepo oyeny, oko nyepo somok, okoy kuwoŋnkey kupok picoto tokol ku tisap.
- <sup>27</sup>Nto om letut kume mpene korket.
- <sup>28</sup>Kunyo om pesyet nyo citutune met, mosukupoyit ŋo korket? Omnye kikikomüt picoto tokol ku tisap!”
- <sup>29</sup>Kuwekyi Yesu kumwoci cek kule, “Oyiku akwek mosotin koromun! Omnye puryo kot oŋnket silutekap Yiyintet, oŋnkupuryo mpo kot oŋnket swametaŋ Yiyintet.
- <sup>30</sup>Omnye pesyet nyo ciŋete kotutune met piko kuye mosukukerkeyitu cek oko Malaykanik ce mite torot, nye puryo kot komütisiyi moronik oŋnkupuryo kot cimüte koruk.
- <sup>31</sup>Nto ŋalek ce nöme kotutunetaŋ met, tompo so kot asuman akwek mpo kisic ŋalek ce kimwowok akwek Yiyintet? Omnye kimwoy kule,
- <sup>32</sup>‘Oyiku ani Yiyintetaŋ Apram, oŋnku Yiyintet Isaka, oŋnku Yiyintetaŋ Yakopo.’ Poru ŋalecu kule neto kunye Yiyintet nyepo ce soptos, ntene puryo kot ku Yiyintet nyepo piko ce kipok.’”
- <sup>33</sup>Ntowo kulim piko ŋalecato, kokite koromun konetisiyeni.
- <sup>34</sup>Ntowo kulim Farasayek kule koŋololyi Yesu Satusayek okoy komukta kusisio, yoto koruruckey mpecek.
- <sup>35</sup>Kusyem akenke om cekto nye konetintetaŋ ntarastinek kule olotu Yesu om teputyoni kule,
- <sup>36</sup>“Konetintet, ntarastit oŋnkono nyewo nye pëlisi?”
- <sup>37</sup>Kuwekyi Yesu kumwoci kule, “Misyini cäm Mokoryontet Yiyinteŋuŋ om mukuleyŋuŋ tokol, oko sopoŋuŋ tokol, oko kasoteywekuk tokol.
- <sup>38</sup>Ntarastit nyitenyi kunye po tayta nye pëlisi.
- <sup>39</sup>Nto nyepo oyeny nye kerkey nyitenyi kunyi kule, ‘Misyini cäm latyeŋuŋ kuyu wulo cömntoykey nyi nkit.’
- <sup>40</sup>Yoŋune ntarastinekap Moses tokol oko konetisiyetaŋ workoyik ntarastinecutecu oyeny.’”
- <sup>41</sup>Nteyu kowo koruruckey Farasayek, kutepe Yesu cek kule,
- <sup>42</sup>“Osoti akwek kulene ce nöme Kristo nye Dapanet? Mosukwek keseniyantetaŋ ŋo?” Kuwec cek kumwoy kule, “Yiku keseniyantetaŋ Tauti.”
- <sup>43</sup>Kutepe Yesu cek kule, “Kunyo omne sukuŋoŋnkyi Muyet Nyetilil Tauti kukure neto Mokoryontet?” Omnye kimwoy Tauti kule:
- <sup>44</sup>“Kimwoci Mokoryontet Mokoryontenyu kule, pure yu po yewumwani nyepo tay okoy okoci ani punikuk kwek ŋecerok cepo kerenkokuk.





<sup>45</sup>“Kunyo ye kure Tauti neto, ‘Mokoryontet’, komuce kulene yec Dapanet kwek keseniyantetap Tauti?”

<sup>46</sup>Kipuryo yoto ci nye kitokomuc kot kuwekyi Yesu njolyo mpo akenke. Nto kuceke pesyonoto kuwo tay, kipuryo yec mpo ci nye kitokusyem kule atepe neto teputek alak.

## Matayo 23

<sup>1</sup>Yoto kujololyi Yesu luket nyepo piko ce caŋ wanak oko konomiky,

<sup>2</sup>kumwoci kule, “Konetikap ntarastinek oko Farasayek kuce kicikoci kamukeywek kunet piko topon wule yunto ntarastinekap Moses.

<sup>3</sup>Kunyo misyini oywey oŋnkorup njalek tokol ce komwowok akwek kule ayiy, ntene monte ceyiye kuyu wulo yiytoy cek, omnye njolole pate ntene oŋnkupuryo kot kwiye njalek co nete cekto.

<sup>4</sup>Rote terekok ce nyikisec oŋnkutorci metewokap piko, ntene oŋnkupuryo kot kutwoye terekocoto mornet.

<sup>5</sup>Yiye cekto kiy ake tokol kule sukuŋet kukäsec piko. Akäs pa lolonik cewoyec cepo silutekap Yiyintet ce nömote tokoywekwa oko yewuniyek! Akäs pa koyinto nyepo kototokap sirokwa ce loce!

<sup>6</sup>Cöme oteputek ce toponec ce toku om sokwonutek oko njecerok ce kweyotin om korikapkok.

<sup>7</sup>Cöme kule ciyweyec cisupayec topon om moteponik oŋnkucäm kule kukurec piko kule, ‘Konetin.’

<sup>8</sup>Ntene puryo kot kumisyini cekurok akwek kule, ‘Konetin.’ Omnye oponte akwek konetintet akenke, oŋnkotupce akwek tokol.

<sup>9</sup>Kunyo puryo kot kumisyini kot okure akwek citake nye mite koret kule, ‘Papa,’ omnye oponte akwek Papa akenke pate nye mite torot.

<sup>10</sup>Puryo kot kumisyini kot cekurenok akwek kule, ‘Kantoyin,’ omnye akenke pate kantoyintet nyimwoŋ, nyoto ku Kristo nye Dapanet.

<sup>11</sup>Ci nyewo kupëlis om wule omite akwek kunye roke kwek nyoto mutworintemwoŋ.

<sup>12</sup>Ci ake tokol nye sutekey parak, mosicirekune nyoto, nto ci ake tokol nye sutekey njony, mosicilaŋnta nyoto kwek nyewo nye mokupëlis.”

<sup>13</sup>“Omite kwapi koromun konetikap ntarastinek oko Farasayek! Oyiku kaperperot! Okere akwek kurket nyepo poytoyisyetap torot sukuŋet mente kowut piko, ntene oŋnkupuryo kot owuti akwek nkit orit, oŋnkoyete mpo piko alak ce syeme kule ciwut orit!

<sup>14</sup>[“Omite akwek kwapi koromun konetikap ntarastinek oko Farasayek! Oyiku koperperot! Onyoponi korikap musukik, oŋnkosilkey osome sayutek ce caŋ. Mosicemutwok akwek musankut nyewo om njalecutecu!]



15“Omite akwek kwapi koromun konetikap ntarastinek oko Farasayek! Oyiku kaperperot! Opesetoti ayay omutu ruretyet oṅnkopunte koret tokol omöce kule cewec cito akenke, nteye kowec cito nyoto, awurte yec kuwur cicoto kumiyatit aret oyeny kupelok akwek, oṅnkuwo wule mite mata nye momise kuyu wule oyunte akwek nkit!

16“Omite akwek kwapi koromun kantoyik ce koryotin! Onetisiyi omwowu kule, ‘Ye kewalkey cito om kaynetap kotap Yiyintet, kupuryo kot ku ḡolyo nyewo koromun kawalenyi, ntene ye kewalkey cito om kaynetap saput nye mite kotap Yiyintet kupoyitu kawalenyi manta.’

17Oyiku akwek pkoratis ce solontoy! Oṅnkono kito nyewo nyepo manta? Saput nto kotap Yiyintet nye wece saput kutililit?

18Onetisiyi akwek yec omwowu kule, ‘Ye kewalkey cito om kaynetap otepto nye cepele korosek om kotap Yiyintet, kupuryo kot ku ḡolyo nyewo koromun kawalenyi, ntene nteye kewalkey cito om kaynetap kokotutyet nye mite otepto nye cepele korosek om kotap Yiyintet, kupoyitu kawalenyi manta.’

19Oyiku akwek pkoratis koromun! Oṅnkono kito nyewo nyepo manta, kokotutyet nto otepto nye pele korosek nye wece kokotutyet kutililit?

20Kunyo ye kewalkey cito om kaynetap otepto nye cepele korosek, kukewalkey neto om kaynetap otepto nye cepele korosek wanak oko tukuk tokol ce mite orit.

21Nteye kewalkey cito om kuynetap kotap Yiyintet kukewalkey om kaynetap Yiyintet nye minye koyoto.

22Nteye kewalkey cito om kaynetap torot, kukewalkey neto om kaynet nyepo ṅeceretap Yiyintet oko neto nyo pure ṅeceranato.

23“Omite akwek kwapi koromun konetikap ntarastinek oko Farasayek! Oyiku kaperperot! Okocini Yiyintet akenke nyepo taman cepo nkuyek alak tokol kuyu cepsocconik, oko lapotik, oko mutunkurunek, oṅnkotay moywey ntarastinek ce pēlisyi, kuyu amut musankunek om aret nyepo manta oko tolosyet oko koyenet. Möce kule oyiye cutecu, ntene nye puryo kot oyostoy cut alak.

24Akwek kaperperotik ce koryotin! Onumu akwek kolyomwet nye mite tukuk ce omöce kule ceye, ntene oṅnkolukuy Nkamiyet!

25“Omite akwek kwapi koromun konetikap ntarastinek oko Farasayek! Oyiku kaperperot! Osite cikompet oko sanit saṅ oṅnkurok kumite kinyiy orit tukuk ce kyonyapan oko soynonet.

26Nyi Farasoyintet nye korat! Nyosye sit kunyo cikompet orit sukuṅet kunyol mpo wulo po saṅ.

27“Omite akwek kwapi koromun konetikap ntarastinek oko Farasayek! Oyiku kaperperot! Akerkeyekey mwenon ce kicetupci piko ce kiciyil kulelakit ce toku topon wulo po saṅ oṅnkurok kinyiy orit koyekap piko ce kipok oko tukuk tokol ce kinun.



<sup>28</sup>Kunyo oporukey akwek wulo po saŋ kuyu pic ce toponec oŋnkurok kukinyiy montuwokwok orit mwiynanet oko miyotyoni.

<sup>29</sup>“Omite akwek kwapi koromun konetikap ntarastinek oko Farasayek! Oyiku kaperperot! Otece akwek topon mwenonik co kicetupci workoyik oŋnkosat okararan mwenonik cepo piko ce tililec ce kipur kopurto nye topon,

<sup>30</sup>oŋnkomwowu kule, ‘Nto kiceyiyec acek om kenysisyek co kipo mpo kukonyo, nto kipuryo kot kiyi acek ŋalek ce kikwiye cekto kupakäc workoyik.’

<sup>31</sup>Kunyo ocöme akwek nkit kule ciku kesenisyekap piko co kipakäc workoyik!

<sup>32</sup>Otosyikekey nyun ape tay awaŋnte ayiy miyotyeyet nye kicece mpo kukomwoŋ.

<sup>33</sup>Akwek erenoy! Lekokap erenoy! Osoti akwek kule cimuci kot cecilile mata nye momise?

<sup>34</sup>Kunyo komwowok kule, mosoyoku ani kukwa wule omite akwek workoyik oko piko ce ŋomec oko konetik, mosopar akwek kupok alak, owuyitoci alak murtowontet, oŋnkopas alak om korikapkokwonikwok, okwet alak kupete moŋet ake okoy moŋet ake.

<sup>35</sup>Kunyo om ŋalecutecu kuce mosonyoru akwek musankut nyepo piko co kicepar kupok ce kimoponto lelis, kuceke korotikap Apel nye kimoponto lelis nye kicepar kume, okoy porisyyet nyo kicepore Sakariya weritap Parakiya nyo kyoporci akwek kwenutap otepto nye cepele korosek oko meset.

<sup>36</sup>Komwowok ani akwek ŋalek cepo manta kule, mosukunyor piko cepo pinta nyepo pesyosyecu toŋoŋutek om ŋalecoto.’’

<sup>37</sup>“Opo! Yerusalem! Yerusalem! Nyi nyo poköci workoyik, oŋnkiwire rwontok piko ce kiciyok kukwa wule mite nyi! Aret cetya ye kyamac ani kule oruruc lekokuk kukwa wule omite ani kuyu wulo ruruktoy nkokyete lekokyi koruruky kopopokyi orit, ntene toyisye nyi!

<sup>38</sup>Akäs pa, mocepokokwok komwoŋ kwek kiratya.

<sup>39</sup>Komwowuŋ kule, kuceke yawut kuwo tay, kemetekoso ani yec okoy ye mocemwowu kule, ‘Kukoci Yiyintet kupeyok neto nye cony om kaynetap Mokoryontet.’’’

## Matayo 24

<sup>1</sup>Kunomen Yesu kumiŋnte kotap Yiyintet, nteye kiweti kukwa konomik kwokuporci neto wule kicetekta kotap Yiyintet.

<sup>2</sup>Kuwekyi Yesu kumwoci cek kule, “Komwowok ani kule, kokäs akwek rwontocu tokol cu mite yu, puryo rwantet mpo akenke nye mokuŋetune yu mite yawut, mosicaturpup tokol oŋnkyewirci ŋony.’’



- <sup>3</sup>Nteye kimite Yesu kukepur ñony om tulwetap ketik ce cekure Seituninek, kukwa konomik ye kimite neto oñnkutepe möt kumwoci kule, “Mwowec acek, mosukwiyokis ñalecutecu pesyo ne? Oñnkukiy ne pelutyet nye yiyoktos sukupor kule kopunto pesyet nyo cone nyi oko ye ñete koret.”
- <sup>4</sup>Kuwekyi Yesu kumwoci cek kule, “Oripkey koromun, monte kot kuperperak kumasak citake.
- <sup>5</sup>Omnye mosukukwa piko ce cañ om kaynemwani oñnkwokumwoy kule, ‘Oyiku ani Kristo nye Ðapanet.’ Mosukuperperis kumas piko ce cañ.
- <sup>6</sup>Mosolim akwek kancoyto nyepo poryosyek ce lekitec oko ce mite wule low; ntene monte cemuye, mosukwiyokis tukuk ceyucoto, ntene kupuryo kot kuporu kule kopunto pesyet nyepo letut.
- <sup>7</sup>Omnye mosukusetyi kuporye koret ake koret ake, kuporye poytoyisyyet ake poytoyisyyet ake; mosukuco rupet, oñnkuriñriñ koret wulyo tokol.
- <sup>8</sup>Ntene poru ñalecutecu yoto kule kacec mwonintap toñoñutek kuyu korko nye kañet moyet.
- <sup>9</sup>“Yoto kuye mosukunämak akwek piko oñnkukoytok wocitañanyak, mosiceparak opoku. Mosukusenkerak piko cepo koret tokol omnye kocäm kaynemwani.
- <sup>10</sup>Pesyosyecoto kuye mosukutay piko ce cañ koyenet nye kweyene. Mosukuñoomntokey cek nkit oñnkusenkerkey kwicek nkit.
- <sup>11</sup>Mosukutok yoto workoyik cepo mwiynanet oñnkuperper kumas piko ce cañ.
- <sup>12</sup>Kutosyikey yoto kuwoyit miyotyeyet oñnkuminiñit koyenet nyepo piko ce cañ.
- <sup>13</sup>Ntene ci ake tokol nye kotitir kuyo okoy pesyet nyepo letut kunye mosicesor kusop nyoto.
- <sup>14</sup>Mocemwayta lokoywecutecu toponec ce nöme poytoyisyyetap torot kupunto koret tokol kumukul sukwek kasowunot om wule mite piko cepo koret tokol. Nteye kapok, kuye kupunto pesyet nyepo letut.”
- <sup>15</sup>“Kunyo ye kokäs akwek, ‘Kiy nye miyat nyo kiñolole Taniel kumite keyoñe otepto nyetilil.’ (Möce kunket cito nye sumone kule mwowu ne ñalecu!)
- <sup>16</sup>Misyini yoto kumwey piko ce mite Yuteya kupa lakomosyek.
- <sup>17</sup>Ye mite cito konyi kisyek, kupuryo kot kumisyini kurek oñnkuwo wokunum tukukyi ce mite koto orit.
- <sup>18</sup>Nteye mite cito mparen, kupuryo kot kumisyini kuweckey wokunum sirenyi nye mite koto orit.
- <sup>19</sup>Mite kwapi koromun pesyosyecoto koruk ce koyotin oko ce rerisiyi lekok!
- <sup>20</sup>Osom akwek Yiyintet sukuñet mente kot kupoyit mweyotemwoñ ye pesyosyek cepo peñat ye kayitit koret, nto ye pesyetap Sapat!



- <sup>21</sup>Omnye mosukutok yoto toŋoŋutek cewoyec kupël alak tokol ce kikikwiyokis kuceke ye kicitany koret okoy pesyoni, oŋnkupuryo kot kwiyoŋtos yec kenysis kitake nye yunyoto.
- <sup>22</sup>Ntomo nye kikwiri Yiyintet kuŋerinitu pesyosyecoto, nto puryo ci mpo akenke nye cimuce kot cesor cisop, ntene kikwiri Yiyintet kuŋerinitu pesyosyecoto om toponiyetap pikyi ce kweyotin.
- <sup>23</sup>“Kunyo ye komwowok akwek citake pesyosyecoto kule, ‘Akäs oŋyi Kristo nye Dapanet’, nto, ‘Oŋyin mite yun’, monte ciyen ŋalekyi.
- <sup>24</sup>Omnye mosukutok piko ce kurekey kule ciku ŋapanik, oko piko ce kurekey kule ciku workoyik. Mosukwiy picoto pelutok cewoyec oko tukuk cepo kakitat kule ye kemukakay ciperper cemas piko cepo Yiyintet ce kicekwey.
- <sup>25</sup>Kunyo alimnte omnye komwowok ani kutompo kot kupunto pesyonoto.
- <sup>26</sup>“Nto mpo ye komwowok akwek piko kule, ‘Akäs, oŋyin mite kitela!’ Monte cipe wuloto; nto mpo ye komwowok kule, ‘Oŋyi kewuŋekey yu!’ Monte ciyen.
- <sup>27</sup>Omnye mosukuco Weritap cito kuyu kaweket nyepo ilat nyo wece kupunte koret parak kuceke koŋasis okoy raraktay.
- <sup>28</sup>“Wule mitowune musto ku wuloto wule ruruŋyinikey motomwek.”
- <sup>29</sup>“Yoto pakenke om letutap toŋoŋutek cepo pesyosyecoto, mosukuweckey asista kutuyit, kutay arawet meluwu, mosukosuwune kokelik torot, oŋnkutimtimnkey swamet nyepo torot.
- <sup>30</sup>Mosukuporkey yoto pelutyet nyepo Weritap cito om torot, kuriryo kusyekey montuwek piko cepo koret tokol kumukul oŋnkukäs cekto Weritap cito kucone polyet nyepo torot kuponto swamet oko woyinto nyewo.
- <sup>31</sup>Mosukuciy kontit nyewo, mosukuyokto neto malaykanikiy kupa okoy toponutek amwan cepo koret. Mosukoruruc cek pikyi ce kweyanik kuceke koret tapanta ake okoy tapanta ake.”
- <sup>32</sup>“Roke okäse akwek ketit mokoywet. Ye keŋot sokek ceci ce ŋorŋor, oŋnket yoto kule karik kuŋotyen kuropen koret.
- <sup>33</sup>Kuyunyoto ye kokäs akwek kwiyoŋtos ŋalecutecu kuye oŋnket kule karik kurkat poytoyisyetap Weritap cito.
- <sup>34</sup>Komwowok ani akwek ŋalek cepo manta kule, mosukwiyokis ŋalecutecu tokol kutompo kot kupok kuwoŋnkey piko tokol cepo pinta nyepo pesyosyecu ce soptos yawut.
- <sup>35</sup>Poku wulin po torot oko koret ŋony, ntene puryo kot kupoku ŋalekwani mpo kisic.”
- <sup>36</sup>“Ntene puryo ci mpo akenke nye nkete kule cony pesyo ne pesyonoto, nto mpo kule sawet oŋnkono. Nka mpo Malaykanik om torot, nka mpo Werit. Papa nkit pate nye nkete.





- <sup>37</sup>Omnye kuyu wulo kiyunto tukuk ce kikwiyoktos om pesyosyek co kipo Nuwa, kuyunyoto wule mosukwiytakey om pesyet nyo coni Weritap cito.
- <sup>38</sup>Omnye om pesyosyecoto, ye kitompo kot kolum peko koret, kikwomisiyi piko oṅnkuyesiyi, komütisiyi moronik, oṅnkymüte koruk okoy pesyet nyo kilonye Nuwa kowute rapet.
- <sup>39</sup>Ntene kipuryo kot konkete piko kito nye kikwiyoktos okoy kunyiw peko koret oṅnkolum piko tokol. Kunyo yunyoto wule mosukwiytakey om pesyet nye cone Weritap cito.
- <sup>40</sup>Om pesyosyecoto, ye mite piko oyenku kwiyisiyi om mparen, mosicesut ake cepakakta ake.
- <sup>41</sup>Ye mite koruk oyenku kuṅosye rwantetap paka akenke, mosicesut ake cepakakta ake.
- <sup>42</sup>Kunyo oripkey, omnye puryo kot oṅnketi akwek kule pesyo ne nye coni Mokoryontemwoṅ.
- <sup>43</sup>Komwowok ani akwek ṅalek cepo manta kule, nto yunye nkete citap koto sawet nye cone corintet, nto kösu nye puryo kot kurwe kot kwosiyi corintet kuput konyi.
- <sup>44</sup>Kunyo misyini oiyitekey mpo akwek okonisiye okokoy, omnye musukuco Weritap cito om sawet nye puryo kot oyityini kule coni neto.”
- <sup>45</sup>“Kunyo omwowo ani pa akwek, ṅo mutworin nye cikenekey oṅnkuṅom? Nyoto kunye ye kokukoci mokoryontenyi kupayta mutworik alak, kupicini cut omik om sawet nye cemokyini.
- <sup>46</sup>Derekat koromun mutworintonoto nye ye kaco mokoryontenyi cokunyoru neto kwiyisiyi kuyunyoto.
- <sup>47</sup>Komwowok ani ṅalek cepo manta kule, mosukukoci mokoryontet mutworintonoto kupayta tukukyi tokol.
- <sup>48</sup>Ntene ye mutworin nye miyat, mosukuṅalal kwine nkit kumwoy kule, ‘Tokulow ye mosukuco mokoryontemwani.’
- <sup>49</sup>Oṅnkucec kupir mutworik cut alak, oṅnkwomis oṅnkuyesyoko pokitisiyek.
- <sup>50</sup>Mosukuweckey kuco yoto mokoryontetap mutworintonoto om pesyet ake nye puryo kot koyityini kule coni oko om sawet nyo puryo kot kunkete.
- <sup>51</sup>Mosukuyepayep mokoryontet neto oṅnkukoyito kupot wanak oko koperperotik om wule mite rirek oṅnkyenyiy kelak.”

## Matayo 25

- <sup>1</sup>“Om pesyonoto, mosukukerkeyit poytoyisyetap torot oko tipik taman ce mwenik ce kinäm tarinekwa oṅnkupa kutorokta cito nye kemütis.



- <sup>2</sup>Tipicoto taman, kiperper mutu kuḡomec mutu.
- <sup>3</sup>Kunāmat co perper tarinekwa pate nye puryo kot kunāmat mwaninek alak.
- <sup>4</sup>Ntene kunāmat ce ḡomec tarinekwa oko mwaninek alak ce kimite cupanik.
- <sup>5</sup>Yoto kulilennkey cito nye kemütisiyi okoy kunukis tipicoto kot kuruy.
- <sup>6</sup>“Ntowo kupunto komoy kwen, yoto kusesew polotet cemwoy kule, ‘Oḡyin kaco cito nyo kemütisiyi! Ape atorokte!’
- <sup>7</sup>Kuḡetyo tipikey mwenik tokol oḡnkusat tarinekwa.
- <sup>8</sup>Yoto kumwoci tipik ce perper ce ḡomec kule, ‘Okonec mpo acek mwaninek cikwok omnye kapekune mwayta tarinek cico.’
- <sup>9</sup>Ntene kuwekyi ce ḡomec kumwoci cut kule, ‘Yunye puryo kot kuyemec cepicine oko akwek, kunyo ape pate wule kyole wayal cikwok nkit.’
- <sup>10</sup>Kunomen yoto tipik mutu ce perper wokwolis, nteye kimite cek aran kupeti, kupun cito nyo kemütisiyi. Yoto kupetakey tipik mwenik co kakaiytakey cito nyo kemütisiyi wokwam sakwet, ceker kurket.
- <sup>11</sup>“Nto om letut kupun mpecek tipik cokey oḡnkwokukursyo kumwoy kule, ‘Mokoryontet, Mokoryontet, yotwec mpöcek kurket!’
- <sup>12</sup>Kuwekyi cito nyo kemütisiyi kumwoci cek kule, ‘Komwowok ḡalek cepo manta kule, puryo kot oḡnketok ani akwek!’
- <sup>13</sup>Kuwaḡnta Yesu kumwoy kule, möce oripkey omnye puryo kot oḡnketi akwek pesyet nto sawet.
- <sup>14</sup>“Mosukukerkeyit poytoyisyetap torot oko ci nye karik kunomen kuwo toyek koret ake. Yoto kukur mutworiky oḡnkukoci kupayta tukuky.
- <sup>15</sup>Kukoci ci ake tokol om picoto kuyu wule kimuktoy yisyet. Kukoci ake silinkinek elifunek mut, nto ake kukoci nyo silinkinek elifunek oyeny, oḡnkukoci ake silinkinek elifut akenke, oḡnkunomen kuwo toyek koret ake.
- <sup>16</sup>Yoto pakenke kuwo mutworintet nyo kicikoci silinkinek elifunek mut oḡnkuwokwiyisye kamonkesyantit okoy kunyor latik silinkinek alak elifunek mut.
- <sup>17</sup>Kuyunyoto kwiyisye mutworintet nyo kicikoci silinkinek elifunek oyeny okoy kunyor latik silinkinek alak elifunek oyeny.
- <sup>18</sup>Ntene kuwo mutworintet nyo kicikoci silinkinek elifut akenke oḡnkupal mwenet oḡnkutupci kuwuny pesanikap mokoryonteny.
- <sup>19</sup>“Nto om letut nyepo pesyosyek ce caḡ, kuweckey mokoryontetap mutworicoto oḡnkucokoyitis kusat pesanik oko picoto.
- <sup>20</sup>Kuco yoto mutworintet nyo kicikocini silinkinek elifunek mut oḡnkuco kukon oko latik silinkinek alak elifunek mut oḡnkumwoy kule, ‘Mokoryontet, kikono ani nyi



silinkinek elifunek mut, kunyo käs pa, kyoyiyisye kot onyuru silinkinek alak elifunek mut.’

<sup>21</sup>Kumwoy mokoryontenyi kule, ‘Kiyiy topon, yiku nyi mutworin nye topon nye cikenekey! Omnye cikeneninke nyi om tukuk ce tukusic, kunyo mokoniḡ ani payte tukuk ce caḡ, co ceyemnte ḡerekwekwani tukway oko nyi.’

<sup>22</sup>Kuco mpene mutworintet nyo kicikocini silinkinek elifunek oyeny, oḡnkuco kumwoy kule, ‘Mokoryontet, kikono ani nyi silinkinek elifunek oyeny, kunyo käs pa, kyoyiyisye kot anyoru latik silinkinek alak elifunek oyeny.’

<sup>23</sup>Kumwoci mokoryontenyi neto nyoto kule, ‘Kiyiy topon, yiku nyi mutworin nye topon nye cikeneninke! Omnye cikeneninke nyi om tukuk ce tukusic, kunyo mosokoniḡ ani nyi payte tukuk ce caḡ, co ceyemnte ḡerekwekwani tukway oko nyi!’

<sup>24</sup>Ntene kuco mpene mutworintet nyo kicikocini silinkinek elifut akenke, oḡnkuco kumwoy kule, ‘Mokoryontet, kyonket ani kule yiku nyi ci nye wuy; kise nyi mpo mparet nye kipuryo kot kol, oḡnkiruruce omik wule kipuryo kot kol nyi kupuswek.

<sup>25</sup>Kyanyokoritu ani, kunyo kyowo wopolyi pesanikuk ḡony. Käs okyu pesanikuk.’

<sup>26</sup>Kumwoy mokoryontenyi kule, ‘Yiku nyi mutworin nye puren! Ye kinket nyi kule okise ani omik wule kipuryo kot akol, oḡnkoruruce omik wule kipuryo kot akol kupuswek.

<sup>27</sup>Kunyo ye yunyo, kimisyiniḡ nyi konore pesanikwani Penki. Nto kwaconi kwocekono tokol oko latik.

<sup>28</sup>Kunyo onumune neto silinkinek co ponto oḡnkokoci cito nyo ponto silinkinek elifunek mut.

<sup>29</sup>Omnye ci ake tokol nye ponto tukuk, mosicetosyi kutosyikey tukukyi, nto cito nyo puryo kot kuponto tukuk, mosicinumune neto nyoto mpo tukusic co ponto.

<sup>30</sup>Nto mutworintoni nyi moponto latik, owunukte kuwo saḡ wule mite menonet, wule mite rirek oḡnkyenyiy kelak.’ ”

<sup>31</sup>“Pesyet nye conī Weritap cito om woyinto kuyu Kinko, kupontonukey oko malaykanik tokol, mosucokopure yoto ḡecerenyi nyepo woyinto.

<sup>32</sup>Mosiciruruc kukwa taynyi piko cepo koret tokol kumukul. Mosukukwey neto yoto cekto kupciwune oyeny kuyu wulo kweytoy mesewontet warek oko kecirek.

<sup>33</sup>Mosukukoci kopurune kecirek yewunyi nyepo tay, oḡnkukoci kopurune warek yewunyi nyepo let.

<sup>34</sup>Mosukumwoci Kinko yoto piko ce mitowune yewunyi nyepo tay kule, ‘Akwa! Kikonok akwek Papamwani kupeyok, akwa kwonyoru poytoyisye nye kiceyiytowok kenī kuceke ye kicitany koret.

<sup>35</sup>Omnye kyoponte ani rupet, apaya akwek, kyoponte melelya, okono akwek peko, kyoyiku to, ntene atoroca ani akwek okwero korikwok.



<sup>36</sup>Kyoweti pöc nye moponte sira, alaca ani akwek. Kyomnyoni, anyaya ani akwek, ye kyomite mopusi, akwa akwek kwakäsa ani.’

<sup>37</sup>Mosukuwekyi yoto piko ce toponec kumwoci neto kule, ‘Mokoryontet, pesyo ne ye kicekösij acek kwomij rupet cepayij, nto ye kyomij melelya cekonij peko iye?’

<sup>38</sup>Pesyo ne ye kicekösij acek yiku to, cetorocij acek cekwerij korikyo, nto ye kimite pöc nye meponte sira cilacij acek nyi?’

<sup>39</sup>Pesyo ne ye kicekosij acek nyi mnyoni, nto ye kimite mopusi cekwa kwocekäsij?’

<sup>40</sup>Mosukuwekyi Kinko kumwoci picoto kule, ‘Kiy ake tokol nye kyoyici akwek akenke om mpo yeyamwani cutecu minkec kupëlis, kuce kyoyiwo ani akwek!’

<sup>41</sup>“Mosukumwoci Kinko yoto mpo piko co mitowune yewutap let kule, ‘Añete yu omite ani akwek cu kicupok Yiyintet! Ape wule mite mata nye momise nye kiceyiytoci Setani nyewo nyepo oyik oko malaykaniki!’

<sup>42</sup>Omnye kyoponte rupet, ntene otay akwek mopaya ani, kyoponte melelya, ntene oyetena mokono peko;

<sup>43</sup>kyoyiku to; ntene otay akwek motoroca okwero ani korikwok, kyoweti ani pöc nye moponte sira, ntene otay akwek molaca ani; kyomnyoni ani, oko ye kyomite mopusi, ntene otay akwek monyaya ani.’

<sup>44</sup>Mosukuwekyi mpecek picoto kumwoci neto kule, ‘Mokoryontet, pesyo ne ye kicekösij acek nyi ponte rupet oñkjetay mocepayij, nto ye kikwomij melelya, nto ye kiyiku to, nto ye kiweti pöc nye meponte sira, nto ye kimnyoni, nto ye kimite mopusi oñkjetay acek mocikalyij nyi?’

<sup>45</sup>Mosukuwekyi Kinko kumwoci picoto kule, ‘Kiy ake tokol nye kyotay akwek mokalye akenke om piko ce minkec ceyucu, kunye kipuryo kot oyiwo ani akwek yoto yisyet.’

<sup>46</sup>Mosukupa picoto wule mite toñonutec cepo kenysis nye mopoku, ntene kupa piko ce toponec wule mite soponto nye mopoku.’”

## Matayo 26

<sup>1</sup>Nteyu kowo kunetis Yesu okoy kuwany ñalecutecu tokol, kumwoci konomikiyi kule,

<sup>2</sup>“Oñkjet akwek kule om pesyosyek oyeny ce kwoni, mosukwek sakwetap Yutayek nye cekure Keytayet. Kunyo mosicenäm Weritap cito oñkyikoyito wocewuyitoci murtowontet.’”

<sup>3</sup>Yoto kutuyo tisik cewoyec oko poyikap Yutayek korurukikey kaytap Tisintet nyewo nye cekure Kayafa,

<sup>4</sup>oñkurwoc ñomnonet kule cenäm Yesu nye puryo konkete ci oñkyepakäc kume.

<sup>5</sup>Kumwoy cek kule, “Puryo kot kurok cenäm acek neto ye pesyet nyepo sakwet, omnye muce kwiw piko pararet.’”



- <sup>6</sup>Nteye kimite Yesu kotap Simon citap mutyenkenik om Pesaniya.
- <sup>7</sup>Yoto kuco korket ake wule mite neto nye kipontonu mwayta nye poŋu topon nye nyitat cupet nye kyole mwayata pesan ce caŋ. Kunäm mwayata oŋnkuroŋkyi metitap Yesu ye kimite kukepur kwomisiyi.
- <sup>8</sup>Nteye kotoköse konomik kuyunyo, kunyer cek kutep kumwoy kule, “Kociwurtoci ne mwayi tokol?”
- <sup>9</sup>Omnye kocimuce kyalya mwayi oŋnkyenyor pesan oŋnkyikoci pononik!”
- <sup>10</sup>Kunket Yesu ŋalecato kimwowu cekto, kumwoci kule, “Omne sayim akwek Cepyosyani? Kokwiwo ani neto ŋolyo nye nyolunot koromun.
- <sup>11</sup>Omnye opontekey okokoy oko pononik, ntene puryo kot opuri ani okokoy oko akwek.
- <sup>12</sup>Kito nye kakwiy neto kunyi koronkyi pormwani mwayi poŋu topon kuyiytowo ani muyisyet.
- <sup>13</sup>Kunyo komwowok ani akwek ŋalek cepo manta kule! Om wulyo tokol wule mocemwayte lokoywecu toponec, mosiceŋolole mpo ŋolyontoni kokwiwo ani cepyosyani cisote neto.”
- <sup>14</sup>Yoto kuwo akenke om konomik taman ok oyeny nye cekure Yuta Isikaryoti wule mite tisik cewoyec,
- <sup>15</sup>oŋnkuwo kumwoci kule; “Mosokono ani akwek ne ye kakonok ani Yesu okoy onäm?” Yoto kuyit tisik silinkinek sosom oŋnkukoci neto.
- <sup>16</sup>Kuceke yoto, kuceny Yuta poroyinto nye topon nye mokuŋomnte Yesu.
- <sup>17</sup>Nteye pesyet nyepo tayta nyepo sakwetap mukatyantet nye mokutunat, kukwa konomik ye kimite Yesu oŋnkutepe kumwoci kule, “Ono wule möce nyi kule woceyiytowuŋ acek wule meyomisye omikap kosoleny cepo sakwetap Keytayet?”
- <sup>18</sup>Kumwoci Yesu cek kule, “Ape wule mite citake nye minye moŋet, womwoci kule, ‘Komwoy konetintet kule, kakwitita pesyemwani nye kicekwey. Kunyo mosoyomisye ani kaŋuŋyi oko konomikwani sekwetap Keytayet.’ ”
- <sup>19</sup>Yoto kuyiyta konomik omik cepo kosoleny cepo sakwetap Keytayet kuyu wulo komwocini Yesu.
- <sup>20</sup>Ntowo kupunto kosoleny, kopur Yesu kwomis oko konomikyiyi taman ok oyeny.
- <sup>21</sup>Nteye kimite kwomisiyi, kumwoy kule, “Komwowok ani akwek kule, mosukuŋomnto ani akenke om akwek.”
- <sup>22</sup>Yoto kunerekis konomik oŋnkucec kutep ci ake tokol om cek kumwoy kule, “Mokoryontet, ani nyoto?”
- <sup>23</sup>Kuwec Yesu kumwoy kule, “Akenke om akwek nye mite kunoknoktoy mukatyantet nyenyi sanit akenke oko ani kunye mosukuŋomnto.



- <sup>24</sup>Mosukume Weritap cito kuyu wulo mwowu silutekap Yiyintet ñalek ce nöme neto, ntene mite kwapi koromun cito nyo mosukuñomnto Weritap cito! Kitopon nto kipuryo kot ceyi cico mpo kisic!”
- <sup>25</sup>Yoto kuñalal ñomntoyintet Yuta kumwoy kule, “Konetintet, ani nyoto mwowu nyi?” Kuwekyi Yesu kumwoci neto kule, “Kemwowu nyi nkit.”
- <sup>26</sup>Nteye kimite cek tokwomisyyi, kunäm Yesu mukatyantet oñnkusomnci kukasta Yiyintet, oñnkukoci konomikyiyi oñnkumwoy kule, “Onäm oyam, nyitenyi kunye pormwani.”
- <sup>27</sup>Oñnkunäm cikompet oñnkusomnci kukasta Yiyintet, oñnkukoci cek oñnkumwoy kule,
- <sup>28</sup>“Oye akwek tokol cutecu, omnye korotikwani cutecu cepo kirotyet nyelel, ce citotocini piko ce cañ sukuñet kunum miyotyonyik.
- <sup>29</sup>Komwowok ani kule, komo toye ani nfinyonicu okoy pesyet nye mosaye nfinyonik ce lelac oko akwek om wulin po poytoyisyetap Papamwani.”
- <sup>30</sup>Yoto kutum cek tumnto oñnkunomen kupa okoy tulwetap ketik ce cekure Seituninek.
- <sup>31</sup>Yoto kumwoci Yesu cek kule, “Mosomwey akwek tokol om kwomuwap pesyoni oñnkopakakta ani nkit, omnye mwowu silutekap Yiyintet kule, ‘Mosukupar Yiyintet mesewontet, yoto kuseret kecirek.’
- <sup>32</sup>Ntene om letut ye kacinjeta ani atutune met, mosontowok anyosye awo Kalilaya.”
- <sup>33</sup>Kuwekyi Petero kumwoci Yesu kule, “Nka kot komwey piko alak tokol, puryo kot oyostiñ ani nyi mpo kisic!”
- <sup>34</sup>Kumwoci Yesu neto kule, “Oñnkisot ñalecu! Kutompo kot koncur kurkonkit aret somok om kwomowutap pesyoni, mesetuckey nyi aret somok mwowu kule monketo ani.”
- <sup>35</sup>Kuwekyi Petero kumwoci kule, “Puryo kot omuci ani mpo kisic kot atuckey omwowu kule monketiñ nyi, nka kot koyek met cepoku mpo tukway.” Kumwoy konomik cut alake tokol kuyunyoto.
- <sup>36</sup>Yoto kuwo Yesu oko konomikyiyi okoy kupunto mparet ake nye cekure Kesese mane oñnkumwoci konomikyiyi kule, “Opur yuteyu awo ani wosom om yun.”
- <sup>37</sup>Kuwetokey neto Petero oko werikap Sepetayo oyeny. Yoto kucec Yesu kunerec kumuy oñnkusot koromun.
- <sup>38</sup>Kumwoci neto cek kule, “Oponte nerekwec ce cañ koromun om mukuleymwani kot karik kupakäca. Opur yuteyu, oñnkokany cekösu oko ani monte ceruye.”
- <sup>39</sup>Kuwo neto kunata tay kuminiñ oñnkuyim kukutuny, oñnkusom kumwoy kule, “Papanyu, numuneno ani toññotecu ye mukoktos, ntene puryo kot kuyu wule omoktoy ani, ntene kuyu wulo moktoy nyi!”





- 40 Yoto kuweckey kuco ye kimite konomik somoku, cokunyor kumite kukoruy. Kumwoci neto Petero kule, “Puryo so kot omuc akwek kot okösu oko ani awany mpo sawet akenke?”
- 41 Kunyo okösu, oñkosom sukuñet monte osuci syemutok. Cöme mukuleyto, ntene puren porto.”
- 42 Kuwo Yesu yec nyepo oyeny oñkuwo kusom kumwoy kule, “Papanyu, ye puryo kot komukoktos kukeytena ani toñonutecu, ntene möce nyi kule opunte ani, kante kwi yokis ce möce nyi.”
- 43 Kuweckey yec kuco cokunyor konomik kumite kukoruy omnye kikinäm rwonto nyewo.
- 44 Kuwo Yesu yec kupakakta cek oñkuwo wokusom aret nyepo somok kumwoy ñalek ce kerkey cokey co komwowu om panta nyepo tay.
- 45 Oñkuweckey kuco ye kimite konomik oñkuwo kumwoci cek kule, “Tomite akwek oruytosi omunyi? Akäs! Karik sawet nye ce nöme Weritap cito oñkyikoyito kunäm piko co ponto miyotyoni.
- 46 Oñetye cipe! Akäs oñyi cito nyo ñomnto ani!”
- 47 Nteye kimite Yesu tokuñolole, kupun Yuta akenke om konomik taman ok oyeny kupontonukey oko luket nyepo piko ce cañ ce kiponto rotokap cok oko korokonik. Picoto kuce kiyoku tisik cewoyec oko poyikap Yutayek.
- 48 Kikikoporci Yuta picoto pelutyet kumwoci kule, “Cito nye katoroc ani añatut kunye cito nyoto, anäm nyoto!”
- 49 Ntowo kupun Yuta, yoto kuwo pakenke okoy ye kimite Yesu, oñkusupay kule, “Konetintet, purte nyi kalyet.” Oñkuñatut.
- 50 Kuwekyi Yesu kumwoci neto kule, “Corwenyu! Sorci lakwar yiy kito nye möce kule ayiy.” Yoto kukwa piko cut kwokunäm Yesu oñkurate topon.
- 51 Kocut cito akenke nye kipontokey Yesu rotwetap cok oñkuyep kulot yitit nyepo mutworintetap tisintet nyewo.
- 52 Kumwoci Yesu cicoto kule, “Ketyi cokiñuñ ye komite! Omnye piko ce yiyisyey rotokap cok kuce pore picoto rotokap cok.
- 53 Puryo kot nket nyi kule omuci ani kot okur kokolyoyisyey kucone wule mite Papamwani oñkuyokwo ani lakwar sikarek cepo Malaykanik ce keyite lukosyek taman ok oyeny?”
- 54 Ntene ye yunyo, komuce kulene kwitita kupoyit manta silutekap Yiyintet co mwowu kule, musukwitita ñalecutecu om aret nye yunyitenyi?”
- 55 Yoto kuñololyi Yesu luket nyepo piko kumwoci kule, “Kakwa akwek kuyunye omöce kule cenäm corin? Omnye kakwante rotokap cok oko runkunek. Nteyu



kwopuri ani pesyosyek tokol onetisiyi om kotap Yiyintet, ntene puryo kot anäma ani akwek yoto.

<sup>56</sup>Ntene kokwiyokis ñalecutecu tokol sukuñet kwitita kupoyit manta ñalek co kisil workoyik om silutekap Yiyintet.” Yoto kumwey konomik tokol kupakakta Yesu.

<sup>57</sup>Kunäm cek Yesu oñnkukwer okoy kupunto kaytap Kayafa Tisintet nyewo, wule kikikorurukikey konetikap ntarastinek oko poyik.

<sup>58</sup>Kurup Petero cekto let kuloyityi kuminiñ okoy kupunto sañntap kaytap Tisintet nyewo. Yoto kuwo Petero kayta orit oñnkopur ñony wanak oko sikarek ce kiripsi kule sakas wule mukupeta ñalek tokol.

<sup>59</sup>Yoto kusyem yoto tisik cewoyec poyik oko piko cepo kokwet kule ceceny piko muncururwanik ce komwoy lelisto nye nöme Yesu kule sukuñet cepakäc kume,

<sup>60</sup>Ntene kipuryo kot kunyor ñolyo nyepo lelis mpo akenke, nka kot kiyonñ piko alake ce cañ oñnkumwoy ñalek cepo mwiynan ce nöme neto. Nto om letut kukwa piko alake oyenku oñnkwokuyonñ tay,

<sup>61</sup>oñnkumwoy kule, “Kumwoy cici kule, ‘Omuci oturpup kotap Yiyintet oñnkatec yec om pesyos somok pate.’ ”

<sup>62</sup>Kuyo Tisintet nyewo oñnkumwoci Yesu kule, “Puryo kot ñololi wec ñalekyu cewosontyiñ nyi?”

<sup>63</sup>Ntene kuis Yesu tokol. Kuñalal Tisintet nyewo yec kumwoci kule, “Omöce ani kule walkey nyi yawut om kaynetap Yiyintet nye sopot! Mwowec acek, yiku nyi Dapanet Weritap Yiyintet?”

<sup>64</sup>Kuwekyi Yesu kumwoci kule, “Kemwowu nyi, Ntene komwowok ani akwek tokol kule kuceke yawut kuwo tay, mosokäs Weritap cito kumite kepure komostap yewut nyepo tay nyepo Yiyintet nyepo kamukeywek tokol, oñnkucone polik cepo torot!”

<sup>65</sup>Om ñalecato, kuye kupac Tisintet nyewo sirokyi oñnkumwoy kule, “Kanyil Yiyintet? Komo cemöce acek yec piko muncururwanik alak! Kunyo kalim akwek om yuteyu ñalekyi ce miyotec.

<sup>66</sup>Osoi akwek kulene?” Kuwec piko kumwoy kule, “Lelat, kunyo misiyini cepakäc kume.”

<sup>67</sup>Yoto kuñutyi cek neto oñnkutuluc, oñnkusyec alake,

<sup>68</sup>Kumwowu kule, “Nyi Dapanet, ñor mwowec acek ño nyi kopiriñ nyi!”

<sup>69</sup>Kimite Petero yoto kukepur yepo kayta sañ, yoto kuco korko nye mutworin nyepo Tisintet nyewo ye kimite neto oñnkumwoy kule, “Kepontekey mpenyi Yesu nyepo Kalilaya.”

<sup>70</sup>Ntene kutuckey kutoyis Petero om taytap piko tokol kuwec kumwoy kule, “Puryo kot oñnket ani ñalek ce mwowu nyi.”



<sup>71</sup>Kunomen Petero kuwo yepo kurket nyepo kayta saŋ. Yoto kukäs cepto ake nye mutworin Petero, kumwoci cepto piko ce kimite yoto kule, “Kopontokey cici oko Yesu nyepo Nasaret.”

<sup>72</sup>Kutuckey Petero yec kuwalkey kumwoy kule, “Puryo kot oŋnket ani cico.”

<sup>73</sup>Nto om letut yec kuminij kukwa piko ce kimite keyoŋ om yoto kimite Petero oŋnkumwoci kule, “Yiku nyi manta akenke om cekto, omnye poru ŋalaleŋuŋ.”

<sup>74</sup>Yoto kuwalkey Petero kucupkey kumwoy kule, “Kupar asis! Puryo kot oŋnket ani cico.” Yoto pakenke koncur kurkonkit,

<sup>75</sup>kusot Petero ŋalek co kumwowu Yesu, “Kutompo kot koncur kurkonkit aret somok, mesetuckey nyi taya ani aret somok mwowu kule monketo ani.” Yoto kuwo saŋ oŋnkurir lokik ce caŋ koromun.

## Matayo 27

<sup>1</sup>Ntowo kuyec koret pate, kurwoc tisik cewoyec tokol oko poyikap Yutayek aret wule sukuŋet kupakäc Yesu kume.

<sup>2</sup>Kurate cek neto nyororonik oŋnkukwer kuwo wule mite poytoyintet Pilato.

<sup>3</sup>Nteyu kowo kukäs Yuta ŋomntoyintet kule kocemutyi Yesu musankut cepakäc kume, yoto kurenynkey oŋnkunäm silinkinekye sosom oŋnkusutyi tisik cewoyec oko poyik.

<sup>4</sup>Kumwoy kule, “Kwalel ani ayiy miyotyet aŋomnte korotikap ci nye moponto lelis!” Ntene kuwec cekto kumwoy kule, “Puryo kot kunömec acek lelisto nyepo ŋalekyo, nyeŋuŋ lelisto nkit!”

<sup>5</sup>Kuwirci Yuta pesanik kotap Yiyintet, oŋnkunomen kuwo wokuketkey nkit.

<sup>6</sup>Kukwey tisik cewoyec pesanik oŋnkumwoy kule, “Pesanicu kuce kucale koroti, kunyo puryo kot kucöme ntarastinekyacek cekonore wule mite pesanikap kotap Yiyintet.”

<sup>7</sup>Nteyu kowo kucömnin cek kwale pesanicato mparetap cito nye yiye terenik sukwek mparanato mparet nye cemucini toyek ce kopok.

<sup>8</sup>Kunyo sukuŋet cekure maswanato, “Maswetap koroti”, okoy kunyi.

<sup>9</sup>Yoto kwitita kupoyit manta ŋalek ce kiŋalal workoyontet Yeremiya kumwoy kule, “Kinäm cek silinkinek sosom pesanik ce kikicäm pikap Israel kule kyale neto

<sup>10</sup>oŋnkwiysisye cekto pesanicato kwale mparetap cito nye yiye terenik, kuyu wulo kikumwowo ani Mokoryontet.”

<sup>11</sup>Kuyone Yesu taytap poytoyintet, kutepe poytoyintet neto kule, “Yiku nyi kinko nyepo Yutayek?” Kuwekyi Yesu kumwoci kule, “Kemwowu nyi.”



- <sup>12</sup>Kuwosontyi tisik cewoyec oko poyik Yesu, ntene kuis Yesu nye puryo kot kuwec ɲolyo.
- <sup>13</sup>Kumwoci Pilato neto kule, “Puryo kot lime ɲalek tokol cu wosontyiɲ nyi cek?”
- <sup>14</sup>Yoto kutay Yesu mawec ɲolyo mpo akenke okoy kukite poytoyintet koromun.
- <sup>15</sup>Kwak okokoy ye pesyetap sakwet nyepo Keytayet, kiponto poytoyintet kopurto nye tyoktoy mopusyontet ake tokol nye kosom piko neto.
- <sup>16</sup>Kimite yoto mopusi mopusyontet ake nye sokoran nye cekure Parapa.
- <sup>17</sup>Nteyu kowo koruruckey piko kutepe Pilato cek kule, “Oɲnkono nye omöce akwek kule otyokwok ani, Parapa nto Yesu nye cekure Dapanet?”
- <sup>18</sup>Omnye kinket Pilato kule kokwer cek Yesu kwokuwosontyiine wule mite neto om corokyi not pate.
- <sup>19</sup>Nteye kimite Pilato kukepure ɲeceret nye mute musankunek, kuyok korkenyi ɲolyontet kumwoci kule, “Mente kot ayiye kiy cico moponto lelis, omnye kwetanjanya ani koromun kirwotik cepo ɲalek ce nöme neto.”
- <sup>20</sup>Ntene kowurur tisik cewoyec oko poyik luket nyepo piko kumwoci kusom Pilato kutyac Parapa oɲnkupakäc Yesu kume.
- <sup>21</sup>Ntene kutepe poytoyintet cek kule, “Oɲnkono om picutecu oyeny nye omöce kule otyokwok ani akwek?” Kuwec cek kumwoy kule, “Cemöce Parapa!”
- <sup>22</sup>Kutepe Pilato cek kule, “Kunyo omöce akwek kule ayiye ani ne Yesu nye cekure Dapanet!” Kuwec piko tokol kumwoy kule, “Wuyitoci murtowontet!”
- <sup>23</sup>Ntene kutepe Pilato cek kule, “Omne, kukwiyy lelis ne?” Yoto kutosyikey piko kupol koromun kumwoy kule, “Wuyitoci murtowontet!”
- <sup>24</sup>Ntowo kukäs Pilato kule komomuci kot akalye mpo kisic, oko yec kule muce kucec pararet, yoto kunäm peko oɲnkowun yewuniyekyi om taytap piko tokol, oɲnkumwoy kule, “Puryo kot oponte ani lelis om korotikap Cici! Nömok akwek nkit lelisto!”
- <sup>25</sup>Kuwec piko tokol kumwoy kule, “Kunämece acek lelisto nyepo korotikyiki oko lekokyacek!”
- <sup>26</sup>Yoto kutyokyi Pilato cekto Parapa, oɲnkumwayta cepas Yesu oɲnkukoyito cekwer wocewuyitoci murtowontet.
- <sup>27</sup>Kukwer sikarekap Pilato Yesu kuwo kaytap Poytoyintet orit, oɲnkorurukikey luket nyepo sikarek tokol komut Yesu.
- <sup>28</sup>Konumune sirokyi oɲnkulokyi siret nye mur kwarra,
- <sup>29</sup>oɲnkuta nkwyatet nyepo kotok oɲnkukoci metinyi, oɲnkukoci kunäme korokto yewutap tay, oɲnkukutuɲe yepo taynyi, oɲnkucasekey kumwoy kule, “Cisupoyiɲ kinko nyepo Yutayek! Ilaɲnte!”



- <sup>30</sup>Kuṅutyi cek neto oṅnkunumune korokto kupire metit.
- <sup>31</sup>Nteyu kowo kucasekey cek okoy kupok, kunumune siret nye mur kwarra oṅnkuketyi kulokyi sirokyi oṅnkukwer kuwo wocewuyitoci murtowontet.
- <sup>32</sup>Nteye kimite cek kupeti, kutuye citake nyepo koretap Kurene nye cekure Simon, yoto kukerci cek neto koṅ kukonop murtowontetap Yesu.
- <sup>33</sup>Kupa cek okoy ye cekure, “Kolokosa” nye poru kule “Rokyetap Metit.”
- <sup>34</sup>Kukoci cek neto kuye nfinyonik ce mwonec ce kacetase akatanet. Ntowo kucemcem Yesu, kutay maye.
- <sup>35</sup>Kuwuyitoci cekto neto murtowontet oṅnkupcicin sirokyi kuporci kirot.
- <sup>36</sup>Nto kapok, kopur cek ṅony oṅnkurip kukās Yesu.
- <sup>37</sup>Kutore yepo metinyi parak ṅalek cepo musankunyi ce kicesil kule, “Nyi ku Yesu Kinko nyepo Yutayek.”
- <sup>38</sup>Cewuyitoci corik oyeny murtowonik oko Yesu, kopurune ake yewunyi nyepo tay, nto ake kopurune yewunyi nyepo let.
- <sup>39</sup>Kulelec metewokwa piko ce kimite kupeti kutile om aran oṅnkucup cek neto kumwoy kule,
- <sup>40</sup>“Nyi nyo kwemöce kule aturpup kotap Yiyintet oṅnkitec yec om pesyosyek somok! Sopkey ra nkit rekune murtowontet ye yiku nyi Weritap Yiyintet.”
- <sup>41</sup>Koncurururis kuyunyoto mpecek tisik cewoyec oko konetikap ntarastinek oko poyik kumwoy kule,
- <sup>42</sup>“Kwesope neto piko alak, ntene kunyo puryo kot komuce kusopkey neto nkit. Puryo kot ku Kinko neto nyepo Israel? Ye korekune neto yawut murtowontet, mosiciyen acek ṅalekyi.
- <sup>43</sup>Kwenekey neto Yiyintet, kumwowu kule oyiku Weritap Yiyintet, kunyo cemöce cekās oṅnkomuce cokusop Yiyintet neto yawut!”
- <sup>44</sup>Kucup mpo corik ce kicewuyitoy oko neto kumwoci ṅalek ceyucoto.
- <sup>45</sup>Ntowo kupunto sawet pet kwen, kunäm menonet kutuyit koret tokol nye kipur kuwany sawanik somok.
- <sup>46</sup>Ntowo kurik kupunto sawet sokol nyepo kosoleny kuṅalal Yesu kukurto om kutit nyewo kumwoy kule, “Eli, Eli, lema sapaksani.” Ce mwowu ṅaleca kule, “Yiyintenyu, Yiyintenyu, omne seyasta ani nyi?”
- <sup>47</sup>Nteye kotolime piko ce kimite keyoṅ yoto ṅalekyi, kumwoy cek kule, “Mite kukure Eriya!”
- <sup>48</sup>Kulapat lakwar akenke om picoto oṅnkunum cankut oṅnkolumnta wule mite nfinyonik oṅnkurutyi tekantet oṅnkusyem kule cikoci kuye.



- <sup>49</sup>Ntene kumwoy piko alake kule, “Tekany pa, cekäs oṅnkuconi Eriya cokusop neto!”
- <sup>50</sup>Kuṅalal Yesu yec om kutit nyewo, oṅnkomuny komuṅnto nyepo letut.
- <sup>51</sup>Yoto kukerer siret nye cepciye kotap Yiyintet kuceke met okoy kel, oṅnkuriṅriṅ koret, kutesis rwontok,
- <sup>52</sup>kuyotokis mwenonik ce kicetupci muswek, kuṅetye kotutune met piko cepo Yiyintet ce kipok.
- <sup>53</sup>Kuṅetye picoto mwenonik, nto om letut yu kowo kotutune met Yesu, kupa picoto okoy moṅet Nyetilil wule kiwo kukäse piko ce caṅ cek picoto.
- <sup>54</sup>Yoto kukäs nyewo nyepo sikarek oko sikarek ce kipontokey ce kiripe Yesu koriṅriṅetap koret oko tukuk tokol ce keyokis, kumuyo cek koromun kumwoy kule, “Koko Weritap Yiyintet cici manta!”
- <sup>55</sup>Kimite yoto koruk ce caṅ ce kimite ye low kuminiṅ ce kimite kuköse Yesu. Korucoto kuce kikwoni kurupu Yesu kuceke Kalilaya sukukolyoy yisyet.
- <sup>56</sup>Om cek coto ku Mariyam nyepo Maktala, oko Mariyam Kametitap Yakopo oko Yosep, oko kametitap werikap Sepetayo.
- <sup>57</sup>Ntowo kupunto kosoleny, kuco citake nye mokoryo nyepo koretap Arimaseya nye cekure Yosep nye kikikwek konomintetap Yesu.
- <sup>58</sup>Yoto kuwo neto wule mite Pilato oṅnkusom cikoci portap Yesu. Kumwayta Pilato cikoci neto musto.
- <sup>59</sup>Kunumune Yosep porto murtowontet oṅnkurate sukut nyelel,
- <sup>60</sup>oṅnkukoci mwenenyi nkit nye kutokupole yepo rwantet nye kepenet, oṅnkunäm rwantet nyewo kukere kurketap mwenet oṅnkunomen kuwecikey.
- <sup>61</sup>Kimite yoto kukepur kutokyikey mwenet Mariyam nyepo Maktala oko Mariyam nyin ake.
- <sup>62</sup>Nteye kipesyet nyepo oyeny, nyoto ku pesyet nye rupe pesyet nyo ceiytoykey. Kutuyo tisik cewoyec oko Farasayek oko Pilato,
- <sup>63</sup>oṅnkumwoci cek Pilato kule, “Mokoryontet, kacisot acek ṅalek ce kimwoy mwintoni ye kitokusope kule, ‘Mosotutune met om letutap pesyosyek somok’.
- <sup>64</sup>Kunyo mwayte cerip mwenet topon okoy kupok pesyosyek somoku, sukuṅet mente kupa konomikiyi wokucor musto oṅnkumwoci piko kule, ‘Kokotutune met.’ Mosukuwoyit koperperisyet nyepo letut kusir nye kipo tay kunyo.’”
- <sup>65</sup>Kumwoci Pilato cekto kule, “Oponte akwek sikarek ce ripsi, ape worip topon koromun kuyu wule omuktoy.”
- <sup>66</sup>Kunomen cek kupa oṅnkuwokuker mwenet topon kukoci pelutyet nye poru oṅnkukoci sikarek kurip.





## Matayo 28

- <sup>1</sup>Ntowo kupok pesyetap Sapat, nye kerir koret pate ye pesyetap Santey, kuwo Mariyam nyepo Maktala oko Mariyam nyin ake wokukäs mwenet.
- <sup>2</sup>Yoto koriñriñ koret koromun, kucone malayketap Mokoryontet torot cokuwunukto rwantet oñnkopure parak.
- <sup>3</sup>Kikerkey tonto nyenyi oko kaweket nyepo ilat, oñnkulelac sirokyi piw kuyu plelityet nyepo koyantet.
- <sup>4</sup>Kumuyo kupoton sikarek ce kiripsi koromun kukerkeyitu pic ce kapok.
- <sup>5</sup>Kuñololyi malayket korucoto kumwoci kule, “Monte cemuye, oñnket ani kule ocenye akwek Yesu nyo kucewuyitocini murtowontet.
- <sup>6</sup>Puryo kot kumite yu, kokotutune met kuyu wulo kimwayta neto. Akwa pa yu kwakäs ye kucemuci.
- <sup>7</sup>Kunyo ape yawut asartekey lakwar womwoci konomiky kule, ‘Kokotutune met’, kunyo mite yawut kontowok akwek kuweti Kalilaya wule mawanyorte! Kunyo möce asot ñalek ce komwowok ani akwek.’”
- <sup>8</sup>Yoto kusartakey cek kupete yepo mwenet kukomuyo oñnkuñerekotin. Kurway cek wokumwoci konomiky.
- <sup>9</sup>Yoto pakenke kutuye Yesu cek oñnkutakwes kule, “Takwenyo.” Kukwa cek kuric Yesu oñnkukutuny kunäm kerekoky kusay.
- <sup>10</sup>Kumwoci Yesu cek kule, “Monte cemuye, ape womwoci mpo yeyamwani konomik kupa Kalilaya wule mosukukäsena ani cekto.”
- <sup>11</sup>Nteye kimite koruk aran kupeti, yoto kupa sikarek alake co kiripe mwenet okoy kupunto moñet oñnkuwo kumwoci tisik cewoyec ñalek tokol ce kokwiyokis.
- <sup>12</sup>Koruruckey tisik cewoyec oko poyik oñnkurwoc ñomnonet. Kukoci cek sikarek pesanik ce cañ,
- <sup>13</sup>oñnkumwoci kule, “Möce omwowu kule, kukwa konomiky komoy cemite acek koceruye oñnkwokucor musnyi.
- <sup>14</sup>Nteye kalim poytoyintet ñalecutecu, mosiceñololyi acek neto okoy cimukte nye komo oponte akwek ñolyo ake tokol nye omuye.”
- <sup>15</sup>Kunäm sikarek co kiripsi pesanik, oñnkwiyy kuyu wulo kocemwoci cekto. Kutisto ñolyontono om wule mite Yutayek tokol okoy pesyoni.
- <sup>16</sup>Kupa konomik tamanu ok akenke okoy tulwet ake om Kalilaya wule kikumwoci Yesu cek kupa wuloto.
- <sup>17</sup>Nteye kotoköse cek neto kukutunje yepo taynyi kusay nka kot kipuryo kot kucömis alake om cekto.



<sup>18</sup>Kunokyi Yesu ye mite cekto oṅnkumwoci kule, “Kacekono ani kamukeywek tokol om torot oko koret ṅony.

<sup>19</sup>Kunyo ape wule mite piko cepo koret tokol kumukul, wanet kwek konomik, wapatan om kaynet nyepo Papa, oko nyepo Werit, oko nyepo Muyet Nyetilil,

<sup>20</sup>oṅnkonet kuywey ṅalek tokol co kyomwowok ani akwek. Kunyo möce oṅnket kule opontekey ani oko akwek okokoy pesyet nyepo letut.’’



## Marko

### Marko 1

- <sup>1</sup>Yunyi wule yunto lokoywek ce toponec ce nöme Yesu Kristo, nye Weritap Yiyintet.
- <sup>2</sup>Kicec kuyu wulo kisil workoyontet Isaya kule: “Mwowu Yiyintet kule: Akäs pa, oyoku ani kiyokintenyu kuntowuñ nyi; nye mosukutemuñ areñuñ.
- <sup>3</sup>Kapole citake kitela; ayiytoci Mokoryontet arenyi, asat kurotakay arenyi nye mosukupunte!”
- <sup>4</sup>Yoto koporkey Yowana om koretap kitela, oñnkupatisan piko oñnkumwoci lokoywekyi kule, “Arenynkey ayaste miyotyoniwkwo oñnkyepatisanak sukuñet kukalyak Yiyintet miyotyoniwkwo.”
- <sup>5</sup>Yoto kupa piko tokol cepo koretap Yuteya oko cepo moñetap Yerusalem wule mite Yowana wokulimnta ñalekyi. Kurenynkey cek kuñuñ kupor miyotyoniwka oñnkupatisan Yowana cek om oyinetap Yortan.
- <sup>6</sup>Kiloce Yowana yoto siret nye kicenape kororikap tyonyntake nye cekure nkamiyet oñnkurate anwet suwenyi. Kikwome talamik oko kumnyatetap samiyita.
- <sup>7</sup>Kumwoci Yowana piko ñalek kule, “Coni om letumwani citake nyewo nye ponto swamet kupëlo ani, nye puryo kot kuyemo oyimnci añnkatyac porokap kweyoniky.
- <sup>8</sup>Opotisonenok ani yawut peko, ntene mosukupatisanenak Muyet Nyetilil.”
- <sup>9</sup>Om pesyosyecoto, kucone Yesu moñetap Nasaret om koretap Kalilaya, yoto kupatisan Yowana Yesu om oyinetap Yortan.
- <sup>10</sup>Nteye kimite neto kuloñune peko, kukäs pakenke kuyatakay wulin po torot oñnkuco kurekyi Muyet Nyetilil neto nye kerkey swarar.
- <sup>11</sup>Yoto kucone kutit torot kumwoy kule, “Yiku nyi Werimwani camanet, oñerekyiñ ani nyi koromun.”
- <sup>12</sup>Yoto pakenke kukwer Muyet Nyetilil Yesu kuwo okoy kitela.
- <sup>13</sup>Kopur Yesu wuloto po kitela kuwany pesyosyek artam; kusyem Setani nyewo nyepo oyik, kule olotu Yesu. Kipontokey neto om wuloto tyoñikap kitela pate. Ntene kukwa Malaykanik kwokukalya neto.
- <sup>14</sup>Nto om letut yu kowo cenäm Yowana cekerta mopusi, yoto kuwo Yesu okoy Kalilaya kumwoytoti lokoywek ce toponec ce kwone wule mite Yiyintet.
- <sup>15</sup>Kumwoy kule, “Kacontyok akwek pesyet nyo kicekwey, kunyo karik poytoyisyetap Yiyintet! Arenynkey ayaste miyotyoniwkwo oñnkocäm lokoywek ce toponec.”
- <sup>16</sup>Nteye kimite Yesu kuweti kurupe tapantap tampayayetap Kalilaya, yoto kukäs Yesu Simon oko mutakwam Antereya ce kimite kuwircini porok tampayayet omnye kinömik ce nöme purpurunek.




- <sup>17</sup>Kumwoci Yesu cek kule, “Akwa arupa cepetekey ani, mosokonok yisyet nye okweru piko.”
- <sup>18</sup>Yoto pakenke kupakakta cek porokwa oṅnkurup kupetakey Yesu.
- <sup>19</sup>Yoto kuwo tay kuminiṅ, kukäs Yesu Yakopo oko Yowana werikap Sepetayo ce tupco ce kimite rapemwa kuyiytoy porokwa.
- <sup>20</sup>Yoto pakenke ntowo kukäs Yesu cek, yoto kukur cekto. Yoto kupakakta kwan Sepetayo kumite kupontokey oko piko ce kikwiysisi oṅnkupetakey cek Yesu.
- <sup>21</sup>Kukwa cek okoy kupun moṅetap Kapernaum. Nteye kipesyetap Sapat nye kirupe, kuwo Yesu kotapkok oṅnkucec kunetis.
- <sup>22</sup>Kukite piko ṅalek ce kinet omnye kinet ṅalek ce nyikisec ce ponto kamukeywek ce puryo kot kuckerkey oko wule netitoy konetikap ntarastinek.
- <sup>23</sup>Yoto pakenke kuco kotapkokwonoto citake nye kiponto oyinot nye miyat oṅnkupol kumwoy kule,
- <sup>24</sup>“Mokenec ne acek nyi Yesu nyepo Nasaret? Keco kule kyarantec acek? Oṅnketiṅ ani kule yiku nyi Nyetilil nyepo Yiyintet!”
- <sup>25</sup>Yoto kupolyi Yesu oyinot nye miyat kumwoci kule, “Sis! Dete cito!”
- <sup>26</sup>Kunäm oyinoto nye miyat cicoto kupotan kwapi oṅnkupol om kutit nyewo oṅnkuṅet kuwecikey.
- <sup>27</sup>Kukite piko tokol koromun okoy kucec kutepekey nkit kumwoy kule, “Dolyo ne nyi? Konetisyet nyi nyelel? Ponto cici kamukeywek ce muce mpo kot kupayta kupolyi oyik ce miyotec oṅnkulimnci.”
- <sup>28</sup>Yoto kutisto lokoywekap Yesu kupunte wulyo tokol om Kalilaya.
- <sup>29</sup>Kunomen cek kupete kotapkok okoy kupunto kotap mpo Simon oko Antereya; kupetakey Yakopo oko Yowana.
- <sup>30</sup>Kimite yoto kukuru kwiriri kumnyone yeset cepyosyetap pikoy nyepo Simon. Kumwoci piko Yesu portap cepyosyanato.
- <sup>31</sup>Kuwo Yesu okoy ye kimite neto, oṅnkunäm yewut kukalya kuṅet, yoto pakenke kusope cepyosyanato yeset oṅnkucec kukalya cek kwici yisyonutek.
- <sup>32</sup>Ntowo kwimen koret pesyonoto kacumukta asista, kukwer piko piko tokol ce kimnyontos oko ce kiponto oyik kukwa wule mite Yesu.
- <sup>33</sup>Yoto korurukikey piko tokol cepo moṅet ye kipo kurketap koto nye kimite Yesu.
- <sup>34</sup>Kusop Yesu om yoto piko ce caṅ ce kimnyontos porwonik wok tokol, oṅnkukwet oyik ce caṅ. Kuyete Yesu oyik moṅalal ṅolyo, omnye kinkete oyik kule neto ku ṅo.
- <sup>35</sup>Nto kerir koret pate nye tokutuy; kuṅet Yesu kunomene moṅet kuwo okoy kupunto koret surukwenet wokusom om wuloto kwine nkit.



- <sup>36</sup>Ntene kupa mpo Simon oko piko ce kipontokey okoy surukwenet kuceṅoti neto.
- <sup>37</sup>Ntowo kunyor kumwoci kule, “Mite piko tokol kuceṅatiṅ nyi.”
- <sup>38</sup>Kuwekyi Yesu kumwoci cek kule, “Okany cipe cetosyikey okoy cepunte soṅwek alak ce lekitec saṅet wamwayte wuloto ṅalek; omnye kyocontyi ani ṅalek coto.”
- <sup>39</sup>Kuwesetot Yesu yoto komut koretap Kalilaya tokol kumwoytoti ṅalekap Yiyintet om korikapkokwonik oṅnkukwet oyik.
- <sup>40</sup>Kuco citake nye kinām mutyenkenik okoy ye kimate Yesu, oṅnkukutuny kusom kakalyayet kumwoci kule, “Ye kecām nyi nkit mucu sopo ani!”
- <sup>41</sup>Yoto kurotot Yesu cicoto okoy kurire kukalya, kuyito yewunyi oṅnkunām cicoto kumwoy kule, “Omoce ani, kunyo sop nyolu!”
- <sup>42</sup>Kusopco om yoto pakenke mutyenkenik ce kiponto cicoto.
- <sup>43</sup>Kumwoci Yesu cicoto kunomen kuwecikey oṅnkunkolontyi kumwoci kule,
- <sup>44</sup>“Lim pa, mente womwoci citake tokol ṅalecu, ntene iwo lakwar wule mite tisintet oṅnkikany kukäsiṅ, nteye kapok koyte kokotutyet nyo kimwoy Moses, sukuṅet porci kunket ci tokol kule kwesop nyi.”
- <sup>45</sup>Ntene kunomen cicoto kuwo wokumwaytat ṅalecato om wulyo tokol. Kumwaytat kutisto ṅalek okoy komokomukoktos kot kuwo Yesu kowut moṅet koporukey, ntene kopurune neto surukwenet. Yoto kukwane piko koret wulyo tokol kukwa wule mite Yesu.

## Marko 2

- <sup>1</sup>Om letutap pesyosyek ce ṅeri, kuweckey Yesu kuco okoy Kapernaum, yoto celim kule kaco neto kamwa.
- <sup>2</sup>Kukwa koruruckey piko ce caṅ okoy kupot poroyinto wule mokopure, nka mpo yepo kurket saṅ. Kimwocini Yesu cek yoto lokoywek cepo Yiyintet.
- <sup>3</sup>Yoto kukwa piko alake amwanu wule mite Yesu ce kitoronu citake nye kipok kerekok.
- <sup>4</sup>Omnye kicaṅit piko nye kipuryo wule kimuce cek kopunte cicoto okoy wule mite Yesu. Kulany cek koto kisyek oṅnkuput kisyekut ye kimate Yesu. Nteyu kowo kuyatakay yosico, kopunte cicoto yoto kumite kwiririt nye korwoye.
- <sup>5</sup>Ntowo kukäs Yesu koyenet nye kiponto picoto, kumwoci cicoto kipok kerekok kule, “Werinyu, kacikalyiṅ miyotyoniuk.”
- <sup>6</sup>Kusot konetikap ntarastinek alake ce kimate yoto kukepur oṅnkunjalal kwicek nkit kumwoy kule,
- <sup>7</sup>“Do cici ṅolole ṅal ce nyile Yiyintet? Do nye mucu kukalya miyotyoniuk nye puryo kot ku Yiyintet nkit!”



- <sup>8</sup>Yoto pakenke konket Yesu n̄alek ce kimite cek kusote om montuwokwa, kumwoci neto cek kule, “Omne sasot akwek n̄al ceyuco oṅkotintentyine om kasoteywekwok?”
- <sup>9</sup>Oṅnkono nye lekit, cemwoci cito nyi kipok kerenkok kule, ‘Kacikalyiṅ miyotyoniuk!’ Nto ye kocemwoci kule, ‘Det yony, oṅnkinām tor kwiririṅṅ wesetote?’
- <sup>10</sup>Kunyo mosoporwok ani n̄alek cepo manta kule ponto Weritap cito kamukeywek om koret kukalya miyotyoniuk.” Yoto kumwoci Yesu cito nye kipok kerenkok kule,
- <sup>11</sup>“Komwowuṅ kule, ṅet yony, oṅnkinām tor kwiririṅṅ nomen iwo ka.”
- <sup>12</sup>Kuṅet cicoto kuyunyoto oṅnkunām kotor kwiririnyi oṅnkunomen kuwo kusartakey kuköse piko tokol. Kokite piko tokol koromun oṅnkukasta woyintap Yiyintet kumwoy kule, “Tompo kot cekäs kenysis ṅolyo nye yunyi.”
- <sup>13</sup>Kuketitakey Yesu yec kuwo okoy kupunto tapantap Tampayayetap Kalilaya. Yoto kukwa luket nyepo piko ce caṅ wule mite neto, kucec kunet cekto.
- <sup>14</sup>Nteye kimite Yesu kuweti, yoto kukäs Lefi weritap Alufayo kukepur konyi nye cekweye mosoret. Kumwoci Yesu neto kule, “Rupa cepetekey oko ani.” Kuṅet Lefi oṅnkunomen kupetakey Yesu.
- <sup>15</sup>Nto om letut ye kimite Yesu kwomisiyi om kotap Lefi. Kimite yoto kukepur wanak oko neto piko co ruruce mosoret oko piko co kicetay, omnye kicaṅ piko ce kipetoykey Yesu.
- <sup>16</sup>Yoto kukäs konetikap ntarastinek alak ce Farasayek kwomisiyi Yesu oko piko co kicetay oko piko co ruruce mosoret. Kutepe cek konomikap Yesu kule, “Omne sukwmisiyi neto oko pic ce ruruce mosoro oko pic ce kicetay?”
- <sup>17</sup>Kulim Yesu n̄alek ce kimwowu cekto, kuwekyi kumwoci kule, “Puryo kot kumöce piko ce sopcotin cepsakityantet, ntene piko ce mnyontos ce möce. Kipuryo kot aco ani kule coker piko ce toponec, ntene kyaco kule sukuṅet kurenynkey piko ce ponto miyotyoniuk.”
- <sup>18</sup>Kimite pesyet ake kukire omik konomikap Yowana oko konomik cepo Farasayek. Yoto kukwa piko alake wule mite Yesu oṅnkutepe kule, “Omne sukukire omik konomikap Yowana oko konomik cepo Farasayek, ntene oṅnkupuryo kot kukire omik konomikukyi?”
- <sup>19</sup>Kuwekyi Yesu kumwoci cek kule, “Muce ra coronutepak cito nyo kemütis kukir omik ye tokupontokey cek cito nyo kemütisiyi? Puryo komuce cek kot kukir omik ye tokupontokey cito nyo kemütisiyi.
- <sup>20</sup>Ntene Mosukupunto pesyet nye mosicinumune cekto cito nyo kemütisiyi, pesyoyecoto ye mosukukir cek omik.
- <sup>21</sup>“Puryo ci nye muce kwiyisye yokwontet kisic nyelel kunopci siret nye yoswaket, omnye ye kakwiy kuyunyoto, komuce yokwontet nyelel kupac siret nyo yoswaket kutok kuwoyit koṅnta.





<sup>22</sup>Oṅnkupuryo mpo ci nye muce kuroṅkyi finyonik ce mwonec wonkinek ce yoswak, omnye ye kakwiy kuyunyoto, komuce finyonik ce mwonec kuyeyi wonkinek co yoswak, kworon wonkinek oṅnkupa wuy finyonik. Puryo kot kuyunyo! Ceroṅkyini komek ce mwonec wonkinek ce lelac!”

<sup>23</sup>Nteye kipesyetap Sapat, kuwo Yesu oko konomiky kupunte mparosyekap nkanuk. Kucec konomiky kuputot nkanuk.

<sup>24</sup>Kumwoci Farasayek Yesu kule, “Käs pa! Omne sukwiri konomikuk ntarastinekap pesyetap Sapat?”

<sup>25</sup>Kuwekyi Yesu kumwoci cek kule, “Tompo kot asuman akwek mpo kisic kito nye kikwiy Tauti oko piko ce kipontokey om pesyet nye kipuryo kiy nye mokwam okoy kwam cek rupet?”

<sup>26</sup>Kiwo neto kowut kotap Yiyintet oṅnkunum kwam mukatyantet nyo kisoci kupoyit Yiyintet. Kikwiy neto kuyunyoto ye ki tisintet nyewo Apiyasar. Kunyo kuyu wule yunto ntarastinekyo, kipuryo ci nye kicecömcini kwam mukatyantanato, ntene tisintet nkit nye kyome. Ntene kwam Tauti yoto oṅnkukoci mpo pikyi ce kipontokey.”

<sup>27</sup>Yoto kumwoy Yesu kule, “Kicekon pesyetap Sapat sukuṅet kukalya cito, ntene kipuryo kot citany cito kupoyit Sapat.

<sup>28</sup>Kunyo Weritap cito nye Mokoryontet nye poytoy mpo Sapat.”

### Marko 3

<sup>1</sup>Yoto kuwo Yesu yec pesyet ake kotapkok. Kimite koyoto cito nye kime yewut.

<sup>2</sup>Kurip piko alake ce kimite yoto kukäs topon Yesu kule sicekäs oṅnkomuce kusop cicoto ye pesyetap Sapat sukuṅet cewosontyi.


<sup>3</sup>Kumwoci Yesu cicoto kime yewut kule, “Co ceyoṅe yu po tay.”

<sup>4</sup>Oṅnkuwekyikey piko kutepe kule. “Cömwec acek ntarastinekyo kiyi ne ye pesyetap Sapat? Cikalya nto ciwurta? Cisop sopontap cito nto cepakäc cipot?” Ntene kuisio cekto.

<sup>5</sup>Kukäskästa Yesu kurotot cek tokol nye konyer, oṅnkukalya wuyinto oko solwontit nye kiponto. Kumwoci Yesu cicoto kule, “Yite yewuṅuṅ.” Kuyito yewunyi, yoto kusop yewunyi.

<sup>6</sup>Kuṅetyo Farasayek kumiṅnto kupa saṅ oṅnkurwoc oko pikap Erote wule muktoy kunämnta Yesu oṅnkupakäc kume.

<sup>7</sup>Kunomen Yesu oko konomiky kupa okoy kupunto tapantap Tampayayetap Kalilaya. Kurup luket nyepo piko ce caṅ ce kikwone Kalilaya oko ce kikwone koretap Yuteya,




- <sup>8</sup>oko ce kikwone moŋetap Yerusalem, oko ce kikwone koretap Itumeya, oko ce kikwone koretap oyinetap Yortan pitonin, oko ce kikwone korosyekap moŋosyekap Tiro oko Siton. Kikwa picoto tokol wule mite Yesu omnye kikilim tukuk ce kikwiye.
- <sup>9</sup>Kucaŋit piko yoto koromun okoy kumwoci Yesu konomiky kule kuyiytoci rapet nye kepure sukuŋet mente kot kuwunukto oŋnkukic piko neto.
- <sup>10</sup>Omnye kikikusop piko ce caŋ, kunyo kimite yoto piko ce kimnyontos kuwunuktotikey kule cepunte ye mite Yesu sukuŋet cenäm cetway.
- <sup>11</sup>Nteye kutoköse piko ce kiponto oyik Yesu, koputyi kukutuŋe yepo taynyi oŋnkuriryo kumwoy kule, “Yiku nyi Weritap Yiyintet!”
- <sup>12</sup>Kuyete Yesu kumwoci konkolontyi oyik ce miyotec kule mente kot kumwayta kule neto kuŋo.
- <sup>13</sup>Kunomen Yesu kuwo kulaŋnta lakamet parak oŋnkukur kupetakey piko ce kimöce neto.
- <sup>14</sup>Yoto kukwey Yesu piko taman ok oyeny oŋnkutoci kaynet kukure kiyokik. Oŋnkumwoci kule, “Kakweyak akwek sukuŋet opur oko ani, kunyo mosoyoktok ape wamwaytate lokoywek,
- <sup>15</sup>mosonyoru kamukeywek ce okwete oyik.”
- <sup>16</sup>Kaynokap kiyokik taman ok oyeny ce kikwey Yesu kucu; Simon nye kimulyi kaynet nyepo oyeny kukure Petero,
- <sup>17</sup>Yakopo oko mutakwam Yowana werikap Sepetayo (ce kimulyi kukure Poanerke nye poru kule, “Werikap ilat.”)
- <sup>18</sup>Antereya oko Filipo, oko Paturumayo, oko Matayo, oko Tomas, oko Yakopo weritap Alufayo, oko Tatayo, oko Simon nyikanet nye poryecini korenyi,
- <sup>19</sup>oko Yuta Isikaryoti nye kiweckey kwek ŋomntoyin.
- <sup>20</sup>Yoto kunomen Yesu kuwo okoy ka. Koruruckey yec piko ce caŋ okoy kupoty ye mokwomis oko konomiky.
- <sup>21</sup>Ntowo kulim pikap kamwa ŋalecato, kupa kule wocerip, omnye kimwowu piko kule, “Kopun met.”
- <sup>22</sup>Kumwoy konetikap ntarastinek ce kikwone Yerusalem kule, “Ponto neto Pelsepul! Kunyo Pelsepul nye, Oyinot nyewo nyepo oyik nye kocini neto swamet sukuŋet kukwet oyik.”
- <sup>23</sup>Yoto kukur Yesu piko kukwa ye mite neto oŋnkunet kumwoci tyonkocok kule, “Muce kulene Setani kukwetkey nkit?”
- <sup>24</sup>Ye kapciwunekey oyeny poytoyisyet nyepo koret ake oŋnkuporyekey nkit kupote koronoto.



- <sup>25</sup>Nteye kapciwunekey oyeny piko cepo kayta ake oṅnkuporyekey kwicek nkit kupote kayata.
- <sup>26</sup>Kunyo ye kaṅet poytoyisyetap Setani kupciykey oṅnkuporyekey nkit, kupuryo kot komuce kot kuyo, ntene pote nyo kupok.
- <sup>27</sup>“Om ṅolyontet ake yec, puryo ci nye muce kot kowut kotap cito nye ponto swamet oṅnkunum tukukyi, tos pate ye kanyosyo kurat cito nyo ponto swamet sukuṅet komuc kowut kotap cicoto oṅnkunyapan tukukyi.
- <sup>28</sup>“Kumwowok ani akwek ṅalek cepo manta kule, cimuce cikalya piko miyotyoniṅ tokol oko ṅalek alak tokol ce miyotec ce kaṅalal, nka kot kaṅalal aret cetya.
- <sup>29</sup>Ntene puryo kot cikolyoy mpo kisic ci ake tokol nye kaṅalale kwapi Muyet Nyetilil, omnye kakwiy cicoto miyotyoniṅ cepo kenysis ce mopoku.”
- <sup>30</sup>(Kimwoy Yesu kuyunyoto omnye kimwoy piko alake kule, “Ponto neto oyik ce miyotec.”)
- <sup>31</sup>Yoto kupun kametitap Yesu oko mpo mutakwam, kwokuyone saṅ oṅnkuyokto kukur kule kuco saṅ.
- <sup>32</sup>Kimite yoto piko ce caṅ ce kepur komut Yesu. Kumwoci cek neto kule, “Lim pa, mite komet oko mpo mutokwomet saṅ ce mocin.”
- <sup>33</sup>Kuwekyi Yesu kumwoci kule, “Do nye yeyomwani? Nto ṅo ce mpo yeyamwani?”
- <sup>34</sup>Kukäsakästa Yesu kukäs piko ce kimite kepur komut neto, oṅnkumwoy kule, “Akäs pa, piko cu ce mpo yeyomwani oko mpo yeyamwani.
- <sup>35</sup>Omnye ci nye yiye ṅalek möce Yiyintet kule kwiy neto kunye yeyamwani nyoto oṅnku yeyomwani.”

## Marko 4

- <sup>1</sup>Kunetisye Yesu yec pesyet ake tampayayet tapan, yoto kukwa piko ce caṅ korurukikey ye kimite okoy kulany Yesu rapet nye kimite tampayayet. Kimite yoto piko ce caṅ ce kepur yepo tampayayet tapan om koret okoy kupun tapantap peko, kumite rapet peko orit.
- <sup>2</sup>Kunet Yesu piko ṅalek ce caṅ kwiyisye tyonkocok, nteye kinetisiyi kumwoci piko kule,
- <sup>3</sup>“Akäs pa! Kiwo citake wokukolsyo.
- <sup>4</sup>Nteye kimite kukolsyi, kusuci kupuswek alake aret tapan, kuterer toritek kwokwam.
- <sup>5</sup>Kusuci kupuswek alake kitawet ye kipuryo kot kumite teṅek ce yeme, yoto kutur kupityo lakwar omnye kipuryo kot kuponto tikityek ce kipa ṅony.
- <sup>6</sup>Ntono kumwok asista kupel kuyom kupoty.



- <sup>7</sup>Kusuci kupuswek alake ye kimate kotok orit, kupityo kotok kwam kowurta kupotyonye puryo kot kwiye kupuswek.
- <sup>8</sup>Ntene kusuci kupuswek alak ye kimate tejek ce toponec, kutur kupityo onkwiy ketit akenke kupuswek sosom; nto ake kwiye kupuswek tomonwokik lö, nto ake kwiye kupuswek pokol akenke.”
- <sup>9</sup>Yoto kumwoy Yesu kule, “Ci nye ponto yitik ce limntoy, roke kulimnte.”
- <sup>10</sup>Nteye kimate Yesu kwine nkit, kukwa ye kimate neto piko alake ce kilimntoy nakekyi oko kiyokiky taman ok oyeny onkutepe kule mwowu ne tyonkocok.
- <sup>11</sup>Kumwoci Yesu cek kule, “Kicekonok akwek onket nakek ce wujotin cepo poytoyisyetap Yiyintet. Ntene om wule mite piko alak ce mite sañ kuce mosukulim cekto nakek om tyonkocok,
- <sup>12</sup>sukuñet, Kukästa onkukästa, ntene onkupuryo kot kuköse, kulimnta onkulimnta, ntene onkupuryo kot kusowu kunket, Nto kukostoy onkunket, kuye kuwekyikey wule mite Yiyintet, sukukalya neto cekto.”
- <sup>13</sup>Yoto kutepe Yesu cekto kule, “Tompo kot onket akwek nakek ce mwowu tyonkoconi? Kunyo omuci kot onket kulene nakek ce mwowu tyonkocok alake?
- <sup>14</sup>Kole kolintet lokoywekap Yiyintet.
- <sup>15</sup>Muce pesyet ake kusuci lokoywek aret tapan kulim picoto lokoywek, nteye kalim; yoto kuco lakwar Setani onkunum nolyontet nye kacekol mukuleywekwa.
- <sup>16</sup>Kerkey piko alake oko kupuswek co kicekol tejek cepo kitawet, coto kuce ye kotolime lokoywek kucäm lakwar om nerekwek
- <sup>17</sup>ntene nye puryo kot kowute mukuleywekwa orit, kunyo puryo kot kopure kuloyit, nteye kaco wuyinto nto toñonutet kupo lokoywek kwasta lakwar.
- <sup>18</sup>Kerkey piko alake oko kupuswek co kicekol kotok orit, coto kuce piko co lime lokoywek,
- <sup>19</sup>ntene om kasoteywekap soponto nyepo pesyosyecu, oko corokyinotet nyepo mokoryontit oko tukuk alak cepo koret, kucut kunum lokoywek nye puryo kot kwiye kupuswek.
- <sup>20</sup>Ntene kerkey piko alake oko kupuswek co kicekol tejek ce toponec, lime piko coto lokoywek, onkucäm onkwiy kupuswontet akenke kupuswek alak sosom, onkwiy kupuswontet ake kupuswek alak tomonwokik lö onkwiy ake kupuswek alak pokol akenke.”
- <sup>21</sup>Kutosyikey Yesu kutepe cekto kule, “Sutu ra cito kenysis tarit onkunäm pesenit kokupuye, nto mpo kotore tarit kwiririt nyony? Puryo kot kusutu neto onkukoci kuyone meset nye yone tarit parak?
- <sup>22</sup>Omnye puryo nolyo nye kicewuny nye puryo kot ceñonye koyin kutok, onkupuryo kiy nye kicetup cewuny nye puryo kot ceñonye koyin kutok.



- <sup>23</sup>Kunyo, ci nye ponto yitik ce limnte, roke kulimnte!”
- <sup>24</sup>Kumwoci Yesu yec cekto kule, “Olimnte topon ñalek ce olime! Omnye koyoyeket nye oyoyekyini akwek piko alak kunye koyoyeket nye yunyoto nye mociyoyekwok mpo akwek, oñkkyetoswok mpo kucanjit.
- <sup>25</sup>Omnye cito nye ponto kunye mosicetosyi nyoto kucanjit, nto cito nye puryo kot kuponto, nka mpo ce tukusic ce ponto mosicinumune.”
- <sup>26</sup>Kutosyikey yec Yesu kumwoy kule, “Kerkey poytoyisyetap Yiyintet oko ci nye kole kupuswek mparen,
- <sup>27</sup>kurucikey ye komoy oñnkukös ye koyek pet, kumite yoto kupuswek kuturu kupitos, oñnkurok kupuryo kot kunkete neto kule yiyoktos kulene.
- <sup>28</sup>Tenjek nkit kuce kocini kupityo okoy kwek omik. Nyosyi kupityo kunyo sokek ceñorñor, ntekere kuyiy taptet, nto om letut kuwoñnkyi kwiy kupuswek.
- <sup>29</sup>Nteye koruryo omik, kunäm cito rotwet oñnkuwo wokusis omnye kopunto kisisyet.”
- <sup>30</sup>Kutosyikey yec Yesu kumwoy kule, “Mocemwowu kule kerkey poytoyisyetap Yiyintet oko kiy ne? Tyonkocet oñnkono nye mocemwowu sukuñet ceroru cikerkeye?”
- <sup>31</sup>Kerkey oko kupuswontetap ketit ake nye cekure kalitarit nye kisic kupël kupuswek alak tokol ce mite koret
- <sup>32</sup>nteye kocewu kupite kuwoyit kwek cemosi kupël ketik alak tokol, oñnkupityo sarisyek ce woyec oñnkukwa toritek kwokutec korikwa wuronokap ketoto.”
- <sup>33</sup>Kumwoci Yesu piko lokoywekyi ce cañ kwiyisye tyonkocok ce kerkey cutecu ce kimuc cekto kot konket ñalek.
- <sup>34</sup>Kipuryo kot kumwoci neto piko ñalek ye mnokwiyisye tyonkocok, ntene nteye kimite kwine nkit oko konomikyiy kuye sukumwoci co ñalek tokol ce mwowu tyonkocok.
- <sup>35</sup>Ntowo kupunto pesyonoto kosoleny, kumwoci Yesu konomikyiy kule, “Onte cipe kyay tampayayet pitonin.”
- <sup>36</sup>Yoto kunomen kupa oñnkupakakta piko tokol. Kulany konomik rapet nye kimite Yesu kunyosyo kopure orit, kupetakey cekto yoto raposyek alak.
- <sup>37</sup>Ntene kuwus yomet nyewo koromun okoy kuwoyikey peko rapet kot kumac kunyiy peko.
- <sup>38</sup>Kimite Yesu yoto kukoru rapet let oñnkutiye metinyi kito nyo cetiye metit. Kuñet konomik kumwoci kule, “Mokoryontet, puryo kot köse nyi kule karik cepoku?”
- <sup>39</sup>Kuñet Yesu Kukos, oñnkupolyiy yomet kumwoci kule, “Sis yomet! Oñnkitempes tampayayet!” Yoto kusion yomet oñnkutempes tampayayet.



<sup>40</sup>Kumwoci Yesu konomik kule, “Omne somuye? Tompo kot onyuru akwek koyenot?”

<sup>41</sup>Ntene kumuyo konomik koromun oṅnkuṅalal kwicek nkit kumwoy kule, “Do nyun cici, nyi limncini yomet oko tampayayet?”

## Marko 5

<sup>1</sup>Yoto kupa cek kway tampayayet pitonin okoy koretap Kerasenik.

<sup>2</sup>Yoto pakenke ntowo kurekune Yesu rapet, kutuye cito nye kicone wule cemucini piko.

<sup>3</sup>Kiponto cicoto oyik ce miyotec kunyo kiminye wule cemucini piko. Kipuryo kot kumite ci nye kimuce kot kurat cicoto, nka mpo ye kacerate nyororonik.

<sup>4</sup>Omnye kikicerate nyororonik oko pinkonok aret ce caṅ ntene kuṅetye nyororonik oṅnkupirto kwiri pinkonok. Kunyo kipuryo kot kumite ci yec nye kiponto swamet kupël cicoto.

<sup>5</sup>Kipurune cicoto komoy oko pet wule cemucini piko oko lakomosyek, sukuncoyoti oṅnkupakeke rwontok.

<sup>6</sup>Nteye kimite cicoto kutokulow kisic, kukäs neto Yesu, yoto kulapat oṅnkoputyi yepo kerekokyi kukutuṅkyi;

<sup>7</sup>oṅnkupol om kutit nyewo kumwoy kule, “Penteno ani ne nyi Yesu Weritap Yiyintet nyepo torot! Owolikey om kaynetap Yiyintet osomiṅ kule, mente kot ataṅanya!”

<sup>8</sup>Kimwoy kuyunyoto omnye kikumwoci Yesu neto kule, “Oyinot nye miyat, cone wule mite cici!”

<sup>9</sup>Yoto kutepe Yesu kule, “Cekure ne kayneṅuṅ.” Kuwec cicoto kumwoy kule, “Cekure kaynemwani, ‘Luket’ omnye ciku caṅ!”

<sup>10</sup>Yoto kusom cicoto kusaysay Yesu kumwoci kule mente kukwet oyik kupete koronoto.

<sup>11</sup>Kimite ye kilekite yoto yeceyap nkururwenik ce kimite kwokete lakamet komos.

<sup>12</sup>Kusom oyik ce miyotec kumwoci Yesu kule, “Kwetec cipe wociwut nkururwenik orit.”

<sup>13</sup>Kucömnci Yesu oyik kupa. Yoto kuṅete oyik ce miyotec cicoto oṅnkupa wokowut yeceyap nkururwenik ce kirice kupunto tokol elifunek oyeny. Kumwey kurway tokol wokoṅirte lakam wokosuci tampayayet, kupakäc peko kupok tokol.

<sup>14</sup>Yoto kumwey kurway mesewek ce kyokisyi oṅnkupa wokumwaytat ṅalecato kumwoci piko cepo moṅet oko piko cepo soṅwek. Kukwa piko kwokukäs ṅalecato kakwiyokis.





- <sup>15</sup>Kukwa picoto okoy ye kimite Yesu, kwokunyor cicoto kiponto oyik ce caŋ kukepur nony kulakat nye kanyol kuŋomit topon. Yoto kumuyo piko tokol.
- <sup>16</sup>Kumwoci piko co koköse om konyekwa piko co kokwoni ŋalek ce kokwiyokis om wule mite cito nyo kiponto oyik oko ŋalek cepo nkururwenik.
- <sup>17</sup>Yoto kucec piko kusom kumwoci Yesu kuŋet kuwete koremwa.
- <sup>18</sup>Nteye kimite Yesu kulonye rapet kule onomen owecikey, kusom cicoto kiponto oyik kumwoci Yesu kule, “Kany cepetekey tukway!”
- <sup>19</sup>Ntene kuyete kumwoci kule, “Iwo kaŋuŋ wule mite pikwok wemwoci ŋalek ce woyec ce kakwiwuŋ nyi Mokoryontet, oko kuyu wule karireniŋ kukalyiŋ.”
- <sup>20</sup>Yoto kunomen cicoto kuwo wokupunte Tekapoli (moŋosyek taman) oŋkuwo wokumwaytat ŋalek ce kokwici Yesu neto. Kukite koromun piko tokol ce kilim ŋalecato.
- <sup>21</sup>Kulany Yesu rapet kuco kwoy okoy kupun tampayayet pitoni. Yoto kukwa piko ce caŋ kwokorurukyikeye ye kimite neto om yepo tampayayet tapan.
- <sup>22</sup>Kuco citake nye kipoytoy kotapkok nye kicekure Yairo. Nteye kotoköse cicoto Yesu, kukutuŋe yepo kerenkokyi,
- <sup>23</sup>oŋnkusom kusaysay kumwoci kule, “Mite cepnyu nye mnyone kasat karik kume; co cekemer yewuniyekuk sukuŋet kusop mente kume!”
- <sup>24</sup>Yoto kunomen Yesu kupetakey cicoto. Kurup piko ce caŋ Yesu ce kikicoti neto om komoswokik tokol.
- <sup>25</sup>Kimite yoto korket ake nye kimnyan kusyen koromun kukwone korotik kuwany kenyisyek taman ok oyeny;
- <sup>26</sup>nye kikikuwoŋnkyi tukukyi tokol ce kiponto kukocini cepsakitisyek kule kunyaya; ntene puryo mpo akenke nye kimuc kot kukalya, ntene kutosyinikey pate porto okokoy.
- <sup>27</sup>Kikilim korkonoto yoto ŋalek ce nöme Yesu. Yoto kurup letutap Yesu,
- <sup>28</sup>oŋnkumwoy om moyenyi nkit kule, “Mpo ye katwaya ani pate sirenyi, mososop.”
- <sup>29</sup>Yoto kunäm kutwa siretap Yesu. Kusop pakenke kusionye komokukwoni korotik, okoy kukäs neto nkit kule kosope porto nyo kwomnyoni.
- <sup>30</sup>Kunket Yesu pakenke om pornyi nkit kule kaweteno swamet. Kuwekyikey kukäs piko oŋnkumwoy kule, “Do nyi kanäma kutwa siremwani?”
- <sup>31</sup>Kumwoci konomikyie kule, “Puryo kot köse nyi piko cu kekiciŋ, kunyi mite yec tepe kule, ‘Do nyi kanama kutwaya ani?’ ”
- <sup>32</sup>Ntene kutosyikey Yesu kukäsakästa kule akäs ŋo nyi kakwiŋ ŋolyontoni.



<sup>33</sup>Kunket yoto korkonoto ḡolyontet nye kakwiyakay om wule mite neto, kuco tay kupotanan nye komuy oḡnkoputyi kukutuḡe yepo kerekokap Yesu oḡnkumwoci ḡalek tokol cepo manta.

<sup>34</sup>Kumwoci Yesu korkonoto kule, “Cepnyu, kokusopiḡ nyi koyeneḡuḡ; kunyo wecikey om kalya oḡnkuwesop okokoy.”

<sup>35</sup>Nteye kimite Yesu tokuḡolole, kukwa piko alake ce kikwone kotap poytoyintet nyepo kotapkok oḡnkwokumwoci cicoto kule, “Kame cepḡuḡ Kunyo mente tayim yec konetintet.”

<sup>36</sup>Ntene kukwes Yesu ḡalecato komwowu picoto, oḡnkumwoci Yairo kule, “Mente omuy, yen pate.”

<sup>37</sup>Yoto kuyete Yesu piko alak tokol mapetakey neto, ntene kupetakey pate Petero oko Yakopo oko mutakwam Yowana.

<sup>38</sup>Kupunto cekto kotap cicoto kinyewo nyepo kotapkok. Yoto kukäs Yesu rirek cepo piko ce kincoytos kwome mnyat koromun.

<sup>39</sup>Kuwo Yesu koto orit oḡnkumwoci piko kule, “Omne soselelen kuyunyi? Omne soriry! Puryo kot kume lekwet koru, pate!”

<sup>40</sup>Kurori piko tokol kurorci neto. Kukwet Yesu piko tokol ce kimite koto orit kupa saḡ, oḡnkukwer kwanitap lekwet oko kamet oko konomiky i somok okoy koto nye kimite lekwet.

<sup>41</sup>Kunäm Yesu yewutap lekwet oḡnkumwoci kule, “Talisa kaum.” Nye mwowu kule, “Cepi miniḡ, kumwowuḡ ani kule ḡet yony.”

<sup>42</sup>Yoto pakenke kuḡet cepoto kuyo oḡnkuwesetot. (Kiponto cepoto kenyisyek taman ok oyeny.) Ntwo kwiyakay ḡolyontonoto; kukite piko koromun.

<sup>43</sup>Ntene kunkolontyi Yesu kumwoci cek kule puryo kot kuroke kunket citake tokol ḡalecu, oḡnkumwoci cek kule, “Okoci cepoto kito nye mokwam.”

## Marko 6

<sup>1</sup>Kunomene Yesu wuloto kuwo kuketitakey okoy kupunto moḡetap koremwa Nasaret, kurup konomiky i neto.

<sup>2</sup>Nteye kipesyetap Sapat kucec Yesu kunetis om kotapkok. Kimite yoto piko ce caḡ, ntwo kulim cekto ḡalek ce kimwowu; kukite tokol oḡnkutep kumwoy kule, “Kinyorta ono cici ḡalecu? Kinyor ḡomnononi kulene? Oḡnkwiye kulene ḡalecu po kakitat?”

<sup>3</sup>Puryo kot ku koswetintetap pawunek neto nyitenyi nye weritap Mariyam, nto mpo mutakwam ku Yakopo oko Yose oko Yuta oko Simon? Puryo kot ku mpo cekwam cek cu cepontekey acek ceminye tokol?” Yoto kutay cek Yesu.



- <sup>4</sup>Kumwoci Yesu cek kule, “Ciyweye workoyo om wulyo ake tokol, ntene puryo kot ciyweye om moŋenyi, oŋnkupuryo kot kuyweye pikap arenyi oko cepo kamwa.”
- <sup>5</sup>Kipuryo yoto kot kwiŋ Yesu tukuk cepo kakitat om wuloto, ntene kukemer yewuniyekyi piko ce ŋeri ce kimnyontos kusop kusopco.
- <sup>6</sup>Kokite Yesu koromun, omnye kipuryo kot kuponto cek koyenotet. Yoto kuwo Yesu kunetat piko kupunte kestonik tokol ce kilekite wuloto.
- <sup>7</sup>Kukur Yesu konomik taman ok oyeny kukwa koruruckey wanak, oŋnkuyokto cek kupa saŋ kupetate oyeny oyeny. Kukoci kamukeywek kupayta oyik ce miyotec,
- <sup>8</sup>Oŋnkumwoci kunkolontyi kule, “Monte cenäm mukatya, nto mpo lolonik cepo pesanik.
- <sup>9</sup>Alac kweyonik ntene monte cilac sirok oyeny.”
- <sup>10</sup>Kumwoci yec kule, “Ye kowut kotake kuyu tö, opurune koyoto pate okoy onomene moŋonoto.
- <sup>11</sup>Nteye kopunte wule puryo kot kuŋerekyok nto kutay molimwok pikap wuloto ŋalek, onomen apete moŋonoto oŋnkupukyi tertit nyepo kerekokwok, sukuŋet kwek kasowunot om wule mite picoto.”
- <sup>12</sup>Yoto kunomen cekto kupa wokwomnci piko lokoywek kule, misyini kurenynkey piko kwasta miyotyoniŋwa.
- <sup>13</sup>Kukwet cek oyik oŋnkuŋape mwayta piko ce caŋ ce kimnyontos kusop kusopco.
- <sup>14</sup>Yoto kilim kinko Erote ŋalecato tokol, omnye kitok kaynetap Yesu ceŋalale om koret wulyo tokol. Kumwoy piko alak kule, “Kuŋet kotutune met Yowana potisonintet kunyi mite kwiŋiyis swamet nye ponto kwiye ŋalecu.”
- <sup>15</sup>Kumwoy mpo piko alake kule, “Eriya nyitenyi.” Kumwoy alake kule, “Workoyo nyi nye kerkey oko workoyikap kenŋ.”
- <sup>16</sup>Nteye kotolime Erote ŋalecato, kumwoy kule, “Yowana Potisonintet nyitenyi nyo kyomwoytoy ani ceyep katit nye kokotutune met yec!”
- <sup>17</sup>Omnye Erote nyitenyi kunyo kimwoytoy cenäm Yowana oŋnkyerat cekerta mopusi. Kikwiŋ Erote kuyunyoto omnye kisac ŋalekap Erotiya nye kikorketap mutakwam Filipino nye kimut neto kwek korkenyi.
- <sup>18</sup>Kunyo kimwocini Yowana Erote kwak okokoy kule, “Puryo kot kumisyini kot müt nyi korketap mutokwomet!”
- <sup>19</sup>Kunyo kisenkere Erotiya Yowana koromun, kusyeme kule apar neto kume, ntene kipuryo kot komuce.
- <sup>20</sup>Omnye kiyweye Erote Yowana omnye kinkete kule neto kunye ci nye topon nyepo manta nyetilil, kunyo kiripe topon koromun, kilimntoy Erote ŋalekap Yowana ce kimwowu nka kot kimuye ye kalim ŋalekyi.



- <sup>21</sup>Nto mite pesyet ake, kunyor Erotiya poroyinto. Omnye kikwiyy Erote sakwet nyepo pesyenyi nye kiceye kwici pikyi poytoyik ce woyec oko sikarek ce woyec cepo poryet oko piko ce woyec kantoyik cepo Kalilaya.
- <sup>22</sup>Yoto kuco ceptap Erotiya koto orit oṅnkutum, okoy kuṅjerec Erote oko toyekyi ce kimite kukepur tokol. Kumwoci kinko Erote cepoto kule, “Möce kule akoniṅ ani kiy ne?”
- <sup>23</sup>Mosokoniṅ kiy ake tokol nye kesomo ani.” Kuwalkey aret ce caṅ kumwoci cepoto kule, “Kokurtowuṅ kule mosokoniṅ kiy ake tokol nye kesomo nka mpo kwenutap kereryantetap koret nye opoytoy ani.”
- <sup>24</sup>Yoto kumiṅnto cepoto kuwo wokutepe kamet kule, “Mosom kiy ne?” Kuwekyi kamet kumwoci kule, “Som cekoniṅ metitap Yowana Potisonintet.”
- <sup>25</sup>Kuwo cepoto kusartakey lakwar okoy wule mite kinko oṅnkusom kumwoci kule, “Omöce kono ani nyi yawut pakenke om yuteyu sanit nye mite orit metit nyepo Yowana potisonintet!”
- <sup>26</sup>Kunyer kinko kumwontyi ṅalecato korumun, ntene kipuryo kot komuce kot kuyete cepoto, omnye kikikowalkey om konyekap toyekyi tokol.
- <sup>27</sup>Kuyokto yoto pakenke Erote sikorintet nye ripsi kuwo wokusut metitap Yowana. Kuwo sikorintet okoy mopusi oṅnkuwo kuyep metitap Yowana,
- <sup>28</sup>oṅnkusut metit nye mite sanit oṅnkuwo kukoci cepoto, kunäm nyo oṅnkukoci kamet.
- <sup>29</sup>Ntowo kulim konomikap Yowana ṅalecato, kukwa kwokusut musyontetap Yowana wokumuci mwenet.
- <sup>30</sup>Kuweckey kiyokik okoy kwokutuyo oko Yesu, oṅnkwokumwoci tukuk tokol ce kukwiyy oko ṅalek ce kukunet cekto.
- <sup>31</sup>Kimite yoto piko ce caṅ ce kikwoni cut kupeti cut okoy kupoty Yesu oko konomiky poroyinto ye mokwomis. Kumwoci Yesu konomik kule, “Akany cipe acek nkit wule po surukwenet sukuṅet womuny akwek kuminiṅ.”
- <sup>32</sup>Kulany cekto rapet kwicek nkit oṅnkupa okoy surukwenet.
- <sup>33</sup>Ntene kukäs piko ce caṅ ye kipeti cek oṅnkunket wule kotokyikey. Yoto kupete piko kerenkok, ce kikwone moṅosyek tokol kusartakey okoy wokunyosyo kupunto kutompo kot kupunto Yesu oko konomik.
- <sup>34</sup>Ntowo kurekune Yesu rapet, yoto kukäs neto luket nyepo piko ce caṅ, nteye kotoköse kurire kukalya omnye kikerkey picoto kecir ce puryo kot kuponto mesewo. Yoto kucec Yesu kunet cek kumwoci ṅalek ce caṅ.
- <sup>35</sup>Nteyu kowo kwimen koret, kukwa konomik ye mite Yesu oṅnkumwoci kule, “Nteyu kokwimen koret, kunyi surukwen wuli ce mite.
- <sup>36</sup>Yomis mwoci piko kupecikey, kupa kestonik oko soṅwek ce lekitec sukuṅet wokuceṅat kwalat nkit omik ce mosukwam.”



- <sup>37</sup>Kuwekyi Yesu kumwoci cek kule, “Okoci akwek nkit kiye mokwam.” Kutepe cek Yesu kule, “Moce nyi kule cipe acek wokyal mukatinek ce muce kyale silinkinek pokolwokik amwan oŋnkyepaye picu?”
- <sup>38</sup>Kutepe Yesu cek kule, “Oponte akwek mukatinek ata? Ape ra wakäs.” Nteyu kowo kunket wule tento, kumwoy kule, “Ceponte mukatinek mut oko purpurunek oyeny.”
- <sup>39</sup>Kumwoci Yesu konomik kuyiyta koruruckey piko tokol oŋnkopure suswek nye nyolilec.
- <sup>40</sup>Yoto kopur piko kutetkey kupetate alake pokol nto alak konom.
- <sup>41</sup>Kunäm Yesu mukatinekey mut oko purpurunek oyeny oŋnkunyal torot oŋnkusomnci kukasta Yiyintet, oŋnkupetec mukatinek oŋnkukoci konomiky kupici piko. Yoto kupciyta neto purpurunek kuyem piko tokol.
- <sup>42</sup>Kwomis piko tokol okoy kupiyonjis.
- <sup>43</sup>Yoto koruruc konomik mukatinek oko purpurunek ce koŋet okoy kunyiy kisok taman ok oyeny.
- <sup>44</sup>Nto coŋinto nyepo piko ce kikwam mukatinek oko purpurunek kuce piko moronik ce kipuntoy elifunek mut.
- <sup>45</sup>Yoto pakenke kumwoci Yesu konomiky kulany rapet kway tampayayet pitonin kontowonu kupa okoy moŋetap Pesusayita ye tokumite neto kuyomise piko kupecikey.
- <sup>46</sup>Nteyu kowo kuyomis konomik, kunomen kwine nkit kuwo kulanŋta lakam wokusom.
- <sup>47</sup>Ntowo kupunto komoy, kimite yoto rapet kukopunto kwenutap tampayayet, kumite Yesu kwine nkit wule po koret.
- <sup>48</sup>Yoto kukäs neto kule mite konomiky kataŋany kuwulye kukwonye rapet omnye kiwuse yomet kuketu cekto kukwa let. Ntowo kupunto komoy karik kuyec koret, kuco Yesu wule mite cek kutyikonu peko parak, yoto kutil kukeyte cekto.
- <sup>49</sup>Ntene kukäs cek kutyikoti peko parak, kusot oŋnkupol kuncoy kule, “Oyinet nyi!”
- <sup>50</sup>Omnye kimuyo cek tokol yu kowo kukäs Yesu. Kuŋololyi Yesu pakenke cek kumwoci kule, “Otitir! Ani nyo, monte cemuye!”
- <sup>51</sup>Kulany Yesu rapet nye kimite cekto; yoto pakenke kuis yomet. Kokite konomik oŋnkumuyo koromun kupotpotenis.
- <sup>52</sup>Kipuryo kot kusow cek konket ŋalek ce nöme ŋalekap mukatinek kule poru ne. Kipuryo kot konket mpo kisic kule poru ne.
- <sup>53</sup>Kupete cek rapet kway tampayayet okoy kupunto koretap Kenesaret wule kiwo kurotyi rapet.
- <sup>54</sup>Nteye kimite kurekune rapet, yoto pakenke kunket piko Yesu.



<sup>55</sup>Kurway piko kupunte koronoto tokol kupa wokukonopune kwiririnek piko ce mnyontos okoy kupun wule mite Yesu om wulyo tokol wule kalim cek kule mite Yesu wuloto.

<sup>56</sup>Nto om wulyo tokol wule kiwo Yesu, soŋwek oko moŋosyek oko kestonik. Yoto kukwer piko pikwa ce mnyontos okoy motaponik oŋnkusom cekto Yesu kule kucömnci piko ce mnyontos kunäm mpo pate kototyetaŋ sirenŋi. Kusopco piko tokol ce kinäm kutwa sirenŋi.

## Marko 7

<sup>1</sup>Korurukikey ye kimate Yesu Farasayek oko konetikap ntarastinek ce kikwone Yerusalem.

<sup>2</sup>Yoto kukäs cek kule omisye konomikyi yewuniyek ce murwonec, coto kuce yewuniyek ce puryo kot ciwun.

<sup>3</sup>Omnye kirupe Farasayek oko Yutayek tokol ntarastinek ce kinet cek mpo kukomwa nye puryo kot kwomisŋi okoy ye kakowun topon yewuniyek om aret nye roke.

<sup>4</sup>Oŋnkupuryo kot kwome kiy nye kocesutune motepo okoy ye keciwon kunyo. Kirupe cek mpo ntarastinek alak ce caŋ ce kicinet. Kuyu, ciwun topon cikomponik oko terenik oko sapuryanikap tayok oko kwiririnek.

<sup>5</sup>Yoto kutepe Farasayek oko konetikap ntarastinek Yesu kule, “Omne yu puryo kot kurupe konomikuk ntarastinekap kenŋ ce kikonec mpo kukonyo, omnye omisye yewuniyek ce murwonec ce puryo kot ciwun?”

<sup>6</sup>Kuwekyi Yesu kumwoci cek kule, “Po manta ŋalek ce kiŋor Isaya ce nömok akwek! Oyiku kaperperot, kuyu wulo kisilyo kumwoy kule, ‘Mwowu Yiyintet kule, Yweyo ani picu om kutuwakwa pate, ntene mitowune mukuleywekwa wule low om wule omite ani.

<sup>7</sup>Puryo kot kuponto cek latik kusaya ani, omnye nete cek ntarastinek ce kikwiye piko kuyunye po ntarastinekyoto Yiyintet!’ ”

<sup>8</sup>Kumwoy Yesu kule, “Otoye akwek mayiy ntarastinekap Yiyintet, oŋnkorup oywey ntarastinek cepo pikap kenŋ.”

<sup>9</sup>Kutosyikey Yesu kumwoci cek kule, “Oponte akwek ŋomnonet nyewo om wule otoytoy ntarastinekap Yiyintet, kule siceŋet cerup ŋalekwok cepo kenŋ!

<sup>10</sup>Omnye kimwoy Moses kule, ‘Ywey kon oko komet. Nto ci nye cupe kwan oko kamet, kumisyini nyoto kume.’

<sup>11</sup>Ntene onetisyi akwek omwowu kule, ye ponto cito kito nye muce kwiyisye kukalya kwan oko kamet, ntene oŋnkumwoy kule, ‘Karupon nyi’ (nye poru kule po Yiyintet nyi).

<sup>12</sup>Kunye cikolyoy cicoto mente kukalya kwan oko kamet.





- <sup>13</sup>Om ñalek ceyucoto kuye owurtoy akwek ñolyontetap Yiyintet om ñalekwok cepo keny ce oneti piko alak. Oñnkumite mpo ñalek alake ce cañ ceyucotecu ce oyiye akwek.”
- <sup>14</sup>Kukur Yesu yec piko kukwa ye mite neto, oñnkumwoci kule, “Olimwo ani pa akwek piko tokol oñnkonañe ñalecu mukuleywekwok.
- <sup>15</sup>Puryo kot ku kito nye cone sañ nye kam cito nye muce kot kowurta cito kumiyatit. Ntene kito nye cone mukuleyto orit kunye wurtoy cicoto kumiyatit.
- <sup>16</sup>[Kunyo roke olimnte ye oponte yitik ce olimnte!]”
- <sup>17</sup>Nteyu kowo kuwete Yesu ye kimate piko oñnkuwo okoy koto orit, kutepe konomiky neto ñalek ce poru tyonkoconoto.
- <sup>18</sup>Kumwoci Yesu cek kule, “Tompo kot osowu mpo akwek okoy kunyi kuyu piko alak? Kule puryo kot ku kito nyo cone sañ kwam cito nye muce kot kowurta cito kumiyatit.
- <sup>19</sup>Omnye puryo kot kowute mukuleynyi orit, ntene wute moyenyi oñnkupa kumiñnto sañ.” (Yoto kumwoy Yesu kule toponec omik tokol.)
- <sup>20</sup>Kutosyikey Yesu yec kumwoy kule, “Dolyo nye cone mukuley tap cito nye wurtoy cito kumiyatit,
- <sup>21</sup>omnye kwone kasoteywek ce miyotec mukuley tap cito orit, kuyu corokyinotetap koruk, corsyet, porisyet, sakwayanat,
- <sup>22</sup>corokyinot, ñomset, kaperperisyo, makatet nye miyat, koñ nye miyat, ñalek ce miyotec, menon, silotet, perperyet.
- <sup>23</sup>Dalecutecu tokol miyotec kuce kwone mukuley tap cito orit oñnkowurtoy cito.”
- <sup>24</sup>Yoto kunomen Yesu om wuloto okoy kupunto koret nye lekite moñetap Tiro. Kuwo koto ake orit, nye kipuryo kot kumöce kule konket citake tokol kule mite neto wuloto, ntene kipuryo komuc kot kuwunynkey.
- <sup>25</sup>Yoto pakenke kulim korket ake nye kiponto cepnyi nye kiponto oyinot nye miyat kule mite neto wuloto. Kucu pakenke oñnkoputyi kukutuñe yepo kerekokap Yesu.
- <sup>26</sup>Korkonoto kunye Kirikin nyepo Foyinisiya om koretap Siriya. Kusom korkonoto Yesu kule kukwetyi cepnyi oyinot nye kiponto.
- <sup>27</sup>Kuwekyi Yesu kumwoci kule, “Kany cenyosye cepay kupiyonñ lekok kunyo, omnye puryo kot kuroke cinum omikap lekok oñnkyewirci ñokik.”
- <sup>28</sup>Kuwec korkonoto kumwoy kule, “Mokoryontet, yunyoto, ntene nka mpo ñokik ce mite meset ñony kwome omikap lekok ce lelektoy!”
- <sup>29</sup>Yoto kumwoci Yesu kule, “Om ñolyontoni kewec nyi mwowu, nomen iwo koñuñ, kañet oyinoto kuwete cepñuñ”



- <sup>30</sup>Kunomen korkonoto kuwo ka, wokunyor lekwet kumite koru kwiriri kukosop kuwete oyinoto cepoto.
- <sup>31</sup>Kunomene Yesu koretap Tiro oṅkuwo kupunte Siton okoy kupunto tampayayetap Kalilaya oṅkuwo kupunte aretap kwenutap Tekapoli (moṅosyek taman).
- <sup>32</sup>Yoto kusut piko alake wule mite Yesu citake nye kiminy kunāmakay kutit nye puryo kot komuce kuṅalal, kusaysay picoto kusom neto kule kukemer yewuniyekyi cicoto.
- <sup>33</sup>Kunām Yesu cicoto oṅnkukwer tapan kwine nkit, oṅnkowute mornenyi yititap cicoto kuṅutyi oṅnkutwa ṅelyepta.
- <sup>34</sup>Kunyal Yesu torot oṅnkumuny komuṅnto nyewo, oṅnkumwoci cicoto kule, “Epapata.” (Nye mwowu kule, “Kuyotokis yitik.”)
- <sup>35</sup>Yoto pakenke kuyotokis yitikap cicoto, oṅnkutyak ṅelyepnyi kucec kuṅalal topon.
- <sup>36</sup>Kumwoci Yesu kunkolontyi cek tokol mente kumwoci citake tokol ṅolyontoni. Nteyu kowo kutosyikey Yesu kumwoci kunkolontyi kuket cekto, mpecek kutosyikey kumwaytat.
- <sup>37</sup>Kukite koromun piko tokol ce kilime oṅnkuṅalale kumwoy kule, “Kakwiy tukuk ce toponec, kokusop kot kulimnta piko ce kimiṅitu, oṅnkuṅalal piko ce kinomokis kutuwak.”

## Marko 8

- <sup>1</sup>Nto om letutap pesyos ce ṅeri, koruruckey yec piko alake ce caṅ koromun okoy komokuponto omik ce mokwam. Kukur Yesu konomiky oṅnkumwoci kule,
- <sup>2</sup>“Orire ani okolyoy picu, omnye pesyosyek somok yawut opontekey oko cekto kunyo puryo kot kuponto omik ce mokwam.
- <sup>3</sup>Kunyi ye komwoci kupecikey nye puryo kot apay, mosukumistot ye peti om aran, omnye kwone alake wule low.”
- <sup>4</sup>Kuwekyi konomiky kumwoci kule, “Nyortoy ono citake omit ce muce kot kupaye picu tokol om surukwenoni?”
- <sup>5</sup>Kutepe Yesu cek kule, “Oponte akwek mukatinek ata?” Kuwec konomik kumwoy kule, “Ceponte mukatinek tisap.”
- <sup>6</sup>Kumwoci Yesu piko tokol kopur ṅony, oṅnkunām, mukatinekey tisap, oṅnkusomnci kukasta Yiyintet oṅnkupetec oṅnkukoci konomiky kupcici piko, kunām co oṅnkupcici piko tokol.
- <sup>7</sup>Kiponto cek mpo purpurunek tukusic ce minkec. Yoto kusomnci Yesu mpo purpurunekey kukasta Yiyintet oṅnkumwoci konomik kupcici piko purpurunek.
- <sup>8</sup>Yoto kwomis piko tokol okoy kupiyonṅis. Ntwo kupok koruruc cek kisok cewoyec tisap ce nyitotin omik ce koṅet.



- <sup>9</sup>Kipuntoy piko tokol ce kyomis ce kirice elifunek amwan. Ntowo kupok, kuyomis Yesu piko kupecikey.
- <sup>10</sup>Yoto pakenke kulany Yesu rapet oko konomiky oṅnkupa okoy koretap Talmanusa.
- <sup>11</sup>Yoto kukwa Farasayek alake, oṅnkucec kutintentyin oko Yesu. Kusyem cek kule celotu neto kumwoci kule kwiy pelutyet nyepo kakitat nye cone torot nye poru swametap Yiyintet.
- <sup>12</sup>Komuny Yesu komuṅnto nyewo, oṅnkumwoy kule, “Omne sukumoce piko cepo pintap pesyosyecu pelutyet nyepo kakitat? Komwowok ani akwek ṅalek cepo manta kule, puryo pelut nyepo kakitat nye cimuce kot ciporci piko cepo pintap pesyosyecu.”
- <sup>13</sup>Yoto kulany Yesu yec rapet kuwo kway tampayayet pitonin oṅnkupokoky cek yoto.
- <sup>14</sup>Kuyutye konomik manām mukatinec, ntene kiponto mukatyantet akenke pate om rapet.
- <sup>15</sup>Yoto kucec Yesu kusow cek kumwoci kule, “Oripkey akwek mumarekap Farasayek oko mumarekap Erote.”
- <sup>16</sup>Kucec konomik kurwoc kwicek nkit kumwoy kule, “Komwoy kuyunyi so omnye moceponte acek mukatya?”
- <sup>17</sup>Kunket Yesu ṅalek ce kiṅolole cekto, yoto kutepe kule, “Omne saṅalal akwek nkit omwowu kule moceponte mukatya? Tompo so kot osowu akwek okoy kunyi? Kerotiṅ kasoteywekwok?”
- <sup>18</sup>Oponete akwek konyek ntene puryo kot oköste? Oponete yitik ntene puryo kot olimnte? Ntene puryo kot osoti akwek,
- <sup>19</sup>yo kyopeteci ani mukatinec mut aṅṅkapaye piko elifunek mut? Kyoruruc akwek yoto kisok ata ce nyitotin omik ce koṅet?” Kuwec konomik kumwoy kule, “Kiciruruc kisok taman ok oyenye.”
- <sup>20</sup>“Nteyo kyopeteci ani mukatinec tisap aṅṅkapaye piko elifunek amwan? Kyoruruc akwek yoto kisok ata cewoyec cepo omik ce koṅet?” Kuwec konomik kumwoci kule, “Kiciruruc kisok tisap?”
- <sup>21</sup>Kutepe Yesu cekto kule, “Kunyo tompo kot osowu akwek so okoy kunyi?”
- <sup>22</sup>Yoto kuwo Yesu oko konomik okoy kupunto Pesusayita. Kureton piko alake cito nye korat okoy ye kimite neto; oṅnkusom picoto neto kunām kutwa cicoto.
- <sup>23</sup>Kunām Yesu cicoto yewut oṅnkukwer kuwo moṅet saṅ. Nteyu kowo kuṅutyi neto konyekap cicoto, kunam konyek oṅnkutepe kule, “Kekäs nyi kitake?”
- <sup>24</sup>Kukästa cicoto kunyal parak oṅnkumwoy kule, “Oköse piko ce pesetoti ce kerkey oko ketik.”



- <sup>25</sup>Yoto kunäme Yesu yec yewuniyekyi konyekap cicoto, kutitir cicoto kuwany konyekyi, yoto kusopco konyekyi kukästa topon okoy kukäs mpo kiy nye mite wule low.
- <sup>26</sup>Kumwoci Yesu cicoto kuwo ka oñnkunkolontyi kumwoci kule, “Mente kot aketitekey awo moñet yec.”
- <sup>27</sup>Yoto kunomen Yesu oko konomiky kupa kupunte soñwek ce kimut koretap Kayisariya nyepo Filipi. Nteye kimite cekto kupeti om aran, kutepe Yesu konomik kumwoci kule, “Mwowu piko kule oyiku ani ño?”
- <sup>28</sup>Kuwekyi konomik kumwoci kule, “Mwowu piko alake kule yiku nyi Yowana potisonintet. Kumwowu piko alake kule, yiku nyi Eriya. Nto alak kumwowu kule yiku nyi akenke om workoyikap kenye nye kokotutune met!”
- <sup>29</sup>Kutepe Yesu cek kule, “Nto akwek, omwowu akwek kule oyiku ani ño?” Kuwec Petero kumwoy kule, “Yiku nyi Kristo nye ñapanet.”
- <sup>30</sup>Yoto kumwoci Yesu kunkolontyi cek kule, “Monte cemwoci citake tokol kule neto ku ño.”
- <sup>31</sup>Kucec Yesu kunet konomik kumwoci kule, “Mosukutañany weritap cito toñoñutek ce cañ koromun, oñnkutay poyik oko tisik cewoyec oko konetikap ntarastinek. Mosicepakäc kume, nteye pesyet nyepo somok ciñet kotutune met.”
- <sup>32</sup>Kumwoy Yesu ñalecato kutor kulim cek tokol. Yoto kunäm Petero Yesu yewut oñnkukwer tapan oñnkusow kupolyi kumwoci kule, “Mente tañalale ñalecu.”
- <sup>33</sup>Ntene kuwekyikey Yesu kukäs konomiky; oñnkupolyi Petero kumwoci kule, “Wete yu omite ani nyi Setani: Puryo kot kupo kasoteywek cekuk Yiyintet, ntene po piko!”
- <sup>34</sup>Yoto kukur Yesu piko tokol wanak oko konomiky kukwa ye mite neto oñnkumwoci kule, “Ye möce citake tokol kule anama cepetekey ani, kumisyini kunyilkey nkit oñnkutor murtowontenyi oñnkuco cokunama cepetekey ani.
- <sup>35</sup>Omnye ci ake tokol nye möce kule osop sponny, kupote cito nyoto sponny, nto ci ake tokol nye kepot sponny omnye kacäm ani oñnkucäm lokoywek ce toponec, kunye mosukusop cito nyoto sponny.
- <sup>36</sup>Nyuru ra cito latik ne ye keyum tukuk ce mite koret tokol kumukul oñnkwarantakey nkit? Puryo kot kuyunyo mpo kisic!
- <sup>37</sup>Puryo kot kumite kiy nye muce kukon cito kwale sponny.
- <sup>38</sup>Kunyo ye kelilan ci ake tokol om wule omite ani oñnkulilontyi ñalekwani om pesyosyecu po piko cepo pinta nye puryo kot kuponto koyenot oñnkupic ce ponto miyotyoni, mosukulilontyi mpo Weritap cito cicoto ye kaco om woyintap Papanyi, ye contoykey malaykanik ce tililec.”

## Marko 9



- <sup>1</sup>Yoto kumwoci Yesu cek kule, “Komwowok ani akwek ñalek cepo manta kule, mite yuteyu piko alake ce keyoñ ce puryo kot kupoku okoy ye kakäs cekto poytoyisyetap Yiyintet kuconi om kamukeywek.”
- <sup>2</sup>Nto om letutap pesyosyek lö, kukwer Yesu Petero oko Yakopo oko Yowana kupa tulwet parak kwicek nkit. Nteye kimite cekto kuköse om konyekwa, kuwäl Yesu tonnyi om taymwacek.
- <sup>3</sup>Yoto kuweckey sirokyi kulekececis kulelakitu koromun, nye puryo ci nye kowunin koret tokol nye muce kowun kulelakitu kuyunyoto.
- <sup>4</sup>Yoto kukäs konomik coto somoku Moses oko Eriya kuñolole oko Yesu.
- <sup>5</sup>Kuñalal Petero komwoci Yesu kule, “Konetintet kiy nye topon omnye cemite acek yuteyu, kunyo kany cetec acek kisarinek somok, mokwek ake nyeñuñ, kupoyit ake Moses, kupoyit ake Eriya.”
- <sup>6</sup>Kiñalal Petero kumwoy ñalecato omnye kipuryo kot kunkete ñalek ce kimwowu, omnye kimuyo cek koromun.
- <sup>7</sup>Yoto kuco polyet oñnkulum cekto rurwet, yoto kucone kutit polyet orit kuñalal kumwoy kule, “Nyi kunye Werimwani camanet, olimnci neto!”
- <sup>8</sup>Kumolmolen pakenke kukäsakästa konomik, ntene kipuryo kot kukäs citake tokol wokwek Yesu nkit nye kipontokey oko cekto.
- <sup>9</sup>Nteye kimite cek tokol kurekune tulwet, kunkolontyi Yesu kumwoci cek kule, “Monte cemwoci citake kito nye kokäs akwek okoy ye kaciñet kotutune met weritap cito.”
- <sup>10</sup>Kucäm cek kurip ñalek ce kumwoci Yesu. Ntene nteye kimite cek kwicek nkit kuñalal kumwoy kule, “Mwowu ne ñolyontoni kumwoy kule, ‘Citutune met’ ”
- <sup>11</sup>Yoto kutepe cek Yesu kule, “Omne sukunete kumwowu konetikap ntarastinek kule, Eriya nye nyosyi kuco?”
- <sup>12</sup>Kuwekyi Yesu kumwoci cekto kule, “Manta, Eriya nye nyosyi kuco cokusat kwitita kunyol tukuk tokol. Ntene omne sukumwowu silutekap Yiyintet kule mosukutañany Weritap cito koromun oñnkyetay?
- <sup>13</sup>Kunyo komwowok ani akwek kule kico Eriya kenya, kunyo kikwici piko neto tukuk ce möce cek kuyu wulo mwoytoy silutekap Yiyintet ñalek ce nöme neto.”
- <sup>14</sup>Ntowo kukwa cekto okoy kupun wule kimite konomik cut, kwokunyor kupontokey co piko ce cañ oko konetikap ntarastinek ce kimite kutintentyintos oko konomik.
- <sup>15</sup>Yoto pakenke ye kotoköse piko Yesu kukite koromun oñnkurway kupa ye mite neto wokusupay.
- <sup>16</sup>Kutepe Yesu konomiky kule, “Ñal ne cu kotintentyintosi akwek oko cekto?”



- <sup>17</sup>Kuwec cito akenke nye kimite kwenutap piko kumwoy kule, “Konetintet, kokweru ani werinyu kuco wule mite nyi, omnye ponto oyinot nye miyat nye kinäm nye puryo kot komuce kot kuñalal.
- <sup>18</sup>Ye kanäm kumilyini ñony oñnkukapus pukantet, oñnkunyyi kelak, oñnkuyam porto tokol. Kunyo kosom ani konomikuk kule kukwetyi oyik, ntene puryo kot komuc kot kukwet.”
- <sup>19</sup>Kumwoci Yesu cekto kule, “Opo! Akwek pikap pinta nyepo pesyosyecu ce puryo kot kuponto koyenot! Mosopur ani oko akwek okoy oyu? Sutu werit kuco yu omite ani!”
- <sup>20</sup>Yoto kusut cek lekwanato kuco ye kimite Yesu. Nteye kotoköse oyinotonoto Yesu, kunäm weroto kumilyi ñony kumilmil oñnkukapus pukantet.
- <sup>21</sup>Kutepe Yesu kwan kule, “Kikowany pesyos ce tya kunöme kuyunyitenyi?” Kuwec kwan kumwoy kule, “Kuceke ku lekwa nye miniñ.
- <sup>22</sup>Kunyo kisyem porto aret ce cañ kule apakäc, omnye wircini wule mite mata, oko peko orit. Ntene ye mucu nyi yici kitake rirenec kalyec acek.”
- <sup>23</sup>Kuwec Yesu kumwoci kule, “Omne semwowu kule, ‘Ye mucu nyi?’ Mukoktos kiy ake tokol om wule mite ci nye keyen.”
- <sup>24</sup>Yoto pakenke kuñalal kupol kwanitap lekwet kumwoy kule, “Oyeni ani! Kalya ye moponte koyenot nye yeme.”
- <sup>25</sup>Yoto kukäs Yesu kule mite kukwoni kotosyinikey piko ce cañ, kupolyi neto oyinot nye miyat kumwoci kule, “Komwowuñ ani nyi oyinot nye nöme cito kuminjit kunämakay kutit kule, ñete lekwani, ntene mente toketyikey yec!”
- <sup>26</sup>Kunäm oyinoto lekwet kupol oñnkupirto kumisto oñnkunete kuwo. Yoto kwiiytakey lekwet musyo nye kame, okoy kumwoy ci ake tokol om yoto kule, “Kame”.
- <sup>27</sup>Kunäm Yesu yewutap lekwet kukalya kuñet kuyo, yoto kuñet kuyo.
- <sup>28</sup>Nto om letut yu kowo kuwo Yesu koto orit, kutepe konomik neto kule, “Omne yu kopuryo kot cimuc acek kot cekwet oyinot?”
- <sup>29</sup>Kuwekyi neto kumwoci cek kule, “Puryo cimuce kot cekwet oyinot nye yunyi om aret ake tokol, somset pate nye mucu.”
- <sup>30</sup>Kunomene cekto wuloto kupa kupunte koretap Kalilaya nye kipuryo kot kumöce Yesu kule konketo piko wule omite.
- <sup>31</sup>Omnye kinete neto konomiky kumwocini kule, “Mosicenäm Weritap cito oñnkyikoyito cekwer kuwo wule mite piko ce mosukupar kume, ntene mosicinjet kotutune met om letutap pesyosyek somok.”
- <sup>32</sup>Kipuryo kot kusow yoto konomik konket kule poru ne ñalecato, ntene kumuyo cek yec yemo kutepe Yesu.





**33**Kukwa cekto okoy kupun Kapernaum. Ntowo kupa koto orit, kutepe Yesu konomiky kule, “Dal ne co korwoke akwek otintentyintos om aran?”

**34**Yoto kusiono konomik, omnye kinjololonu kutintentyintos kwicek nkit om aran kule no nyewo kupelis om cekto.

**35**Kopur Yesu nony onnkukur konomik taman ok oyeny kukwa ye mite neto onnkumwoci kule, “Ye möce ci ake tokol kule oyiku kantoyintet nyepo piko, kuroke cicoto kwek cito nyepo letut om wule mite piko alak tokol kwek mutworintetap piko.”

**36**Yoto kunäm Yesu lekwa nye miniñ kuyone taymwacek onnkunäm kumot kopure kupesokyi, onnkumwoci cekto kule,

**37**“Ci ake tokol nye katoroc kuñerekyi lekwa akenke om lekocu minkec nyi yunyi om kaynemwani, kunye katoroca kuñerekyo ani cicoto; nto ci tokol nye katoroca kuñerekyo, kunye puryo kot kukatoroca kuñerekyo ani nkit, ntene kukatoroc kuñerekyi mpo neto nyo kiyokwo ani.”

**38**Kumwoci Yowana Yesu kule, “Konetintet, kucekäs acek citake nye kukwete oyik om kayneñuñ ceyete acek cekerekte cicoto omnye puryo kot cepesetoti cepontotikey oko neto.”

**39**Kuwekyi Yesu kumwoci kule, “Monte ceyete cekerekte cico, omnye puryo kot kumite ci nye muce kot kwiy ñalek cepo kakitat om swametañ kaynemwani nye muce yec kot kuwekey om letut onnkunjalalena ani kwapi.

**40**Ci tokol nye puryo kot kutoyec acek kunye nyinyo cicoto.

**41**Komwowok ani akwek ñalek cepo manta kule, ci tokol nye kokonok akwek peko ce koye omnye oyiku piko cepo Kristo nye Ñapanet, kunye mosukunyor cicoto kokotutyet nyenyi nye kocikoci.”

**42**“Nteye kamas kuwec ci ake tokol lekoy ce minkec ce yucu ce cömo ani kot kwiy miyotyet, kuroke ceroty katitap cicoto rwantetap paka nyewo onkyewirci ruretyet orit.

**43**Kunyo ye yewuñuñ nye sokyin nyi ye sewurte, yep kuñet! Omnye kaykay ye kewo nyi torot wule mite soponto nye topon nye moponte yewut ake kusir ye ponte yewuniyek tukway onkiwo wule mite mata nye momise.

**44**[Wule wokwome om wuloto porwonikwa mokik ce mopoku oko mata nye momise.]

**45**Nteye kerenkeñuñ nye sokyin nyi ye sewurte, yepta kuñet! Omnye kaykay ye kewo nyi torot wule mite soponto nye topon nye meponte kerenket ake, kusir ye ponte kerenkok tukway onkiwo wule mite mata nye momise.

**46**[Wule wokwome om wuloto porwonikwa mokik ce mopoku oko mata nye momise.]



<sup>47</sup>Nteye koŋnta nyeŋuŋ nye sokyin nyi ye sewurte, lotu kulot! Omnye kaykay ye kewo nyi wule mite poytoyisyetap Yiyintet ponte koŋnta akenke kusir ye ponte konyek tukway oŋknyewircin wule mita mata nye momise.

<sup>48</sup>Wule wokwome paronkikwa mokik ce mopoku oko mata nye momise.

<sup>49</sup>“Omnye mosicitoye ci ake tokol mata kuyu wulo citoye nkuyek misyontet.

<sup>50</sup>Topon misyontet, ntene ye komokunomu, omuci akwek kulene kot awec yec kot kunom? Roke oponte akwek misyontet, oŋkocämnykey opurte kalyet akwek kwakwek nkit.”

## Marko 10

<sup>1</sup>Yoto kunomene Yesu wuloto kuwo okoy koretap Yuteya oŋkway oyinetap Yortan. Korurukikey yec piko ce caŋ wule mite neto. Kunet neto cekto kuyu wule yunto kopurnyi.

<sup>2</sup>Kukwa Farasayek ye mite Yesu oŋnkulot kutepe kule, “Mwowec acek, cömwece ra ntarastinekyo kukwet cito korkenyi?”

<sup>3</sup>Kuwekyi Yesu kutepe cekto kule, “Kikonok akwek Moses ntarastit oŋnkono?”

<sup>4</sup>Kuwec cek kumwoy kule, “Kicäm Moses kule muce kusil cito parwet nye kakwete korket.”

<sup>5</sup>Kumwoci Yesu cek kule, “Kisilwok Moses akwek ntarastini omnye wuyec mukuleywekwok ye mocinetak.

<sup>6</sup>Ntene kuceke ye kicece citany koret, kicemwoy kule, ‘Kitany Yiyintet moron oko korko.

<sup>7</sup>Kunyo om ŋolyontoni kuye sukuŋet kupakakta cito kwan oko kamet oŋnkuyomokey oko korkenyi,

<sup>8</sup>kwec picoto oyenku akenke nye komo ku pic oyeny yec, ntene kokwek ci akenke.’

<sup>9</sup>Kunyo puryo kot kumisyini kot kupciy cito piko ce kokuyomo Yiyintet.”

<sup>10</sup>Nteye kimite cekto koto orit, kutepe konomik Yesu ŋalek ce nöme ŋolyontoni.

<sup>11</sup>Kumwoci Yesu cek kule, “Ci ake tokol nye kakwet korkenyi oŋnkömüt ake, kakwiyy cito nyoto sakwayanat om wule mite korkenyi.


<sup>12</sup>Nto korko nye katay santenyi oŋnkuwo wokomüt citake, kakwiyy korkonoto sakwayanat.”

<sup>13</sup>Kukwer piko lekok kukwa wule mite Yesu kule sukuŋet kunäm neto lekocoto ntene kupolyi konomik kukerekta picoto.

<sup>14</sup>Nteye kotoköse Yesu kunyer oŋnkumwoci konomiky kule, “Ayaste lekok kukwa wule omite ani! Monte ceyete, omnye po poytoyisyetap Yiyintet cekto ceyucutecu.



- 15**Komwowok ani akwek ñalek cepo manta kule, ci ake tokol nye puryo kot kunome poytoyisyetap Yiyintet kuyu lekwa, kunye puryo kot komuce cito nyoto kot kowut mpo kisic.”
- 16**Yoto kunäm Yesu lekocoto kopure kupesokyi oñnkukemer yewuniyekyi metewokap lekocoto kusomnci kupeyok.
- 17**Nteye kimite Yesu kunomene poninekyi, kulapat citake kuwo tay nyi oñnkukutuñnkyi kutepe kule, “Konetintet nye topon, mosaiyy ne ani ye sonyoru soponto nye mopoku?”
- 18**Kutepe Yesu cicoto kule, “Omne sekureno ani nyi nye topon? Puryo ci nye topon, ntene Yiyintet pate nkit nye topon.
- 19**Nketi nyi ntarastinek, mwowu kule, ‘Mente oporisye, mente operperisye, mente asakwayan, mente acorsye, mente oñomu ci, ywey kon oko komet!’ ”
- 20**Kuwekyi cicoto kumwoci Yesu kule, “Konetintet, kyorip ani ntarastinecutecu tokol kuceke oyiku lekwa.”
- 21**Yoto kurotot Yesu cicoto topon kuñerekyi moyenyi, oñnkumwoy kule, “Mite kito akenke nye tokupotuñ nyi, iwo weyalye tukuk tokol ce ponte oñnkikoci pesanik pononik mesenyoru mokoryontit om torot, oñnkico cepetekey oko ani.”
- 22**Nteye kotolime cicoto ñalecato; kunyer kusiriny tokoynyi oñnkunomen kuwecikey kunerekat omnye kimokoryo nye kiponto tukuk ce cañ.
- 23**Yoto kukäsakästa Yesu oñnkumwoci konomiky kule, “Mokuwuyit koromun om wule mite piko co mokoren ce ponto tukuk ce cañ ye mokowut cekto poytoyisyetap Yiyintet!”
- 24**Kukite konomik ñalecato koromun, ntene kutosyikey Yesu kumwoy kule, “Lekocu, mokuwuy koromun ye mociwut poytoyisyetap Yiyintet!
- 25**Lekit kupunte nkamiyet koñntap sintanit kupël ye mokowut cito nye mokoryo nye ponto tukuk ce cañ poytoyisyetap Yiyintet.”
- 26**Yoto kukite konomik koromun oñnkutepekey kwicek nkit kumwoy kule, “Kunyo ño nyun cito nye cimuce cisop.”
- 27**Kurotot Yesu cek topon, oñnkuwekyi kumwoci kule, “Puryo kot komukoktos ñalecu om wule mite piko, ntene mukoktos kiy ake tokol om wule mite Yiyintet.”
- 28**Kumwoci Petero Yesu kule, “Nto acek? Käs pa, kicepakakte acek tukuk tokol oñnkyinämiñ cepetekey oko nyi.”
- 29**Kumwoci Yesu cekto kule, “Kumwowok ani akwek ñalek cepo manta kule, puryo ci nye ye kapakakta kanyi; oko mpo mutakwam, nto mpo cekwam, nto kamet, nto mpo lekok, nto mosonok oñnkucäm ani oko lokoywek ce toponec,
- 30**nye puryo kot kunyuru om pesyosyecutecu korik pokolwokik ce cañ, oñnkunyor mpo cekwam oko mpo kamet, oko mpo kwan oko mpo lekok, oko mpo mosonok,



oṅnkunyor mpo toṅoṅutek, oṅnkunyor yec soponto nye mopoku om kenysisyek co kwoni.

<sup>31</sup>Ntene piko ce mite yawut tayta kuce mosukwokupoyit coto letut, nto piko ce caṅ ce mite yawut letut kuce mosukwokupoyit coto tayta.”

<sup>32</sup>Nteye kimite cekto kupeti om aran kulonṅtoy Yerusalem, yoto kuwo Yesu tay kuntoci konomik ce kanyokoritu kumuyo oko piko ce kirupe cekto ce komuyo mpecek. Yoto kukwer Yesu konomik taman ok oyeny kupa tapan, oṅnkumwoci kito nye mosukwiyakay om wule mite neto.

<sup>33</sup>Kumwoci kule, “Alim pa, ce mite yawut cepeti celoṅtoy Yerusalem, wule mowocenäm Weritap cito, oṅnkyekwer kuwo wule mite tisik cewoyec oko konetikap ntarastinek, mosicewosontyi oṅnkyemutyi musankut cepakäc oṅnkyikoyito kuwo wule mite lamek.

<sup>34</sup>Mosukurorici kucur co neto, oṅnkuṅutyi, oṅnkupas, oṅnkupakäc kume, ntene mosukotutune met om letutap pesyosyek somok.”

<sup>35</sup>Yoto kukwa ye kimite Yesu werikap Sepetayo oyenku Yakopo oko Yowana, oṅnkumwoci cekto Yesu kule, “Konetintet, mite ṅolyontet akenke nye ce möce acek kule yiwec nyi.”

<sup>36</sup>Kutepe Yesu cekto kule, “Ṃolyo ne nye omöce kule oyiwok ani?”

<sup>37</sup>Kuwekyi kumwoci kule, “Comwec kule, ye kepure nyi ṅeceret nyepo woyinṅuṅ, comwec acek yoto cipur oko nyi, kopurune ake yewuṅuṅ nyepo tay kopurune ake yewuṅuṅ nyepo let.”

<sup>38</sup>Kumwoci Yesu cekto kule, “Puryo kot oṅnket akwek kito nye osome. Omuci akwek ra kot opunte toṅoṅutek ce mataṅany ani?”

<sup>39</sup>Kuwekyi kumwoci kule, “Cimuci.” Kumwoci Yesu cekto kule, “Po manta kule omuci akwek opunte toṅoṅutek ce mataṅany ani, oṅnkyepatisanak mpo patisanet kuyu wulo mocepatisana.

<sup>40</sup>Ntene puryo kot oponte kamukeywek akwey kule ṅo nye mosukopure yewumwani nyepo tay nto nyepo let. Yiyintet nkit nye mosukukoci oteputek coto piko ce kiyiytoci neto.”

<sup>41</sup>Ntowo kulim konomik cut tamanu ṅalecato, kunyerci cekto Yakopo oko Yowana.

<sup>42</sup>Yoto kukur Yesu konomik kuyomo wanak, oṅnkumwoci kule, “Oṅnket akwek kule piko ce ciyite kule poytoyik cepo lamek kuce ponto kamukeywek kupayta piko, kunyo yiyisyek pikwa cewoyec kamukeywek kupayta cekto.

<sup>43</sup>Puryo kot kuroke kuyuyit nyo om wule omite akwek. Ye möce citake om akwek kule oyiku nyewo, kuroke nyoto kwek mutworintet nyepo piko.

<sup>44</sup>Nteye möce citake om akwek kule oyiku kantoyin, kuroke nyoto kwek mutworintet nyepo piko tokol.



<sup>45</sup>Omnye kipuryo kot kuco Weritap cito kule kwokyiwo yisyet, ntene kico kule coyiisye oṅnkume kukoyto soponto nyenyi kwolis sukusop piko ce caṅ.’’

<sup>46</sup>Kukwa cekto okoy, Yeriko. Nteye kimite Yesu kunomone oko konomikiyi Wanak oko piko ce caṅ, kimite yoto citake nye korat nye kipure aret tapan sukusomsi; nye kicekure Partimayo weritap Tamayo.

<sup>47</sup>Ntowo kulim cicoto korat kule Yesu nyepo Nasaret nyitenyi, kucec kupol kumwoy kule, “Yesu! Weritap Tauti! Rirena kalya ani!”

<sup>48</sup>Yoto kupolyi piko ce caṅ cicoto kumwoci kusi, ntene kutosyikey kupol koromun kumwoy kule, “Weritap Tauti! Rirena kalya ani!”

<sup>49</sup>Kuyo Yesu oṅnkumwayta kule, “Okur kuco yu.” Yoto kukur piko cicoto korat kumwoci kule, “Titir ṅete ṅony! Kuriṅ Yesu.”

<sup>50</sup>Yoto kuwirci cicoto sirenyi tapan, oṅnkunjet kuyo oṅnkuco ye kimite Yesu.

<sup>51</sup>Kutepe Yesu cicoto kule, “Möce nyi kule oyiwuṅ ne?” Kumwoci cicoto Yesu kule, “Konetintet, omöce kule akäste yec.”

<sup>52</sup>Kumwoci Yesu neto kule, “Wecikey kokusopiṅ nyi koyeneṅuṅ.” Yoto kusopco konyeki kukästa oṅnkuwo kunäm kupetakey Yesu om aran.

## Marko 11

<sup>1</sup>Nteyu kowo kurik cek kupun Yerusalem om ye lekite moṅetap Pesapake oko moṅetap Pesaniya om komosta nyepo tulwetap ketik ce cekure Seituninek. Yoto kuyokto Yesu konomikiyi oyeny.

<sup>2</sup>Kumwoci kule, “Ape okoy opunte kayta nyin mite taymwoṅ. Nteye kopunte kayata orit, mosonyoru moyitap sikiryet nyeratat nye tompo kot kulany kuwete ci mpo akenke, atyac oṅnkokweru kuco yu.

<sup>3</sup>Nteye katepenak citake kule omne satyac akwek moyitap sikiryet? Omwoci kule möce mokoryontet, kunyo mosukukwer kuket lakwar okoy yu!”

<sup>4</sup>Kunomen cek kupa okoy wokunyor moyitap sikiryet nye kocerotyi kurkat om yepo aret nyepo kayta.

<sup>5</sup>Nteye kimite cek kutyoce, kutepe piko ce kimite keyoṅ yoto kule, “Omne sayiy kuyunyi atyac moyitap sikiryet?”

<sup>6</sup>Kuwekyi konomik kumwoci picoto ṅalek co komwowu Yesu. Yoto kwasta picoto konomik kukwer moyitap sikiryet.

<sup>7</sup>Kukwer cek moyitap sikiryet okoy kupun ye kimite Yesu, oṅnkuyitoci sirokwa pataytap moyitap sikiryet oṅnkulany kukonopci Yesu kopure parak.

<sup>8</sup>Kuyito piko ce caṅ sirokwa aret nye wete Yesu, kuput piko alake ketik ce ponto sokek oṅnkoyito aran.



- <sup>9</sup>Yoto kucec piko ce kimite let oko ce kimite tay kupol kutum kule: “Akaste Yiyintet! Kukoci Yiyintet kupeyok kinko nyi coni om kaynetap Mokoryontet!
- <sup>10</sup>Kukoci Yiyintet kupeyok poytoyisyet nyi coni nyepo kukonyo Tauti! Cikaste Yiyintet!”
- <sup>11</sup>Yoto kupunto Yesu Yerusalem, oṅkuwo okoy kotap Yiyintet orit, nteyu kowo kukäs tukuk tokol ce kimite orit okoy kuwany, kunomen oko konomikyï taman ok oyeny okoy kupunto Pesaniya, omnye kikwimen koret.
- <sup>12</sup>Ntowo kuyekune ye kimite cekto kukwone Pesaniya, kwam Yesu rupet, yoto kukäs neto mokoywet nye ponto sokek nye kimite ye low.
- <sup>13</sup>Kuwo kule wakäs nto manyorte mokoyek ketoto. Ntowo kupunto yeto, wokunyor kuponto sokek pate, omnye kipuryo kot ku pesyosyek coto ce rurye mokoyek.
- <sup>14</sup>Yoto kumwoci Yesu mokoywet kule, “Mente kot tokwamenij nyi ci yec mokoyek kenysis.” Kulim konomik ṅalek ce kimwoy neto.
- <sup>15</sup>Ntowo kupun cek Yerusalem, kowut kotap Yiyintet orit, oṅkucec kukwetune orit piko ce kyolisyi oko ce kyolyoyisyi, oṅnkumil mesanikap piko co wöle pesanik oko ṅecerokap piko ce kyolyoy swororok,
- <sup>16</sup>oṅnkuyete piko tokol manamat kusut kiy kuweto saṅ.
- <sup>17</sup>Kunet Yesu piko yoto kumwoci kule, “Kicesil silutekap Yiyintet kule kimwoy Yiyintet kule ‘Mosukwek komwani koto nye some pikap koret tokol,’ kunyi kwawec akwek kwek kepenet nye wuṅekey corik?”
- <sup>18</sup>Yoto kulim tisik cewoyec oko konetikap ntarastinek ṅalecato, kucec cek kuceny aret nye mokupakäce Yesu. Ntene kunyokoritu kuywey neto omnye kikite piko ce caṅ konetisyenyi.
- <sup>19</sup>Ntowo kwimen koret, kunomen Yesu oko konomikyï kupete moṅet.
- <sup>20</sup>Ntowo kuyekune kororn ye kimite cekto kupeti om aran kukäs mokoywetwe nye kuyam kuceke met okoy tikityek.
- <sup>21</sup>Yoto kusot Petero kito nye kukwiyakay, kumwoci neto Yesu kule, “Konetintet, käs pa kuyam mokoywetwe kwecupe nyi!”
- <sup>22</sup>Kuwekyi Yesu kumwoci kule, “Komwowok ani akwek ṅalek cepo manta kule, ye koyen okenekey Yiyintet,
- <sup>23</sup>omuci omwoci tulwoni kule, ‘Dayekisyë oṅnkiwo wewircikey ruretyet orit.’ Oṅnkupuryo kot oponte mukuleywek oyeny, ntene oyeni kule mokwiyokis ṅalek ce kemwowu, kwiyiyoktos kupoyit manta ṅalecato kemwowu nyi.
- <sup>24</sup>Kunyo omwowok ani akwek kule, ye kosom kule cekonok kitake kumöce kule oyeni kule kacenyoru, mosicekonok kiy ake tokol.





<sup>25</sup>Nteye koŋetye osom, roke okalye ci ake tokol ŋolyo ye kwopontekey, sukuŋet kukalyak akwek Papamwoŋ nye mite torot miyotyoniwok.

<sup>26</sup>[Ntene ye puryo kot omuci akwek kot akalye piko alak; kupuryo komuce mpo kot kukalyak Papamwoŋ nye mite torot miyotyoniwok.]”

<sup>27</sup>Yoto kukwa cekto okoy kupun Yerusalem. Nteye kimite Yesu kuwesetoti om kotap Yiyintet orit, yoto kukwa tisik cewoyec oko konetikap ntarastinek oko poyik ye kimite neto,

<sup>28</sup>oŋnkutepe kumwoci kule, “Poŋo kamukeywek cu yiye nyi tukucu? Do nyi kikonin kamukeywek iyiy tukucu?”

<sup>29</sup>Kuwekyi Yesu kumwoci cek kule, “Mosatepenak ani akwek teputyet akenke pate, nteye kowekwo, mpo ani mosowekwok wule onyortoy kamukeywek ce oyiye tukucu.

<sup>30</sup>Kicone potisonisyetap Yowana torot, nto kicone wule mite piko? Owekwo ani pa akwek?”

<sup>31</sup>Yoto kurwoc cekto kwidek nkit kumwoy kule, “Ye kocemwowu kule, ‘Kicone torot,’ mosukuwekwec neto kule, ‘Omne satay akwek moyen ŋalekyi?’

<sup>32</sup>Nteye kucemwowu kule, ‘Kicone wule mite piko.’ ” (Kuywey cek piko, omnye kicöme ci ake tokol kule kiworkoyo Yowana manta.)

<sup>33</sup>Kuwekyi cekto Yesu kumwoci kule, “Puryo kot cinket acek.” Kumwoci Yesu cek kule, “Mpo ani puryo kot omuci kot omwowok akwek wule onyortoy kamukeywek cu oyiye tukucu.”

## Marko 12

<sup>1</sup>Yoto kuŋololyi Yesu cekto om tyonkocok kumwoy kule, “Kimite citake nye kiwu ketik ce cekure Sapipunek oŋnkuker tuyita komut, oŋnkupal kutec mwenet nye ciruranye matuntanikap Sapipunek, oŋnkutec kitarit nye ceripse oŋnkukoci kopotik kukotesan, oŋnkunomen kuwo toyek.

<sup>2</sup>Ntwoo kupunto pesyosyek ce rurye omikap sapipunek, kuyok cicoto mutworintenyi kuco wule mite kopotik co kikotesonisyi, kule sukuŋet co kukoci mutworintonoto omik alak cepo sapipunek ce kiciyoyekyin.

<sup>3</sup>Kunäm kopoticoto mutworintonoto oŋnkupir oŋnkukwet kuweto yewuniyek pate.

<sup>4</sup>Kuyok cicoto mutworintet ake yec, kupir kopoticoto yec mutworintet nyoto metit kukoten, oŋnkunyalil kutaŋany.

<sup>5</sup>Kuyokto cicoto mutworintet ake yec, kupakäc kopoticoto mutworintet nyoto kume, oŋnkutaŋany mpo alak ce caŋ, kupir alak, oŋnkupakäc alak kupok.

<sup>6</sup>Cito nye kikiŋet kuyokto cicoto ku weritap cicoto akenke pate cämanet. Nto om letut kuyokto cicoto werinyi nkit kuwo wule mite kopotik, kumwoy kule, ‘Mosukuywey cek werimwani.’



- <sup>7</sup>Ntene kurwoc kopotik kwicek nkit kumwoy kule, ‘Nyitenyi kunye kotiyintet, akwa cenäm cepakäc kume, sukuñet kwek nyinyacek kontisyet!’
- <sup>8</sup>Yoto kunäm cekto werit oñnkupakäc kume, oñnkocut kucone mparetap sapipunek.’’
- <sup>9</sup>Kutep Yesu kumwoy kule, ‘Mosukwiy kulene citap mparetap sapipunek? Mosukuco neto nkit, oñnkupakäc kupok kopoticoto oñnkukoci kopotik alak kukotesan mparetap sapipunek.’’
- <sup>10</sup>Porukey kule tompo kot asuman akwek silutyoni po Yiyintet nyi mwowu kule: ‘Rwantet nyo kitoye tekik kule puryo kot kuponto latik, kunye kiweckey kwek rwantet nye pële tokol nye tiye koto tapan.
- <sup>11</sup>Mokoryontet nye kikwiye, kunyo po kakitat koromun wule yunto!’’’
- <sup>12</sup>Yoto kusyem kantoyikap Farasayek kule cenäm Yesu, omnye kinket kule kañalale neto tyonkocet nye nöme cekto, ntene kuywey luket nyepo piko ce cañ. Yoto kunomen cekto kupecikey kupapakta neto.
- <sup>13</sup>Ciyok Farasayek alak oko piko cepo luketap Erote alak kukwa wule mite Yesu kule sukuñet kwokulot cek neto om ñalek ce mosukumwoy om tintenotet.
- <sup>14</sup>Kukwa picoto oñnkwokutepe Yesu kule, ‘Konetintet, cinket kule yiku nyi ci nyepo manta, oñnkupuryo kot soti ñalek ce sote piko, omnye puryo kot soti wule yunto piko, ntene neti pate ñalek cepo manta cepo Yiyintet, kunyo mwowec acek, cömweç ra ntarastinekyo cekweci mosoret Kinko Nyewo nto puryo? Roko cekweci nto puryo kot kuroke cekweci?’’’
- <sup>15</sup>Ntene kunket Yesu tekutek ce kiponto cek, kuwekyi kumwoci kule, ‘Omne sasyem akwek kule ceteca ani? Osutwo pa silinkit akäs?’’’
- <sup>16</sup>Yoto kusutyi cek neto silinkit akenke, kutepe Yesu cek kule, ‘Po ño metit nyi oko kaynet nyi silot?’’ Kuwec kumwoy kule, ‘Po Kinko. Nyewo.’’’
- <sup>17</sup>Kumwoci Yesu cekto kule, ‘Kunyo okocini kinko tukuk cepo kinko, okocini Yiyintet tuku cepo Yiyintet.’’ Kukite cekto yoto koromun ñalekyi.
- <sup>18</sup>Kukwa Satusayek alake wule mite Yesu. (Coto ku piko co mwowu kule puryo kot komuce kot kotutune met piko ce kipok.) Kutepe cekto Yesu kule,
- <sup>19</sup>‘Konetintet, kisilwec acek Moses ntarastini kule, ‘Ye kame citake oñnkupakakta korket nye puryo kot kuyici lekok, kuroke konti komüt mutakwam korkonoto musuk, sukuñet kuyici mutakwam nyo kime lekok.’
- <sup>20</sup>Kunyo kimite piko tisapu ce kitupco, kukesyo nyewo komüt korket, ntene kume nye kipuryo kot kuyi lekoy.
- <sup>21</sup>Komüt mutakwam nyepo oyeny konti korkonoto musuk, kume mpo nyoto nye kipuryo kot kupapakta lekoy, kuyunyoto mpo nyepo somok.
- <sup>22</sup>Komüt picoto ku tisap korkonoto oñnkupok picoto tokol nye kipuryo kot kuyi lekwa mpo akenke. Nto om letut kume mpene korkonoto.



- <sup>23</sup>Kunyo om pesyet nyo cejetos citutune met piko tokol, poyitu ŋo korkonoto? Omnye kikomüt cekto picoto tokol ku tisap?”
- <sup>24</sup>Kumwoci Yesu cekto kule, “Yunyoto ye somosokisye akwek, ntene oŋnketi akwek omne? Omnye puryo kot oŋnketi silutekap Yiyintet oŋnkupuryo mpo kot oŋnket swametap Yiyintet.
- <sup>25</sup>Omnye piko co mokotutune met, kuce puryo kot komütisiyi moronik nto cimüt mpo koruk, omnye mosukukerkeyitu cekto oko Malaykanik ce mite torot.
- <sup>26</sup>Kunyo nto ŋalek cepo manta ce nöme kotutunetap met kucu: tompo kot asuman akwek om kitaputap Moses ŋalek cepo rukututwet nyo kiloye? Omnye kicesil ŋalecato kule kimwoci Yiyintet Moses kule, ‘Oyiku ani yiyintetap Apram, Yiyintetap Isaka, yiyintetap Yakopo.’
- <sup>27</sup>Poru ŋaleca kule, Yiyintet kunye Yiyintet nyepo piko ce soptos ntene puryo ku yiyintetap piko ce kipok. Oyiku akwek mosotin koromun.”
- <sup>28</sup>Kimite yoto konetintetap ntarastinek akenke nye kilime ŋalecato. Yoto kukäs neto kule kowekyi Yesu Satusayek ŋalek topon, kucu ye mite Yesu oŋnkutepe kule, “Ntarastit oŋnkono nyepo tayta nye pële tokol.”
- <sup>29</sup>Kuwekyi Yesu kumwoci kule, “Ntarastit nyepo tayta nye pële tokol kunyi mwowu kule, ‘Alim pa pikap Israel! Mokoryontet yiyintenyö kunye Mokoryontet akenke nkit pate.
- <sup>30</sup>Misyini cäm Mokoryontet Yiyinteŋuŋ om mukuleyŋuŋ tokol, oko sopenŋuŋ tokol, oko kasoteywekuk tokol, oko swameŋuŋ tokol.’
- <sup>31</sup>Nto nyepo oyeny nye pëlisiyi kunyi kule, ‘Misyini cäm latyeŋuŋ kuyu wulo cömntoykey nyi nkit.’ Puryo ntarastinek alak cewoyec kupël cutecu oyeny.”
- <sup>32</sup>Kumwoci konetintetap ntarastinek Yesu kule, “Konetintet, kemwowu ŋalek cepo manta kule, ‘Mokoryontet kunye Yiyintet akenke nkit pate, puryo kot kumite yiyik alak ntene neto nkit pate.
- <sup>33</sup>Kunyo misyini kucäm cito Yiyintet om mukuleynyi tokol, oko kasoteywekyi tokol, oko swamenyi tokol, oŋnkucäm latyenyi kuyu wulo cömntoykey neto nkit.’ Topon koromun kupëlis ye kocerip ntarastinecutecu oyeny kupël ye kocesut tyoŋik oŋnkyepele meset nyetilil kwek korosek cepo Yiyintet.”
- <sup>34</sup>Yoto kukäs Yesu kule kawec cicoto ŋalek cepo ŋomnon, kumwoci kule, “Puryo kot mitowune nyi wule low om wule mite poytoyisyetap Yiyintet.” Kipuryo yoto ci nye kitokomuc kot kusyem kule atepe Yesu ŋolyo mpo akenke.
- <sup>35</sup>Nteye kimite Yesu kunetisiyi om kotap Yiyintet, yoto kutep kumwoy kule, “Muce kulene kumwoy konetikap ntarastinek kule, mosukwek Kristo keseniyantetap Tauti?
- <sup>36</sup>Omnye kintoci Muyet Nyetilil Tauti kumwoy kule ‘Kimwoci Mokoryontet Mokoryontenyu kule, Pure yu po yewumwani nyepo tay, okoy okoci ani punikuk kwek ŋacerok cepo kerenkokuk!’



<sup>37</sup>Kunyo nteye kure Tauti nkit kule, ‘Mokoryontet.’ Komuce kulene yec Kristo kwek keseniyantetap Tauti?’ Kulimnta piko ce caṅ om yoto ṅalekyi om ṅerekwek.

<sup>38</sup>Nteye kimite Yesu kunete cek, yoto kumwoy kule, “Oripkey koromun wule Konetikap ntarastinek, ce möce kule cepesetoti kukelac sirok ce koyec, oṅnkucäm kule ciyweyec cisupayec topon om wulo po moteponik.

<sup>39</sup>Ce kweye ṅacerok co kweyotin om korikapkok oko oteputek cepo tay om sokwonutek,

<sup>40</sup>ce nyopone korikap musukik, oṅnkusilkey kusome kwiyisye ṅalek ce caṅ, cekto ce mosukunyor toṅoṅutek ce caṅ ce pëlisyi.”

<sup>41</sup>Nteye kimite Yesu kukepur ye kilekite sontukut nye cekonore pesanikap kotap Yiyintet, kukäs neto piko ce kikocini pesanik sontukut orit. Kukoci piko ce mokoren pesanik ce caṅ.

<sup>42</sup>Ntene kuco korko nye panan nye musuk oṅnkukoci kafunek oyeny.

<sup>43</sup>Yoto kukur Yesu konomiky kuka yeto oṅnkumwoci kule, “Omwowok ani akwek ṅalek cepo manta kule, kekoci panani musuk kokotutek ce caṅ kusir ce kekoci piko alake tokol.

<sup>44</sup>Omnye kakon piko alake kokotutekwa ce koṅetune ce caṅ cepo mokoryontimwa. Ntene om wule mite korkoni panan kuyu wule yunto, kokukoci neto kiy ake tokol nye koponto, coto kuce tokol ce kuponto ce kwenekey om sapon nyi.”

## Marko 13

<sup>1</sup>Nteye kimite Yesu kunomene kotap Yiyintet, kumwoy akenke om konomiky kule, “Konetintet, käs pa, rwontok cewoyec oko tekset nyepo korik cewoyec.”

<sup>2</sup>Kuwekyi Yesu kumwoci kule, “Kekäs nyi koricu woyec cu kicetec kuyunyi, puryo rwantet mpo akenke nye ṅetune ye mite yawut, mosiciturpup tokol oṅnkyewirci ṅony.”


<sup>3</sup>Nteye kimite Yesu kukepur tulwetap mokoyek kutokyikey kotap Yiyintet. Yoto kuka ye kimite neto mpo Petero oko Yowana oko Antereya oṅnkumwoci möt kule,

<sup>4</sup>“Mwowec acek, mosukwiyokis pesyo ne ṅalecutecu?”

<sup>5</sup>Kucec Yesu kunet cekto kumwoci kule, “Akäste monte kot kuperperak kumasak citake tokol.

<sup>6</sup>Mosukukwa piko ce caṅ om kaynemwani oṅnkwokumwoy kule, ‘Ani kunye nyoto!’ Oṅnkuperper piko ce caṅ.

<sup>7</sup>Monte cemuye ye kolim polotetap poryet nye lekit, nto poryet nye mite wule low, monte cemuye, mosukwiyokis tukucoto, ntene kupuryo kot kuporu kule kopunto pesyetap letut.



- <sup>8</sup>Omnye mosukusetyi koret ake kuporye koret ake, kusetyi poytoyisyet ake kuporye poytoyisyet ake, mosukoriŋriŋ koret wulyo tokol oŋnkunām rupet koret tokol. Tukucutecu kuce poru kule kacec mwoninto nyepo toŋoŋutek.
- <sup>9</sup>“Ntene misyinok oripkey akwek nkit. Omnye mosukunāmak piko oŋnkukwerok ape koti, mosicepasenak korikapkok, mosoyoŋe taytap poytoyik cewoyec oko taytap kinkonik omnye kacām akwek kaynemwani sukuŋet omwoci akwek cekto lokoywek ce toponec.
- <sup>10</sup>Ntene misyini ce nyosye ce mwoci lokoywek ce toponec piko cepo koret tokol.
- <sup>11</sup>Nteye kacenāmak akwek oŋnkyekwerok ape koti, monte ce nyosye cemuye kule mosicemwowu ne, ye kopunto pesyonoto, aŋalal omwowu pate ŋalek ce kacekonok kule omwowu om yoto. Omnye puryo kot kucikwakwek ŋalek ce moŋalal, mosukukwane wule mite Muyet Nyetilil.
- <sup>12</sup>Mosukukoyito piko nkit mpo yeyamwa cenām oŋnkyepakāc, mosukwiŋ mpo kwan lekokwa kuyunyoto. Mosukuweckey lekok kunām mpo kwan oŋnkukoyito cepakāc.
- <sup>13</sup>Mosukusenkerak akwek piko tokol omnye kocāma ani. Ntene mosicisop cesor ci ake tokol nye kotitir okoy kupunto pesyet nyepo letut.”
- <sup>14</sup>“Ntene ye kokās akwek, ‘Kiy nye miyat nye cetoye,’ kumite keyoŋe otepto nye puryo kot kuroke kuyoŋe. (Moce kunket cito nyo sumone kule mwowu ne ŋalecu!) Misyini kumwey yoto piko ce mite Yuteya kupa lokomosyek.
- <sup>15</sup>Oŋnkupuryo kot kumisyini cito nye mite konyi kisyek kurek kuwo koto orit wokonum kiy ake tokol nye möce kule owete,
- <sup>16</sup>Puryo kot kuroke cito nye mite mparen kuwo konyi kule wonumu siret.
- <sup>17</sup>Mite kwapi koromun om pesyosyecoto koruk ce koyotin oko koruk ce rerisyi lekok!
- <sup>18</sup>Osom Yiyintet sukuŋet mente kwiyokis ŋalecutecu om pesyosyek cepo peŋat ye katit koret.
- <sup>19</sup>Omnye mosukupēlis toŋoŋutek cepo pesyosyecoto kupēl toŋoŋutek cepo pesyosyek alak tokol ce kikwiŋokis om koret kuceke ye kitany Yiyintet koret okoy kupunto pesyosyecoto. Ntene komokwiŋoktos yec taŋanyanta ake nye kerkey nyoto.
- <sup>20</sup>Ntomo nye kikoŋerin Mokoryontet Yiyintet kuŋerinitu pesyosyecoto, nto puryo ci mpo akenke nye ŋetu nye cimuce cisop. Ntene kikoŋerin Mokoryontet pesyosyecoto om toponiyetap pikyi co kweyanik.
- <sup>21</sup>“Kunyo, ye komwowok akwek citake om pesyosyecoto kule, ‘Akās oŋyi Kristo nye Dapanet!’ nto ‘Oŋyin mite yun!’ Monte ciyen ŋalekyi.
- <sup>22</sup>Omnye mosukutok piko ce mwiynec ce perperisyi kule ciku Dapanet oko piko cemwowu kule ciku workoyik. Mosukwiŋ picoto pelutok cepo kakitat kule siceŋet cemas ciwurte piko ce kweyanikap Yiyintet ye kemukakay.



<sup>23</sup>Akäste akwek! Omnye komwowok ani akwek ñalek tokol kutompo kot kupunto pesyonoto.”

<sup>24</sup>“Om letutap pesyosyekap toñoñutek; mosukolumakay kutuyit asista,

<sup>25</sup>oñkutay arawet me luwu. Mosukosuwune kokelik torot. Mosukotimtimkey swamet nyepo torot.

<sup>26</sup>“Yoto ye mosokäs Weritap cito kucone polyet kuponto swamet nyewo oko woyinto.

<sup>27</sup>Mosukuyokto neto malaykanik kupa taponutek amwan cepo koret, oñkoruruc pikap Yiyintet ce kweyanik kukwane wule kiñete koret tokol kuceke tapan okoy tapan.”

<sup>28</sup>“Roke anetekey akäse ketit mokoywet. Ye kokäs akwek kwak kule kokunot sokek ce ñorñor; oñket yoto kule karik pesyosyekap peñatut.

<sup>29</sup>Kuyunyoto, ye kokäs akwek kwiyoktos tukuk ceyucutecu, kuye mosonket kule karik kucec pesyosyekap Weritap cito.

<sup>30</sup>Komwowok ani akwek ñalek cepo manta kule! Mosukwitita ñalecutecu tokol kutompo kot kupok piko tokol cepo pini soptos yawut.

<sup>31</sup>Poku wulin po torot, oñkupok wuli po ñony, ntene puryo kot kupoku ñalekwani mpo kisic.”

<sup>32</sup>“Puryo ci mpo akenke nye nkete pesyonoto nto sawet, nka mpo Malaykanik om torot, nka mpo Werit. Papa nkit pate nye nkete.

<sup>33</sup>Akäste, oripkey okonjise, omnye puryo kot oñketi akwek kule pesyo ne ye puntoy pesyonoto.

<sup>34</sup>Mosukukerkeyit oko ci nye konomen kuwo toyek oñkupakakta mutworikiyi kumite kwiyisiyi, oñkukoci ci ake tokol yisyenyi nye yiye, oñkumwoci cito nye ripe kurket kukös kuripso topon.

<sup>35</sup>Kunyo oripsye, omnye puryo kot oñketi akwek pesyet nye cone citap koto. Muce pesyet ake kupun kosoleny, nto ye komoy kwen, nto ye kerir koret, nto ye komwok asista.

<sup>36</sup>Nteye kotepe kot kuco lakwar, kupuryo kot kuroke cokunyorwok akwek omite koruye rwonto!

<sup>37</sup>Kunyo ñalek ce omwowok ani akwek kuce omwocini mpo piko alak tokol kule, okösu oripkey.”

## Marko 14

<sup>1</sup>Nteyu kowo kuñet pesyosyek oyeny kupunto pesyet nyepo sakwetap Yutayek nye cekure keytayet oko sakwet nyepo mukatyantet nyemo kutunat. Kimite yoto tisik cewoyec oko konetikap ntarastinek kucenye aret nye mokunäme Yesu om wule wuñat oñkupakäc kume.





- <sup>2</sup>Kumwoy cekto yoto kule, “Puryo kot kurok kwiy ŋolyontoni ye pesyetap sakwet, omnye muce kiy piko pararet.”
- <sup>3</sup>Kimite Yesu pesyet ake kotap Simon citap mutyenkenik om Pesaniya, nteye kimite kwomisyi, kuco korket ake nye kiponto cupet nye nyitat mwaytap ketit nye cekure narat nye poŋu topon nye kyole pesan ce caŋ. Kuyat kuyeyi cupet oŋnkuroŋknyi mwayta metitap Yesu.
- <sup>4</sup>Kunyer yoto piko alake ce kimite yoto kuŋalal kwicek nkit kumwoy kule, “Omne siciwurta mwayi poŋu topon kuyunyi?”
- <sup>5</sup>Kopuryo kot kuroke kyalya sicyenyor silinkinek ce keyitye pokolwokik lö oŋnkyikoci pesanik pononik?” Kunyerci cekto korkonoto koromun.
- <sup>6</sup>Ntene kumwoy Yesu kule, “Ayaste! Omne sayim akwek neto? Kokwiwo ani ŋolyo nye topon nye nyolunot koromun.
- <sup>7</sup>Omnye opontekey akwek oko pononik okokoy, nteye omöce kule cikalye cek omuci oyici tukuk ce toponec om pesyo ake tokol, ntene puryo kot opuri ani oko akwek okokoy.
- <sup>8</sup>Kakwiy korkoni ŋalek ce muce, omnye kaŋape mwayta pormwani kutompo kot kupunto muyisyet.
- <sup>9</sup>Komwowok ani akwek ŋalek cepo manta kule, om koret tokol wule mocemwaytye lokoywek ce toponec, mosicemwowu mpo ŋalek cu kokwiwo ani korkoni cisote neto.”
- <sup>10</sup>Kunomen yoto Yuta Isikaryoti nye ki akenke om konomik taman ok oyeny, kuwo wule mite tisik cewoyec wokuŋomnto Yesu kukoci cekto.
- <sup>11</sup>Kuŋerec tisik koromun yu kowo kulim ŋalek ce komwoy Yuta. Kukurtoci cek neto kule mosicekonij pesanik. Yoto pakenke kucec Yuta kuceny poroyinto nye topon nye mokuŋomnte Yesu.
- <sup>12</sup>Nteye ki pesyet nyepo tayta nyepo sakwet nyo kyome mukatyantet nye mokutunat, pesyet nye ceyenye kecirekap omikap Keytayet, kutepe konomik Yesu kule, “Ono wule möce nyi kule cipe acek woceyiytowuŋ wule meyomisye omik cepo pesyetap keytayet?”
- <sup>13</sup>Yoto kuyokto Yesu konomik oyeny kumwoci kule “Ape okoy moŋet orit, mosukutuyenok akwek citake nye toronu teretap peko, arup cicoto,
- <sup>14</sup>okoy koto nye kewut, oŋnkomwoci citap koto kule, ‘Komwowuŋ nyi konetintet kule, ono kotap toyek nye moyomisye ani oko konomikyu omikap pesyetap Keytayet?’
- <sup>15</sup>Mosukuporwok cicoto koto nyewo nye satat topon nye mite koto parak, wayiye kiy ake tokol om wuloto.”



- <sup>16</sup>Kunomen konomik kupa okoy kupunto mojet, wokunyor kiy ake tokol kumite kuyu wulo kakamwayta Yesu. Kuyiyta cekto omikap pesyetap Keytayet.
- <sup>17</sup>Ntowo kupunto kosoleny, kuco Yesu oko konomiky taman ok oyeny.
- <sup>18</sup>Nteye kimite cek kukepur kwomisyi, kumwoy Yesu kule, “Komwowok ani akwek ñalek cepo manta kule, mosukuñomnto ani akenke om akwek nye mite yuteyu kwomisyi oko ani.”
- <sup>19</sup>Yoto kocoñoñoonis konomik oñkucec ci ake tokol om cekto kutepe Yesu kule, “Ani nyoto?”
- <sup>20</sup>Kuwekyi Yesu kumwoci kule, “Akenke om akwek taman ok oyeny nye noknoktoy mukatyantet nyenyi sanit akenke oko ani.
- <sup>21</sup>Omnye mosukume Weritap cito kuyu wulo mwoytoy silutekap Yiyintet kule mosukume, ntene mite kwapi koromun cito nyo mosukuñomnto neto! Kitopon nto kipuryo kot ce yi cicoto mpo kisic!”
- <sup>22</sup>Nteye kimite kwomisyi, kunäm Yesu mukatyantet, oñkusomnci kukasta Yiyintet, oñkupetec oñkukoci konomiky, oñkumwoy kule, “Onäm oyam, pormwani nyitenyi.”
- <sup>23</sup>Kunäm yec cikompet oñkusomnci kukasta Yiyintet, oñkukoci kuyesyo cek tokol.
- <sup>24</sup>Kumwoci Yesu cekto kule, “Korotikwani cutecu cepo kiroyetap Yiyintet nyelel ce citotocini piko ce cañ.
- <sup>25</sup>Komwowok ani akwek ñalek cepo manta kule komo toye ani yec mpo tukusic pekap omikap sapipunek okoy pesyet nye mosaye ce lelac om poytoyisyetap Yiyintet.”
- <sup>26</sup>Ntowo kupok, kutum tumnto oñkuñetyo kupa okoy kupunto tulwetap sapipunek.
- <sup>27</sup>Yoto kumwoci Yesu cek kule, “Mosomwey arway akwek tokol oñkopakakta ani, omnye mwowu silutekap Yiyintet kule, ‘Mosukupar Yiyintet mesewontet kume, yoto kuseret kecirek.’
- <sup>28</sup>Ntene om letut ye kacinjeta otutune met, mosontowok awo anyosye Kalilaya.”
- <sup>29</sup>Kumwoy Petero kule, “Nka kot kamwey kurway cut alake tokol, puryo kot oyostiñ ani nyi mpo kisic.”
- <sup>30</sup>Kumwoci Yesu Petero kule, “Oñnkisot ñolyontoni! Kutompo kot koncur kurkonkit aret oyeny om kwomowutap pesyoni, mesetuckey nyi aret somok mwowu kule puryo oñketo ani.”
- <sup>31</sup>Kuwec Petero yec om swamet kumwoy kule, “Puryo kot omuci ani kot atuckey omwowu kule monketiñ nyi, nka kot koyek met cepoku mpo tukway!” Kumwoy mpo konomik cut tokol kuyunyoto.



- <sup>32</sup>Kupa cek okoy kupunto mparet nye cekure kesesemane. Yoto kumwoci Yesu konomiky kule, “Opur yuteyu ye omite ani osome.”
- <sup>33</sup>Kukwer neto kupetakey Petero oko Yakopo oko Yowana. Kupotpoten Yesu kumuy oṅnkusot koromun om yoto,
- <sup>34</sup>oṅnkumwoci neto cekto kule, “Oponte nerekwek ce caṅ koromun om mukuleymwani kot karik kupakäca, opur yuteyu oṅnkosom.”
- <sup>35</sup>Kuwo neto kunata tay kisic, oṅnkuyim kukutuny oṅnkusom kule nto kemukoktos kukeytena sawet nyepo toṅoṅutek.
- <sup>36</sup>Kusom kumwoy kule, “Papa! Papanyu! Mukoktos kiy ake tokol om wule mite nyi. Nemuneno ani toṅoṅutecu, puryo kot kuyu wulo omoktoy ani, ntene kwi yokis kuyu wule moktoy nyi.”
- <sup>37</sup>Yoto kuweckey kuco okoy cokunyor konomik co kosomok kumite koruy. Kumwoci Yesu Petero kule, “Simon, keru nyi? Puryo kot muc kot kösu wany mpo sawet akenke?”
- <sup>38</sup>Kumwoci neto cek kule, “Okösu sukuṅet mente kot osuci syemutok. Cöme mukuleyto, ntene puren porto.”
- <sup>39</sup>Kuwo Yesu yec wokusom kumwoy ṅalek ce kerkey oko co kumwowu yo kusome om panta nyepo tay.
- <sup>40</sup>Ntowo kuweckey kuco, cokunyor cekto kumite koruy yec, omnye kikinäm rwonto nyewo konyekwa. Yoto kupoty kule ṅolyontet nye mokuwec kumwoci Yesu.
- <sup>41</sup>Kuwo Yesu yec aret nyepo somok oṅnkucokomwoci cek kule, “Tomite akwek oruytosi omunyi? Kayem! Kapunto sawet! Kacenäm yawut Weritap cito oṅnkuyikoyito kunäm piko ce ponto miyotyonyik.
- <sup>42</sup>Oṅetye cipe! Akäs karik cito nye ṅomnto ani!”
- <sup>43</sup>Nteye kimite Yesu tokuṅolole, kupun Yuta akenke om konomik taman ok oyeny kupontonukey oko luket nyepo piko ce caṅ ce kiponto ponkok oko runkunek, kiyoku picoto tisik cewoyec oko konetikap ntarastinek oko poyik.
- <sup>44</sup>Kikumwoci ṅomntoyintet Yuta picoto pelutyet, kumwoci kule, “Cito nyo katoroc aṅatut ani kunye cito nyoto, anäm nyoto okwer oṅnkoriṅ topon koromun.”
- <sup>45</sup>Ntowo kupun Yuta kuwo okoy ye kimite Yesu oṅnkumwoy kusupay kule, “Konetintet.” Oṅnkutoroc kuṅatut.
- <sup>46</sup>Yoto kunäm cekto Yesu oṅnkurat.
- <sup>47</sup>Ntene kocut cito akenke nye kimite keyoṅe yoto rotwetap cok, oṅnkuyep kulot yititap mutworintetap tisintet nyewo.
- <sup>48</sup>Kutepe Yesu cek kule, “Kakwa kule kwocenama kuyu nye omöce kule cenäm corin? Omnye kakwante ponkok oko runkunek.



49Nteyu kucepontekey oko akwek kuwany pesyosyek ce caŋ om kotap Yiyintet onetisi ani, ntene puryo kot onäma ani akwek yoto. Ntene misyini kwi yokis ñalecu sukuŋet kwitita ñalak co kicemwoy om silutekap Yiyintet.”

50Yoto kumwey konomik tokol kupakakta Yesu.

51Yoto kurup oyiperyontet ake Yesu let, nye kikilac suket pate. Kusyem piko alak kule cenäm oyiperyontonoto

52ntene kuciwit kumwey kupokokyi cek suket oŋnkulopotyikey puc pate nye puryo sira.

53Kukwer cek Yesu okoy kupunto kaytap Tisintet nyewo, wule kimite kukokorurukikey tisik cewoyec tokol oko poyik oko konetikap ntarastinek.

54Yoto kurup Petero cekto letut kuloyityi kisic okoy kupunto saŋntap kaytap Tisintet nyewo. Kopur Petero ŋony kuyu mata wanak oko sikarek ce ripsi.

55Kusyem tisik cewoyec oko piko cepo kokwet tokol kule ceceny piko muncururwanik ce komwoy lelisto nye nöme Yesu sukuŋet kupakäc kume, ntene kipuryo kot kunyor ñolyo nyepo lelis.

56Kumwoy piko muncururwanik ce caŋ ñalek cepo mwiynan pate kule kikwiw Yesu. Ntene kutoytocin ñalekwa nye puryo kot kunömekey.

57Kuyon alake oŋnkuwosontyi Yesu kumwoy ñalek cepo mwiynan pate, kumwoy picoto kule,

58“Kucelim acek nkit kumwowu cici kule, ‘Mosoturpup ani kotap Yiyintet nyi kitece piko yewuniyek, nto om letutap pesyosyek somok, atec ani ake nye puryo kot kutec piko yewuniyek!’ ”

59Kutoytocin mpo ñalek ce kimwoy picoto nye puryo kot kunömekey.

60Yoto kuŋet Tisintet nyewo kuyonje taytap kokwet, oŋkutepe Yesu kule, “Puryo kot ñololi nyi wec ñalekyu cewosontyiŋ nyi picu?”


61Ntene kuis Yesu nye mnawec ñolyo. Kutepe yec Tisintet nyewo Yesu kule, “Yiku nyi Dapanet nye Weritap Yiyintet Nyetilil nye cikostoy?”

62Kumwoy Yesu kule, “Ani nyoto! Kunyo mosakäs akwek tokol Weritap cito kukokopure komostap yewut nyepo tay nyepo Yiyintet nyepo kamukeywek tokol, oŋnkucontoykey polik cepo torot.”

63Yoto kupac Tisintet nyewo sirokyi, oŋnkumwoy kule, “Tocemocene acek yec piko muncururwanik alak!

64Kalim akwek ñalekyi nkit ce miyotec, omute akwek musankut kulene?” Yoto kumüt piko tokol musankut kulot Yesu kule misyini cepakäc kume.

65Kucec piko alake kuŋutyi Yesu ñulek, oŋnkuyen konyekyi, oŋnkutuluc, oŋnkumwoci kule, “Dor ño nye kopiriŋ nyi!” Kunäm sikarek Yesu oŋnkusyec.



<sup>66</sup>Nteye kitokumite Petero kukepur nyony om sañtap kayta, kuco cepto mutworintet akenke nyepo Tisintet nyewo.

<sup>67</sup>Nteye kotoköse cepoto Petero kumite kuyuye mata, kurotot komil topon, oñnkumwoy kule, “Kepontekey mpenyi Yesu nyepo Nasaret?”

<sup>68</sup>Ntene kutuckey Petero kutoyis kumwoy kule, “Puryo monket, oñnkupuryo mpo kot oñnkot ani ñalek ce mwowu nyi.” Kumiñnto Petero kuwo aret nyepo kayta sañ. Yoto koncur kurkonkit.

<sup>69</sup>Kukosyi yec cepkey Petero kumite wuloto, kumwoci cepoto piko ce kimite keyon yoto kule, “Oñyi cito akenke nye kopontokey picut.”

<sup>70</sup>Kutuckey yec Petero kutoyis. Nto om letut kumiññ, kumwoci piko ce kimite keyon yoto Petero kule, “Yiku nyi manta akenke om picut, omnye yiku citap Kalilaya.”

<sup>71</sup>Kutuckey Petero yec kuwälkey kucupkey kumwoy kule, “Kupara asis, monket ani cici oñolole akwek!”

<sup>72</sup>Yoto pakenke koncur kurkonkit nyepo oyeny. Yoto kusot Petero ñalek co komwocini Yesu neto kule, “Kutompo kot koncur kurkonkit aret oyeny mesetuckey toyisy aret somok kule monketo ani.” Yoto kucec Petero kurir.

## Marko 15

<sup>1</sup>Ntowo kuyec koret pate, koruruckey lakwar pakenke tisik cewoyec oko poyik oko konetikap ntarastinek oko piko tokol cepo kokwet nyewo oñnkurwoc. Ntokopok kurat cekto Yesu oñnkukwer okoy wule mite Pilato.

<sup>2</sup>Kutepe Pilato Yesu kule, “Yiku nyi kinko nyepo Yutayek?” Kuwec Yesu kumwoy kule, “Kemwowu nyi.”

<sup>3</sup>Yoto kuwosontyi tisik cewoyec Yesu kumwoy ñalek ce cañ.

<sup>4</sup>Kutepe yec Pilato Yesu kule, “Puryo kot wece nyi ñolyo? Kaspä ñalek ce cañ ce cewosontyiñ !”

<sup>5</sup>Yoto kutay Yesu yec mawec ñolyo okoy kukite Pilato koromun.


<sup>6</sup>Kityoktoy Pilato mopusyontet akenke nye kosom piko om pesyosyek cepo sakwetap keytayet.

<sup>7</sup>Kimite pesyosyecoto citake nye cekure Parapa nye ki akenke om piko alak ce kirototin om mopusi ce kiporis oko pararet nye kikwi.

<sup>8</sup>Yoto kukwa piko tokol kwokusom Pilato kwici cek kuyu wulo yiytoy kwak ye pesyetap sakwet.

<sup>9</sup>Kutepe Pilato cekto kule, “Omöce akwek kule otyokwok ani Kinko nyepo Yutayek?”

<sup>10</sup>Kinket Pilato topon kule kowosontyi tisik cewoyec Yesu om corokyinot pate.



- <sup>11</sup>Ntene kowurur tisik cewoyec piko kumwoci kule kusom Pilato kutyokyi cekto Parapa.
- <sup>12</sup>Kuŋololyi Pilato piko kutepe yec kule, “Kunyo omöce akwek kule ayiye ne ani cici okure akwek Kinko nyepo Yutayek?”
- <sup>13</sup>Kupol piko kumwoci Pilato kule, “Wuyitoci murtowontet!”
- <sup>14</sup>Kutepe Pilato cek kule, “Omne, kukwiyl lelis ne nye miyat?” Kutosyikey piko kupol koromun kumwoy kule, “Wuyitoci murtowontet!”
- <sup>15</sup>Omnye kimöce Pilato kule aŋerec piko, yoto kutyokyi cekto Parapa, oŋnkukoyito Yesu wokupas sikarek, oŋnkyekwer wocewuyitoci murtowontet.
- <sup>16</sup>Yoto kukwer sikarek Yesu kuwo kaytap Poytoyintet, ye cekure Pretoriyom, oŋnkukur koruruc sikarek tokol kukwa koyoto.
- <sup>17</sup>Kulokyi cekto Yesu siret nye mur kwarar, oŋnkuta kutwet nyepo kotok oŋnkukoci metinyi,
- <sup>18</sup>oŋnkucec kusupay kumwoci kule, “Cisupoyiŋ kinko nyepo Yutayek! Ilaŋnte!”
- <sup>19</sup>Kupire cekto Yesu korokto metit, oŋnkuŋutyi oŋnkukutuŋkyi kuyu nye keywey.
- <sup>20</sup>Nteyu kowo konkurur cekto Yesu okoy kuwany, konomune siretkey mur kwarar; oŋnkulokyi sirokyi nkit, oŋnkukwer kuwo wocewuyitoci murtowontet.
- <sup>21</sup>Nteye kimite kupeti om aran, cetuye citake nye cekure Simon nye kicone koret saŋ kuconi moŋet, kunäm cekto neto kukerci koŋ kukonopat murtowontetap Yesu. Cicitenyi ku Simon nyepo koretap Kurene nye kikwanitap Alekisantha oko Rupo.
- <sup>22</sup>Yoto cekwer Yesu okoy kupunto ye cekure Kolokosa nye mwowu kule “Rokyetap Metit.”
- <sup>23</sup>Kusyem cek kule cikoci Yesu kuye nfinonyik ce kacetase sakityek alak ce mwonec ce cekure mira, ntene kutay Yesu kuye.
- <sup>24</sup>Yoto kuwuyitoci cek Yesu murtowontet, oŋnkupcicin sirokyi kuporci kirotyet sukuŋet kukäs kule mosukupoyit ŋo siret oŋnkono.
- <sup>25</sup>Kimite yoto sawet somok nyepo kororn ye kiwuyitocini cekto Yesu murtowontet.
- <sup>26</sup>Cecil ŋalek cepo musankunyi kule, “Kinko nyepo Yutayek.”
- <sup>27</sup>Cewuyitoci murtowonik mpo piko corik alak oyeny oko Yesu, kopurune ake yewunyi nyepo tay, koporune ake yewunyi nyepo let.
- <sup>28</sup>[Yoto kwitita kupoyit manta silutekap Yiyintet ce mwowu kule, “Kicituyo neto oko piko ce yirye ntarastinek.”]
- <sup>29</sup>Kulelec metewokwa piko ce kipeti kutile aran, oŋnkucup cekto Yesu kumwoy kule, “Ye! Nyi nyo mwowu kule omuci oturpup kotap Yiyintet aŋnkatec ake om pesyosyek somok.





- <sup>30</sup>Kunyo rekune pa nyi yawut murtowontet co ŋony sopkey nkit.’’
- <sup>31</sup>Kuŋalal kwicek nkit mpo tisik cewoyec oko konetikap ntarastinek konkurur kucup Yesu kumwoy kule, “Kwesope neto piko alak, ntene puryo kot komuce kot kusopkey nkit!
- <sup>32</sup>Ce möce acek yawut cekäs Dapanet Kinko nyepo Israel kurekune Murtowontet kuco ŋony, sukuŋet ciyen acek neto.’’ Mpo piko oyeny ce kicewuyitoy oko Yesu kucupis mpecek kucup Yesu.
- <sup>33</sup>Ntowo kupunto asista pet kwen, kuŋäm menonet koret tokol okoy kupunto asista sokol nyepo kosoleny.
- <sup>34</sup>Ntowo kupunto asista sokol kupol Yesu om kutit nyewo kumwoy kule, “Eloy, Eloy, lema sapaksani?” Nye mwowu ŋaleca kule, “Yiyintenyu, Yiyintenyu, omne seyasta ani nyi?”
- <sup>35</sup>Nteye kotolime piko alake ce kimite keyoŋ yoto, kumwoy kule, “Alim pa, mite kukure Eriya!”
- <sup>36</sup>Yoto kulapat citake nye kiponto siponcit nye kerkey cankut nye kakolumnta nfinyonik ce mintililec; oŋnkurutyi tekantet oŋnkunömnci kutitap Yesu oŋnkumwoy kule, “Akany pa cekäs oŋnkuconi Eriya cokurek neto kucone murtowontet kuco ŋony!”
- <sup>37</sup>Kunco Yesu om kutit nyewo oŋnkume.
- <sup>38</sup>Yoto kukerer kupciwunekey oyeny kuceke met okoy kel siret nyo cepciye otepto nye tilil om kotap Yiyintet.
- <sup>39</sup>Ntowo kukäs nyewo nyepo sikarek nye kimite keyoŋe taytap murtowontet wule kencoyto Yesu oŋnkume, kumwoy kule, “Weritap Yiyintet cici manta!”
- <sup>40</sup>Kimite yoto koruk alake ce kimite kuköse ce kimite ye low kuminiŋ. Om cekto korucoto, kimite mpo Solome oko Mariyam nyepo Maktala oko Mariyam kametitap Yakopo nye miniŋ oko Yose.
- <sup>41</sup>Korucoto kuce kipontokey Yesu ye kimite Kalilaya ce kikwici neto yisyet. Kimite yoto mpo koruk alake ce caŋ ce kikwontoykey Yesu okoy kupun Yerusalem.
- <sup>42</sup>Nteye kimite kwimene koret, yoto kuco Yosep nyepo moŋetap Arimaseya,
- <sup>43</sup>Cito nye kisikenet nye kiciyweye nye kipo kokwetap Yutayek. Ki cito neto nye kimite kukene pesyet nye cone poytoyisyetap Yiyintet. Pesyonoto kunye kipesyet nye kiceyiytoykey sukuŋet ye koyekune kwek pesyetap Sapat. Yoto kuwo Yosep nye kipuryo kot kumuy okoy taytap Pilato oŋnkusom portap Yesu.
- <sup>44</sup>Kukite Pilato kulim kule kame Yesu. Yoto kukur neto nyewo nyepo sikarek oŋnkutepe kule kame Yesu kuloyit.
- <sup>45</sup>Ntowo kulim ŋalekap nyewo nyepo sikarek, kucomnci Pilato Yosep wokusut porto.



<sup>46</sup>Kwal Yosep suket nyelel, oṅnkurek musto, oṅnkurate suket oṅnkumuci mwenet nye mite kepenet nye kicepal rwantet. Ntowo kupok, kutor rwantet nyewo kukere kurket nyepo mwenetap kepenet.

<sup>47</sup>Kimite yoto Mariyam nyepo Maktala oko Mariyam kametitap Yose. Yoto kukäs cekto topon ye kocemuci Yesu.

## Marko 16

<sup>1</sup>Ntowo kupok Sapat, yoto kwal Mariyam nyepo Maktala oko Mariyam kametitap Yakopo oko Solome mwaninek ce poṅu topon sukuṅet kusut wokoyile mustap Yesu.

<sup>2</sup>Nteye kipesyetap Santey kukayec koret komwok asista, kupa cek okoy ye kimite mwenet.

<sup>3</sup>Nteye kimite kupeti om aran kuṅalalat kwicek nkit kumwoy kule, “Do nye sukuwunuktowec rwantet nyo mite kurketap mwenet?”

<sup>4</sup>Yoto ntopere cekäs kacewunukto rwantet kucone kurket nyepo mwenet.

<sup>5</sup>Ntowo kupa cekto mwenet orit, yoto kukäs oyiperyo nye kelac siret nyelel nye koy nye kepur yepo yewutap tay. Kukite koromun.

<sup>6</sup>Kumwoci cicoto korucoto kule, “Monte cikite, ocenye akwek so Yesu nyepo Nasaret nyo kucewuyitocini murtowontet? Puryo kot kumite yu; Kokotutune met! Akäs pa yeto ye kucemuci.

<sup>7</sup>Kunyo ape yawut womwoci ṅalecu konomik wanak oko Petero, kule mite neto kuntowok akwek kuweti Kalilaya, wuloto wule mowokäse kuyu wulo kikumwowok akwek.”

<sup>8</sup>Kumiṅ cekto kukwa saṅ oṅnkurway kupete yepo mwenet, omnye kinäm muyotet oṅnkokite koromun. Ntene kipuryo kot kumwoci cekto citake tokol ṅolyo, omnye kinyokoritu.

<sup>9</sup>[Nteyu kowo kotutune met Yesu kororn ye kipesyetap Santey, kunyosyo kuporcikey Mariyam nyepo Maktala nyo kikwetyini Yesu neto oyik tisap.


<sup>10</sup>Kuwo Mariyam wokumwoci piko co kipontotikey oko neto ce kimite kurirtos kumesyi.

<sup>11</sup>Ntowo kulim cut kumwowu Mariyam kule sope Yesu oṅnkumwoy kule kākäs neto nkit, kutay cut macäm kule po manta ṅalekyi.

<sup>12</sup>Yoto om letut kuporcikey Yesu kuponto tonto ake konomik alak oyeny. Kimite konomik coto kupeti panwa nye kipeti koret saṅ.

<sup>13</sup>Yoto kuweckey konomik coto kupa wokumwoci konomik cut ṅalecato, ntene kutoyis cut macäm ṅalekwa.

<sup>14</sup>Nto om panta nyepo letut; kuporcikey Yesu konomik taman ok akenke ye kimite kukepur kwomisyi. Kuṅololyi Yesu cekto kupolyi omnye kitoyis meyen kuwuyekitu



mukuleywekwa oko omnye kinyekeritu mecäm ñalek cepo piko co kikäs Yesu kukotutune met.

<sup>15</sup>Kumwoci Yesu cekto kule, “Ape koret tokol kumukul, womwoci piko tokol lokoywek ce toponec.

<sup>16</sup>Mosukusop ci ake tokol nye keyen kucäm lokoywek ce toponec oñkyepatisan, nto ci ake tokol nye puryo kot kucömis, mosicemutyi nyo musankut.

<sup>17</sup>Mosicikoci piko tokol ce kocömis kuyen pelutocu: Mosukukwet oyik cekwol yitik om kaynemwani, mosukuñalal ñelyepik alak.

<sup>18</sup>Nka mpo ye kanäm Erenoy, nto ye kaye mwonet, kupuryo kot kupoköce. Mosukukemer cek yewuniyekwa piko ce mnyontos kusopco picoto.’’

<sup>19</sup>Nto om letut yu kowo kuñalal Mokoryontet Yesu oko cekto, cesut neto kuwo torot wokopure Yewutap tay nyepo Yiyintet.

<sup>20</sup>Yoto Kunomen konomik kupa wokumwaytat lokoywek om koret tokol. Kwiyis Mokoryontet om wule mite cek, kupor kule po manta lokoywek ce mwoytoy. Omnye kikoci neto cekto kamukeywek kwiy pelutok ce poru kamukeywek.]



## Luka

### Luka 1

- <sup>1</sup>Mokoryontet nye cekonyite Teyopilo, Kuyu wulo kusyem piko ce caŋ kusil ŋalek ce kikwi yokis om kwenunyacek.
- <sup>2</sup>Kisil cekto ŋalek co kimwowec acek piko muncururwanik kosik co kiköse ŋalecutecu kuceke ye kicece, oŋnkumwaytat lokoywecutecu.
- <sup>3</sup>Kunyo Mokoryontet nye cekonyite, omnye kwokir ani topon oŋnkasuman topon wule kicekta ŋalecutecu, asot mpo ani kule misyini asat topon oŋnkosiluŋ nyi.
- <sup>4</sup>Sukuŋet nket mpenyi kule po manta ŋalek tokol co kicinetiŋ.
- <sup>5</sup>Om kenyisyek ce kipoytoy Kinko Erote koretap Yuteya, kimite tisintet nye kicekure Sakariya nye kipo neto luketap Apiya. Kicekure kaynetap korkenyi Elisapet nye kipo aretap mpo Aron.
- <sup>6</sup>Ki pic cek tukway ce kikwiye ŋalek ce toponec om taytap Yiyintet oŋnkurupe kuyweye ntarastinek oko ŋalek tokol ce möce Mokoryontet; nye kipuryo kot kowurtoy mpo kisic.
- <sup>7</sup>Ntene kipuryo kot kuponto lekoy omnye kison Elisapet oŋnkukikiyosekitu tukway.
- <sup>8</sup>Om pesyet ake ye kimite Sakariya kwiysisi yisyenyi nyepo tisyontit kuyu kwak om taytap Yiyintet, omnye kinyenyi pesyet kwiysis,
- <sup>9</sup>kuyu wule yunto yisyonutepak tisik, kikicekwey neto om kirotyet kupel korosek ce poŋu om otepto Nyetilil. Yoto kuwo neto kotap Mokoryontet.
- <sup>10</sup>Kimite yoto piko ce caŋ kusome om saŋ om sawet nyo cepele korosek ce poŋu.
- <sup>11</sup>Kuporcikey malayketap Mokoryontet Sakariya. Kimite malayket kukeyoŋe yewutap tay om otepto nye nyo cepele korosek ce poŋu.
- <sup>12</sup>Nteye kotoköse Sakariya malayket, kulipil oŋnkumuy koromun.
- <sup>13</sup>Ntene kumwoci malayket neto kule, “Sakariya! Mentе omuy. Omnye kucelim somseŋuŋ, kunyo mosukuyiwuŋ nyi korkeŋuŋ Elisapet werit, oŋnkirut cekure kaynenyi Yowana;
- <sup>14</sup>mesenerec nyi koromun, oŋnkunerec mpo piko alake om pesyonoto koceye neto.
- <sup>15</sup>Omnye mosukwek ci nyewo koromun om taytap Mokoryontet. Puryo kot kuroke kuye finyonik nto tukun alak tokol ce cepokite. Mosicikoci neto kunyor swametap Muyet Nyetilil kuceke pesyonoto koceye.
- <sup>16</sup>Mosukuwec pikap Israel ce caŋ kuwekyikey wule mite Mokoryontet Yiyintemwa.
- <sup>17</sup>Mosukuwesetot kwek kiyokintetap Mokoryontet kuponto nyikanatet oko swamet kuyu workoyontet Eriya. Mosukuwec poyik oŋnkotuyo kuyomokey wanak oko



lekokwa, oṅkuwec ṅomnonetap piko co kitoyis kumosokis kurup aret nye sote ṅalek ce toponec, oṅkusot kopur topon kukenisyi pikap Mokoryontet.”

<sup>18</sup>Kumwoci Sakariya malayket kule, “Mosonkete ne kule po manta ṅalecutecu? Omnye oyiku ci nye kyayosit; nto mpo korkemwani kiyosit mpene kutil kenyisyek!”

<sup>19</sup>Kuwekyi malayket kumwoci neto kule, “Oyiku ani Kapuryel nye oyone taytap Yiyintet; kunyo kociyokwani coṅololuṅ osutuṅ nyi ṅalecutecu toponec.

<sup>20</sup>Ntene omnye ketay meyen ṅalekwani ce mosukupoyit manta om pesyet nye kicekwey, kunyo mesesis nye puryo kot ṅololi okoy kupunto pesyet nye yiyoktos ṅalecu komwowuṅ ani nyi.”

<sup>21</sup>Kimite piko yoto kukonye Sakariya ntene kukite kumwoy kule, “Omne sukulilennkey nye tenyi om koto orit?”

<sup>22</sup>Nteyu kowo kumiṅ saṅ, kipuryo kot komuc yoto Sakariya kot kuṅololyi piko ṅolyo, ntene kuṅololyi cek kwiyisye yewuniyek pate omnye kanamakay kutit. Yoto kusowu piko kunket kule kakäs neto ṅoṅutyet om kotap Yiyintet.

<sup>23</sup>Ntowo kupok pesyosyeki cepo yisyet om kotap Yiyintet, kuwecikey Sakariya kanyi.

<sup>24</sup>Yoto om pesyos ce ṅeri, kukoyakay Elisapet oṅkuwunyenkey koto orit kuwany orok mut kumwoy kule,

<sup>25</sup>“Kunyo om yawut letut kakukalya ani Mokoryontet kuyunyi, omnye kokunumuneno nyilatet nyo kunyilo piko!”

<sup>26</sup>Om arawetap lö kuceke kakoyakay Elisapet, kuyokto Yiyintet malayket Kapuryel kuwo moṅet nye cekure Nasaret om koretap Kalilaya,

<sup>27</sup>wule kimite cepto ake nye kimukul nye kitompo kot kunket moron nye kimöce komüt citake nye cekure Yosep nye kipo aretap mpo Tauti. Cekure kaynetap cepoto Mariyam.

<sup>28</sup>Yoto kucontyi malayket Mariyam oṅnkumwoci kule, “Takwenyo! Ponte nyi kupeyok koromun; pontekey nyi Mokoryontet.”

<sup>29</sup>Nteye kotolime mariyam ṅalekap malayket, kulipil oṅnkumuy, oṅnkusot kumwoy kule, “Mwowu ne katakwesani.”

<sup>30</sup>Kumwoci malayket neto kule, “Mariyam, mente omuy, omnye kwenyori nyi kupeyok om wule mite Yiyintet.

<sup>31</sup>Mesetic lekwet oṅnkiyi werit oṅnkirut cekure kaynet Yesu.

<sup>32</sup>Mosukwek nyewo koromun, oṅnkyekure Weritap Yiyintet nye mite torot koromun. Mosukukoci Mokoryontet Yiyintet neto kopure ṅeceretap kukonyi Tauti.

<sup>33</sup>Mosukwek Kinko nye mosukupayta aretap Yakopo okokoy, nto poytoyisyenyi kunye puryo kot kuponto ye ṅete!”



- 34 Yoto kumwoci Mariyam malayket kule, “Muce kwiyakay ḡolyontoni kulene? Omnye oyiku mukul nye puryo kot öḡnket moron.”
- 35 Kuwekyi malayket kumwoci neto kule, “Mosukucontyiḡ nyi swametap Muyet Nyetilil, öḡnkuyeneniḡ atotoytap swametap Yiyintet nye mite torot koromun. Kunyo mosiceyi lekwet nye mosicekure Nyetilil Weritap Yiyintet.
- 36 Käs pa Elisapet cekwomet nye kicekure kule kisonen öḡnkukiyosit, kunyo ponto yawut orok lö kukoyat lekwa nye wero.
- 37 Omnye puryo kiy ake tokol nye purune Yiyintet nye memuce kot kwiy.”
- 38 Kumwoy Mariyam kule, “Oyiku ani mutworintetap Mokoryontet, kunyo kany kwiyokis ḡalek co kemwowu om wule omite kuyu wule kemwayte nyi.” Yoto kunomen malayket kuwecikey.
- 39 Om pesyosyecoto, kuyiytakey Mariyam öḡnkunomen kusartakey om ḡerekwek kuwo moḡet nye mite lakomosyekap koretap Yuta.
- 40 Yoto kuwo okoy wokumiḡnto kotap Sakariya öḡnkutakwes Elisapet.
- 41 Nteye kotolime Elisapet katakwesetap Mariyam, kuwecweckey lekwet om moyenyi, yoto kunyor Elisapet swametap Muyet Nyetilil.
- 42 Kuḡalal kupol om kutit nyewo kumwoy kule, “Ponte nyi kupeyoy om wule mite koruk! Öḡnkuponto kupeyoy mpo lekwet nye mite moyeḡuḡ nyo meyi nyi!
- 43 Omne sukwiyakay kiy nye yunyi om wule omite ani, akäs kule muce kuco wule omite kametitap Mokoryontenyu?
- 44 Omnye yu kowo alim ani katakweseḡuḡ, kuwecweckey lekwet om moyemwani om ḡerekwek.
- 45 Ponte nyi kupeyoy yen öḡnkiyen ḡolyontetap Mokoryontet kule mosukupoyit manta om wule mite nyi!”
- 46 Kumwoy Mariyam kule, “Kostoy mukuleymwani Mokoryontet,
- 47 öḡnkuḡerekat sponnmwani om wule mite Yiyintet kosopintenyu.
- 48 omnye kukusot topon wule ayunte ani mutworintenyi nye miniḡ! Kuceke yawut pesyoni. Okokoy mosukukureno ani piko cepo pinutek tokol nye ponto kupeyoy.
- 49 Omnye kokwiwo ani Yiyintet nyepo kamukeywek tokol tukuk cewoyec. Kunyo Tilil kaynenyi.
- 50 Porcini tolosyet pikyi tokol co yweye neto, kuceke piko cepo pinta ake okokoy cepo pinta ake.
- 51 Kokuyito yewunyi nye ponto swamet; Öḡnkuseret piko co silekey om kasoteywekwa.
- 52 Kokonumune poytoyik cewoyec ḡecerokwa; öḡnkutoror piko co cenyile kupa torot.





- <sup>53</sup>Kapaye piko ce ponto rupet tukuk ce toponec, oṅnkukwet mokorenik kupeta yewuniyek pate.
- <sup>54</sup>Kirip kirotyet nyo kikurtoci neto mpo kukonyo, kunyo kaco cokukalya mutworintenyi Israel;
- <sup>55</sup>Oṅnkusot kule oporci tolosyet mutworintenyi Apram oko wule mite mucokoronikyitokol okokoy!”
- <sup>56</sup>Kopur Mariyam oko Elisapet kuwany kurikta orok somok, ntowecekey kuwo konyi.
- <sup>57</sup>Yoto kuponto pesyosyekap Elisapet ce cömekey lekwet, kucämnekey werit.
- <sup>58</sup>Kulim latosyekyi oko tilyonutekyi kule kakukalya kukoci Mokoryontet Elisapet kupeyok, yoto kuṅerec cekto tokol wanak oko neto.
- <sup>59</sup>Ntowo kupunto pesyetap sisit cewon lekwet, kumac piko kule cerut kaynet cekure Sakariya kaynetap kwan.
- <sup>60</sup>Ntene kumwoy kamet kule, “Puryo kot kuyunyo! Mocekure kaynenyi Yowana.”
- <sup>61</sup>Kumwoci piko Elisapet kule, “Puryo ci mpo akenke nyepo aremwoṅ nye cekure kaynanato.”
- <sup>62</sup>Yoto kuṅololyi piko kwanitap lekwet kwiysisye yewuniyek kutepe kaynetap lekwet.
- <sup>63</sup>Kusom kwan rwantet nye cesile oṅnkusil kule, “Kaynenyi Yowana.”
- <sup>64</sup>Om yoto pakenke kuyatakay kutitap Sakariya, oṅnkucec kuṅalal topon kukasta Yiyintet,
- <sup>65</sup>Kumuyo latosyek koromun, yoto kuseret ceṅalalate lokoywek ce nöme ṅalecutecu tokol okoy kupunte lakomosyekap Yuta tokol.
- <sup>66</sup>Nto piko tokol ce kilim ṅalecutecu, kuripe montuwokwa oṅnkutep kumwoy kule, “Mosukwek ne lekwani?” Omnye porukey kupoyit manta kule ponto lekwani swametap Mokoryontet.
- <sup>67</sup>Yoto kunyor kwan Sakariya swametap Muyet Nyetilil, kuṅalal kuṅorsyo kumwoy kule:
- <sup>68</sup>“Akany cikaste Mokoryontet nye Yiyintetap Israel! Omnye kaco korutoci cokukalya kutyac pikyi.
- <sup>69</sup>Kakutororwec acek kosopintet nyepo swama, Nyoto ku nyepo aretap mutworintenyi Tauti.
- <sup>70</sup>Kuyu wulo kikurtoci kenya kupunune wule mite workoyikyit ce tililec,
- <sup>71</sup>kikurtoci kule mososorwec acek om wule mite punikyit oko wule swametap yewuniyekap piko tokol co senkerec acek.
- <sup>72</sup>Kimwoy kule mosoporci poypoyet mpo kukonyo, aṅnkusot kirotyenyi nye tilil.



- <sup>73</sup>Kirotyet nye kiwolcikey kukonyo Apram,
- <sup>74</sup>kuwalkey kule mososorwec acek om wule mite swametap yewuniyekap punikyö, oñnkukonec acek ceyici Neto yisyet nye puryo kot ceponte muyot,
- <sup>75</sup>om tililinto oko toponiyet om pesyosyek tokol cepo saponwekyacek.
- <sup>76</sup>Ntenyi lekwenyu, mosicekurenij workoyontetap Yiyintet nye mite torot koromun; omnye mesentoci nyi Mokoryontet yiyitoci neto arenyi.
- <sup>77</sup>Meseporci mwoci pikyi kunket kule mocisop cikalya cekto miyotyönikwa.
- <sup>78</sup>Omnye kokolyoyin oñnkutala Yiyintenyö. Mosukukon kuyec koluvec acek lakweyet nyepo sponoto,
- <sup>79</sup>nye luwu kucone torot cokoluwuci piko tokol ce mite menonetap met, oñnkuketwec acek cerup aret nyepo kalyet.’’
- <sup>80</sup>Yoto kuner lekwet Yowana kunyor swamet om porto oko ñomnonet nyepo Muyet Nyetilil, kuminy koretap kitela okoy kupunto pesyet nyo porcinekey neto pikap Israel.

## Luka 2

- <sup>1</sup>Yoto om pesyosyecoto kucone ntarastit wule mite Kinko Akusto kule, cemöce ciyitis cesil kaynokap piko tokol cepo korenyi.
- <sup>2</sup>Koyitisyet nyoto kunye kinyosyo ciyitis cesil kaynokap piko ye kipoytoy Kurenioyö koretap Siriya.
- <sup>3</sup>Yoto kuwo ci tokol wokusilyokey om moñenyi.
- <sup>4</sup>Kunomene Yosep moñetap Nasaret om Koretap Kalilaya kuwo kulannta Yuteya okoy wokupunto moñetap Tauti nye cekure Peselekem, omnye kipo Yosep aretap mpo Tauti.
- <sup>5</sup>Kuwo Yosep wokusilyokey oko Mariyam nye kimöce neto kule amüt, kikoyat Mariyam yoto.
- <sup>6</sup>Nteye kimite cekto wuloto, kupunto pesyosyek ce cömekey Mariyam.
- <sup>7</sup>Yoto kucämñkey Mariyam werit poretyet, kunäm oñnkulokyi sirok oñnkömukontyi rapet nye omisye toka, omnye kipuryo kot kumite poroyinto koto nye mokuruy cekto om kotap toyek.
- <sup>8</sup>Kimite mesewek alake koronoto ce kikwokisiy komoy kuripe kecirekwa.
- <sup>9</sup>Kuco malayketap Mokoryontet ye kimite cekto; oñnkukoci kukweny cekto komut woyintap lakweyetap Mokoryontet, yoto kumuyo koromun.
- <sup>10</sup>Ntene komwoci malayket cek kule, “Monte cemuye! Omnye osutwok ani lokoywek ce toponec cepo ñerekwek ce mosukupoyit piko tokol.



- 11**Omnye kaceyiwok akwek yawut pesyoni Mokoryontet om mojetap Tauti nye Kosopintet Kristo Yesu!
- 12**Kito nyi nye mosokäse akwek, mosonyoru lekwa nye rweru nye kocilokyi sirok; oṅkyimukontyi rapet nye omisye toka.”
- 13**Om yoto pakenke mosolim akwek luket nyewo nyepo malaykanik om torot kukostoy Yiyintet kumwowu kule,
- 14**“Kupoyit woyinto Yiyintet nye mite torot, oṅkupoyit kalyet koret oko piko ce ṅerekyini cekto Yiyintet!”
- 15**Nteyu kowo kunomen Malaykanik kupakakta cek kupecikey torot, kuṅalal Mesewek kumwocin nkit kule, “Akany cipe okoy cepunte Peselekem, wocekäs kiyitenyi kakwiyakay nyi kokuporwec Mokoryontet.”
- 16**Yoto kunomen mesewek kusartakey lakwar okoy wokunyor Mariyam oko Yosep oko lekwet nye kocimukontyi rapet nye omisye toka.
- 17**Nteye kotoköse mesewek lekwet, kumwoci kutorci piko ṅalek tokol co kukumwoy Malayket ce nöme lekwanato.
- 18**Kukite piko tokol ṅalek ce kumwoci mesewek.
- 19**Ntene kusot Mariyam ṅalecato oṅnkuripe moyenyi.
- 20**Yoto kuweckey mesewek kupecikey kutumoti kukostoy Yiyintet om ṅalek tokol ce kilim oṅnkukäs cekto, omnye kiyu tukuk ce kikäs wule kikumwoytoci malayket.
- 21**Yoto ntowo kupunto pesyetap sisit, nye cewone lekwet cikoci cekure kaynet Yesu, kaynet nyo kikonu kumwoy malayket kutompo kot cesic neto.
- 22**Ntowo kupunto pesyosyekap Yosep oko Mariyam kwiy ntasimnyet nyo kimwowu Moses, oṅnkwiyata sakwet nye kiceṅetune asis korketap tomono, yoto kusut cek lekwet kuwo Yerusalem wocikoci Mokoryontet.
- 23**Kuyu wulo kicesilyo om ntarastinekap Mokoryontet kule, “Lekwa tokol nye poret oṅnkuwero nye kanyosyo kuyat moyetap kamet, misyini cikoci neto nyoto Mokoryontet.”
- 24**Yoto kupa Yosep oko Mariyam wokukoyito mpo korosekwa kuyu wule cemoktoy om ntarastinekap Mokoryontet kule, “Cikoytoy swororok oyeny nto lekokap swororok oyeny.”
- 25**Kimite citake nye kiminye Yerusalem nye kicekure kaynenyi Simiyon nye ki cito nye topon koromun nye kiyweye Yiyintet. Kimite neto kukonye pesyet nye cisope pikap Israel, oṅnkiponto Muyet Nyetilil.
- 26**Kikikoporci Muyet Nyetilil neto kule puryo kot kume kutompo kot kukäs Dapanet Mokoryontet nyo kicekurto.



- <sup>27</sup>Yoto kuntoci Muyet Nyetilil Simiyon kuco okoy kupun kotap Yiyintet orit, nteyu kowo kusut kwan oko kamet lekwet Yesu kuco kotap Yiyintet; sukuṅet ceyici ntaṣimnyet kuyu wulo moktoy ntarastinek.
- <sup>28</sup>Kunäm Simiyon lekwet kunäme yewuniyekyi oṅnkukasta Yiyintet kumwoy kule:
- <sup>29</sup>“Mokoryontet, yaste yawut mutworinteṅuṅ, kuwecikey om kalya, kuyu wulo kikuṛte nyi om ṅolyonteṅuṅ.
- <sup>30</sup>Omnye kakäs konyekwani nkit kosopoteṅuṅ,
- <sup>31</sup>kuyu wulo kiyiytoci taytap piko tokol,
- <sup>32</sup>oṅnkwek lakweyet nye kweṅknyini lamek areṅuṅ, oṅnkwek woyinto nyepo pikuk pikap Israel.”
- <sup>33</sup>Kukite kwan oko kamet ṅalek ce komwoy Simiyon ce nömekey oko lekwanato.
- <sup>34</sup>Yoto kusomnci Simiyon cekto kupeyok, oṅnkumwoci Mariyam kamet kule, “Kikwey Yiyintet lekwanı kwek nyemo kwaranta, oṅnkusop piko ce caṅ om Israel, oṅnkwek neto pelutyet nye cone wule mite Yiyintet nye toye piko ce caṅ,
- <sup>35</sup>sukuṅet kuṅoṅ kuparta kasoteywekwa ce wuṅotin. Nto om wule mite nyi, mosukurut mukuleyṅuṅ rotwet nye ṅatip.”
- <sup>36</sup>Kimite mpo korko nye workoyo nye cekure kaynenyi Anna, ceptap Panuel nyepo aretap mpo Aser nye kicimüt ye kikokoniyo kuwany kenysisyek tisap kume santenyi.
- <sup>37</sup>Yoto kopur nkit kumusuk okoy kwek cepyosya nye kiyosit koromun kuwany kenysisyek tomonwokik sisit ok amwan nye kipuryo kot kuṅete kupakakta kotap Yiyintet. Ntene kikwiyisi yisyetap Yiyintet komoy oko pet; kikostoy oṅnkusome oṅnkukire omik.
- <sup>38</sup>Om yoto pakenke kuco tay oṅnkucec kukasta Yiyintet kuṅalal ṅalek ce nömekey oko lekwanato kumwoci piko tokol ce kikonye pesyet nye mokusope Yiyintet Yerusalem.
- <sup>39</sup>Nteyu kowo kuwany cekto kwiy tukuk tokol ce mwowu ntarastinekap Mokoryontet, kuweckey cek kupa moṅemwa Nasaret om koretap Kalilaya.
- <sup>40</sup>Kuner lekwet Yesu kunyor swamet oko ṅomnonet oṅnkukoci Yiyintet neto kupeyok.
- <sup>41</sup>Kipeti kwan oko kamet om kenyt ake tokol Yerusalem ye pesyetap sakwetap Keytayet.
- <sup>42</sup>Nteye kiponto Yesu kenysisyek taman ok oyeny, kupa cek tokol oko kamwa sakwet Yerusalem kuyu wule yunto sakwanato.
- <sup>43</sup>Nteyu kowo kupok pesyosyekap sakwet, kunomen cekto kupa ka, ntene kuṅetune werit Yesu Yerusalem nye kipuryo kot kunkete kwan oko kamet.



<sup>44</sup>Kisote cekto kule tos mite Yesu luketap piko alak om panta. Kupa cekto pesyonoto kwimen; ntwo kwimen koret kucec cekto kucenye wule mite tilyonutekwa oko wule mite coronutekwa.

<sup>45</sup>Ntene kipuryo kot kunyor. Yoto kuwekey kwan oko kamet kupa Yerusalem wokucejat Yesu.

<sup>46</sup>Nteye kipesyetap somok kunyor cek Yesu kumite kotap Yiyintet, kukepur kwenutap konetikap Yutayek kulimntoy n̄alek cemwowu konetik, oṅnkutepe Yesu cekto teputek.

<sup>47</sup>Kukite piko tokol ce kilime ṅomnonenyi oko wule kiwektoy n̄alek.

<sup>48</sup>Nteye kotoköse kwan oko kamet Yesu kukite koromun, kumwoci kamet neto kule, “Yeyonyu! Omne seiyec acek nyi kuyu nyi? Kucisot cemuye acek oko kon, oṅnkyeceniyi koromun.”

<sup>49</sup>Kuwekyi Yesu kumwoci cekto kule, “Omne sacenya ani akwek? Puryo kot oṅnket akwek kule misyino ani opur kotap Papamwani?”

<sup>50</sup>Ntene kipuryo, kot kusik kunket kwan oko kamet kule komwoy Yesu ṅolyo ne.

<sup>51</sup>Yoto kunomen neto oko kamwa kuketitakey okoy kupunto Nasaret, oṅnkuwo wokuywey kamwa. Kunäme kamet n̄alecato moyenyi.

<sup>52</sup>Kutosyikey Yesu kuner oṅnkuṅomit, oṅnkunyor cömisyet om wule mite Yiyintet oko wule mite piko.

### Luka 3

<sup>1</sup>Nto om kenytap taman ok mut ye kipoytoyisyi Kinko Nyewo Taperiyo, kupoytoy Pontio Pilato koretap Yuteya, kupoytoy Erote koretap Kalilaya, kupoytoy mutakwam Filipino koretap Itureya oko koretap Tirakoniti, kupoytoy Lusaniya koretap Apilene.

<sup>2</sup>Nto tisik cewoyec ku Anas oko Kayafa. Om pesyosyecoto kucontyi ṅolyontetap Yiyintet Yowana weritap Sakariya kumite kitela.

<sup>3</sup>Yoto kuwesetote Yowana koret tokol nye lekite tapantap oyinetap Yortan, kumwoytoti kule, “Arenynkey ayaste miyotyoniwok, oṅnkyepatisanak, sukuṅet kukalyak Yiyintet miyotyoniwok.”

<sup>4</sup>Kuyu wulo kisilyo workoyontet Isaya om kitapunyi kule: “Kapole citake kitela, ‘Oyiytoci Mokoryontet arenyi, asat kurotakay arenyi nye mosukupunte!

<sup>5</sup>Misyini alakan wulyo tokol wule mite roroṅisyek; oṅnkyicat lakomosyek oko tulong tokol. Cecul kuculokis orustunwek tokol co musotin.

<sup>6</sup>Mosukukäs pikap koret tokol kosopotetap Yiyintet.’ ”

<sup>7</sup>Yoto kukwa piko ce caṅ wule mite Yowana kule kupatisanec, kumwoci neto cek kule, “Akwek erenocu! Do nye kwesowok kule omweye nyerunotetap Yiyintet nye karik kuco?



- <sup>8</sup>Kunyo ayiy tukuk ce sukupor kule kwarenykey akwek ayaste miyotyonikwok, ntene monte cecec cejalal omwowu kule, ‘Ceponte Apram nye kukonyo!’ Omnye komwowok ani kule, muce Yiyintet kunäm rwontocu oṅkuwec kwici Apram lekok.
- <sup>9</sup>Kunyo kocenömnci oywet kulekite kirintonokap ketik; nto ket ake tokol nyo puryo kot kwiye omik ce toponec mosiceyep nyo kulul oṅkyewirci mata orit.’
- <sup>10</sup>Kutepe piko Yowana kule, “Kunyo mokyiy ne acek yawut?”
- <sup>11</sup>Kuwekyi kumwoci kule, “Ci tokol nye ponto sirok oyeny, misyini kukoci cito nyo puryo kot kuponto, mpo cito nyo ponto omik misyini kupciyta kuyunyoto.’”
- <sup>12</sup>Yoto kukwa mpo piko alak co ruruce mosoret kwocepatisan, oṅnkutepe cek Yowana kule, “Konetintet mokyiy ne acek?”
- <sup>13</sup>Kumwoci Yowana cekto kule, “Monte ciruruc mosoret kutil co kiciyoyec.’”
- <sup>14</sup>Kutepe sikarek alak neto kule, “Nto acek, mokyiy ne?” Kumwoci co kule, “Monte cinumune citake tokol pesan om swama, nto om aret nyepo mwiynan; roke kuyemak musyaremwoṅ.’”
- <sup>15</sup>Nteyu kimite piko tokol kukonye ṅalek ce mokwiyokis kutintentos om kasoteywekwa om ṅalekap Yowana, kule pesyet ake neto kunye Ḍapanet.
- <sup>16</sup>Yoto kumwoci Yowana piko tokol kule, “Opotisonenok ani peko, ntene coni om letumwani citake nyewo nye ponto swamet kupëlo ani, nye puryo kot kumisyino ani atyac porokap kweyoniky. Neto nyoto nye mosukupatisanenak akwek Muyet Nyetilil oko mata.
- <sup>17</sup>Pontonu neto sweswet nye kanäme yewuniyekyi; nye mokusese nkanuk oṅnkururuky nkanuk cokeniky nto moriryek kupele co mata nye momise!’”
- <sup>18</sup>Wanak oko ṅalecutecu, kumwoy Yowana ṅalek alak ce caṅ kurorci piko lokoywek ce toponec.
- <sup>19</sup>Yoto kupolyi Yowana potisonintet poytoyintet Erote om ṅalek ce nömekey oko Erotiya korketap mutakwam nye kimüt Erote, oko om ṅalek alak ce caṅ cepo ṅokis ce kikwiyy Erote.
- <sup>20</sup>Yoto kutosyi Erote miyotyet ake omnye kinäm Yowana oṅnkukerta mopusi.
- <sup>21</sup>Nteyu kowo cepatisan piko tokol, yoto cepatisan mpo Yesu. Nteye kimite Yesu kusome, kuyatakay wulin po torot,
- <sup>22</sup>kuco kurekyi neto Muyet Nyetilil nye kerkey porto kuyu swarar. Kucone kurset torot kumwoy kule, “Nyi kunye yiku Werimwani camanet, nye oṅerekyiṅ ani nyi koromun.’”
- <sup>23</sup>Kucec Yesu kwiyis yisyenyi kuponto kenysisyek ce puntoy sosom; Cisote kule neto kunye weritap Yosep nye ki weritap Eri,
- <sup>24</sup>weritap Matati, weritap Lefi, weritap Merek, weritap Yanai, weritap Yosep,






- <sup>25</sup>weritap Matatiya, weritap Amos, weritap Naum, weritap Esil, weritap Nakay,  
<sup>26</sup>weritap Masati, weritap Matatiya, weritap Semeyin, weritap Yosek, weritap Yota,  
<sup>27</sup>weritap Yowanan, weritap Resa, weritap Serupapel, weritap Salatiyeta, weritap Neri,  
<sup>28</sup>weritap Meleci, weritap Atti, weritap Kosma, weritap Elmatam, weritap Eri,  
<sup>29</sup>weritap Yoswa, weritap Eriesa, weritap Yorim, weritap Mata, weritap Lefi,  
<sup>30</sup>weritap Simiyon, weritap Yuta, weritap Yosep, weritap Yonam, weritap Eliyakim,  
<sup>31</sup>weritap Meleya, weritap Menna, weritap Matasa, weritap Nasan, weritap Tauti,  
<sup>32</sup>weritap Yese, weritap Opet, weritap Poas, weritap Solomon, weritap Nasyon,  
<sup>33</sup>weritap Aminatap, weritap Atamin, weritap Arin, weritap Eseron, weritap Peres, weritap Yuta,  
<sup>34</sup>weritap Yakopo, weritap Isaka, weritap Apram, weritap Tera, weritap Nakor,  
<sup>35</sup>weritap Seruk, weritap Reyu, weritap Pelek, weritap Eper, weritap Syella,  
<sup>36</sup>weritap Kanan, weritap Arapasat, weritap Syem, weritap Nuwa, weritap Lamek,  
<sup>37</sup>weritap Misusera, weritap Enok, weritap Yaret, weritap Makalalel, weritap Kanan,  
<sup>38</sup>weritap Enos, weritap Sesi, weritap Atam, weritap Yiyintet.

#### Luka 4

- <sup>1</sup>Kuwecekey Yesu oyinetap Yortan kukonyor swametap Muyet Nyetilil, nye kisut neto okoy kupunto kitela.
- <sup>2</sup>Kuwany om wuloto pesyosyek artam, nteye kimite wuloto kusyem kulot Setani nyewo nyepo oyik neto. Kipuryo kiy nye kyome kuwany pesyosyecoto tokol, nteyu kowo kuwany kwam neto rupet.
- <sup>3</sup>Yoto kumwoci Setaninato neto kule, “Ye yiku nyi Weritap Yiyintet, mwoci panyi rwontocu kuwecekey kwek mukatya.”
- <sup>4</sup>Kuwekyi Yesu kumwoci neto kule, “Mwowu silutekap Yiyintet kule, ‘Puryo kot kusope cito mukatya pate nkit!’ ”
- <sup>5</sup>Yoto kusut Setaninato Yesu kuwo parak, oṅnkuporci lakwar poytoyisyonikap koret tokol kumukul,
- <sup>6</sup>oṅnkumwoci kule, “Mosokonij ani nyi woyinto nyi oko kamukeywek payte tukucu tokol, omnye kicekono ani tokol kunyo omuci okoci ci nye kacām ani;
- <sup>7</sup>Kunyo ye kekutumwo ani nyi mosukwek cekuk cutecu tokol.”
- <sup>8</sup>Kuwekyi Yesu kumwoci neto kule, “Mwowu silutekap Yiyintet kule, ‘Misyini kutuṅnkyi say Mokoryontet Yiyinteṅuṅ oṅnkiyici neto yisyet nkit pate!’ ”



- <sup>9</sup>Kusut yec oyinoto cekwol yitik Yesu okoy Yerusalem, oṅnkumwoci kuyone kusurutap kotap Yiyintet ye koy koromun, oṅnkumwoci kule, “Ye yiku nyi Weritap Yiyintet, wirtekey panyi kuceke yu okoy wepir ṅony;
- <sup>10</sup>omnye mwowu silutekap Yiyintet kule, ‘Mosukumwoci Yiyintet malaykanikiyi kukwa kwokutaciṅ nyi.’
- <sup>11</sup>Oko yec kule, ‘Mosukutaciṅ om yewuniyekwa mente kot kuryac kerenkokuk rwantet.’ ”
- <sup>12</sup>Kuwekyi Yesu kumwoci neto kule, “Mwowu silutekap Yiyintet kule, ‘Mente kot asyem alotu Mokoryontet Yiyinteṅṅ’ ”
- <sup>13</sup>Nteyu kowo kusyem kulot Setani nyewo nyepo oyik Yesu okoy kuwany; kwasta okoy pesyet ake.
- <sup>14</sup>Yoto kuwekey Yesu kuco Kalilaya kuponto swametaṅ Muyet Nyetilil. Kupunte lokoywek ce nōme neto koronoto tokol.
- <sup>15</sup>Kunetisyē Yesu korikapkokwonikwa om wuloto, kucāmnta piko tokol ṅalekap Yesu.
- <sup>16</sup>Kuwo Yesu okoy kupunto Nasaret wule kinere, nto kuyu wule kiyunto kopur nyi, kuwo ye kipesyetap Sapat okoy kotapkok. Nteye kimite orit, kuṅet kuyo kule asuman silutekap Yiyintet.
- <sup>17</sup>Yoto cikoci kitaputap workoyontet Isaya, kuṅany kitaput okoy kunyor ye kicesil kule:
- <sup>18</sup>“Oponte ani Muyetaṅ Mokoryontet, omnye kaṅape ani mwayita saṅet omwoci pononik lokoywek ce toponec. Kweyokwo ani saṅet omwoci piko co rototin pesyet nye cityoktoy cekto, oko ye mosukukāste piko co koryotin, oṅnkyityakta piko co kicinyalil kupecikey,
- <sup>19</sup>oṅnkomwowu oporu kenyt nye mosukusope Mokoryontet pikyi.’”
- <sup>20</sup>Yoto kuker Yesu kitaput oṅnkuketyi cito nye ripe, oṅnkupur ṅony; kuwec konyekwa piko tokol ce kimite kotapkok oṅnkukās Yesu topon.
- <sup>21</sup>Yoto kuwec Yesu kumwoci cek kule, “Pesyoniyē ye kakwitita kupoyit manta ṅalecu silotin cu kalim akwek om yitikwok.’”
- <sup>22</sup>Kucāmnta oṅnkukite piko tokol ṅalekyi ce toponec ce toloyec ce kiṅalale kutinyi. Kumwoy picoto kule, “Puryo kot ku weritap Yosep nyitenyi?”
- <sup>23</sup>Kumwoci Yesu cekto kule, “Oṅnket kule mosomwowo ani akwek tyonkoconi kule, ‘Cepsakityantet, sopkey nyi nkit!’ Oṅnkomwowu yec kule, ‘Yiy nyi yec om wuli po koreṅṅ tukuk co kicelim acek kule kiyokis om Kapernaum.’
- <sup>24</sup>Kumwoy Yesu kule, komwowok ani akwek ṅalek cepo manta kule, ‘Puryo workoyo nye cecōme om korenyi.



- 25Cinket kule po manta n̄alek kule kimite musukik ce caŋ om Israel om pesyosyekap Eriya, yo kipuryo kot kumite ropta koret tokol kuwany kenyisyek somok ok orok lö, yoto kunäm rupet koret tokol.
- 26Ntene kipuryo kot ciyokto Eriya om pesyosyecoto kuwo wule mite akenke om musukik coto, ntene kiciyokto kuwo pate wule mite musuk akenke nyepo Sarepta om koretap Siton.
- 27Kimite mpo yec pikap mutyenkenik ce caŋ Israel om pesyosyek ce kipo workoyontet Elisya, ntene puryo mpo akenke nye kicisop, tos pate Naman nyepo koretap Siriya.’ ’
- 28Yoto kunyer koromun piko tokol ce kimite kotapkok orit yu kowo kulim n̄alecato komwoy Yesu.
- 29Kuŋetyo cekto oŋnkunäm Yesu kocut kuŋete moŋonoto oŋnkukwer okoy kupunto tulwet parak nye kicetec moŋonoto kule wocitulye kuŋirte lakam.
- 30Ntene kupunte neto yewuniyekwa oŋnkuwecikey arenyi ake.
- 31Kurekto Yesu kuwo okoy kupunto Kapernaum moŋet nyepo Kalilaya, yoto kunet piko ye kipesyetap Sapat.
- 32Ntene kukite piko konetisyenyi, omnye kinet kumwoy n̄alek ce kinyikisec koromun, oŋnku n̄alek ceponto kamukeywek.
- 33Kimite yoto po kotapkok orit citake nye kiponto oyik ce miyotec, yoto kupol cicoto koromun om kutit nyewo kumwoy kule,
- 34“Ye! Mokenec acek ne nyi Yesu nyepo Nasaret? Keco nyi kule cayarantec acek? Oŋnketiŋ ani nyi kule yiku nyi n̄o: Yiku Nyi Nyetilil nyepo Yiyintet.’ ’
- 35Kupolyi Yesu oyinot kumwoci kule, “Sis! Dete cito.’ ’ Yoto kumilyi oyinoto cicoto n̄ony om taytap piko tokol, oŋnkuŋet kuwete cicoto nye kipuryo kot kwiye kiy mpo kisic.
- 36Kukite piko tokol koromun, oŋnkutepekey cekto nkit kumwoy kule, “Dolyo ne nyi mwowu cici? Omnye polyini oyik ce miyotec om kamukeywek oko swamet okoy kumwey oyik.’ ’
- 37Yoto kutisto n̄alekap Yesu kupunte koret tokol nye lekite koronoto.
- 38Kuŋete Yesu kotapkok oŋnkuwo okoy kupunto kotap Simiyon. Wokunyor cepyosyetap pikoy nyepo Simon kumnyone yeset nyewo koromun. Kusom piko Yesu kule kukalya neto.
- 39Kuwo Yesu oŋnkuyone yepo komostap cepyosyanato, oŋnkukwet yeset, yoto kuwo yeset, kuŋet neto lakwar oŋnkucec kwici cekto yisyonutek.
- 40Nteye kimite kurortoy asista, kusut piko pikwa ce kimnyontos porwonik wok tokol kukwa wule mite Yesu, kukemer Yesu yewuniyekyi metitap ci tokol nye kimnyone; kusopco cekto tokol.



<sup>41</sup>Kuṅetye oyik piko alak ce caṅ, kupoloti kumwowu kule, “Yiku nyi Weritap Yiyintet!” Kupolyi Yesu oyicoto oṅnkuyete mente kuṅalal, omnye kinkete oyik kule Yesu kunye Ḍapanet.

<sup>42</sup>Nto kayec koret pate, kunomen Yesu kuwo surukwenet wule momite piko, ntene kucec piko ce caṅ kuceṅat neto okoy wokunyor, nteye kotonyoru, kusyem kule ceyete neto mente kot kuwo wulyo ake kupakakta cekto.

<sup>43</sup>Ntene kumwoci Yesu cek kule, “Misyino ani awo wamwayte lokoywek ce toponec cepo Yiyintet mpo moṅosyek alak, omnye kiyokwani Yiyintet comwowu ṅalecutecu.”

<sup>44</sup>Yoto kumwayte Yesu ṅalek korikapkok cepo Yuteya.

## Luka 5

<sup>1</sup>Nteyu kimite piko ce caṅ kukicekey kumut Yesu kule celim ṅolyontetap Yiyintet, kimite yoto Yesu kukeyoṅe tapantap tampayayetap Kenesaret.

<sup>2</sup>Kukäs Yesu om yoto rapanik oyeny ce kimite tampayayet tapan ce kapakakta piko co nöme purpurunek oṅnkupa wokusit porokap purpurunek co cenömisye.

<sup>3</sup>Kulany Yesu rapet akenke nyepo Simon, oṅnkusom kumwoci Simon kutorta rapet kunata kusic kuwo tampayayet. Yoto kupure Yesu rapanato oṅnkunet piko.

<sup>4</sup>Nteyu kowo kuṅalal kot kuwany, kumwoci Yesu Simon kule, “Torte rapet kuwo peko kwen, oṅnkikoci nyi oko piko co konömisyi tokol porokwok peko orit onömisye.”

<sup>5</sup>Kuwekyi Simon kumwoci Yesu kule, “Mokoryontet, kukiyyisye om swama komowut tokol; ntene puryo kot cimuc kot cenäm kiy, ntene om ṅolyonteṅuṅ nye kemwowu, mosokoci porok peko orit.”

<sup>6</sup>Yoto kwiy cek kuyunyoto kukoci porok peko orit; kunäm yoto purpurunek ce caṅ koromun okoy kumac kuṅetyo porok.

<sup>7</sup>Yoto kukur cekto kuwus nömik alak ce kinömisyi tokol ce kimite rapet ake kule kukwa kwokukalya, kukwa cut, kwokonum cek purpurunek ce caṅ koromun kunyit raposyek tukway kot kumac kotompultokey kowut peko orit.

<sup>8</sup>Nteye kotoköse Simon Petero ṅalek coto keyokis, koputyi kukutuṅe kerenkokap Yesu oṅnkumwoy kule, “Mokoryontet wecikey, omnye oyiku ani ci nye miyat.”

<sup>9</sup>Omnye kikite Simon oko piko co kipontokey coṅintap purpurunek ce caṅ ce kicenäm.

<sup>10</sup>Kuyuyit nyoto kukite mpecek Yakopo oko Yowana werikap Sepetayo ce kinömikap purpurunek ce kipontokey oko Simon. Kumwoci Yesu Simon kule, “Mente omuy; kuceke yawut pesyoni meseyeku nyi roponintet nye kweru piko.”



- 11**Yoto kusut cekto raposyekwa okoy kupunto tampayayet tapan, oᅇnkupakakta tukuk tokol, oᅇnkunomen kunam kupetakey Yesu.
- 12**Nteye kimate Yesu pesyet ake moᅇet ake, kimate moᅇonoto citake nye kunām mutyenkenik koromun, nteye kotoköse cicoto Yesu, kuputyi ᅇony kukutuᅇᅇkyi oᅇnkusom kumwoci kule, “Mokoryontet, ye kecām nyi nkit, mucu sopo ani!”
- 13**Kuyito Yesu yewunyi oᅇnkunām cicoto, oᅇnkumwoy kule, “Omöce ani; kunyo sop nyolu.” Kusopco om yoto pakenke mutyenkenik ce kiponto cicoto.
- 14**Kunkolontyi Yesu kumwoci cicoto kule, “Mente kot omwoci citake tokol ᅇalecu, ntene iwo weporcikey tisintet, nto kuyu ᅇalek ce nöme kosopeᅇᅇᅇ, iwo wekoyite korosyontet kuyu wule kimwayta Moses, sukuᅇet porci ci tokol kule kwesop nyi.”
- 15**Ntene kutosyikey kutisto lokoywecoto po Yesu, koruruckey piko ce caᅇ oᅇnkukwa kwokulimnta ᅇalekyi oᅇnkysisopci cekto porwonikwa.
- 16**Ntene kikweyekey Yesu kwine nkit om pesyosyek alak oᅇnkuwo surukwenet wokusom.
- 17**Kimate Yesu kunetisiyi pesyet ake, nto om yoto kimate kukepur Farasayek oko konetikap ntarastinek ce kikwone moᅇosyekap Kalilaya oko Yuteya oko Yerusalem. Kiponto Yesu yoto swametap Mokoryontet nye kisopse.
- 18**Yoto kusutune piko alake kwiririt citake nye kipok kerekok. Kusyem picoto kule cekonop cicoto kuwo okoy kupunto taytap Yesu.
- 19**Ntowo kupoty ce aret nye kepunte omnye kicaᅇ piko, kunām kulaᅇnte okoy koto kisyek, oᅇnkuput kisyekutap koto oᅇᅇkopunte cicoto kumite kwiririt okoy kupunto kwenutap piko om yepo taytap Yesu.
- 20**Ntowo kukäs Yesu koyenetap picoto, kumwoy kule, “Corwenyu, kacikalyiᅇ nyi miyotyonyuk.”
- 21**Yoto kucec kuᅇalal kwicek nkit konetikap ntarastinek oko Farasayek kumwoy kule, “ᅇo cici ᅇolole ᅇal ce nyile Yiyintet kuyu nyi! ᅇo yec nye mucu kukalya miyotyonyuk nye puryo kot ku Yiyintet nkit!”
- 22**Kunket Yesu kasoteywek ce kimate cekto kusote; kuwekyi kumwoci kule, “Omne sasot akwek ᅇalek ce yuco otintentyine om kasoteywekwok?”
- 23**Oᅇnkono nye lekite, cemwoy kule, ‘Kacikalyiᅇ miyotyonyuk’. Nto ye kocemwoy kule, ‘ᅇet wesetote?’
- 24**Kunyo moporwowok ani akwek ᅇalek cepo manta kule ponto Weritap cito kamukeywek om koret kukalya miyotyonyuk.” Yoto kumwoci Yesu cicoto kule, “ᅇet yony, oᅇnkitor kwiririᅇᅇ nomen iwo ka!”
- 25**Om yoto pakenke kuᅇet cicoto kuyo om konyekap piko tokol, oᅇnkutor kinyi nyo korwoye oᅇnkuwecikey ka; kukostoti Yiyintet.



<sup>26</sup>Kukite piko tokol ce kimite yoto koromun! Oṅnkumuyo kukasta cek Yiyintet kumwoy kule, “Kacekäs pesyoni ṅalek cepo kakitat!”

<sup>27</sup>Om letutap coto, kunomen Yesu kuwo okoy wokunyor korurukintetap mosoret nye cekure Lefi kukepur konyi nye cekweye mosoret, kumwoci Yesu neto kule, “Nama cepetekey oko ani.”

<sup>28</sup>Yoto kuṅet Lefi kupakakta tukuk tokol oṅnkunomen kunam kupetakey Yesu.

<sup>29</sup>Yoto kwici Lefi Yesu sakwet nyewo koromun om kanyi, kimite yoto piko ce caṅ co ruruce mosoret oko piko alak kukepur tokol wanak.

<sup>30</sup>Kuṅunṅuny Farasayek oko konetikwa cepo ntarastinek om wule mite konomikap Yesu kumwoy kule, “Omne soyomisye oṅnkoyesye akwek oko pic ce ruruce musoro, oko pic ce kicetay?”

<sup>31</sup>Kuwekyi Yesu kumwoci cekto kule, “Puryo kot kumöce piko ce sopcotin cepsakityantet, ntene piko ce mnyontos ce möce.

<sup>32</sup>Kipuryo kot aco ani kule cokur piko ce toponec, ntene kyaco kule sukuṅet kurenynkey piko co ponto miyotyoni.”

<sup>33</sup>Kumwoci piko alake Yesu kule, “Kire omik om pesyosyek alak oṅnkusome konomikap Yowana, mpo konomik cepo Farasayek kwiye kuyunyoto, ntene omne sukwomisi oṅnkuyesyo konomikukyi?”

<sup>34</sup>Kuwekyi Yesu kumwoci cekto kule, “Omuci akwek omwoci pikap sakwet kule kukir omik ye tokupontokey cek cito nyo kemütisi? Puryo kot kuyunyo!

<sup>35</sup>Mosukupunto pesyet nye mocipesyo cek oko cito nyo kemütisi, kunyo om pesyosyecoto ye mosukukiris cekto omik.”

<sup>36</sup>Kumwoci Yesu cekto tyonkoconi kule, “Puryo ci nye poce yokwontet kisic kopukune siret nyelel oṅnkunopci siret nye yoswak, omnye ye kakwiyy neto kuyunyoto, mosukupac siret nyelel kunyor koṅta, nto siret nyelel nyo kocenopci kupuryo kot kunyolcintos oko siret nyo yoswaket.

<sup>37</sup>Puryo mpo ci nye roṅkyini komek ce mwonec wonkinek ce yoswak, omnye ye kakwiyy kuyunyoto, kumuce finyonik ce mwonec kuyeyi wonkinek ce yoswak, kutumntokey finyonik kupa wuy oṅnkuyeyo kworon wonkinek.

<sup>38</sup>Möce finyonik ce mwonec ceroṅkyi wonkinek ce lelac.

<sup>39</sup>Puryo mpo ci nye ye kiye finyonik ce rucwok nye möce kule nto aye finyonik ce mwonec ce kururyo, omnye mwowu kule toponec finyonik co rucwok.”

## Luka 6

<sup>1</sup>Nteye kipesyetap Sapat kuwo Yesu kupunte mparosyekap nkanuk, yoto kuputot konomikyi nkanuk oṅnkupirir kwam.






- <sup>2</sup>Kumwoci Farasayek alake konomik kule, “Omne sayiy akwek om pesyetap Sapat yisyet nye puryo kot kucöme ntarastinekyo?”
- <sup>3</sup>Kuwekyi Yesu kumwoci cekto kule, “Tompo kot asuman akwek ñalek cek kikwiyy Tauti oko pikyi yo kikwome cek rupet?”
- <sup>4</sup>Kiwut neto kotap Yiyintet oñnkunum mukatyantet nye kicesoci kupoyit Yiyintet, oñnkwan oko pikyi co kipontokey, ntene kipuryo kot kucömncini ntarastit ci ake tokol kwam, tisik pate nkit ce kicecömncini.”
- <sup>5</sup>Kutosyi Yesu kumwoy kule, “Weritap cito kunye Mokoryontetap Sapat.”
- <sup>6</sup>Nteye kipesyetap Sapatit ake, kuwo Yesu okoy kotapkok oñnkunetis, kimite koyoto orit citake nye kime yewutap tay.
- <sup>7</sup>Yoto kurip Farasayek oko konetikap ntarastinek kule cekäs oñnkusopsi Yesu ye pesyetap Sapat, sukuñet cekto kuwosontyi.
- <sup>8</sup>Ntene kunket Yesu kasoteywekwa, kumwoci cicoto kime yewut kule, “Ñet yony oñnkico ceyoñe yu potay” Kuñet cicoto oñnkuyoñe yoto.
- <sup>9</sup>Kumwoci Yesu cekto kule, “Otepenok akwek kule, cömwece acek ntarastinekyo kiyi ne ye pesyetap Sapat? Cikalya nto ciwurta? Cisop sopontap cito nto cipot?”
- <sup>10</sup>Kukäskästa Yesu kukäs cekto tokol, oñnkumwoci cicoto kime yewut kule, “Yite yewuñuñ.” Kwiyy cicoto kuyunyoto, kusop yewunyi kuyu wule kiyunto kunyo.
- <sup>11</sup>Ntene kunerekis cek koromun, oñnkucec kuñalale nkit kito nye mokwiye Yesu.
- <sup>12</sup>Om pesyosyecoto kuwo Yesu kulannta lakamet parak wokusom; kuwany kwomowunoto tokol kusome Yiyintet.
- <sup>13</sup>Nteyu kowo kuyec koret, kukur konomikiy kukwa ye kimite neto, oñnkukwey taman ok oyeny om coto oñnkutoci kaynet kukure kiyokik.
- <sup>14</sup>Simon nye kimulyi cekure Petero, oko mutakwam Antereya, oko Yakopo, oko Yowana, oko Filipino, oko Paturumayo,
- <sup>15</sup>oko Matayo oko Tomas, oko Yakopo weritap Alufayo, oko Simon nye kicekure nyikanet nye poryecini korenyi,
- <sup>16</sup>Yuta weritap Yakopo, oko Yuta Isikaryoti nyo kiweckey kwek ñomntoyin.
- <sup>17</sup>Kurekune Yesu lakam wanak oko konomikiy, kuco okoy cokuyoñe yepo kewet nye topon. Kimite yoto konomik ce cañ oko piko ce cañ koromun ce kikwone koretap Yuteya tokol oko Yerusalem, oko ce kikwone tapantap ruretyet om Tiro oko Siton.
- <sup>18</sup>Cekikwa kule kwocelimnte ñalekyi oñnkuyisopci porwonikwa. Kukwa mpecek piko ce kikikutañany oyik ce miyotec, cisop cek tokol.
- <sup>19</sup>Kusyem piko tokol kule cetiny Yesu, omnye kicone swamet wule mite neto oñnkusop cekto tokol.



- <sup>20</sup>Kukäs Yesu konomikyí oñnkumwoci kule: “Oponte akwek pononik kupeyoy, omnye nyimwoñ poytoyisyetap Yiyintet!
- <sup>21</sup>Oponte akwek kupeyoy co omok yawut rupet: omnye koyin cipyonyok! Oponte akwek kupeyoy co orirtosi yawut: omnye mosorori koyin!
- <sup>22</sup>“Oponte akwek kupeyoy ye kasenkerak piko oñnkukwetak, oñnkucupok kumwowok kule, oyiku oyi, omnye kocäm Weritap Cito!
- <sup>23</sup>Añerec om pesyonoto, oñnkotum om ñerekwek omnye komwowok ani akwek kule coñec kupeyokwok om wulin po torot. Omnye kikwicini mpo kukomwa workoyik ñalek ceyucoto.
- <sup>24</sup>“Ntene Oyey! Omite akwek kwapi co oyiku mokoren yawut, omnye kiyemak ñerekwek!
- <sup>25</sup>“Oyey! Omite akwek kwapi co oyiku piyoñotin yawut, omnye mosukwamak rupet! Oyey! Omite akwek kwapi co ororye yawut, Omnye mosomesye oñnkorirye.
- <sup>26</sup>“Oyey! Omite akwek kwapi co ñololenok piko topon. Omnye kikwici mpo kukomwa ñalek ceyucotecu workoyik co kimwiynot.
- <sup>27</sup>“Ntene komwowok ani akwek cu olime ñalekwani yawut kule, ocäm punikwok, oñnkoyici tukuk ce toponec piko tokol co senkerok.
- <sup>28</sup>Osomnci kupeyok piko co cupok kurumncok akwek, oñnkosomnci piko co toñonyok akwek.
- <sup>29</sup>Ye kasyeciñ citake kwarmatut ake wekyi kusyec mpo kwarmatut ake. Ye kosut citake kotiñun koci kusut mpo satit.
- <sup>30</sup>Koci ci tokol kiy nye kosomiñ, ntene mente atepe cicoto kuketuñ tukuk coto kosut.
- <sup>31</sup>Oyici piko tokol kuyu wule omoktoy akwek kule ntoyiwok akwek picoto.
- <sup>32</sup>“Nteye kocäm akwek pate piko co cömok akwek, asot akwek kule ceponte kupeyoy ne? Omnye mpo piko co ponto miyotyoniñ kucöme mpecek piko co cöme cekto!
- <sup>33</sup>Nteye koyici akwek tukuk ce toponec piko co yiwok akwek tukuk ce toponec, asot akwek kule ceponte kupeyoy ne? Omnye mpo piko co ponto miyotyoniñ kwiye mpecek kuyunyoto.
- <sup>34</sup>Nteye kopesentyi akwek pate piko co oñnketi kule mosukuketwec kuyokwec tukukyo, asot akwek kule ceponte kupeyoy ne? Omnye mpo piko co miyotec kupesentyini piko co miyotec kunkete kule ceketwec ceyokwec tukukyo!
- <sup>35</sup>Ntene ocäm punikwok, oyici tukuk ce toponec; opesente ntene monte osotyí kule ceyokwec om letut, omnye mosonyoru kupeyok ce cäj oñnkoyiku lekokap Yiyintet nyewo nyepo torot koromun, Omnye tala Yiyintet om wule mite piko tokol co puryo kot kukostoyisi oko piko co miyotec.
- <sup>36</sup>Oyiku pic ce ponto poypoyet kuyu Papamwoñ nye ponto poypoyet.’’



<sup>37</sup>“Monte cemutyi piko alak musanku, mpo akwek kupuryo kot kumutwok Yiyintet koyin musanku. Monte cemutyi piko alak kulot musanku, mpo akwek kupuryo kot cemutwok koyin kulotak musanku. Okalye sukuḡet koyin kukalyak mpo akwek Yiyintet.

<sup>38</sup>Okoyite sukuḡet koyin cekonok mpo akwek, mosonyoru akwek koyoyeketap sweswet nye topon nye kiciruruḡnkyi okoy kuwastakey; omnye koyoyeket nyo oyoyekyini akwek piko alak, kunyoto koyoyeket nye koyin ciyoyekwok mpo akwek.”

<sup>39</sup>Kumwoci Yesu cekto yec tyonkoconi kule, “Muce pa cito nye korat kuretот citake nye korat? Puryo kot kosucini tukway mwenet?

<sup>40</sup>Puryo kot kupēle cito nyo cinete cito nyo netisiyi, ntene ci tokol nyo cinete ye kacinet okoy kunket mosukukerkeyit neto oko konetintenyi.

<sup>41</sup>“Kunyo omne sekōse nyi pertet nye kisic nye mite koḡntap yeyaḡuḡ, oḡnkupuryo kot mucu kot kās musukyet nye mite koḡnta nyeḡuḡ nkit?

<sup>42</sup>Mucu nyi kulene mwoci yeyaḡuḡ kule, ‘Yeya, kany onumuḡ ani pertet nye mite koḡnta nyeḡuḡ oḡnkurok kupuryo mucu nyi kot kās musukyet nyo mite koḡnta nyeḡuḡ nkit? Ye, koperperintoni! Nyosye numu kunyo musukyet nyo mite koḡnta nyeḡuḡ nkit, siḡet kāsṽe topon semuc numu pertet nyo mite koḡntap yeyaḡuḡ.’ ”

<sup>43</sup>“Omnye puryo ket nye topon nye muce kot kwiy omik ce miyotec, oḡnkupuryo yec mpo ket nye miyat nye muce kot kwiy omik ce toponec.

<sup>44</sup>Cinkete ket ake tokol omikyiyi ce yiye; omnye puryo kot komuce piko kupute mokoyek ketik ce ponto kotok, nto muce ra kupute komolik ketik ce ponto kotok?

<sup>45</sup>Numu cito nye topon toponiyet kucone konorutyenyi nye nye topon nye mite mukuleynyi, nto cito nye miyat kunum miyotyeyet kucone konorutyenyi nye miyat nye mite mukuleynyi, omnye ḡolole kutitap cito ḡalek tokol ce nyitotin mukuleynyi.”

<sup>46</sup>“Omne sokureno ani akwek, ‘Mokoryontet, Mokoryontet,’ oḡnkurok kupuryo kot oyiye ḡalek ce omwowok ani akwek?

<sup>47</sup>Mosoporwok ani wule yunto cito nye cony wule omite oḡnkulim ḡalekwani oḡnkwiyy kurup.

<sup>48</sup>Kerkey nyo oko ci nye tece koto kupal kuwo ḡony koromun oḡnkutuci topon, nteye keyin mokotekap oyinet oḡnkurotyi koyoto om swama kupuryo kot kumuce kutyem omnye kicetec topon.

<sup>49</sup>Nto ci nye kalim ḡalekwani oḡnkupuryo kot kwiy kiy, kukerkey nyo oko ci nye tece koto yepo ntapca oḡnkupuryo kot kutec topon kupal kuwo ḡony, kurotyi oyinet koyoto om swama kulul lakwar, nto luletap koyoto kululot nyewo koromun.”

## Luka 7



- <sup>1</sup>Nteyu kowo kuwany Yesu kumwoci piko ñalecutecu tokol, kunomen kuwo Kapernaum.
- <sup>2</sup>Kimite wuloto citake nyewo nyepo sikarek nye kiponto mutworintenyi nye kicöme koromun. Kimnyone nye kikasat koromun nye karik kume mutworintonoto.
- <sup>3</sup>Ntowo kulim cicoto kinyewo nyepo sikarek ñalek ce nöme Yesu, kuyokto poyikap Yutayek alak kupa wokumwoci Yesu kuco cokusop mutworintenyi.
- <sup>4</sup>Yoto kukwa poyikap Yutayek okoy kupun wule mite Yesu, oñkusaysay koromun kumwoci kule, “Misyini yici neto kuyunyoto, roke neto kunyor,
- <sup>5</sup>omnye cöme pikyacek, oñku neto nye kitekwec acek kotapkok.”
- <sup>6</sup>Yoto kunomen Yesu kupetakey wanak oko cekto, ntowo kurikta koyoto, kuyok nyewo nyepo sikarek coronutekyi kwokumwoci Yesu kule, “Mokoryontet, mente ayimnkey omnye oyiku ani ci nye puryo kot kumisyiniñ nyi ico cewut komwani.
- <sup>7</sup>Kunyo puryo kot kumisyo ani aco wule mite nyi; mwowu pate ñolyo mosukusop mutworintemwani.
- <sup>8</sup>Omnye oyiku mpo ani ci nye cepoytoy, oñkoponte sikarek ce opoytoy ani, omwocini ake kule, ‘Iwo’, kuwo, nto ake omwoci kule, ‘Co’, kuco, nto mutworintemwani omwoci kule, ‘Yiy kiyi’, kwiye kuyunyoto.”
- <sup>9</sup>Nteyu kowo kulim Yesu coto, kukite ñalekap cicoto koromun, oñnkumwoci piko ce kirupe neto kule, “Komwowok ani akwek kule, nka mpo om Israel tokol kumukul; tompo kot anyoru ani ci nye ponto koyenot nyewo kuyunyi.”
- <sup>10</sup>Ntowo kuweckey piko co kociyoku kupa okoy koyoto, wokunyor kosop mutworintetkey.
- <sup>11</sup>Nto om letut kuminiñ, kunomen Yesu kuwo okoy kupunto moñet nye cekure Nain. Kiwetoykey neto yoto konomikyiki oko piko ce cañ.
- <sup>12</sup>Nteyu kowo kupunto kurketap moñet kutuye piko ce satu cito nye kame, nyoto kunye kiwero akenke pate nyepo korko nye musuk. Kipontokey korkonoto piko ce ce cañ cepo moñonoto.
- <sup>13</sup>Ntowo kukäs Mokoryontet korkonoto, kurire oñnkumwoci kule, “Mente tarir.”
- <sup>14</sup>Yoto kunokyi Yesu kulekityi oñnkunäm kito nye kicesute cito, yoto kuyonñ piko ce kisute, kumwoy Yesu kule, “Oyiperyontoni! Komwowuñ kule, ñet yony!”
- <sup>15</sup>Kuñet cicoto kikime kopur ñony oñnkucec kuñalal, kunäm Yesu oñnkukoci kamet lekwenyi.
- <sup>16</sup>Yoto kokite oñnkumuyo piko tokol, oñnkukasta cekto Yiyintet kumwoy kule, “Kotokune kwenunyo workoyonto nyewo koromun!”
- <sup>17</sup>Kutisto lokoywecutecu po Yesu om koretap Yuteya tokol oko korosyek ce lekite wuloto.



- <sup>18</sup>Kumwoci konomiky Yowana ñalecutecu tokol. Yoto kukur Yowana konomiky oyeny,
- <sup>19</sup>oñnkuyokto kupa wule mite Mokoryontet wokutepe kule, “Nyi neto cito mosukuco nto cekany acek citake?”
- <sup>20</sup>Nteyu kowo kukwa picoto okoy kupun wule mite Yesu; kwokumwoy kule “Keyokwec acek Yowana potisonintet wule mite nyi kutep kule, ‘Nyi neto cito nyo mosukuco nto cekany acek citake.’ ”
- <sup>21</sup>Yoto pakenke kusop Yesu piko ce cañ ce kiponto porwonik, ce kisyen, oko ce kiponto oyik ce miyotec, oñnkunany konyek kukästa piko ce cañ ce kikoryo.
- <sup>22</sup>Kuwekyikey Yesu pikap Yowana oñnkumwoci kule, “Ape womwoci Yowana ñalek tokol ce kokäs oñnkolim akwek: Akäs pa, köstoy piko ce kikoryo, pesetoti piko ce kimwolyos, kocisop piko ce kuponto mutyenkenik, limntoy piko ce kikimiñitu, kokotutune met piko ce kikipok, oñnkyemwocini pononik lokoywek ce toponec.
- <sup>23</sup>Ntene ñerekat kuponto kupeyoy ci tokol nye puryo kot kunyoruneno ani kanokut.”
- <sup>24</sup>Nto om letut yu kowo kupecikey piko co kiyoku Yowana, kumwoci Yesu piko ñalek ce nömekey oko Yowana kule, “Kyopeti akwek Kitela kule wocekäs ne? Rostit nye kitimtime yomet? Puryo kot kuyunyo!
- <sup>25</sup>Ntene kyopeti akwek kule wocekäs ne? Ci nye kelac sirok ce toponec ce kintus? Cinkete kule piko co loce sirok ce toponec ce cikite oñnkuponto soponto nyepo ñerekwek kuminye piko coto korikap mokorenik!
- <sup>26</sup>Ntene omwowo ani pa, kyopeti akwek kule wocekäs ne? Workoyo? Yunyoto manta, komwowok ani kule kyokäs akwek yoto ci nye pële workoyo.
- <sup>27</sup>Omnye neto nyoto nyo mwowu silutekap Yiyintet ñalek ce nöme neto kule: ‘Akäs pa, oyoku ani kiyokitemwani kuntowuñ nyi, Nye mosukusat areñuñ om tayñuñyi.’ ”
- <sup>28</sup>Kutosyi Yesu kumwoy kule, “Komwowok ani kule, om piko tokol ce kiyi koruk, puryo mpo akenke nyewo kupël Yowana. Ntene nye miniñ om poytoyisyetap Yiyintet kunye nyewo nyoto kupël neto.”
- <sup>29</sup>Nteyu kowo kulim ñalecato piko tokol oko korurukikap mosoret, kukasta cekto kucämnta toponiyetap Yiyintet, omnye kikiçäm oñnkyepatisan cek om potisonisyetap Yowana.
- <sup>30</sup>Ntene kutay Farasayek oko konetikap ntarastinek ñalek ce möce Yiyintet om wule mite cek, omnye kipuryo kot kucäm kupatisan Yowana cekto.
- <sup>31</sup>Kumwoy Yesu kule, “Moyuyite ne ani yawut pikap pesyosyecu? Kerkey oko kiy ne?
- <sup>32</sup>Kerkey oko lekoy ce kepure yepo motepet sukupole kukurcinikey kumwowu kule: ‘Kicekutwok akwek kurerunek, ntene atay akwek motum! Kiceriryce acek kyam mnyat, ntene atay akwek morirycce omesye!’



- 33 Omnye kico Yowana potisonintet, oṅnkukir omik nye puryo kot kwomisyi oṅnkupuryo kot kuye finyonik, omwowu akwek kule, ‘Ponto oyinot!’
- 34 Kunyo kuco Weritap cito oṅnkwomis, oṅnkuyesyo, omwowu akwek kule, ‘Akäs pa cici! Nye cemoyetyontet oṅnkuyeyin nyepo pokitet, oṅnkucorwetap korurukikap mosoret oko piko co kicetay!’
- 35 Ntene kunyo kicinket kule po manta ṅomnonetap Yiyintet om wule mite piko tokol ce lekokyi.”
- 36 Kukur Farasoyintet ake Yesu cokwomis kanyi, kuwo Yesu okoy kupunto kotap Farasoyintonoto oṅnkupur ṅony kwomis.
- 37 Kimite korket ake moṅonoto nye kiponto kopurto nyepo soponto nye miyat, nteyu kowo kunket korkonoto kule mite Yesu kwomisyi om kotap Farasoyintet, yoto kusut cupet nye nyitat mwayita nye poṅu topon.
- 38 Kuco oṅnkuyonḡe patay om yepo kerengkoka Yesu, kuyile mwayikey poṅu topon.
- 39 Nteye kotoköse Farasoyintet nyo kukure Yesu ṅalecato, kumwowune moyenyi kule, “Nto koworkoyo cici, nto kokonket kule, ṅo, oṅnkuyu ne korkoni kanäm neto, oṅnkunket kule, ponto korkoni miyoty.”
- 40 Kuwekyi Yesu kumwoci neto kule “Simon, oponte ani ṅolyo nye omöce kule omwowuṅ nyi.” Kumwoy Simon kule, “Mokoryontet, mwowu.” Kuporci Yesu kumwoci neto kule.
- 41 “Kiponto piko alak oyeny pesenutepak citake nye pesentoy pesan. Kiceyoce ake silinkinek pokolwokik mut, nto ake kiceyoce silinkinek konom.
- 42 Omnye kipuryo kot kuponto picoto oyenku tukuk ce mokuyokune, cikalya tukway pesenutekwa. Kunyo oṅnkono om picoto oyeny nye mosukucäm koromun cito nyo kikolyoyisyi?”
- 43 Kuwec Simon kumwoci Yesu kule, “Asoti ani kule cito nyo kicikalya pesento nyewo.” Kumwoci Yesu neto kule, “Kerwoc topon.”
- 44 Kuwekyikey Yesu korketkey oṅnkumwoci Simon kule, “Kekäs nyi korkoni? Kaco ani koṅṅyi, ntene puryo kot kono pekap kerengkok, kunyo korkoni kunye kenyinye lokiki kerengkokwani, oṅnkupuke putekap metinyi.
- 45 Kopuryo mpo kot ṅerekyo ṅatuta ani nyi, ntene kuceke ye kaco ani koṅṅyi, puryo kot kwasta korkoni nye moṅotute kerengkokwani.
- 46 Kopuryo mpo kot iyile nyi mwayita metimwani, ntene kakuyile korkoni kerengkokwani mwayita nye poṅu.
- 47 Kunyo cömisyenyi nyewo nye kokupor kunye poru kule kacikalya neto miyotyonyiki ce caṅ. Ci tokol nye kacikalya ce tukusic kuporu nyoto cömisyet nye minij.”
- 48 Kumwoci Yesu korkonoto kule, “Kacikalyiṅ nyi miyotyonyikuk tokol.”





<sup>49</sup>Yoto kucec kuḡalal piko co kyomisiyi wanak om montuwokwa kumwoy kule, “Ḷo yec nyi kolyoy miyotyoni?”

<sup>50</sup>Kumwoci Yesu korkonoto kule, “Kakusopiḡ nyi koyeneḡḡ wecikey om kalya.”

## Luka 8

<sup>1</sup>Om letut kunomen Yesu kuwo kupunte soḡwek oko moḡosyek kuceke ake okoy ake kumwoytoti lokoywek ce nōme poytoyisyetap Yiyintet. Kipontotikey neto yoto konomikiyi taman ok oyeny,

<sup>2</sup>oko koruk alak ce kikicisopci oyik ce miyotec oko porwonikwa. Coto ku mpo Mariyam nyepo maktala nye kikicekwetyi oyik tisap,

<sup>3</sup>oko Yoana korketap Yusa cito nyewo nye kipoytoy kaytap Erote, oko Susana, oko koruk alak ce caḡ ce kikolyoy korucoto Yesu oko konomikiyi tukuk ce kimōce.

<sup>4</sup>Ntowo koruruckey piko ce caḡ, oḡnkumite alake kutosyinikey kukwone moḡosyek alak tokol, kumwoci Yesu cekto tyonkoconi kule,

<sup>5</sup>“Kiwo kolintet ake wokukol kupuswekyi, nteye kimite kukolsyi kupuswekyi, kusuci kupuswek alake aret tapan, cetyikta ḡony, kuterer toritek oḡnkwokwam.

<sup>6</sup>Kusuci alake yepo kitawet parak, kutur oḡnkuyom omnye kipuryo kot kunyor peko.

<sup>7</sup>Kusuci kupuswek alake yepo kotok orit, kupityo wanak oko kotok kwam kotok.

<sup>8</sup>Kusuci alake yepo teḡek ce toponec, kupityo oḡnkwiyy kupuswontet akenke kupuswek pokol akenke”. Nteye kimwowu Yesu ḡalecutecu kukurto kupol om kutit nyewo kumwoy kule, “Ci nye ponto yitik ce limnte, roke kulimnte!”

<sup>9</sup>Kutepe konomikiyi Yesu kumwoci kule, “Mwowu ne tyonkoconi?”

<sup>10</sup>Kumwoci Yesu cek kule, “Om wule omite akwek, kicekonok oḡnket ḡalek ce wuḡotin cepo poytoyisyetap Yiyintet, ntene om wule mite piko alak kicikoci co kunket om tyonkocoy pate, sukuḡet cek kukās ntene oḡnkupuryo kot kunkete, kulim ntene oḡnkupuryo kot kusowu kunket.”

<sup>11</sup>“Poru tyonkoconi kule, kupuswontet kunye ḡolyontetap Yiyintet.

<sup>12</sup>Kupuswek co kisuci aret tapan; kukerkey oko piko co kalim ḡolyontet, ntene kuco Setani nyewo nyepo oyik oḡnkucokunumune ḡolyontet mukuleywekwa kule mente kuyen ḡolyontet oḡnkyisop.

<sup>13</sup>Nto kupuswek co kisuci kitawet parak, kukerkey oko piko co ye kalim ḡolyontet kuḡerekyi koromun, ntene oḡnkupuryo kot kowute mukuleywekwa orit, kuyen pate pesyos tukusic, nteye kacesyem cekto kumwey.

<sup>14</sup>Nto kupuswek co kisuci kotok orit, kukerkey oko piko co ye kalim ḡolyontet nteye tokumite kurupe, kowurta cekto kasoteywek oko mokoryontit oko ḡerekwekap koret. Kunyo puryo kot kwiye cek omik kot kururyo.



- <sup>15</sup>Kupuswek co kisuci tejek ce toponec, kukerkey oko piko co ye kalim ɲolyontet, kunäm ɲɲnkurip topon om mukuleywekwa ce toponec ce muytocini ɲɲnkukwilokis okoy kwiy omik.”
- <sup>16</sup>“Puryo ci nye pele tarit ɲɲnkukupuye pesenit, nto kukoci kwiririt ɲony, ntene tore meset parak sukuɲet kukäs piko co miɲu koto orit lakweyet.
- <sup>17</sup>Omnye puryo ɲolyo nye kicewuny nye puryo kot ciporu koyin kutok. ɲɲnkupuryo kiy nye kicetup cewuny nye puryo kot ceɲonye koyin kutok.
- <sup>18</sup>Oripkey yawut wule olimntoy; omnye ci tokol nye ponto kiy mosicetosyi kucaɲit, nto ci tokol nye puryo kot kuponto nka mpo tukusic co sote kule oponte, mosicinumune.”
- <sup>19</sup>Yoto kukwa mpo mutakwam oko kamet wule mite Yesu, ntene kipuryo kot komuc cek kot kupunto wule mite Yesu omnye kicaɲ piko koromun.
- <sup>20</sup>Kumwoci citake Yesu kule, “Mite komet oko mpo mutokwomet keyoɲe saɲ kumöce kule cekäsini nyi.”
- <sup>21</sup>Kuwekyi Yesu kumwoci cek tokol kule, “Yeyomwani oko mpo yeyamwani ku piko co lime ɲolyontetap Yiyintet ɲɲnkurup kwiy.”
- <sup>22</sup>Nteye kipesyet ake, kulany Yesu rapet oko konomikiyi ɲɲnkumwoci cek kule, “Onte cipe kyay tampayayet pitonin.” Yoto kunomen cek kway.
- <sup>23</sup>Nteye kimite kwoye, kunuc Yesu kunäm rwonto; yoto kuwus yomet nyepo swama om tampayayet okoy kumac kunyiy peko rapet, kukäs konomik kule cemite ye miyat.
- <sup>24</sup>Kukwa cek ye kimite Yesu ɲɲnkuɲet kumwoci kule, “Konetintet, Konetintet! Kocemis!” Kuɲet Yesu ɲɲnkupolyi yomet oko peko ce kiwosekey, yoto kuis yomet oko tampayayet tokol.
- <sup>25</sup>Kumwoci Yesu cek kule, “Mite ono koyenemwoɲ?” Kumuyo cekto ɲɲnkukite, ɲɲnkuɲalal kwicek nkit kumwoy kule, “Do yec cici? Nyi polyini mpo yomat oko peko kulimnci neto!”
- <sup>26</sup>Yoto kway cek kupete rapet okoy kupunto pitonin om koretap Kerasenik nye tokyintos oko koretap Kalilaya.
- <sup>27</sup>Nteyu kowo kupunto cek tapantap tampayayet, kutuye Yesu citake nye kiponto oyik nye kicone moɲet, kikukuwany cicoto pesyosyek ce caɲ nye puryo kot kuloce siroy, ɲɲnkupuryo kot kuminye ko, ntene kiminye pate wule cemucini piko.
- <sup>28</sup>Nteye kotoköse cicoto Yesu, kurir kupol om kutit nyewo koromun ɲɲnkuputyi ɲony kukutuɲe taytap Yesu ɲɲnkumwoy kule, “Ponteno ne ani nyi Yesu Weritap Yiyintet nyepo torot koromun? Osomiɲ kule mente ataɲanya ani!”
- <sup>29</sup>Kimwoy cicoto kuyunyoto omnye kikipolyi Yesu oyinot nye miyat kuwete neto. Kikinäm oyik cicoto aret ce caɲ, kunyo kiceripe cerate nyororonik oko pinkonok, ntene kimuce cicoto kuɲeti ɲɲnkusut oyik neto okoy kupunto surukwenet.



- <sup>30</sup>Kutepe Yesu neto kule, “Cekure ne kayneḡuḡ?” Kuwec cicoto kumwoy kule, “Cekure kaynemwani, ‘Luket’, ” omnye kikikowut cicoto oyik ce caḡ.
- <sup>31</sup>Kusaysay oyik Yesu kumwoci kule, kukwet cek kupa wokowut kapkompic.
- <sup>32</sup>Kimite ye kilekite yoto yeceyap nkururwenik ce kimite kwokete tulwet komos. Kumwoci oyik Yesu kule kucömnci cek kupa wokowut nkururwenicoto. Yoto kumwoci Yesu cek kupa kuyunyoto.
- <sup>33</sup>Yoto kuḡete oyik cicoto oḡnkupa wokowut nkururwenicoto kumwey kurway yeceyta tokol okoy wokoḡirte lakam wokosuci tampayayet kupakäc peko kupok tokol.
- <sup>34</sup>Nteyu kowo kukäs mesewek ce kyokisyi ḡalecato keyokis kumwey kurway kupa wokumwaytat kupunte lokoywek moḡosyek oko koret tokol.
- <sup>35</sup>Kukwa piko kwokukäs ḡalecato kokwiyokis, ntowo kupun yoto; kwokunyor Yesu kupontokey cicoto kopete oyik kukepur yepo kerekokap Yesu kulakat oḡnkuponto ḡomnonet. Yoto kumuyo piko tokol.
- <sup>36</sup>Kuporci piko co komite yeto kumwoci piko co kokwoni wule kocisopto cicoto kiponto oyik.
- <sup>37</sup>Yoto kusom piko tokol ce kiminye koretap Kerasenik oko ce lekite koronoto kumwoci Yesu kule kuḡet kuwete koremwa, omnye kinäm cek tokol muyotet nyewo koromun. Yoto kulany Yesu rapet oḡnkunomen kuweckey.
- <sup>38</sup>Kusom cicoto kipete oyik kumwoci Yesu kule, “Kany cepetekey tukway.” Kuwekyi Yesu kumwoci neto kule,
- <sup>39</sup>“Nomen weckikey kaḡuḡ oḡnkuwemwayte ḡalek ce kokwiwuḡ nyi Yiyintet.” Kunomen cicoto kuweckikey oḡnkuwokumwaytat kupunte moḡosyek tokol ḡalek ce kokwici Yesu neto.
- <sup>40</sup>Ntowo kuweckey Yesu kwoy pitoni, kutoroc kuḡerekyi piko ce caḡ, Omnye kimite picoto kukonye neto.
- <sup>41</sup>Yoto kuco citake nye cekure Yairo nye kipoytoyintetap kotapkok, oḡnkuputyi yepo kerekokap Yesu oḡnkusom kumwoci kule, cipe kanyu,
- <sup>42</sup>omnye kiponto Yairo lekwenyi akenke nye tye nye kiponto kenyisyek taman ok oyeny, nye kikirik kume. Nteye kimite Yesu kuweti kukic piko neto om komoswokik tokol.
- <sup>43</sup>Kimite yoto korket ake nye kimnyan kutajany kukwone korotik kuwany kenyisyek taman ok oyeny. Kikikuwoḡnkyi korkonoto tukukyi tokol ce kiponto cepsakitisyek, ntene puryo mpo akenke nye kimuc kot kusop neto.
- <sup>44</sup>Kucone korkonoto letutap Yesu oḡnkutwa kunäm tapantap siretap Yesu, yoto pakenke kusisio korotik ce kikwone neto.
- <sup>45</sup>Kutep Yesu kule, “Do nyi kanäma kutwaya ani?” Nteyu kowo kutinton piko tokol, kumwoy Petero kule, “Konetintet, piko cu kuwunuktiḡ kukiciḡ nyi!”



<sup>46</sup>Ntene kumwoy Yesu kule, “Kutwaya kunäma ani citake; omnye kakäs kule kaweteno swamet.”

<sup>47</sup>Ntowo kukäs korkonoto kule komowuñoktosi, kupotanan kuco tay, oñnkuputyi taytap Yesu oñnkumwoci om taytap piko tokol omne sukutwa kunäm neto Yesu, oñnkumwoy kutor wule kosopto neto yoto pakenke.

<sup>48</sup>Kumwoci Yesu korkonoto kule, “Cepnyu, kokusopiñ nyi koyeneñuñ, kunyo wecikey om kalya.”

<sup>49</sup>Nteyu kimate Yesu tokuñolole, kucone citake kotap poytoyintetap kotapkok, oñnkucokumwoci poytoyintet kule, “Kame cepñuñ kunyo mente tayim yec Konetintet.”

<sup>50</sup>Ntowo kulim Yesu ñalecato, kumwoci Yairo kule, “Mente omuy, iyen pate, mosukusop cepñuñ.”

<sup>51</sup>Ntowo kupunto Yesu koyoto, kuyete piko tokol mewut koto orit, oñnkucömnci pate Petero oko Yowana oko Yakopo, oko kwanitap lekwet oko kamet.

<sup>52</sup>Kimate yoto piko kurire kwome mnyat cepoto. Kumwoci Yesu cek kule, “Monte cerirye, omnye puryo kot kume, koru pate.”

<sup>53</sup>Kurorici picoto Yesu omnye kinkete cek kule kame lekwet.

<sup>54</sup>Kunäm Yesu yewutap cepoto oñnkukur kupol kumwoy kule, “Lekwani ñet!”

<sup>55</sup>Kuweckey sopen nyi, oñnkuñet lakwar kuyo. Yoto kumwayta Yesu cikoci omik ce kam.

<sup>56</sup>Kukite kwan oko kamet, ntene kunkolontyi Yesu kumwoci cekto kule mente kot kumwoci citake tokol ñalecu keyokis.

## Luka 9

<sup>1</sup>Yoto kukur Yesu koruruc wanak kiyokikiyi taman ok oyeny, oñnkukoci cek swamet oko kamukeywek ce kwete oyik oko swamet nye sope porwonik,

<sup>2</sup>oñnkuyokto kupa wokumwaytat lokoywek cepo poytoyisyetap Yiyintet, oñnkusop piko tokol ce mnyontos.

<sup>3</sup>Kumwoci kule, “Monte cenämata kiy om poninekwok, nka mpo korok nye otepenoti, nka mpo lol nyepo omit, nka mpo omnyo, nka mpo pesan, monte mpo cenämata sirok oyeny.

<sup>4</sup>Nto koto ake tokol nye kowut; opur koyoto okoy onomene moñonoto.

<sup>5</sup>Nto wulyo ake tokol wule puryo kot kutorocak kuñerekyok akwek piko, añete apete moñonoto oñnkopukiyi tertitap kerengkowok sukuñet kwek kosowunot om wule mite pikap moñonoto.”



- <sup>6</sup>Yoto kunomen kiyokik kupa kupunte moḡosyek tokol kumwaytat lokoywek ce toponec oḡnkusop piko om wulyo tokol wule kipa cekto.
- <sup>7</sup>Yoto kulim Erote poytoyintetap Kalilaya tukuk tokol ce kiyoktos, kusot kupotpoten koromun, omnye kimwowu piko alake kule, “Kokututune met Yowana Potisonintet.”
- <sup>8</sup>Kumwowu alake kule, “Kukuporkey Eriya.” Kumwowu alake kule, “Kokotutune met yec akenke om workoyikap keny.”
- <sup>9</sup>Kumwoy Erote kule, “Nteyu kyayep ani metitap Yowana, ḡo yec cici olimncini ani ḡalecu yucu?” Kumac Erote kule ntaḡäs Yesu.
- <sup>10</sup>Kuweckey kiyokik oḡnkwokumwoci Yesu tukuk tokol ce kukwiw cekto. Yoto kukwer Yesu cek kwicek nkit kuwuḡat okoy kupunto moḡet nye cekure Pesasayita.
- <sup>11</sup>Ntowo kunket piko kupa kurup neto. Nteye kotoköse Yesu piko, kuḡerekyi oḡnkuḡololyi kumwoci ḡalek cepo poytoyisyetap Yiyintet, oḡnkusop piko ce kimöce kule cisopec.
- <sup>12</sup>Ntowo kupunto kosoleny karik kurarakta asista, kukwa kiyokik co tamanu ok oyeny ye kimite Yesu oḡnkumwoci kule, “Yomis mwoci piko kupecikey, kupa moḡosyek oko soḡwek ce lekitec wokuceḡat wule mokuruy oko wule mokunyorta omik, omnye cemite acek wuli po surukwenoni,”
- <sup>13</sup>Kumwoci Yesu cek kule, “Okoci akwek nkit kiye mokwam.” Kuwekyi kiyokik kumwoci neto kule, “Ceponte acek pate mukatinec mut oko purpurunek oyeny, möce nyi kule cipe acek nkit wokyal omik cepo picu tokol?”
- <sup>14</sup>Omnye kimite yoto piko ce kirice elifunek mut. Kumwoci Yesu kiyokiky kule, “Oyiyte piko tokol kopur ḡony, korurukotekey, piko ce puntoy konom.”
- <sup>15</sup>Kwiw kiyokik kuyunyoto kuyiyta piko tokol kopur ḡony.
- <sup>16</sup>Kunäm Yesu mukatinekey mut oko purpurunek oyeny oḡnkunyal torot, oḡnkukasta Yiyintet kusomnci oḡnkupetec oḡnkukoci kiyokiky kupcici piko.
- <sup>17</sup>Yoto kwomis piko tokol okoy kupiyonḡis, yoto koruruc kiyokik omik ce kam piko kot kuḡet kunyiy kisok taman ok oyeny.
- <sup>18</sup>Nteye kimite Yesu kusome kwine nkit pesyet ake, yoto kukwa konomik ye kimite neto, Kutepe Yesu cek kule, “Mwowu piko kule oyiku ani ḡo?”
- <sup>19</sup>Kuwekyi konomik kumwoci kule, “Mwowu piko alake kule, yiku nyi Yowana potisonintet, kumwowu alak kule yiku nyi Eriya, nto alak kumwowu kule yiku nyi akenke om workoyikap keny nye kokotutune met.”
- <sup>20</sup>Kutepe Yesu cek kule, “Nto akwek, omwowu akwek kule oyiku ani ḡo?” Kuwec Petero kumwoy kule, “Yiku nyi Ḋapanet nyepo Yiyintet!”
- <sup>21</sup>Yoto kunkolontyi Yesu koromun cekto kumwoci kule, “Monte kot omwoci citake tokol ḡolyontoni.”



- <sup>22</sup>Kutosyi Yesu yec kumwoy kule, “Misyini citaŋany Weritap cito om tukuk ce caŋ; mosukutay poyik oko tisik cewoyec, oko konetikap ntarastinek. Mosicepakäc kume, nteye pesyetap somok ciŋet kotutune met.”
- <sup>23</sup>Yoto kumwoci Yesu piko tokol kule, “Ye möce citake tokol kule anama cepetekey ani, kumisyini kunyilkey nkit, oŋnkutor murtowontenyi pesyosyek tokol oŋnkuco cokunama cepetekey ani.
- <sup>24</sup>Omnye ci nye möce kule osop sopen nyi kupote neto nyoto sopen nyi, nto ci nye kepot sopen nyi omnye kacäma ani, mosukusop neto nyoto sopen nyi.
- <sup>25</sup>Muce ra kunyor cito latik oŋnkocu ye ponto tukuk ce mite koret kumukul oŋnkwarantakey neto nkit?
- <sup>26</sup>Omnye ci tokol nye kelilan om wule omite ani oko ŋalekwani, mosukulilontyi Weritap cito neto nyoto om pesyet nye contoy woyin nyi, oko woyintap Papa oko nyepo malaykanik ce tililec.
- <sup>27</sup>Ntene komwowok ani akwek ŋalek cepo manta kule, mite yuteyu piko alake ce keyoŋ ce puryo kot kucemcem met okoy ye kakäs cekto poytoyisyetap Yiyintet.”
- <sup>28</sup>Ntowo kupok pesyosyek cerice sisit, kuceke ye kiŋalale Yesu ŋalecato, kukwer Yesu Petero oko Yowana oko Yakopo kupa tulwet parak, kupa cek wokusom.
- <sup>29</sup>Nteyu kimite Yesu kusome kuwälkey tokoynyi, oŋnkuweckey sirokyi kulelakitu kulekececis.
- <sup>30</sup>Yoto pakenke kuporkey neto kuŋolole oko piko alak oyeny, coto ku Moses oko Eriya,
- <sup>31</sup>ce kiporkey om woyinto, oŋnkuŋolole oko Yesu ŋalek ce nöme yisyetap Yiyintet nye mosukuyitita Yesu om Yerusalem.
- <sup>32</sup>Kikiruy kunäm rwonto om yoto Petero oko piko co kipontokey neto, nteye kotowokukösu cekto topon; yoto kukäs woyintap Yesu oko picoto oyeny kukeyoŋ oko neto.
- <sup>33</sup>Nteye kimite Moses oko Eriya kupciykey oko Yesu, kumwoci Petero Yesu kule, “Konetintet, kiy nye topon omnye cemite acek yuteyu, kunyo kany cetec acek kisarinek somok, mokwek akenke nyeŋuŋ, nto ake kupoyit Moses, nto ake kupoyit Eriya.” Kiŋalal Petero kumwoy ŋalecato nye kipuryo kot kunkete ŋalek ce mwowu.
- <sup>34</sup>Nteyu kimite Petero tokuŋolole kuco polyet oŋnkulum cek rurwet, kumuyo konomik yukowo kulum polyet.
- <sup>35</sup>Yoto kucone kurset polyet orit kuŋalal kumwoy kule, “Nyi kunye Werimwani camanet, nye kweyanemwani olimnci neto.”
- <sup>36</sup>Ntowo kuis kursonoto, kutok Yesu kumite kwine nkit. Yoto kuisio konomik pesyonoto nye kipuryo kot kumwoci citake tokol kito nye kikäs cekto.
- <sup>37</sup>Nto om pesyetap koyekune, kurekune cek tulwet, yoto kutuye piko ce caŋ Yesu.





- <sup>38</sup>Kukursyo citake nye kimate kwenutap piko kumwoy kule, “Konetintet, osomiņ ani nyi kule koswo werinyu, omnye lekwemwani nye akenke pate,
- <sup>39</sup>nye nöme oyinoto kunco, oņnkupirtopirto okoy kukapus pukantet, kunyo kikotaņany koromun oņnkukorom kot ye mokwasta lakwar.
- <sup>40</sup>Kyosom mpo kiyokikuk kule kukwetyi neto oyinot, ntene puryo kot komuc kot kukwet.’’
- <sup>41</sup>Kuwec Yesu kumwoy kule, “Opo! Akwek pikap pintap pesyosyecu ce puryo kot kuponto koyenot! Mosopur ani oko akwek okoy pesyo ne? Mosomuytyocok ani akwek okoy oyul’’ Yoto kumwoci Yesu citap lekwet kule, “Sutu weriņuņ kuco yu.’’
- <sup>42</sup>Nteye kimate lekwanato kuconi kunām oyinoto oņnkumilci ḡony, oņnkupirtopirto. Yoto kupolyi Yesu oyinot nye miyat; kusop lekwanato, oņnkunām neto kuketyi kwan.
- <sup>43</sup>Kukite Piko tokol woyinto nyepo swametap Yiyintet. Nteye kimate piko tokokite tukuk ce kimate kwiye Yesu, yoto kumwoci Yesu konomiky kule,
- <sup>44</sup>“Alimnte topon ḡalecu, cikwakwek ḡalecutecu monte ceyutye! Mosicenām Weritap cito oņnkuyikoyito kunām swametap piko.’’
- <sup>45</sup>Ntene kipuryo kot kusow yoto konomik kunket ḡalecato, omnye kicewuņe mente kot konket kule mwowu ne ḡalecato, yoto kunyokoritu cekto ye mokutepe Yesu kule poru ne ḡalecato.
- <sup>46</sup>Yoto kucec konomik kutintentyin kutepekey kwicek nkit kumwoy kule, “Do nyewo kupēlis om cekto.’’
- <sup>47</sup>Kunket Yesu ḡalek ce kitintentyini cek om kasoteywekwa. Kunām lekwa nye miniņ oņnkukoci kopure komosnyi.
- <sup>48</sup>Oņnkumwoci kule, “Ci tokol nye katoroc kuņerekyi lekwani om kaynemwani ku katoroca kuņerekyo ani neto cicoto; nto ci tokol nye koņerekyo ani ku koņerekyi neto nyoto neto nyo kiyokwani, omnye ci nye miniņ kupēlis om kwenumwakwek ku cito nyoto nyewo.’’
- <sup>49</sup>Kuwekyi Yowana kumwoci Yesu kule, “Konetintet, kucekās acek citake nye kukwete oyik om kayneņuņyi, ceyete acek cekerekte cicoto, omnye puryo kot cepontotikey acek oko neto.’’
- <sup>50</sup>Kumwoci Yesu neto kule, “Monte ceyete cekerekte cicoto, omnye ci nye puryo kot kutoyok akwek kunye nyimwoņ cicoto.’’
- <sup>51</sup>Nteyu kowo kurikta kupunto pesyosyek ce cesute Yesu kuwo torot. Kusot kuwoņkyi oņnkunomen kutokyikey Yerusalem.
- <sup>52</sup>Yoto kuyokto piko alak kupa kuntoye. Kupa picoto okoy wokupunto saņtap Samariyek kule woceyiytoci Yesu otepto.
- <sup>53</sup>Ntene kutay pikap saņata moņerekyi Yesu omnye kiweti kutokyikey Yerusalem.



<sup>54</sup>Nteye kotoköse kiyokiki Yowana oko Yakopo kuyunyoto kumwoy kule, “Mokoryontet, mokyec acek nyi kule cekur mata kucone torot cokupel cekto?”

<sup>55</sup>Kuwekyikey Yesu cek oṅnkupolyi.

<sup>56</sup>Yoto kunomen cek kupa okoy saṅnta ake.

<sup>57</sup>Nteye kimate cek kupeti om aran, kumwoci citake Yesu kule, “Mosanamiṅ ani cepetekey oko nyi om wulyo tokol wule mewo nyi!”

<sup>58</sup>Kumwoci Yesu cicoto kule, “Ponto mokoyitinek mwenonik, kuponto toritek co terertoy korikwa wule minye, ntene puryo kot kupunto Weritap cito wule mokowute metinyi.”

<sup>59</sup>Kumwoci Yesu citake kule, “Nama nyi cepetekey oko ani.” Ntene kumwoy cicoto kule, “Mokoryontet, kany awo kunyo wamuy papanyu.”

<sup>60</sup>Kumwoci Yesu cicoto kule, “Yaste muswek cokipok kumuy muswekwa, ntene nomen nyi iwo wemwaytate lokoywek cepo poytoyisyetap Yiyintet.”

<sup>61</sup>Kumwoy yec citake kule, “Mokoryontet, mosanamiṅ ani cepetekey oko nyi, ntene kany awo kunyo womwoci cemutakwey piko co mite ka.”

<sup>62</sup>Kumwoci Yesu cicoto kule, “Puryo ci nye ye kaṅame yewunyi mukonketap yeyik kupotis, oṅnkukäs yec let nye yeme poytoyisyetap Yiyintet.”

## Luka 10

<sup>1</sup>Yoto om letutap ṅaleca, kukwey Mokoryontet Yesu piko alak tomonwokik tisap ok oyeny oṅnkuyokto kuntoye kupetate oyeny oyeny kupa moṅosyek tokol oko komoswokik tokol om wule kimöce Yesu kule sawo om letut.

<sup>2</sup>Kumwoci Yesu picoto kule, “Wo koromun yisyetap kisisyet, ntene ṅeri pate piko co kisisyi, kunyo osom Mokoryontetap kisisyet sukuṅet kuyokto kisik alak kupa kisisyenyi.

<sup>3</sup>Ape, koyoktok ani kuyu lekopak kecirek ce kapa kwenutap suyik.

<sup>4</sup>Monte cenamate munyenku nyepo pesan, nto lol nyepo omit, nto kweyonik, ntene monte cisupay citake tokol om aran.

<sup>5</sup>Nto koto ake tokol nye konyosye owut orit, omwowu kule, ‘Kopur kalyet koyi!’


<sup>6</sup>Nteye mite yoto citake nye ponto kalyet, mosukunyor cicoto kalyemwoṅ, nteye puryo kot kumite yoto, mosukukketkey kalyet wule omit akwek.

<sup>7</sup>Opurene koyoto, oṅnkoyomisye oṅnkoye kiy ake tokol nye kacekonok, omnye misyini ci nye yiyisi kunyor musyarenyi. Monte ceṅete koyoto oṅnkape yec wowut koto ake.

<sup>8</sup>Nteye kopunte moṅet ake tokol oṅnkuṅerekyok piko, oyam kiy ake tokol nye kacekonok.



- <sup>9</sup>Osop piko tokol ce cemnyontos om wuloto; oṅnkumwoci piko kule, ‘Korikyok akwek poytoyisyetap Yiyintet.’
- <sup>10</sup>Nteye kupunte moṅet ake tokol, oṅnkutay moṅerekyok piko, ape opunte orustunwek ce punte moṅonoto, oṅnkumwowu kule, ‘Puryo kiy nye mokiywok acek akwek.
- <sup>11</sup>Kunyo mocipukwok tertit nyi kanäm kerekokyacek om moṅemwoṅ, ntene möce oṅket ḡolyontoni kule, korikyok akwek poytoyisyetap Yiyintet!’
- <sup>12</sup>Komwowok ani akwek kule, om pesyet nye cemute musankut, mosukukaykay Yiyintet musankut nyepo Sotom kupël moṅonoto!’’
- <sup>13</sup>“Oyey! Meseṅur kwapi nyi Korasin! Oyey! Meseṅur kwapi mpenyi Pesasayita! Omnye nto kitukuk cepo kakitat co kiciwuṅ nyi kuce kicici coto Tiro oko Siton nto kikopur ken y pikap wuloto ḡony, oṅnkulac sirok sarkatineḡ oṅnkuwastekey arek kupor kule karenynkey cek om miyotyoniḡwa.
- <sup>14</sup>Mosukukaykay Yiyintet musankut nyepo Tiro oko Siton om pesyetap Musankut kupëlök akwek.
- <sup>15</sup>Nto mpenyi Kapernaum! Kimöce nyi kule osutkey awo torot? Mosicewirciṅ wule mite mata nye momise!’’
- <sup>16</sup>Kumwoci Yesu konomiky kule, “Ci tokol nye kolimwok akwek konomikwani; kulimwo ani cicoto, nto ci tokol nye katayak akwek, kutoyo mpo ani cicoto, nto ci nye toyo, kukatay cicoto neto nyo kiyokwo ani.’’
- <sup>17</sup>Yoto kuwekey piko co kitomonwokik tisap ok oyeny kuponto ḡerekwek ce caṅ, oṅnkwokumwoy kule, “Mokoryontet, kulimwec mpo acek oyik ye kucepolyi om Kayneṅuṅ!’’
- <sup>18</sup>Kuwekyi Yesu kumwoci cek kule, “Kyakäs ani Setani kosuwune torot kuyi ilet.
- <sup>19</sup>Olim pa! Kwokonok ani ani kamukeywek ce omuci atyic erenoy, oko keneyisyek; oṅnkotirtir swamet tokol nyepo puniyontet, ntene oṅnkupuryo kot komuce kot kunyerenak akwek.
- <sup>20</sup>Ntene monte ceṅerec omnye kolimwok akwek oyik, ntene aṅerec pate omnye silotin kaynokwok om wulin po torot.’’
- <sup>21</sup>Om yoto pakenke kunyor Yesu ḡerekwekap swametaṅ Muyet Nyetilil kumwoy kule, “Ayi Papa, okostiṅ ani nyi Mokoryontetaṅ torot oko koret, omnye kiwuṅe nyi tukucu piko ce ḡomec oko ce sumonotin, oṅnkiporci piko ce minkec. Yunyoto Papa, kiyiy kuyunyoto omnye kikwey ḡerekyi nyi nkit.
- <sup>22</sup>Kikono Papa tukuk tokol, kunyo puryo ci nye nkete kule Werit ku ḡo, toskoy pate Papa nye nkete, oṅnkupuryo mpo ci nye nkete kule Papa ku ḡo, toskoy pate Werit nye nkete oko ci nyo kakwey Werit kule aparte.’’
- <sup>23</sup>Yoto kuwekyikey Yesu konomik; oṅnkuṅololyi möt kumwoci kule, “Ponto kupeyoy konyek ceköse tukuk ceyucu oköse akwek.



- 24** Komwowok ani akwek kule, caŋ workoyik oko kinkonik ce kimöce kule nto cekäs tukuk ceyucutecu oköse akwek, ntene kipuryo kot komuc cek kot kukäs, nto kule celim ceyucutecu olim akwek, ntene kipuryo kot kulim.’’
- 25** Yoto kuŋet kuyo konetintet ake nyepo ntarastinek, oŋnkulot kutepe Yesu kumwoy kule, “Konetintet, mosayiy ne ani ye saŋet anyoru soponto nyemo poku?”
- 26** Kuwekyi Yesu kumwoci neto kule, “Kicesil kulene om ntarastinek? Sumoni nyi mwowu kulene?”
- 27** Kuwec cicoto kumwoy kule, “Misyini cäm Mokoryontet Yiyinteŋuŋ om mukuleyŋuŋ tokol, oko sponŋuŋ tokol oko swameŋuŋ tokol, oko kasoteywekuk tokol, oŋnkicäm latyeŋuŋ kuyu wulo cömntoykey nyi nkit.’’
- 28** Kumwoci Yesu cicoto kule, “Kewec topon, iwo weyiy kuyunyoto mesenyoru soponto.’’
- 29** Omnye kimöce cicoto kule ayetkey onyolu kutepe neto Yesu kule, “Latyemwani ku ŋo?”
- 30** Kuwekyi Yesu kumwoci neto kule. “Kinomene citake Yerusalem kurekto kuwo Yeriko, kunyor corik om aran ce kiporye kunumene sirok, oŋnkupir neto koromun, oŋnkupakakta kumilekey karik kume.
- 31** Kuwete kurekte aranato mpo yec tisintet ake, nteye kotoköse cicoto kumur aret tapan.
- 32** Kuco yec Lefintet om aranato okoy kupun yoto kimite cicoto, nteye kotoköse kumur mpene aret tapan.
- 33** Ntene kuco Samariyantet ake nye kiweti pan nyi om aranato okoy kupun yoto kimite cicoto, nteye kotoköse kurire kukalya koromun.
- 34** Kuwo okoy ye kimite cicoto, oŋnkunäm oŋnkuyile mwayita oko finyonik oŋnkurotyi mwoyokyi, oŋnkunäm kulany sikiryenyi oŋnkukwer okoy kupunto kotap toyek wokunyaye wuloto.
- 35** Ntowo kuyec koret om pesyetap oyeny, kunum silinkinek oyeny oŋnkukoci cito nye ripe kotap toyek oŋnkumwoci kule, ‘Nyay cici, nteye kenyaye kot kutil tukuk cu kokoniŋ ani, mosucoyokuŋ ye kaweckey.’’’
- 36** Kutepe Yesu neto kule, “Do om picoto somok nye soti kule kilatyetap cicoto kipire corik?”
- 37** Kuwec cicoto kumwoy kule, “Neto cito nyo kikwici cicoto tukuk ce toponec.’’ Kumwoci Yesu neto kule, “Mpenyi iwo weyiy kuyunyoto.’’
- 38** Nteye kimite Yesu oko konomikyi kupeti panmwa, yoto kukwa okoy kupun kayta ake, kuŋerekyi korket ake nye cekure Marisa neto oŋnkupay.
- 39** Kiponto korkonoto cekwam nye cekure Mariyam nye kipure yepo krenkokap Mokoryontet Yesu kulimntoy ŋalek ce kimwowu.



<sup>40</sup>Yoto kutaŋany Marisa yisyonutek ce kimite kwiye, kuco ye mite Yesu oŋnkumwoci kule, “Mokoryontet, puryo kot köse nyi kule kokwoso ani yeyamwani ayiy yisyonutek nkit? Mwoci kuco cokukalya ani!”

<sup>41</sup>Kuwekyi Mokoryontet kumwoci kule, “Marisa, Marisa! Soti nyi koromun, oŋnkitaŋänkey om tukuk ce caŋ,

<sup>42</sup>ntene ce möce kiy akenke pate. Kunyo kakwey Mariyam kiyoto topon nye komocimuce kot cinumune neto.”

## Luka 11

<sup>1</sup>Kimite Yesu pesyet ake kusome om yeto ake, nteyu kowo kusom kot kuwany; kumwoci konomintenyi ake neto kule, “Mokoryontet, netec acek wule cesomntoy kuyu wulo kinetitoy Yowana konomiky.”

<sup>2</sup>Kumwoci Yesu cek kule, “Ye some, omwowu kule: ‘Papa, kante-ciywey kutililit kayneŋuŋ, kante kuco poytoyisyenŋuŋ.

<sup>3</sup>konec acek omikyo ce cemöce pesyosyek tokol.

<sup>4</sup>kalyec acek miyotyonykyo, kuyu wulo cikolyoy acek co lele om wule ce mite acek, ntene mesutec royenec wule mite syemutok.’ ”

<sup>5</sup>Kumwoci Yesu konomiky kule, “Do om akwek nye ye ponto corwenyi, oŋnkuweci ye kopunto komoy kwen wokumwoci kule, ‘Corwenyu, peseno mukatinec somok.

<sup>6</sup>Omnye kacontyo tontet nye corwenyu ntene moponte kiy nye mokoci kwam.’

<sup>7</sup>Kuwec nyin om koto orit kumwoy kule, ‘Mente ataŋany ani! Omnye kaceker kurket, kunyi kaceruye acek tokol oko lekok om kwiririt, puryo kot tomuci aŋet cokoniŋ kiy.’

<sup>8</sup>Komwowok ani kule, nka kot kupuryo kot kuŋet cicoto cokukoci nyin tukuk ce komöce omnye corwenyi, ntene ye kosomso cicoto nye puryo kot kulilone kupunto muyot, mosukuŋet nyin kuco cokukoci kiy ake tokol nye kosome.

<sup>9</sup>Kunyo komwowok ani kule: Osom mosicekonok, aceny, mosonyoru, okonykony, mosiceyotwok kurket.

<sup>10</sup>Omnye ci tokol nye some, mosicikoci, nto ci nye cene, mosukunyor; mpene neto cito nyo konykonye mosiceyoty,

<sup>11</sup>Ci ŋo om akwek nye ye papa nyepo lekoy nye ye kosom lekwenyi purpuryo kukoci erenet ye ketekocini purpuryontet?

<sup>12</sup>Nto kukoci lekwenyi keneyontet ye kosom mekeyontet?

<sup>13</sup>Kunyo nteye oŋnket akwek piko cu oyiku miyotec okoci lekokwok tukuk ce toponec, ku aret cetya nyun ce muce kukoci Papa nyepo torot Muyet Nyetilil piko ce kosom!”



- 14**Kukwet Yesu om yoto oyinot nye kiponto cito nye kinamakay kutit, nteye kowo kuwecikey oyinoto, kucec kuñalal cicoto, yoto kukite piko koromun.
- 15**Ntene kumwoy piko alake kule, “Yiyisye neto Pelsepul nyewo nyepo oyik sukuñet kukwet oyik.”
- 16**Yoto kusyem piko alake kumac kule kokonec Yesu pelutyet nye cone torot.
- 17**Ntene kunket Yesu kasoteywekwa, kumwoci cek kule: “Poytoyisyo ake tokol nye pciykey oñkuporyekey nkit komuce nyo kupot, nto koto ake tokol nye pciyekey oñkuporyekey nkit kulule koyoto.
- 18**Kunyo nteye pciyat Setani onkuporyekey nkit, kuyonye kulene poytoyisyenyi? Omnye omwowu akwek kule oyiyisye ani Pelsepul sañet amuc akwet oyik.
- 19**Nteye oyiyisye ani Pelsepul sañet amuc akwet oyik, kunyo yiyisye ño pikwakwek sukuñet kukwet oyik? Kunyo cekto ce mosukomutwok akwek musankut.
- 20**Nteye oyiyisye ani swametap Yiyintet sañet akwek oyik, kuporkey manta kule kucontyok akwek poytoyisyetap Yiyintet.
- 21**Ye Ponto cito swama oko karik ce ripe kanyi, kuripotin oñkukonorotin tukukyi topon.
- 22**Ntene ye kaco citake nye ponto swamet kupël nyenyi oñkuporye kot kupël cicoto, mosukunumune karik co kekenekey oñkusut kupör tukukap cicoto.
- 23**Ci tokol nye puryo kot cepontekey oko ani, ku cito nyoto nye toyo ani, nto mpo cito nye puryo kot cirurukisi tukway oko ani, ku cito nyoto nye serete.”
- 24**“Ye kowete oyinoto nye miyat cito, mosukuwesetot kupunte koret wule puryo peko kuceñoti wule möce kule komuñe, nteye puryo kot kunyor, mosukumwoy nkit kule, ‘Mosaketitekey ani awo konyu nyo kyocone.’
- 25**Mosukuketkey kuco, nteye kocokunyor kicipuc oñkyesat topon.
- 26**Yoto mosukuwo wokukwer oyik alak tisap ce miyotec kupël neto, kukwa oñkwokowut orit oñkumiñis wuloto; mosukuwur yoto kopurtap cicoto nyepo letut kupël wule kiyunto kopurnyi nyo kipo kunyo.”
- 27**Nteye kimite Yesu kumwowu ñalecato, kukurune korket ake kwenutap piko kumwoci Yesu kule, “Derekat nye ponto kupeyoy moyet nye kiyiñ nyi, oko kitik ce kireri nyi!”
- 28**Ntene kuwec Yesu kumwoy kule, “Topon ye kocemwoy kule, Dërekotin kuponto kupeyok piko co lime ñolyontetap Yiyintet oñkurip!”
- 29**Nteye kimite piko korurucekey wanak, kutosyikey Yesu kumwoy kule, “Pikap pini kuce piko cepo pinta nye miyat! Omnye tepe cek pelutyet, ntene puryo pelutyet nye mocikoci, tos pate palutyetap Yona.





- 30 Kuyu Yona nye kikwek pelutyetap pikap Nenefi, Kuyunyoto musokwek Weritap cito pelutyetap pikap pini.
- 31 Om pesyetap musankut, mosukuyo korko nye Kinko nye cone koretap tö oṅkuwosontyi pikap pini, oṅkomutyi musankut kulot cekto, omnye kicone korkono tapantap koret kule cakäs ṅomnonetap Solomon; kunyo möce akäs akwek kule mite yu nyewo nye pële Solomon.
- 32 Om pesyetap musankut, mosukuyon pikap Nenefi, oṅkumutyi musankut pikap pini, omnye kirenynkey cek pikap Nenefi kwasta miyotyoni kwa om ṅalek ce kimwoci Yona. Kunyo möce akäs akwek kule, mite yu nyewo nye pële Yona!”
- 33 “Puryo ci nye pele tarit oṅkutore wule wuṅat, nto kukupuye pesenit, ntene tore kito nye yonje tarit, sukuṅet piko co kwoni ko kukäs lakweyet.
- 34 Koṅnta nyeṅuṅ kunye taritap porto nyeṅuṅ. Ye topon koṅnta nyeṅuṅ, mpo porto nyeṅuṅ tokol kuponto lakweyet, ntene ye miyat koṅnta nyeṅuṅ, mpo porto nyeṅuṅ tokol kuponto menonet.
- 35 Möce ripkey oṅnkikäs kule lakweyinto nyo ponte nyi kunye puryo kot ku menonet.
- 36 Kunyo ye ponto porto nyeṅuṅ tokol lakweyet nye puryo kot kuponto kereryantet ake menonet, mosukwek porto nyeṅuṅ tokol nye ponto lakweyet kuyu wule loytoy tarit nye loye topon kukwenyiṅ nyi lakweyet.”
- 37 Nteyu kowo kuṅalal Yesu okoy kuwany. Kukur Farasoyintet ake Yesu wokwomis tukway om kanyi. Kuwo Yesu oṅkuwokopur ṅony kwomis.
- 38 Kukite Farasoyintonoto yu kowo kukäs kule komis Yesu nye puryo kot kowun yewuniyekyi.
- 39 Yoto kumwoci Mokoryontet Yesu neto kule, “Po manta kule akwek Farasayek! Osite topon cikomponik oko saninek saṅ, ntene om montuwokwok orit kunyitotin nyapanatet oko miyotyet.
- 40 Akwek solonocu! Yiyintet nyo kikwiye saṅ kupuryo kot ku neto nye kikwiye mpo orit?
- 41 Ntene okoyite akwek kokotutek cepo tukuk ce kwone montuwokwok orit, sukuṅet kutililitu mpo tukuk tokol om wule omite akwek.
- 42 “Ntene omite kwapi akwek Farasayek! Omnye okocini Yiyintet akenke nyepo taman cepo nkuyek alak tokol, kuyu munyanyinek oko mutunkurunek, ntene oṅnkoyaste morwoc topon, oṅkotay mocäm Yiyintet. Roke oyiye coto, ntene monte kot ayaste tukuk alak.
- 43 “Omite kwapi akwek Farasayek! Omnye ocöme ṅecerok ce kweyotin ce mite kotapkok, oṅnkiyweyak cisupayak topon om moteponik.
- 44 Omite akwek kwapi, omnye okerkeyekey mwenonik ce kicetupci piko ce puryo kot kutoku ce tyikoti piko nye menkete.”



<sup>45</sup>Kuwekyi konetintet ake nyepo ntarastinek kumwoci Yesu kule, “Konetintet, ye kemwowu nyi n̄aleca kukecupec mpo acek.”

<sup>46</sup>Kuwekyi Yesu kumwoci kule, “Omite kwapi mpo akwek konetikap ntarastinek! Omnye otorcini piko terekok ce nyikisec ce puryo kot komuce kot kutor, ntene oṅnkupuryo kot onöme akwek morin terkocoto!

<sup>47</sup>Omite akwek kwapi! Omnye kipakäc mpo kukomwoṅ workoyik; atec akwek kunyol mwenonik co kicetupci cekto.

<sup>48</sup>Oyiku akwek muncururwanikap n̄alecutecu, omnye ocöme akwek nkit n̄alecato kikwiye mpo kukomwoṅ, kipakäc cek workoyik, atec akwek mwenonik co kicetupci.

<sup>49</sup>Kunyo om n̄alecutecu, kumwoy ṅomnonetap Yiyintet kule, ‘Mosoyokte ani workoyik oko kiyokik alak kupa wule mite cekto, mosukupar cek alak om picoto, oṅnkutaṅany alak.’

<sup>50</sup>Kunyo mosicitaṅany pikap pintap pesyosyecu kuyok korotikap workoyik co kicepakäc kupok kuceke ye kicitany koret.

<sup>51</sup>Kuceke korotikap Apel okoy korotikap Sakariya nyo kiceporci kwenutap otepto nye cepele korosek oko otepto nyetilil. Komwowok ani n̄alek cepo manta kule, mosicitaṅany pikap pintap pesyosyecu om n̄alecato tokol!

<sup>52</sup>“Omite akwek kwapi konetikap ntarastinek! Omnye kyokonor akwek funkuwet nyo yote kotap ṅomnonet; oṅnkupuryo kot awut akwek orit, ntene oṅnkokerekte piko alak ce syeme kule ciwut orit!”

<sup>53</sup>Nteye kinomene Yesu om wuloto, kunyer koromun Farasayek oko konetikap ntarastinek, kutepe cek Yesu om swama n̄alek ce caṅ;

<sup>54</sup>kusyem kule cetec neto sukuṅet cenäm om ṅolyo ake tokol nye cone kutinyi nye miyat nye mosukumwoy.

## Luka 12

<sup>1</sup>Koruruckey om yoto piko elifunek ce caṅ koromun, okoy kutyickey cek nkit. Kunyosyo Yesu kuṅololyi kumwoci kule, “Oripkey mumarekap Farasayek ce kaperperot cekto.

<sup>2</sup>Omnye puryo kiy nye yelat yawut nye puryo kot ceṅonye koyin kutok, oṅnkupuryo kiy nye wuṅat yawut nyemo ciporu koyin kutok.

<sup>3</sup>Kunyo nka mpo n̄alek ce kyonolole wule wuṅat, mosicelim coto ye pet kwen; mpo n̄alek co kyocome korik orit, mosicemwayta cekurte korik kisyek.”

<sup>4</sup>“Komwowok ani akwek coronutekwani kule, monte ciywey piko co poköce porto nkit, nto om letut kupuryo kot komuce kwiyo kito ake tokol nye miyat.



- <sup>5</sup>Kunyo mosoporwok ani cito nye roke aywey akwek. Aywey Yiyintet nyo ye kapakac kuponto kamukeywek kuwircin wule mite mata nye momise. Kunyoto nye omwowok ani akwek kule aywey neto.
- <sup>6</sup>Puryo kot kyole cek titiyinek mut tampuranik oyeny? Nto om konyekap Yiyintet kupuryo kot ceyutye cek mpo akenke?
- <sup>7</sup>Nka mpo putekap metewokwok kiciyit tokol. Kunyo monte cemuye, omnye oponte akwek latik ce caṅ koromun kupel titiyinek ce caṅ.’’
- <sup>8</sup>“Komwowok ani akwek kule, ci tokol nye kaṅalal kutor om wule mite piko kule oyiku nyimwani, mosukuparta kutor Weritap cito neto nyoto koyin om taytap malaykanikap Yiyintet.
- <sup>9</sup>Ntene ci tokol nye katay maṅalal kuparta ani Weritap cito om wule mite piko, mosicetay mociparta neto nyoto koyin om konyekap malaykanikap Yiyintet.
- <sup>10</sup>“Mosaicalya ci ake tokol nye kaṅalale kwapi Weritap cito ntene puryo kot cimuce kot cikalya mpo kisic ci ake tokol nye kaṅalale kwapi Muyet Nyetilil.
- <sup>11</sup>Nteye kocekwerok akwek wocewosontyok om korikapkok nto om taytap piko co ponto kamukeywek, nto om taytap poyik, monte cisot kule mosiceṅalal kulene, nto kule mosicemwowu ne ye ceyetekey.
- <sup>12</sup>Omnye mosukunetak akwek Muyet Nyetilil om yoto ṅalek ce mosomwowu.’’
- <sup>13</sup>Kuṅalal citake om kwenutap piko kumwoci Yesu kule, “Konetintet, mwoci yeyamwani cepcicine oko ani tukuk ce kipokokwec acek Papanyo.’’
- <sup>14</sup>Kuwekyi Yesu kumwoci neto kule, “Corwenyu, ṅo nye kikono ani oyiku ketintemwoṅ nto pciyintemwoṅ?’’
- <sup>15</sup>Yoto kumwoci Yesu piko tokol kule, “Akaste, oripkey akwek wule mite corokyinot ake tokol, omnye nka kot kuponto cito mokoryonti nye tya, kupuryo kot kumuce kokoci cicoto tukucoto ponto soponto.’’
- <sup>16</sup>Kumwoci Yesu cekto tyonkoconi kule, “Kiponto mokoryontet ake mparenyi nye kiyiwu kurur topon koromun,
- <sup>17</sup>kusot om moyenyi nkit kumwoy kule, ‘Mosayiy ne ani? Omnye puryo kot oponte wule mokisyi omikyu cu tokol.’
- <sup>18</sup>Kumwoy nkit kule mosayiy kule, ‘Mosopot cokenikwani aṅnkatec alak cewoyec, saṅet akonore wuloto omikwani tokol oko tukukwani alak;
- <sup>19</sup>nto kapok omwowu nkit om moyenyu kule, ponte nyi tukuk ce caṅ ce konorotin ce mosukuwany kenysisyek ce caṅ, kunyo muny, yesye, yomisye, oṅkniṅerec.’
- <sup>20</sup>Ntene kumwoci Yiyintet cicoto kule, ‘Nyi perperyani! Om kwomwowuni po yawut, mosicinumuneniṅ sopenṅuṅ, kunyo mosukupoyit ṅo tukuk coto kikonor nyi?’



- 21**Kuyunyoto wule yunto om wule mite cito nye konorkyinikey mokoryonti, ntene oṅkupuryo kot ku mokoryo om wule mite Yiyintet.”
- 22**Kumwoci Yesu konomikiy kule, “Yunyoto omne saṅet ani omwowok akwek kule, monte cisot saponwekwok kule mosikyam ne, nto kule mosicilac ne.
- 23**Omnye pële soponto omik, oṅkupële porto sirok.
- 24**Akäs pa pkukinek ce puryo kot kukolsyi nto kukisis, ce puryo kot kuponto wule konore omik nto mpo cokenik, ntene oṅkupoye Yiyintet cekto! Oponte akwek latik ce caṅ kupël toritek!
- 25**Do om akwek nye ye komuy oṅkusot koromun ce nöme sapon nyi; nye muce kot kutosyi kucaṅit kenysisyek alak cepo sapon nyi?
- 26**Kunyo nteye puryo kot omuci akwek kot ayiy kiy nye kisic nye yunyo; omne sasoti akwek ce nöme tukuk alak?
- 27**Akäs pa kuyu wule pititoy taptok om koret, puryo kot kwiyisyi oṅkupuryo kot kunope sirok ce loce. Ntene komwowok ani akwek kule, nka mpo Solomon om woyintap mokoryontit nye kiponto, kipuryo kot kulocekey neto topon kuyu akenke om toptocu.
- 28**Kunyo, nteye muce Yiyintet kot kulac suswek ce mite koret pesyoni nto mite tun cewirci mata kuloy, ku aret ce tya nyun ce muce kulacak akwek Yiyintet? Oyiku akwek pic ce ponto koyenet nye kisic pate!
- 29**Kunyo monte ceceny kiye mosoyam nto ce mosoye, monte cisot.
- 30**Omnye cenye mpo pikap koret tokol tukucutecu: ntene om wule omite akwek, nkete Papamwoṅ kule omöce akwek tukucutecu.
- 31**Kunyo onyosye aceny oṅkokoci kunyor saponwekwok poytoyisyetap Yiyintet, sukuṅet cetoswok akwek tukucutecu.”
- 32**“Monte cemuye akwek luket nyi miniṅ! Omnye ṅerekat Papamwoṅ kokonok akwek poytoyisyet.
- 33**Oyalye tukukwok oṅkokoci pononik pesanik, oṅkokonorkyikey akwek munyenkutap pesanik nye puryo kot kuyositu kupunto, okonore mokoryontinekwok torot wule puryo kot kurice corik oṅkupuryo kot kwome solopik.
- 34**Omnye wule mitowune mokoryontinekwok ku wuloto wule mitowune mukuleywekwok.”
- 35**“Omoty sirokwok suwe, oṅkoyaste tarinekwok kuloytos;
- 36**akerkeyitu pic ce mite kukonye mokoryontemwa nye mosukuwecekey kucone sakwetap komütisyet, nteye kaweckey neto oṅkukonykony kurket kuyotyini lakwar.



- <sup>37</sup>Ponto kupeyoy mutworik co ye kaco mokoryontemwa cokunyor cekto kumite kukösu kukenisiyi! Komwowok ani akwek ñalek cepo manta kule, mosukuco cicoto wo; oñnkucokulackey oñnkusat cek kopur ñony topon oñnkupoyis.
- <sup>38</sup>Ponto kupeyoy mutworik ce ye kaco nyewo panta nyepo oyeny ye komoy kwen oko panta nyepo somok ye kerir koret cokunyor cekto kumite kuyunyoto.
- <sup>39</sup>Möce oñnket akwek topon kule, ntenkete citap koto sawet nye cone corintet nto puryo kot komuce cicoto kupapakta konyi kuput oñnkowut orit corintet.
- <sup>40</sup>Kunyo mpo akwek misyini oiyitekey, omnye mosukuco Weritap cito om sawet nyo puryo kot osotyini akwek kule muce kucone.”
- <sup>41</sup>Kumwoy Petero kule, “Mokoryontet, mwowec acek nkit tyonkoconi nto mwocini mpo piko tokol?”
- <sup>42</sup>Kuwekyi Mokoryontet Yesu kumwoci kule, “Mwowo ani pa, ño mutworin nye cikenekey oñnkuñom? Nyoto kunye ye kokukoci mokoryontenyi kurip yisyonutepak kanyi tokol, kupcicini pikap yisyet omikwa om pesyet nyo cemokyini.
- <sup>43</sup>Ponto kupeyoy mutworintonoto nye ye kaco mokoryontenyi cokunyor neto kwiye yisyenyi kuyunyoto.
- <sup>44</sup>Komwowok ani akwek ñalek cepo manta kule, mosukuco mokoryontet oñnkukoci mutworintonoto kupayta tukukyi tokol.
- <sup>45</sup>Ntene ye kumwoy mutworintet om moyenyi kule, tokulow ye mosukuco mokoryontenyu, oñnkucec kupir piko moronik oko koruk co yiyisiyi, oñnkwomis oñnkuyesyoy kupokit,
- <sup>46</sup>mosukupun mokoryontenyi om pesyet nyo puryo kot kusotyini, oñnku om sawet nye puryo kot kunket neto, oñnkunäm mutworintonoto kuyepune oyeny, oñnkuwunukyi kunyor tañanynta wanak oko piko co puryo kot kucömisyyi.
- <sup>47</sup>“Nto mutworin nye nkete ce möce mokoryontenyi kule kwiy neto; oñnkupuryo kot kusat nto kwiy kuyu wule moktoy mokoryontet, mosicepas neto nyoto korokonik ce cañ.
- <sup>48</sup>Ntene mutworin nyo puryo kot kunket ce moce mokoryontenyi oñnkwiyy ce roke ce pase, mosicepas neto nyoto korokonik ce ñeri. Nto ci tokol nyo kicikoci ce cañ, mosicemake neto nyoto koyin ce cañ, nto cito nyo kicikoci kurip tukuk ce cañ, mosicemake neto nyoto koyin ce cañ kutil coto.”
- <sup>49</sup>“Kyaco ani cowirci mata koret, kunyo nto nkonkuyunyi kumite kuloye!
- <sup>50</sup>Oponete patisanet nye mosicepatisana, kunyo matañany okoy koyin awany!
- <sup>51</sup>Komwowok ani akwek kule, osoti kule kyaco asutu kalyet? Puryo kot kuyunyo, ntene kyosutu pate pciyatet!
- <sup>52</sup>Kuceke yawut mosukupciyyey piko mutu cepo koto akenke, kutay piko co somok piko co oyeny, kutay piko co oyeny piko co somok.



<sup>53</sup>Mosukupciykey kwan oko werit, kupciykey werit oko kwan. Kupciykey kamet oko cepto, kupciykey cepto oko kamet, kupciykey kametitap werit oko korketap werinyi, kupciykey korketap werit oko kametitap santenyi.”

<sup>54</sup>Kuwekyikey Yesu piko oṅnkumwoci kule, “Ye kokäs akwek polik kumite raraktay, yoto omwowu akwek lakwar kule mosukuroopen koret, kuyuyit nyoto kuropen koret.

<sup>55</sup>Nteye kokäs kuwuse yomet nye cone tö, omwowu kule, mosukulay asista, kuyuyit nyoto kulay asista.

<sup>56</sup>Akwek koperperoticu! Yu oṅnket akwek okäs wule yunto tukuk ce mokwiyokis om koret parak, omne yu puryo kot omuci kot oṅnket ṅalek ce yiyoktos om pesyosyecu?”

<sup>57</sup>“Kunyo omne yu puryo kot omuci akwek kot orwoc nkit okoy oṅnket ṅalek cepo manta ce roke oyiy?

<sup>58</sup>Ye kowosontyiṅ citake kukweriṅ koti, syem koromun aṅalal olimncine oko cicoto ye tomite opeti om aran, oṅnkowany ṅalekwok, mente kot kukweriṅ okoy wule mite ketintet, kuṅet nyo kuratiṅ kukoytiṅ iwo wule mite sikarek, kuṅet co kukertiṅ mopusi.

<sup>59</sup>Komwowuṅ kule puryo kot mucu nyi cone mopusi mpo kisic okoy konu pesanik tokol.”

## Luka 13

<sup>1</sup>Kimite pesyosyecoto piko alak ce kimwoci cek Yesu ṅalek ce nöme pikap Kalilaya, ce kifar Pilato kupok oṅnkulinyo korotikwa oko korosekwa ye kimite cek kukoyitoy korosekwa.

<sup>2</sup>Kuwekyi Yesu kumwoci cek kule, “Osoṅti akwek kule kiponto picoto miyotyoniṅ kusir piko alak tokol ce kimite Kalilaya omnye kicitanyiṅ kuyunyoto?

<sup>3</sup>Puryo kot kuyunyo! Komwowok ani akwek kule, ye puryo kot arenynkey ayaste miyotyoniṅkwok, mosoyaran opoku mpo akwek tokol kuyu wule kyaranta kupok picoto.

<sup>4</sup>Nto osoṅti akwek kule piko co ki taman ok sisit co kilulyi koto om Siloam kupakäc kupok kuce piko ce kilelotin kusir piko alak tokol ce kiminye Yerusalem?

<sup>5</sup>Puryo kot kuyunyo! Komwowok ani akwek kule ye puryo kot arenynkey ayaste miyotyoniṅkwok, mosoyaran opoku mpo akwek kuyu wule kyaranta kupok picoto.”

<sup>6</sup>Kumwoci Yesu cek tyonkoconi kule, “Kiponto citake mokoywenyi nye kiwu rotinyi, kuco pesyet ake kule cakäs nto kukwiṅ omik, yoto puryo kot cokunyorta kiy.

<sup>7</sup>Kumwoci cicoto kopotintet kule, ‘Kenytap somok nyi aconi ani kule cekäs omikap mokoywoni, nteṅe puryo kot onyortoy kiy; kunyo yep kulul! Omne sokowurta kwam teṅek pate?’

<sup>8</sup>Kuwekyi kopotintet kumwoci cicoto kule, ‘Mokoryontet, yaste kopur keniyini pate okoy opoty ani omutu oṅnkokoci puresik.





- <sup>9</sup>Nteye kayiy omik om pesyosyek co kwoni; kunyol kutoponit nteye puryo, yep yoto kulul.’ ”
- <sup>10</sup>Kimite Yesu kunetisiye ye kipesyetap Sapat om kotapkokwet ake.
- <sup>11</sup>Kimite yoto korket ake nye kinäm oyinoto kumnyan kusyen kuwany kenysisyek taman ok sisit nye kiyim pate nye puryo kot komuce kot kuculkey mpo kisic.
- <sup>12</sup>Ntowo kukäs Yesu korkonoto, kukur kuco ye mite neto oñnkumwoci kule, “Cepyosyani, kacityaceniñ nyi rewonoteñuñ!”
- <sup>13</sup>Kukemer Yesu yewuniyekyi korkonoto, yoto pakenke kuñet kuyo oñnkuculkey oñnkucec kukasta Yiyintet.
- <sup>14</sup>Yoto kunerec nyewo nye poytoy kotapkok, omnye kisopis Yesu om pesyetap Sapat. Kumwoci cicoto piko kule, “Mite pesyosyek co lö co misyini ciyisye yisyonutek, kunyo okwoni kwocisopok om pesyosyecoto. Ntene monte cekwoni ye pesyetap Sapat.”
- <sup>15</sup>Kuwekyi Mokoryontet kumwoci cicoto kule, “Akwek koperperoticu! Puryo kot kutyoce citake tokol om akwek yeyinyi nto sikiryenyi kutyace pewut ye pesyetap Sapat oñnkukwer kuwo wokuye peko?”
- <sup>16</sup>Kunyo akäs pa korkoni nye mucokoretap Apram, nye kirat Setani neto kuwany kenysisyek taman ok sisit, kupuryo kot kumisyini cityokyi neto porokyi ye pesyetap Sapat?”
- <sup>17</sup>Nteyu kowo kumwoy Yesu ñalecato, kulilonis punikiyi, ntene kuñerec piko alake tokol om tukuk cepo kakitat ce kikwiye neto.
- <sup>18</sup>Kumwoy Yesu kule, “Kerkey poytoyisyetap Yiyintet oko kiy ne? Mosoyuyite ani kiy ne?”
- <sup>19</sup>Kerkey oko kupuswontetap ketit nye cekure kalitarit nye kinäm citake oñnkukol mparenanyi, kupit okoy kuwoyit kwek ket nyewo, kukwa toritek kwokutec korikwa sarisyekap ketoto.”
- <sup>20</sup>Kumwoy Yesu yec kule, “Mosoyuyite ani ne poytoyisyetap Yiyintet?”
- <sup>21</sup>Kerkey oko mumarek ce kinäm korket ake oñnkutankwar oko pusyekap nkanuk cepo tepenik somok kukut kunyiy tokol.”
- <sup>22</sup>Kunomen Yesu kuwo kupunte moñosyek oko soñwek kunetisyoti om pan nyi ye kiweti Yerusalem.
- <sup>23</sup>Kutepe citake neto kule, “Mokoryontet, ñeri so pate piko ce mocisop?” Kumwoci Yesu cek kule,
- <sup>24</sup>“Otitir osyem koromun opunte kurket nye maric; omnye komwowok ani kule, cañ piko ce mosukusyem kule ciwut orit, ntene puryo kot komuce cekto kot kowut.



- <sup>25</sup>Ye kotepe kot kuṅet citap koto oṅnkuker kurkenyi, oṅnkoyoṅe akwek saṅ oṅnkokonykony kurket omwowu kule, ‘Mokoryontet, yotwec acek kurket!’ Mosukuwekwok kumwoy kule, ‘Puryo kot oṅnketok ani akwek, okwone ono?’
- <sup>26</sup>Yoto mosowec akwek omwowu kule, ‘Kikyomisiyi acek wanak oko nyi, oṅnkinetisiye nyi soṅwekyacek.’
- <sup>27</sup>Mosukuwekwok yec cicoto kumwowok kule, ‘Puryo kot oṅnketok ani akwek, okwone ono? Aṅete taymwani akwek cu oyiye ṅalek ce miyotec!’
- <sup>28</sup>Tya yoto nyun rirek oko nyiyetap kelak ye kokäs akwek Apram oko Isaka oko Yakopo oko workoyik kumite cek wule mite poytoyisyetap Yiyintet, oṅnkurok yec omite akwek kacekwetyok saṅ!
- <sup>29</sup>Mosukukwane piko koṅasis oko raraktay oko makentany oko tö oṅnkwokopure yepo meset om poytoyisyetap Yiyintet.
- <sup>30</sup>Kunyo möce okäs kule piko co mite yawut letut kuce mosukwokupoyit tayta, nto piko co mite yawut tayta kuce mosukwokupoyit letut.’
- <sup>31</sup>Yoto pakenke kukwa Farasayek alake wule kumite Yesu oṅnkumwoci kule, “Det wete wuli, nomen wecikey poninekuk, omnye möce Erote kule apakäciṅ nyi.”
- <sup>32</sup>Kumwoci Yesu cek kule, “Ape womwoci mokoytina kule, ‘Mosakwet ani oyik oṅnkosop porwonik pesyoni oko pesyetap tun, nteye pesyetap somok awany yisyemwani.’
- <sup>33</sup>Ntene misyino awo poninekwani pesyoni oko pesyetap tun oko pesyetap koyin, omnye puryo kot komukoktos cepar kumeci workoyonto saṅ, nye puryo kot ku Yerusalem orit.
- <sup>34</sup>Opo! Yerusalem! Yerusalem! Nyi nyi poköci workoyik, oṅnkiwire rwontok piko co kiciyok kukwa wule mite nyi, om aret ce tya ye kyamac ani kule oruruc lekoku kukwa wule omite ani, kuyu wulo ruruktoy nkokyet lekoki koruruki kepepoki orit, ntene toyisiye nyi.
- <sup>35</sup>Käs pa kacepokokwok komwoṅ kwek kiratya. Kunyo komwowok ani akwek kule, puryo kot toköso ani akwek okoy pesyet nye mosomwowu kule, ‘Ponto kupeyoy neto nye cony om kaynetap Mokoryontet.’ ”

## Luka 14

- <sup>1</sup>Nteye kipesyetap Sapat, kuwo Yesu wokwomis omik om kotap Farasoyintet ake nye kipoytoyin. Yoto kurip piko kukäs Yesu topon koromun.
- <sup>2</sup>Kimite yoto po taytap Yesu citake nye kikokwa porto tokol.
- <sup>3</sup>Yoto kuwekyikey Yesu Farasayek oko konetikap ntarastinek oṅnkutepe cek kule, “Cöme ra ntarastinek cisop cito ye pesyetap Sapat nto puryo?”
- <sup>4</sup>Kusisio cek. Kunäm Yesu cicoto oṅnkusop oṅnkumwoci kuwecikey.



<sup>5</sup>Oṅnkumwoci cek kule, “Ye ponto citake om akwek werinyi nto yeyinyi oṅnkusuci kurumncō ye pesyetap Sapat, kupuryo kot kuweti lakwar wokocut ye pesyetap Sapat?”

<sup>6</sup>Yoto kupurune cekto kuwec ṅalecato.

<sup>7</sup>Nteyu kowo kukäs Yesu toyek ce kikweye oteputek ce tokunotin cepo tay, kumwoci neto piko tokol tyonkoconi kule,

<sup>8</sup>“Ye kokuriṅ citake sakwetap komütisyet, mente wopure otepto nye tokunot nyepo tay, omnye pesyet ake kokokukur cicoto kokuriṅ nyi citake nyewo kupëliṅ nyi kuco sakwanato.

<sup>9</sup>Mosukuco cicoto kokurok akwek tukway oṅnkucokumwowuṅ nyi kule, ‘Detyi otepto cito nyi!’ Mosecurokisyē nyi oṅnkiwo yec wepure otepto nyepo let!

<sup>10</sup>Ntene ye kocekuriṅ sakwet, iwo wepure otepto nye mite let, nteye kaco cito nyo kokuriṅ nyi, cokuṅetiṅ kumwowuṅ kule, ‘Corwenyu, co nyi yu po tay.’ Yoto nyoru nyi om yoto kayweyatet om wule mite piko co kopur tokol.

<sup>11</sup>Omnye ci tokol nye silekey kusutkey parak nkit, mosicirekune nyoto, nto ci tokol nyo yweyisyi kurektokey nkit, mosicilaṅnta nyoto.”

<sup>12</sup>Yoto kumwoci Yesu cicoto kokure neto cokwomis kanyi kule, “Ye kekur piko kukwa kwokwomis kaṅuṅ omikap pet, nto sakwa, mente okur pate mpo yeyauṅ nto tilyonutekuk, nto latosyekuk ce mokoren, omnye mosukukuriṅ nyi cek sakwet ake kuyokuṅ.

<sup>13</sup>Mente ayiy kuyunyo, ye keyiy sakwet, kur pononik oko piko co kipok kerekok, oko co mwolyos oko piko co koryotin;

<sup>14</sup>mesenyoru nyi kupeyok, omnye puryo kot kuponto cek picoto tukuk ce mokuyokuneniṅ nyi, ntene kuyokuṅ Yiyintet nyi om pesyet nyo ciṅete kotutune met piko ce toponec.”

<sup>15</sup>Nteyu kowo kulim ṅalecato citake nye kipontokey Yesu kwomisyi tokol om meset, kumwoci cicoto neto kule, “Ponto kupeyoy neto cito nyo mosukopur ṅony kwomis om poytoyisyetap Yiyintet!”

<sup>16</sup>Kumwoci Yesu cicoto kule, “Kimate citake nye kikwiyta sakwet, oṅnkukur toyek ce caṅ.

<sup>17</sup>Ntowo kupunto pesyetap sakwet, kuyokto cicoto mutworintenyi kuwo wokumwoci piko co kucekur kule, ‘Akwa, omnye kaceyiyta kiy ake tokol!’

<sup>18</sup>Yoto kucec ci tokol om picoto kicekure kuṅalal kumwoy kito nye kakereka neto maco. Kumwoy nyepo tayta kule, ‘Kwayal mparet kunyo misyini awo wakäs, kunyo osomiṅ kule kalya puryo kot aconi ani.’

<sup>19</sup>Kumwoy ake kule, ‘Kwayal yeyik taman ce potisyi, kunyo omite oweti kule wasyemnte yeyicato, kunyo somiṅ kule kalya puryo kot aconi ani.’



- <sup>20</sup>Kumwoy ake kule, ‘Kutomütisiy kirket, kunyo om ñolyontonoto puryo kot aconi ani.’
- <sup>21</sup>Yoto kuwo mutworintet wokumwoci mokoryontenyi ñalecato tokol, kunyer citap kayta, oñnkumwoci mutworintenyi kule, ‘Iwo sartekey lakwar wulo po orustunwek kacatanik oko arosyek ce minkec cepo moñet, oñnkikweru kukwa yu piko co pononik oko co kipok kerekok, oko co kikoryo, oko co mwolyos!’
- <sup>22</sup>Yoto lakwar kumwoy mutworintet kule, ‘Mokoryontet, kaceyiya tokol co kemwowu nyi, ntene oñnkutokupara koto.’
- <sup>23</sup>Yoto kumwoci mokoryontet mutworintet kule, ‘Iwo arosyek co mite koret sañ oko kacatanik wekur piko kukwa, sukuñet kunyiy piko komwani.’
- <sup>24</sup>Kunyo komwowok ani akwek kule, puryo mpo akenke om picoto kicekure nye muce kot kucemcem sakwemwani!’’
- <sup>25</sup>Nteye kimite piko ce cañ kupeti kurupe Yesu, yoto kuwekyikey neto piko oñnkumwoci kule,
- <sup>26</sup>“Ye kaco citake tokol wule omite ani oñnkupuryo kot kupciykey oko kwan oko kamet, oko korkenyi, oko lekokyi, oko mpo mutakwam, oko mpo cekwam, oñnkutaykey kunyilkey neto nkit kupuryo kot komuce nyoto kwek konomintemwani.
- <sup>27</sup>Nto citake tokol nye puryo kot komuce kukesen murtowontenyi oñnkunama cepetekey oko ani kupuryo kot komuce nyoto kwek konomintemwani.
- <sup>28</sup>Omnye ño om akwek nye ye möce kule atec koto nyewo koromun, nye puryo kot kunyosyi kopur ñony oñnkuyitis kule oponte pesanik ce ceyeme otekse kuwany koto.
- <sup>29</sup>Nteye puryo kot kwiy kuyunyoto, muce kucec kutekso; nteye puryo kot kuwany koyoto, mosukurorici neto piko alak co kiköse cicoto ye kicec kuteksi.
- <sup>30</sup>Muce kuñalal piko cut kunyil cicoto kumwoy kule, ‘Kicec cici kutekso ntene puryo kot komuc kuwany konyi’
- <sup>31</sup>Nto Kinko ño nye ye möce kule woporye Kinket ake, nye puryo kot kunyosyi kupur ñony oñnkusot kule omuci ra woporye Kinket nyin om sikarekap poryet elifunek taman ce oponte oñnkuponto nyin sikarekap poryet elifunek tiptem?
- <sup>32</sup>Ye kakäs kule puryo kot omuci poryet, mosukuyokto piko kutorokta nyin tokumite wule low, oñnkusom kumwoci kule, cesat kalyet pate.
- <sup>33</sup>Kuyunyoto om wule omite akwek, puryo kot komuce akenke om akwek akwek konomintemwani ye puryo kot kupakakta kwasta tukuk ce ponto.’’
- <sup>34</sup>“Topon misyontet, ntene ye komo kunomu, kupuryo kot kumite aret ake yec nye cimuce cewec kot kunom.
- <sup>35</sup>Ye puryo kot konomu misyontet kupuryo kot kuroke cinure teñek nto cekonor kwek nye cinure teñek, ciswortoy pate. Kunyo ci nye ponto yitik ce limnte, roke kulimnta!’’



## Luka 15

- <sup>1</sup>Nto mite pesyet ake, kukwa korurukikap mosoret ce caŋ oko piko co kicetay kwokorurukiye ye kimite Yesu kulimnta ŋalekyi.
- <sup>2</sup>Yoto kucec koŋunŋun Farasayek oko konetikap ntarastinek kumwoy kule, “Ɗerekyini cici piko ce kicetay oŋnkwoomis wanak oko cekto!”
- <sup>3</sup>Ntene kumwoci Yesu cek tyonkoconi kule,
- <sup>4</sup>“Nteye ponto citake om akwek keciyekyi pokol akenke, oŋnkupot akenke om coto, puryo kot kupokokyini neto surukwenet cut tomonwokik sokol ok sokol oŋnkuwo kuceŋat nyo potot okoy kunyor?”
- <sup>5</sup>Nteye kanyor kuŋerec oŋnkunām kukemer kat;
- <sup>6</sup>ntowo kupun kanyi kukur coronutekyi oko latosyekyi, oŋnkumwoci kule, ‘Onte ceŋerec tokol wanak oko ani, omnye kwonyoru keciyenye nye kukupot!’
- <sup>7</sup>Komwowok ani akwek kule, kuyunyoto mosiceŋerec om torot ye karenynkey cito akenke nye ponto miyoty kupēl piko ce toponec tomonwokik sokol ok sokol ce puryo kot kuroke kurenynkey.”
- <sup>8</sup>Nto yec kule, “Ye ponto korket ake silinkinek taman, oŋnkupot akenke, kupuryo kot kupele tarit, oŋnkopuc koto, oŋnkuceny topon kot tokol okoy kunyor.
- <sup>9</sup>Nteye kanyor, kukur kukwa wanak coronutekyi oko latosyekyi, oŋnkumwoci cek kule, ‘Onte ceŋerec tokol wanak oko ani, omnye kwonyoru silinkit nye kukupot!’
- <sup>10</sup>Komwowok ani akwek kule, kuyu nyoto mosukuŋerec malaykanikap Yiyintet ye karenynkey cito akenke nye ponto miyoty.”
- <sup>11</sup>Kutosyi Yesu kumwoy kule, “Kimite citake nye kiponto werikyiyeny.
- <sup>12</sup>Kumwoci werit nye miniŋ kwan kule, ‘Papa, ropkwo ani tukuk cecu.’ Yoto kupcici kwan werikyiyeny tukway tukukwa.
- <sup>13</sup>Nto om letutap pesyos ce ŋeri, koruruc werit nye miniŋ tukukyiyeny oŋnkunomen kuwu koret ake nye low.
- <sup>14</sup>Nteye kimite wuloto kuseret kowurta om aret nye miyat tukuk tokol. Nteyu kowo kwam kuwany tukuk tokol kunām rupet nyewo koronoto, yoto kunām pananiyantit lekwanato.
- <sup>15</sup>Kuwo wokwiyis yisyet kaytap citap koronoto, kukoci nyo kuwo wokwokis nkururwenik om kanyi.
- <sup>16</sup>Yoto kumac lekwanato kule ntayam sopiyonŋe perikap poroyonik ce kyome nkururwenik, ntene kupuryo ci nye kikoci neto kiy.
- <sup>17</sup>Om letut kusot nkit om kasoteywekyiyeny okoy kumwoy kule, ‘Ponto Papamwani pakasinek ce omisyiyeny okoy kupiyonŋe oŋnkuŋet omik, kunyi karik kupokokyo ani rupet wuli!’



- <sup>18</sup>Kunyo mosanjet oṅnkunomen awo wule mite Papamwani, oṅnkuwomwoci kule, Papa, kyawurte om wule mite Yiyintet oko om wule mite nyi.
- <sup>19</sup>Kunyo puryo kot tokumisyino cekureno ani weriṅuṅ; yiya ani pate oyiku akenke om pakasinekuk!’
- <sup>20</sup>Yoto kuṅet kunomen kuwo kaytap Papanyi. Nteyu kito kumite wule low karik kupunto kaytap kwan, yoto kukās kwan neto, nteye kotoköse kwan kurire oṅnkulapat kutoroc oṅnkuṅatut.
- <sup>21</sup>Kumwoci weroto kwan kule, ‘Papa, kyawurte ani om wule mite Yiyintet oko om wule mite nyi, kunyo puryo kot tokumisyino ani cekureno weriṅuṅ.’
- <sup>22</sup>Kumwoci kwan mutworintenyi kule, ‘Osutu lakwar siret nye topon koromun oṅnkolokyi, oṅnkokoci komolilyet mornenyi, oṅnkolokyi, kweyonik krenkokyi,
- <sup>23</sup>oṅnkokweru yeyito nye yakway kwayeny kyam ceṅerec acek.
- <sup>24</sup>Omnye kaco kusopot werimwani nye kikime, kikipot kunyi kotok.’ Yoto kucec kuṅerec cek tokol kwam sakwet.
- <sup>25</sup>“Ntene kimite yoto werit nyewo mparen, nteye kimite kuconi karik kupun ka, kulim polotet oko tumnto.
- <sup>26</sup>Yoto kukur mutworintet akenke oṅnkutepe kule, ‘Ḍal ne cu?’
- <sup>27</sup>Kumwoci mutworintet kule, ‘Kaco yeyaṅuṅ, kunyo kayeny Papaṅuṅ yeyito nye yakway omnye kaco yeyaṅuṅ kusopot.’
- <sup>28</sup>Ntene kunyer werit nyewo okoy kutay nye mowo koto orit. Kumiṅ kwan kuco saṅ oṅnkusaysay kumwoci kule, ‘Co ko orit!’
- <sup>29</sup>Kuwekyi werit nyewo kumwoci kwan kule, ‘Om kenyisyek tokol kyoyiwuṅ ani mutworyontit nye puryo kot otowuṅ ṅolyo mpo akenke, ntene puryo kot kono ani nyi mpo kucontet nye kayam aṅerec wanak oko coronutekwani.
- <sup>30</sup>Kunyi kaco yawut weriṅuṅyi nye kikuseret tukukukyi kowurte koruk cemoronisyek kunyi keyeṅnkyi nyi neto yeyito nye yakway!’
- <sup>31</sup>Kuwekyi kwan kumwoci neto kule, ‘Wenyo, cepontekey acek oko nyi okokoy, kunyo cekukyi tukuk tokol ce oponte ani.
- <sup>32</sup>Kunyo nyolyini ceṅerec acek wanak tokol, omnye kaco yeyaṅuṅ nyitenyi kikime kusopot, kikipot ntene kacenyoru neto yawut’.”

## Luka 16

- <sup>1</sup>Kumwoci Yesu konomiky kule, “Kimate citake nye mokoryo nye kiponto ripintet nye kipoytoy tukukap cicoto mokoryo, yoto cemwoci piko alake cicoto mokoryo kule, ‘Wurtoy ripinteṅuṅ tukukuk.’





- <sup>2</sup>Kukur cicoto ripintenyi oṅnkumwoci kule, ‘Dal ne cu olimnciṅ ani nyi? Yitwo ani tukuk tokol co kweripe nyi! Omnye kemeyiku nyi yec ripin.’
- <sup>3</sup>Kumwoy ripintonoto nkit om moyenyi kule, ‘Mosayiy ne ani? Omnye kokunumuneno mokoryontenyu yisyetap ripset, kunyo puryo kot oponte swamet nye opotisye, oṅkoliloni ye mosomote.
- <sup>4</sup>Kumwoy kule, oṅnket kito nye mosayiy, sukuṅet ye kacinumuneno yisyetap ripset kuṅerekyo ani piko ye kowo korikwa.’
- <sup>5</sup>Yoto kukur ripintonoto ci ake tokol nye kiponto pesentap mokoryontenyi, oṅnkumwoci nyepo tayta kule, ‘Yociṅ nyi mokoryontemwani ata?’
- <sup>6</sup>Kumwoy nyo kule, ‘Ntepenik pokolwokik oyeny cepo mwayitap uto.’ Kumwoci nyo kule, ‘Oṅyi kartasiṅuṅ, pur ṅony lakwar oṅnkisil pokol pate.’
- <sup>7</sup>Nto ake kutepe kule, ‘Ntenyi ceyociṅ ata?’ Kumwoy nyo kule, ‘Kuniyanik cepo nkanuk sosom.’ Kumwoci nyo kule, ‘Oṅyi kartasiṅuṅ, sil tiptem oko mut pate.’
- <sup>8</sup>Kukasta mokoryontenyi ripintonoto puryo kot kupo manta omnye kikwiy kiy nyepo ṅomnon; omnye ṅomec pikap koroni om wule yiytoy tukuk ce nöme cekto kupël piko cepo lakweyet.’
- <sup>9</sup>Kutosyi Yesu kumwoy kule, “Kunyo omwowok ani akwek kule, anäm coronutek om mokoryontitap tukuk ce miyotec cepo koret, nteye kapok coto, ceṅerekyok akwek akwa kayita nye ominye okokoy.
- <sup>10</sup>Ci tokol nye cikenekey om tukuk ce tukusic, kunye cikenekey mpene nyoto om tukuk ce caṅ; nto ci nye puryo kot kwiye cepo manta om tukuk ce tukusic, kupuryo kot kwiye neto nyoto cepo manta om tukuk ce caṅ.
- <sup>11</sup>Kunyo nteye puryo kot cimuce cikenenokey akwek ye morip mokoryontitap tukukap koret, ku ṅo nye muce kukenenokey akwek kukonok orip mokoryontit nyepo manta?
- <sup>12</sup>Nteye puryo kot cikenenokey akwek om tukuk cepo citake, ku ṅo nye muce kukonok akwek tukuk ce cikwakwek nkit?
- <sup>13</sup>“Puryo mutworin nye muce kwek mutworintetap mokorenik oyeny, omnye muce kusenker ake oṅnkucäm ake; nto muce kuywey ake oṅkunyil ake. Puryo koto mucu akwek oyici yisyet Yiyintet oko mokoryontitap koret.”
- <sup>14</sup>Yoto kulim Farasayek ṅalecato tokol, kucasekey cek Yesu omnye kicöme cek mokoryontit koromun.
- <sup>15</sup>Kumwoci Yesu cek kule, “Akwek kuce oportoykey om konyekap piko kule oyiye ce toponec, ntene nkete Yiyintet mukuleywekwok orit, omnye tukuk co kostoy piko kule ponto latik, kuce tukuk ce puryo kot kuponto latik coto mpo kisic om konyekap Yiyintet.



- 16“Okoy kupun pesyosyekap Yowana, kimate yoto kwiyisi ntarastinekap Moses oko ñalekap workoyik, ntene kuceke yoto okoy pesyosyecu; cemite yawut cemwoytoy lokoywek ce toponec cepo poytoyisyetap Yiyintet. Kunyo mite ci tokol kutitire kule owut orit.
- 17Muce kupok wulin po torot oko ñony, ntene puryo kot komukoktos mpo kisic kot cinum nyukutet akenke nyepo ntarastinek.
- 18“Ci nye kakwet korkenyi, oñkomüt ake kakwiw cito nyoto sakwayanat, nto ci nye kemüt korko nye kikwet santenyi, kakwiw mpo cito nyoto sakwayanat.”
- 19Kutosyikey Yesu kumwoy kule, “Kimate citake nye kimokoryo; nye kiloce sirok ce toponec coronec oko celelac, nye kinerekyinikey pesyosyek tokol om mokoryontinyi.
- 20Kimate mpo yec pananet ake nye cekure Lasaro, nye kiponto serkecek ce kinäm porto tokol, nye kicesutu kuco cokopure yepo kurketap mokoryontet.
- 21Kimöce Lasaro kule ntoyome sipiyöñe omik ce kileleku kosuwune mesetap mokoryontonoto. Kikwoni mpo ñokik yoto kwokumele serkecekyi.
- 22Yoto kume pananetkey, kusut malaykanik neto okoy kupunto komostap Apram om torot wule kimate sakwet. Yoto kume mpene mokoryontet, cemuy.
- 23Nteye kimate mokoryontet kapkompic kunyor tañanyntap mwoninto, yoto kunyal torot okoy kukäs Apram kumite wule low, oko Lasaro nye kimate kepure yepo komosnyi.
- 24Yoto kukursyo kumwoy kule, ‘Papa, Apram kalya rirena ani, yoku Lasaro kuco cokowute walyitap mornenyi peko oñkutise ñelyepmwani, omnye omite tañanynta om wuli mite mayi loye!’
- 25Ntene kumwoy Apram kule, ‘Wenyo, möce sot oñkinket kule, kinyoru nyi tukuk cepo soponto nye topon om spononñuñ tokol, kuyu wulo kinyor Lasaro tukuk cepo soponto nye miyat, ntene kunyo mite Lasaro yawut om wuli soponto nye topon, kunyo mite nyi tañanynta.
- 26Kunyo kumite ñalekyo yo, kunyi mite mwenet nye kiwo ñony koromun nye mite kwenunyacek oko akwek, nye puryo kot kumuce kwoy kukwa wulo piko cekwone wuli ce mite acek, oñkupuryo kot kumuce kwoy kukwa wuli piko cekwone wulo omite akwek.’
- 27Kumwoy cicoto kimokoryo kule, ‘Kunyo osomiñ ani nyi Papa Apram kule, yokte Lasaro kuwo kaytap papamwani,
- 28omnye oponte ani mpo yeyamwani mut, kunyo kuwo neto oñkuwokusowu cek koromun mente kot kukwa mpecek wuli mite tañanyntap mata!’
- 29Kumwoy Apram kule, ‘Puryo kot kuyunyo, omnye ponto mpo yeyañuñ Moses oko workoyik ce muce kumwoci ñalek, kunyo misyini kulimnci cekto coto ñalek.’



<sup>30</sup>Ntene kumwoy cicoto kule, ‘Puryo kot kuyunyo, Papa Apram; omnye ye ketutune met citake oṅkuwo wule mite cekto; mosukurenynkey.’

<sup>31</sup>Ntene kumwoci Apram neto kule ‘Ye puryo kot komuce cek kot kulimnci Moses oko workoyik, kupuryo kot komuce mpo kucām nka kot ketutune met citake.’ ”

## Luka 17

<sup>1</sup>Kumwoci Yesu konomiky kule, “Mosukutok tukuk ce noce kuwec piko kwiw miyotyeyet, ntene mite kwapi cito nyo sutu kwiwokis tukucoto!

<sup>2</sup>Roke ceroty katitap cicoto rwantetap paka oṅkyewirci ruretyet orit, kusir ye kotokoyostoy cicoto kuwurta piko ce tinimnkec ceyucu kwiw miyotyoy.

<sup>3</sup>Oripkey! Ye koyiwuṅ yeyanuṅ miyotyonyik, polyi neto, nteye karenynkey kalye.

<sup>4</sup>Nteye koyiwuṅ nyi neto miyotyeyet aret tisap om pesyet akenke, oṅkuwo wule mite nyi aret tisap cokumwowu kule karenynkey, misyini kalye.’ ”

<sup>5</sup>Kumwoci kiyokik Mokoryontet Yesu kule, “Toswec acek koyenet.’ ”

<sup>6</sup>Kuwec Mokoryontet kumwoy kule, “Nto yunye oponte akwek koyenet nyewo kuyu kupuswontetap ketit nye cekure kalitarit, nto mucu kot omwoci ketit mokoywet kule, ṅeyakisy kirinta nkit, oṅkiwo wepite ruretyet, kulimwok akwek.’ ”

<sup>7</sup>“Nteye ponto citake om akwek mutworintet nye potisyi nto nye okisyi kecirek, ye kacone mparen nto yecey, mucu nyi pa mwoci kule, ‘Sorukey lakwar cepur ṅony oṅkiyomisye?’

<sup>8</sup>Puryo kot kuyunyo! Ntene mwocini nyi kule, ‘Yosye omikwani kiny kunyo, oṅkipaya kot oyomisye oṅkoyesye ani, nteye kawany, yomisye oṅkiyesy nyi om letut!’

<sup>9</sup>Kunyo puryo kot kumisyini cikasta mutworintonoto omnye kakwiw yisyet nye cemokyini kwiw? Puryo kot kuyunyoto?

<sup>10</sup>Kuyunyoto mpo akwek; ye kawany oyiy yisyet nye kucemokwok kule oyiy, omwowu kule, ‘Ciku acek mutwor ce puryo kot kuponto latik, omnye kukiw yisyet nye kucemwowec kule ayiy.’ ”

<sup>11</sup>Nteye kiweti Yesu Yerusalem, kuwo kupunte kwenutap koretap Samariya oko Kalilaya.

<sup>12</sup>Ntowo kupun moṅet ake, kutuye neto piko taman ce kiponto mutyenkenik. Kuyone picoto wule low,

<sup>13</sup>oṅnkukursyo kupol kumwoy kule, “Mokoryontet Yesu, rirenec acek!’ ”

<sup>14</sup>Nteye kotoköse Yesu picoto kumwoci cek kule, “Ape woporcikey tisik.’ ” Nteye kimite picoto kupeti om aran kusopco tokol.



- <sup>15</sup>Ntowo kukäs akenke om picoto kule kosop, kuweckey kuco kutumon om kutit nyewo kukostoy Yiyintet.
- <sup>16</sup>Kuco okoy cokoputyi yepo krenkokap Yesu oñnkukasta kumwoci kule, keyiy topon. Cicoto kunye ki Samariyantet.
- <sup>17</sup>Yoto kuñalal Yesu kumwoy kule, “Kopuryo kot cisop piko tokol ku taman, onto cut sokol?”
- <sup>18</sup>Puryo mpo akenke nye kaweckey kuco cokukasta Yiyintet, tos pate tontoni?”
- <sup>19</sup>Kumwoci Yesu cicoto kule, “Dete yony, oñkiwecikey kokusopiñ nyi koyeneñuñ.”
- <sup>20</sup>Kutepe Farasayek alake Yesu kule, “Coni pesyo ne poytoyisyetap Yiyintet?” Kuwec Yesu kumwoy kule, “Puryo kot kuconi poytoyisyetap Yiyintet cekosonu ye coni.
- <sup>21</sup>Puryo kot cimuce cemwoy kule, ‘Akäs oñyi mite yu! Nto oñyin mite yun!’ Omnye ñalek cepo manta kucu kule, mitowune poytoyisyetap Yiyintet wule omite akwek.”
- <sup>22</sup>Yoto kumwoci Yesu konomik kule, “Mosukuponto pesyet nye mosomac akwek kule nto cekäs akenke om pesyosyekap Weritap cito, ntene puryo kot omuci yoto kot okäs.
- <sup>23</sup>Mosukumwowok akwek piko alake kule, ‘Akäs oñyi mite yu! Nto akäs oñyin mite yun!’ Monte cirway arup picoto.
- <sup>24</sup>Kuyu wulo kweñntoy kaweketap ilet koret parak kuceke tapan okoy tapan; kuyunyoto wule mosukwiytakey pesyetap Weritap cito.
- <sup>25</sup>Ntene mosukunyosyo kutañany koromun, oñkutay neto pikap pintap pesyosyecu.
- <sup>26</sup>Kuyu wule kiyunto om pesyosyekap Nuwa, kuyunyoto wule mosukwiytakey om pesyosyekap Weritap cito.
- <sup>27</sup>Omnye kimite piko om pesyosyecoto kipo Nuwa, kwomisyi oñnkuyesyi, kukesyi komüte moronik koruk oñnkyimüte koruk okoy pesyet nyo kiwute Nuwa rapet, yoto kutumnkey peko oñnkupakäc piko tokol.
- <sup>28</sup>Mosukwiytakey mpo wule kiyunto koret om pesyosyekap Lot, ye kimite piko tokol kwomisyi, oñnkukesyi komüte moronik koruk oñnkuteksi korik.
- <sup>29</sup>Nto om pesyet nye kiñete Lot kuwete Sotom; kuropen mata oko rwontok ce loyotin om torot oñnkupel kupakäc kwaranta piko tokol.
- <sup>30</sup>Kunyo mosukwiytakey nyoto om pesyet nye ciñonu cipor Weritap cito.
- <sup>31</sup>“Om pesyosyecoto, ye mite citake konyi kisyek oñnkumite tukukyi koto orit, kupuryo kot kuroke kurek oñnkuwokunum tukucoto, kuyunyoto mpo om wule mite cito nye mite mparen, puryo kot kuroke kuweckey neto kuwo kanyi.
- <sup>32</sup>Asot pa korketap Lot!



<sup>33</sup>Ci tokol nye möce kule osoru osop sopen nyi, kupote nyoto sopen nyi, nto ci tokol nyo kepot sopen nyi, mosukusor kusop nyoto sopen nyi.

<sup>34</sup>Om kwomowutap pesyonoto, mosicenyor piko oyeny ce koruy kwiririt akenke, cesut ake cepakakta ake,

<sup>35</sup>cenyor koruk oyeny ce ɲosye rwantet akenke, cesut ake cepakakta ake.

<sup>36</sup>[Cenyor piko alak oyeny kumite mparen, cesut akenke oɲknyepakakta ake.]’

<sup>37</sup>Kutepe konomik Yesu kumwoci kule, “Mokoryontet, om ono?” Kuwec Yesu kumwoci cek kule, “Wule mite musto ku wuloto wule rurukyinikey motomwek.”

## Luka 18

<sup>1</sup>Yoto kumwoci Yesu cek tyonkocet sukuɲet kunet kule misyini kusome cek okokoy nye puryo kot kucostos.

<sup>2</sup>Kumwoy kule, “Kimate Ketintet ake nye kimate moɲet ake, nye kipuryo kot kuyweye Yiyintet oɲnkupuryo kot kuyweye ci tokol.

<sup>3</sup>Kumite mpo korket ake nye musuk moɲonoto nye kiconi wule mite ketintonoto pesyosyek tokol cokumwocini kule, ‘Müt musankut nyepo manta kulot cito nyo owosontyini ani.’

<sup>4</sup>Kutoyis ketintet kunyo, ntene om letut kusot nkit kumwoy kule, ‘Nka kot puryo kot oyweyi ani Yiyintet, oɲnkupuryo kot oyweyi ci tokol,

<sup>5</sup>ntene om kayimatetap musukuni yimani okokoy, mosamüt musankut, sukuɲet komokuconi cokutaɲanya kwimen.’ ’

<sup>6</sup>Kumwoy Mokoryontet Yesu kule, “Olim pa wule mwoytoy ketintet nye puryo kot kwiye ɲalek cepo manta,

<sup>7</sup>kunyo puryo kot komuce ra Yiyintet komüt musankut kukalya pikyi co rircini neto kusome kakalyantet komoy oko pet? Muce pa neto kulileyankey nye puryo kot kukolyoy cekto?

<sup>8</sup>Komwowok ani akwek kule, mosukumüt Yiyintet musankut lakwar kuyunyoto kukalya cekto. Ntene yec, ye kaweckey pa Weritap cito, muce cokunyor koyenotet om koret?’

<sup>9</sup>Kumwoci Yesu tyonkoconi piko ce kisilekey cek nkit kule ciku toponec oɲnkunyil piko alak tokol.

<sup>10</sup>Kumwoci kule, “Kinomen piko oyeny kupa wokusom om kotap Yiyintet, akenke om picoto kunye Farasoyintet nto ake kunye korurukintetap mosoret.

<sup>11</sup>Kuyo Farasoyintet oɲnkusom nkit kumwoy kule, ‘Okostiɲ ani nyi, Ayi Yiyintet omnye puryo kot akerkeyekey ani oko piko alak tokol, ce cor, oɲnkuporisyi, oko co sakwayot, kuyu mpo korurukintoni po mosoret nyi mite yu.



**12**Opuri ani okire omik aret oyeny om sopitit akenke, oṅnkoniṅ ani nyi akenke om taman cepo tukuk tokol ce onyoru!’

**13**Ntene kuyonje korurukintetap mosoret ye low, nye kipuryo mpo kot kunyal torot, ntene kusyeckey teket oṅnkumwoy kule, ‘Ayi Yiyintet, kalya ani ci nye oponte miyoty!’ ”

**14**Kumwoy Yesu kule, “Komwowok ani akwek kule, kiweckey kuwo kanyi cicitenyi korurukintetap mosoret kukakikalya neto miyotyonyiki ntene puryo kot kunyin ake Farasoyintet; omnye ci tokol nye sutekey kulanṅtankey nkit parak, mosicirekune neto nyoto, ntene ci tokol nye sutekey kurektokey nkit ṅony, mosicilanṅta neto nyoto kuwoyit.”

**15**Kukwer piko alake lekokwa kukwa wule mite Yesu, kule sukuṅet kukemer neto yewuniyekyi metewokap lekocoto, nteye kotoköse konomik picoto kikweru lekokwa, kuyete kukereka cek.

**16**Ntene kukur Yesu lekok kukwa wule mite neto, oṅnkumwoy kule, “Ayaste lekok kukwa wule omite ani! Monte ceyete, omnye po poytoyisyetap Yiyintet cekto ceyucutecu.

**17**Komwowok ani akwek kule, ci tokol nye puryo kot kunöme poytoyisyetap Yiyintet kuyu lekwa, kupuryo kot kumuce neto nyoto kot kowut orit.”

**18**Kutepe poytoyintet ake Yesu kule, “Konetintet nye topon, mosaiyy ne ani ye sonyoru soponto nye mopoku?” Kumwoci Yesu cicoto kule,

**19**“Omne sekureno ani nyi nye topon? Puryo ci nye topon, ntene Yiyintet pate nkit nye topon.

**20**Nketi nyi ntarastinek mwowu kule, ‘Mente kot ayiy sakwayanat, mente kot apakäc ci. Mente kot acorsye, mente kot aṅalal mwiynan perperisye, ywey kon oko komet!’ ”

**21**Kuwec cicoto kumwoy kule, “Kyorip ani ntarastinecutecu tokol kuceke oyiku lekwa.”

**22**Ntowo kulim Yesu ṅalecato, kumwoci cicoto kule, “Mite kito akenke nye tokupotuṅ nyi, iwo weyalye tukuk tokol ce ponte oṅnkikoci pesanik pononik, mesenyoru mokoryontit om torot; oṅnkico ce nama cepetekey oko ani.”

**23**Nteye kotolime cicoto ṅalecato kunerec koromun, omnye kimokoryo nye kiponto tukuk ce caṅ.

**24**Yoto kukäs Yesu wule kanereka cicoto, kumwoy kule, “Mokuwuy koromun om wule mite piko co mokoren ce ponto tukuk ce caṅ ye mokowut cekto poytoyisyetap Yiyintet!

**25**Lekit mpo kupunte Nkamiyet koṅntap sintanit kupël ye mokowut ci nye mokoryo poytoyisyetap Yiyintet.”

**26**Kutepe piko ce kilime ṅalecato Yesu kule, “Do nyun cito nye muce cisop?”





- <sup>27</sup>Kuwec Yesu kumwoy kule, “Tukuk ce puryo kot komukoktos om wule mite piko, komukoktos coto om wule mite Yiyintet.”
- <sup>28</sup>Kumwoy Petero kule, “Käs pa! Kicepakakte acek korikyo oñknyekwa kwocinamiñ cepetekey nyi.”
- <sup>29</sup>Kumwoy Yesu kule, “Komwowok ani akwek ñalek cepo manta kule, puryo ci nye ye kupakakta kanyi oko korket oko lekok, oko mpo yeyanyi, oko kamwa tokol, omnye karup neto poytoyisyetap Yiyintet,
- <sup>30</sup>nye puryo kot kunyor ce cañ kupëlis om pesyosyecu, oñkunyor soponto nye mopoku om pesyosyek co kwoni.”
- <sup>31</sup>Kukwer Yesu tapan kiyokik taman ok oyeny, oñkumwoci kule, “Olim pa, cemite yawut cepeti celoñtoy Yerusalem, wule mosukwitita ñalek tokol cepo manta co kisile workoyik ce nöme Weritap cito.
- <sup>32</sup>Mosicenäm neto oñknyikoci kunäm lamek ce mosukutañany, oñnkucup, oñnkuñutyi;
- <sup>33</sup>mosukupas oñnkupar kume, ntene om letutap pesyosyek somok mosukotutune met.”
- <sup>34</sup>Ntene kipuryo kot kusow konomik kunket om yoto ñalecata, kiwuñotin ñaleca om wule mite cekto, kipuryo kot kusow kunket kule komwoy Yesu ñal ne.
- <sup>35</sup>Nteyu kowo kurikta Yesu Yeriko, kimite citake nye korat nye kipure aret tapan sukusomsi.
- <sup>36</sup>Nteye kotolime cicoto korat piko ce kimite kupeti kutile om aran, kutep kule, “Key kulene?”
- <sup>37</sup>Kumwoci piko neto kule, “Yesu nyo nyepo Nasaret nye mite kukeytoy.”
- <sup>38</sup>Yoto kupol kukurto cicoto kumwoy kule, “Yesu Weritap Tauti! Rirena ani!”
- <sup>39</sup>Kupolyi piko ce kimite kupeti om tay kumwoci cicoto kule kulis. Ntene kutosyikey kupol koromun kumwoy kule, “Weritap Tauti! Rirena ani!”
- <sup>40</sup>Yoto kuyo Yesu oñnkumwyta cekwer cicoto korat kuco ye mite neto. Nteyu kowo kuco kurik, kutepe Yesu neto kule,
- <sup>41</sup>“Möce nyi kule oyiwuñ ani ne?” Kumwoy cicoto kule, “Konetintet, omöce kule akäste yec.”
- <sup>42</sup>Kumwoci Yesu cicoto kule, “Käste! Kakusopiñ nyi koyeneñuñ.”
- <sup>43</sup>Om yoto pakenke kusopco kukästa konyekyi. Kunamat cicoto kupetekey Yesu kukostoti Yiyintet. Nteye kotoköse piko tokol tukuk ce keyokis, kokasta tokol Yiyintet.

## Luka 19



- <sup>1</sup>Kuwo Yesu okoy kupunto Yeriko, nteye kimate kupunte kwenutap moṅet,
- <sup>2</sup>kimate yoto citake nye cekure Sakayo nye kikorurukintetap mosoret nyewo, nye kimokoryo nye ponto tukuk ce caṅ.
- <sup>3</sup>Yoto kusyem Sakayo kule akās oṅnkono nye Yesu, ntene kipuryo komuc kot kukās omnye kicaṅ piko oko yec nye kinwac neto.
- <sup>4</sup>Yoto kulapat Sakayo kuwo taytap piko oṅnkuwokulany ketit mokoywet kule saṅet akās, omnye kiweti Yesu wokupunte aranato.
- <sup>5</sup>Ntowo kuco Yesu okoy ketit ṅony, kunyal parak oṅnkumwoci Sakayo kule, “Sakayo, reku co ṅony lakwar; omnye omöce ani woru kaṅuṅ pesyoni.”
- <sup>6</sup>Kurek Sakayo kuco ṅony lakwar, oṅnkuṅerekyi Yesu koromun.
- <sup>7</sup>Ntowo kukās piko tokol kuyunyoto kucec koṅnyṅunyis kumwoy kule, “Kowo cici wokwek tontetap ci nye ponto miyoty!”
- <sup>8</sup>Kuyo Sakayo oṅnkuṅalal kumwoci Mokoryontet Yesu kule, “Om yuteyu yawut pakenke, mosopcici ani tukukwani pononik, nteye kyaperper olotu citake tokol oṅnkonumune kinyi, mosoyokyi aret amwan kucanjit.”
- <sup>9</sup>Kumwoci Yesu neto kule, “Kaco yawut pesyoni kosopet kayi. Omnye mpeneto cicitenyi kunye mucokoretap Apram.
- <sup>10</sup>Omnye kico Weritap cito cokuceny oṅnkusop ce kipoty.”
- <sup>11</sup>Nteye kimate kulimntoy piko ṅalecato, kutosyikey Yesu kumwoci cek tyonkocet, omnye kikirikta neto yoto kupunto Yerusalem, oko omnye kisote piko kule mosukuco lakwar poytoyisyetap Yiyintet.
- <sup>12</sup>Yoto kumwoy kule, “Kinomen mokoryontet ake kuwo koret ake nye low, sukuṅet wocikocine neto wuloto kamukeywek kwek Kinko oṅnkuwekey kuco ka.
- <sup>13</sup>Nteyu mokunomen, kukur mutworiky i taman oṅnkukoci ci ake tokol om cekto silinkinek pokol, oṅnkumwoci kule, ‘Oyiyisye kamonkesyantit okoy awekey ani.’
- <sup>14</sup>Ntene kitoye pikap korenyi cicoto, yoto kuyokto piko alak kupa kunam let wokumwayta kule, ‘Puryo kot ce cöme acek cico kwek Kinko nyinyacek!’
- <sup>15</sup>“Ntowo kuwekey cicoto kukocikoci neto kamukeywek kwek Kinko, kumwayta cekwer kukwa ye mite neto mutworik co kikocini neto pesanik, kule sukuṅet oṅnket latikap pesanik ce kinyor cekto om kamonkesyantit.
- <sup>16</sup>Kuco nyepo tayta oṅnkumwoy kule, ‘Mokoryontet, kiyi silinkinekyekuk pokolu silinkinek alak elifut akenke.’
- <sup>17</sup>Kumwoci cicoto nyoto kule, ‘Kiyiy topon, yiku nyi mutworin nye topon! Kunyo omnye cikeneninke om pesan ce tukusic, kunyo nyoru yawut kamukeywek ce mepayte moṅosyek taman.’



- <sup>18</sup>Kuco nyepo oyeny oṅnkumwoy kule, ‘Mokoryontet, kiyi silinkinekyekuk pokolu silinkinek alak pokolwokik mut.’
- <sup>19</sup>Kumwoci cicoto nyoto kule, ‘Mpenyi mepayte moṅosyek mut.’
- <sup>20</sup>Kuco ake oṅnkumwoy kule, ‘Mokoryontet, okyu silinkinekuk pokol ce kyakonor ani oyukyi siret.
- <sup>21</sup>Omnye kyanyokoritu om wule mite nyi, omnye yiku nyi ci nye wuy, sute kiy nye puryo kot ku nyenṅ, oṅnkikise mpo ce puryo kot kol nyi.’
- <sup>22</sup>Kumwoci cicoto nyoto kule, ‘Yiku nyi mutworin nye miyat! Mosoyiyisye ani ṅalekuk ce kwone kutiṅṅ nkit oṅnkomütṅṅ musankut! Ye kinket nyi kule, oyiku ani ci nye wuy, omnye osute kiy nye puryo kot ku nyenyu, oṅnkokise mpo ce kipuryo kot akol ani.
- <sup>23</sup>Kunyo ye yunyo, omne simekonore nyi pesanikwani Penki? Omnye nto kwowecekey ani kwoceketwo kuponto latik.’
- <sup>24</sup>Kumwoci cicoto mokoryo piko ce kimite keyoṅ yoto kule, ‘Onumune cici silinkinek co pokol oṅnkokoci mutworintet nyo ponto silinkinek elifut akenke.’
- <sup>25</sup>Kumwoci picoto mokoryontemwa kule, ‘Mokoryontet, ponto cicitenyi silinkinek elifut akenke!’
- <sup>26</sup>Kuwec Yesu kumwoy kule, ‘Komwowok ani akwek kule, ci tokol nye ponto, mosicikoci neto nyoto kucanjit, nto ci tokol nyo puryo kot kuponto, nka mpo co ponto, mocinumune neto coto.
- <sup>27</sup>Nto wule mite punikwani cutecu kipuryo kot kucäm kule oyiku ani Kinko nyimwa, okweru kukwa yu oṅnkotil kupok om yu po taymwani!’ ”
- <sup>28</sup>Nteyu kowo kumwoy Yesu ṅalecato okoy kuwany, kunomen kuntoci cekto kuwo Yerusalem.
- <sup>29</sup>Ntowo kurikta Pesapake oko Pesaniya om tulwetap ketik ce cekure seituninek, kuyokto konomik oyeny,
- <sup>30</sup>kumwoci kule, “Ape okoy opunte kayta nye mite taymwoṅ, nteye kowut kayata mosonyoru moyitap sikiryet nye ratat nye tompo kot kulany kuwete ci mpo akenke, atyac oṅnkokweru kuco yu.
- <sup>31</sup>Nteye katepenak citake kule, ‘Omne satyac akwek sikiryoni?’ Omwoci kule, ‘Möce Mokoryontet.’ ”
- <sup>32</sup>Kunomen picoto kociyoktoy kupa okoy wokunyor kiy ake tokol kumite kuyu wulo kokomwoci Yesu cekto.
- <sup>33</sup>Nteye kimite kutyoce moyitap sikiryet, kutepe pikap sikiryet kule, “Omne satyac akwek moyitap sikiryet?”
- <sup>34</sup>Kuwekyi kumwoci kule, “Möce Mokoryontet.”



<sup>35</sup>Yoto kukwer cek moytap sikiryet okoy wule mite Yesu oṅnkuyitoci sirokwa patayitap moyitap sikiryet, oṅnkulany kukonopci Yesu kopure parak.

<sup>36</sup>Nteye kimite neto kuweti koyito cek sirokwa aret.

<sup>37</sup>Ntowo kurikta Yesu Yerusalem, om aret nye rekune tulwetap ketik ce cekure seituninek, yoto kucec luketap konomik kukasta Yiyintet om ṅerekwek om polotetap tumnto nyewo om tukuk tokol cewoyec ce kikäs cek, kumwoy kule:

<sup>38</sup>“Kukoci Yiyintet kupeyok neto Kinko nye coni om kaynetap Mokoryontet! Kopur kalyet torot, oṅnkupur woyinto wule mite Yiyintet!”

<sup>39</sup>Yoto kumwoci Farasayek alake ce kipontokey piko Yesu kule, “Konetintet, mwoci konomikuk kusiono!”

<sup>40</sup>Kuwekyi Yesu kumwoci cek kule, “Komwowok ani akwek kule, ye kusiono cekto; mosukupol mpo rwontok.”

<sup>41</sup>Nteyu kowo kuco Yesu okoy kurik moṅet nyewo Yerusalem, nteye kutoköse kutopen, kurir kukalya kumwoy kule,

<sup>42</sup>“Nto kesowu nyi nket pesyoni pate kito nye sutu kalyet! Ntene puryo kot mucu yawut kot käs omnye wuṅat om konyekuk!”

<sup>43</sup>Omnye mosukupunto pesyosyek ce mosukutec punikuk totet komutuṅ nyi om komoswokik tokol.

<sup>44</sup>Mosukupuryetiṅ poku kule toṅ oko piko ce minyiṅ nyi orit, nye puryo kot kupokoktoy cek om wule mite nyi rwantet ake kumite rwantet ake parak. Omnye kipuryo kot sowu nyi oṅnkinket pesyet nye cone Yiyintet cokusopiṅ kosoruṅ nyi!”

<sup>45</sup>Yoto kowut Yesu kotap Yiyintet orit, oṅnkucec kukwet piko ce kimite kwolyoyisyi om orit,

<sup>46</sup>kumwoci cek kule, “Kicesil om silutekap Yiyintet kule, ‘Mosukwek komwani koto nye cesome.’ Kunyi kwawec akwek kwek kepenet nye wuṅekey corik!”


<sup>47</sup>Yoto kunetisye Yesu kotap Yiyintet pesyosyek tokol. Ntene kumac tisik cewoyec oko konetikap ntarastinek oko poyikap piko kule cepakäc neto.

<sup>48</sup>Ntene kipuryo kot kunyor cek wule mokwiyta, omnye kimite piko tokol kulimntoy ṅalekyi topon nye kipuryo kot kumöce kule nto cemuyte ṅolyo mpo akenke.

## Luka 20

<sup>1</sup>Nteye kipesyet ake, ye kimite Yesu kunete piko komwocini lokoywek ce toponec om kotap Yiyintet, yoto kukwa tisik cewoyec oko konetikap ntarastinek oko poyik,

<sup>2</sup>oṅnkwokutepe cek Yesu kule, “Mwowec acek, po ṅo kamukeywek cu yiye nyi tukucu? Do nyi kiconiṅ nyi kamukeywecu?”



- <sup>3</sup>Kuwekyi Yesu kumwoci cek kule, “Mpo ani mosatepenak akwek teputyoni kule, omwowo ani pa akwek,
- <sup>4</sup>kicone potisonisyetap Yowana wulin po torot nto kicone wule mite piko?”
- <sup>5</sup>Yoto kurwoc cek kwicek nkit kumwoy kule, “Ye kocemwowu kule, ‘Kicone torot,’ mosukumwowec acek neto kule, ‘Omne satay akwek moyen ñalekyi?’
- <sup>6</sup>Nteye kocemwowu kule, ‘Kicone wule mite piko,’ mosukuwirenec piko rwontok; omnye cöme piko kule workoyo Yowana manta.”
- <sup>7</sup>Yoto kuwekyi cek Yesu kumwoci kule, “Puryo kot cinket wule kicone.”
- <sup>8</sup>Kumwoci Yesu cek kule, “Mpo ani puryo kot omuci kot omwowok akwek wule anyortoy ani kamukeywek cu oyiye tukucu.”
- <sup>9</sup>Kumwoci Yesu piko tyonkoconi kule, “Kiwu citake mparenysi nyepo ketik ce cekure sapipunek, oñnkukoci kopotik ce kekotesan oñnkunomen kuwo koret ake nye low wokuwany wuloto pesyosyek ce cañ.
- <sup>10</sup>Nteyu kowo kupunto pesyosyek ce rurye omikap ketik ce cekure sapipunek, kuyok mutworintenyi kuco wule mite kopotik co kikotesonisyi, kule sukuñet co kukoci mutworintonoto omik alak cepo mparetap ketik ce cekure sapipunek ce kikiciyoyekyin; ntene kunäm kopoticoto mutworintonoto oñnkupir oñnkukwet kuweto yewuniyek pate.
- <sup>11</sup>Kuyokto yec cicoto mutworintet ake, ntene kupir kopotik oñnkunyalil mutworintonoto oñnkukwet kuweto yewuniyek pate.
- <sup>12</sup>Kuyokto yec cicoto mutworintet nyepo somok, kupir kopotik mpo nyoto kukoten oñnkukwetyi sañ.
- <sup>13</sup>Yoto kumwoy citap mparetap ketik ce cekure sapipunek kule, ‘Mosayiy ne ani? Mosoyokte werimwani nyi akenke pate, pesyet ake mucce cek kuywey neto!’
- <sup>14</sup>Nteye kotoköse kopotik weroto, kurwoc nkit kumwoy kule, ‘Nyitenyi kunye kontiyintet; akany cepakäc kume, sukuñet kwek nyinyacek kontiyisyet!’
- <sup>15</sup>Kunäm kopotik weroto oñnkucutune mparen oñnkupakäc kume.” Kutep Yesu kumwoy kule, “Mosukwiye kiy ne citap mparanato kopoticoto?
- <sup>16</sup>Mosukuco nkit citap mparet oñnkupar kupok kopoticoto oñnkukoci kopotik alak ce kekotesan mparetap ketik ce cekure sapipunek.” Nteye kotolime piko ñalecato, kumwoy cek kule, “Puryo kot kurok kwi yokis kuyunyo!”
- <sup>17</sup>Kukäs Yesu kurotot cek topon, oñnkutep kumwoy kule, “Mwowu ne nyun ñalecu kicesil om silutekap Yiyintet kule: ‘Rwantet nyo kitoye tekik kule, puryo kot kuponto latik, Kunye kiweckey kwek rwantet nye pële tokol nye tiye koto tapan.’
- <sup>18</sup>Ci tokol nye kowircikey rwantanato kutirtiroktos neto nyoto, nteye kowircikey rwantanato citake kunyirnyire cicoto.”



- <sup>19</sup>Kusyem om yoto konetikap ntarastinek oko tisik cewoyec kule cenäm Yesu, omnye kinket kule komwoy Yesu tyonkocet nyepo ñalek ce nöme cekto. Ntene kuywey piko.
- <sup>20</sup>Yoto kuceny cek pesyet nye topon. Kwal piko alak ce kosutkey picoto kuyu pic ce toponec, oñnkuyokto cek picoto kupa wokulot kutepe Yesu ñalek ce mosukumwoy, sukuñet kunäm oñnkukwer wokuwosontyine taytap poytoyintet nyewo nye ponto kamukeywek.
- <sup>21</sup>Kupa picoto oñnkuwokutepe cek Yesu kule, “Konetintet, cinket kule, ñalek ce mwowu nyi oko ce netinyi kuce ñalek cepo manta, oñnkyinket kule, puryo kot cöme nyi ñalek cepo citake oñnkitay cepo ake, ntene netinyi ñalekap Yiyintet cepo manta.
- <sup>22</sup>Kunyo, mwowec acek, cömwece pa ntarastinekyo cekweci mosoret Kinko Nyewo nto puryo?”
- <sup>23</sup>Ntene kunket Yesu tekutekwa. Kumwoci kule,
- <sup>24</sup>“Oporwo ani pa akwek silinkit? Po ño metit oko kaynet nyi silot silinkini?” Kuwekyi cek kumwoci kule, “Po Kinko Nyewo.”
- <sup>25</sup>Kumwoci Yesu cek kule, “Kunyo okocini Kinko Nyewo tukuk cepo Kinko Nyewo, okocini Yiyintet tukuk cepo Yiyintet.”
- <sup>26</sup>Yoto kipuryo komuc cek kot kunyor lelis om ñalekyi ce kimwoy om taytap piko, ntene kusiono, omnye kikite koromun wule kawekta ñalekyi.
- <sup>27</sup>Kukwa Satusayek alake wule mite Yesu. Coto ku piko co mwowu kule puryo kot komuce kot kotutune met piko co kipok. Kutepe cek neto kule,
- <sup>28</sup>“Konetintet, kisilwec acek Moses ntarastini kule, ‘Ye kame citake, oñnkupakakta korket nye puryo kot kuyici lekok, roke komüt mutakwam korkonoto musik, sukuñet kuyici mutakwam nye kime lekok.’
- <sup>29</sup>Kunyo kimite piko alake tisapu ce kitupco. Kukesyo nyewo komüt korket, ntene kume nye kipuryo kot kuyi lekoy.
- <sup>30</sup>Kunti komüt mutakwam nyepo oyeny korkonoto musik,
- <sup>31</sup>oko nyepo somok, kuyunyoto kupok tokol picoto ku tisap nye kipuryo kot kuyi mpo akenke lekwa,
- <sup>32</sup>nto om letut kume mpene korket.
- <sup>33</sup>Kunyo om pesyet nyo citutune met, poyitu ño korket? Omnye kikikomüt picoto tokol ku tisap!”
- <sup>34</sup>Kuwekyi Yesu kumwoci cek kule, “Mütisi moronik, oñnkyimüte koruk cepo pesyosyecu,
- <sup>35</sup>ntene om wule mite piko co kipok co kicecäm om konyekap Yiyintet kule yeme kotutune met oñnkuminjis koret nyin ake, kupuryo kot komütisiyo nto cimüte cekto coto.





- <sup>36</sup>Omnye puryo kot tokomuce cek yec kupok, kerkey picoto oko malaykanik, oṅnkukikwek lekopak Yiyintet omnye kikitutune met.
- <sup>37</sup>Kunyo kipor Moses ṅalek cepo manta kule, tutune met piko co kipok kunyor yec soponto. Kimwoy coto om ṅalekyi ce kisil co nömekey oko rukututwet nyo kiloye, kumwoy kule, ‘Mokoryontet kunye Yiyintetap Apram, Yiyintetap Isaka, Yiyintetap Yakopo.’
- <sup>38</sup>Kunyo poru ṅaleca kule, puryo kot ku Yiyintetap piko ce kipok; ntene Yiyintetap piko ce soptos; omnye sopcotin piko tokol om wule mite Yiyintet.’
- <sup>39</sup>Yoto kuwekyi konetikap ntarastinek alake kumwoci Yesu kule, “Konetintet, kewec topon!”
- <sup>40</sup>Omnye kipuryo kot tokukany cek yec kot kutepe Yesu ṅalek alak.
- <sup>41</sup>Kumwoci Yesu cek kule, “Omne sukuṅalole piko kumwowu kule, mosukwek Ḍapanet keseniyantetap Tauti?”
- <sup>42</sup>Omnye mwowu Tauti nkit om kitaputap tumwonikap kakastayet kule: ‘Kimwoci Mokoryontet Mokoryontenyu kule, Pure yu po yewumwani nyepo tay,
- <sup>43</sup>okoy okoci ani punikuk kwek ṅecerokap kerenkokuk.’
- <sup>44</sup>Kunyo nteye kure Tauti nkit neto kule, ‘Mokoryontet.’ Komuce kulene yec Ḍapanet kwek keseniyantetap Tauti?’
- <sup>45</sup>Yoto kumite kulime piko tokol, kumwoci Yesu konomiky kule,
- <sup>46</sup>“Oripkey koromun wule mite konetikap ntarastinek, ce möce kule cepesetoti kukelac sirok ce koyec, oṅnkucöme kule ciyweyec cisupayec topon om wulo po moteponik, ce kweye ṅecerok co kweyotin om korikapkok,
- <sup>47</sup>oko oteputek cepo tay om sokwonutek; ce nyopone korikap musukik; oṅnkusilkey kusome somutek ce caṅ, cek ce mosukunyor toṅoṅutek ce pëlisyi.”

## Luka 21

- <sup>1</sup>Yoto kukäs Yesu piko ce mokoren ce kikocini kokotutekwa sontukut nye cekonore pesanikap kotap Yiyintet.
- <sup>2</sup>Yoto kukäs om yoto korko panan nye musuk kukocini mpene orit kafunek oyeny;
- <sup>3</sup>kumwoy Yesu kule, “Komwowok ani akwek ṅalek cepo manta kule, kekoci panani musuk ce caṅ kusir ce kekoci piko alake tokol,
- <sup>4</sup>omnye kokon piko alake tokol kokotutekwa om ce koṅetune ce caṅ cepo mokoryontimwa. Ntene om wule mite korkoni panan kuyu wule yunto neto kokukoci tokol ce kuponto ce kwekolyekey om sapon nyi.”
- <sup>5</sup>Kimite kuṅolole piko alake om yoto ṅalek ce nöme toponiyetap kotap Yiyintet, oko rwontok ce toponec ce kicetece oko kokotutek ce kicikase. Kumwoy Yesu kule,



- <sup>6</sup>“Tukucu tokol cu oköse akwek yawut, mosukupunto pesyet nye puryo kot kuñetune rwontocu yu mite yawut, mosicipuryet tokol oñknyewirci ñony.”
- <sup>7</sup>Kutepe piko Yesu kule, “Konetintet, mosukupunto ñalecutecu pesyo ne? Oñnkukiy ne nye pelutyet nye poru kule kopunto pesyet kwi yokis ñaleca?”
- <sup>8</sup>Kumwoy Yesu kule, “Akäste koromun, mente kot ciperperak cëmasak akwek, omnye mosukukwa piko ce cañ om kaynemwani, oñnkumwoy kule, ‘Ani kunye neto!’ Oñnkumwoy kule, ‘Karik pesyet nyo kicekwey!’ Monte kot arup akwek picoto.
- <sup>9</sup>Monte cemuye ye kolim poryosyek oko kwankwañatet ye puryo kot kumite kalyet koret. Omnye mosukunyoso kutok kunyo tukuk ceyucoto, ntene kutompo yoto kot kurik pesyetap letut.”
- <sup>10</sup>Kutosyikey Yesu kumwoci cek kule, “Mosukusetyi koret ake kuporye koret ake, kusetyi poytoyisyet ake kuporye poytoyisyet ake;
- <sup>11</sup>mosukuriñij koret koromun oñnkunäm rupet oko porwonik korosyek ce cañ, mosukutok tukuk ce muye piko oko pelutok cekwone parak.
- <sup>12</sup>“Kutompo kot kwi yokis tukucutecu tokol, mosukunämak akwek piko oñnkutañanyak oñknyewosontyinenok korikapkok oñknyekertak mopusi, mosicekwerok ape taytap kinkonik oko taytap poytoyik cewoyec, omnye kacäm akwek kaynemwani.
- <sup>13</sup>Yoto ye mosonyoru akwek poroyinto nye kamwayte ñalek ce toponec.
- <sup>14</sup>Kunyo asot añkawany om mukuleywekwok kutompo kot kupunto pesyet, monte cisot kule, mosiceyetkey acek kulene;
- <sup>15</sup>omnye mosokonok ani akwek ñalek oko ñomnonet nye puryo kot komuce punikwok kutay nto kutintentyi kot komuc.
- <sup>16</sup>Mosukunjomntok akwek mpo Papamwoñ oko mpo komet, oko mpo yeyamwoñ, oko mpo tilyonutekwok, oko mpo coronutekwok, mosicepakäc kupok alake om akwek.
- <sup>17</sup>Mosukusenkerak akwek piko tokol omnye kocäm kaynemwani.
- <sup>18</sup>Ntene puryo kot kupote putyontet mpo akenke nyepo metewokwok.
- <sup>19</sup>Otitir okwilokisye koromun, omnye yunyoto wule mososorukey osopkey akwek nkit.”
- <sup>20</sup>“Ye kokäs kule kakomut pikap luketap poryet Yerusalem, yoto ye mosonket kule karik citurpup lakwar.
- <sup>21</sup>Roke yoto kumwey kupa lakomosyek piko ce mite Yuteya; nto piko co mite Yerusalem orit; roke kumwey co kupa sañ, oñnkupuryo kot kumisyini piko co mite koret sañ kukwa oñnkwokowut moñet orit.
- <sup>22</sup>Omnye pesyosyekap toñonutec coto; kunyo kopunto pesyosyecoto sukuñet kwitita kupoyit manta ñalek cepo silutekap Yiyintet ce mwowu kule:



- <sup>23</sup>Mite kwapi kulene om pesyosyecoto koruk ce koyotin nto ce rerisiyi! Mosukucontyi koroni tañanynta; oñnkunyor cek picu nerekwepak Yiyintet.
- <sup>24</sup>Mosicepare piko ñotit, oñnkyenäm cekwer ku mopusin kupa korosyek tokol; oñnkukwa lamek kwokutyikta Yerusalem, okoy kupunto pesyosyekwa ce kiceyiytoci.”
- <sup>25</sup>“Mosukuporkey pelutok cepo kakitat om wule mite asista oko arawet oko kokelik, nto om koret kumuyo piko tokol kucoñonenis cek om karumntap ruretyet oko peko ce tultoykey.
- <sup>26</sup>Mosukumisto piko om muyotet ye mite cek kukene tukuk ce mo kukwontyi koret tokol; omnye mosukutimtimnkey swameta torot.
- <sup>27</sup>Yoto ye mosukukäs cek Weritap cito kucone polyet kuponto kamukeywek oko woyinto nyewo koromun.
- <sup>28</sup>Ye kacec kutok tukuk ceyucoto, oyoñnkye onyal parak omnye karik yoto pesyet nye ce sorunenok akwek.”
- <sup>29</sup>Yoto kumwoci Yesu piko tyonkoconi kule, “Akäs ketit mokoywet oko ketik alak tokol.
- <sup>30</sup>Ye kokäs akwek nye puryo kot ce mwowok kule kokuñot sokek, yoto oñnket kule karik pesyosyekap peñatut.
- <sup>31</sup>Kunyo ye kokäs akwek tukuk ceyucoto kwiyoktos möce oñnket kule karik poytoyisyetap Yiyintet.
- <sup>32</sup>Komwowok ani akwek ñalek cepo manta kule, mosukwiyokis tukucu tokol kutompo kot kupok piko cepo pini ce soptos yawut.
- <sup>33</sup>Poku wulin po torot oko wuli po ñony, ntene puryo kot kupoku ñalekwani mpo kisic.”
- <sup>34</sup>“Oripkey akwek nkit! Monte kot kowurtak sokwonutek oko pokitetap komek, oko kasoteywekap sopontap pesyosyecu, omnye muce kucontyok akwek pesyonoto lakwar nye puryo kot oñnket kuyu musat;
- <sup>35</sup>omnye mosukucontyi piko tokol ce mite koret tokol kumukul.
- <sup>36</sup>Kunyo oripkey pesyosyek tokol, oñnkosome sukuñet onyoru swamet nye omuci omweye acilile tukucutecu tokol ce mokwiyokis, sañet oyone akwek taytap Weritap cito.”
- <sup>37</sup>Kunetisyeye Yesu pesyosyecoto kotap Yiyintet, nteye kemen koret kuweti wokurwe tulwet nye cekure tulwetap ketik ce cekure Seituninek.
- <sup>38</sup>Yoto kupeti piko tokol kororn okoy kotap Yiyintet wule kinetisyeye Yesu wokulimntoy ñalekyi.

## Luka 22



- <sup>1</sup>Nteyu kowo kurikta kupunto pesyetap sakwetap mukatyantet nye mokutunat, nyoto kunye sakwetap Yutayek nye cekure Keytayet.
- <sup>2</sup>Kimite yoto tisik cewoyec oko konetikap ntarastinek kucenye aret nye muce kupakäce Yesu kume, omnye kiywey cekto piko.
- <sup>3</sup>Yoto kowut Setanit Yuta nye cekure Isikaryoti nye ki akenke om kiyokikap Yesu taman ok oyeny.
- <sup>4</sup>Kunomen Yuta kuwo wule mite tisik cewoyec oko piko cewoyec ce ripe kotap Yiyintet, oṅkuwokuṅololyin oko cek wule muktoy neto kuṅomnto Yesu oṅnkukoci cek kunäm.
- <sup>5</sup>Kuṅerec cek koromun oṅnkumwoci cek Yuta kule mocekonij pesanik.
- <sup>6</sup>Kucäm Yuta kuyunyoto oṅnkucec kuceny poroyinto nye topon nye muce neto kuṅomnte Yesu kunäm cek nye puryo kot kunkete piko.
- <sup>7</sup>Yoto kupunto pesyetap sakwetap mukatyantet nye mokutunat, ye ceyenye keciryetap Keytayet kwek korosyo oṅnkyam.
- <sup>8</sup>Yoto kuyokto Yesu Petero oko Yowana oṅnkunkolontyi kumwoci kule, “Ape woyiytowec kyam omikap pesyetap Keytayet.” Kutepe cek Yesu kule,
- <sup>9</sup>“Ono wule möce nyi kule woceyiyte acek?”
- <sup>10</sup>Kumwoci Yesu cek kule, “Alim pa, ape nteye kopunte moṅet mosukutuyenok akwek citake nye toronu teretap peko, arup cicoto okoy koto nye kewut.
- <sup>11</sup>Omwoci citap koto kule, ‘Komwowuṅ konetintet kule, ono kotap toyek nye moyomisye ani oko konomikwani omikap Keytayet?’
- <sup>12</sup>Mosukuporwok cicoto koto nyewo nye satat topon nye mite koto parak; wayiyte akwek kiy ake tokol om wuloto.’”
- <sup>13</sup>Kupa cek okoy wokunyor kiy ake tokol kumite kuyu wulo kakamwayta Yesu. Kuyiyta cek omikap Keytayet.
- <sup>14</sup>Ntowo kupunto ye kyomisyi, kopur Yesu ṅony wanak oko Kiyokik.
- <sup>15</sup>Yoto kumwoci Yesu cek kule, “Kwomöce ani koromun kule kyomisye wanak oko akwek omicu po pesyetap Keytayet kutompo kot atañany ani!
- <sup>16</sup>Omnye komwowok ani akwek kule, puryo kot toyome ani yec mpo kisic okokoy cikoci wule cemoktoy om poytoyisyetap Yiyintet.’”
- <sup>17</sup>Yoto kunäm Yesu cikompet oṅnkusomnci kukasta Yiyintet, kumwoy kule, “Onäm oṅnkoye opcicine akwek nkit,
- <sup>18</sup>omnye komwowok ani akwek kule, kuceke pesyoni, komo toye ani pekap omikap ketik ce cekure sapipunek okoy ye kaco poytoyisyetap Yiyintet.’”



- <sup>19</sup>Kuyunyoto kunäm mukatyantet oṅnkusomnci kukasta Yiyintet, oṅnkupetec oṅnkukoci cek, oṅnkumwoy kule, “Nyi kunye pormwani, [nye kacekon kupo akwek, oyiye kuyunyitenyi ye asoteno ani akwek.]”
- <sup>20</sup>Kuyunyoto yec yu kowo kupok omikap kosoleny, kunam Yesu cikompet, oṅnkumwoy kule, “Cikomponi kunye Kirotyet nyelel nyepo korotikwani ce kicitotowok akwek.”]
- <sup>21</sup>“Ntene akäs pa, yewutap neto cito nye ṅomnto ani, nye mite cepontekey kyomisye meset akenke oko ani!
- <sup>22</sup>Omnye ṅalek cepo manta kucu kule, weti Weritap cito kuyu wule kiceyiytoci, ntene mite kwapi neto cito nyo ṅomntoy!”
- <sup>23</sup>Yoto kucec konomik kutepekey cek kwiček nkit kumwoy kule, “Do om cekto nye wokwiye ṅolyontoni?”
- <sup>24</sup>Yoto kuco tintenotet om kwenutap kiyokik kule ṅo om cekto nye cinket kule nyewo kupēlis.
- <sup>25</sup>Kumwoci Yesu cek kule, “Ponto Kinkonikap lamek kamukeywek kupayta piko, oṅnkyekure poytoyik kule, ‘Coronutepak piko.’
- <sup>26</sup>Ntene puryo kot kuyunyo om wule omite akwek, misyini nyewo om wule omite akwek kusutkey kwek nye miniṅ, nto nye kantoyin kunye yiyisi kukolyoyisi.
- <sup>27</sup>Omnye ṅo nyewo kupēlis, cito nyo pure meset kwomis nto cito nyo yosyi oṅnkusut? Cepo manta ku kule neto nyoto ku cito nyo pure meset. Ntene amite ani kwenumwakwek kuyu ci nye oyiwok akwek yisyet.
- <sup>28</sup>“Kwopur ani oko akwek, kunyo kwopunte syemutok kwani tokol.
- <sup>29</sup>Kunyo kuyu wulo kikono ani Papamwani Poytoyisyet, kunyo kakonok mpo ani akwek kamukeywek.
- <sup>30</sup>Sukuṅet oyomisye oṅnkoyesye mesemwani om poytoyisyemwani, oṅnkopure ṅecerok cewoyec omutyi musankut aretap pikap Israel co taman ok oyeny.”
- <sup>31</sup>Kumwoy Yesu kule, “Simon! Simon! Käs pa, kamac Setanit kule asesak akwek tokol kuyu wulo sestoy cito nkanuk oṅnkupciy nkanuk oko moriryek.
- <sup>32</sup>Ntene kosomuṅ ani nyi Simon, kule sukuṅet mente kot kupok koyeneṅuṅ, ntene om wule mite nyi nkit, ye keweckey nyi kwilakisyē om wule omite ani, kumisyini kwil mpo yeyanuṅ.”
- <sup>33</sup>Kumwoy Petero kule, “Mokoryontet, oyiku ani yiytat cerotyō mopusi oko nyi oṅnkyepoku mpo tukway!”
- <sup>34</sup>Kumwoy Yesu kule, “Komwowok ani nyi Petero kule, puryo kot konkure kurkonkit om kwomowutap pesyoni okoy tuckey nyi aret somok mwowu kule puryo kot oṅnketo ani?”



- 35 Kumwoci Yesu cek kule, “Yo kyoyoktok ani akwek pesyet itye nye kipuryo kot anämäte munyenkutap pesanik oko lolonik oko kweyonik, mite ra kiy nye kipotwok akwek yoto?” Kuwec cek kumwoy kule, “Puryo kiy nye kipotwec.”
- 36 Yoto kumwoci Yesu cek kule, “Kunyo kunäm yawut ci tokol nye puryo kot kuponto munyenkutap pesanik oko lolet, nto ci tokol nye puryo kot kuponto rotwetap cok, misyini nyoto kwalya sirenyi oṅkwale rotwet.
- 37 Omnye komwowok ani kule, misyini kwitita kupoyit manta silutekap Yiyintet om wule omite ani co mwowu kule, ‘Kiciyitito neto piko ce miyotec co yirye ntarastinek.’ Omnye mite kwititoy ṅalek co kicesil ce nömo ani.”
- 38 Kumwoy cekto kule, “Mokoryontet, käs pa, okyu rotok.” Kumwoci Yesu cek kule, “Kayem.”
- 39 Kunomen Yesu kuyu wulo yunto kopur nyi nyepo kwak, kuwo okoy kupunto tulwetap ketik ce cekure Seituninek, yoto kupetakey neto kiyokikiyi.
- 40 Nteyu kowo kupunto yoto, kumwoci cek kule, “Osom sukuṅet mente kot osuci onyuru akwek syemutok.”
- 41 Yoto kunata Yesu kuwete ye kimite cek kuwo ye low kisic ye muce kutic rwantet ye kacewirta, oṅnkukutuny kusom kumwoy kule,
- 42 “Papa, ye cöme nyi numuneno ani cikomponi, ntene puryo kot kuyu wulo omoktoy ani, ntene kwiyokis kuyu wulo moktoy nyi.”
- 43 [Yoto kuporkey malayket nye cone torot oṅnkutitir neto kukoci swamet.
- 44 Kusot oṅnkutaṅany koromun, ntene kutosyikey kusom koromun, okoy kurotune kiyotik ce kerkey korotik ce kitecini ṅony.]
- 45 Kuṅete Yesu ṅony om ye kimite kusome, oṅnkuwo kuketitakey ye kimite konomik, wokunyor kumite koruy om nyalilya.
- 46 Kumwoci Yesu cek kule, “Omne soruye akwek? Oṅetye oṅnkosom sukuṅet monte osuci onyuru syemutok.”
- 47 Nteye kimite Yesu tokuṅolole, kupun luketap piko ce kintocini Yuta nye ki akenke om konomik taman ok oyeny. Kuco Yuta okoy ye mite Yesu oṅnkutoroc kuṅatut.
- 48 Ntene kumwoci Yesu neto kule, “Datutani kunye ṅomnte nyi Weritap cito?”
- 49 Nteye kotoköse konomikiyi kito nye mosukwiyakay kumwoy kule, “Mokoryontet, ceyepe acek rotok?”
- 50 Yoto kuyepis akenke om cek kuyep mutworintetap tisintet nyewo kulot yititap tay.
- 51 Kumwoy Yesu om yoto kule, “Ayaste kayem nyoto!” Kunäm Yesu yititap cicoto oṅnkusop kusop.





- <sup>52</sup>Yoto kumwoci Yesu tisik cewoyec oko kantoyik cewoyec ce ripe kotap Yiyintet, oko poyik ce kikwa kwokunäm neto, kumwoci kule, “Kakwa akwek kuyu nye omöce kule cenam corin? Omnye kakwante rotokap cok oko runkunek?”
- <sup>53</sup>Nteyu kwopontokey ani oko akwek pesyosyek tokol om kotap Yiyintet, ntene puryo kot asyem akwek kule cenäma ani yoto. Ntene nyimwoŋ sawet nyi, nye poytoyisyi menonet.”
- <sup>54</sup>Yoto kunäm cek Yesu oŋnkukwer okoy kupunto kaytap Tisintet Nyewo. Kunam kurup Petero letut kuloyityi kuminiŋ.
- <sup>55</sup>Nteyu kowo cila mata yepo kwenutap saŋntap kayta, kopur piko kuyuye mata, yoto kuco mpene Petero oŋnkupur otepto nyenyi om ye kimite cekto.
- <sup>56</sup>Nteye kotoköse korko nye mutworin kukekweny mata Petero, kukäs topon; oŋnkumwoy kule, “Kopontokey cici Yesu!”
- <sup>57</sup>Ntene kutuckey kutoyis Petero kumwoci korkonoto kule, “Cepyosyani, puryo kot oŋnket ani cico!”
- <sup>58</sup>Om letut yec kuminiŋ, kukäs citake Petero, oŋnkumwoy kule, “Mpenyi yiku akenke nye kepontekey oko Yesu!” Ntene kumwoy Petero kule, “Puryo kot ku ani!”
- <sup>59</sup>Om letut yec kukopok sawet akenke, kumwoy citake yec om swamet kule, “Manta nye puryo kot kumite tintenot, kopontokey cici oko Yesu, omnye po mpene cici koretap Kalilaya.”
- <sup>60</sup>Ntene kuwec Petero kumwoy kule, “Puryo kot oŋnket ani kito nye mwowu nyi.” Yoto pakenke kumite Petero kutokuŋolole, koncur kurkonkit.
- <sup>61</sup>Kuweckey Mokoryontet Yesu kukäs Petero. Yoto kusot Petero ŋolyontetap Mokoryontet nyo kumwocini neto kule, “Kutompo kot koncur kurkonkit om kwomowutap pesyoni, mesetoyisye nyi tuckey aret somok mwowu kule puryo kot oŋnketo ani.”
- <sup>62</sup>Kumiŋnto Petero kuwo saŋ, oŋnkurir lokik koromun.
- <sup>63</sup>Kurorici kucup piko ce kiripe Yesu, oŋnkupir neto.
- <sup>64</sup>Kurat konyekyi oŋnkutepe kule, “Dor, ŋo nyi kasyeciŋ nyi!”
- <sup>65</sup>Oŋnkuŋalal cek kucup kumwoci Yesu ŋalek ce caŋ ce miyotec ce kincurure.
- <sup>66</sup>Nteyu kowo kuyec koret, kutuyo wanak poyikap Yutayek oko tisik cewoyec oko konetikap ntarastinek, yoto kukwer cek Yesu kuco kokwemwa.
- <sup>67</sup>Kutepe cek Yesu kule, “Mwowec acek, yiku nyi Dapanet?” Kuwec Yesu kumwoy kule, “Nka kot komwowok ani akwek kupuryo kot oyeni;
- <sup>68</sup>kunyo nka kot katepenak ani akwek teput kupuryo kot owekwo.
- <sup>69</sup>Ntene kuceke yawut oŋnkutosyikey kuwo tay mosukopurune Weritap cito yewutap tay nyepo Yiyintet nyepo kamukeywek tokol.”



<sup>70</sup>Kumwoy cek kule, “Kunyo yiku nyi so Weritap Yiyintet?” Kuwekyi Yesu kumwoci cek kule, “Akwek ce omwowu kule oyiku ani.”

<sup>71</sup>Yoto kumwoy cek kule, “Komo cemöce acek muncururwanik alak omnye kacelim acek nkit ñalek ce kwone kutinyi nkit!”

## Luka 23

<sup>1</sup>Yoto kuñetyo luketap piko tokol oñnkukwer Yesu okoy kupunto taytap Pilato.

<sup>2</sup>Oñnkucec cek kuwosontyi neto kumwoy kule, “Kucenyoru acek cici kumite kumose pikap korenyacek, oñnkuyete kukerehta piko mente kukweci mosoret Kinko Nyewo, oñnkukurkey kule oyiku Ñapanet!”

<sup>3</sup>Kutepe Pilato kumwoci Yesu kule, “Yiku nyi Kinko nyepo Yutayek?” Kuwekyi Yesu kumwoci neto kule, “Nyi nye mwowu.”

<sup>4</sup>Yoto kumwoci Pilato tisik cewoyec oko luketap piko tokol kule, “Mnanyorte ani cici lelis nye miyat.”

<sup>5</sup>Ntene kutosyikey cek kumwoy om swamet kule, “Kwonykwonye kumose neto piko, kunet om koretap Yuteya tokol; kiceke Kalilaya okoy kunyi mite yawut wuli.”

<sup>6</sup>Ntowo kulim Pilato kuyunyoto, kutep kule, “Po cicitenyi Kalilaya?”

<sup>7</sup>Nteyu kowo kunket kule cepoytowune Yesu koretap Erote, kukoyito Yesu cekwer kuwo wule mite Erote, omnye kimite nyo pesyosyecoto Yerusalem.

<sup>8</sup>Nteye kotoköse Erote Yesu, kuñerec koromun, omnye kikilim neto ñalek ce nöme Yesu, kunyo kisotyini kule mosukukäs kwiye pelutok cepo kakitat.

<sup>9</sup>Kutepe Erote Yesu teputek ce cañ, ntene kuis Yesu nye kipuryo kot kuwekyi neto ñolyo mpo akenke.

<sup>10</sup>Yoto kuyonñ tisik cewoyec oko konetikap ntarastinek oñnkuwosontyi Yesu kumwoy ñalek cepo swama.


<sup>11</sup>Kunyil oñnkurorci Erote oko sikarekyi Yesu, oñnkulokyi siret nye topon; oñnkuketita cekwer kuwo wule mite Pilato.

<sup>12</sup>Kuceke pesyonoto kucomnyo kwek coronut yec Erote oko Pilato, omnye kisenkerekey cek kunyo.

<sup>13</sup>Kukur Pilato kukwa kopur wanak tisik cewoyec oko poytoyik oko piko,

<sup>14</sup>oñnkumwoci cek kule, “Kokweru akwek cici kuco wule omite ani oñnkwowosontyi omwowu kule, mose piko kutay kurup ntarastinek. Kunyo kokir ñalekyi om yu po taymwakwek, ntene puryo kot onyuru ani lelis nye miyat nye ponto kuyu wulo omwoytoy akwek.

<sup>15</sup>Kunyo mpo Erote puryo kot kunyorta neto lelis, omnye koketwec acek. Kunyo puryo kot kwiye neto ñolyo nye miyat nye misyini cepakäce.



- <sup>16</sup>Mosokoyite ani wocepas korokonik, nteye kapok atyakte.”
- <sup>17</sup>[Om pesyetap sakwetap Yutayek nye cekure Keytayet kimuce Pilato kutyokyi piko mopusyontet akenke.]
- <sup>18</sup>Yoto kupol piko tokol koromun kumwoy kule, “Pakāc cici! Oṅnkityokwec acek Parapa!”
- <sup>19</sup>(Kicerat cekerta Parapa mopusi om ṅalek ce kikwonykwonyokis om moṅet oko omnye kiporis neto.)
- <sup>20</sup>Kuṅololyi Pilato yec piko, omnye kimöce kule atyakte Yesu.
- <sup>21</sup>Ntene kutosyikey piko tokol kupol kumwoy kule, “Wuyite! Wuyite! Wuyitoci neto murtowontet!”
- <sup>22</sup>Kumwoci Pilato yec piko aret nyepo somok kule, “Omne! Lelis ne nye kukwiy? Puryo kot anyoru ani lelis nye miyat nye misyini cepakāce! Kunyo mokoyite ani wocepas aṅnkatyakte.”
- <sup>23</sup>Ntene kutosyikey piko tokol kupol koromun kumwoy om swamet kule, “Misyini cewuyitoci murtowontet.” Nto om letut kupēlis polotetap piko.
- <sup>24</sup>Yoto kumutyi Pilato musankut Yesu kuyu wulo komoktoy cekto.
- <sup>25</sup>Kutyakta Pilato cito nyo komöce cekto, nyoto kunye kiratat om mopusi om ṅalekap kwankwaṅatet oko porisyet, oṅnkukoyito Yesu kuyiyta kuyu wulo komoktoy cek.
- <sup>26</sup>Nteye kimite cikwer Yesu, cetuye om aran Simon nyepo koretap Kurene nye kicone koret saṅ kuconi moṅet, kunām cek neto oṅnkyikoci kukonopat murtowontet oṅnkunam letutap Yesu.
- <sup>27</sup>Kupa piko ce caṅ kurup Yesu let oko koruk ce kiriroti kusyekotikey montuwu kurire Yesu.
- <sup>28</sup>Kuwekyikey Yesu korucoto oṅnkumwoci kule, “Tipikap Yerusalem, monte cerirena ani, arirekey akwek nkit pate oko lekokwok.
- <sup>29</sup>Omnye mosukupunto pesyosyek ce kwoni ce mosicemwoy piko kule, ‘Ḍerekotin koruk co kisonon, oko montuwok ce puryo kot kuyiy oko kitinak ce puryo kot kureris.’
- <sup>30</sup>Om pesyosyecoto ye mosukumwoci piko tulonok kule, ‘Olulyec acek!’ Oṅnkumwoci lakemosyek kule, ‘Awunyec acek!’
- <sup>31</sup>Omnye ye yicini piko ṅalek ceyucu ketit nye ata, mosukwiy kulene nye yamat?”
- <sup>32</sup>Yoto cekwer piko alak oyeny ce kikowurta wocepakāc oko Yesu.
- <sup>33</sup>Nteyu kowo ciyitita cek ye cekure kule, “Rokyetap Metit.” Cekwertoci Yesu murtowontet om yoto, neto oko pikey oyeny, kopurune ake yewutap tay, kopurune ake yewutap let.



- <sup>34</sup>Kuñalal Yesu kumwoy kule, “Papa, kalye nyi cek! Omnye puryo kot kunkete kito nye yiye.” Kupcicin sikarek sirokyi kuporci kirotyet.
- <sup>35</sup>Kuyon̄ yoto piko ce kimite kuköse ye kimite kuroricini koncurure poytoyik Yesu kumwowu kule, “Kisope neto piko alak; kunyo kusopkey pa neto nkit ye cici kunye ðapanet nye kikwey Yiyintet!”
- <sup>36</sup>Kurorici mpo sikarek Yesu, oñnkukwa ye kimite neto oñnkukoci finyonik ce mintililec koromun.
- <sup>37</sup>Oñnkumwoci kule, “Ye yiku nyi Kinko nyepo Yutayek, sopkey pa nyi nkit.”
- <sup>38</sup>Cesil murtowontet parak ñalecu kule, “NYI KU KINKO NYEPO YUTAYEK.”
- <sup>39</sup>Yoto kuñalal cito akenke om pikey oyeny nye kiwuyitot kucup Yesu kumwoy kule, “Puryo kot yiku nyi ne ðapanet? Kunyo sopkey pa nyi nkit oñnkisopec mpo acek.”
- <sup>40</sup>Ntene kuwekyi kupolyi cito nyin ake kumwoci kule, “Puryo kot yweyi nyi Yiyintet? Omnye ceponte musankut nye kerkey oko nyenyi.
- <sup>41</sup>Ntene po musankut nyinyo manta, omnye kocenyoru acek ce rokenec om tukuk ce kiciy. Ntene puryo kot kwiy cici lelis nye miyat.”
- <sup>42</sup>Kumwoci cicoto Yesu kule, “Yesu oñnkisota ani om pesyet nye con̄i om poytoyisyen̄uñ.”
- <sup>43</sup>Kuwekyi Yesu kumwoci cicoto kule, “Komwowuñ ani ñalek cepo manta kule, om pesyoni mosicipur wanak oko ani om koretap Yiyintet wule topon.”
- <sup>44</sup>Ntowo kupunto sawet lö nyepo pet, kunäm menonet koret tokol okoy kupunto sawet sokol nyepo kosoleny.
- <sup>45</sup>Yoto kutay asista nye meluwu, kukerer kupciwunekey oyeny siret nye cepciye otepto nye Nyetilil om kotap Yiyintet.
- <sup>46</sup>Kokurto Yesu om kutit nyewo kumwoy kule, “Papa, okocini ani sponmwani yewuniyekuk.” Nteyu kowo kuwany kumwoy kuyunyoto, kume.
- <sup>47</sup>Nteye kotoköse nyewo nyepo sikarek tukuk ce keyokis, kukasta Yiyintet kumwoy kule, “Kopuryo kot kupunto cici lelis manta.”
- <sup>48</sup>Nteyu kowo kukäs piko ce kikerurukyikekey yoto kwokukasta, tukuk ce keyokis, kunomen cek kuweckey kupa kestonikwa kusyekotikey montuwu.
- <sup>49</sup>Ntene kuyon̄ ye low kuminiñ piko co kinkete Yesu, oko koruk co kikwontoykey neto kuceke Kalilaya. Kukäs cek tokol ñalecutecu.
- <sup>50-51</sup>Kimite citake nye cekure Yosep, nye kirwokin, nyepo kokwetap Yutayek oñnku ci nye ki siken koromun. Kipuryo kot kucäm neto kirworetap cut oko tukuk ce kikwi. Kipo neto moñetap Yutayek nye cekure Arimaseya. Kimite neto kukene poytoyisyetap Yiyintet.
- <sup>52</sup>Kuwo cicoto wule kimite Pilato oñnkusom cikoci neto portap Yesu.



<sup>53</sup>Kunum kurekune musto kucone murtowontet, oṅnkurate suket nyelel, oṅnkukoci mwenet nye kicepäl rwantet kwek kepen, nye kipuryo kot cetupci citake tokol.

<sup>54</sup>Kipesyet nyoto nye kiceyiytoykey omnye kikirik kwek pesyetap Sapat.

<sup>55</sup>Kuwetokey Yosep koruk co kinomu Yesu kuceke Kalilaya okoy wokukäs cek topon mwenet oko wule kacemuyta portap Yesu.

<sup>56</sup>Oṅnkunomen cek kuweckey kupa ka wokuyiyta mwaninek co poṅu sukuṅet kusut kwokuyile musto. Yoto komuny cekto om pesyetap Sapat kuyu wule yunto ntarastinek.

## Luka 24

<sup>1</sup>Nto kerir koret pate ye kipesyetap Santey, kupa koruk okoy kupunto ye kimite mwenet, kusute cek mwaninek co poṅu ce kikikwiya.

<sup>2</sup>Ntene wokunyor kucewunukto rwantet nye kicekere mwenet.

<sup>3</sup>Ntwo kowut orit, yoto kipuryo kot kunyor portap Mokoryontet Yesu.

<sup>4</sup>Nteye kimite korucoto kokite, yoto pakenke kukwa piko oyeny ce kelac sirok ce lelac ce lekecectos oṅnkuyoye komos om ye kimite cekto.

<sup>5</sup>Kumuyo korucoto koromun, oṅnkuwec metewokwa kukäs ṅony, kumwoci picoto cek kule, “Omne socenye akwek, wule mite muswek ce kipok neto cito nye sopot?”

<sup>6</sup>Puryo kot kumite yu; kokotutune met. Asot pa ṅalek co kimwowok akwek neto ye kimite Kalilaya kule,

<sup>7</sup>“Mosicenäm weritap cito oṅnkyikoyito kunäm yewuniyekap piko ce miyotec; oṅnkuwo cewuyitoci murtowontet, nteye pesyetap somok ciṅet kotutune met.”

<sup>8</sup>Yoto kusot korucoto ṅalekap Yesu.

<sup>9</sup>Kunomene cek wuloto kimite mwenet; oṅnkupa wokumwoci ṅalek tokol kiyokik taman ok akenke oko piko alak tokol.

<sup>10</sup>Korucoto ku mpo, Mariyam nyepo moṅetap Maktala, oko Yoan, oko Mariyam kametitap Yakopo; cekto coto wanak oko koruk alak. Kumwoci cek Kiyokik ṅalek tokol.

<sup>11</sup>Ntene kusot Kiyokik yoto kule, perperyo pate ṅalek ce komwoy koruk, yoto kutay macäm ṅalekwa.

<sup>12</sup>Ntene kuṅet Petero oṅnkulapat okoy ye kimite mwenet, ntwo kupunto; kuyim kukoyito; yoto kukäs pate sirok co cemuytoy musto, ntene kipuryo kiy ake tokol. Kunomen kuweckey kuwo ka kokitote tukuk ce kukwiyokis.

<sup>13</sup>Om pesyonoto akenke, ye kimite kupeti konomik oyeny kaytake nye cekure Emawus nye kimite kilomitanik taman kuceke Yerusalem.

<sup>14</sup>Nteye kimite cek kupeti om aran kuṅololoti kurwoke tukuk ce kukwiyokis,



- 15yoto kuco Yesu ye kimate cek oṅnkupetakey wanak tokol.
- 16Kukäs cek neto, ntene kipuryo kot konket kule neto ku ṅo.
- 17Kumwoci neto cek kule, “Ḍal ne cu oṅloloti akwek yu omite opeti?” Kuyonṅ cek om yoto konyer kusiriny tokoywekwa.
- 18Kuwekyi akenke om cekto nye cekure Kliopa kumwoci kule, “Nyi nkit pate tontet nye mite Yerusalem nye puryo kot konkete tukuk ce kukwiyokis om wuloto?”
- 19Kutepe neto cek kule, “Kiy nye kukwiyakay?” Kuwec cek kumwoci kule, “Ḍalekap Yesu nyepo Nasaret, cito nye ku workoyo nyepo swamet om ṅalek ce kukwiye om wule mite Yiyintet oko wule mite piko tokol.
- 20Ntene kunyo kunäm tisik kyacek cewoyec oko poytoyik oṅnkuwosontyi kumutyi musankut cepakäc kume cewuyitoci murtowontet.
- 21Kunyo kucisot acek kule neto nye mokusop kusor pikap Israel! Kunyo kutokumite ṅalekyo tokol yo, pesyetap somok yawut nyi kuceke kweyokis ṅalecato.
- 22Kunyi kucikite acek koromun koruk alak ce kucepontekey tokol ce kamusta pesyoni kerir koret pate kupa wule mite mwenet,
- 23ntene puryo kot wokunyor pornyi, kuwekey cek oṅnkukwa kwokumwoy kule keporcikey kuṅoṅkyi malaykanik ce komwoci cek kule, sopot neto.
- 24Kapa mpo pesyoni piko alake ce kucepontekey acek tokol okoy wule mite mwenet, wokunyor mpecek manta kuyu wulo komwoytoy koruk, ntene puryo kot kukäs cekto neto.”
- 25Kuwekyi Yesu kumwoci cek kule, “Oyiku akwek pic ce perper, ce oponte mukuleywek ce wuyec ye mocäm ṅalek tokol ce kimwoy workoyik!
- 26Kipuryo kot kumisyini kutanṅany Ḍapanet om tukucutecu sukowut woyin nyi?”
- 27Yoto kuporci kumwoci neto cek ṅalek tokol ce kicemwoy ce nöme neto om silutekap Yiyintet, kuceke kitaputap Moses oko silutek tokol cepo workoyik.
- 28Nteyu kowo kukwa cek okoy kurikta kayta nye kipeti, yoto kuyiytakey neto nye möce kule atil akeyte cek kuwo tay;
- 29ntene kurany cekto neto kumwoci kule, “Cipur oko acek, omnye kokwimen, kunyo mite kurotorote koret.” Kuwo neto koto orit wokopur oko cekto.
- 30Nteyu kowo kopur neto oko cek kwomis, kunäm neto mukatyantet oṅnkusomnci oṅnkupetec oṅnkukoci cek.
- 31Yoto kuṅoṅokis konyekwa kusow konket neto, oṅnkupote konyekwa.
- 32Kuṅalal konomikey oyeny kwicek nkit kumwoy kule, “Kopuryo kot kwamec acek montuwok yo koṅlolowec neto om aran kuṅoṅwec ṅalek ce mite silutekap Yiyintet.”





33Yoto pakenke kuḡetyo cek lakwar, oḡnkunomen kupa Yerusalem; wokunyor kiyokik cut taman ok akenke ok piko alak kumite keruruckey wanak. Kimite yoto cut kuḡolole kumwowu kule,

34“Kokotutune met mokoryontet manta! Omnye kokuporcikey Simon!”

35Yoto kuporci kumwoci konomik co koyeny cut ḡalek tokol ce keyokis om aran oko ye kosowu kunket cek Mokoryontet ye kopetece mukatyantet.

36Nteye kitokumite cek kuporcini kumwocini cut ḡalecato, kuco pakenke lakwar Mokoryontet nkit oḡnkuyoḡe kwenumwa, oḡnkumwoci cek kule, “Opurte kalyet.”

37Kumuyo cek koromun; kusote kule toskoy ceköse atotoy.

38Ntene kumwoci neto cek kule, “Omne somuye kuyunyi aḡnkasot om kasoteywekwok ḡal ceyucu?”

39Akäs pa akwek yewuniyekwani oko kerekokwani. Ani nyitenyi. Anäma ani pa akwek oḡnkokäs; omnye puryo kot kuponto atotoy panyek oko koyek kuyu cu oponte ani.”

40Kumwoy ḡalecato kuyunyoto oḡnkuporci cek yewuniyekyi oko kerekokyi.

41Nteye kimite cek kutompo kot kuyen kucäm kule manta ḡalecata om ḡerekwek ce kiponto oko kakitatet; yoto kutepe neto cek kule, “Oponte akwek om yu kiy nye moyam?”

42Kukoci cek neto purpuryontet nye kaciyo kurur.

43Kunäm neto oḡnkwam kuköse cek om konyekwa.

44Kumwoci Yesu cek kule, “Dalecutecu kuco kyomwowo akwek ye kitocepontekey, yo kyomwowok kule, mosukwitita kupoyit manta ḡalek tokol ce kicesil ce nömo ani om ntarastinekap Moses oko silutekap workoyik oko cepo tumwonikap kakastayet.”

45Yoto kuḡany neto kasoteywekwa kunket silutekap Yiyintet,

46oḡnkumwoci cek kule, “Dalecutecu kuco kicesil kule, ‘Misyini kutany ḡapanet; oḡnkyiḡet kotutune met ye pesyetap somok.

47Oko kule; om kaynenyi mosicemwoci pikap koret tokol lokoywek cepo reḡetapkey oko kakalyayetap miyotyoni; kuceke ḡalecato Yerusalem.’

48Kunyo oyiku akwek muncururwanikwani cepo ḡalecutecu.

49Kunyo mosoyoku ani nkit kuco wule omite akwek neto nyo kikirto Papamwani. Ntene opur moḡonitenyi okoy ye kocilokwok akwek swamet nye cone torot.”

50Yoto kuntoci Yesu cek kukwer kuḡete moḡet kupa okoy kupunto Pesaniya, ntwo kupunto yoto kunömnci Yesu yewuniyekyi torot kusomnci cekto.

51Nteye kimite kusomncini cekto kupeyok kupciykey om wule mite cek, cesut neto kuwo torot.



**52**Yoto kukutuny cek kusay Yesu, oŋkuwekey tokol kupa Yerusalem kuponto ŋerekwek ce caŋ.


**53**Yoto kopurune cek pesyosyek tokol kotap Yiyintet orit kukostoy Yiyintet.



## Yowana

### Yowana 1

- <sup>1</sup>Kimite ɲolyontet kuceke towunot. Kipontokey ɲolyontet Yiyintet, ɲolyontet kunye Yiyintet.
- <sup>2</sup>Kipontokey ɲolyontet Yiyintet kuceke towunot.
- <sup>3</sup>Kicitany tukuk tokol kupunte wule mite neto, puryo kiy mpo akenke nye mite koret nye kipuryo kot citany kupunune wule mite neto.
- <sup>4</sup>Kinyorta tukuk tokol soponto wule mite neto, kwek soponto lakweyetap piko, soponto nyenyi kunye kisut lakweyet kuco wule mite piko.
- <sup>5</sup>Lucini lakweyet menonet, oŋnku puryo komuce menonet kenysis kot komis lakweyet.
- <sup>6</sup>Kiyok Yiyintet kiyokintenyi, citake nye cekure Yowana,
- <sup>7</sup>nye kico cokwek muncururwet nye kiporci piko lakweyet, sukuŋet kulim piko tokol lokoywek oŋnkuyen kupunte wule mite neto.
- <sup>8</sup>Kipuryo ku neto nye lakweyet, ntene kico cokupor ɲalek ce nōme lakweyet.
- <sup>9</sup>Lakweyet nyitenyi nyepo manta nye coni koret oŋnkukweny piko tokol.
- <sup>10</sup>Kunyo kimite neto koret, kitany Yiyintet koret kupunte wule mite neto, oŋnkurok kipuryo kot kunket koret kule neto ku ɲo.
- <sup>11</sup>Kico neto korenyi ntene kutay pikyi matoroc kuŋerekyi.
- <sup>12</sup>Ntene kuŋerekyi kutoroc piko alake oŋnkuyen ɲalekyi. Yoto kukoci neto picoto kamukeywek kwek lekokap Yiyintet.
- <sup>13</sup>Ntene kipuryo kot kwek cek lekokap Yiyintet om aret kuyu wulo ceyitoyi piko, nto om corokyinot nyepo piko, ntene Yiyintet nkit kunye Papamwa.
- <sup>14</sup>Kuweckey ɲolyontet kwek ci oŋnkopurune wule ce mite. Kicekäs acek woyinto nyenyi nye ponto poypoyet nyewo oko ɲalek cepo manta. Woyinto nyitenyi kunye kinyor neto kuyu weritap Papa nye akenke pate.
- <sup>15</sup>Kiŋalale Yowana ɲalek ce nōme neto kumwoy kule, “Oŋyi cito nyo kyogolole ani omwowu ɲalek ce nōme neto kule, cito nye coni om letumwani kunye nyewo kupëlo, omnye kimite neto om towunot kutompo kot otuku ani.”
- <sup>16</sup>Om poypoyenyi nyewo koromun kunye kucenyoru acek tokol kupeyok ce caŋ cerupkey kuceke ake okoy ake.
- <sup>17</sup>Kikon Yiyintet ntarastinek kupunune wule mite Moses, ntene kico poypoyenyi oko ɲalek ce po manta kopunune wule mite Yesu Kristo.
- <sup>18</sup>Puryo ci mpo akenke nye kikäs Yiyintet, Ntene Werit akenke pate, nye kerkey oko Yiyintet oŋnkopurune komostap Papa kunye kiporwec acek Yiyintet.



- <sup>19</sup>Dalek cu ce kimwoy Yowana ye kiyoku Yutayek om Yerusalem tisik oko lefik kwokutepe neto kule, “Nyi kuḡo?”
- <sup>20</sup>Kipuryo kot kutay Yowana mowekyi cekto. Ntene kitorci kumwoci kule, “Puryo kot oyiku ani Dapanet.”
- <sup>21</sup>Kutepe cek Yowana kule, “Kunyo yiku nyi ḡo? Yiku nyi Eriya?” Kumwoci Yowana cekto kule, “Puryo kot kwani nyo!” Kutepe cek neto kule, “Yiku nyi workoyontet?” Kuwec Yowana kule, “Puryo kot kwani nyo.”
- <sup>22</sup>Kumwoy cek kule “Mwowec acek ḡolyontet nye wocemwocini piko co kweyokwec. Kurekey nyi kule oyiku ḡo?”
- <sup>23</sup>Kuwekyi Yowana kumwoci cek kule, “Oyiku ani polotetap cito nye pole kitela kule, ‘Asat kurotakey aret nye wete Mokoryontet!’ ” Kimwowu workoyontet Isaya ḡalecutecu.
- <sup>24</sup>Yoto piko co kiyoku Farasayek.
- <sup>25</sup>Kutepe cek Yowana kule, “Ye puryo kot yiku nyi ḡapanet, oḡnkupuryo kot yiku Eriya nto workoyontet, kunyo omne sepotisonisiyi nyi?”
- <sup>26</sup>Kuwekyi Yowana kumwoci kule, “Opotisonisiye ani peko, ntene mite citake nye keyoḡe kwenumwakwek nye puryo kot oḡnketi.
- <sup>27</sup>Cito nyoto coni om letumwani kunye puryo kot oyeme ani kot atyac porokap kweyonikiyi.”
- <sup>28</sup>Kikwiyokisiye ḡalecutecu tokol Pesaniya om oyinetap Yortan pitonin wule kipotisonisiye Yowana.
- <sup>29</sup>Ntowo kuyekune, kukäs Yowana Yesu kuconi wule mite neto, yoto kumwoy kule, “Akäs pa, keciryetap Yiyintet nye numu miyotyetaḡ Koret!
- <sup>30</sup>Cito nyitenyi nyo kwoḡolole yo kwomwowu kule, ‘Coni om letumwani cito nyewo kupölo, omnye kimite neto om towunot kutompo kot otoku ani.’
- <sup>31</sup>Kipuryo kot oḡnket kule neto ku ḡo. Ntene kyaco ani copotisonisiye peko sukuḡet aparte cinket neto om Israel.”
- <sup>32</sup>Dalek cu kuce kitor Yowana kumwoy kule, “Kyakäs ani Muyet Nyetilil kurekune torot kuconi ḡony kuyu swarar oḡnkopure metinyi.
- <sup>33</sup>Oḡnkurok yoto kipuryo kot oḡnket ani neto. Ntene Yiyintet nyo kiyokwo copotisonisiye peko nye kimwowo kule, ‘Cito nyo kekäs kurekyi Muyet Nyetilil oḡnkopure metinyi kunye cito nyoto nye potisonisiye Muyet Nyetilil.’ ”
- <sup>34</sup>Kumwoy Yowana kule, “Kwakäs ani neto kunyo omwowok kule neto kunye Weritap Yiyintet.”
- <sup>35</sup>Ntowo kuyekune kimite Yowana wuloto yec kupontokey konomikiyi oyeny.



- <sup>36</sup>Yoto kukäs Yowana kuweti Yesu kupunte ye kilekite cekto, kumwoy kule, “Akäs pa onyi keciryetap Yiyintet.”
- <sup>37</sup>Yoto kulim konomikiy cokey oyenku kumwowu neto ñalecato, kupa kupetakey Yesu.
- <sup>38</sup>Kuwekey Yesu kukäs let, nteye katoköse kurupe cek neto kutepe kule, “Ocenye ne akwek?” Kuwec kumwoy kule, “Rapi! Poru kaynana kule ‘Konetintet’ Minye nyi ono?”
- <sup>39</sup>Kumwoci Yesu cek kule, “Akwakäs.” Yoto kupa cekto oko neto okoy wokukäs wule minye; onkupur cek tokol pesyonoto kwimen, kikipunto sawet yoto taman nyepo kosoleny.
- <sup>40</sup>Cito akenke om picoto oyeny nye kilim ñalekap Yowana onkuwo kunäm Yesu ku Antereya mutakwametitap Simon Petero.
- <sup>41</sup>Yoto pakenke kunyor Antereya mutakwam Simon onkumwoci kule, “Kacenyoru Kristo.” (Poru kaynana kule Dapanet.)
- <sup>42</sup>Kukwer Antereya Simon okoy wule mite Yesu. Kukäs Yesu Petero onkumwoy kule, “Yiku nyi so Simon weritap Yowana, kunyo mosicekurenin kayneñuñ Kefa (nye poru kaynana kule Petero, nto Kitawet.) ”
- <sup>43</sup>Ntowo kuyekune kumac Yesu kule awo Kalilaya, yoto kunyor Filipino kumwoci nyo kule, “Nama cepetekey ani.”
- <sup>44</sup>Filipo ku cito nye kipo Pesasayita moñet nye kiminye Antereya oko Petero.
- <sup>45</sup>Yoto kunyor Filipino Nasanael onkumwoci kule, “Kacenyoru acek neto cito nyo ksil Moses ñalek ce nöme neto. Yesu nyitenyi weritap Yosep nye cone Nasaret.”
- <sup>46</sup>Kutep Nasanael kumwoy kule, “Muce ra kotokune kitake nye topon Nasaret?” Kuwekyi Filipino kumwoci neto kule, “Co cekäs pa.”
- <sup>47</sup>Nteye kotoköse Yesu Nasanael kuconi wule mite neto, kuñalal ñalek ce nöme neto kumwoy kule, “Käs pa onyi Isroloyintet sikwo nye moponto lelis!”
- <sup>48</sup>Kutepe Nasanael Yesu kule, “Kenketeno ani ne nyi,” kuwekyi Yesu kumwoci kule, “Kwakäsiñ yo kwemite mokoyontet ñony kutompo kot kukuriñ nyi Filipino.”
- <sup>49</sup>Kuwekyi Nasanael kumwoci Yesu kule, “Konetintet; yiku nyi Weritap Yiyintet. Yiku kinko nyepo Israel!”
- <sup>50</sup>Kumwoy Yesu kule, “Keyen nyi so omnye komwowuñ kule, kwakäsiñ ye kwemite mokoyontet ñony? Mese käs cewoyec ce pële coto.”
- <sup>51</sup>Onkumwoci kule, “Komwowok ñalek cepo manta kule mosakäs kuyatakay wulin po torot onkokäs malaykanikap Yiyintet ce loñntoy onkureku kurekyini Weritap cito!”

## Yowana 2



- <sup>1</sup>Nto om letutap pesyosyek oyeny, kimite sakwetap komütisyyet nye kimite Kana om koretap Kalilaya. Kimite kametitap Yesu wuloto.
- <sup>2</sup>Kikicekur Yesu oko konomiky kupa sakwet.
- <sup>3</sup>Nteyu kowo ceye Finyonik tokol kupok, kumwoci kamet Yesu kule, “Kororci piko Finyonik.”
- <sup>4</sup>Kuwekyi Yesu kumwoci kule, “Cepyos! Mokeno ne kutompo kot kupunto pesyosyekwani!”
- <sup>5</sup>Kumwoci Kametitap Yesu mutworik kule, “Aṅnkayiy kiy ake tokol nye komwowok.”
- <sup>6</sup>Kimite yoto terenik cepo peko cepo rwontok ce kiyite lö, kuyu wule yunto ntarastinekap tinitap Yutayek om kowunet. Kimuce kunyiy teret akenke om coto peko cepo litanik pokol akenke.
- <sup>7</sup>Kumwoci Yesu mutworik kule, “Anyit peko terenicu.” Yoto kunyit cek kunyiy peko kule pak.
- <sup>8</sup>Kumwoci Yesu cek kule, “Oromu yawut peko oṅnkusutyi cito nyo poytoy sakwet.” Yoto kusutyi cek neto.
- <sup>9</sup>Kucemcem cito nye poytoy sakwet peko ce kaweckey kwek Finyonik, nye kipuryo kot kunkete wule kukwone ntene kunkete mutworik ce koromu wule kokwone. Yoto kukur cicoto cito nye kemütisiy,
- <sup>10</sup>oṅnkumwoci kule, “Nyosyi piko tokol kukoci piko Finyonik ce toponec nteye koyesyo piko kot kuyem kukon om letut Finyonik ce toytoy, ntene kunyo kekonor nyi Finyonik ce toponec okoy kunyi!”
- <sup>11</sup>Kinyosyo Yesu kwiye ṅolyontoni po kakitat Kana om koretap Kalilaya. Kupor neto woyinnyi om wuloto, yoto kuyen konomiky ṅalekyi.
- <sup>12</sup>Nto om letutap ṅalecato, kunomen Yesu oko kamet oko mpo mutakwam oko konomiky kuwo okoy Kapernaum, wokopur wuloto pesyos ce ṅeri.
- <sup>13</sup>Kikirik yoto kupunto sakwetap Yutayek nyepo Keytayet. Kuwo Yesu yoto kulaṅnta Yerusalem.
- <sup>14</sup>Wokunyorta Kotap Yiyintet orit piko ce kimite kepur ce kyolyoy tuka oko swororok oko piko co wöle pesanik ce kepur cekto yepo mesanikwa.
- <sup>15</sup>Yoto kwiy Yesu porok kwek kipoket oṅnkukwet tokol kupete kotap Yiyintet, kecirek oko tuka, oṅnkumil mesanikap piko co wölisiy oṅnkuseret pesanikwa.
- <sup>16</sup>Kumwoci neto piko co kolyoy swororok kule, “Osut tukucu kupete yu. Monte ceyyi Kotap Papamwani kwek matepo!”
- <sup>17</sup>Yoto kusot konomik kule mwowu silutekap Yiyintet kule, “Ayi Yiyintet ṅerekwekwani ce cöme koṅuṅ kuce loyos kuyo mata.”





- <sup>18</sup>Kuwekyikey Yutayek neto oṅnkutepe kule, “Kiy ne nyepo kakitat nye mucu nye yiy sukuṅet porwec acek kule ponte kamukeywek ce yiye tukucu?”
- <sup>19</sup>Kuwekyi Yesu kumwoci cekto kule, “Oturpup pa akwek koyi po Yiyintet, mosatec ani kuyo om pesyosyek somok pate.”
- <sup>20</sup>Kutepe cek neto kule, “Metece nyi pesyos somok pate kuyo koyi kicetece kenysisyek artam oko lö?”
- <sup>21</sup>Ntene kotap Yiyintet nye kiṅolole Yesu ku porto nyenyi nkit.
- <sup>22</sup>Nteyu kowo ciṅet neto kotutune met, kusot kusow konomiky kule kimwoy neto ṅalecutecu, kuyen cekto ṅalek cepo silutekap Yiyintet oko ṅolyontet nye kimwoy Yesu.
- <sup>23</sup>Nteye kimite Yesu Yerusalem ye ki pesyetap sakwetap Keytayet kuyen piko ce caṅ ṅalekyi yu kowo kukäs tukuk cepo kakitat ce kikwiye neto.
- <sup>24</sup>Ntene kipuryo kot kukeneky Yesu cekto, omnye kinkete neto topon wule yunto piko tokol.
- <sup>25</sup>Kipuryo kot komöce neto citake nye komwoci wule yunto piko omnye kinkete tokol ce mite mukuleywekwa.

### Yowana 3

- <sup>1</sup>Kimite citake nye cekure Nikontemo nye ki poytoyintet nyepo Yutayek, nye kipo neto luket nyepo Farasayek.
- <sup>2</sup>Kuco pesyet ake komoy wule mite Yesu oṅnkucokumwoci kule, “Konetintet, cinket acek kule yiku nyi konetintet nye cone wule mite Yiyintet, omnye puryo ci nye mucu kot kwiy tukuk cepo kakitat cu yiye nyi, tos pate ye pontokey cicoto Yiyintet.”
- <sup>3</sup>Kuwekyi Yesu kumwoci neto kule, “Komwowuṅ ani nyi ṅalek cepo manta kule, ye tompo kot ce yi cito aret oyeny kupuryo kot kuköse cito nyoto poytoyisyetap Yiyintet!”
- <sup>4</sup>Kutepe Nikontemo neto kule, “Muce kulene cito nye kiwoyit ce yi aret yec oyeny? Muce pa kowut yec moyetap kamet oṅnkyeyi aret oyeny?”
- <sup>5</sup>Kuwekyi Yesu kumwoci kule, “Komwowuṅ ani nyi ṅalek cepo manta kule, puryo ci nye mucu kowut poytoyisyetap Yiyintet ye tompo kot ce yi cito nyoto om peko oko Muyet Nyetilil.
- <sup>6</sup>Yiye porto porto, kuyi Muyet Nyetilil Muyet Nyetilil.
- <sup>7</sup>Mente kot akite omnye komwowuṅ kule misyini ce iyok aret oyeny.
- <sup>8</sup>Wuse yomet kutokynikey wule möce, lime nyi karumnta ntene puryo kot nketi wule cone nto wule weti. Kuyunyoto wule yunto om wule mite cito nye koceyi om Muyet Nyetilil.”



- <sup>9</sup>Kutepe Nikontemo neto kule, “Muce ñalecu kwiyokis kulene?”
- <sup>10</sup>Kuwekyi Yesu kumwoci kule, “Yiku nyi konetintet nyewo nyepo Israel oñnkurok kupuryo kot nketi ñalecu?”
- <sup>11</sup>Komwowuñ ani ñalek cepo manta kule, ceñololi acek ñalek ce cinketi oñnkyemwowu ñalek ce kicekäs oñnkurok yec kupuryo ci mpo akenke om akwek nye möce kule oyen ñalekyacek.
- <sup>12</sup>Puryo kot oyeni akwek ñalekwani ye komwowok ñalek nöme ñalek cepo koroni, kunyo omuci akwek kulene kot oyen kenysis ñalekwani ye komwowok ñalek ce nöme wulin po torot?
- <sup>13</sup>Kunyo puryo ci mpo akenke nye kilañnta kuwo torot tos pate Weritap cito nyo kireku kucone torot!”
- <sup>14</sup>Kuyu wulo kinomncini Moses erenet parak om kitela, kunyo mosicenomnci parak weritap cito kuyunyoto,
- <sup>15</sup>sukuñet kunyor soponto nye mopoku ci tokol nye kacäm koyen neto.
- <sup>16</sup>Omnye kicäm Yiyintet koret koromun okoy kukon Werinyi akenke pate sukuñet mente kot kupot ci tokol nye kacäm koyen neto, ntene kule sukunyor soponto nye mopoku.
- <sup>17</sup>Omnye kipuryo kot kuyok Yiyintet Werinyi cokwek kontiyintetap koret, ntene kiyok cokwek kosopintetap koret kupunte wule mite neto.
- <sup>18</sup>Ci ake tokol nye keyen Werit, kunye puryo kot cemutyini cicoto musankut, nto ci ake tokol nye katay meyen kukocemutyi kenye cicoto musankut omnye katay meyen Weritap Yiyintet nye akenke pate.
- <sup>19</sup>Musankut kunyi kule, kico lakweyet koret ntene kacäm piko menonet kupël lakweyet, omnye yiye cek tukuk ce miyotec.
- <sup>20</sup>Senkere ci tokol nye yiye ñalek miyotec lakweyet omnye puryo kot kucöme kule aparte kutok ñalek ce miyotec ce yiye neto.
- <sup>21</sup>Ntene ci tokol nye yiye ñalek cepo manta ce toponec kuconi cicoto wule mite lakweyet sukuñet kupor lakweyet kule kikwiye neto yisyenyi om koyweyisyet nye yweye Yiyintet.
- <sup>22</sup>Nto om letutap ñalecutecu, kuwo Yesu oko konomikyiyi okoy koretap Yuteya, wokopur wuloto oko cekto kuwany pesyos oñnkupotisonis.
- <sup>23</sup>Kimite yoto Yowana kupotisonisyi om Ayinon ye kilekite Salem, omnye kimite peko ce cañ wuloto. Kipeti piko wule mite neto, kunyo kipotisonis neto cekto,
- <sup>24</sup>omnye kitompo yoto kot cekerta Yowana mopusi.
- <sup>25</sup>Kucec konomik alake cepo Yowana kutintentyin oko Yutoyintet ake om ñalek ce nöme kowunetapkey nyepo tinit.



- <sup>26</sup>Yoto kupa cek wule mite Yowana oṅnkumwoci kule, “Konetintet tesoti nyi cito nyo kwopontekey akwek tukway om oyinetap Yortan pitonin, cito nyo kiṅolole nyi? Mite yawut neto kupotisonisiyi, kunyo peti piko tokol wule mite neto!”
- <sup>27</sup>Kuwekyi Yowana kumwoci cek kule, “Puryo ci nye muce kiy kenysis, tos pate okoy ye kokukoci Yiyintet cicoto.
- <sup>28</sup>Kunyo oyiku akwek muncururwanikwani ce oṅnketi kule kyomwowu kule, ‘Puryo kot oyiku ani Ḍapanet, ntene kiciyokwani cantoci neto.’
- <sup>29</sup>Cito nye kemütis kunye citap korket, kuyonṅtos tapan coronutepak cito nyo kemütisiyi sukulimntoy kuṅerekyini koromun kutitap cito nyo kemütisiyi ye kaṅalal.
- <sup>30</sup>Kunyo kapok yawut ṅerekwekwani; misiyini kuner neto aṅnkacucukte ani.”
- <sup>31</sup>Cito nyo cone wulin po torot kunye nyewo kupël piko tokol, nto cito nyo cone koret kunye po cito nyoto koret oṅnkuṅolole ṅalek ce nöme koret. Cito nyo cone torot kunye nyewo nyepo tukuk tokol.
- <sup>32</sup>Mwowu neto kupor ṅalek ce kikäs oṅnkulim, ntene puryo ci nye cöme lokoywekyi.
- <sup>33</sup>Ci tokol nye kacäm kuyen lokoywekyi kunye kakuwalkey kule Yiyintet kunye po manta.
- <sup>34</sup>Neto cito nyo kiyok Yiyintet kunye ṅolole ṅalek cepo Yiyintet, omnye kikoci Yiyintet neto Muyenyi Nyetilil nye yeme.
- <sup>35</sup>Cöme Papa werinyi, kunyo kikoci tukuk tokol kopurune yewuniyekap Werinyi.
- <sup>36</sup>Ci ake tokol nye katay macäm kuyen werit kupuryo kot kunyuru cicoto soponto ntene kopurtoy pate nerekwepak Yiyintet cepo kenysis.

#### **Yowana 4**

- <sup>1</sup>Yoto kulim Farasayek kule kokocut Yesu piko oṅnkumite kupotisone konomik ce caṅ kupël Yowana.
- <sup>2</sup>(Ntene ṅalek cepo manta kucu kule kipuryo kot kupotisone neto pic, ntene konomikiyi pate ce kipotisonisiyi.)
- <sup>3</sup>Ntowo kulim Yesu ṅalek ce kicemwowu, kunomene Yuteya kuketitakey kuwo Samariya.
- <sup>4</sup>Nteye kimite kuweti poninekyi om wuloto, kuwo kupunte koretap Samariyek.
- <sup>5</sup>Kuco Yesu okoy kupun moṅetap Samariya nye cekure Sikari nye kilekite mparet nyo kikocini Yakopo werinyi Yosep.
- <sup>6</sup>Kimite wuloto mwenetap peko nye cekure pekap Yakopo. Omnye kikicas Yesu om poninekyi, yoto kopur yepo mwenetap peko tapan. Kimite yoto sawet karik kupunto pet kwen.



- <sup>7</sup>Yoto kuco korket ake nyepo samariyek cokuram peko. Kumwoci Yesu kule, “Kono peko aye.”
- <sup>8</sup>(Kikipa konomiky yoto wule po moŋet wokwolis omik.)
- <sup>9</sup>Kuwekyi korketap Samariyek kumwoci Yesu kule, “Yiku nyi Yutoyintet, oyiku ani cepsamariyantet, kunyo mucu nyi kulene somo kule kono peko aye, omnye puryo kot kuyemntoy tukuk ce kyomisye Yutayek oko Samariyek.”
- <sup>10</sup>Kuwekyi Yesu kumwoci kule, “Nto yunye kukwenket nyi kokotutyetap Yiyintet, oŋnkinket kule ŋo cici somiŋ nyi kule, ‘Kono peko aye,’ nto kenyi nye kesome neto kukoniŋ peko ce ponto soponto.”
- <sup>11</sup>Kumwoy korkonoto kule, “Nyewo, nteyu meponte nyi teret, kunyi kiwo oyinet ŋony koromun, menyorte nyi ono peko ce ponto soponto,
- <sup>12</sup>Yiku nyi nyewo kupël kukonyacek Yakopo nye kikonec acek pecu ce kiye neto oko lekoyi oko tuka ceci pekap oyinoni?”
- <sup>13</sup>Kuwekyi Yesu kumwoci neto kule, “Mosukwam melelya ci ake tokol nye kaye pecu.
- <sup>14</sup>Ntene komo kwome melelya mpo kisic ci ake tokol nye kaye peko ce mokoci ani. Omnye mosokoci ani neto peko cepo soponto ce kosune wule mite neto nyepo soponto nye mopoku.”
- <sup>15</sup>Kumwoy korkonoto kule, “Mokoryontet kono mpo ani pecoto! Sukuŋet komo kwomo melelya mpo kisic, nto komoconi yec mpo wuli caram peko.”
- <sup>16</sup>Kuwekyi Yesu kumwoci kule, “Nomen iwo wekur santeŋuŋ oŋnkiketukey okoy yuteyu.”
- <sup>17</sup>Kuwekyi korkonoto kumwoci kule, “Moponte ani saniya.” Kuwekyi Yesu kumwoci neto kule, “Poye manta mwowu kule, ‘Moponte saniya!’
- <sup>18</sup>Omnye kikomütiŋ nyi sanik mutu, nto cito nye pontekey nyi yawut kunye puryo kot ku santeŋuŋ nyepo manta. Kunyo kemwowu ŋalek cepo manta.”
- <sup>19</sup>Kumwoy korkonoto kule, “Mokoryontet, kakäs kule yiku nyi workoyo.
- <sup>20</sup>Kisoye mpo kukonyacek Yiyintet om tulwoni, ntene omwowu akwek Yutayek kule, ‘Yerusalem pate ku wule misyini cesoye Yiyintet!’ ”
- <sup>21</sup>Kumwoci Yesu kule, “Cepyosyani, yen ŋalekwani, mosukupunto pesyosyek ce puryo kot kusoye piko Yiyintet Papa om tulwoni nto mpo om Yerusalem.
- <sup>22</sup>Puryo oŋnketi akwek Samariyak cito nye osoye, cinket acek Yutayek cito nye cesoye, omnye cone kosopotet wule mite Yutatek.
- <sup>23</sup>Ntene mosukupunto pesyet, kunyo mite yawut yuteyu nye toku piko cepo manta ce soye Yiyintet om Muyet oko om ŋalek cepo manta. Piko cesoye kuyunyoto kuce möce Papa cekto.



- 24 Yiyintet kunye Muyet nye moponto porto, nto piko ce soye neto kuce möce kusoye om Muyet oko ñalek cepo manta.’’
- 25 Kumwoci korkonoto Yesu kule, “Oñket ani kule mosukuco Kristo nye poru kaynana kule Ñapanet. Ye kaco neto mosukuco oñkumwowec acek ñalek tokol.’’
- 26 Kuwekyi Yesu kumwoci neto kule, “Ani nyoto nyi oñololuñ nyi.’’
- 27 Yoto pakenke kupun konomikiyi. Kukite cek koromun kwokunyor kuñolole neto oko korkonoto. Ntene kipuryo mpo akenke om cek nye kitep kule, “Möce ne nyi?” Nto mpo kutep yec kule, “Omne señololyi korkoni.’’
- 28 Yoto kupakakta korkonoto terenyi nyepo peko oñkuwo okoy moñet wokumwoci piko kule.
- 29 “Akwa kwakäs citake nye komwowo ani ñalek tokol ce kyaiyi ikye keny! Puryo kot ku Ñapanet ne nyitenyi?”
- 30 Yoto kunomen piko om moñet kupa wule mite Yesu.
- 31 Kimite yoto konomik kusoysoye Yesu kumwoci kule, “Konetintet, yomisye!”
- 32 Ntene kuwekyi Yesu kumwoci cek kule, “Oponte omik ce oyome ce monket akwek!”
- 33 Yoto kucec konomik kutepekey kwicek nkit kumwoy kule, “Kokosutyi so citake omik?”
- 34 Kumwoci Yesu cek kule, “Omikwani ku kule ayiy cömisyetap neto nyo kiyokwo ani añkaiyi awañte yisyenyi nye kikono.
- 35 Puryo kot omwowu akwek ne kule, ‘Koñet orok amwanu kupunto pesyosyekap kisisyet!’ Komwowok ani kule, akäs pa mparenik koruryo yawut omik kunyo kopunto kisisyet!
- 36 Kunyo mite yawut cikocini musyaret cito nyo kisisyi oñkoruruce omik kupa wule mite soponto nye mopoku, sukuñet kuñereke wanak cito nyo kikolsyi oko cito nyo rurukisiyi.
- 37 Kunyo po manta ñolyontoni mwowu kule, ‘Kolsyi cito ake, kukisis cito ake.’
- 38 Koyoktok ani ape wokisisye omik om mparosyek wule kipuryo kot oyoyisye akwek, kitantane piko alake wuloto, kunyo mosonyoru akwek latik cepo yisyet nye kikwiw cekto.’’
- 39 Kuyen Samariyek ce cañ cepo moñonoto ñalekap Yesu, omnye kumwoy korkonoto kule, “Komwowo ani ñalek tokol ce kyaiyi ikye keny.’’
- 40 Yoto ntowo kukwa Samariyek okoy ye kimite Yesu, kusom cekto neto kopur oko cekto. Kopur Yesu wuloto kuwany pesyos oyeny.
- 41 Kutosyikey yec piko alake ce cañ kuyen om ñalekyi ce kimwoy.



<sup>42</sup>Kumwoci piko korkonoto kule, “Kociyen acek yawut, ntene nye puryo kot ku om ñalek co kwemwowu nyi, ntene omnye kucelim acek nkit ñalekyi, kunyo kucinket kule neto kunye kosopintet nyepo manta nyepo koret kumukul.”

<sup>43</sup>Nteyu kowo kopur Yesu wuloto kuwany pesyosyek oyeny, kunomen kuwo okoy Kalilaya.

<sup>44</sup>Omnye kikimwoy Yesu nkit kule, “Puryo kot ciyweye workoyo om korenyi.”

<sup>45</sup>Ntowo kupun Yesu Kalilaya, kutoroc kuñerekyi piko cepo wuloto neto omnye kikikäs cekto tukuk tokol ce kikwiw Yesu om Yerusalem ye kipesyet nyepo sakwetap Keytayet, omnye kikipa mpecek sakwet.

<sup>46</sup>Yoto kuwo Yesu kuketitakey okoy Kana nyepo Kalilaya wulo kiwece peko kwek Finyonik. Kimite wuloto poytoyintet ake nyewo nye kimnyone werinyi om Kapernaum.

<sup>47</sup>Ntowo kulim cicoto kule kucone Yesu Yuteya kuco Kalilaya, kuwo wule mite oñnkusom kule kowo Kapernaum wokusop werinyi nye kikirik kume.

<sup>48</sup>Kumwoci Yesu neto kule, “Puryo ci mpo akenke nye muce kot koyen mpo kisic okoy ye kakäs tukuk cewoyec cepo kakitat.”

<sup>49</sup>Kuwec cicoto kumwoy kule, “Mokoryontet kany cipe kutompo kot kume lekwwemwani.”

<sup>50</sup>Kumwoci Yesu neto kule, “Nomen iwo mokusop weriñuñ!” Kuyen cicoto ñalekap Yesu, kunomen kuwo.

<sup>51</sup>Nteye kimite neto kuweti om aran kutuye mutworiky ce kimwoci neto kule, “Mokusop weriñuñ!”

<sup>52</sup>Kutepe cicoto cek kule kukoykoyitu werinyi kumite sawet kutya? Kumwoy cek kule, “Kumite sawet tisap nyepo pet omutun ye kusope kwostoy yeset neto.”

<sup>53</sup>Yoto kusot kwan okoy kunket kule kumite sawet kuteyoto ye kumwocini Yesu neto kule, “Musokusop weriñuñ.” Yoto kuyen neto oko piko cepo kanyi tokol.

<sup>54</sup>Kunyo ñolyontet nyitenyi kunye po oyeny nyepo kakitat nye kikwiw Yesu letut yu kowo kucone Yuteya kuco Kalilaya.

## Yowana 5

<sup>1</sup>Nto om letutap ñalecutecu, yoto kupunto pesyet nyepo sakwetap Yutayek nyepo tini. Kulañnta Yesu kuwo Yerusalem.

<sup>2</sup>Kimite wuloto om yepo kurketap Kecirek tolilet nye cekure om ñelyeptap Puraniyek “Petisata,” nye kiponto tekewunek mut.

<sup>3</sup>Kimite yoto piko ce cañ ce mnyontos ce koruy tekewunecoto, ce kikoryo oko ce kimwolyos oko ce kinäm mokonkisyek. (Kimite picoto kukonye kule kuwaskey peko.





- <sup>4</sup>Omnye kirekyini om pesyosyek alak malayketap Mokoryontet tolilonoto oŋnkuwas peko, nto cito nye mnyone nye konyosyo kowut orit ye kacewas peko kusope porto ake tokol nye kiponto.)
- <sup>5</sup>Kimite yoto citake nye kimnyan kuwany kenyisyek sosom ok sisit.
- <sup>6</sup>Kukäs Yesu cicoto kumite yoto omnye kinkete kule kimnyan cicoto kuwany kenyisyek ce caŋ. Yoto kumwoci kule, “Möce nyi kule osop?”
- <sup>7</sup>Kuwekyi cicoto kimnyone kumwoci kule, “Mokoryontet, moponte ani ci om yu nye muce kowuteno tolilet ye kawaskey peko, ye omite ani osyeme kule owut orit kukokunyosyo citake.”
- <sup>8</sup>Kumwoci Yesu neto kule, “Det yony, oŋnkinäm kwiririŋuŋ oŋnkiwesetote.”
- <sup>9</sup>Yoto pakenke kusop cicoto, kunäm, kwiririnyi oŋnkuwesetot. Kikwiyokis ŋalecato ye kipesyetap Sapat.
- <sup>10</sup>Yoto kumwoci Yutayek cicoto kicisope kule, “Pesyetap Sapat pesyoni kunyo puryo kot kucöme ntarastinekyo kot torate kwiririŋuŋ.”
- <sup>11</sup>Kuwekyi cicoto kumwoci cek kule, “Komwowo ani cito nyo kesopo kule, ‘Näm kwiririŋuŋ oŋnkiwesetote.’ ”
- <sup>12</sup>Kutepe cek kule, “Do cici komwowuŋ kule, Näm kwiririŋuŋ oŋnkiwesetote?”
- <sup>13</sup>Ntene kipuryo kot konket cicoto kicisope kule ŋo nyoto, omnye kikiwete Yesu yoto oko omnye kimite yoto luket nyepo piko ce caŋ.
- <sup>14</sup>Nto om letut kunyor Yesu cicoto kumite kotap Yiyintet kumwoci kule, “Käs pa kwesop so yawut! Kunyo mente tayiy miyotyoni ye möce kule simesuci yec miyotyet nye pëlisi.”
- <sup>15</sup>Yoto kuwo cicoto oŋnkuwo kumwoci Yutayek kule Yesu nye kwesope neto.
- <sup>16</sup>Om ŋalecato, kucec Yutayek kutany Yesu omnye kikwiyis kusopis ye pesyet Sapat.
- <sup>17</sup>Kuwekyi Yesu kumwoci cek kule, “Yiyisiy Papamwani okokoy, kunyo omite mpo ani oyiyisi.”
- <sup>18</sup>Kutosyi ŋalecutecu Yutayek swamet kumäc kule cepakäc Yesu kume, nye kipuryo kot ku kule omnye kikwiri ntarastinekap Sapat, ntene oko omnye kimwoy kule Yiyintet kunye Papanyi, kuweckey neto kuyoyeckey oko Yiyintet.
- <sup>19</sup>Kuwekyi Yesu kumwoci cek kule, “Komwowok ani akwek ŋalek cepo manta kule, puryo kot kwiye Werit kiy nye nyenyi nkit, yiye pate kito nye köse neto kwiye Papanyi. Kito nye yiye Papa kunye yiye mpo Werit kiyoto.
- <sup>20</sup>Omnye cöme Papa Werit oŋnkuporcini tukuk ce yiye neto. Mosukuporci mpo kwiye tukuk ce woyec kupël cutecu, Sukuŋet akite akwek tokol.



- <sup>21</sup>Kuyu wulo soptoy Papa piko kotutune met kusopco kunyor soponto, kuyunyoto mosukusop Werit kututune met piko co kikwey neto.
- <sup>22</sup>Puryo kot kumutyini Papa nkit ci musanku, ntene kikoci neto Werit kamukeywek tokol cepo musankunek,
- <sup>23</sup>sukuñet kuywey piko tokol Werit kuyu wulo yweye cek Papa. Ci tokol nye puryo kot kuyweye Werit, kupuryo kot kuyweye cito nyoto Papa nyo kiyoku Werit.
- <sup>24</sup>“Komwowok ani akwek ñalek cepo manta kule, ci tokol nye kalim ñalekwani oñnkucām kuyen neto nyo kiyokwani, kuponto cito nyoto soponto nye mopoku. Puryo kot cemutyini cito nyoto musankut, ntene kopunte met kuwo wule mite soponto.
- <sup>25</sup>“Komwowok ani akwek ñalek cepo manta kule, kwoni pesyosyek, kunyo kopun yawut yuteyu ye mosukilim piko ce kipok kutit nyepo Weritap Yiyintet, mosukusopsco piko ce kalim ñalekyi.
- <sup>26</sup>Omnye kuyu wulo cone soponto wule mite Papa nkit, kuyunyoto kikoci Papa Werit kwek nye ponto soponto.
- <sup>27</sup>Kunyo kikoci Papa Werit kamukeywek ce mute musankunek. Omnye Weritap cito neto.
- <sup>28</sup>Monte cikite ñalecu omnye mite kuconi pesyet ye mosokulim piko ce kipok ce mite mwenonik kursyenyi.
- <sup>29</sup>Yoto kuñetyo cek kuloñune mwenonikwa. Mosiñet kotutune met piko co kikwiye tukuk ce toponec oñnkyikoci kusopco, ciñet kotutune met piko co kikwiye tukuk ce miyotec oñnkyewosontyi kulot musankut.”
- <sup>30</sup>“Puryo kot oyiye ani kiy tokol om kamukeywekwani nkit, omute pate musankut kuyu wulo kimwowo Yiyintet, kunyo po manta wule omutitoy musankut, omnye puryo kot osyeme kule ayiy kuyu wule omoktoy, ntene kuyu wulo moktoy neto nyo kiyokwo ani.
- <sup>31</sup>“Ye koporkey kule omwowu ce cikwani nkit, kupuryo kot kupo manta ñalek ce omwowu ani.
- <sup>32</sup>Ntene mite citake nye poru kumwoy ñalek ce nōmo ani om kaynemwani. Kunyo oñnket kule po manta ñalek ce mwowu neto ce nōmo ani.
- <sup>33</sup>Kyoyokte akwek kiyokik kupa wule mite Yowana, kunyo kiñalal neto kupor ñalek cepo manta.
- <sup>34</sup>Puryo kot omöce ani kule misyini oponte cito muncururwet nye nkete ñalecu. Komwowok ani ñalecu pate kule sukuñet osopce akwek.
- <sup>35</sup>Kikerkey Yowana oko tarit nye loye kukweny kulakwayit. Kunyo kyomuc akwek oñrekyi lakweyinto nyenyi om pesyos ce ñeri.



- <sup>36</sup>Ntene oponte muncururwanik cikwani cewoyec ce porto ce pële cepo Yowana. Muncururwanik cutecu ku yisyonutek ce kikono Papamwani kule ayiy. Porto yisyonocutecu kule Papamwani kunye kiyokwani.
- <sup>37</sup>Kunyo Papa nyo kiyokwani kunye ñololtowo. Tompo kot olim akwek kutinyi mpo kisic oñkutompo kot okäs mpo kisic wule yunto tokoyta nyenyi.
- <sup>38</sup>Kunyo puryo kot kumitowune ñalekyi mukuleywekwok orit, omnye puryo kot oyen akwek cito nyo kiyoku neto.
- <sup>39</sup>Osumoni ocenye silutekap Yiyintet omnye osoti kule mocenyorte orit wuloto soponto nye mopoku, oñnkurok yec ñalecato kuce poru ñalek ce nömo ani.
- <sup>40</sup>Kunyo puryo kot ocöme akwek kule cekwa wule omite ani sukuñet onyuru soponto.
- <sup>41</sup>“Puryo kot acenye ani kule amöce onyuru kakastayet om wule mite piko.
- <sup>42</sup>Ntene oñnketok akwek, kule moponte cömisyet nye oyeni Yiyintet om mukuleywekwok orit.
- <sup>43</sup>Kyaconte kamukeywek cepo Papamwani, ntene puryo kot oñerekyo ani akwek, kunyo ye kaco citake om kamukeywekyi nkit, mosoñerekyi akwek cicoto.
- <sup>44</sup>Omuci akwek kulene kot oyen, ye omöce kule cikostoykey akwek kwakwek nkit, ntene oñnkupuryo kot osyeme kule cenyuru kakastayet nye cone wule mite Yiyintet nye akenke pate?
- <sup>45</sup>Kunyo monte cisot kule mosowosontyok ani akwek om wule mite Papa. Moses kunye mosukuwosontyok. Moses nyoto kunyo omite akwek okenekey neto.
- <sup>46</sup>Nto yunye kikyoyen akwek ñalekap Moses kupoyit manta, nto kwocömo mpo ani, omnye kisil neto ñalek ce nöme ani.
- <sup>47</sup>Ntene omnye puryo kot oyeni akwek ñalek ce kisil neto, kunyo omuci akwek kulene kot ocäm ñalekwani?”

## Yowana 6

- <sup>1</sup>Nto om letutap ñalecutecu, kunomen Yesu kuwo kway tampayayetap Kalilaya (Nye cekure yec tampayayetap Tiperia)
- <sup>2</sup>Yoto kurup luket nyepo piko ce cañ neto, omnye kikikäs yisyonutek cepo kakitat ye kisope piko ce kimnyontos.
- <sup>3</sup>Kulany Yesu tulwet parak oñkopur ñony oko konomiky.
- <sup>4</sup>Kikirik yoto sakwetap Keytayet nyepo Yutayek.
- <sup>5</sup>Ntowo kukäsakäskta Yesu, yoto kukäs neto luket nyepo piko ce cañ ce kitosyinikey kukwoni wule mite neto. Yoto kumwoci neto Filipino kule, “Mokyale ano omik ce mokwam picu tecu tokol?”
- <sup>6</sup>(Kuwekyi Yesu kuyunyoto kusyem Filipino, ntene kinkete kito nye mokwi.)



- <sup>7</sup>Kuwekyi Filipo kumwoci neto kule, “Ye sukwomis picu kunyor ci kisic kisic pate, kumöce mukatinek ce kakyale silinkinek ce keytye pokolwokik amwan.”
- <sup>8</sup>Kumwoci Antereya mutakwametitap Simon Petero nye akenke om konomiky neto kule,
- <sup>9</sup>“Mite yu wero nye miniñ nye ponto mukatinek mut cepo nkanuk oko purpurunek oyeny ntene yeme ne coto om picu tecu tokol?”
- <sup>10</sup>Kumwoci Yesu cek kule, “Ayiye piko kopur ñony,” (kimite yoto suswek ce cañ). Yoto kopur ñony piko tokol, kipuntoy piko tokol moronik ce kirice elifunek mut.
- <sup>11</sup>Kunäm Yesu mukatinekey, oñnkusomnci kukasta Yiyintet, oñnkupcici piko ce kokopur ñony, kwiy mpo purpurunek kuyunyoto. Kwomis piko tokol okoy kupiyonjis.
- <sup>12</sup>Nteyu kowo kupiyonjis piko tokol, kumwoci Yesu konomiky kule, oruruc omik ce kojet, monte ce pakakte mpo kisic.
- <sup>13</sup>Yoto koruruc cek omik mukatinek cepo nkanuk co kome piko kuleleku okoy kunyit kisok taman ok oyeny.
- <sup>14</sup>Ntowo kukäs piko om wuloto tukuk cepo kakitat ce kokwiy Yesu, kumwoy kule, “Workoyontet nyitenyi manta nyo kumöce sukuco koret!”
- <sup>15</sup>Konket Yesu kule karik kunäme cekto neto swama oñnkukoci woyinto kwek kinko. Yoto kuwekey Yesu yec kulannta kuwo lakam kwine nkit.
- <sup>16</sup>Ntowo kupunto kosoleny kurekto konomiky kupa okoy tampayayet,
- <sup>17</sup>oñnkulany rapet kupa kway tampayayet kutokyikey Kapernaum. Kikikwimen kutuyit koret yoto ntene kitompo kot kuco Yesu wule mite cekto.
- <sup>18</sup>Kikicec kuwus yomet nyewo nyepo swama nye kiwose peko.
- <sup>19</sup>Nteyu kowo kukwany konomik rapet okoy kuwany koyinto nyepo kilomitanik mut nto lö, yoto kukäs cek Yesu nye kityikonu peko parak kuconi ye kimite rapet, kumuyo koromun.
- <sup>20</sup>Kumwoci Yesu cek kule, “Ani nyo, monte cemuye!”
- <sup>21</sup>Kumac cek kule cenäm neto kulany rapet, ntene yoto pakenke kupunto rapet koret tapan wule kitokynikey cekto.
- <sup>22</sup>Ntowo kuyec koret om pesyet nyepo oyeny, kukäs luket nyepo piko ce cañ ce kiñetune tampayayet pitonin kule rapet akenke pate nye kikicepokoky yoto, yoto konket cek kule kopuryo kot kulany Yesu rapet kuwetokey konomiky, ntene konomik kwicek nkit pate ce kupa kupuryo neto.
- <sup>23</sup>Kukwene raposyek alake Tiperia okoy kurik tampayayet tapan om yo kisomncine Mokoryontet mukatinek kupeyok.
- <sup>24</sup>Nteye kotoköse luket nyepo piko ce cañ kule puryo kot kumite Yesu wuloto nto mpo konomiky, Yoto kulany cek raposyek oñnkupa Kapernaum wokucejat Yesu.



- <sup>25</sup>Ntowo kunyor piko Yesu kumite tampayayet pitonin, kumwoci kule, “Konetintet, kweconi nyi oyu wuli?”
- <sup>26</sup>Kuwekyi Yesu kumwoci cek kule, “Kumwowok ani akwek ñalek cepo manta kule, puryo kot oceņoto omnye kyokäs tukuk cepo kakitat cepo swamemwani, ntene oceņoto omnye kyoyam mukatinekye okoy opiyonkye tokol.
- <sup>27</sup>Monte kiyisye kule cenyoru omit ce wurtos, ntene oiyisye sonyoru omik cepo okokoy cepo soponto nye mopoku. Mosukukonok Weritap cito omicoto, omnye kikokoci Yiyintet Papa neto pelutyet nyepo kamukeywek.”
- <sup>28</sup>Yoto kutepe cek kumwoci neto kule, “Mokyyi acek ne ye sukuņet kyyi yisonutek ce toponec cepo Yiyintet?”
- <sup>29</sup>Kuwekyi Yesu kumwoci cek kule, “Yisyet nye möce kule ayiy akwek kunyi kule, oyen akwek cito nyo kiyoku neto.”
- <sup>30</sup>Kuwekyi cek kumwoci Yesu kule, “Kunyo pelutyet nye yune nyepo swamet nye meyyi nyi sukuņet cekäs acek oņnkyyien ñalekuk! Meyiy kiy ne?”
- <sup>31</sup>Kikwam mpo kukonyacek omik ce cekure Mana ye kimate koretap kitela, kuyu wulo mwoytoy silutekap Yiyintet kule, ‘Kikoci neto cekto kwam mukatyantet nye cone torot.’ ”
- <sup>32</sup>Kumwoy Yesu kule, “Komwowok ani akwek ñalek cepo manta kule, kipuryo kot kukonok akwek Moses mukatyantet nye cone torot, ntene papamwani nye konok akwek mukatyantet nyepo manta nye cone torot.
- <sup>33</sup>Omnye mukatyantet nye konu Yiyintet ku cito nye kirekune torot oņnkukoci soponto piko cepo koret tokol.”
- <sup>34</sup>Kusom cek neto kule, “Mokoryontet, konec mpo acek okokoy mukatyantanato po soponto.”
- <sup>35</sup>Kumwoci Yesu cek kule, “Oyiku ani mukatyantet nyepo soponto, puryo kot kwome rupet ci tokol nye kaco wule omite ani, oņnkupuryo kot kwome melelya mpo kisic ci tokol keyeno ani.
- <sup>36</sup>Kunyo kwomwowok kule kwakäsa ani akwek, ntene puryo kot oyeni.
- <sup>37</sup>Mosukuco wule amite ani ci tokol nye kakono Papamwani, puryo kot okwete ani mpo kisic ci tokol nye kaco wule amite.
- <sup>38</sup>Omnye kyaco ani arekune torot kule cayiy ce möce Neto nyo kiyokwo, ntene puryo kot ku kule ayiy ce amöce nkit.
- <sup>39</sup>Yisyet nye mokyani neto nyo kiyokwani kunyi kule, puryo kot opoti ani ci ake tokol om piko co kikono neto. Ntene misyini aņet kotutune met kusopco tokol om pesyet nyepo letut.



- <sup>40</sup>Omnye kito nye möce Papamwani kunyi kule, mosukunyor soponto nye mopoku piko tokol ce kakäs cekto Werit onnkuyen nialekyi. Kunyo mosanjet kotutune met kusopco picoto om pesyet nyepo letut.”
- <sup>41</sup>Yoto kucec Yutayek konyunjnyis om wule mite Yesu omnye kumwoy kule, “Oyiku ani mukatyantet nye cone torot.”
- <sup>42</sup>Kumwoy cek yoto kule, “Puryo kot ku Yesu cicitenyi Weritap Yosep, ce cinket kwan oko kamet? Muce kulene kumwoy kule, kyocone arekune torot?”
- <sup>43</sup>Kuwekyi Yesu kumwoci cek kule, “Ayaste monte cijunynjny akwek kukwek nkit,
- <sup>44</sup>puryo ci nye muce kot kuco wule amite ani okoy ye kokwer Papamwani nyo kiyokwani cicoto kuco wule amite, mosanjet ani kotutune met cicoto om pesyet nyepo letut.
- <sup>45</sup>Kisil workoyik kule, ‘Mosukunjet Yiyintet piko tokol.’ Ci tokol nye kolimnci Papa onnkunetkey nialek kukwane wule mite neto, kuconi cicoto wule amite ani.
- <sup>46</sup>Puryo kot kuporu nialecu kule kikäs ci tokol Papa. Neto nkit pate nyo kicone wule mite Yiyintet kunye kikäs Papa.
- <sup>47</sup>“Komwowok ani akwek nialek cepo manta kule, ci nye kocömis kuyen kuponto nyoto soponto nye mopoku.
- <sup>48</sup>Oyiku ani mukatyantet nyepo soponto.
- <sup>49</sup>Kikwam mpo kukomwoj mukatyantet nye cekure Mana om koretap kitela, kunyo kipok cekto.
- <sup>50</sup>Ntene ye kam ci ake tokol mukatyantet nye cone torot kupuryo kot kume cicoto.
- <sup>51</sup>Oyiku ani mukatyantet nye sopot nye cone torot. Ye kakwam citake tokol mukatyantani mosukusop kenysis okoy kenysis. Nto Mukatyantet nye mokoci ani neto kupormwani nye mokonu sukujet kusop piko cepo koret tokol.”
- <sup>52</sup>Yoto kusut nialecutecu tintenotet nyewo koromun om wule mite Yutayek nkit. Kutep cek kumwoy kule, “Muce cici kulene kukonec acek kyam pornyi?”
- <sup>53</sup>Kumwoci Yesu cek kule, “Komwowok ani akwek nialek cepo manta kule, ye puryo kot ayam akwek portap Weritap cito, onnkoye korotiky kupuryo kot oponte soponto om akwek orit.
- <sup>54</sup>Ci ake tokol nye kam pormwani onnkuye korotikwani kunye ponto cito nyoto soponto nye mopoku. Masanjet ani kotutune met cicoto om pesyet nyepo letut.
- <sup>55</sup>Omnye pormwani kunye omik cepo manta, nto korotikwani kuce yesyet cepo manta.
- <sup>56</sup>Ci ake tokol nye kam pormwani onnkuye korotikwani kumitowune cicoto wule omite ani, onnkomitowune ani wule mite neto.





- <sup>57</sup>Kiyokwani Papa nye sopot, kunyo onyuru ani soponto kucone wule mite neto, kuyunyoto om wule mite ci ake tokol nye kama ani, musukunyor cicoto soponto kucone wule amite ani.
- <sup>58</sup>Kunyo mukatyantet nyitenyi nye cone torot kunye puryo kukerkey oko mukatyantet nyo kikwome mpo kukomwoŋ oŋnkupok cekto. Mosukusop kenysis okoy kenysis ci tokol nye kam mukatyantani.”
- <sup>59</sup>Kimwowu Yesu ŋalecutecu ye kimate kunetisiyi om kotapkok om Kapernaum.
- <sup>60</sup>Ntowo kulim konomikiyi alake ce caŋ ŋalecutecu, kumwoy kule, “Wuy koromun ŋolyontoni, ŋo nye muce kulim ŋal ceyuco?”
- <sup>61</sup>Yoto kunket Yesu nkit kule ŋunyunye konomikiyi om ŋolyontoni. Kumwoci neto cek kule, “Kemuyok akwek ŋolyontoni?”
- <sup>62</sup>Kunyo kucäm ne nyun ye kokäs akwek Weritap cito kuloŋntoy wule kimitowune kunyo?
- <sup>63</sup>Muyet Nyetilil kunye konu soponto, kunyo puryo kot kopunto porto latik mpo kisic. Dalek co komwowok ani kuce Muyet oko soponto.
- <sup>64</sup>Oŋnkurok kupuryo kot kuyene piko alake om akwek.” (Omnye kinkete Yesu kuceke tayta kule piko oŋnkuco om cekto ce puryo kot kucömis oŋnku cito oŋnkono nye musukunomnto neto.)
- <sup>65</sup>Yoto kutosyikey kumwoy kule, “Kuyu nyitenyi somwowok ani akwek kule, puryo ci nye muce kot kuco wule amite okoy pate ye kokukoci Papa cicoto kwiyy kuyunyoto.”
- <sup>66</sup>Kuceke yoto kukweykey konomikiyi ce caŋ kutay nye komo kupesetoti yec oko Yesu.
- <sup>67</sup>Yoto kumwoci Yesu kiyokik taman ok oyeny kule, “Omöce mpo akwek kule, cepecikey?”
- <sup>68</sup>Kuwekyi Simon Petero kumwoci neto kule, “Mokoryontet, mocipe acek wule mite ŋo? Ponte nyi ŋalek ce konu soponto nye mopoku,
- <sup>69</sup>kunyi kociyen oŋnkyinket acek kule yiku nyi Nyetilil nye cone wule mite Yiyintet.”
- <sup>70</sup>Kuwekyi Yesu kumwoci cek kule, “Kipuryo kot akweyak ani akwek cu oyiku taman ok oyeny? Oŋnkurok akenke om akwek kunye Setani nyewo nyepo oyik.”
- <sup>71</sup>Kiŋolole Yesu yoto Yuta weritap Simon Isikaryoti, omnye nka kot ki akenke Yuta om konomik taman ok oyeny, ntene neto kunye kiwo kuŋomnto Yesu.

## Yowana 7

- <sup>1</sup>Nto om letutap ŋalecutecu, kuwesetote Yesu Kalilaya, nye kipuryo kot kumöce kule owesotote Yuteya omnye kimate Yutayek cepo woloto kucenye kule cepakac neto.



- <sup>2</sup>Kikirik yoto pesyetap sakwet nyepo Yutayek nye cekure sakwetap kisarinek.
- <sup>3</sup>Yoto kumwoci mpo mutakwam Yesu kule, “Dete wuli oŋnkiwo Yuteya, sukuŋet kukäs konomikuk yisyet nye yiye nyi.
- <sup>4</sup>Omnye puryo ci nye muce kuwuŋat yisyenyi nye yiye ye möce kule soyeku konketon. Ye yiye nyi ŋalecutecu kupoyit manta, kumöce kule partekey konketiŋ piko tokol.”
- <sup>5</sup>Kipuryo kot kuyen mpo mutakwam ŋalekyi.
- <sup>6</sup>Kumwoci Yesu cek kule, “Tompo kot kupunto pesyemwani nye topon. Ntene oponte pesyosyek ce caŋ ce toponec.
- <sup>7</sup>Puryo kot komuce koret kot kusenkerak akwek, ntene senkero ani, omnye omwocini ani okokoy kule miyotec yisyonutekyi.
- <sup>8</sup>Ape akwek sakwet, ntene moweti ani sakwani, omnye tompo kot kupunto pesyemwani nye topon.”
- <sup>9</sup>Kumwoci neto cekto ŋalecato oŋkopur kuŋutune Kalilaya.
- <sup>10</sup>Nteyu kowo kupa mpo mutakwam sakwet, kuwo mpene Yesu nye kiwuŋotikey nye moköse ci.
- <sup>11</sup>Kuceny Yutayek neto om sakwet, kutepe kule, “Mite ono neto?”
- <sup>12</sup>Kimite yoto comset nyewo koromun om wule mite luket nyepo piko om ŋalek ce nöme neto, kumwowu piko alake kule, “Topon cito nyin!” Kumwowu alake kule, “Puryo, pepere kumose piko.”
- <sup>13</sup>Ntene puryo ci nye kiŋalale kutok omnye kiyweye piko Yutayek.
- <sup>14</sup>Nteyu kowo kupunto kwenutap pesyosyek cepo sakwet, kuwo Yesu kotap Yiyintet orit oŋnkucec kunetis.
- <sup>15</sup>Yoto kukite Yutayek koromun kumwoy kule, “Muce kulene cici kunket ŋalek ce caŋ oŋnkurok yec kupuryo kot ku ci nye sumanat.”
- <sup>16</sup>Kuwekyi Yesu kumwoci cek kule, “Puryo kot kucikwani ŋalekyu oneti, ntene kwone wule mite Yiyintet nyo kiyokwo ani.
- <sup>17</sup>Ye kecäm ci ake tokol kule ayiy ŋalek ce möce Yiyintet kunye mosukunket cito nyoto kule po manta ŋalek ce oneti ani, nto oŋololi ŋalek cepo kamukeywekwani nkit.
- <sup>18</sup>Ci nye ŋolole ŋalek cepo kamukeywekyi nkit, kunye syeme cito nyo kule onyuru woyinto nye nyenyi nkit; nto cito nyo cene woyinto nyepo neto nyo kiyoku ani kunye nyepo manta cito nyo, oŋnkupuryo kot kuponto ŋolyo nyepo mwiynan.
- <sup>19</sup>Kikonok akwek Moses ntarastinek nto puryo? Ntene puryo mpo akenke om akwek nye yweye ntarastinek. Omne yu osyeme akwek kule cepakäc ani?”




- 20**Kuwekyi luket nyepo piko kumwoci neto kule, “Ponte nyi oyinot! Do nye syeme kule apakäciṅ nyi?”
- 21**Kuwekyi Yesu kumwoci cek kule, “Kyayiy ani ḡolyo akenke nyewo koromun ye ki sapat, okite akwek tokol yoto koromun ḡolyontonoto.
- 22**Kikonok akwek Moses ntarastit nyepo wonset nka kot kipuryo kot kicece neto ntene mpo kukomwoṅ ce kicece, kunyo owonsi akwek ye Sapat.
- 23**Nteye cewone cito ye Sapat sukuṅet mente kyiri ntarastinekap Moses. Kunyo omne sonyerco ani akwek omnye kyosop portap cito kunyol topon ye kipesyetap Sapat?
- 24**Ayaste monte cemute musankut ye kokäs wule yunto tonto wulo po saṅ, ntene omute musankunek cepo manta.”
- 25**Kumwoy piko alake cepo Yerusalem kule, “Puryo kot ku cicitenyi nyo cesyeme kule cepakäc?
- 26**Akäs pa! Oṅyi mite kuṅolole nye mowunyekey oṅnkurok kupuryo kot kumwocini cekto ḡolyo! Konkot so poytoyikyacek kupoyit manta kule Ḋapanet neto.
- 27**Kunyo cinket acek tokol wule cone cici, ntene puryo ci nye mucce kunket ye kaco Ḋapanet kule mokucone ono.”
- 28**Nteye kimite Yesu kunetisiyi om kotap Yiyintet kuṅalal kupol om kutit nyewo kumwoy kule, “Oṅnketo ani akwek manta? Oṅnkot pa wule acone? Ntene kipuryo kot aco om kamukeywekwani nkit. Neto nyo kiyokwo kunye nyepo manta.
- 29**Ntene oṅnkoti ani neto; omnye acone wule mite neto, oṅnku neto kunye kiyokwo ani.”
- 30**Yoto kusyem cek kule cenäm Yesu, ntene puryo ci nye kimuc kot kunäm omnye kitompo kot kupunto pesyenyi.
- 31**Ntene kuyen ḡalekyi piko ce caṅ ce kimite luket nyepo piko, kumwoy cek kule, “Ye kaco Ḋapanet mucce kwiy tukuk cepo kakitat kupël cu kukwiṅ cici?”
- 32**Yoto kulim Farasayek kucomoti luket nyepo piko ḡalek ce nöme Yesu. Kuyokto yoto tisik cewoyec oko Farasayek sikarek wokunäm Yesu.
- 33**Kumwoy Yesu kule, “Mosopur ani oko akwek kuloyit kuminiṅ nto kopok onomen awo wule mite neto nyo kiyokwo ani.
- 34**Mosacenya ani akwek, ntene puryo kot onyorwo, omnye puryo opeti akwek kot opunte wule oweti ani.”
- 35**Kuṅalal Yutayek kwicek nkit kumwoy kule, “Karik kuwo cici ono wule mocenyoru acek? Möce so kule sawo moṅosyekap lamek wule kiwuci kupuntyi Yutayek wokumiṅis oṅnkunet Kirikik om wuloto?
- 36**Poru ne ḡolyontoni komwoy kule, mosocenya ani akwek, ntene monyorwo, oṅnku puryo kot opeti akwek kot opunte wule oweti ani.”



- <sup>37</sup>Kipesyet nyepo letut nyepo sakwet kunye kipesyet nyoto nyewo koromun. Kuyo Yesu pesyonoto oṅnkuṅalal kupol om kutit nyewo kumwoy kule, “Ye ponto ci ake tokol melelya kumisyini kuco wule omite ani co kuyesyo.
- <sup>38</sup>Kuyu wulo mwowu silutekap Yiyintet kule, ‘Mosukosune peko cepo soponto mukuleyap ci ake tokol nye keyeno ani.’ ”
- <sup>39</sup>Kimwoy Yesu kuyunyoto ṅalek ce nöme Muyet Nyetilil nye kikirik wokunyor piko ce keyen ṅalekyi. Kitompo kot cekon yoto Muyet Nyetilil omnye kitompo kot ciṅet Yesu kotutune met kunyor woyinto.
- <sup>40</sup>Ntowo kulim piko ce caṅ om kwenutap piko ṅalecutecu kimwoy Yesu, kumwoy kule, “Workoyontet nyitenyi manta!”
- <sup>41</sup>Kumwoy alake kule, “Ḍapanet nyitenyi!” Ntene kumwoy piko alake kule, “Puryo kot komuce kucone Ḍapanet Kalilaya!”
- <sup>42</sup>Mwowu silutekap Yiyintet kule, “Ḍapanet kunye keseniyantetap Tauti, kunyo mosiceyici neto Peselekem moṅet nyepo Tauti.”
- <sup>43</sup>Yoto kupciykey luket nyepo piko om ṅalek ce nöme Yesu.
- <sup>44</sup>Yoto kumäc piko alak kule cenäm ntene puryo ci mpo akenke nye kimuc kunäm neto.
- <sup>45</sup>Kuketitakey sikarek kupa wule mite cewoyec oko Farasayek. Kutepe cek sikarek kule, “Omne yu mnokweru kuco yu?”
- <sup>46</sup>Kuwekyi sikarek kumwoci cek kule, “Puryo ci kenysis nye kiṅalal kuyu wule ṅololyoy cici!”
- <sup>47</sup>Kutepe Farasayek cek kule, “Kukupperperak neto kumasak so mpo akwek?”
- <sup>48</sup>Kwokäs akwek pa akenke om kantoyik nto mpo Farasayek nye yene ṅalekyi?
- <sup>49</sup>Lukoni kunye luket nyepo piko co menket ntarastinekap Moses, kunyo kicup Yiyintet cekto!”
- <sup>50</sup>Akenke om cekto ku Nikontemo nyo kikinyosyo kuwo wokukäs Yesu. Kutepe nyo cekto kule.
- <sup>51</sup>“Cömwec acek pa ntarastinek cemutyi cito musanku kutompo kot celimnci ṅalekyi oṅnkyinket ṅolyontet nye kulel.”
- <sup>52</sup>Kuwekyi cek kumwoci neto kule, “Yiku mpenyi so citap Kalilaya? Suman pa silutekap Yiyintet, mesenket kule puryo workoyo kenysis nye muce kucone koretap Kalilaya.”

## Yowana 8

- <sup>1</sup>[Yoto kunomen ci ake tokol kuwo kanyi. Ntene kuwo Yesu okoy tulwetap ketik ce cekure Seituninek.



- <sup>2</sup>Ntowo kuyec kororn kuketitakey Yesu yec kowo okoy kotap Yiyintet. Koruruckey luket nyepo piko ce caŋ komut neto. Yoto kopur ŋony oŋnkucec kunet cekto.
- <sup>3</sup>Kukwer konetikap ntarastinek oko Farasayek korket ake nye kicenäm kusekweyene oŋnkukoci kuyone taytap piko tokol.
- <sup>4</sup>Kumwoci cek Yesu kule, “Konetintet, kucenäm korkoni kumite kusekweyene.
- <sup>5</sup>Om ntarastinekyacek, kikon Moses kule cewire rwontok korko nye yunyi kume. Kunyo mwowu ne nyi yawut?”
- <sup>6</sup>Kimwoy cek kuyunyoto kule celotu neto sukuŋet cenyoru ŋolyontet nye kocewosontyine. Ntene kuyim Yesu kukäs ŋony oŋnkusile mornenyi ŋony.
- <sup>7</sup>Nteyu kimate cek keyoŋ kutepe teputek, kuculkey Yesu oŋnkumwoci cek kule, “Ci ake tokol om akwek nye tompo kot kwiŋ miyoty, kunyosyo nyoto kuwire neto rwantet?”
- <sup>8</sup>Oŋnkuyim yec kusil ŋony
- <sup>9</sup>Nteye kotolime cek ŋalecato, kupete akenke akenke, kunyosyo piko ceyec kunyo, okoy wokunet Yesu nkit oko korkonoto nye kimate kukeyoŋe yoto.
- <sup>10</sup>Kuculkey Yesu oŋnkumwoci kule. “Cepyosyani, onto cekto? Puryo ci mpo akenke nye koŋet nye mokumutuŋ musankut?”
- <sup>11</sup>Kuwekyi korkonoto kumwoci kule, “Mokoryontet, puryo ci.” Kumwoy Yesu kule, “Kunyo mpo ani puryo omutuŋ musanku, wecikey ntene mente towayiy yec miyoty.”]
- <sup>12</sup>Kuŋololyi Yesu yec kumwoci cekto kule, “Oyiku ani lakweyet nyepo koret. Ci ake tokol nye karupa ani, mosukunyor lakweyet nyepo soponto nye komo kuwesetote menonet mpo kisic.”
- <sup>13</sup>Kumwoci Farasayek neto kule, “Kemwowu nyi nyun yawut ŋalek ce cekuk nkit, kunyo puryo kot kupo manta ŋalekuk ce mwowu.”
- <sup>14</sup>Kuwekyi Yesu kumwoci cek kule, “Puryo kot kuyunyo, nka kot omwowu ani ŋalek ce cikwani nkit ntene kupo ŋalekwani manta, omnye oŋnketi wule kyocone oko wule oweti, ntene puryo kot oŋnket akwek wule kyocone nto mpo wule oweti ani.
- <sup>15</sup>Omüte akwek pate musanku om kasoteywek cepo pic, ntene puryo koto omutyini ani ci ake tokol musanku.
- <sup>16</sup>Ntene nka kot mpo ye kamüt ani musanku, kupoyitu ŋalek cikwani manta, omnye puryo kot omite ani kwani nkit, mitowune Papamwani nye kiyokwo wule amite ani.
- <sup>17</sup>Kicesil ntarastinek kwakwek kule ye kocömncin piko muncururwanik kosik oyeny kupoyitu manta ŋalekwa ce komwoy.
- <sup>18</sup>Kunyo oporu ani ŋalek ce cikwani nkit, kuporu mpo yec Papamwani nyo kiyokwo ŋalekwani.



- <sup>19</sup>Kutepe cek Yesu kule, Mite Papaŋuŋ ono?” Kuwekyi Yesu kumwoci kule, “Puryo kot oŋnketo ani akwek oŋnkupuryo mpo kot oŋnketi Papamwani. Nto kwonketo ani akwek nto kwonketi Papamwani.”
- <sup>20</sup>Kimwowu Yesu ŋalecutecu tokol ye kimate kunetisiyi om kotap Yiyintet om yepo koto nye citore sontukunek pesanik cepo kokotutek. Kipuryo ci nye kinäm neto om yoto, omnye kipuryo kot kwitita pesyenyi.
- <sup>21</sup>Kumwoci Yesu cek yec kule, “Mosowecikey ani, kunyo mosocenata ani akwek, ntene mosopoku oponte miyotyemwoŋ. Puryo kot omuci akwek kot ape wule oweti ani.”
- <sup>22</sup>Kumwoy Yutayek kule, “Poru ŋalecu so kule, mosukuketkey neto nkit kume, omnye komwoy kule, ‘Puryo kot okwoni akwek wule oweti ani’ ”
- <sup>23</sup>Kuwekyi Yesu kumwoci cek kule, “Okwone akwek koret wuli po ŋony, ntene acone ani torot. Opoye akwek koroni, ntene mopoye ani koroni.
- <sup>24</sup>Kuyu nyitenyi omne somwowok ani akwek kule, mosopoku oponte miyotyemwoŋ, kunyo mosopoku om miyotyemwoŋ ye puryo kot oyen akwek kule, ‘AYUYE ANI NYI’ ”
- <sup>25</sup>Kutepe cek Yesu kule, “Nyi ku ŋo?” Kuwekyi Yesu kumwoci cek kule, “Kyomwowok ani kuceke keny.
- <sup>26</sup>Mite ŋalek ce caŋ ce nömok akwek ce misyini omwowok oŋnkamüt musankut. Po manta neto nyo kiyokwo ani, kunyo omwocini koret ŋalek ce kyalim kukwane wule mite neto.”
- <sup>27</sup>Kipuryo kot kusow cek kunket ŋalek ce kimwocini neto cekto ce nöme Papa.
- <sup>28</sup>Kumwoci Yesu cek kule, “Ye konömnci akwek parak Weritap cito, yoto ye mosonket kule, ‘AYUYE ANI NYI’; oŋnku yoto ye mosonket kule puryo kot oyiye ani kiy om kamukeywekwani nkit, ntene omwowu pate ŋalek ce kikoneta ani Papa.
- <sup>29</sup>Kunyo mitowune Neto nyo kiyokwo wule amite ani, puryo kwasta kwani nkit. Omnye oyiye ani pesyosyek tokol ŋalek ce ŋerece neto.”
- <sup>30</sup>Kuyen piko ce caŋ ce kilim kumwowu Yesu ŋalecutecu.
- <sup>31</sup>Yoto kumwoci Yesu Yutayek ce kacäm ŋalekyi kule, “Mosoyiku akwek konomikwani cepo manta ye koyen konetisyemwani,
- <sup>32</sup>kunyo mosonket ŋalek cepo manta, mosukutyacak ŋalek cepo manta.”
- <sup>33</sup>Kuwekyi cek kumwoci nto kule, “Ciku acek kesenisyekap Apram, tompo kot ciku acek kenysis mutwor cepo citake tokol, kunyo poru ne ŋalecu mwowu nyi kule, ‘Mosityacak?’ ”
- <sup>34</sup>Kuwekyi Yesu kumwoci cek kule, “Komwowok ani akwek ŋalek cepo manta kule, ci tokol ye yiye miyoty kunye mutworintetap miyotyey nyoto.





- <sup>35</sup>Puryo kot kupoytoy mutworintonoto kayato okokoy, ntene poyitu werit kayato okokoy.
- <sup>36</sup>Omnye ye muce Werit kutyacak, kumuce kutyacak akwek kupoyit manta.
- <sup>37</sup>Oŋnket kule oyiku akwek kesenisyekap Apram, oŋnkurok yec osyeme kule cepakäca ani, omnye puryo kot ocöme ñalekwani.
- <sup>38</sup>Oŋololi ñalek ce kikoporwo Papamwani, ntene oyiye akwek ñalek ce kimwowok papamwoŋ.”
- <sup>39</sup>Kuwekyi cek kumwoci Yesu kule, “Apram kunye Papanyacek.” Kuwekyi Yesu kumwoci cek kule, “Nto yunye oyiku akwek lekokap Apram cepo manta nto oyiye yisyet nye kerkey nye kikwiw neto.
- <sup>40</sup>Ntene omwowok ani okokoy ñalek cepo manta ce kyalim kukwane wule mite Yiyintet, oŋnkurok omöce akwek kule cepakäca. Kipuryo kot kwiy Apram ñolyo nye yunyi!
- <sup>41</sup>Oyiye akwek ñalek ce kikwiw mpo papamwoŋ.” Kuwekyi cekto neto kule, “Puryo kot ciku acek pantayek. Ceponte acek Papanyo akenke nyoto ku Yiyintet nkit.”
- <sup>42</sup>Kuwekyi Yesu kumwoci cek kule, “Nto yunye Papamwakwek Yiyintet kupoyit manta, nto ocömo, omnye acone wule mite Yiyintet kunyo mite yawut yu. Omnye kipuryo kot aco om kamukeywekwani nkit, ntene kiyokwo ani Yiyintet.
- <sup>43</sup>Omne sumosowu akwek oŋnket ñalek ce omwowu ani? Omnye puryo kot omuytoy oŋnkolimnte lokoywekwani.
- <sup>44</sup>Oyiku akwek lekokap papamwoŋ Setani nyewo nyepo oyik, kunyo omöce kule cerup corokyinotet nyepo papamwoŋ nyoto. Kiporin neto kuceke kenye. Puryo kot kucöme neto kenye ñalek cepo komosta nyepo manta, omnye puryo kot kuponto ñalek cepo manta. Ye kaŋalal, kumwowu pate ñalek cepo mwiynan ce nöme neto nkit, omnye mwiynonin oŋnkukwanitap mwiynanet tokol.
- <sup>45</sup>Ntene oŋololi ani omwowu ñalek cepo manta, kunyo puryo kot oyeni akwek ñalekwani.
- <sup>46</sup>Do om akwek nye muce kumwoy kutor kule oponte ani miyoty? Omne sotay akwek moyen ñalekwani ye komwowu ñalek cepo manta?
- <sup>47</sup>Ci nye cone wule mite Yiyintet kunye limntoy nyoto ñalekap Yiyintet. Omnye puryo kot okwone akwek wule mite Yiyintet. Kunyo puryo kot olimntoy.”
- <sup>48</sup>Kuwekyi Yutayek kumwoci Yesu kule, “Puryo kot cepoye acek ne manta cemwowu kule, yiku nyi Samariyoyin; oŋnkiponte oyinot!”
- <sup>49</sup>Kuwec Yesu kumwoy kule, “Puryo, kot oponte ani oyinot, ntene oyweyi Papamwani, ntene puryo kot oyweyo akwek.
- <sup>50</sup>Puryo kot acenye ani woyinto nye nyimwani nkit. Mite ake nye cenye woyinmwani nye mute musankut kucämnta ani.



- <sup>51</sup>Komwowok ani akwek ñalek cepo manta kule, puryo kot kume kenysis citake tokol nye kacäm kuyen lokoywekwani.’’
- <sup>52</sup>Kumwoci Yutayek neto kule, “Kocinket acek yawut kupoyit manta kule ponte nyi oyinot!
- <sup>53</sup>Kime Apram, oñnkupok workoyik, kunyi mwowu nyi yec kule, ‘Puryo kot kume kenysis citake tokol nye kacäm kuyen lokoywekwani.’ Yiku nyi so nyewo kupël papanyacek Apram? Soti nyi kule oyiku ño?’’
- <sup>54</sup>Kuwekyi Yesu kumwoci cek kule, “Ye kosutkey owoyitkey ani nkit, kupuryo kot kuponto woyinmwani latik, Papamwani nye kono woyinto, nyoto kunyo okure akwek Yiyinteny,
- <sup>55</sup>oñnkurok yec kutompo kot oñnket akwek neto, oñnketi ani neto. Ye kotepe kot omwowu ani kule puryo oñnket ani neto, mosoyeku mwiyn kuyu akwek. Kunyo oñnket ani oñnkoyweyi ñolyontenyi.
- <sup>56</sup>Kiñerec papamwoñ Apram kule mosakäs pesyemwani, kunyo kikäs oñnkuñerec.’’
- <sup>57</sup>Kumwoci Yutayek neto kule, “Tompo mpo kot punte nyi kenysisyek konom, kunyo kikäs nyi pa Apram?’’
- <sup>58</sup>Kuwekyi Yesu kumwoci cek kule, “Komwowok ani akwek ñalek cepo manta kule, kutompo kot ceyi Apram oyuye ani nyi.’’
- <sup>59</sup>Yoto kukwey cek rwontok kule cewire neto, ntene kuwunynkey Yesu oñnkunomen kuwete kotap Yiyintet

## Yowana 9

- <sup>1</sup>Nteye kimite Yesu kutile kukäs citake nye kiceyi kukorat.
- <sup>2</sup>Kutepe konomiki nyi neto kule, “Konetintet, ño nyepo miyotyeyet, cici nkit nto piko ce kiye sukuñet ceyi kukorat?’’
- <sup>3</sup>Kuwec Yesu kumwoy kule, “Puryo kot kunömekey koratenyi oko miyotyenyi nto miyotyeyetap piko ce kiye. Kikor neto sukuñet ciyiyisyey cipor swameta Yiyintet.
- <sup>4</sup>Misyini cetosyikekey acek ceyiy yisyonutekap neto nyo kiyokwo ani ye tokupet koret, mosukuco menonet nye puryo kot komuce ci ake tokol kot kwiyyisyey.
- <sup>5</sup>Ye tomite koret, oyiku ani lakweyeta koret.’’
- <sup>6</sup>Nteyu kowo kuñalal Yesu ñalecato kuñutyi ñony oñnkutankware tenek ñulek oñnkunyinye konyekap cicoto.
- <sup>7</sup>Oñnkumwoci kule, “Iwo wewune konyekuk tolilet Siloam’’ (nye poru kaynani kule, “Kiciyokto.’’) Yoto kuwo cicoto wokowunnkey oñnkuketkey kuco nye kakästa.
- <sup>8</sup>Yoto kutepe latosyeyi oko piko ce kikäs neto ikye kusomsi kumwoy kule, “Puryo kot ku cicitenyi nyo kwepure ñony sukuksomsi?’’



- <sup>9</sup>Kumwoy piko alake kule, “Cito nyitenyi.” Ntene kumwoy cicoto nkit kule, “Ani nyoto.”
- <sup>10</sup>Kutepe cek kumwoci neto kule, “Kuṅṅokis kusopco konyekuk kulene?”
- <sup>11</sup>Kuwekyi cicoto kumwoci cek kule, “Kutankware teṅek ṅulek cico cekure Yesu oṅnkonyinye konyekwani oṅnkumwowo kule, ‘Iwo wewune konyekuk toliletap Siloam’ Yoto awo ani, nteyu kowo awunekey akäste pakenke.’”
- <sup>12</sup>Kutepe cek kule, “Ono cicoto?” Kuwekyi cicoto kumwoci cek kule, “Puryo kot oṅnket.”
- <sup>13</sup>Yoto kukwer cek cicoto kikorat okoy wule mite Farasayek.
- <sup>14</sup>Kipesyetap Sapat pesyet nye kitonkwore Yesu teṅek ṅulek oṅnkuṅany kusopco konyekap cicoto.
- <sup>15</sup>Yoto kutepe yec Farasayek cicoto kule kuṅṅokis kusopo konyekuk kulene? Kumwoci neto cek kule, “Kwenyinye neto sakatyet konyekwani oṅnkowunnkey ani, kunyo oköstoy yawut.”
- <sup>16</sup>Kumwoy Farasayek alake kule, “Puryo kucone cici kukwiye kuyunyi wule mite Yiyintet, omnye puryo kot kuyweye ntarastinekap Sapat.” Ntene kumwoy alake kule, “Muce kulene cito nye ponto miyotyet kwiyy tukuk cepo kakitat ceyucu?” Yoto kutoytocin cek kwicek nkit kupciwunekey oyeny.
- <sup>17</sup>Kutepe Farasayek yec cicoto kule, “Kemwowu nyi kule kuṅany cico kusopco konyekuk, kunyo mwowu nyi kule, ci ne, cicitenyi?” Kuwec cicoto kumwoy kule, “Workoyo.”
- <sup>18</sup>Ntene kutoyis Farasayek meyen kule kikorat cicoto nye puryo kuköstoy. Okoy kukur cek kwan oko kamet,
- <sup>19</sup>oṅnkutepe kule, “Werimwakwek so nyitenyi? Omwowu akwek so kule kiceyi kukorat? Kunyo omne sukuköstoy yawut?”
- <sup>20</sup>Kuwec cek kumwoy kule, “Cinket acek kule werinyacek nyitenyi, oṅnkyinket kule kiceyi kukorat.
- <sup>21</sup>Ntene puryo kot cinket omne sukuṅet kukästa yawut, oṅnkupuryo mpo kot cinket cito nye kuṅonye kusopco konyekyi. Atepe akwek neto nkit; omnye ci nye kuwoyit nye muce kuṅalal kuwec nkit!”
- <sup>22</sup>Kimwoy kuyunyoto omnye kiyweye cek Yutayek, omnye kikiömnin Yutayek kunyo kule ye kacäm citake tokol kule Yesu kunye Ḍapanet, mosicekerekta cicoto nye komo kuweti kotapkok.
- <sup>23</sup>Sukuṅet kumwoy kwan oko komet kule, “Atepe akwek neto nkit, omnye ci nye kiwoyit.”



- <sup>24</sup>Kukur cek cicoto kiceyi kukorat aret nyepo oyeny oṅnkumwoci kule, “Walkey pa nyi om taytap Yiyintet kule momwowu ṅalek cepo manta! Cinket acek kule ponto cico miyotyet.”
- <sup>25</sup>Kuwec cicoto kumwoy kule, “Puryo kot oṅnket ani kule ponto cico miyotyto nto moponto, oṅnket pate ṅolyo akenke kule kyoyiku ani ikye korat, kunyo oköstoy yawut.”
- <sup>26</sup>Kutepe cek cicoto kule, “Kukwiṅ ne nyi neto? Kiṅany kusopco konyekukyi kulene?”
- <sup>27</sup>Kuwekyi cicoto kumwoci cekto kule, “Kumwowok ani itwe, ntene puryo kot alim akwek. Omne somac kule celim yec, toskoy omöce mpo akwek kule ciku konomikyi?”
- <sup>28</sup>Kucup cek cicoto oṅnkumwoci kule, “Yiku nyi konomintetap cicoto. Ciku acek konomikap Moses.
- <sup>29</sup>Cinket acek kule kiṅololyi Yiyintet Moses, kunyo mocinket wule cone cico!”
- <sup>30</sup>Kuwekyi cicoto kumwoci cek kule, “Ḍolyo nyi nye cikite! Puryo kot oṅnketi akwek wule kicone cico! Ntene kuṅany konyekwani!
- <sup>31</sup>Cinket kule, puryo kot kulimncini Yiyintet piko ce ponto miyotyet; ntene muce kulimnci pate piko co yweye neto oṅnkwiye ṅalek ce möce neto kule kwiy.
- <sup>32</sup>Ntene kuceke kicitany koret tompo kot celim kenysis kule kiṅany citake konyekap cito nye kiceyi kukorat.
- <sup>33</sup>Nto yunye kupuryo kot kucone cici wule mite Yiyintet, nto kupuryo kot komuce kwiy ṅolyo.”
- <sup>34</sup>Kuwekyi cek kumwoci cicoto kule, “Mpenyi nyi kiceyitiṅ miyotyet, kunyi syeme kule anetec acek?” Yoto kukwete cek cicoto kotapkok.
- <sup>35</sup>Kulim Yesu kule kukwet cek cicoto. Ntene kunyor neto cicoto kutepe kule, “Yeni nyi ṅalekap Weritap cito?”
- <sup>36</sup>Kuwec cicoto kumwoy kule, “Mokoryontet, mwowo ṅo cicoto saṅet oyen ani ṅalekyi!”
- <sup>37</sup>Kumwoci Yesu neto kule, “Kwekäs nyi neto, kunyo neto nyitenyi ṅololuṅ nyi yawut.”
- <sup>38</sup>Kumwoy cicoto kule, “Mokoryontet, koyen ani!” Oṅnkukutuṅe taytap Yesu.
- <sup>39</sup>Kumwoy Yesu kule, “Kyaco ani koroni camüt musankut kule sukuṅet kukästa piko ce kikoryo oṅnkucömis piko co köstoy.”
- <sup>40</sup>Kulim Farasayek alake ce kimite yoto kumwowu Yesu ṅalecato, kutepe cek neto kule, “Soti nyi so kule kicekorye mpo acek?”



<sup>41</sup>Kuwekyi Yesu kumwoci cek kule, “Nto kwoyiku akwek koryotin, nto puryo kot oyiku lelotin, ntene omnye omwowu kule, ‘Ceköstoy acek.’ Koporkey kule toyiku akwek lelotin.”

## Yowana 10

<sup>1</sup>Komwowok ani akwek ñalek cepo manta kule, “Cito nye puryo kot kupunte kurket ye weti kotap kecirek, ntene kulannta kupunte wulyo ake, kunye corin cito nyoto.

<sup>2</sup>Nto cito nye punte kurket kunye mesewontet nyepo kecirek nyoto.

<sup>3</sup>Kuyotyini cito nyo ripe kurket mesewontet. Mosukulim kecirek kutinyi ye kokur kaynokap kecirekyi, oñnkuntoci kukwer kupa sañ.

<sup>4</sup>Nteye kokwer ceci tokol kukwa sañ; kuwo kuntoci om tay, yoto kurup kecirek neto omnye nkete kutinyi.

<sup>5</sup>Puryo kot komuce kurup citake pate nye to, muce kumwey omnye menkete kutit nyepo cito nyoto.”

<sup>6</sup>Kumwoci Yesu cekto tyonkoconitenyi ntene kipuryo kot kunket ñalek ce kimwocini neto cekto.

<sup>7</sup>Kumwoci Yesu cek yec kule, “Komwowok ani akwek ñalek cepo manta kule, oyiku ani kurket nyepo kecirek.

<sup>8</sup>Piko alak tokol ce kikwa kunyosyeno ani kuce kicorik oñnkumwoñot, ntene kipuryo kot kulimnci kecirek cekto.

<sup>9</sup>Oyiku ani kurket, ci ake tokol nye kaco cokupurune wule omite ani mosukusop, mosukuco orit oñnkumiñnto sañ oññkunyor suswek.

<sup>10</sup>Coni corintet corsyet pate oñnkupakäc, oñnkwaranta. Kyaco ani kule sukuñet kunyor piko soponto nye yeme topon.

<sup>11</sup>“Oyiku ani mesewontet nye topon, cöme mesewontet nye topon kule okoyte sponny kumeci kecirek.

<sup>12</sup>Cito nye pokosin kunye puryo kot ku mesewontet oñnkupuryo kot kuceci kecirek, pokoktoy nyo kecirek oñnkumwey ye kakäs suyontet, yoto kusar suyontet oñnkuseret cut alak.

<sup>13</sup>Mweye cito nye pokosin nyepo musyara omnye puryo kot kusote kecirek.

<sup>14</sup>Oyiku ani Mesewontet nye topon, oñnket kecirek ce cikwani oñnkunketo kecirekwani,

<sup>15</sup>kuyu wule oñnketi ani Papamwani oñnkunketo Papa. Kunyo oyiku ani yiytat okoyte sponmwani omeci kecirek.



- <sup>16</sup>Oponte mpo kecirek alak ce puryo kot kumite yeceyi, misyini okweru mpecek coto, mosukulim mpecek kutimwani kukwa kwek yeceyta akenke nyepo mesewontet akenke.
- <sup>17</sup>“Cömo ani Papa, omnye oyiku yiytat okoyte saponmwani sukuḡet ceketwo yec.
- <sup>18</sup>Puryo ci nye muce kot konomuneno saponmwani, ntene okoytoy om cömisyemwani nkit. Oponte kamukeywek okoyite, oḡnkoponte kamukeywek ce oketune kuketkey. Kiyitenyi nye kimwowo ani Papamwani kule ayiy.”
- <sup>19</sup>Yoto kupciykey yec Yutayek om ḡalecutecu.
- <sup>20</sup>Kumwowu ce caḡ om cek kule, “Ponto nyi oyinot! Kipun met nyi! Omne solimnci akwek ḡalekyi?”
- <sup>21</sup>Ntene kumwoy piko alake kule, “Puryo kot kuḡolole kuyunyi cito nye ponto oyinot! Muce oyinoto cekwol yitik kuḡany konyekap piko ce kikoryo?”
- <sup>22</sup>Yoto kupunto pesyet nye kyome sakwet nye citilile kotap Yiyintet om Yerusalem. Kikaytit koret pesyosyecoto.
- <sup>23</sup>Nteye kimite Yesu kuwesetote tekewutap Solomon om kotap Yiyintet.
- <sup>24</sup>Yoto korurukikey Yutayek komut neto oḡnkutepe kule, “Ḋomwec acek nyi okoy oyu? Mwowec ḡalek kutok cepo manta, yiku nyi Ḋapanet?”
- <sup>25</sup>Kuwekyi Yesu kumwoci cek kule, “Kwomwowok ani, ntene puryo kot oyen akwek ḡalekwani. Yisyonutek ce oyiye om kamukeywekap Papamwani kuce ḡolole kuporto ani.
- <sup>26</sup>Ntene puryo kot oyeni akwek omnye puryo kot oyiku akwek kecirekwani.
- <sup>27</sup>Lime kecirekwani kutit nyimwani, oḡnket ani cekto, kunyo nomoto ani cekto.
- <sup>28</sup>Okocini soponto nye mopoku, puryo kot kupoku mpo kisic, oḡnkupuryo mpo ci nye muce kot kusar kukwane yewuniyekwani.
- <sup>29</sup>Ce kikono ani Papa kuce cewoyec kupēl tukuk tokol, oḡnkupuryo citake tokol nye muce kot kusar kunum kukwane wule mite Papa.
- <sup>30</sup>Oyiku ani oko Papa akenke.”
- <sup>31</sup>Yoto kukwey yec Yutayek rwontok kule cewire neto.
- <sup>32</sup>Kumwoci Yesu cek kule, “Kyoporwok ani yisyonutek ce caḡ ce toponec ce kikono Papa ayiy; oḡnkono om coto nye omöce akwek kule cewirco ani?”
- <sup>33</sup>Kuwekyi Yutayek kumwoci kule, “Puryo kot ce möce acek kule ceweriḡ nyi om yisyo ake tokol nye topon, ntene om nyilsyet nye nyile nyi Yiyintet! Ntene oko omnye yiku nyi ci pate, oḡnkurok yec sutkey nkit kule oyiku Yiyintet!”
- <sup>34</sup>Kuwekyi Yesu kumwoci cek kule, “Puryo kot cesil ne om ntarastinekwakwek nkit kule, kimwoy Yiyintet kule, ‘Oyiku akwek Yiyinwek!’





<sup>35</sup>Cinket kule po manta okokoy ñalek ce mwowu silutekap Yiyintet; kure Yiyintet piko co kicikoci lokoywekyi kule, ‘Yiyinwek.’

<sup>36</sup>Nto ani kunyo kikweya Yiyintet oñnkuyokwo aco koret. Kunyo omuci akwek kulene omwowu kule, ‘Nyile nyi Yiyintet,’ Omnye komwowu kule, Oyiku Weritap Yiyintet?

<sup>37</sup>Kunyo monte ciyen yisyemwani ye puryo kot oyiye yisyet nyepo Papamwani.

<sup>38</sup>Ntene ye oiyisyi ani, nka mpo ye mnoyen akwek ñalekwani, kuroke oyen yisyonutekwani sukuñet oñnket okokoy kule mitowune Papa wule omite ani oñnkomitowune ani wule mite Papa.’’

<sup>39</sup>Yoto kusyem cek yec kule cenäm Yesu, ntene kuwecikey kuciwit.

<sup>40</sup>Kuwo Yesu kway yec oyinetap Yortan okoy kupunto yo kipotisonisye Yowana kunyo, oñnkuwo kopurune wuloto.

<sup>41</sup>Kukwa piko ce cañ wule mite neto oñnkwokumwoy kule, “Kipuryo kot kwiy Yowana yisyonut nyepo kakitat, ntene po manta ñalek tokol ce kimwoy ce nöme cici.’’

<sup>42</sup>Kuyen piko ce cañ ñalekyi om wuloto.

## Yowana 11

<sup>1</sup>Kumnyan citake nye cekure Lasaro nye kiminye Pesaniya. Pesaniya kunye moñet wule kiminye Mariyam oko cekwam Marisa.

<sup>2</sup>(Mariyam nyitenyi kunyo kuñope mwayta kerekokap Mokoryontet oñnkopuke putekyi. Kunyo kimnyone mutakwam Lasaro.)

<sup>3</sup>Kuyokto mpo cekwam ñolyontet kuwo wule mite Yesu kumwoci kule, “Mokoryontet, mnyone corweñuñ nyo cöme nyi’’

<sup>4</sup>Ntowo kulim Yesu ñalecato, kumwoy kule, “Puryo kot kusutu porto nyepo Lasaro met, kwiyakay sukuñet kupor woyintap Yiyintet, oñnkyilañnta Weritap cito kupunte met.’’


<sup>5</sup>Kicöme Yesu Marisa oko cekwam Mariyam oko Lasaro.

<sup>6</sup>Nteyu kowo kulim Yesu kule mnyone Lasaro; kopur wule kimite kuwany pesyosyek alak oyeny.

<sup>7</sup>Nto om letut kumwoci neto konomik kule, “Akany ceketitekey cipe Yuteya.’’

<sup>8</sup>Kuwekyi konomik kumwoci neto kule, “Konetintet, kumöce Yutayek oyin lekito kule cewireniñ rwontok kunyi yiytoykey yec kule aketitekey wuloto?’’

<sup>9</sup>Kuwekyi Yesu cek kule, “Puryo kot kuponto ne pesyet akenke sawanik taman ok oyeny? Kunyo puryo kot cinoce cito ye wesetoti ye pet, omnye köse neto lakweyet nyepo koroni.



- <sup>10</sup>Ntene mosicinoc cito ye kowesetot ye komoy, omnye puryo kot kuponto lakweyet.”
- <sup>11</sup>Kumwoy Yesu n̄alecato oṅnkutosyi kumwoy kule, “Koru corwenyo Lasaro, ntene mosowo ani waṅet neto.”
- <sup>12</sup>Kuwekyi konomik kumwoci kule, “Mokoryontet, ye koru neto, mosukusop.”
- <sup>13</sup>Ntene kimwowu Yesu kuporu kule, kume Lasaro, kusote cek kule toskoy ṅolole rwonto nyepo kwak.
- <sup>14</sup>Kuporci Yesu kumwoci cekto kule, “Kume Lasaro,
- <sup>15</sup>ntene oyiku ani ṅerekat om wule omite akwek omnye kupuryo kot opontekey ani neto sukuṅet oyen akwek. Kunyo akany cipe.”
- <sup>16</sup>Yoto kumwoci Tomas (nye soromin) konomik cut kule, “Akany cipe mpo acek tokol oko konetintet sukuṅet wocepoku tokol oko neto!”
- <sup>17</sup>Ntowo kupunto Yesu, wokunyor kucemuy Lasaro nye kukuwany mwenet pesyosyek amwan.
- <sup>18</sup>Kilekite Pesaniya Yerusalem nye kikeytye kilomitanik somok.
- <sup>19</sup>Kikwa yoto Yutayek ce caṅ kwokuṅololyi Marisa oko Mariyam om metap mutakwam Lasaro.
- <sup>20</sup>Ntowo kulim Marisa kule mite Yesu kuconi, kuwo kutorokta aran, ntene kopurcikey Mariyam ko.
- <sup>21</sup>Kumwoci Marisa Yesu kule, “Mokoryontet, nto kwemite nyi wuli, nto puryo kot kume yeyamwani!
- <sup>22</sup>Ntene oṅnket ani mpo yawut kule, muce Yiyintet kukoniṅ kiy ake tokol nye kesom nyi neto.”
- <sup>23</sup>Kumwoci Yesu neto kule, “Mosiciṅet yeyaṅuṅ kotutune met.”
- <sup>24</sup>Kuwec Marisa kumwoy kule, “Oṅnketi kule mosukotutune met om pesyet nyepo letut.”
- <sup>25</sup>Kumwoci Yesu neto kule, “Oyiku ani kotutunetap met oko soponto. Mosukusop ci ake tokol nye yene n̄alekwani oṅnkuyen nka kot kame.
- <sup>26</sup>Nto ci ake tokol nye sopot nye keyeno ani kupuryo kot kume kenysis okoy kenysis. Kunyo yeni nyi n̄alecu?”
- <sup>27</sup>Kuwekyi Marisa kumwoci Yesu kule, “Mokoryontet, oyeni ani kule, yiku nyi Dapanet Weritap Yiyintet, nyo mosukuco koret.”
- <sup>28</sup>Nto om letut yu kowo kumwoy Marisa n̄alecato, kuwo kuketitakey wokukur cekwam Marisa oṅnkunololyi kucomnci kule, “Kaco yu Konetintet, kunyo tepin nyi.”
- <sup>29</sup>Ntowo kulim Mariyam, kuṅet lakwar kusartakey kuwo wule mite Yesu.



- 30[Kitompo yoto kot kupun Yesu kayata, ntene kitokumite yo kituytos oko Marisa.]
- 31Yoto ntowo kukäs Yutayek ce kiñololyini Mariyam om ko kule kañet kusartakey kuwo sañ. Kupa mpecek kurup let, kusote kule toskoy kowo wokurire yepo mwenet.
- 32Ntowo kuwo Mariyam okoy kupunto ye mite Yesu, nteye kotoköse kukutuñe yepo kerekokyi oñnkumwoy kule, “Mokoryontet, nto kwemite nyi wuli, nto puryo kot kume yeyamwani!”
- 33Kukäs Yesu neto kurire oko Yutayek ce kimate kurirtos mpecek! Yoto kulon mukuleynyi oñnkusot koromun.
- 34Kutep kule, “Kwomuci akwek ono?” Kuwekyi cek kumwoci kule, “Mokoryontet, co cekäs yeto.”
- 35Kurir Yesu lokik.
- 36Kumwoy Yutayek kule, “Akäs pa wule kucömntoy cito nyin!”
- 37Ntene kumwoy alake om picoto kule, “Puryo kot cici ne nyo kiñonye konyekap cito nye kikorat? Kopuryo kot komuce neto kot kukereka Lasaro mame?”
- 38Kulon yec mukuley tap Yesu kutok oñnkuwo okoy yepo mwenet nye kepenet nye kimate rwantet nye kaceker kurket.
- 39Kumwoy Yesu kule, “Owunukte rwantet!” Kuwec Marisa cekwametitap cito nyo kume kumwoy kule, “Mokoryontet, mosukupon somisyet, omnye kupeni mwenet kuwany pesyosyek amwan!”
- 40Kumwoci Yesu neto kule, “Kopuryo kot omwowuñ ani nyi kule, (ye keyen mesekäs woyinto nyepo Yiyintet?)”
- 41Yoto kuwunukto cek rwantet. Kunyal Yesu torot oñnkumwoy kule, “Okostiñ ani nyi Papa; omnye limwo.
- 42Oñnketi kule limwo okokoy, ntene komwowu ñalecu sukukäs picu mite yu, sukuñet cekto kuyen kule nyi kunye kiyokwo ani.”
- 43Nteyu kowo kumwoy kuyunyoto, kupol kukurto om kutit nyewo kumwoy kule, “Lasaro! Miñu co sañ!”
- 44Kumiñ kuco sañ cito nye kukume kupontonu sirok co kucemuytoy kurototin yewuniyek oko kerekok oko siret nyo kicerate komut metit. Kumwoci Yesu cek kule, “Otyokyi sirok, oñnkayaste kuwo.”
- 45Yoto kukäs Yutayek ce cañ ce kikikwa kwokukäs Mariyam ñalek ce kikwiyy Yesu okoy kuyen cek ñalekyi.
- 46Ntene kuweckey alake om cekto kupa wule mite Farasayek oñnkuwokumwoci ñalek ce kukwiyy Yesu.
- 47Kukur tisik cewoyec oko Farasayek kokwet nyewo oñnkumwoy kule, “Mokiyiy kulene? Yiye cici tukuk ce cañ cepo kakitat!



<sup>48</sup>Ye kakyaste kutosyikey kwiye kuyunyi, mosukuyen ci tokol ñalekyi, kunyo mosukukwa poytoyik cepo Romek kwokwaranta kotap Yiyintet oko piko cepo yemenyo tokol!”

<sup>49</sup>Kumwoci Kayafa akenke nye ki tisintet nyewo om kenyinoto cek kule, “Puryo kot oñket akwek kiy.

<sup>50</sup>Puryo kot osowu akwek kule misyini cepakäc kume cito akenke om wule omite, ye koto kyorontoy piko cepo yemet tokol?”

<sup>51</sup>Ntene kipuryo kot kumwoy neto kuyunyoto kwine nkit, ntene omnye neto kunye ki tisintet nyewo om kenyinoto, kunyo kiñor kule karik cepakäc Yesu kumeci piko cepo yemonoto.

<sup>52</sup>Ntene nye kipuryo kot ku kule kumeci piko cepo yemonoto nkit pate, ntene kule sukuñet koruruc kwek akenke lekokañ Yiyintet ce kiseret.

<sup>53</sup>Kuceke pesyonoto kwiyita Yutayek rorumut kule cepakäc Yesu kume.

<sup>54</sup>Yoto kuwesetot Yesu om Yuteya nye komokuporkey kutok, ntene kunomen kuwo koret nye lekite kitela, om moñet nye cekure Efrayim wule kiwo kopur oko konomik.

<sup>55</sup>Kikirik yoto kupunto sakwet nyepo Yutayek nye cekure Keytayet. Kupete piko koret kupa Yerusalem wokwiñ ntasimnyet nye cipukte miyotyey kutompo kot kupunto sakwet.

<sup>56</sup>Kimite cek yoto kucenye Yesu. Kururukikey cekto kotap Yiyintet sukuñolole kwicek nkit kutepekey kule, “Osoti akwek kulene? Muce pa kuco sakwani, nto puryo?”

<sup>57</sup>Kikimwayta Tisik cewoyec oko Farasayek kule ye nkete citake tokol wule mite Yesu kumisyini kumwoy sukuñet cekto wokañ.

## **Yowana 12**

<sup>1</sup>Yoto om pesyosyek lö kutompo sakwet nyepo Keytayet, kuwo Yesu okoy Pesaniya wule kiminye Lasaro cito nyo kiñete neto kotutune met.

<sup>2</sup>Kyici Yesu omik om wuloto. Marisa nye kikwiñisi kupciwu omik, kumite Lasaro kukepur yepo meset kwomisiyo oko Yesu.

<sup>3</sup>Kunäm Mariyam cupet nye nyitat mwayta nye cekure naratus nye poñu topon koromun nye kyole pesan ce cañ oñnkuroñkyi kuñape kerenkokañ Yesu oñnkupuke putekañ metinyi. Kupoñ mwayta kunäm koto tokol.

<sup>4</sup>Kumwoy Yuta akenke om konomikiye nye kiwokuñomntoy Yesu kule,

<sup>5</sup>“Omne mokyalya yikwe mwayi kyale silinkinek pokolwokik lö, oñnkuyikoci pesanik pononik?”

<sup>6</sup>Kimwoy Yuta kuyunyoto, ntene kipuryo kot omnye kisote kurire pononik, ntene omnye ki corin, kinomoti neto lolet nye cekonore pesanik.



- <sup>7</sup>Kumwoy Yesu kule, “Ayaste neto kukonor co koŋet okoy pesyet nye cemuyeno ani.
- <sup>8</sup>Opontekey akwek oko pononik okokoy, ntene puryo kot opuri ani oko akwek okokoy.”
- <sup>9</sup>Yoto kulim luket nyepo Yutayek ce caŋ kule mite Yesu Pesaniya, kupa wuloto, ntene kipuryo kot komöce kule cekäs Lasaro nyo kiŋet Yesu kotutune met.
- <sup>10</sup>Yoto kwiyta tisik cewoyec kule cepakäc mpo Lasaro.
- <sup>11</sup>Omnye neto nye kwesac sukutay Yutayek ce caŋ kantoyikwa oŋnkuyen ŋalek cepo Yesu.
- <sup>12</sup>Ntowo kuyekune pesyet nyepo oyeny kulim luket nyepo piko ce caŋ ce kikwa sakwetap Keytayet kule mite Yesu kuconi Yerusalem.
- <sup>13</sup>Yoto kuput cekto sosik oŋnkupa kutorokta kupolot; kumwowu kule, “Akaste Yiyintet! Kukoci Yiyintet kupeyok neto nye cono om kaynetap Mokoryontet! Kukoci Yiyintet kupeyok Kinko nyepo Israel!”
- <sup>14</sup>Kunyor Yesu sikiryet, yoto kulany kuyu wulo mwoytoy silutekap Yiyintet kule,
- <sup>15</sup>“Monte cemuye pikap Siyon; Akäs mite kuconi Kinko nyemwoŋ wule omite akwek nye kalany moytap sikiryet.”
- <sup>16</sup>Kipuryo kot kusowu kunyo konomiky kunket ŋalecu. Ntene om letut yu kowo cilaŋnta Yesu kotutune met, kusot cek kule kimwoy silutekap Yiyintet ŋalecutecu, oko kule kikwici piko neto ŋalek ce yucutecu.
- <sup>17</sup>Luketap piko ce caŋ co kipontotikey Yesu, oŋnkukäs cekto nkit ye kikure neto Lasaro kucone mwenet oŋnkusop kotutune met; kuce kimwayta ŋalek ce kikwiyokis.
- <sup>18</sup>Kunyo sukuŋet kupa luket nyepo piko ce caŋ kutorokta Yesu omnye kikilim kule kikwiyo neto ŋolyontoni pa kakitat.
- <sup>19</sup>Yoto kuŋalal Farasayek kwicek nkit kumwoy kule, “Kokäs so? Komo cimuci acek kiy! Akäs pa, karup piko tokol neto!”
- <sup>20</sup>Kimite Kirikik alake ce kikwontoykey oko piko ce kikwoni Yerusalem kwokusay ye pesyetap sakwet.
- <sup>21</sup>Kukwa cek ye kimite Filipino nyepo Pesaniya om koretap Kalilaya oŋnkumwoy kule, “Mokoryontet, cemöce acek kule cekäs Yesu.”
- <sup>22</sup>Kuwo Filipino wokumwoci Antereya, yoto kupa tukway wukumwoci Yesu.
- <sup>23</sup>Kuwekyi Yesu kumwoci cek kule, “Kuponto yawut nyun sawet cilaŋnta Weritap Cito kunyor woyinto nyewo.
- <sup>24</sup>Komwowok ani akwek ŋalek cepo manta kule, ye puryo kot kosuci ŋony kupuswontet akenke nyepo nkanuk oŋnkume, kweku nyo kopuswontet akenke pate okokoy ntene ye kusuci ŋony kume, mosukuyi kupuswek ce caŋ.



- <sup>25</sup>Ci ake tokol nye kacäm sopen nyi, kupote cicoto sopen nyi, nto ci ake tokol nye kasenker sopen nyi om koroni mosukurip cicoto sopen nyi onnkunyor sopen to nye mopoku.
- <sup>26</sup>Ye möce ci ake tokol kule kuyiwo ani yisyet, kumisyini kurupa ani cicoto, sukuñet kopurune mutworintemwani wuloto amite ani. Mosukulañta Papa cicoto yiwo ani yisyet.
- <sup>27</sup>“Kapotpoten yawut mukuleymwani, kunyo momwowu kulene? Momwowu ra kule ‘Papa mente kucontyo ani sawet nyitenyi?’ Ntene kucoto yec ce kyacontyi ani sañet opunte sawet nyitenyi po toñoñutek.
- <sup>28</sup>Ayi Papa, koci kulañta kuwoyit kayneñu!” Yoto kucone kutit torot kumwoy kule, “Kokoci ani kaynemwani Woyinto. Kunyo mosaiy kuyunyoto yec.”
- <sup>29</sup>Kulim luket nyepo piko ce cañ ce kimite keyoñ yoto kutit, kumwoy cek kule, “Kotul ilat!” Kumwoy alake kule, “Koñololyi malayket neto!”
- <sup>30</sup>Ntene kumwoci Yesu cekto kule, “Kopuryo kot kuñololwo ani kutina kunömo ani ñalek, kuñolole ku nömok akwek.
- <sup>31</sup>Kopunto yawut pesyet cewosontyi koret; kunyo mosicekwet yawut poytoyintet nyepo koroni.
- <sup>32</sup>Pesyet nye ye kacilañta ani owete koret awo torot, yoto ye mosoruruc piko tokol kukwa wule amite ani.”
- <sup>33</sup>(Kimwoy neto ñalecutecu kupor aret wule mosukumeta.)
- <sup>34</sup>Kuwekyi luket nyepo piko kumwoci Yesu kule, “Mwowec acek ntarastinekyo kule, mosukusop Dapanet okokoy nye puryo kot kume, kunyo mucu nyi kulene mwowu kule, Mosicilañta Weritap cito kuwo torot? Weritap Cito ku ño?”
- <sup>35</sup>Kuwekyi Yesu kumwoci cek kule, “Mosukupor lakweyet kuminiñ wule omite akwek, kunyo apesetate ye toponte lakweyet, sukuñet mente kot kunamäk menonet, omnye puryo kot kunket wule weti ci tokol nye mite menonet.
- <sup>36</sup>Oyen lakweyet ye topontekey, sukuñet oyiku piko cepo lakweyet.” Nteyu kowo kumwoy Yesu ñalecato okoy kuwany, kuwo wokuwunynkey mente kot kukäs cek neto.
- <sup>37</sup>Nka kot kikwiyy Yesu ñalek cepo kakitat kuköse om konyekwa, ntene kipuryo kot kuyen ñalekyi.
- <sup>38</sup>Sukuñet kwitita kupoyit manta ñalek ce kimwoy workoyontet Isaya kule: “Mokoryontet, ño nye kiyen lokoywek ce kicemwowu acek? Ci ño nye kiporci Mokoryontet swamenyi?”
- <sup>39</sup>Kutoyis cekto meyen om ñalecutecu omnye kikimwoy yec Isaya kule:





<sup>40</sup>“Kikokor Yiyintet konyekwa, oṅnkiker kasoteywek cikwa, sukuṅet mente kot kukästa konyekwa kunyo puryo kot kuwecekey kukwa wule amite ani saṅet ani osop cekto.”

<sup>41</sup>Kimwoy Isaya ṅalecutecu omnye kikikäs woyintap Yesu, kunyo kiṅolole ṅalek ce nöme neto.

<sup>42</sup>Kuyen om yoto mpo kantoyikap Yutayek ce caṅ kucäm ṅalek cepo Yesu. Ntene omnye kiyweye Farasayek kipuryo kuṅalale kupor sukuṅet mente kot ceyete cek komo kupeti kotapkok.

<sup>43</sup>Omnye kicöme cek kule kukastec piko kusir kakastayet nyepo Yiyintet.

<sup>44</sup>Yoto kuṅalal Yesu kukurto om kutit nyewo kumwoy kule, “Ci ake tokol nye kacäm kuyen ṅalekwani kunye puryo kot kukacäma kuyeno ani nkit pate, ntene kukacäm kuyen neto nyo kiyokwo ani.

<sup>45</sup>Ci ake tokol nye kakäsa ani, kukäs cicoto Yiyintet nye kiyokwo ani.

<sup>46</sup>Kyaco ani koret kuyu lakweyet kule sukuṅet mente kot kopurune menonet ci ake tokol nye kacäma kuyeno ani.

<sup>47</sup>Ci ake tokol nye kalim lokoywekwani oṅnkutay meyen, kupuryo kot amutyini musanku. Kipuryo kot aco kule comutyi koret musankut, ntene kyaco kule cosop koret.

<sup>48</sup>Ci ake tokol nye katay meyen lokoywekwani, kuponto cito nyo nye mosukusutyi neto musankut. Dolyontemwani nye komwowu kunye mosukumutyi cicoto musankut om pesyet nyepo letut!

<sup>49</sup>Omnye puryo kot aṅalal ani ṅalek om kamukeywekwani nkit, ntene Papamwani nyo kiyokwo nye kimwowo ṅalek ce maṅalal.

<sup>50</sup>Kunyo oṅnket ani kule konu soponto nye mopoku ntarastinekyi, Kunyo ṅalek ce omwowu ani kuce kimwowo Papa kule mwowu.”

## Yowana 13

<sup>1</sup>Nteye kitompo kot kupunto pesyet nyepo sakwetap Keytayet. Yoto kunket Yesu kule kakwitita pesyenyi nye ṅete koroni kuwo wule mite Papa. Kicöme neto pikyi ce kipontokey om koret, kunyo kicäm cekto koromun okoy pesyet nyepo letut.

<sup>2</sup>Nteyu kimate Yesu oko konomikyi kwomisyyi omikap kosoleny. Kikikowut yoto Setani nyewo nyepo oyik moyetap Yuta weritap Simon Isikaryoti kule neto nye mosukuṅomnto Yesu.

<sup>3</sup>Kinket Yesu yoto kule kakono ani Papa swamet nyepo tukuk tokol. Kinket kule kyacone wule mite Yiyintet kunyo mosowo wule mite Yiyintet.

<sup>4</sup>Yoto kuṅete yepo meset ye kyomisyye oṅnkurek sirenyi kutore tapan, oṅnkunäm towulet komoty suwenyi.



- <sup>5</sup>Kuroŋkyi peko pesenit oŋnkucec kowun kerekokap konomik oŋnkupuke towulet nye kamoty suwenyi.
- <sup>6</sup>Yoto kupun ye mite Simon Petero. Kumwoci nyo neto kule, “Mokoryontet, möce nyi iwun kerekokwani?”
- <sup>7</sup>Kuwekyi Yesu kumwoci neto kule, “Puryo kot nketi nyi kito nye oyiye ani om yawut panta nyi, ntene mesenket om letut!”
- <sup>8</sup>Kumwoci Petero neto kule, “Puryo mucu nyi kot iwun kerekokwani mpo kisic!” Kuwekyi Yesu kumwoci kule, “Ye puryo kot owun ani kerekokuk, kemeyiku nyi konomintemwani.”
- <sup>9</sup>Kuwekyi Petero kumwoci kule, “Mokoryontet, kunyo mente owun kerekokwani pate, wun mpo yewuniyek oko metit!”
- <sup>10</sup>Kumwoci Yesu neto kule, “Puryo kot kuroke ciwun porto nyepo ci ake tokol nye kakowunkey, omnye tilil, ntene ce möce ciwun kerekok pate. Oyiku akwek tokol tililec toskoy cito akenke pate.”
- <sup>11</sup>(Omnye kinkete Yesu cito nye wokuŋomntoy neto, sukumwoy kule, “Oyiku akwek tokol tililec toskoy cito akenke pate.”)
- <sup>12</sup>Nteyu kowo kowun Yesu kerekokwa okoy kuwany, kulac sirenyi oŋnkopur ŋony oŋnkutepe kule, “Konket akwek pa kito nye koyiwok ani?”
- <sup>13</sup>Okuro ani akwek kule konetintet oko kule Mokoryontet. Po manta okuro kuyunyoto, omnye oyiku ani nyoto.
- <sup>14</sup>Kunyo ye oyiku ani Mokoryontemwoŋ oŋnkoyiku konetintemwoŋ, kunyi kowun ani yawut kerekokwakwek, misyinok mpo akwek owuntyinikey kerekokwok.
- <sup>15</sup>Koporwok kito nye kokäse, sukuŋet ayiy mpo akwek kuyu wulo koyiwok ani.
- <sup>16</sup>Komwowok ŋalek cepo manta kule, puryo mutworin nyewo kupël Mokoryontenyi, oŋnkupuryo kiyokin nyewo kupël cito nyo keyoku neto.
- <sup>17</sup>Kunyo ye konket ŋalecu, oponte akwek kupeyoy ye koyiyisye ŋalecutecu!
- <sup>18</sup>“Puryo kot oŋlololwok ani akwek tokol, oŋnketi piko ce kyakwey, ntene misyini kwitita kupoyit manta silutekap Yiyintet ce mwowu kule, ‘Cito nye kwome omikwani, kunye kiwekyokey.’
- <sup>19</sup>Komwowok ani ŋalecu kutompo kot kwiwokis, sukuŋet ye kokwiwokis oyen kule ani nye comwowu.
- <sup>20</sup>Komwowok ani akwek ŋalek cepo manta kule, ci ake tokol nye katoroc citake tokol nye koyokte ani, kukatoroca mpo ani cicoto, nto ci ake tokol nye katoroca kukatoroc cicoto Yiyintet nyo kiyokwo ani.”



- <sup>21</sup>Nteyu kowo kumwoy Yesu ñalecu kuñerec mukuleynyi, oñnkutor kumwoy kule, “Komwowok ani akwek ñalek ceпо manta kule, mosukuñomnto ani cito akenke om akwek.”
- <sup>22</sup>Yoto kukäskey konomik kwicek nkit, kukite koromun kule ñolole Yesu ño.
- <sup>23</sup>Kimite yoto konomintet akenke nye kicöme Yesu kukepur kitinñtokey.
- <sup>24</sup>Kuwus Petero konomintonoto oñnkumwoci kule, “Tepe pa nyi, ño cito nyi ñolole neto.”
- <sup>25</sup>Kuwekyikey konomintonoto Yesu oñnkutepe kule, “Mokoryontet, ño nyoto?”
- <sup>26</sup>Kuwec Yesu kumwoy kule, “Cito nyo mosokoci ani mukatyantani ye kanonoke nkuyek, kunye cito nyoto.” Yoto kunonoke Yesu mukatyantet nkuyek oñnkukoci Yuta weritap Isikaryoti.
- <sup>27</sup>Yoto pakenke yu kowo kwam Yuta mukatyantet, kowut Setani moyetap Yuta. Kumwoci Yesu neto kule, “Teyiye ne! Sorci lakwar weyiy kiye möce kule ayiy!”
- <sup>28</sup>Kipuryo mpo akenke om piko ce kipur meset nye kinket kule komwoci Yesu Yuta ñolyo ne.
- <sup>29</sup>Omnye kiripe Yuta lolet nyepo pesanik, kusot konomik alak kule toskoy keyokto Yesu neto wokwal omik ce cemöce om sakwet, nto komwoci kusutyi pesanik pononik.
- <sup>30</sup>Yoto kunäm Yuta Mukatyantet oñnkumiñnto kuwo sañ, kikikwek yoto komoy.
- <sup>31</sup>Nto om letut yu kowo kuwo Yuta, kumwoy Yesu kule, “Kociñon cipor yawut woyinto nyepo Weritap cito, kocipor woyinto, nyepo Yiyintet kupunte wule mite neto.
- <sup>32</sup>Kunyo ye kociñon cipor woyinto nyepo Yiyintet kupunte wule mite neto, kunyo Yiyintet nkit nye mosukuñon kupor woyinto nyepo Weritap cito. Mosukwiw kuyunyoto lakwar.
- <sup>33</sup>Lekokwani, komo opuri oko akwek kuloyit, mosecenyani ani akwek, ntene omwowok ani akwek ñalek co kyonwocini Yutayek kule, ‘Puryo okwoni akwek wule oweti ani.’
- <sup>34</sup>Kakonok ntarastit nyelel kule, acämñkey akwek nkit, Misyini acämñkey kwakwek nkit kuyu wule ocömok ani.
- <sup>35</sup>Ye kacämñkey akwek kwakwek nkit, mosukunket ci tokol kule oyiku akwek konomikwani.”
- <sup>36</sup>Kutepe Petero Yesu kule, “Mokoryontet, Mesewo nyi ono?” Kuwec Yesu kumwoy kule, “Puryo kot mucu nyi yawut kot rupa wule oweti ani. Ntene meserupa om letut.”
- <sup>37</sup>Kutepe Petero neto kule, “Mokoryontet, omne sumarupinñ ani nyi yawut? Oyiku ani yiytat omeciñ.”



<sup>38</sup>Kuwekyi Yesu kumwoci neto kule, “Yiku nyi ne yiytat manta kule omeco ani? Kumwowuŋ ani nyi ŋalek cepo manta kule, kutompo kot koncur kurkonkit mesetuckey nyi aret somok mwowu kule monketo ani.”

## Yowana 14

<sup>1</sup>Kumwoci Yesu acek kule, “Monte cemuye oŋnkonyeru om mukuleywekwok, oyen akwek Yiyintet, oŋnkoyeno mpo ani.

<sup>2</sup>Mite korik ce caŋ ce mite kotap Papamwani, kunyo kowo woyiytowok otepto, nto yunye kopuryo kot kumite nto komwowok ani akwek.

<sup>3</sup>Nteye kowo ani woyiytowok akwek otepto, moseweckey ani nkit oŋnkyokwerok, sukuŋet opurune akwek wule amite ani.

<sup>4</sup>Oŋnket akwek aret nye weti wule oweti ani.”

<sup>5</sup>Kumwoci Tomas neto kule, “Mokoryontet, puryo kot cinket acek wule weti nyi, kunyo cimuci kulene cinket aret nye weti wuloto.”

<sup>6</sup>Kuwekyi Yesu kumwoci neto kule, “Oyiku aret, oyiku ani nyepo manta, oyiku soponto, puryo ci nye muce kuwo wule mite Papa ye manopunte wule omite ani.

<sup>7</sup>Nto yunye kokwonketo ani akwek, nto kwonket mpo Papa, kunyo kuceke yawut kwonketo akwek, kunyo kwakäs mpo neto.”

<sup>8</sup>Kumwoci Filipo Yesu kule, “Mokoryontet, porwec acek Papa, kito nyo nye ce möce acek pate.”

<sup>9</sup>Kuwekyi Yesu kule, “Filipo, kwopur ani oko akwek tokol kuloyit oŋnkurok tompo kot nketo ani nyi? Ci ake nye kikäs ani, kukikäs cicoto Papa. Kunyo omne semwowu nyi kule ‘Porwec Papa?’

<sup>10</sup>Puryo kot ku cikwani nkit cepo kamukeywekweni ŋalek ce omwowok ani. Papa nkit nye mitowune wule amite ani nye yiyisi yisyenyi.

<sup>11</sup>Roke oyen akwek kule omitowune ani wule mite Papa oŋnkumitowune Papa wule amite ani. Nteye puryo kot kuyunyo, kuroke oyen om yisyonutek cu porukey nkit.

<sup>12</sup>Komwowok ani akwek ŋalek cepo manta kule, ci ake tokol nye keyeno ani, mosukwiyy cicoto yisyonutek cu oyiye ani, mosukwiyy mpo yisyonutek ce woyec kupëlis omnye oweti ani wule mite Papa.

<sup>13</sup>Mosayiy ani kiy ake tokol nye kosom akwek om kaynemwani, sukuŋet cipor woyinto nyepo Papa kupunte wule mite Werit.

<sup>14</sup>Ye kosomo ani akwek kiy ake tokol om kaynemwani; mosayiy kiyoto.”

<sup>15</sup>“Ye kocäma ani akwek, mosorup aywey ntarastinekwani.

<sup>16</sup>Mososom Papa kukonok kokolyoyintet ake, nyoto ku Muyet Nyetilil nyepo manta nye mosukopurune wule omite akwek okokoy.



- <sup>17</sup>Puryo kot komuce koret kutoroc neto, omnye puryo kot komuce koret kukäs oṅkonket, ntene oṅketi omnye purune oṅnkuminye wule omite akwek.
- <sup>18</sup>“Puryo kot opokoktok ani kwakwek nkit; mosoketukey yec wule omite akwek.
- <sup>19</sup>Komo kuköse ani koret kuwany poroyinto nye miniṅ, ntene mosakäsa ani akwek, omnye osope, kunyo mosopce mpo akwek.
- <sup>20</sup>Ye kopunto pesyonoto, mosonket akwek kule omitowune ani wule mite Papa, oṅnkumitowune akwek wule omite ani, kuyu, wulo omitowune ani wule omite akwek.
- <sup>21</sup>“Ci ake tokol nye kacäm ntarastinekwani oṅnkuywey kurip, kunye nyoto nye cömo ani, mosukucäm Papamwani nyo cömo ani, mosacäm mpo ani nyoto oṅkoporcikey kunketo.”
- <sup>22</sup>Kumwoci Yuta, (ntene puryo kot ku Isikaryoti kule,) “Mokoryontet, mucu kulene porweckey acek nkit, nye puryo kot kule porcikey koret?”
- <sup>23</sup>Kuwekyi Yesu kumwoci neto kule, “Mosukucäm Papamwani ci ake tokol nye kacäm lokoywekwani, mosicekwa acek oko Papa oṅnkwoceṅisye cicoto orit.
- <sup>24</sup>Ci ake tokol nye katay macäma ani, kupuryo kot kuyweye cicoto ṅalekwani, kunyo puryo kot ku cikwani nkit ṅalek co kwalim akwek, ntene kwone wule mite Papa nyo kiyokwo ani.
- <sup>25</sup>“Komwowok ṅalecu omnye topontekey ani oko akwek.
- <sup>26</sup>Ntene Kokolyoyintet nyoto ku Muyet Nyetilil; nye mosukukonok akwek Papamwani om Kaynemwani kunye mosukunetak akwek ṅalek tokol, oṅnkusowok oṅket ṅalek tokol co kyomwowok.
- <sup>27</sup>“Kopokwok ani kalyet; kakonok kalyet nyimwani nkit. Puryo kot okonu kuyu wulo konuntoy koret, monte cemuye oṅnkonyeru, monte cenyokoritu.
- <sup>28</sup>Kwalim akwek omwowok ani kule, ‘Mosowecikey, ntene oṅnkoketukey wule omite akwek.’ Nto kwocömo ani akwek, nto kwoṅereci omnye kowo wule mite Papa, kunyo nyewo neto kupëlo ani.
- <sup>29</sup>Komwowok ani akwek yawut ṅalecu kutompo kot kwi yokis tokol, sukuṅet ye keyokis kuye oyen.
- <sup>30</sup>Komomuci toṅololwok ṅalek ce caṅ kuloyit, omnye mite kuconi nyewo nyepo koroni, ntene puryo kot kuponto kamukeywek kupayta ani.
- <sup>31</sup>Ntene möce kunket koret kule acöme ani Papa, kunyo oyiye kiy ake tokol kuyu wulo kimwowo ani neto, oṅetye cepete yu.”

## Yowana 15

- <sup>1</sup>“Oyiku ani Sapiput nyepo manta, nto Papamwani kunye kapotintet.



- <sup>2</sup>Neto nye yeptooy saryantet ake tokol nye mite wule mite ani nye puryo kot kwiye omik, oṅnkumutyi sarisyek ce yiye omik sukuṅet kwiye omik alak ce caṅ.
- <sup>3</sup>Kunyo kicesatak akwek kenye otillitu om ṅolyontet nyo kyomwowok ani.
- <sup>4</sup>Opurune wule amite ani, mosopurune mpo ani wule omite akwek. Ye puryo kot opurune akwek wule amite ani, kupuryo kot oyiye omik, kuyu wulo puryo kot kwiye saryantet omik ye puryo kot kumite wule mite Sapiput.
- <sup>5</sup>“Oyiku ani Sapiput, oyiku akwek wule po sarisyek, ci ake tokol nye kepurune wule amite ani, oṅnkopurune ani wule mite neto, mosukwiy nyoto omik ce caṅ. Omnye Puryo kot omuci akwek kot ayiy kiy ake tokol ye momite ani.
- <sup>6</sup>Ci ake tokol ye puryo kopurune wule amite ani, mosicekwetyi nyoto saṅ wokuyam kuyu saryantet nyepo ketit. Ciruruce sarisyecato oṅkyewirci mata kuloy.
- <sup>7</sup>Ye kopurune akwek wule amite ani oṅnkopurune ṅalekwani wule omite akwek, oṅkosom kiy ake tokol nye omöce mosonyoru kiyoto.
- <sup>8</sup>Kuyunyoto ye sicipor kutok woyinto nyepo Papamwani, kuye kayiy akwek omik ce caṅ. Om aret nye yunyitenyi kuye soyeku akwek konomikwani cepo manta.
- <sup>9</sup>Ocömok ani akwek kuyu wule cömonto ani Papa; kunyo roko opurte cömisyemwani.
- <sup>10</sup>Ye karup akwek ntarastinekwani, kuye mosopurte cömisyemwani, kuyu wule kyopurte ani aywey ntarastinek cepo Papa oṅkopurte cömisyenyi.
- <sup>11</sup>“Komwowok ṅalecu, sukuṅet kopurune ṅerekwekwani wule omite akwek oṅnkuyitita kuyem ṅerekwekwok.
- <sup>12</sup>Ntarastimwani nye kakonok kunyi kule; ocömnkey akwek kwakwek nkit kuyu ocömntok ani akwek.
- <sup>13</sup>Cömisyet nyewo nye pëlisyi nye muce kunyor cito kuye kekoyito cito sponnyi kumeci coronutekyi.
- <sup>14</sup>Oyiku akwek coronutekwani, ye kayiy ṅalek co komwowok ani.
- <sup>15</sup>Komokurenok yec mutworik, omnye puryo kot kunket mutworinto yisyet nye yiye mokoryontenyi. Kunyo okurenok yawut coronutekwani, omnye komwowok ṅalek tokol ce kyalim kukwane wule mite Papamwani.
- <sup>16</sup>Kipuryo kot kwakwek ce kyokweyo ani, ntene ani nye kyakweyak akwek, oṅnkoyoktok kule ape wayiy omik ce caṅ, nto omik coto kuce pure okokoy. Kunyo mosukukonok Papa kiy ake tokol nye kosom akwek neto om kaynemwani.
- <sup>17</sup>Kunyo komwowok oṅnkolonwok kule, acämkey akwek kwakwek nkit.”
- <sup>18</sup>“Ye kasenkerak akwek koret kumisyini oṅket kule kinyosyo kusenkerani.
- <sup>19</sup>Nto kwopoye akwek koret nto kucömok akwek koret kuyu pikyi. Ntene kyakweyak ani akwek om koroni, oṅku puryo kot opoye koret, kunyo senkerok koret.





<sup>20</sup>Möce asot ñalek co kyomwowok ani kule, ‘Puryo mutworin nyewo kupël mokoryontenyi.’ Ye kikutañanya ani cek, mosukutañanyak mpo akwek, nteye karup cekto lokoywekwani, mosukurup mpo lokoywek cikiwakwek.

<sup>21</sup>Ntene mosukwiwok akwek cekto ñalecutecu tokol omnye oyiku akwek pikwani, omnye puryo kot kunket cekto cito nye kiyokwo ani.

<sup>22</sup>Nto kipuryo kot aco ani coñololyi cek, nto kupuryo koto kupunto lelis. Kunyo puryo kot kupunto yawut wule mokucililya om miyotyoniwa.

<sup>23</sup>Ci ake tokol nye toyo ani kutoye cicoto Papamwani.

<sup>24</sup>Nto kipuryo kot ayiy ani om wule mite cekto yisyet nye mnakwiw citake tokol kenysis, nto kipuryo kot kuponto cek lelis. Ntene kukäs cekto yisyemwani, kunyo kutaya ani oñkutay mpo Papamwani.

<sup>25</sup>Misyini kwiwokis ñalecutecu sukuñet kwitita kupoyit manta ñalek ce kicesil om ntarastineywa kule, ‘Kisenkera ani puc pate nye puryo ñolyo.’

<sup>26</sup>“Mosukuco Kokolyoyintet nyoto ku Muyet Nyetilil nyepo manta nye cone wule mite Papa. Mosoyoku ani kucone wule mite Papa mosucokuñalal kuparta ñalek ce nömo ani.

<sup>27</sup>Kunyo oyiku mpo akwek muncururwanik ce moparta ani; omnye kwopur akwek oko ani kuceke ye kicece.

## Yowana 16

<sup>1</sup>“Komwowok ani akwek ñalecu sukuñet monte kot omweyi.

<sup>2</sup>Mosukukwetak akwek nye komo peti kotapkok, kunyo musukupunto pesyet nye sote ci ake tokol nye kapakäcak akwek kule ayiye yisyetap Yiyintet.

<sup>3</sup>Mosukwiwok ñalecutecu tokol omnye tompo kot kunket cekto Papa nto mpo ani.

<sup>4</sup>Ntene komwowok ani akwek ñalecutecu kule sukuñet ye kopunto pesyet ye yiwok akwek cekto ñalecutecu, yoto ye mososot oñket kule kyomwowok ani ñalecu.”  
“Kipuryo kot omwowok ani akwek ñalecutecu ikye kunyo omnye kito cepontekey akwek.

<sup>5</sup>Kunyo amite yawut aweti wule mite neto nyo kiyokwo ani, ntene puryo citake tokol om akwek nye mokutepena kule, ‘Weti nyi ono?’

<sup>6</sup>Kunyo konyer mukuleywekwok omnye komwowok ani ñalecu.

<sup>7</sup>Ntene omwowok ñalek cepo manta kule, topon om wule omite akwek ye kawo ani, omnye ye puryo kot awo, kupuryo kot kuconi Kokolyoyintet wule omite akwek. Kunyo ye kawo ani mosuwoyoku neto kuco wule omite akwek.

<sup>8</sup>Nteye kaco neto mosukuporci piko cepo koret kule, lelotin cekto om ñalek ce nöme miyotyoniw, oko ñalek ce nöme cepo manta oko ce nöme musankut nye mute Yiyintet.



- <sup>9</sup>Lelotin om ñalek cenöme miyotyoni, omnye puryo kot kuyeno ani,
- <sup>10</sup>lelotin om ñalek cepo po manta, omnye mosowo ani wule mite Papa, kunyo komo oköso ani akwek yec.
- <sup>11</sup>Oñnkulelotin cekto om ce nöme musankut omnye kucemutyi musankut, poytoyintet nyepo koroni.
- <sup>12</sup>“Toponte ani ñalek ce cañ ce amöce kule omwowok akwek, ntene mosukunyikisyok yawut ye mokesen.
- <sup>13</sup>Ntene ye kaco Muyet Nyetilil nyepo manta, kuye mosukuntowok om ñalek tokol cepo manta. Puryo kot kuconi cokuñalale neto ñalek ce ceci cepo kamukeywekyi nkit, mosukuñalale ñalek ce lime oñnkumwoy ñalek ce mosukukwa.
- <sup>14</sup>Mosukulañta ani kukono woyinto, omnye mosukunäm ñalekwani oñnkukonok akwek.
- <sup>15</sup>Cikwani tukuk tokol ce ponto Papamwani, kuyunyoto somwowok ani akwek kule, mosukunäm Muyet Nyetilil ñalek ce kokoci ani oñnkukonok akwek.”
- <sup>16</sup>“Komo oköso ani akwek kuwany poroyinto nye miniñ, ntene mosokäsa yec om letutap poroyinto nye miniñ.”
- <sup>17</sup>Kumwoci konomiky alake konomiky cut kule, “Poru ne ñalecu? Omnye komwowec kule, ‘Komo oköse ani akwek kuwany poroyinto nye miniñ, ntene mosokäsa yec om letutap poroyinto nye miniñ?’ Oñnkumwoy yec kule, ‘Omnye mosawo ani wule mite Papa?’ ”
- <sup>18</sup>Yoto kutep cek kumwoy kule, “Poru ne ñolyontoni po kule, ‘Poroyinto nye miniñ?’ Puryo kot cinket acek kito nye ñolole neto.”
- <sup>19</sup>Kunket Yesu kule möce cek kutep ñolyo. Kumwoci neto cekto kule, “Komwowu ani kule, ‘Komo oköso ani akwek kuwany poroyinto nye miniñ, ntene mosokäsa yec om letutap poroyinto nye miniñ.’ ñolyontonitenyi so nyi otepekey akwek nkit?
- <sup>20</sup>Komwowok ani akwek ñalek cepo manta kule, mosorirye oñnkoncoy, ntene mosukuñerec koret. Mosonerekisy akwek ntene mukuweckey nerekwewok kwek ñerekwek.
- <sup>21</sup>Nerece korko ye karik kucämnyeky lekwet, omnye kopunto sawet nye ñete moyet ntene ye koceyi lekwet, yoto kuyutye toñonuteky omnye ñerece kule koceyi lekwet kuco koret.
- <sup>22</sup>Kuyunyoto om wule omite akwek. Oyiku akwek nerekotin yawut, ntene mosakäsak ani akwek yec om letut. Kunyo musukuñerec mukuleywekwok yoto, ñerekwec coto kuce puryo kot komuce ci kot konumunenok akwek.
- <sup>23</sup>“Ye kopunto pesyonoto komo osomo ani kiy. Komwowok ani akwek ñalek cepo manta kule, mosukukonok akwek Papa kiy ake tokol nye kosom neto om kaynemwani.



- <sup>24</sup>Okoy kupunto pesyoni tompo kot osom akwek kitake om kaynemwani. Kunyo osom mosicekonok sukuŋet kuyemak ŋerekwekwok.”
- <sup>25</sup>“Komwowok ani ŋalecu oyiyisyey tyonkocok, ntene mosukupunto pesyet nye komo oyiyisyey tyonkocok kuyunyi; yoto mosoŋololwok oporwok topon kutok ŋalek ce nöme Papa.”
- <sup>26</sup>Ye kopunto pesyonoto, mosasom akwek neto om kaynemwani, ntene puryo kot omwowu ani kule mososomwok ani Papa.
- <sup>27</sup>Omnye oyeni akwek Papa nkit. Cömok akwek neto omnye oyeno ani akwek, kunyo kwacäm akwek kule acone ani wule mite Yiyintet.
- <sup>28</sup>Kyacone ani wule mite Papa saŋet aco koret, kunyo anomeni yawut owete koret awo wule mite Papa.”
- <sup>29</sup>Kumwoci konomik neto kule, “Käs pa, keŋalal yawut poru kutok nye puryo kot yiyisyey tyonkocok.
- <sup>30</sup>Kocinket acek yawut kule nketi nyi tukuk tokol, kunyo puryo kot möce nyi kutepeniŋ citake teputek. Porwec acek ŋalecutecu ciyen kule kicone nyi wule mite Yiyintet.”
- <sup>31</sup>Kuwekyi Yesu kumwoci cek kule, “Koyen akwek so yawut?”
- <sup>32</sup>Ntene mosukupunto pesyet, kunyi kopun yawut yuteyu ye mososeretye kuwo citake tokol kanyi, mosoŋetu ani nkit pate. Ntene puryo kot oŋetu kwani nkit, omnye ce pontekey oko Papa.
- <sup>33</sup>Komwowok ani ŋalecu kule sukuŋet onyoru akwek kalyet omnye kociyomekey oko ani. Mosukutaŋanyak akwek koret, ntene otitir oyiku nyikon! Kwopël ani koret!”

## Yowana 17

- <sup>1</sup>Nteyu kowo kuŋalal Yesu ŋalecata okoy kuwany, kunyal torot oŋnkumwoy kule, “Papa, kopunto sawet, ilaŋnte koci Werinŋuŋ woyinto, sukuŋet Werit kulaŋntiŋ nyi.
- <sup>2</sup>Omnye kikoci nyi neto kupayta tukuk tokol, sukuŋet kukoci neto soponto nye mopoku piko tokol ce kikoci nyi neto.
- <sup>3</sup>Nto Soponto nye mopoku kunyi kule, kunketiŋ piko tokol, nyi Yiyintet nyepo manta oŋnkunket cek Yesu Kristo nyo kiyoku nyi.
- <sup>4</sup>Kwoporu ani woyinŋuŋ om koret. Kwawany yisyet nyo kikono ayiy.
- <sup>5</sup>Ayi Papa! Kono yawut woyinto om tayŋuŋ, woyinto nyoto kunyo kyoponte ani oko nyi kutompo kot citany koret.
- <sup>6</sup>“Kwapartiŋ ani nyi om wule mite piko co kikono om koret, cekuk picoto, nyi nye kikono ani cekto, kunyo kurip cekto ŋolyonteŋuŋ.
- <sup>7</sup>Kukunket cekto yawut kule cone wule mite nyi kiy ake tokol nye kikono ani nyi.



- <sup>8</sup>Omnye kwomwoci lokoywek ce kikono ani nyi, kunyo kunäm cekto ñalecato oñnkunket kupoyit manta kule ocone ani wule mite nyi, oñnkuyen kule nyi nye kiyokwo ani.
- <sup>9</sup>“Osomncini ani cekto. Ntene puryo kot osomncini koret, osomncini piko co kikono ani nyi, omnye cekuk pico.
- <sup>10</sup>Cekuk tukuk tokol ce oponte ani oñnkucikwani tukuk tokol ce ponte nyi, kunyo ciporu woyinmwani kupunte wule mite cekto.
- <sup>11</sup>Omite yawut aconi wule mite nyi; komo minye ani koret, ntene tokuminye cek koret. Ayi Papa Nyetilil! Rip cekto topon om swametap kayneñuñ, kaynet nyoto kunyo kikono ani nyi sukuñet kwek akenke cekto kuyu wulo ciku acek akenke oko nyi.
- <sup>12</sup>Kworip cek, kunyo monopot mpo akenke, tos pate cito nyo kicinket kule mosukupot sukuñet kwitita kupoyit manta silutekap Yiyintet.
- <sup>13</sup>Kunyo amite ani yawut aconi wule mite nyi. Komwowu ñalecu om koret sukuñet kunyor cekto ñerekwekwani ce kayem mukuleywekwa.
- <sup>14</sup>Kwomwoci cekto lokoywekuk; kunyo toye koret cekto, omnye puryo kot kupo koret kuyu wulo puryo kot opoye mpo ani koret.
- <sup>15</sup>Puryo kot osomiñ kule sut kupete koret, ntene osome kule rip cekto om wule mite Nyo Miyat.
- <sup>16</sup>Puryo kot kupo cekto koret, kuyu wulo puryo kot opoye ani koret.
- <sup>17</sup>Wec cek kwek cekuk om aret nyepo manta. Dolyontenñuñ kunye po manta.
- <sup>18</sup>Koyokte ani cek kupa koret kuyu wulo kiyokwo ani nyi aco koret.
- <sup>19</sup>Okonukey ani wule mite nyi om kaynemwacek, sukuñet mpecek kwek pikuk cepo manta.
- <sup>20</sup>“Puryo kot osomncini ani cek nkit pate, ntene osomncini mpo piko alake co yeno ani, omnye kalim lokoywek cikwa.
- <sup>21</sup>Osome kule kuyomekey cek tokol kwek akenke. Ayi Papa! Kante kopurune cekto wule cemitowune acek kuyu wulo mitowune nyi wule omite ani oñnkomitowune ani wule mite nyi. Kante kwek cek akenke sukuñet kuyen koret kule nyi nye kiyokwo ani.
- <sup>22</sup>Kokoci ani cek woyinto nye kerkey oko nyo kikono ani nyi, kule sukuñet kwek akenke, kuyu wule ciku acek akenke oko nyi.
- <sup>23</sup>Opurune ani wule mite cek oñnkipurune nyi wule omite ani, sukuñet cek kukwilokis kwek akenke, sukuñet kunket koret kule nyi nye kiyokwo ani oñnkunket kule cöme nyi cekto kuyu wulo cömnto ani nyi.



<sup>24</sup>“Ayi Papa! Kikono ani nyi cek, kunyo amöce kule kopurune cek wule omitowune ani, sukuñet kukäs woyinmwani, woyinto nyoto kunyo kikono ani nyi, omnye kicäma ani nyi kutompo kot citany koret.

<sup>25</sup>Ayi Papa nyepo manta! Puryo kot konketiñ koret, ntene oñketiñ ani nyi oñkunketiñ picu kule nyi nye kiyokwo ani.

<sup>26</sup>Kwoporci kunketiñ nyi, kunyo mosotosyikey ayiy kuyunyoto sukuñet kopurune wule mite cekto cömisyet nye ponte nyi om wule omite ani, oñkopurune ani wule mite cekto.”

## Yowana 18

<sup>1</sup>Nteyu kowo kuñalal Yesu ñalecutecu okoy kuwany, kunomen oko konomikyí kupa kway roroñtitap Ketron. Kimite wuloto mparet, yoto kuwo Yesu oko konomikyí okoy mparanato orit.

<sup>2</sup>Kinket ñomntoyintet Yuta mparanato, omnye kituytos Yesu oko konomikyí wuloto om pesyosyek alak ce cañ.

<sup>3</sup>Yoto kuwo Yuta okoy mparanato, kukwer neto luket nyepo sikarek oko piko ce ripe kotap Yiyintet ce kiyoktoy tisik cewoyec oko Farasayek. Kiponto picoto karikap poryet oko nomoryek oko tarinek.

<sup>4</sup>Kinket Yesu kiy ake tokol nye mokwiyakäy om wule mite neto; yoto kuwo tay oñnkutepe kule, “Ocenye akwek ño?”

<sup>5</sup>Kuwekyi cek neto kule, “Cecenye Yesu nyepo Nasaret.” Kumwoci Yesu cek kule, “Ani nyoto.” Kimite ñomntoyintet Yuta kukeyo ye mite cek.

<sup>6</sup>Ntowo kumwoy Yesu kule, “Ani nyoto,” kunata cek kupa let oñnkuruyi ñony.

<sup>7</sup>Kutepe Yesu cekto yec kule, “Ocenye akwek ño?” Kumwoy cek kule, “Cecenye Yesu nyepo Nasaret”

<sup>8</sup>Kumwoy Yesu kule, “Komwowok ani akwek kule, Ani nyoto! Kunyo ye ocenye ani akwek, ayaste picu alak kupecikey.”


<sup>9</sup>(Kimwoy Yesu ñalecu sukuñet kwitita kupoyit manta ñalek ce kikumwoy kule, “Papa, puryo kot kupote mpo akenke om piko tokol co kikono ani nyi.”)

<sup>10</sup>Kucut Simon Petero rotwetap cok nye kiponto oñnkuyep kulot yititap tay nyepo mutworintetap Tisintet nyewo. Kicekure kaynetap mutworintono Malko.

<sup>11</sup>Kumwoci Yesu Petero kule, “Ketyi rotwetap cok kirarwet, soti nyi kule puryo kot omuci ani opunte toñoñutek ce möce Papamwani kule opunte ani?”

<sup>12</sup>Kukwa luket nyepo sikarek oko nyewo nyimwa oko sikarek cepo Yutayek, oñnkunäm cek Yesu oñnkurat,

<sup>13</sup>oñnkunyosye kukwer wule mite Anas. Anas kunye ki pontetap pikoy nyepo Kayafa nye ki Tisintet nyewo om kenyinoto.



- <sup>14</sup>Kayafa kunyo kikocini Yutayek ḡomnonet kule topon ye kumeci cito akenke piko tokol.
- <sup>15</sup>Kurup Simon Petero oko konomintet nyin ake Yesu let. Kinkete topon Tisintet nyewo konomintet nyin ake. Yoto kowo nyo oko Yesu okoy kowut saḡnta nyepo kaytap Tisintet nyewo.
- <sup>16</sup>Kuyone Petero kayta saḡ om yepo kurket. Yoto kuketitakey konomintet nyo kinkete Tisintet nyewo kuwo saḡ oḡnkuwokunololyi cepto nye ripe kurket, oḡnkukwer Petero kuco orit.
- <sup>17</sup>Kumwoci cepoto kimite kurket Petero kule, “Puryo kot yiku nyi ne konomintetap cici?” Kuwec Petero kumwoy kule, “Puryo kot kwani nyo.”
- <sup>18</sup>Omnye kikaytit koret, yoto kulay mutworik oko sikarek mata nyepo nesek oḡnkuyone komut kuyuye cek mata. Kuwo mpene Petero wo kuyu mata.
- <sup>19</sup>Kutepe Tisintet nyewo Yesu ḡalek ce nōme konomikyini oko ḡalek ce nōme konetisyenyi.
- <sup>20</sup>Kowekyi Yesu kumwoci neto kule, “Kwoḡololi ani okokoy oporu kutok om wule mite ci tokol. Kwonetisye ḡalekwani korikapkok oko kotap Yiyintet wule rurukyinikey Yutayek tokol. Monanjalale ani ḡolyo nye wuḡat mpo kisic.
- <sup>21</sup>Kunyo omne setepena ani nyi? Tepe pate piko ce kulime ḡalek ce kwamwowu. Nkete ḡalek ce kwamwocini. Tepe kumwowuḡ.”
- <sup>22</sup>Ntowo kumwoy yesu ḡalecato, kusyec sikorintet nye kikiyone ye lekite neto, oḡnkumwoy kule, “Muci nyi kulene ḡololyi Tisintet nyewo kuyunyo?”
- <sup>23</sup>Kuwekyi Yesu kumwoci neto kule, “Ye kwamwowu ḡolyo nye lelat, mwoci pa nyi ci tokol nye mite yu lelisoto. Ntene ye opoye manta om ḡalek ce kwamwowu, omne sesyeca ani nyi?”
- <sup>24</sup>Yoto Kukoyito Anas cekwer Yesu kuratat kuwo wule mite Kayafa Tisintet nyewo.
- <sup>25</sup>Kimite Petero yoto kukeyo kutokuyuye mata. Yoto kumwoci piko alake neto kule, “Puryo kot yiku nyi ne konomintetap cici?” Kutuckey Petero kumwoy kule, “Puryo kot kwani nyo.”
- <sup>26</sup>Yoto kuḡalal mutworintet nyepo Tisintet nyewo nye kipo aretap mpo cito nyo koyepe Petero kulot yitit kumwoy kule, “Kopuryo kot akasiḡ ani nyi ne pontekey cici om mparen?”
- <sup>27</sup>Kutuckey Petero yec kutoyis, yoto pakenke koncur kurkonkit.
- <sup>28</sup>Kukwer cek Yesu kuwete kotap Kayafa okoy kaytap kotap Poytoyintet. Kimite yoto kerir koret pate. Kutay Yutayek nkit mewut kaytap Poytoyintet omnye kimōce kule ceripkey mente celelokisye sukuḡet kwam sakwetap Keytayet.
- <sup>29</sup>Yoto kuco Pilato saḡ kutorok cek oḡnkutepe kule, “Owosontyini akwek cici om ḡolyo ne?”





<sup>30</sup>Kuwekyi cek kumwoci neto kule, “Nto yunye kopuryo kot kwiy cici lelis nye miyat nto kopuryo kot cimuci acek kot cekweru kuco wule mite nyi.”

<sup>31</sup>Kumwoci Pilato cek kule, “Okwer wowosontyi akwek nkit neto kuyu wulo yunto ntarastinekwok.” Kuwec Yutayek kumwoci kule, “Puryo kot ce cömwec acek cepakäc ci.”

<sup>32</sup>(Kikwiyokis ñalecutecu sukuñet kwitita kupoyit manta ñalek ce kikimwoy Yesu ce nöme menyi wule mokumeta)

<sup>33</sup>Kuketitakey Pilato kuwo konyi orit oñnkukur Yesu. Oñnkutepe kule, “Yiku nyi Kinko nyepo Yutayek?”

<sup>34</sup>Kuwekyi Yesu kumwoci kule, “Tepe ñolyontoni kwinyi nkit nto kumwowuñ piko alake ñalek ce nöme ani?”

<sup>35</sup>Kuwekyi Pilato kumwoci neto kule, “Soti nyi kule oyiku ani Yutoyin? Pikuk oko tisikwok cewoyec ce kokweruñ nyi wuli omite ani, kweyiy ne nyi?”

<sup>36</sup>Kumwoy Yesu kule, “Puryo kot kupo poytoyisyemwani koroni, nto koyunye kupo poytoyisyemwani koroni, nto kuportos konomikwani kuyeta mente kunäma Yutayek, kunyo puryo kot kupo poytoyisyet nyimwani koroni!”

<sup>37</sup>Yoto kutepe Pilato Yesu kule, “Kunyo yiku nyi so Kinko?” Kuwekyi Yesu kumwoci neto kule, “Nyi nye kemwowu kule oyiku ani Kinko, kiceyo ani oñnkoco koret om ñolyontonitenyi akenke, sañet añalal ñalek cepo manta, nto ci ake tokol nyepo manta kunye lime ñalekwani.”

<sup>38</sup>Kutep Pilato kumwoy kule, “Ñalek cepo manta ku kiy ne?” Yoto kuco Pilato sañ wule mite Yutayek oñnkumwoci cek kule, “Mananyorte ani cici lelis nye momutyine musanku.

<sup>39</sup>Ntene oponte akwek kwak kopurto nye otyokwok ani mopusyontet akenke ye pesyet nyepo sakwetap Keytayet. Omöce akwek kule otyokwok ani kinko nyepo Yutayek?”

<sup>40</sup>Kuwekyi cek kupol kumwoy kule, “Puryo kot kunyo, cemöce Parapa!” Parapa kunye cito nye kicorin.

## Yowana 19

<sup>1</sup>Yoto kukoyito Pilato Yesu wocepas korokonik.

<sup>2</sup>Kutä sikarek kutwet nyepo kotok oñnkukoci metitap Yesu, oñnkulokyi cek neto siret nye mur kwarar,

<sup>3</sup>oñnkukwa ye kimite kwokumwoci kule, “Ilañnte sop okokoy Kinko nyepo Yutayek!” Oñnkusyec cek Yesu.



- <sup>4</sup>Kuco Pilato yec saŋ oŋnkumwoci Yutayek kule, “Akäs pa, mosokweru neto kuco saŋ yu mite akwek sukuŋet akäs akwek kule mananyorta ani neto lelis nye momutyine musanku.”
- <sup>5</sup>Yoto kuco Yesu saŋ kukelac kutwetap kotok oko siret nye mur kwarar. Kumwoci Pilato cek kule, “Akäs pa oŋyi cito!”
- <sup>6</sup>Nteye kotokäse tisik cewoyec oko sikarek Yesu, kupol cek kumwoy kule, “Owuyite! Owuyite neto owuyitoci murtowontet” Kumwoci Pilato cek kule, “Akwer akwek nkit wowuyite; omnye mananyorte ani neto lelis nye momutyine musanku!”
- <sup>7</sup>Kuwekyi Yutayek kumwoci Pilato, “Ceponte acek ntarastit, nto wule yunto ntarastinato, kumisyini kume neto omnye sutekey kule oyiku Weritap Yiyintet.”
- <sup>8</sup>Ntowo kulim Pilato kumwowu cek kuyunyoto, kutosyikey kumuy yec koromun.
- <sup>9</sup>Kuketitakey kuwo kanyi orit oŋnkumwoci Yesu kule, “Cone nyi kor ne!” Ntene kutay Yesu mowekyi ŋolyo.
- <sup>10</sup>Kumwoci Pilato neto kule, “Meŋololwo ani nyi so? Nketi nyi kule oponte kamukeywek ce omuci atyaktiŋ nyi, oŋkoponte kamukeywek ce omuci owuyitociŋ murtowontet?”
- <sup>11</sup>Kuwekyi Yesu kumwoci neto kule, “Ponte nyi pate kamukeywek om wule omite ani omnye kikoniŋ Yiyintet. Kunyo cito nyo kukwerwo ani aco wule mite nyi kunye ponto nyoto miyotyey nyewo kupëlis.”
- <sup>12</sup>Ntowo kulim Pilato ŋalecato, kutosyikey kusyem kule atyakte Yesu, ntene kupol, Yutayek kumwoy kule, “Ye ketyakte nyi neto, kuporkey kule puryo kot yiku nyi corwetap Kinko Nyewo! Kunyo ci ake tokol nye sutekey kule oyiku Kinko Nyewo kunye tintentyini Kinko Nyewo!”
- <sup>13</sup>Nteye kotolime Pilato ŋalecato, kukwer Yesu kuwo saŋ, oŋkopure ŋeceretap kokwet nye cemüte musankunek om otepto nye cekure, “Rwantet nye laŋntat.” (Nye cekure om ŋelyeptap Puraniyek “Kapasa.”)
- <sup>14</sup>Kimite yoto sawet kakeyte pet kwen nye ntoyekune kwek pesyetap Keytayet. Kumwoci Pilato Yutayek kule, “Akäs pa Kinko nyimwoŋ”
- <sup>15</sup>Kupol Yutayek kumwoy kule, Apakäc nyo! “Apakäc nyo! Wuyitoci Murtowontet!” Kutepe Pilato cekto kule, “Omöce akwek so kule owuytoci ani murtowontet Kinko nyimwoŋ?” Kuwec tisik cewoyec kumwoy kule, “Kinko nye ceponte acek ku Kinko nyewo pate.”
- <sup>16</sup>Yoto kukoci Pilato cek Yesu wocewuyitoci murtowontet. Yoto kukwer sikarek Yesu,
- <sup>17</sup>kuwo neto kukonopoti murtowontenyi nkit okoy ye cekure, “Rokyetap Metit.” Ye cekure om ŋelyeptap, Puraniyek “Kolokosa.”



- <sup>18</sup>Cewuyitoci neto murtowontet om wuloto oko piko alak oyeny, kopurune ake tapan oko tapan kumite Yesu kwenut.
- <sup>19</sup>Kusil Pilato ñalek oñnkukoci cikemer murtowontet parak nye kisil kule, “Yesu nyepo Nasaret Kinko nyepo Yutayek.”
- <sup>20</sup>Kusuman Yutayek ce cañ ñalecato omnye kilekite yepo moñet yoto kicewuyite Yesu, kunyo kicesil ñalecato om ñelyeptap Puraniyek, oko nyepo Romek, oko nyepo Kirikik.
- <sup>21</sup>Kumwoci tisik cewoyec cepo Yutayek Pilato kule, “Mente osil kule, ‘Kinko nyepo Yutayek.’ Ntene sil kule ‘Kimwoy cici kule oyiku Kinko nyepo Yutayek!’ ”
- <sup>22</sup>Kuwekyi Pilato kumwoci cek kule, “Ce kosil ani, kuce kosil.”
- <sup>23</sup>Nto om letut yu kowo kuwuyitoci sikarek Yesu murtowontet, kunäm cek sirokyi oñnkupeciwane wok amwan, kusut sikorintet akenke akenke, kunäm cekto mpo kansunyi nye kisiret akenke nye puryo wule kicenap cituye ntene nye kicenap kucone met okoy kel.
- <sup>24</sup>Kurwoc sikarek kwicek nkit kumwocin kule, “Monte cepac, ntene cepirci kirot sicekäs ño nye mokusut.” Kikwiyokis ñaleca kuyunyoto sukuñet kwitita kupoyit manta silutekap Yiyintet ce mwowu kule, “Kipcicin cek sirokwani kwicek nkit, oñnkuporci kirot siremwani.” Yoto kwiy sikarek kuyunyoto.
- <sup>25</sup>Kimite kukeyoñe yoto ye kilekit murtowontet mpo kametitap Yesu oko cekwametitap kamet nye cekure Mariyam korketap Kiloypa oko Mariyam nyepo koretap Maktala.
- <sup>26</sup>Yoto kukäs Yesu kamet oko konomintet nyo kicöme neto kumite kukeyoñ ye lekite kamet. Kumwoci Yesu kamet kule, “Cepynos, oñyo weriñuñ!”
- <sup>27</sup>Oñkumwoci konomintonoto kule, “Oñyo komet.” Kuceke yoto pakenke kukwer konomintonoto kametitap Yesu kuwo kanyi.
- <sup>28</sup>Kunket Yesu yoto kule kaciwany kiy ake tokol, sukuñet kwitita kupoyit manta silutekap Yiyintet. Kumwoy Yesu kule, “Kakwama ani melelya!”
- <sup>29</sup>Kimite kokitore yoto pokulit nye nyitat finyonik ce mintililec. Kowute cek cankut orit oñnkurutyi ketit nye mwa koromun nye cekure isop oñnkukoci yepo kutinyi.
- <sup>30</sup>Kuye Yesu finyonik oñnkumwoy kule, “Kapak!” Yoto kolulyo metinyi oñnkume.
- <sup>31</sup>Yoto kusom Yutayek Pilato kule kucömnci cekto kwiri kerenkokap piko co kocewuyitoy oñnkurek muswek kukwane murtowonik. Kikwiy cek kuyunyoto omnye kipesyetap müt kunyo kipuryo kot kumöce cek kule kopur muswek murtowonik okoy pesyetap Sapat. Omnye kipesyo nyewo nyetilil koromun pesyetap Sapat nyoto kiconi.
- <sup>32</sup>Yoto kupa sikarek wokwiri kerenkokap piko ce kicepoköce oko Yesu. Kunyosye nyepo tay ntekere nyepo let.



<sup>33</sup>Ntene yu kowo kupun ye mite Yesu kwokunyor kame kenya kipuryo kot kwiri cek yoto kerekokyi.

<sup>34</sup>Ntene kupar sikorintet ake Yesu kupare notit karasta, yoto kukwa korotik oko peko.

<sup>35</sup>Cito nye kiköse kwiyoctos n̄alecu kunyi n̄olole. Cinket acek kule mwowu neto n̄alek cepo manta oṅnkunket mpene nkit kule oṅololi n̄alek cepo manta sukuṅet oyen mpo akwek.

<sup>36</sup>Kikwiyoctis n̄alecu sukuṅet kwitita kipoyit manta silutekap Yiyintet ce mwowu kule, “Puryo kot cirye kowenyi mpo akenke.”

<sup>37</sup>Kumite yec silutekap Yiyintet nye mwowu kule, “Mosakukäs piko cito nyo kipore neto”.

<sup>38</sup>Nto om letutap n̄alecato. Yoto Yosep nyepo moṅetap Arimaseya, nye kikonointetap Yesu nye kiwunyekey omnye kiyweye Yutayek. Kusom neto Pilato kukoci portap Yesu. Kucömnci Pilato neto. Yoto kuwo wokusut portap Yesu.

<sup>39</sup>Kuco mpene Nikontemo nyo kiweti pesyet ake komoy wule mite Yesu. Kusut neto mwayta nye poṅu topon nye kipo kilonok konom nye kicilinyo oko mwaninek alak ce cekure mira oko alosik.

<sup>40</sup>Kunäm picoto kwoyeny portap Yesu kurek oṅnkurate sirok ce cemuytoy oṅnkuyile mwayta, omnye kikwiye Yutayek kuyunyoto ye mocemuy musyontet.

<sup>41</sup>Kimite ye kilekite yoto kicepokokyini Yesu mparet nye kimite yoto mwenet nye kitompo kot cemuci ci mpo akenke.

<sup>42</sup>Kunyo kipesyet nyoto nye ntoyekune kwek pesyetap Sapat nyepo Yutayek oko omnye kilekite yoto mwenet, kumuci cekto Yesu yoto.

## Yowana 20

<sup>1</sup>Nteye ki pesyetap Santey, nye kerir koret pate nye tokutuy, kuwo Mariyam nyepo Maktala wule mite mwenet. Yoto wokukäs kule kocinum rwantet kucone kurket nyepo mwenet.

<sup>2</sup>Kunomen yoto kukony mweyek okoy wule mite Simon Petero oko konomintet nyin ake, nyoto kunyo kucöme Yesu neto oṅnkumwoci kule. “Kocinum Mokoryontet kucone mwenet. Kunyo mocinket wule kocitore neto.”

<sup>3</sup>Kunomen yoto Petero oko konomintet nyin ake kupa okoy wule mite mwenet.

<sup>4</sup>Kukony cekto tukway, ntene kukony konomintet nyin ake kusirte Petero okoy wokunyosyo yepo mwenet.

<sup>5</sup>Nteyu kowo kuyim kukoyto mwenet, kukäs yoto suket nyo kucerate, ntene kipuryo kot kowut orit.

<sup>6</sup>Yoto kupun mpene Petero nye kirupu let, oṅnkoco kowut mwenet orit. Kukäs suket nye mite ṅony,



- <sup>7</sup>oko tamparit nyo kucerate metitap Yesu nye kipuryo kot kupontokey tukway, ntene kiciriny nye mite yeto nyenyi nkit.
- <sup>8</sup>Kowut mpene konomintet nyo konyosyi kupunto mwenet, kukäs oṅnkuyen kucämnta.
- <sup>9</sup>(Kipuryo kot kusow cekto yoto kunket silutekap Yiyintet ce mwowu kule misyini kotutune met neto.)
- <sup>10</sup>Yoto kunomen konomik kuketitakey kupa ka.
- <sup>11</sup>Kimite Mariyam kukeyoṅe yepo mwenet saṅ oṅnukurire. Nteye kimite kurire kuyim kukoyito mwenet.
- <sup>12</sup>Yoto kukäs neto malaykanik oyeny ce kelac sirok ce lelac ce kepur yo kucemucini portap Yesu. Kiyoṅe ake ye kipo metit kuyoṅe ake ye kipo kerenkok.
- <sup>13</sup>Kutepe malaykanicoto neto kule, “Cepyo! Keririci ne?” Kuwec kumwoy kule, “Kocinum Mokoryontenyu kunyo monketi wule kucitore!”
- <sup>14</sup>Kuwekey Mariyam yoto kukäs let okoy kukäs Yesu nye keyo, ntene kipuryo kot konket kule Yesu.
- <sup>15</sup>Kutepe Yesu neto kule, “Cepyo! Keririci ne?” Kisote Mariyam kule cito nye ripe mparet, kumwoci kule, “Nyewo! Ye nyito nye kwenumu osomiṅ porwo ye kwetore saṅet ani wonumu.”
- <sup>16</sup>Kuṅololyi Yesu neto kukur kaynet kule, “Mariyam.” Yoto kuwekyikey Mariyam kukäs Yesu oṅnkumwoci om ṅelyeptap Puraniyek kule, “Rapponi!” Nye poru kaynana kule, “Konetintet.”
- <sup>17</sup>Kumwoci Yesu kule, “Mente anäma ani kutompo awo torot wule mite Papa, ntene iwo wule mite mpo yeya mwani wemwoci kule amite ani owete oloṅntoy wule mite Papa mwani oṅnku Papa mwakwek.”
- <sup>18</sup>Yoto kunomen Mariyam nyepo Maktala wokumwoci konomik kule kokäs neto Mokoryontet oṅnkurorci ṅalek ce kokomwoci Yesu neto.
- <sup>19</sup>Nto om pesyonoto santey komoy, kimite yoto konomik kukokorurukikey koto orit, oṅnkukerotin kurkotik omnye kimuye poytoyikap Yutayek. Yoto kuco Yesu oṅnkuyoṅe kwenumwacek oṅnkumwoci kule, “Opurte akwek kalyet.”
- <sup>20</sup>Nteyu kowo kumwoci coto, kuporci yewuniyekyi oko karasta nyenyi. Kuṅerec yoto konomik koromun yu kowokukäs cekto Mokoryontet.
- <sup>21</sup>Kumwoci Yesu yec cekto kule, “Opurte akwek kalyet! Kuyu wolo kiyokwo ani Papa, kunyo oyoktok mpo ani akwek.”
- <sup>22</sup>Nteyu kowo kumwoy ṅalecato, komuṅkyi neto cekto Muyet Nyetilil, kumwoci kule, “Onyuru Muyet Nyetilil,



- <sup>23</sup>Ye kokalye akwek piko miyotyoni, mosicikalya. Nteye puryo kot okalye akwek piko miyotyoni kupuryo kot cikolyoy.’’
- <sup>24</sup>Kipuryo kot kumite akenke om konomik nye cekure Tomas-Soromin, yo kiconi Yesu.
- <sup>25</sup>Yoto kumwoci konomik cut alake neto kule, “Kucekäs acek Mokoryontet!” Kumwoci Tomas cekto kule, “Puryo kot oyeni ani mpo kisic okoy ye kakäs momitek cepo musumarisyek om yewuniyekyi oñkanäme yewuniyekwani momitecoto oko koroswekyi.’’
- <sup>26</sup>Nto letutap pesyosyek sisit. Ye kimate konomik koto orit, kupontokey cekto yoto Tomas. Kukerotin kurkotik. Ntene kuco Yesu oñkuyoye kwenumwacek, oñkumwoy kule, “Opurte akwek kalyet.’’
- <sup>27</sup>Kumwoci Yesu yoto Tomas kule, “Sutu pa morneñu kuco yu, käs yewuniyekwani, mente añuny pate, ntene yen cämnte pate.’’
- <sup>28</sup>Kuwec Tomas kumwoy kule, “Mokoryontenyu, oñku Yiyintenyu!”
- <sup>29</sup>Kumwoci Yesu neto kule, “Keyen nyi so omnye kekäs ani? Ponto kupeyoy ce keyen kucömis kutompo kot kukäs!”
- <sup>30</sup>Kwiy Yesu tukuk cepo kakitat alak om taytap konomiky, coto kuce puryo kot cesil kitapuni.
- <sup>31</sup>Ntene kicesil cutecu sukuñet cämnte nyi kule Yesu kunye Dapanet, Weritap Yiyintet nto om koyenet om wule mite neto, kuye nyoru soponto om kaynenyi.

## Yowana 21

- <sup>1</sup>Nto om letutap ñalecutecu, kuporcikey Yesu nkit yec konomiky om tampayayetap Tiperia. Kiporcikey neto cekto kuyunyi kule.
- <sup>2</sup>Kimate yoto kupontokey wanak konomiky Simon Petero, oko Tomas soromin, oko Nasanael ñyepo Kana om koretap Kalilaya, oko werikap Sepetayo oko konomiky alak oyeny.
- <sup>3</sup>Kumwoci Simon Petero konomik tokol cut alak kule, “Mawo ani wanäm purpurunek.’’ Kumwoci cut neto kule, “Mocepetekey tokol oko nyi.’’ Yoto kupa cek oñkuwokulany rapet, ntene kipuryo kot kunäm cek kiy mpo akenke om komowunoto tokol.
- <sup>4</sup>Nto kerir koret pate, kuyoye Yesu tampayayet tapan, nye kipuryo kot konket konomik kule Yesu nyoto.
- <sup>5</sup>Kumwoci Yesu cek kule, “Lekocu monanäm akwek kiy.’’ Kuwekyi cek kumwoci kule, “Monacenäm kiy.’’





<sup>6</sup>Kumwoci Yesu cekto kule, “Owirici porokwok yewutap tay nyepo rapet mosonäm alak.” Yoto kuwirici cek porok peko, ntopere cicutu kocut kot kutij omnye kikinäm purpurunek ce caṅ koromun.

<sup>7</sup>Kumwoci konomintet nyo kicöme Yesu Petero kule, “Mokoryontet nyitenyi!” Nteye kotolime Petero kule, koko Mokoryontet nyitenyi kwisunekey sirenyi nyepo saṅ (omnye kikikorek sirokyi oṅnkurontyi peko orit.)

<sup>8</sup>Kukwane konomik cut alake rapet okoy kupun tampayayet tapan kocutonu porok ce kanyiy Purpurunek. Kipuryo kot kuloyec cekto kuceke yoto okoy cepunte koret, ntene kupuntoy kakwoyutek pokol akenke.

<sup>9</sup>Ntowo kupun cek tampayayet tapan kukäs mata nyepo nesek oko purpurunek ce kacewatan oko mukatinek.

<sup>10</sup>Kumwoci Yesu cek kule, “Osutu pa purpurunek alak co kotonöme akwek pantenyi.”

<sup>11</sup>Kuwo Simon okoy yepo rapet oṅnkucut porok ce kanyiy purpurunek cewoyec okoy kupun tampayayet tapan, kipuntoy Purpurunek tokol pokol akenke oko konom ok somok. Nka kot kicaṅ rupurunek ntene kipuryo kot kuṅetyo porok.

<sup>12</sup>Kumwoci Yesu cek kule, “Akwa kwoyomisye.” Kipuryo mpo akenke om konomik nye kisyem kutepe neto kule, “Nyi ḡo?” Omnye kinket cek kule Mokoryontet nyitenyi.

<sup>13</sup>Kuwo Yesu oṅnkonum mukatyantet oṅnkukoci cek oṅnkukoci mpo Purpurunek kuyunyoto.

<sup>14</sup>Kunyo aret nyepo somok nyitenyi kuporcikey Yesu konomik om letut yu kowo ciṅet kotutune met.

<sup>15</sup>Nto letut yu kowo kwomis cekto, kumwoci Yesu Petero kule, “Simon weritap Yowana, cömo ani nyi kusir alak cu?” Kuwekyi Petero kumwoci neto kule, “Mokoryontet, yunyoto nyi nye nketi kule ocömiṅ ani.” Kumwoci Yesu neto kule, “Rip kecirekwani.”

<sup>16</sup>Kumwoci Yesu yec Petero kule, “Simon weritap Yowana, cömo ani nyi?” Kuwekyi Petero kumwoci kule, “Mokoryontet yunyoto nyi nye nketi kule ocömiṅ ani nyi.” Kumwoci Yesu neto kule, “Rip kecirekwani.”

<sup>17</sup>Kumwoci Yesu Petero yec nyepo somok kule, “Simon weritap Yowana, cömo ani nyi?” Yoto kunyer Petero omnye katepe Yesu neto nyepo somok kule, “Cömo ani nyi?” Oṅnkumwoci kule, “Mokoryontet nyi nye nketi ḡalek tokol kule ocömiṅ ani nyi.” Kumwoci Yesu neto kule, “Rip kecirekwani.”

<sup>18</sup>Komwowuṅ ani nyi ḡalek cepo manta kule, ye kiyiku nyi lekwa, kirotekey nkit oṅnkunomen iwo wolyo ake tokol wule möce, ntene ye keyositu, meseyite yewuniyekuk oṅnkurateniṅ citake misipit oṅnkukweriṅ wule memöce.”



<sup>19</sup>(Kimwoy Yesu ñalecutecu kupor met wule mosukumeta Petero sukuñet kusut woyinto om wule mite Yiyintet.) Yoto kumwoci Yesu neto kule, “Rupa ani.”

<sup>20</sup>Kuweckey Petero kukäs let, yoto kukäs konomintet nyin ake nyo kicöme Yesu kumite letunyi. Konomintet nyoto kunyo kutiñtoykey oko Yesu ye kyomisiyi cek komoy oñnkunyoto kunyo kitepe neto Yesu kule, “Mokoryontet, ño nye mosukuñomntiñ, nyi?”

<sup>21</sup>Nteye kotoköse Petero konomintet nyoto. Kumwoci neto Yesu kule, “Mokoryontet, nto nyi,”

<sup>22</sup>Kuwekyi Yesu kumwoci neto kule, “Ye omöce ani kule kusop neto, okokoy, kunömiñ nyi coto? Rupa ani nyi pate.”

<sup>23</sup>Yoto kutisto ñolyontono om wule mite konomik kule puryo kot kume konomintonoto. Ntene kipuryo kot kumwoy Yesu kule puryo kot kume neto, kimwoy pate kule, “Ye omöce ani kule kusop, okokoy aweckey ani, kunömiñ nyi coto?”

<sup>24</sup>Konomintonoto kunye neto nyi poru ñalecu, oñnku neto nye kisile ñalecu, kunyo cinket acek neto, kimwoy ñalek cepo manta.

<sup>25</sup>Kunyo mite ñalek alak ce cañ ce kikwiw Yesu. Ce nto kocesil ñolyo ake tokol nye kikwiw, asoti ani kule nto puryo kot komuce koret kukonor kitapunek ce kocesil.



## Kiyokik

### Kiyokik 1

- <sup>1</sup>Mokoryontet nye cekonyite Teyopilo, Om kitapumwani nyo kipo tay, kyosil onkatet yisyonutek tokol ce kikwi y onkunet Yesu kuceke ye kicece yisyenyi,
- <sup>2</sup>okoy pesyet nyo kicesute neto kuwo torot. Ye kitompo kot cesut kuwo torot, kimwoci kunkolontyi om swametap Muyet Nyetilil piko co kikweny neto kwek kiyokiky.
- <sup>3</sup>Kopur Yesu kuwany pesyosyek artam kiceke ye kitutune met, onkuporcikey neto nkit cekto aret ce can om aret nye poru manta nye puryo tintenot kule kikitutune met kusop. Kikäs cekto nkit neto om konyekwa. Yoto kumwoci Yesu cekto nlek ce nöme poytoyisyetap Yiyintet.
- <sup>4</sup>Nteye kipontokey Yesu oko cekto kunkolontyi kumwoci kule, “Monte kot agete Yerusalem, ntene oken okoy kuco neto nyo kikurto Papamwani, nyo kyolim omwowok ani.
- <sup>5</sup>Omnye kipatisane Yowana piko peko, ntene om pesyos ce neri mosicepatisanenk akwek Muyet Nyetilil.”
- <sup>6</sup>Ntowo kuyomokey kiyokik oko Yesu, kutepe cek neto kule, “Mokoryontet, pesyosyecu so ye mesekeyi nyi Israel poytoyisyet?”
- <sup>7</sup>Kuwekyi Yesu kumwoci cek kule, “Puryo kot kunömok akwek onket pesyosyek nto kenyisyek co kikwiya Papa om kamukeywekyi nkit.
- <sup>8</sup>Ntene mosonyoru akwek swametap Muyet Nyetilil ye kucontyok, yoto ye mosoyiku muncururwanik ce kamwayte nlekwanani om Yerusalem, oko om Yuteya, oko om Samariya tokol okoy wule kinete koret.”
- <sup>9</sup>Nteyu kowo kuwany kumwoy nlecutecu, cesut neto kuwo torot kumite cek kuköse, yoto kulum polyet kupote konyekwa.
- <sup>10</sup>Nteye kumite cekto kunyole torot kuköse ye weti, kuyone lakwar komosmwacek piko alak oyeny ce kilac sirok ce lelac.
- <sup>11</sup>Kumwoy picoto kule, “Pikap Kalilaya, omne soyone akwek yu onkonyoli wulin po torot? Yesu nyitenyi kocesutenok akwek kuwo torot, kunye mosukuwekey kuyu nyitenyi oköse akwek cesute kuweti torot.”
- <sup>12</sup>Yoto kuwecekey konomik tulwet nye cekure tulwetap Seituninek nye kumite ye puntoy kilometet akenke keceke Yerusalem.
- <sup>13</sup>Nteyu kowo kupun cek Yerusalem, kupa koto orit onkulanjta kupa koto nye kumite koto parak nye kipurune cekto. Coto ku Petero oko Yowana, oko Yakopo oko Antereya, oko Filipo oko Tomas, oko Paturumayo, oko Matayo, oko Yakopo weritap Alufayo, oko Simon nyikanet nye poryecini korenyi, oko Yuta, weritap Yakopo.



- <sup>14</sup>Kipure picutece tokol wanak om moyet akenke sukusome om pesyosyek tokol. Kipontokey cekto wanak oko koruk, kumite mpo Mariyam kametitap Yesu oko mpo yeyanyitap Yesu.
- <sup>15</sup>Om letutap pesyos ce ŋeri, kopur kokwet nyepo piko tokol co kikoyen, kipuntoy piko tokol pokol ok timtem. Yoto kuŋet Petero kuyo oŋnkuŋalal kumwoy kule,
- <sup>16</sup>“Mpo yeya, roke ciyitita kupoyit manta ŋalekap silutekap Yiyintet ce nōme Yuta nyo kintocini piko ce kinōme Yesu.
- <sup>17</sup>Yuta kunye ki cito akenke nyepo lukenyacek nye kikicekwey kwiyis yisyoni nyacek.”
- <sup>18</sup>(Om pesanik co kinyor om yisyet nyepo miyotyeyet kuco kikwale neto mparet wule kinyorta menyī, wule kiputyi kuŋas kuyatakay moyet kukwa okutanik saŋ.
- <sup>19</sup>Kulim oŋnkunket topon piko ce minye Yerusalem, kunyo kikur cekto mparanato kutoci kaynemwa kule, Akeltama, nye poru kule, “Mparetap koroti.”)
- <sup>20</sup>“Omnye kicesil om kitaputap tumwonikap kakastayet kule, ‘Roke kopur konyi kwek kiratya, Puryo kot kumisyini kuminy ci orit.’ Kicesil yec kule, ‘Roke kusut citake oteptap yisyenyi.’
- <sup>21</sup>“Kunyo misyini kuco citake oŋnkuyomokey oko acek sukuŋet kwek neto nyoto muncururwet nye nket kotutunetap metap Mokoryontet Yesu.
- <sup>22</sup>Roke ku cito nye kicepesetoti tokol om lukenyacek yo kicepesetoti wanak oko Mokoryontet Yesu, kuceke pesyosyek co kimwoytoti Yowana ŋalekap potisonisyenyi okoy pesyet nyo kicesutenec acek Yesu kuwo torot.”
- <sup>23</sup>Yoto kukwey cekto kaynokap piko oyeny, Yosep nye kicekure Parsapa (nye kicekure yec Yusto) oko Matiya.
- <sup>24</sup>Kusom cekto kumwoy kule, “Ayi Mokoryontet, nyi nye nketi mukuleywekap piko tokol, kunyo Mokoryontet, porwec acek ŋo om picu oyeny nye kekwey nyi,
- <sup>25</sup>sukuŋet kusut kuker yisyet kwek kiyokintet otepto nyo kipokoktoy Yuta nyo kiwecikey otepnyī wule kicone.”
- <sup>26</sup>Nto om letut kukweyis cekto kuporci kirotyet picoto oyeny. Nto kaynet nye kicekwey kunye kipo Matiya, cituyo neto kuyomokey wanak oko luketap kiyokik co ki taman ok akenke.

## Kiyokik 2

- <sup>1</sup>Ntowo kupunto pesyetap Pentekoste, kimite pesyonoto kukerurukikey yeto akenke piko tokol ce kikoyen.
- <sup>2</sup>Yoto pakenke kuco karumnta nye kicone torot nye kerkey oko yomat nye kiwuse om swamet nyewo koromun oŋnkunyiy koto tokol nye kimite kukepur cekto orit.



- <sup>3</sup>Yoto kukäs cekto ce kerkey oko ñelyepikap motik ce kaseret oñkopure moticoto metitap ci tokol om cekto.
- <sup>4</sup>Yoto kunyor ci tokol Muyet Nyetilil oñkucec kuñalal ñelyepik alak kuyu wule kimukta kukoci Muyet Nyetilil ci ake tokol om cekto.
- <sup>5</sup>Kimite yoto Yutayek ce kiminye Yerusalem, piko ce kiyweye Yiyintet ce kikikwane koret tokol kumukul.
- <sup>6</sup>Nteye kotolime picoto karumnta nyoto, koruruckey wanak piko ce cañ oñnkukite tokol omnye kilim ci tokol kuñolole piko co kikoyen om ñelyepikwa.
- <sup>7</sup>Kukite piko oñnkumuyo oñnkuñalal kwicek nkit kumwoy kule, “Puryo kot ku pikap Kalilaya cekto cutecu ñolole!”
- <sup>8</sup>Omne yec sicelim acek tokol ñalek ce ñolole cekto om ñelyepta nyo kiceyitec acek?
- <sup>9</sup>Ciku acek Parasik oko Metisyek oko Elamayek oko pikap Mesopotamia oko cepo Yuteya oko cepo Kapontokiya, oko cepo Pontia, oko cepo Asia,
- <sup>10</sup>oko cepo Prukiya, oko cepo Pampiliya, oko cepo Misiri, oko cepo koretap Lipiya ce lekite moñetap Kurene, oko toyek ce kwone Rom, wanak oko Yutayek oko lamek co kicäm tinitap Yutayek,
- <sup>11</sup>Kirikik oko Arapuk. Kunyi celime acek cekto kuñolole ñelyepik kyacek yisyonutek cewoyec cepo Yiyintet.”
- <sup>12</sup>Yoto kukite cek tokol oñnkunñalal kwicek nkit kutepekey kule, “Dolyo ne ñolyontoni?”
- <sup>13</sup>Ntene kucur piko alake piko co kikoyen kumwoy kule, “Kopokit picu komek ce mwonec!”
- <sup>14</sup>Yoto kuyo Petero nye kipontokey kiyokik taman ok akenke, oñnkunñalal kukurto om kutit nyewo kumwoci luketap piko kule: “Merekyo akwek Yutayek, wanak oko akwek piko tokol ce minye Yerusalem, olimwo pa ani akwek topon koromun ñalecu amöce kule omwowu.
- <sup>15</sup>Puryo kot kupokit picu kuyu wulo osotitoy akwek; omnye mite yawut sawet somok nyepo kororn.
- <sup>16</sup>Ntene ñalecutecu kuce kiñalale workoyontet Yower kumwoy kule,
- <sup>17</sup>‘Mwowu Yiyintet kule, om pesyosyek cepo letut cokwoni mosayiy ani ñalecu: Mosokoci Muyemwani piko tokol; mosikuñorsyo werikwok oko tipikwok, mosukukäs oyiperikwok ñoñutok, mosukurwotyeci poiyikwok kirwotik.
- <sup>18</sup>Yunyoto, om pesyosyecoto mosokoci Muyemwani mpo mutworikwani moronik oko koruk, mosikuñorsyo cekto.
- <sup>19</sup>Mosoporu tukuk cepo kakitat om wulin po torot, oko pelutok ce cekite om wuli koret ñony mosukutok korotik oko mata oko yetit nyewo;



- <sup>20</sup>mosukuwälkey asista kutuyit kwek menon, oṅnkusalakay arawet kwek koroti, kutompo kot kapunto pesyet nyewo nye cikite nyepo Mokoryontet.
- <sup>21</sup>Yoto ye mosicisop ci tokol nye kure kaynetap Mokoryontet.’
- <sup>22</sup>“Pikap Israel, alimnte pa ṅalecu! Yesu nyepo Nasaret kunye cito nye kiporwok akwek Yiyintet om yisyonutek ce kikwiw cepo kakitat oṅnkupo swamet oko pelutok ce kikwiw Yiyintet om wule mite neto, oṅnket akwek nkit ṅalecutecu, omnye kikwiwokis om wule omite akwek.
- <sup>23</sup>Yiyintet nkit om cömisyenyi oko wule nketitoy neto nkit, kunye kicämnta kenya kule roke anäm akwek Yesu; kunyo kyopar apakac neto, omnye kyocämnte oṅnkokoyte kuwuyitoci piko co miyotec neto murtowontet.
- <sup>24</sup>Ntene koṅet Yiyintet kututune met kunumune neto mwonintap met, omnye kipuryo kot komukoktos kunäm oṅnkurip met neto kwek mopusyo.
- <sup>25</sup>Omnye kimwoy Tauti ṅalek ce nöme neto kule, ‘Oköse ani Mokoryontet kumite taymwani pesyosyek tokol, omnye mitowune neto yewumwani nyepo tay, sukuṅet mente kot atomtomen ani.
- <sup>26</sup>Kunyo sukuṅet kupaypayit mukuleymwani, oṅnkuṅerec ṅelyepmwani, kunyo ponto pormwani kokenotet nyepo ṅerekwek;
- <sup>27</sup>omnye puryo kot mucu nyi yosyi saponmwani kopur kapkompic, oṅnkupuryo kot mucu nyi yaste mutworinteṅuṅ nye tilil kunun.
- <sup>28</sup>Kweporwo ani arosyek ce peti wule mite soponto, kunyo om tayṅuṅyi mesekono ani nyi ṅerekwek.’
- <sup>29</sup>“Mpo yeya! Omwowok ani akwek topon ṅalek ce nöme kukonyo nyewo Tauti, kule kime cemuy, kunyo mite mwenenyi nyo kicetupci ceköse acek okay pesyoni.
- <sup>30</sup>Kunyo ki workoyo, oṅnkinkete Tauti kirotyet nye kikurtoci Yiyintet neto. Kiwalkey Yiyintet kumwoy kule mosokoci cito akenke om kesenisyekap Tauti kopure ṅeceret kwek Kinko; kuyu wule kiyunto Tauti.
- <sup>31</sup>Kikäs Tauti kito nye kimöce Yiyintet wokwiw om pesyosyek cepo tay. Yoto Kuṅalale ṅalek ce nöme kotutunetap metap Ḍapanet yo kimwowu kule, ‘Puryo kot cepokokyini neto kapkompic, Nto puryo kot kunun pornyi.’
- <sup>32</sup>“Kinjet Yiyintet Yesu nyitenyi kotutune met, kunyo ceyiku acek tokol muncururwanik cepo manta ce nöme ṅalecutecu.
- <sup>33</sup>Kicilaṅnta kuwo torot wokopurune yewutap tay nyepo Yiyintet, oṅnkunyor om wule mite Yiyintet Muyet Nyetilil kuyu wulo kikikurtoci Papanyi. Kunyo ṅalek cu oköse oṅnkolime akwek kuce kokoteywekyi ce kokonec kuroṅwec acek.
- <sup>34</sup>Omnye kipuryo kot kulaṅnta Tauti kuwo torot; ntene mwowu neto nkit kule, ‘Kimwoci Mokoryontet Mokoryotenyu kule, Purune yu po yewumwani nyepo tay,
- <sup>35</sup>okay awec ani punikuk kopurune ṅonyutap kerenkokuk.’





<sup>36</sup>“Kunyo möce kunket pikap kotap Israel tokol ñalek cepo manta kule. Yesu nyitenyi nyo kyowuyitocini akwek murtowontet kunye kikoci Yiyintet kwek Mokoryontet oñku Ñapanet!”

<sup>37</sup>Nteyu kowo kulim piko ñalecata, kwam cekto mukuleywekwa. Yoto kumwoci cek Petero oko kiyokik alak kule, “Mpo yeya, mokyiy ne?”

<sup>38</sup>Kumwoci Petero cekto kule, “Arenynkey ayaste miyotyoniwkwo citake tokol om akwek, oñkokany cepatisanak om kaynetap Yesu Kristo, sukuñet cinumunenok miyotyoniwkwo; mosonyoru akwek kokotutyet, nyoto ku Muyet Nyetilil nyepo Yiyintet.

<sup>39</sup>Omnye kikutowok Yiyintet akwek oko lekokwok oko piko tokol ce mite wule low oko tokol ce kure Yiyintet kukwa wule mite neto.”

<sup>40</sup>Kurwoyki Petero kunkolontyi kumwoci kule, “Osorukey akwek nkit osopkey om toñonutek ce kwotyini pikap pinitenyi masat!”

<sup>41</sup>Cepatisan om yoto piko ce kiyen ce kirice kupunto elifunek somok oñkuyomokey oko luketap piko ce kikoyen.

<sup>42</sup>Yoto kopurcin picoto pesyosyek tokol sukunete kiyokik cekto, oñkuyomokey wanak tokol sukupcicintos omikap Mokoryontet oñkusome okokoy.

<sup>43</sup>Kunäm muyotet ci tokol om tukuk cepo kakitat oko pelutok ce kikwiye kiyokik.

<sup>44</sup>Kuyomokey wanak piko tokol co kikoyen om cömisyet oñkusankan tukuk tokol ce kiponto ci tokol.

<sup>45</sup>Kwalya tukukwa oko tukuk alak tokol ce kiponto oñkuyomo wanak sukupcicintos kuyem kuyu wule kimoktoy ci tokol.

<sup>46</sup>Kutosyikey cek kuyu yete pesyo kutuytos wanak tokol kuyu luket akenke om kotap Yiyintet oñkwomncitos omik wanak om korikwa. Kwomisiyi omik om ñerekwek oko om mukuleywek ce poypoy.

<sup>47</sup>Kukostoy cekto Yiyintet oñkuponto cömisyet nyewo nye kicöme piko tokol. Kutosyini Mokoryontet pesyosyek tokol kuyomo wanak oko cekto piko ce kimite cisope.

### **Kiyokik 3**

<sup>1</sup>Nto om pesyet ake ye kimite Petero oko Yowana kupeti kuloñntoy kotap Yiyintet wokusome om sawetap somset ye kimite sawet sokol nyepo kosoleny.

<sup>2</sup>Kimite citake nye kikomwal kuceke ye kiceyi, nye kicesutu pesyosyek tokol cokopure kurketap kotap Yiyintet nye kicekure, “Kurket nye karam.” Sukuñet kusome pesanik piko ce peti kowute orit.

<sup>3</sup>Nteye kotoköse cicoto Petero oko Yowana kupeti kotap Yiyintet, kusom neto cekto kakalyayet.



- <sup>4</sup>Kurotot cekto tukway cicoto topon, oṅnkumwoci Petero cicoto kule, “Käsec acek pa nyi!”
- <sup>5</sup>Yoto kukäs cicoto cekto kusotyini kule tos musukukono kitake.
- <sup>6</sup>Ntene kumwoci Petero neto kule, “Moponte ani pesya tokol, ntene mosokonij kito nye oponte, om kaynetap Yesu Kristo nyepo Nasaret, komwowuṅ kule, ṅet wesetote!”
- <sup>7</sup>Yoto kunäm Petero yewutap tay nyepo cicoto oṅnkukalya kuyo. Yoto pakenke lakwar kuculokis kusopco kerenkok oko kutuṅokap cicoto,
- <sup>8</sup>Kuṅet lakwar kuyo oṅnkucec kuwesetot kowut kotap Yiyintet wanak oko cekto kuṅerekoti kuronoti kukostoy Yiyintet ye kimite kuweti.
- <sup>9</sup>Kukäs piko tokol cicoto kuwesetoti oṅnkukostoy Yiyintet.
- <sup>10</sup>Ntowo kukäs piko oṅnkunket kule cicoto ku somintet nyo kwepure kurketap kotap Yiyintet nye cekure, “Kurket nye karam.” Yoto kumuyo tokol oṅnkukite kito nye keyakay om wule mite cicoto.
- <sup>11</sup>Nteye kitokunomoti cicoto Petero oko Yowana, kukite piko tokol oṅnkurway kupa wule mite cekto om tekewut nye cekure, “Tekewutap Solomon.”
- <sup>12</sup>Ntowo kukäs Petero piko, kuṅololyi kumwoci kule, “Pikap Israel, omne sokite akwek koromun ṅalecu, nto omne sorototec acek kuyunyi. Osoti akwek kule om swamet nto om toponiyenyacek nkit kunye kekoci cici kuwesetot?”
- <sup>13</sup>Yiyintetap mpo kukonyo nye kwelaṅnta kukoci woyinto mutworintenyi Yesu, neto nyo kyonomntoy kunäm piko ce ponto kamukeywek, yo kyotoye taytap Pilato, nka mpo om letut yo kimöce Pilato kule atyakte kuwecikey.
- <sup>14</sup>Ki cito neto nye tilil nyepo manta, ntene otay akwek neto. Yoto osom Pilato kwiwok ce toponec kutyokwok rumintet,
- <sup>15</sup>Akany akwek cepar kume neto nyo konu soponto, nyo kicinjet kotutune met. Ciku acek muncururwanik ce kicekäs ṅalecu.
- <sup>16</sup>Om swametap kaynenyi kunye kekoci swamet oṅnkusop cici kimwole nye oṅnketi akwek topon. Ḍalecu oköse kuce kakyiy om koyenet oko cömisyetap kaynenyi. Om koyenet nyewo nye ceponte acek om Yesu kunye kesop cici kuyu wule oköstoy akwek kumite yu po taymwoṅ kuyunyi.
- <sup>17</sup>“Kunyo yawut, mpo yeya oṅnketi ani kule kyayiy akwek coto oko pikwok cewoyec nye kipuryo oṅnketi.
- <sup>18</sup>Kikurto kumwoy Yiyintet kenya kupunune kutuwakap workoyik tokol kumwoy kule mosukutaṅany Ḍapanenyi; kunyo kakwiyy kuyitita coto kuyu nyitenyi.
- <sup>19</sup>Kunyo arenynkey, oṅnkowekyikey wule mite Yiyintet, sukuṅet kopukto miyotyoniwok,



<sup>20</sup>sukuŋet Mokoryontet komuc kukonok pesyosyek ce omuŋe kupoypoyitu mukuleywekwok, oŋnkuyokwok kukonok Ŋapanet, Nyoto ku Yesu nyo kicekwewok akwek kuceke keny.

<sup>21</sup>Kunyo misyini kopur neto torot okoy pesyet nye cewece tukuk tokol kulelakitu, kuyu wulo kikurto Yiyintet om kenyisyek cepo keny kupunune wule mite Workoyiky ce tililec.

<sup>22</sup>Omnye kimwoy Moses kule, ‘Mosukukonok kuyokwok akwek Mokoryontet Yiyintemwoŋ workoyontet nye mosukucone kwenumwakwek nkit, kuyu wulo kikweyo ani. Misyini olimnci kiy ake tokol nye komwowok.

<sup>23</sup>Ci tokol nye puryo kot kulime ŋalek ce mwowu workoyontonoto, mosicekwey cito nyoto kucone wule mite pikap Yiyintet oŋnkyaranta.’

<sup>24</sup>Mpo workoyik, kuyu Samuel oko cerupe neto kikurto tokol ŋalecu po pesyosyecutecu.

<sup>25</sup>Kunyo oyiku akwek kontiyikap workoyik, oŋnkopoye kirotyet nyo kikwiŋ Yiyintet oko po Papamwoŋ kuyu wulo kimwoci Apram kule, ‘Kupunune wule mite kesenisyekuk, mosokoci ani kupeyok pikap koret tokol kumukul.’

<sup>26</sup>Kunyo kunyosyo Yiyintet kukwey oŋnkuyokwok kuco wule omite akwek mutworintenyi cokukonok kupeyok oŋnkuwecak akwek tokol apakakte kopurwek ce miyotec.’’

#### **Kiyokik 4**

<sup>1</sup>Nteye kitokumite kuŋololyini Petero oko Yowana piko, kukwa tisik oko cito nyewo nye poytoy kotap Yiyintet oko Satusayek.

<sup>2</sup>Kinyer cekto kunerekis omnye kinete kiyokik coto oyenku kumwoci kule kitutune met Yesu, nye poru kule mosukotutune met piko ce kipok.

<sup>3</sup>Yoto kunäm cek oŋnkukerta mopusi okoy tun kororn, omnye kikikwimen koret.

<sup>4</sup>Ntene kuyen piko ce caŋ ce kilim lokoywek okoy kapunto coŋintap moronik ce kirice elifunek mut.

<sup>5</sup>Ntowo kuyec koret, korurukikey Yerusalem poytoyikap Yutayek oko poyik oko konetikap ntarastinek;

<sup>6</sup>oko Anas tisintet nyewo oko Kayafa oko Yowana oko Alekisant, oko piko alak cepo aretap tisintet nyewo.

<sup>7</sup>Kukwer cekto Kiyokik kukwa kuyone taymwa om kokwet oŋnkutepe kule, “Swametap ŋo, nto kamukeywekap kaynetap ŋo nye oyiye akwek ŋalecu?”

<sup>8</sup>Yoto kunyor Petero swametap Muyet Nyetilil, kuŋalal kumwoci cekto kule, “Akwek kantoyikap piko oko poyik:



- <sup>9</sup>Ye otepenec acek pesyoni ñalek ce nöme ñalek ce toponec ce kukyici cito nyo kwemwole oko wule kusopto,
- <sup>10</sup>kuroke oñket akwek oko pikap Israel tokol; kule cici keyoñe yu po taymwakwek kunye kucisop neto kunyol topon om swametap kaynetap Yesu Kristo nyepo Nasaret nyo kyowuyitoy akwek, ntene kuñet Yiyintet neto kututune met.
- <sup>11</sup>Yesu nyitenyi nyo mwowu silutekap Yiyintet kule, ‘Rwantet nyo kyonyile akwek tekik, kunye kiweckey kwek rwantet nye pële tokol nye tiye koto tapan.’
- <sup>12</sup>Cenyortoy kosopotet kupunune wule mite neto nkit pate omnye puryo kot kumite yec cito ake koret tokol kumukul nye kikoci Yiyintet kaynenyi piko, nye muce kot kusopec acek.’’
- <sup>13</sup>Kukite pikap kirwoket yu kowo kukäs cekto nyikanatetap Petero oko Yowana, oñkunket kule kipontotikey picuteçu Yesu.
- <sup>14</sup>Yoto kupotyï cekto ñolyontet nye mokumwoy omnye kiköse cito nyo kucisope kumite keyoñe ye kimite Petero oko Yowana.
- <sup>15</sup>Kumwoci cekto Petero oko Yowana kuñete kokwet kupa sañ, oñkucec kurwoc kwicek nkit.
- <sup>16</sup>Kutepekey kumwoy kule, “Mokyiye ne acek picu? Omnye kukunket ci tokol nye minye Yerusalem kule, cekto ce kokwiye manta ñolyontoni po kakitat nye puryo kot cimuce cetinten.
- <sup>17</sup>Ntene ye sicekerekte ñolyontoni mente kot tokutosyikey kupunto wule mite piko tokol, roke cemwoci cisowu picu kule monte kot toñalale yec mpo kisic kaynetap Yesu.’’
- <sup>18</sup>Yoto kukur cekto kiyokik kukwa kokwet oñkurwokyi kumwoci kule, “Monte kot toñalale nto anet yec mpo kisic piko om kaynetap Yesu.’’
- <sup>19</sup>Ntene kuwekyi Petero oko Yowana kumwoci kule, “Orwoc akwek nkit nye roke ciywey om taytap Yiyintet, ciywey Yiyintet nto ciyweyak akwek?
- <sup>20</sup>Omnye puryo kot cimuci acek cesisie mocenejalale ñalek ce kicekäs oñknyelim acek nkit.’’
- <sup>21</sup>Kunkolontyi kokwet kukerci cekto koñ oñkutyakta kupecikey omnye kipuryo kot kunyorta lelis nye muce cerate, oko omnye kimite piko tokol om yoto kukostoy Yiyintet om tukuk ce kukwiyokis.
- <sup>22</sup>Kiponto cicoto kicisope om kosopet nyepo kakitat kenysiyek ce kikeytye artam.
- <sup>23</sup>Nteyu kowo cityakta Petero oko Yowana, kunomen kupa lakwar wule kimite lukemwa, oñkuwokumwoci ñalek tokol ce komwoy tisik cewoyec oko poyik.
- <sup>24</sup>Nteye kotolime cut ñalecato, kusom cekto tokol wanak Yiyintet kumwoy kule, “Ayi Mokoryontetap torot oko ñony, oko ruretok oko tukuk tokol ce mite koret!



<sup>25</sup>Kinjalal nyi om swametap Muyet Nyetilil kupunune kutitap kukonyo Tauti mutworintenun yo kimwowu kule. ‘Omne sukunerekis lamek, omne sukuyiytakey piko nyepo puc pate?’

<sup>26</sup>Kuyiytakey kutetkey kinkonikap koret, onnkuyomokey poytoyik wanak, kutoye cekto Mokoryontet oko Dapanenyi.’

<sup>27</sup>Omnye nalek cepo manta kucu kule, kiyomokey wanak Erote oko Pontyo Pilato oko lamek oko pikap Israel om mononi onkutay cekto Yesu mutworintenun nye tilil nye kinap nyi kwek Kinko.

<sup>28</sup>Kururuckey cekto wanak kwiyy kiy ake tokol nye kicam nyi kunyo om swamenun oko comisyenun kule mosukwiyakay.

<sup>29</sup>Kunyo yawut Mokoryontet, kas pa komuyotet wule kokomuytec acek, konec acek mutworikuk cejalale lokoywekuk om nyikanatet tokol.

<sup>30</sup>Yite yewunun onnkikonu kwiyyokis nalek cepo kakitat om kaynetap mutworintenun nye tilil Yesu.’

<sup>31</sup>Nteyu kowo kusom kot kuwany, yoto korinrin koret om yoto kimite cekto, konyor tokol Muyet Nyetilil onkucec kunjalal kumwoy lokoywekap Yiyintet om nyikanatet tokol.

<sup>32</sup>Yoto kuyomokey wanak piko tokol co kikoyen om moyet akenke oko mukuleyto akenke, nye kipuryo ci nye mwowu kule cecu tukuk ce kiponto, ntene kisonkone tukuk tokol ce kiponto cek tokol.

<sup>33</sup>Kumwaytat kiyokik om swamet nalek cepo manta kutor kotutunetap metap Mokoryontet Yesu. Kukoci Yiyintet cekto tokol kupeyok ce can.

<sup>34</sup>Kipuryo yoto ci mpo akenke nye kimite lukonoto nye kipotyini kiy nye moce. Kwalya piko co kiponto mparosyekwa nto korik onkusut pesanik ce konyor,

<sup>35</sup>onkwokukoci kiyokik, cepicin pesanicato kuyem ci tokol kuyu wule kimoktoy.

<sup>36</sup>Yoto mpo Yosep nye ki Lefintet nye kiceyici Kupro nye kikumulyi kiyokik kukure, ‘Parnapa’ nye poru kaynanato kule, ‘Cito nye kimisyi.’

<sup>37</sup>Kwalya neto mparenny nye kiponto onkusut pesanik cokukoci kupoy kiyokik.

## **Kiyokik 5**

<sup>1</sup>Ntene kimite citake nye kicekure kayneny Ananiya oko korkenyi Safira, yoto kwalya Ananiya mparenny nye kiponto,

<sup>2</sup>onkuwuny kukonor pesanik alak kunkete korkenyi, onkusut ce konet wule mite kiyokik.

<sup>3</sup>Kumwoci Petero neto kule, ‘Ananiya, omne sekoci Setanit kupayta mukuleynun kuwecin perper Muyet Nyetilil, omnye kwewuny pesanik kererya ce kwenyorte mparet nyo kweyalye?’



- <sup>4</sup>Ki cekuk tukuk tokol kutompo yalye, mpo yu koweyalye kutokucekuk pesanik. Kunyo omne secäm nyi om mukuleyñuñ kot yiy kiy nye yunyi? Puryo kot perper nyi piko ntene keperper Yiyintet.”
- <sup>5</sup>Nteye kotolime Ananiya ñalecato kuputyi ñony kume. Yoto kumuyo piko tokol ce kilim ñalecato.
- <sup>6</sup>Yoto kukwa oyiperik oñnkurate musto sirok oñnkusut kuwo sañ wokumuy.
- <sup>7</sup>Nto om letut kukatil sawanik somoku, kuco korkenyi nye kipuryo kot kunkete kiy ake tokol nye kakwiyakay.
- <sup>8</sup>Kutepe Petero neto kule, “Mwowo ani pa, pesanik tokol so cutecu ce kyonyoru akwek oko santeñuñ om mparet nyo kyoyalye?” Kuwec kumwoy kule, “Manta tokol cutecu.”
- <sup>9</sup>Yoto kumwoci Petero neto kule, “Omne sacäm akwek oko santeñuñ kule cesyem celotu Muyet Nyetilil nyepo Mokoryontet? Käs pa piko ce kowokomuye santenüñ, mosukusutiñ mpenyi iwo aranato!”
- <sup>10</sup>Om yoto pakenke koputyi yepo kerekokyi kume. Kukwa oyiperik koto orit kwokunyor kame, kanäm oñnkusut neto kuwo sañ wokumuy kurupkey oko santenyi.
- <sup>11</sup>Yoto kunäm muyotet nyewo koromun pikap Yiyintet oko piko alak tokol ce kilim ñalecutecu.
- <sup>12</sup>Kwiy Kiyokik tukuk cepo kakitat oko pelutok om wule mite piko, kuyomokey wanak piko tokol co kikoyen kwek luket akenke sukutuytos tekewutap Solomon.
- <sup>13</sup>Kipuryo ci mpo akenke nye kipuryo kot kupo lukonoto nye kisyem kule nto owut wule kimite piko co kikoyen, ntene kuñolole piko alake cut ñalek ce toponec kucömntoy cekto koromun.
- <sup>14</sup>Yoto kutosyikey piko ce cañ moronik oko koruk kucäm Mokoryontet oñnkuyomokey oko luketap piko co kikoyen Yiyintet,
- <sup>15</sup>okoy cesutu mpo piko ce mnyontos cesutune kwiririnek oko tempok oñkwocimukontyi arastunwekap moñet kule sukuñet nteye kopunte Petero ye lekite cekto kuyen atotoynyi picoto alak ce kimnyontos.
- <sup>16</sup>Kukwa mpo piko ce cañ ce kiminye moñosyek ce lekitec ce kimut Yerusalem, kusut cekto piko ce kimnyontos oko ce kiponto oyik ce miyotec, cisop tokol kusopco.
- <sup>17</sup>Yoto kuñet Tisintet nyewo oko pikyi ce kikolyoy neto, coto ku luketap kereryantetap Satusayek. Kunerekis cekto koromun kukocorok om wule mite kiyokik, oñnkucömncin kule mocenäm citañany kiyokik.
- <sup>18</sup>Yoto kunäm cek kiyokik oñnkukerta mopusitap piko tokol.
- <sup>19</sup>Ntene om kwomowunoto kwen, kuyat Malayketap Mokoryontet kurketap mopusit, oñnkukwer kiyokik kukwa sañ oñnkumwoci kule,





20“Ape woyonje kotap Yiyintet orit, onkomwoci piko n̄alek tokol cepo sopenitenyi lel.”

21Yoto kucām kiyokik. Ntowo kuyec kororn kupa kotap Yiyintet onkucec kunetis. Yoto kukur tisintet nyewo pikyi co kolyoy neto oko kokwet nyepo poyikap Yutayek tokol cepo Israel, onkuyokto cepa wocekwerune kiyokik mopusi kukwa kokwet wule kimate cekto.

22Nteyu kowo kupunto piko cewoyec co kiciyoktoy, munowokunyor yoto kiyokik kumite mopusi, kuwekeyek cek onkwokumwoci kokwet kule,

23“Kowocepunte acek mopusit kumite kukerat topon onkumite sikarek kuripsi topon om kurket, ntene yu kowo ceyat kurkotik puryo kot cenyorte ci orit.”

24Nteye kotolime cito nyewo nye poytoy kotap Yiyintet oko tisik n̄alecato kukite kumwoy kule, kukwam ne kiyokik.

25Yoto kuco citake onkucokumwoci kule, “Mite piko co kwokertoy akwek mopusi keyonje kotap Yiyintet orit kunete piko!”

26Yoto kunomen cito nyewo nye poytoy kotap Yiyintet oko sikarek wokukwer cekto, ntene ye kipuryo kot kukwerune swama omnye kiywey kule mente kuwirenec piko rwontok.

27Kukwer cek kiyokik kukwa onkukoci kuyonje taytap kokwet. Kucec tisintet nyewo kutepe kule,

28“Kucisowok cinkolonwok akwek kule, monte tocinetisye mpo kisic om kaynetap cici, kunyo akās pa n̄alek ce kwayiy! Kwonetisye kunām Yerusalem tokol, omōce akwek kule cesutwec acek miyotyeta korotikap cici!”

29Kuwekyi Petero oko kiyokik kumwoy kule, “Misyini celimnci acek Yiyintet kusir ye mocelimnci piko.


30Yiyintetap mpo kukonyacek nye kiŋet Yesu kotutune met om letut yu kowo okwertoci akwek murtowontet apakāc.

31Kunyo kikolan̄nta Yiyintet neto kuwo wokopure yewutap tay kwek kantoyintet nyewo onkukosopintet, sukuŋet kukoci pikap Israel poroyinto kurenynkey om miyotyoniƙwa.

32Ciku acek muncururwanik ce cinketi n̄alecutecu, acek oko Muyet Nyetilil nye kokotutyeta Yiyintet nye kocini piko co limncini neto n̄alek.”

33Nteye kotolime pikap kirwoket n̄alecato kunyer koromun okoy kurwoc kutilta kule cepakāc kiyokik.

34Ntene kuyo cito akenke om kirwoket, nyoto ku Farasoyintet nye kicekure kaynenyi Kamaliel, nye kikonetintetap ntarastinek, nye kiyweye piko tokol. Yoto kumwayta cekwer kiyokik kupa saŋ kuminiŋ,



- <sup>35</sup>oṅnkuṅalal kumwoy kule, “Merekyo pikap Israel, oripkey om kito nye omöce akwek kule ceyiye picu,
- <sup>36</sup>Omnye om kenysisyek ce ṅeri co kutil, kitok cito nye kicekure Seuta oṅnkusutkey kule oyiku ci nyewo koromun, yoto kulukyi luketap piko ce rice pokolwokik amwan, ntene cepakäc neto kume, kuseret piko tokol ce kirupoti, yoto kupok lukenyi.
- <sup>37</sup>Om letut yec, kutok Yuta nyepo koretap Kalilaya om pesyosyek co kiciyite piko tokol, yoto kururuc mpene piko ce caṅ kulukyi neto, ntene cepakäc kume oṅnkyiseret piko tokol co kirupoti.
- <sup>38</sup>Kunyo om ṅolyontoni mite yawut yu, komwowok ani kule monte ceyiye picu kitake, oyaste kwiyat cek nkit, omnye ye ṅalecu oko yisyoni mwacek kunye kiy nye kweye piko, mosukupot om letut;
- <sup>39</sup>ntene ye cone wule mite Yiyintet kupuryo kot omuci akwek kot opël cekto mpo kisic, omnye monte oporukey akwek kule omite oporye Yiyintet.”
- <sup>40</sup>Cekur Kiyokik kukwa kokwet orit, oṅnkyepas oṅnkyemwoci cinkolontyi kule monte toceṅalale onet piko om kaynetap Yesu, oṅnkyasta kupecikey.
- <sup>41</sup>Kuṅete konomik kokwet kupunto ṅerekwek ce caṅ omnye kakonket kule misyini kutaṅany toṅoṅutek om kaynetap Yesu.
- <sup>42</sup>Kunetisyec cekto pesyosyek tokol kotap Yiyintet oko korikap piko kumwoytoy lokoywek ce toponec cepo Yesu nye Ḍapanet.

## Kiyokik 6


- <sup>1</sup>Om letut kuminiṅ ye kimite kutosyinikey kucoṅitu konomik, yoto kucec kaṅunṅunyet om kwenutap Yutayek co ṅolole ṅelyeptap Kirikik oko Yutayek pikap koret. Kumwoy Yutayek co ṅolole ṅelyeptap Kirikik kule kyostoy musukik cikwa monyor omik co cepciwu pesyosyek tokol.
- <sup>2</sup>Yoto kukur kiyokik co kitaman ok oyeny luketap konomik tokol kukwa kuyomokey wanak oṅnkumwoci kule, “Puryo kot kumisyini kyaste acek mocemwayte ṅolyontetap Yiyintet oṅnkyerip cepciyte pesanik pate.
- <sup>3</sup>Kunyo mpo yeya, akwey akwek om kwenumwoṅ piko tisap ce oṅnket akwek kule ponto swametap Muyet Nyetilil oko ṅomnonet, siceṅet acek cikoci kwiy yisyoni.
- <sup>4</sup>Sukuṅet cenyoru acek poroyinto nye cesome oṅnkyiy yiyset nye cemwoytoy lokoywek.”
- <sup>5</sup>Yoto kuṅerekyi luket tokol kasoteywek ce kimwoy kiyokik; cekwey Stefano cito nye kiponto koyenet nyewo oko Muyet Nyetilil, oko Filipino oko Nikolas, oko Nikanor, oko Timon, oko Pamena, oko Nikolas nyepo koretap Antiyok cito nye kikiweckey kwek Yutoyintet.
- <sup>6</sup>Kukwer luket picoto kukwa taytap kiyokik. Yoto kusomnci kiyokik cek oṅnkukemer yewuniyekwa metewokap picoto.



- <sup>7</sup>Yoto kutosyikey nolyontetap Yiyintet kutisto om koret onnkutosyikey koromun conjintap konomik om Yerusalem onnkucäm tisik ce cañ koyenet.
- <sup>8</sup>Yoto Stefano cito nye kiponto poypoyet oko swamet oko kamukeywek, kwiyy tukuk cepo kakitat oko pelutok ce cañ om wule mite piko.
- <sup>9</sup>Ntene yoto kutintentyi piko alake n̄alekap Stefano, coto ku piko cepo luketap kokwet nye cekure kotapkokwetap piko ce kikyasta (wule kicekurtoy cekto) ce kipontokey Yutayek cekwone Kurene oko Alekisantaria. Cek coto oko Yutayek alak ce kikwone Silisiya oko Asia, kucec picoto kutintentyin oko Stefano.
- <sup>10</sup>Ntene kukoci Muyet Nyetilil Stefano nomnonet nye kiñalal nye kipuryo kot komuc cek neto.
- <sup>11</sup>Yoto kwal picoto piko alak ce kiñalal kumwoy kule, “Kucelim acek neto kuñolole kumwowu n̄alek ce miyotec om wule mite Moses oko Yiyintet.”
- <sup>12</sup>Kuñetjet cekto kowurur piko oko poyik oko konetikap ntarastinek, kukwa onnkunäm Stefano onnkukwer taytap kokwet,
- <sup>13</sup>onnkukwer piko alak kukwa kwokumwoy n̄alek cepo mwiynanet pate kule, “Dolole cici pesyosyek tokol nye memunye n̄alek ce miyotec konyacek nye tilil nyepo Yiyintet oko ntarastinekap Moses.
- <sup>14</sup>Omnye kucelim kumwowu kule, mosukoturpup cicitenyi cekure Yesu nyepo Nasaret kululyi n̄ony kotap Yiyintet, onnkuwec kopurto nyo kikonec acek Moses.”
- <sup>15</sup>Yoto kurotot piko tokol ce kimite kokwet kukäs Stefano, nto pere cekäs kawälkey tokonyi kukerkeyit tokoytap malayket.

## Kiyokik 7

- <sup>1</sup>Kutepe Tisintet nyewo Stefano kule, “Po so n̄alecutecu manta?”
- <sup>2</sup>Kuwec Stefano kumwoy kule, “Mpo yeya, oko mpo Papa, olimwo ani pa akwek! Kiporcikey Yiyintet nye ponto woyinto kukonyo Apram ye kimite kuminye koretap Mesopotamia, kutompo kot kuwu wokuminy koretap Aran,
- <sup>3</sup>kimwoci kule, ‘Det pakakte komwoñ oko koreñuñ onnkiwuyi iwo koret nye mosoporuj ani nyi.’
- <sup>4</sup>Yoto kuwuye Apram koretap Kalitayek onnkuwo wokuminy Aran. Nto om letut yu kowo kume kwan, kuntoci Yiyintet Apram kukwer kucone wuloto okoy kupun koronitenyi omite akwek yawut.
- <sup>5</sup>Ntene kipuryo kot kukoci Yiyintet Apram kereryantetap maswetap koroni nka mpo kisic pate kwek nyenyi, ntene kukurtoci pate kimwoci kule mosokoniñ kwek nyenjuñ oko kesenisyekuk, nka kot kipuryo kot kuponto Apram lekwa om pesyosyecoto.



- <sup>6</sup>Kimwoci Yiyintet neto kule, ‘Mosukupa kesenisyekuk wokuminjis koretap piko alak wule mosokwek cekto mutwor oṅkkyitaṅany koromun om wuloto kuwany kenysisyek pokolwokik amwan.’
- <sup>7</sup>Kumwoy Yiyintet kule, ‘Mosomutyi musankut ataṅany picoto mosukutaṅany cekto, nto om letut okweru kukwane koronoto kukwa kwokusaya ani om koronitenyi.’
- <sup>8</sup>Yoto kukoci Yiyintet Apram sakwetap wonset kwek pelutyetap kirotyet. Kuwon Apram werinyi Isaka kuponto pesyosyek sisit kuceke koceyi. Kuwon Isaka werinyi Yakopo nto om letut kurupkey kuyunyoto kuwon Yakopo mpo kukonyo co kitaman ok oyeny.
- <sup>9</sup>‘Kucorokyi mpo kukonyo Yosep oṅkwalya neto kuwo Misiri wokwek mutworin, ntene kurip Yiyintet neto om wuloto,
- <sup>10</sup>oṅnkukalya kupunte toṅoṅutek tokol ce kinyor. Nteye kimate Yosep kaytap Farawo Kinko nyepo Misiri, kukoci Yiyintet neto kopurto nye topon oko ṅomnonet okoy kukwey Farawo neto kwek poytoyintet nye poytoy pikap koronoto wanak oko pikap kaytap Kinko nyepo Misiri.
- <sup>11</sup>Yoto kuco rupet nye kisut toṅoṅutek ce caṅ om koretap Misiri tokol oko koretap Kanan tokol, okoy kupoty mpo kukonyo omik ce mokwam.
- <sup>12</sup>Ntene kulim Yakopo kule mite omik Misiri, sukuṅet yoto mpo kukonyo kupa wuloto om panta nye kipo tay.
- <sup>13</sup>Nto om Panta nyepo oyeny kuporcikey Yosep mpo yeyanyi okoy letut kunket Farawo pikap Yosep.
- <sup>14</sup>Yoto kuyokto Yosep ṅalek kupa wule mite kwan Yakopo kumwoci kule kuwu neto wanak oko pikap kanyi tokol kupa Misiri. Kipuntoy coṅintap picoto tokol tomonwokik tisap ok mut.
- <sup>15</sup>Yoto kuwu Yakopo kuwo Misiri wule kiwo kumeci neto oko mpo kukonyo tokol.
- <sup>16</sup>Cesut muswek cikwa okoy kupun Sekem wule kikwocemuci mwenet nyo kyole Apram pesanik kwale werikap Amor.
- <sup>17</sup>‘Ntowo kupunto pesyet kuyitita Yiyintet kirotyet nyo kikurtoci Apram, yoto kutosyikey kupit kucaṅit pikyo om Misiri.
- <sup>18</sup>Om letut kupoytoyis Kinko ake nye kipuryo kot konket nyoto Yosep.
- <sup>19</sup>Kuṅet Kinko nyoto kumutyi ṅomnon kuṅom pikyacek kutaṅany mpo kukonyo kukerci koṅ kunumune lekokwa ce timinkec kumwoci kule kiwirici saṅ sukuṅet kupok.
- <sup>20</sup>Om pesyosyecoto kuye kiceyiye Moses, kwek lekwa nye topon koromun nye kiṅerece Yiyintet. Ntene cepaye kaytap kwan kuwany orok somok,
- <sup>21</sup>nto cinumu cewirta. Yoto kunyor ceptap Farawo, kuṅam nyo kwek werinyi.



- <sup>22</sup>Cinet neto ñomnonet tokol nyepo pikap Misiri, yoto kutok neto kwek ci nyewo koromun om ñalek ce kiñolole oko yisyonutek ce kikwiye.
- <sup>23</sup>“Nteye kiponto Moses kenysisyek artam, kusot kule mawo orutoci mpo yeyanyi pikap Israel.
- <sup>24</sup>Wokunyor cito akenke nyepo Misiri nye kimate kupire kutoñonye cito nyepo Israel, kuwo yoto wokuyetyeci citap Israel nyo kicitoñonye. Kupir Moses citap Misiri kupakäc kume.
- <sup>25</sup>Kisote Moses kule toskoy mokusow pikyi pikap Israel kule mite Yiyintet kuweti kule wosoru cekto kupunte wule mite Moses. Ntene kipuryo kot kusow cut.
- <sup>26</sup>Ntowo kuyekune om pesyet nyepo oyeny, kunyor yec Moses pikap Israel oyeny ce kiportos kwicek nkit. Yoto kusyem kule aket kumwoci kule, ‘Merekyo, alim pa, nteyu otupce akwek! Omne soporye akwek nkit?’
- <sup>27</sup>Ntene kuwunukto cito nyo kitoñonye nyin Moses kuwo tapan oñnkutepe kule, ‘Do nye kokoniñ nyi kule paytec nto ketec acek?’
- <sup>28</sup>Möce kule apakäc ani kuyu wulo kwepoköci citap Misiri?’
- <sup>29</sup>Ntowo kulim Moses ñalecato, kumwey kuwete Misiri wokuminy koretap Mitian wule kiwo kuyici werikiyi oyeny.
- <sup>30</sup>“Yoto ntowo kupok kenysisyek artamu, kucontyi malayket neto oñnkuporcikey om rukututwet nye kiloye om koretap kitela ye lekite tulwetap Sinai.
- <sup>31</sup>Kukite Moses kito nye kikäs oñnkuwo kunokyi wule wakäs topon rukututwet nyi loye, yoto kulim kursetap Mokoryontet,
- <sup>32</sup>nye kimwoy kule, ‘Ani nyo Yiyintetap mpo kukoñuñ, Yiyintetap Apram, Yiyintetap Isaka, Yiyintetap Yakopo.’ Yoto kumuy Moses kupotan nye kipuryo kot tokomuc kukäs.
- <sup>33</sup>Kumwoci Mokoryontet neto kule, ‘Numune kweyonik kerenkokuk omnye tilil koret yo koyeje nyi!
- <sup>34</sup>Kwakäs manta toñoñutek ce ponto pikwani om Misiri, kwalim rirekwa, kunyo kaco oreku cesoru osop cekto, amöce kule oyoktiñ nyi iwo Misiri.’
- <sup>35</sup>“Moses nyitenyi neto nyoto kitoye pikap Israel yo kimwowu kule, ‘Do nye kokoniñ nyi kule paytec nto ketec acek?’ Moses kunyo kiyoku Yiyintet cokwek poytoyintet nyewo oñnkwek kosopintet om kakalyayetap malayket nyo kiporcinikey neto om rukututwet nye loye.
- <sup>36</sup>Kukwerune Moses pikap Israel kukwane Misiri oñnkwiyy pelutok cepo kakitat om Misiri oko ruretyet nye arra oko om koretap kitela kuwany kenysisyek artam.
- <sup>37</sup>Moses kunyo kimwoci pikap Israel kule, ‘Mosukuyokwok akwek Yiyintet workoyontet ake kuyu wulo kiyokwo ani, mosukucone neto nyoto wule omite akwek pikap Israel nkit.’



<sup>38</sup>Moses kunyo kipontokey mpo kukonyo luketap pikap Israel yo kirurucekey om kitela, yo kinololyini Malayket neto om tulwetap Sinai ye kicikocini lokoywek cepo soponto nyepo okokoy sukuŋet kukonec acek.

<sup>39</sup>“Ntene kutay mpo kukonyo kulimnci Moses, kuwunukto kuwo tapan oŋnkusot kule keroke ceketitekey cipe let koretap Misiri.

<sup>40</sup>Yoto kuyon oŋnkumwoci Aron kule, ‘Tonwec acek oyinotik alak ce sekuŋet kuntowec, omnye puryo kot cinket kito nye kukwam Moses nyo kikwerunenec acek koretap Misiri.’

<sup>41</sup>Yoto kuye kitonye cekto kerkeyinto nye kerkey moyita, oŋnkupel kwici korosek kiyoto, oŋnkwiŋ sakwet nyewo kwici kiyoto kitonye cek om yewuniyekwa nkit.

<sup>42</sup>Yoto kutay Yiyintet cek oŋnkwasta kusay kokelikap parak, kuyu wulo kicesilyo om kitaput workoyik kule: ‘Pikap Israel! Puryo kot ku ani nyo kyotilyini tyonjik oko korosek kuwany kenysyek artam om kitela.

<sup>43</sup>Ki wemetap Yiyintet Moloc nyoto nyo kyotoroti akwek, oko kerkeyintap kokelyantetap Yiyintemwoŋ Repan; coto ku kerkeyik ce kyotany akwek om yewuniyekwok oŋnkosay, kunyo mosakwetak ani ape okoy akeyitye Papulon.’

<sup>44</sup>“Kiponto mpo kukonyo wemet om kitela nye poru kule mite Yiyintet, wemanato kunye kicitany kopur kuyu wule kimwoci Yiyintet Moses kuyiyta, oŋnkukiciyoyec kuyu wule kikiciporci neto wule tento.

<sup>45</sup>Nto om letut kukoci mpo kwan mpo kukonyacek kutorat wemanato yo kipontotikey cekto Yoswa, oŋnkusut okoy kupun koretap pikap lamek alak co kikwete Yiyintet. Kopur wemanato wuloto okoy pesyosyekap Tauti.

<sup>46</sup>Yoto kucäm Yiyintet Tauti koromun okoy kucömnci kutec koto nye minye Yiyintetap Yakopo.

<sup>47</sup>Ntene Solomon nye kitekyi Yiyintet koto.

<sup>48</sup>Kunyo puryo kot kuminye Yiyintet nyewo nye mite torot koromun korik ce tece piko; kuyu wulo mwoytoŋ workoyontet kule.

<sup>49</sup>‘Mwowu Mokoryontet kule, torot kunye ŋecerenyu nyepo mokoryontit, nto koret ŋony ku wule yoŋe kerekokyu. Kunyo koto nye yu ne nye otekwo ani akwek? Ono otepto nye momuŋe ani?’

<sup>50</sup>Puryo kot ku yewumwani ne nye kitonye tukucu tokol?’

<sup>51</sup>“Oyiku akwek pic ce kyorat kotwo! Oyiku pic ce puryo kot kuwonotin mukuleywekwok, oŋnkumiŋotin yitikwok nye molime ŋalek cepo manta! Okerkeyekey mpo kukomwoŋ! Okerektoy mpo akwek okokoy Muyet Nyetilil!

<sup>52</sup>Mite pa nyun workoyonto mpo akenke nye kipuryo kot kutany mpo kukomwoŋ? Kipar cek kupakac piko ce kisutu lokoywekap Yiyintet ce kicemwoy keny kule conit mutworintet nyepo manta. Kunyo yawut kyonomnte akwek neto nyoto apakac kume.





<sup>53</sup>Oyik akwek piko ce kikonok malayket ntarastinekap Yiyintet, oṅnkurok otay akwek mocäm orip ntarastinecoto.”

<sup>54</sup>Ntowo kulim piko tokol om kokwet ṅalek ce komwoy Stefano, kunyiy cek kelak kunyeri neto koromun.

<sup>55</sup>Ntene kunyor Stefano Muyet Nyetilil, yoto kunyal torot okoy kukäs woyintap Yiyintet oko Yesu kumite kukeyoṅe yewutap tay nyepo Yiyintet.

<sup>56</sup>Komwoy kule, “Akäs pa! Kakäs ani kayatakay wulin po torot, kunyo oköse Weritap cito nye kuyoye yewutap tay nyepo Yiyintet.”

<sup>57</sup>Yoto kupol piko tokol om kutit akenke nyewo oṅnkuker yitikwa, oṅnkurotyi Stefano,

<sup>58</sup>kocutune moṅet kuwo saṅ oṅnkuwire rwontok. Kupokoyi piko muncururwanik ce kimite yeto sirokwa oyiperyontet ake nye cekure Saulo.

<sup>59</sup>Nteye kimite cekto kuwire neto rwontok, kusom Stefano kumwoy kule, “Mokoryontet Yesu Näm mukuleymwani.”

<sup>60</sup>Yoto kukutuny oṅnkukurto om kutit nyewo kule, “Mokoryontet mente oyityi cekto miyotyoni!” Kumwoy kuyunyoto oṅnkuru ṅony kume.

## Kiyokik 8

<sup>1</sup>Kucämnta mpeneto Saulo wule kameta Stefano. Kuceke pesyonoto kucec kutanjany toṅoṅutek ce caṅ koromun luket nyepo pikap Yiyintet om Yerusalem. Kumwey piko tokol co kikoyen kuseretyi koret tokol nyepo Yuteya oko Samariya okoy kuṅet pate kiyokik.

<sup>2</sup>Kumuyis piko ce kikoyen kumuy Stefano ce kirire neto lokik ce caṅ koromun.

<sup>3</sup>Ntene yoto kusyem Saulo koromun kule awurte kupotyoy pikap Yiyintet, kuwo kowut korik tokol oṅnkocutune orit piko co kikoyen moronik oko koruk oṅnkukerta tokol mopusi.

<sup>4</sup>Yoto kupa piko tokol co kikoyen kuseretyi koret tokol kumwoytoti lokoywek ce toponec.

<sup>5</sup>Kunomen Filipino kurekto okoy kupunto moṅetap Samariya oṅnkuwokumwoci pikap wuloto lokoywek ce toponec cepo Ḍapanet.

<sup>6</sup>Kulim topon piko ce caṅ ṅalek ce kimwowu Filipino, kilum cekto ṅalekyi oṅnkukäs tukuk cepo kakitat ce kikwiye neto wuloto.

<sup>7</sup>Kuṅetyo kupete oyik ce miyotec piko ce caṅ oṅnkupa kupolot polotet nyewo. Cisop mpo piko ce caṅ, piko ce kipok kuwusyo kerenkok oko ce kikikomwolis.

<sup>8</sup>Yoto kuṅerec koromun piko tokol cepo moṅetap Samariya.



- <sup>9</sup>Kimite mojonoto citake nye cekure Simon, nye kikwiye sokeyek ce cikite om pesyosyek alak okoy kukite pikap Samariya tokol koromun. Kisutekey kule oyiku ci nyewo nye tokunot koromun.
- <sup>10</sup>Kiyweye piko tokol neto kuceke lekwa okoy piko cewoyec, kumwowu cekto kule, “Cici kunye swametap Yiyintet nye cekure. ‘Swamet nyewo.’ ”
- <sup>11</sup>Kiyweye piko neto omnye kikikwiyy sokeyek ce cikite kuwany pesyosyek ce caŋ.
- <sup>12</sup>Ntene yu kuwo kuyen piko lokoywek ce toponec cepo poytoyisyetap Yiyintet oko kaynetap Yesu Kristo ce kimwowu Filipino, yoto cepatisan piko moronik oko koruk.
- <sup>13</sup>Kuyen mpene Simon, nto om letut yu kowo cepatisan Simon kopurcin neto oko Filipino. Kokite koromun yu kowo kukäs pelutok cewoyec oko tukuk cepo kakitat ce kiciye.
- <sup>14</sup>Yoto kulim kiyokik ce kimite Yerusalem kule kulim oŋnkucäm pikap Samariya ŋolyontetap Yiyintet. Kuyokto cekto Petero oko Yowana kupa wule mite picoto.
- <sup>15</sup>Ntowo kupunto Petero oko Yowana wuloto, kusomnci cek piko co kikoyen kule sukuŋet kunyor Muyet Nyetilil.
- <sup>16</sup>Omnye kitompo kot kucontyi Muyet Nyetilil mpo akenke om picoto. Ntene kikicepatisan cekto tokol pate om kaynetap Mokoryontet Yesu.
- <sup>17</sup>Yoto kukemer Petero oko Yowana yewuniyekwa metewokap picoto, kunyor tokol Muyet Nyetilil.
- <sup>18</sup>Ntowo kukäs Simon kule kanyor picoto Muyet Nyetilil omnye kekemer kiyokik yewuniyekwa metewokap picoto, yoto kunam pesanik oŋnkukoci Petero oko Yowana,
- <sup>19</sup>kumwoci kule, “Okono mpo ani swamani sukuŋet kunyor Muyet Nyetilil piko tokol ce kakemer ani yewuniyekyu.”
- <sup>20</sup>Ntene kuwekyi Petero kumwoci kule, “Wot pot oko pesanikuk, omnye soti nyi kule omuci ayale pesanik kokotutyetap Yiyintet!
- <sup>21</sup>Puryo kot kunyeŋuŋ yisyoni, omnye puryo kot kurotat mukuleyŋuŋ om konyekap Yiyintet.
- <sup>22</sup>Kunyo renynkey oŋnkicone areŋuŋ nyi miyat, oŋnkisom Mokoryontet sukuŋet kukalyiŋ nyi kasoteywekuk cu yucu.
- <sup>23</sup>Omnye kakäs ani kule ponte nyi corokyinotet nyewo koromun, oŋnkiyiku mopusyontetap miyotyet.”
- <sup>24</sup>Kimwoci Simon nyonkey Petero oko Yowana kule, “Osomok ani akwek kule osomwo Mokoryontet sukuŋet mente kot kukwontyo tukucu komwowu akwek kule muce kukwontyo ani.”



- <sup>25</sup>Nto om letut yu kowo kumwayta cekto lokoywekap Mokoryontet, kunomen Petero oko Yowana kuwekey kupa Yerusalem. Nteye kimite kupeti om aran kumwaytat lokoywek ce toponec om sojwek ce caṅ cepo Samariyek.
- <sup>26</sup>Kuṅololyi malayketap Mokoryontet kumwoci Filipino kule, “Det yiytekey, oṅkinomen tokyikey tö okoy punte aret kacatanet nyo rekte Yerusalem okoy kupunto Kasa.” (Aretap surukwenet nyoto.)
- <sup>27</sup>Yoto kunomen Filipino kuwo, okoy wokunyor citake nyepo Esiopiya. Cicoto kunye cito nyewo nye kikonorintetap Kantake nto korko nye Kinko nyepo Esiopiya. Kimite cicoto yoto kucone Yerusalem wule kikiwo toyek wokusay Yiyintet.
- <sup>28</sup>Kunyo kimite poninekyi kuketitokey Esiopiya kuwete karinyi oṅkusumonoti kitaput nye kisile workoyontet Isaya.
- <sup>29</sup>Kumwoci Muyet Nyetilil Filipino kule, “Lapat ric apetekey karina.”
- <sup>30</sup>Yoto kulapat Filipino okoy ye kimite karinata, kulim neto cicoto kusumone om kutit nyewo ṅalekap workoyontet Isaya. Yoto kutepe Filipino cicoto kule, “Nketi nyi ṅalecutecu sumoni?”
- <sup>31</sup>Kuwekyi cicoto kumwoci kule, “Omuci ani oṅket kulene ye puryo ci nye keporwo?” Kumwoci cicoto Filipino kulany karit parak oṅkupetakey tukway.
- <sup>32</sup>Dalekap silutekap Yiyintet ce kisumone cicoto kucu kule: “Kicekwer neto wocetil kuyu keciryet, Kikerkey neto lekwap kecir nye mute cito kororik ntene oṅkupuryo kot kutwowu, Kunyo puryo kot kuṅany kutinyi.
- <sup>33</sup>Kicewec neto kuminiṅit oṅkyeyete ṅalek cepo musankut nyepo manta. Puryo ci nye muce kuror kumwoy pikap arenyi, Omnye kicesut soponny kuwete koret.”
- <sup>34</sup>Kumwoci cicoto Filipino kule, “Mwowo ani nyi pa, ṅolole workoyontet ci ṅo om ṅalecu? Kiṅololekey neto nkit; nto kiṅolole citake?”
- <sup>35</sup>Yoto kucec Filipino kumwoci cicoto lokoywek ce toponec cepo Yesu kuceke ṅalecutecu kicesil om kitaputap silutekap Yiyintet.
- <sup>36</sup>Nteye kimite cekto tukway kupeti om aran kukwa okoy kupun ye kimite peko. Kumwoy cicoto kule, “Käs okyu peko, kiy ne nye kerektoy mocepatisana ani?”
- <sup>37</sup>Kumwoci Filipino cicoto kule. “Cimuce cepatisaniṅ nyi ye keyen om mukuleyṅuṅ tokol.” Kuwec cicoto kumwoy kule, “Koyen acäm ani kule Yesu Kristo kunye Weritap Yiyintet.”
- <sup>38</sup>Kuyonṅto cicoto karit, oṅnkupa tukway oko Filipino kolumntakey peko orit, yoto kupatisan Filipino cicoto.
- <sup>39</sup>Nteyu kowo koluṅune peko, kukwer Muyetap Mokoryontet Filipino kuwecikey arenyi. Kipuryo kot tokukäs cicoto Filipino yec om yoto. Ntene kutosyikey cicoto kuwo poninekyi kuṅerekoti ṅerekwek ce caṅ.



<sup>40</sup>Wokukose Filipino pate mite wule cekure Asyotot. Yoto kuwo Filipino kupunte moṅosyek tokol kumwoytoti lokoywek ce toponec okoy kapunto Kaysariya.

## Kiyokik 9

<sup>1</sup>Ntene om pesyosyecoto, kutosyikey Saulo kutañany konomikap Mokoryontet. Yoto kuwo wule mite Tisintet nyewo,

<sup>2</sup>oṅnkusom parwet nye muce wokuporci kantoyikap korikapkok cepo Tamasko, sukuṅet ye kopunto wuloto oṅnkunyor ci tokol nye rupe ṅalekap Mokoryontet komuc neto kunäm oṅnkurat tokol moronik oko koruk oṅnkukwer cek kupa Yerusalem.

<sup>3</sup>Nteye kimite Saulo panta kuweti Tamasko kukarikta moṅet, kucone lakweyet parak lakwar nye kikweny komut neto.

<sup>4</sup>Yoto kuputyi ṅony, oṅnkulim kutit nye kikure neto kule, “Saulo, Saulo! Omne setañany ani nyi?”

<sup>5</sup>Kumwoy Saulo kule, “Mokoryontet, nyi ṅo?” Kumwoy kutit nye kokursyi kule, “Ani nyo Yesu nyo mite nyi toṅonyi.

<sup>6</sup>Ntene ṅete ṅony oṅnkinomen iwo okoy moṅet wule mosicemwowuneniṅ nyi kito nye roke yiy.”

<sup>7</sup>Ntene kikikuyonṅ yoto piko ce kipetoykey neto nye puryo kot kuṅolole, omnye kilim cekto kutit nye kikursyi ntene amakäs ci.

<sup>8</sup>Kuṅete Saulo ṅony oṅnkuṅany konyekyi, ntopere akaste komokuköstoy. Yoto cenäm neto yewut oṅnkyiretot okoy kupunto Tamasko.

<sup>9</sup>Kuwany Saulo pesyosyek somok nye puryo kot kuköstoy oṅnkupuryo kot kwomisyi omit nto mpo kuyesyo.

<sup>10</sup>Kimite Tamasko konomintet ake nye cekure Ananiya, yoto kuṅonkyi kuporci Mokoryontet neto kumwoci kule, “Ananiya!” Kuwec Ananiya kumwoy kule, “Mokoryontet, amite ani yu.”

<sup>11</sup>Kumwoci Mokoryontet neto kule, “Det oṅnkinomen iwo okoy aretap moṅet nyo rotat okoy punte kotap Yuta oṅnkitepu citake nyepo Taruso nye cekure Saulo nye mite kusome.

<sup>12</sup>Kunyo kocenṅonkyi neto kukäs cito nye cekure Ananiya kuconi kumiṅu ko oṅnkukemer yewuniyekyi sukuṅet kukästa yec konyekyi.”

<sup>13</sup>Ntene kuwec Ananiya kumwoy kule, “Mokoryontet, kumwowo ani piko ce caṅ ṅalek ce miyotec ce nöme cicitenyi ce kikwici pikuk om Yerusalem.

<sup>14</sup>Kunyo kuco Tamasko kuponto kamukeywek cepo Tisintet nyewo sukuṅet kunäm piko tokol ce rupe kusoye kayneṅuṅ.”

<sup>15</sup>Kumwoci Mokoryontet Ananiya kule, “Iwo nyi, omnye kwakwey ani neto sukuṅet kwiwo, yisyet kuparta ani om wule mite Lamek oko kinkonikwa oko pikap Israel.



- <sup>16</sup>Omnye ani nkit nye mosoporci neto ñalek tokol ce mosukutañany om kaynemwani.’’
- <sup>17</sup>Yoto kuwo Ananiya okoy koyoto oñnkukemer yewuniyekyi metitap Saulo oñnkumwoy kule, “Yeya Saulo, keyokwani Mokoryontet Yesu nkit, nyo kweporunkey nyi nkit om aran yo kwemite coni wuli, kule sukuñet käste nyi yec oñnkinyoru Muyet Nyetilil.’’
- <sup>18</sup>Om yoto pakenke kusuwune konyekap Saulo tukun ce yu taper, oñnkunjoñokis konyekyi kukästa yec. Kuñet kuyo oñnkyepatisan,
- <sup>19</sup>oñnkwomis omik oñnkunyor swamet. Kopur Saulo kuwany pesyos tukusic kupontokey wanak oko konomik om Tamasko.
- <sup>20</sup>Yoto pakenke kuwo Saulo kowut korikapkok oñnkumwayta ñalekap Yesu kutor kumwoy kule, “Yesu kunye Weritap Yiyintet.’’
- <sup>21</sup>Kokite piko tokol ce kilim ñalekyi, oñnkutep kumwoy kule, “Puryo kot ku cicitenyi nyo syeme kule apakäc omis piko co cöme kaynani om Yerusalem? Kunyo kuco wuli kule canäm, picoto oñnkokwer kupa wule mite tisintet nyewo?’’
- <sup>22</sup>Ntene kutosyikey Saulo kukimit oñnkutintentyin oko Yutayek ce kiminye Tamasko okoy kupël, kumwoci neto cekto om swamet kule, Yesu kunye Dapanet nyepo manta.
- <sup>23</sup>Nteyu kowo kutil pesyosyek ce cañ, koruruckey Yutayek kwiy rurumut kule cepakäc Saulo.
- <sup>24</sup>Ntene kusow Saulo konket kito nye kimöce cek kule ceyiy. Kuripso cekto kurkotikap moñet komoy oko pet kule cepakäc neto.
- <sup>25</sup>Ntene kunäm konomikyiy Saulo om kwomowut ake oñnkukerta cikaput nyewo oñnkukoyito kupunte pastit nyepo totetap moñet kuwo sañ.
- <sup>26</sup>Ntowo kuwo Saulo okoy Yerusalem, yoto kusyem kule oyomekey wanak oko luketap konomik om woloto, ntene kuywey cut tokol neto, omnye kipuryo kot kuyen kule kikwek Saulo konomintet.
- <sup>27</sup>Yoto kukalya Parnapa kukwer neto wule mite kiyokik, oñnkurorci kuporci cekto wule kikästa Saulo Mokoryontet om aran, oko kule kikiñololyi Mokoryontet neto. Kumwoci Parnapa cek yec ñalek ce kimwayta Saulo om nyikanatet om kaynetap Yesu ye kimite Tamasko.
- <sup>28</sup>Kopur Saulo wanak oko cekto oñnkuwesetote Yerusalem tokol kumwoytoti om swamet kaynetap Mokoryontet Yesu,
- <sup>29</sup>oñnkutintentyin oko Yutayek co ñolole ñelyeptap Kirikik. Kusyem co kule cepakäc neto.
- <sup>30</sup>Ntowo kulim mpo yeya piko co kikoyen ñalecato, kukwer cek Saulo kurekto okoy kupunto Kaysariya oñnkuyomis kuwecikey Taruso.



- <sup>31</sup>Yoto kunyor kalyet pikap Yiyintet ce kimite koretap Yuteya tokol oko Samariya. Kutekakay kuner oṅnkutosyikey kucan̄it piko om kakalyayetap Muyet Nyetilil, oṅnkunām cekto kopurto nye yweye Mokoryontet.
- <sup>32</sup>Kuwesetote Petero koret wulyo tokol om wuloto. Nto mite pesyet ake kuwo kurutoci pikap Yiyintet ce kiminye Lita.
- <sup>33</sup>Wokunyor om wuloto citake nye cekure Ayineya, nye kikiru kwiriri kuwany kenysyek sisit, omnye kipok krenkok.
- <sup>34</sup>Yoto kumwoci Petero neto kule, “Ayineya, sopiṅ nyi Yesu Kristo ṅet yony oṅnkisat kwiririṅṅ.” Yoto kuṅete Ayineya ṅony lakwar.
- <sup>35</sup>Kukäs piko tokol ce kiminye Lita oko Syaron cicoto kicisop, yoto kuwekyikey cekto kucām Mokoryontet.
- <sup>36</sup>Kimite Yopa korket ake nye konomintet nye kicekure Tapisa (kaynenyi om ṅelyeptap Kirikik ku Torkas, nye poru kule, Cepkecey). Kikwiysisi korokonoto yisyonutek ce toponec kukolyoy pononik okokoy.
- <sup>37</sup>Kumnyan pesyosyecoto okoy kume. Ciwun pornyi oṅnkyikoci kopur koto nye mite koto parak.
- <sup>38</sup>Kipuryo kot ku low kuceke Yopa okoy kupunto Lita. Nteye kotolime konomik ce kimite Yopa kule mite Petero Lita, kuyokto cekto piko oyeny kupa wokumwoci Petero kule, “Co sorukey lakwar okoy punu wuli cemite acek.”
- <sup>39</sup>Yoto kuṅet Petero oṅnkunomen wanak oko picoto kiciyoku. Ntowo kupunto, cekwer neto kuwo koto nye kimite koto parak. Korurukikey wuloto musukik tokol komut Petero kukirtos sukuporcini cekto neto sirok ce kinope Torkas ye kisope.
- <sup>40</sup>Yoto kukwet Petero piko tokol kukwane koyoto, oṅnkukutuny kusom, oṅnkuwekyikey musto kumwoci kule, “Tapisa, ṅet yony.” Kuṅany Tapisa konyekyi, nteye kotoköse neto Petero kuṅet kopur ṅony.
- <sup>41</sup>Yoto kukalya Petero neto kunām kuṅet kuyo, oṅnkukur piko co kikoyen oko musukik oṅnkuporci neto cek Torkas nye kosop.
- <sup>42</sup>Celime ṅalecato koretap Yopa tokol kumukul, yoto kuyen piko ce caṅ Mokoryontet.
- <sup>43</sup>Kopur Petero Yopa kuwany pesyosyek ce caṅ kopurune kaytap Simon nye kikute syerok.

## Kiyokik 10

- <sup>1</sup>Kimite citake Kaysariya nye cekure Korneliyo nye kinyewo nyepo sikarekap luket nye cekure, “Luketap Romek.”
- <sup>2</sup>Ki cito neto nyepo tini koromun nye kisoye Yiyintet wanak oko pikap kanyi. Kikwiye neto tukuk ce caṅ ce toponec kukolyoy Yutayek ce pononik, oṅnkisome Yiyintet okokoy.





- <sup>3</sup>Nto mite pesyet ake ye kimate sawet sokol nyepo kosoleny, kukäs Korneliyo nõnyet nye kimuc kot kukäs topon malayketap Mokoryontet nye kico õnkumwoci neto kule, “Korneliyo!”
- <sup>4</sup>Yoto kurotot neto malayket topon om muyotet õnkumwoci kule, “Mokoryontet, kiy ne nyito?” Kuwekyi malayket kumwoci neto kule, “Kucäm Yiyintet somseñuõ oko yisyonutekek co kolyoy pononik, kunyo kakusotiñ nyi.
- <sup>5</sup>Yokte yawut piko alak kupa okoy Yopa wokukur citake nye cekure kaynenyi Simon Petero.
- <sup>6</sup>Mite neto tontonet om kotap cito nyo kute syerok nye cekure Simon nye minye ruretyet tapan.”
- <sup>7</sup>Nteyu kowo kuwecikey malayket nye kiñololyini neto, yoto kukur Korneliyo mutworikyiy oeny oko sikorintet akenke nye yweye Yiyintet nye ki akenke nye yicini neto yisyet.
- <sup>8</sup>Kumwoci neto cekto ñalek tokol ce keyokis, õnkuyokto kupa Yopa.
- <sup>9</sup>Nteye kipesyetap oeny ye kimate cekto tokupeti poninekwa nye kikirikta Yopa. Kuwo Petero kolañta koto nye kimate koto parak wokusom ye kimate sawet pen kwen.
- <sup>10</sup>Yoto kwam Petero rupet okoy kumac kule ntoyomisye; nteye kimate tokyiye omik, kukäs neto nõnyet.
- <sup>11</sup>Kukäs kuyatakay wulin po torot, kureku kitake nye coni koret nye kerkey oko sira nyewo koromun nye cenömonu kototok tokol amwan.
- <sup>12</sup>Kimite kiyoto orit tyoñik wok tokol, co pete kerekok oko co cutekey ñony, oko toritek.
- <sup>13</sup>Kumwoci Yiyintet Petero kule, “Petero, ñet näm pakäc tyoñicu õnkiiyeny yam!”
- <sup>14</sup>Ntene kumwoy Petero kule, “Mokoryontet, puryo kot kuyunyo! Omnye tompo kot ayam ani kenysis kiy nye puryo kot kutilil nto nye miyat.”
- <sup>15</sup>Kukursyo Yiyintet yec nyepo oeny kumwoy kule, “Puryo kot kuroke kure nyi tukuk ce kikitilil Yiyintet kule puryo kot kutilec nto miyotec.”
- <sup>16</sup>Kwiyakay kuyunyo aret somok, õnkyesut kiyoto lakwar kuwo torot.
- <sup>17</sup>Nteye kimate Petero kusote nkit om moyenyi kule poru ne nõnyetoni kakäs neto. Kimite yoto piko co keyoku Korneliyo kukeyoñ om kurketap kayta om letut yu kowo kutep kot kunket kaytap Simon.
- <sup>18</sup>Kukursyo cekto yoto kutep kule, “Mite tontet ake nye cekure Simon Petero kayi?”
- <sup>19</sup>Nteye kimate Petero tokusote kusyeme kule õnket poru ne nõnyet, kumwoci Muyet Nyetilil neto kule, “Lim pa! Mite piko alake somoku ce ceñotiñ nyi.



- <sup>20</sup>Kunyo ñet yiytekey rekte ñony, ntene mente kot atay mewetekey picoto omnye koyoku ani cekto.’’
- <sup>21</sup>Kurekto neto kuwo ñony oñnkumwoci picoto kule, “Ani cito nyo acenye akwek, kunyo kwokwotyini ne akwek?’’
- <sup>22</sup>Kuwec picoto kumwoci neto kule, “Keyokwec acek Korneliyo nyewo nyepo sikarek, nye ci nye topon nye soye Yiyintet oñnkuyweye Yutayek tokol. Kumwoci malayketap Yiyintet neto kule kukuriñ nyi iwo kanyi sukuñet kulim ñalek ce memwowu nyi.’’
- <sup>23</sup>Kukur Petero picoto kupa ko orit kwek toyekyi oñnkuruy tokol. Ntowo kuyekune, kuñet Petero oñnkunomen oko picoto oko mpo yeya alak cepo Yopa kupatakey tokol.
- <sup>24</sup>Nto om pesyet nye kirupe kupunto Kaysariya wule kimite Korneliyo kukonye neto. Kimite Korneliyo yoto kokoruruc tilyonutekyi oko latosyekyi ce kikikur kukwa.
- <sup>25</sup>Ntowo kurikta Petero kupunto kayta, kuco Korneliyo kutorok oñnkoputyi kerekokyi oñnkukutuny.
- <sup>26</sup>Ntene kunäm Petero neto oñnkuñet kuyo kumwoci kule, “Ñet yony; omnye oyiku mpo ani ci pate.’’
- <sup>27</sup>Kuñololyinot Petero Korneliyo ye kimite kuweti koto orit wule kimite kukorurukyikekey piko ce cañ.
- <sup>28</sup>Yoto Kumwoci Petero picoto kule, “Oñnket, akwek nkit topon kule puryo kot kucömncini Yutoyintet ntarastinyi kurutoci nto mpo kuyomokey oko lomin. Ntene kukuporwo ani Yiyintet kule puryo kot kumisyo ani asut ci ake tokol kule puryo kot kutilil nto kule miyat.
- <sup>29</sup>Kunyi yu kweyoku nyi piko kule misyini aco ani, mpo ani aco nye puryo kot atay. Kunyo otepeniñ kule, kiy ne nye kwekurco ani nyi?’’
- <sup>30</sup>Yoto kumwoy Korneliyo kule, “Kimite sawet kutenyitenyi om pesyosyek somok co kutil, ye kyomite ani osome om konyu ye kimite sawet sokol nyepo kosoleny. Om yoto lakwar kuco citake nye kelac sirok ce lekecectos, oñnkuyone yepo taymwani,
- <sup>31</sup>oñnkumwoy kule, ‘Korneliyo! Kolim Yiyintet somseñuñ, oñnkukusot mpo kokotutepak yisyonutekuk cepo kokolyoyisyet.
- <sup>32</sup>Kunyo yokte citake kuwo Yopa wokukur citake nye cekure Simon Petero. Mite neto tontonet om kotap citake nye kute syerok nye minye ruretyet tapan.’
- <sup>33</sup>Sukuñet yoto oyoku ani kule ico nyi lakwar, kunyo keyiy topon keco. Kunyi ce mite acek tokol yu om taytap Yiyintet cekonye kule celim ñolyo ake tokol nye komwowuñ nyi Mokoryontet kule mwowu.’’
- <sup>34</sup>Kucec Petero kuñalal kumwoy kule, “Konket ani kupoyit manta kule, puryo kot kukweye Yiyintet piko,



<sup>35</sup>ntene cöme ci tokol nye yweye neto oṅnkwiye ṅalek cepo manta ce cöme, nka kot kupo cito yemet oṅnkono.

<sup>36</sup>Oṅnket akwek ṅolyontet nye kiyokoci Yiyintet pikap Israel kumwoy lokoywek ce toponec cepo kalyet om Yesu Kristo nye Mokoryontetap koret tokol.

<sup>37</sup>Oṅnket akwek ṅolyontet nyewo nye kikwiyakay om koretap Yuteya tokol, kule kiceke koretap Kalilaya om letutap potisonisyet nyo kimwoytoy Yowana.

<sup>38</sup>Oṅnket akwek ṅalek cepo Yesu nyepo Nasaret, nye kiṅape Yiyintet Muyet Nyetilil oko swamet kwek Kinko. Nye kiwesetote koret tokol kwicini piko tukuk ce toponec, oṅnkusop piko tokol ce kitaṅany kupayta setani nyewo nyepo oyik, omnye kipontokey neto Yiyintet.

<sup>39</sup>Ceyiku acek muncururwanik ce cinket tukuk tokol ce kikwiye neto om koretap Yutayek oko Yerusalem. Ntene kupakäc Yutayek neto kukwertoci murtowontet.

<sup>40</sup>Ntene kuṅet Yiyintet kotutune met om pesyetap somok oṅnkukoci kuporkey,

<sup>41</sup>nye kipuryo kot kuporkey kukäs piko tokol, ntene acek pate muncururwanik ce kikwey Yiyintet ce kicekäs. Kikyomisye oṅnkyeyesye acek wanak oko neto om letut yu kowo kuṅet Yiyintet kotutune met.

<sup>42</sup>Kunyo kinkolonwec acek kule womwoci piko lokoywek ce toponec oṅnkoporci ṅalek cepo manta kule neto kunye kikwey Yiyintet kwek ketintet nye mutyini musankut piko ce soptos oko ce kipok.

<sup>43</sup>Neto nyo kiṅalale workoyik tokol ṅalek ce nöme neto kumwoy kule, ci tokol nye keyen neto kunye mocikalya nyoto miyotyonyiki om swametaṅ kaynenyi.”

<sup>44</sup>Nteye kimite Petero tokuṅolole, kuco Muyet Nyetilil kurekyi piko tokol co kimite kulimntoy lokoywek.

<sup>45</sup>Kukite Yutayek co kikoyen ce kukwontoykey Petero om Yopa kukäs kule kekoci Yiyintet kuco kurekyi kokotutyetap Muyet Nyetilil mpo lamek.

<sup>46</sup>Omnye kilim cekto piko cut kuṅolole ṅelyepik cepciyotin, kukostoy woyintap Yiyintet. Yoto kuṅalal Petero kumwoy kule,

<sup>47</sup>“Do nye muce kuyet mocepatisane picu peko, omnye kanyor Muyet Nyetilil kuyu wulo kicenyoru acek?”

<sup>48</sup>Kumwayta Petero cepatisan cekto om kaynetap Yesu Kristo. Kusom cekto Petero kopur wanak oko cekto kuwany pesyos ce ṅeri

## **Kiyokik 11**

<sup>1</sup>Yoto kulim kiyokik oko piko co kikoyen ce kimite Yuteya tokol kule kuçäm lamek ṅolyontetap Yiyintet.

<sup>2</sup>Ntowo kulaṅta Petero kowo okoy Yerusalem, kuwokutye luketap piko co wonotin neto.



- <sup>3</sup>Kumwoci cek neto kule, “Omne siwo nyi oṅkiweyomekey oko piko ce puryo kot ce won oṅkiyomisye wanak oko cekto?”
- <sup>4</sup>Yoto kumwoci Petero kirorci cek ṅalek tokol ce kukwiyokis kuceke wule kicekta okoy kupok. Kumwoy kule,
- <sup>5</sup>“Kyomite ani osome om moṅetap Yopa, yoto akäs ṅoṅutyet akäs kitake nye kireku kuconi ṅony nye kerkey sira nyewo nye kicereku kucone torot om kototokyi. Kurek kiyoto okoy kupun ye kyomite.
- <sup>6</sup>Arotote ani topon orit oṅnkasot, okoy akäs tyoṅik cepo krenkok amwan, oko tyoṅikap samiyita oko tyoṅik co cutekey ṅony, oko toritek.
- <sup>7</sup>Yoto alim ani Yiyintet kukuro kumwowo kule, ‘Petero, ṅet nām pakäc tyoṅicu oṅkiyen yam!’
- <sup>8</sup>Ntene omwowu ani kule, ‘Mokoryontet, puryo kot kuyunyo! Omnye tompo kot kowut kutimwani mpo kisic kiy nye puryo kot kutilil nto nye miyat.’
- <sup>9</sup>Yoto kuṅololwo Yiyintet aret nyepo oyeny kumwoy kule, ‘Mente kot akur kiy nye kikitilil Yiyintet kule puryo kot kutilil.’
- <sup>10</sup>Kwiyokis ṅalecato kuyunyoto aret somok. Nto om letut cesut kiyoto kuketitakey kuwo torot.
- <sup>11</sup>Yoto pakenke kupun piko alake somoku ce kiciyoku kukwane Kaysariya okoy koto nye kyomite ani.
- <sup>12</sup>Kumwowo Muyet Nyetilil kule wetekey picoto mente kot atay. Owetekey ani tokol oko mpo yeya cutecu lö okoy cepunte kotap Korneliyo om Kaysariya.
- <sup>13</sup>Yoto kumwowec acek Korneliyo kule kiporcikey malayket neto nye kico oṅnkuyoye konyi oṅnkumwoci kule, ‘Yokte piko kupa Yopa wokukur citake nye cekure kaynenyi Simon Petero.
- <sup>14</sup>Nye mosukucokumwowuṅ nyi ṅalek ce mosukusoruṅ kusopiṅ oko pikap kaṅuṅ!’
- <sup>15</sup>Ntowo acec ani omwoci cekto ṅalek, yoto kukoci Yiyintet cek Muyet Nyetilil kuyu wulo kikonec acek om kunyo.
- <sup>16</sup>Yoto asot ṅalek co kimwowu Mokoryontet kule, ‘Kipatisane Yowana peko, ntene mosicepatisanenak akwek Muyet Nyetilil.’
- <sup>17</sup>Porukey kupoyit manta kule kikoci Yiyintet cek lamek coto kokotutyet nye kerkey nyo kikonec acek yo kiciyeni Mokoryontet Yesu Kristo. Kunyo ani ku ṅo nye kyomuci kot akerkte Yiyintet!’”
- <sup>18</sup>Ntowo kulim cekto ṅalecato kuisio nye komokuwokutye Petero, oṅnkukasta Yiyintet kumwoy kule, “Kunyo kukukoci nyun Yiyintet mpecek Lamek poroyinto kurenynkey oṅnkusopco!””



- <sup>19</sup>Kuseret piko co kikoyen om toñojutek ce kikwiyokis yo kicepoköce Stefano kume. Yoto kupa alake om cekto okoy kupunto Foyinisiya oko Kupro oko Antiyok kumwocinoti Yutayek nkit pate lokoywek cepo Mokoryontet Yesu.
- <sup>20</sup>Nto om picoto ku piko alake co kikoyen ce kipo koretap Kupro oko Kurene. Kunomen picoto okoy kupunto Antiyok, oñnkumwoci lamek lokoywek ce toponec cepo Mokoryontet Yesu.
- <sup>21</sup>Kiponto picoto swametap Mokoryontet, yoto kuyen piko ce cañ kuwekyikey wule mite Mokoryontet.
- <sup>22</sup>Kupunto lokoywek cutecu wule mite pikap Yiyintet ce kimite Yerusalem, yoto kuyokto cek Parnapa kuwo Antiyok.
- <sup>23</sup>Ntowo kupunto, kukäs neto wule kikocinto Yiyintet kupeyok piko. Kuñerec koromun oñnkutosyi kumwoci cek ñalek tokol kule kuyen oñnkurup ñalek kupoyit manta om mukuleywekwa tokol om wule mite Mokoryontet.
- <sup>24</sup>Ki cito nye topon koromun Parnapa nye kiponto swametap Muyet Nyetilil oko koyenet. Yoto cewec piko ce cañ kuyen Mokoryontet.
- <sup>25</sup>Yoto kunomen Parnapa kuwo Taruso kuceñat Saulo.
- <sup>26</sup>Ntowo kunyor kukwer okoy kupun Antiyok, Kuwany kenyit akenke kupontokey cek tukway wanak oko pikap Yiyintet. Kunet cekto luketap piko ce cañ. Om Antiyok ku wule kikenyosye kunyo cecec cekure konomik kule, “Kristayek.”
- <sup>27</sup>Kurekto om pesyosyecoto workoyik alake om Yerusalem kupa Antiyok.
- <sup>28</sup>Kuñet akenke om cekto nye cekure Akapo, oñnkuñalal kuñorsyo om swametap Muyet Nyetilil kumwoy kule mosukuco rupet nyewo nye mosukunäm koret tokol. Kuyuyit nyoto kuco rupet nyoto ye Kinko Nyewo Klautiyo.
- <sup>29</sup>Yoto kucäm konomik kule mokukoyto ci tokol om cekto kuyu wule muktoy kukalya mpo yeyamwa ce minye Yuteya.
- <sup>30</sup>Kwiy cekto kuyunyoto, yoto kukoyito pesanik cesutyi poyik cepo pikap Yiyintet ce kimite Yerusalem. Cikoci Parnapa oko Saulo kusut pesanik.

## **Kiyokik 12**

- <sup>1</sup>Kucec om pesyosyecoto Kinko Erote kutañany pikap Yiyintet alak.
- <sup>2</sup>Yoto kunäm Yakopo mutakwametitap Yowana oñnkumwayta cepare rotwetap cok kume.
- <sup>3</sup>Ntowo kukäs kule koñerekyi Yutayek ñalecato, kitosyikey kunäm mpo Petero. Kikwiyokis ñalecato om pesyosyekap sakwetap mukatyantet nye mokutunat.
- <sup>4</sup>Ntowo cenäm Petero cerotyí mopusi, oñnkyikoci kurip sikarek co ripsi ce kipetote amwan. Kimöce yoto Erote kule sokweru Petero kuco kokwetap Yutayek ye kapok sakwetap keytayet.



- <sup>5</sup>Yoto ceripune Petero mopusi. Ntene kusomncini pikap Yiyintet neto koromun.
- <sup>6</sup>Nto om kwomowut nye kimöce Erote kule sokweru Petero ye koyekune kuco wule mite piko. Kimite yoto Petero kukoru kwenutap sikarek oyeny ce ripsi mopusi, Kicerate neto nyororonik oyeny, oñnkumite sikarek ce ripsi kurketap mopusit.
- <sup>7</sup>Yoto kuco lakwar malayketap Mokoryontet, kukweny lakweyet mopusit orit. Kulucluc malayket Petero leyet kuñet kukos, oñnkumwoci kule, “Det lakwar.” Yoto pakenke kutyokokis nyororonik kusuyito om yewuniyekyi.
- <sup>8</sup>Kumwoci malayket neto kule, “Ratkey, oñnkilac kweyonikuk.” Kwiyo neto kuyunyoto, oñnkumwoci kule, “Yisinekey sireñuñ oñnkirupani.”
- <sup>9</sup>Kurup Petero neto okoy kupunto sañ nye kipuryo kot kunkete om yoto kule po manta ñalek ce kikwiye malayket, kisote kule toskoy oköse ñoñutyet.
- <sup>10</sup>Kupunte cekto kurkotik ce ripe sikarek, nyepo tay, oko nyepo oyeny, sicepa moñet orit, yoto kuyatakay kurket nkit, kupa cek sañ, kupa tukway kurup aret, nto om yoto pakenke kupakakta malayket Petero.
- <sup>11</sup>Yoto kusow Petero kunket kito nye kakwiyakay om wule mite neto, kumwoy kule, “Konket ani yawut kupoyit manta! Kule kokuyok Mokoryontet malaykenyi, kunyo kosoruneno ani kamukeywekap Erote oko tukuk tokol ce kumöce Yutayek kule ce yiy.”
- <sup>12</sup>Nteyu kowo kusow Petero topon, kunomen kuwo okoy kotap Mariyam kametitap Yowana Marko wule kimite piko ce cañ ce kokorurukikey wuloto ce kimite kusome Yiyintet kusomncini Petero.
- <sup>13</sup>Kukonynkony Petero kurket nyepo sañ yoto kuco cepto nye mutworin nye cekure Rota co kukäs.
- <sup>14</sup>Kunket cepoto kutitap Petero, kuñerec koromun kulapat kuketitakey kuwo nye puryo kot kuyat kurket, wokumwayta kule, mite Petero kuyonje kurkat sañ. Kumwoci piko neto kule,
- <sup>15</sup>“Kopunuñ met!” Ntene kutinten koromun kumwoy kule, “Mite manta!” Kuwec cut kumwoy kule, “Malaykenyi nyo.”
- <sup>16</sup>Kutosyikey Petero kukonynkony kurket. Nto om letut kuyat cekto kurket. Nteye kotoköse cekto Petero kukite koromun.
- <sup>17</sup>Kuñololyi Petero cek kuwuse yewuniyekyi kusisio, oñnkumwoci kurorci wule ketyakta Mokoryontet neto kukwerune mopusi. Oñnkumwoci Petero cek kule, “Womwoci ñatecutecu Yakopo oko mpo yeya alak.” Oñnkunomen kuwecikey wulyo ake.
- <sup>18</sup>Ntowo kuyec koret, yoto kupotpotenis koromun sikarek ce kiripsi kumwoy kule kukwam ne Petero?





<sup>19</sup>Yoto kumwayta Erote kule ceceny Petero, ntene kipuryo kot komuc cekto kot kunyor. Yoto kukir Erote sikarek ce kiripsi koromun, oṅnkumwayta ce par kupok. Nto om letutap ṅalecato, kunomen Erote kuwete Yuteya kuwo Kaysariya wokopurune wuloto.

<sup>20</sup>Kikiwokut koromun Erote oko pikap Tiro oko cepo Siton. Yoto koruruckey picoto kwek luket akenke oṅnkupa wule mite neto. Kunyosyo cekto kiny kunyo kunām kwek corwemwa Plasto cito nyewo nye kiripe kaytap Kinko, oṅnkupa wule mite Erote wokusom kalyet, omnye kipoyekey koremwa omik ce kikwone koretap Kinko.

<sup>21</sup>Nteye kipesyet nye kweyat, kulac Erote sirokyi cepo poytoyisyet oṅkopure ṅeceretap kokwet oṅnkujololyi piko.

<sup>22</sup>Yoto kupol piko kumwoy kule, “Kutitap Yiyintet nyito, ntene puryo kot kupo ci!”

<sup>23</sup>Om yoto pakenke kupir malayketap Mokoryontet Erote kumnyan, omnye mneywey Yiyintet. Kwam neto mokik okoy kume.

<sup>24</sup>Kutosyikey ṅolyontetap Yiyintet kuseret kupunte koret tokol.

<sup>25</sup>Ntowo kuwany Parnapa oko Saulo yisyonutekwa cepo ṅalek ce kikwontyi om Yerusalem, kuweckey cekto oṅnkupetakey Yowana Marko.

### **Kiyokik 13**

<sup>1</sup>Om pikap Yiyintet ce kimite Antiyok, kuce kimite workoyik oko konetik coto ku mpo Parnapa oko Simiyon (nye cekure matuy) Lukio nyepo Kurene, oko Manaen nye kicepoye oko kinko Erote oko Saulo.

<sup>2</sup>Nteye kimite cekto kwicini Mokoryontet yisyet oṅnkukire omik, kumwoci Muyet Nyetili cekto kule, “Okwewo Parnapa oko Saulo sukuṅet kwiy yisyet nye kyokweci ani.”

<sup>3</sup>Kukir cekto omik oṅnkusomnci kukemer yewuniyekwa metewokap Parnapa oko Saulo oṅnkuyokto kupa.

<sup>4</sup>Nteyu kowo kuyokto muyet Nyetilil Saulo oko Parnapa, kunomen cekto okoy kapunto Seleukiya, kulany om yoto rapet oṅnkupa okoy kapunto Kupro.

<sup>5</sup>Ntowo kupunto cek Salami, kumwayta ṅolyontetap Yiyintet om korikapkok cepo Yutayek. Kipontotikey yoto Yowana Marko nye kikolyoy cekto yisyet.

<sup>6</sup>Kupa kupunte koret nyoto kikwen peko okoy kupunto Papo wule kipa kunyorta cepsokeyontet nye weritap Yoswa, yutoyintet nye kisutekey kule iyiku workoyo.

<sup>7</sup>Kipontokey cicoto oko Serkio Paulo nye ki cito nye ṅom nye ki poytoyintetap koronoto kikwen peko. Kukur poytoyintonoto Parnapa oko Saulo kukwa wule mite neto, omnye kimöce kule alim ṅolyontetap Yiyintet.

<sup>8</sup>Yoto kuṅet Elima cepsokeyontet, (nye kaynenyi nyitenyi wule cekurtoy om ṅelyeptap Kirikik.) Kusyeme kule amas poytoyintet mente kot kuyen.



- <sup>9</sup>Yoto kunyor Saulo nye cekure Paulo swametap Muyet Nyetilil, kurotot koromun cepsokeyontonoto,
- <sup>10</sup>oṅnkumwoci kule, “Nyi, weritap Setani nyewo nyepo oyik! Yiku nyi puniyontetap ṅalek tokol ce toponec, ponto nyi koperperisyet oko ṅolset tokol, kunyo syeme pesyosyek tokol kule amas kwek mwiynan ṅalek cepo Mokoryontet!
- <sup>11</sup>Kunyo mosukupiriṅ yewutap Mokoryontet, mesokor nye meköse asis kuwany pesyos.” Yoto pakenke kukerokis kunäm cemereresyet nye tuy konyekap Elima, kutaptapat yoto wulo tokol kule nto sonyoru ci nye kanäm yewut oṅnkuretoto.
- <sup>12</sup>Kuyen kucömis poytoyintet yu kowo kukäs ṅalek ce kokwiyokis. Kukite neto koromun konetisyet nyepo ṅalekap Mokoryontet.
- <sup>13</sup>Kunomen Paulo oko piko ce kipontokey kulany rapet om Papo oṅnkupa okoy kupunto Peruka om koretap Pampiliya. Yoto kupokokyi Yowana Marko cekto wuloto oṅnkuweckey kuwo Yerusalem.
- <sup>14</sup>Kunomene cekto Peruka kupa okoy kupunto Antiyok nyepo Pisitiya. Nteye kipesyetap Sapat kupa cekto wokowut kotapkok oṅnkopur ṅony.
- <sup>15</sup>Nto om letut yu kowo ciwany cesuman ntarastinekap Moses oko silutekap workoyik, kumwoci kantoyik cepo kotapkok cek kule, “Mpo yeya, ye oponte akwek lokoywek ce muce kukalya kotitir piko, cesomok acek akwek kule aṅalal.”
- <sup>16</sup>Kuṅet Paulo kuyo oṅnkuwuse cekto yewuniyekyi, oṅnkucec kuṅalal kumwoy kule: “Merekyo pikap Israel, oko akwek lamek co soye Yiyintet olimwo ani pa.
- <sup>17</sup>Yiyintetap picuteçu po Israel kunye kikwey mpo kukonyacek oṅnkukoci kwek pic cewoyec om kenysiyek ce ye kimite kuminye koretap Misiri ku toyek. Kukwerune Yiyintet cekto swamenyi nyewo kukwane Misiri.
- <sup>18</sup>Kumuytoci Yiyintet kopurto nye kiponto cekto kuwany kenysiyek artam ye kiminye koretap kitela.
- <sup>19</sup>Yoto kukoci Yiyintet cek kwaranta lamek cepo yemosyek tisap ce kiminye koretap Kanan, oṅnkukoci pikyi kumiṅis kwek pikap koronoto.
- <sup>20</sup>Kumiṅis kuwany kenysiyek ce rice pokolwokik amwan ok konom. Nto om letut kukoci Yiyintet cek ketik okoy kenysiyek ce kipo workoyontet Samuel.
- <sup>21</sup>Ntwo kusom kule ce möce Kinko, kukoci Yiyintet cekto Saulo weritap Kisyi nye kipo aretap Penyamin kwek Kinko nyimwa. Kupoytoyis nyo kuwany kenysiyek artam.
- <sup>22</sup>Nto om letut yu kowo kunate Yiyintet Saulo, kukoci Tauti kwek Kinko nyimwa. Dalek ce kimwoy Yiyintet kutor ce nöme ṅalecutecu kucu kule, ‘Kwakäs ani kule, Tauti weritap Yese kunye cito nye ocöme, nye mosukwiy ṅalek tokol ce ocöme ani kule kwiy.’



- <sup>23</sup>Yesu nye akenke om mucokoronikap Tauti kunye kikoci Yiyintet kwek kosopintetap pikap Israel kuyu wulo kikikurtoci keny.
- <sup>24</sup>Kutompo kot kuco Yesu, kimwoci Yowana pikap Israel tokol kule misyini kwasta cekto miyotyoni kwa oŋnkyepatisan.
- <sup>25</sup>Nteyu kowo kurik kuwany Yowana yisyenyi; kumwoci piko kule, ‘Asoti akwek kule oyiku ani ŋo? Puryo kot oyiku cito nyo okeni akwek. Ntene akäs! Mite cicoto kuconi om letumwani, nye puryo koto yiku ani topon nye ayeme kot atyac porokap kweyoniki.’
- <sup>26</sup>“Mpo yeya, kesenisyekap Apram oko akwek lamek cu mite yu ce soye Yiyintet, acek pikap Israel ce kiciyokoci lokoywek cutecu po kosopotet!
- <sup>27</sup>Omnye kipuryo kot kunket piko ce kiminye Yerusalem oko poytoyikwa kule Yesu kunye kosopintet; nto kipuryo kot kusot cek kusow oŋnkunket ŋalekap workoyik co cesumone pesyosyek tokol ye pesyetap Sapat. Ntene kuyitita kupoyit manta ŋalekap workoyik omnye kiwosontyi cek Yesu.
- <sup>28</sup>Nka kot kipuryo kot kunyor lelis nye kiwosontyine neto kume, ntene kusom cek Pilato kule kupakac Yesu.
- <sup>29</sup>Nteyu kowo kuwany kwici Yesu ŋalek tokol ce mwowu silutekap Yiyintet ce nöme neto, kunumune murtowontet oŋnkutupci mwenet.
- <sup>30</sup>Ntene kuŋet Yiyintet kotutune met.
- <sup>31</sup>Yoto kuwany pesyosyek ce caŋ kuköse piko co kipontotikey neto kuceke Kalilaya okoy Yerusalem.
- <sup>32</sup>Cekto picoto yawut ce muncururwaniki om wule mite pikap Israel,
- <sup>33</sup>Kunyo cemite acek yu cemwowok akwek lokoywek ce toponec kule, kokoyitita Yiyintet om wule mite lekoyi kirotyet nyo kikikurtoci mpo kukonyo, omnye kiŋet Yesu kotutune met kuyu wulo kicesilyo om kitaputap tumwonikap kakastayet nyepo oyeny kule. ‘Yiku nyi werimwani koyiku ani pesyoni Papaŋuŋ.’
- <sup>34</sup>Nto ŋalek cepo manta kule kiŋet Yiyintet neto kotutune met nye puryo kot komuce yec kot kunun, kucu kumwoy kule: ‘Mosokoniŋ ani nyi tililinto oko kupeyok cepo manta ce kerkey oko co kyokocini Tauti.’
- <sup>35</sup>Kunyo mwowu yec kupoyit manta om silutek alak kule, ‘Puryo kot mucu nyi kot cömnci mutworinteŋuŋ nye tilil kunum.’
- <sup>36</sup>Omnye kikwiŋ Tauti ye kisope yisonutek ce kimöce Yiyintet okoy kume cetupci tapanta yo kicetupci mpo kukonyo, kunyo kinun neto.
- <sup>37</sup>Ntene puryo kot kunun neto nyo kiŋet Yiyintet kotutune met.
- <sup>38</sup>Kunyo möce oŋnket akwek mpo yeya tokol ŋalek cepo manta kule, kupunune wule mite Yesu, kunyi cemwowok akwek yawut lokoywek ce cerenyekey miyotyoni.



<sup>39</sup>Möce oṅket kule ci tokol nye yentyini neto kunyoto nye cinumune miyotyoni tokol co puryo kot komuce kunum ntarastinekap Moses.

<sup>40</sup>Kunyo oripkey, mente kot kukwontyok akwek co kimwowu workoyik kule:

<sup>41</sup>‘Akäs akwek nyilotik! Mosokite oṅkopoku: Omnye yisyet nye oyiye ani om pesyemwoṅ nkit kunye kiy nye puryo kot omuci akwek kot oyen, nka kot kororwok kumwowok akwek cito ake.’ ”

<sup>42</sup>Nteye kimite Paulo oko Parnapa kumiṅntoy om kotapkok, kumwoci piko acek kule, oṅkokwa om Sapatit nyo coni kwororwec yec topon ṅalecutecu.

<sup>43</sup>Nto om letut yu kowo kupete piko tuyet nyepo kotapkok, yoto kurup Yutayek ce caṅ oko lamek ce caṅ co kicäm tinitap Yutayek Paulo oko Parnapa. Koṅololyi kiyokik picoto kotitir kumwoci kule kutosyikey kopurto swamet nyepo poyoyetap Yiyintet.

<sup>44</sup>Nto om pesyetap Sapatit nye kirupe, kukwa koruruckey piko ce kirikta coṅinto cepo moṅet tokol kwokulimnta ṅolyontetap Yiyintet.

<sup>45</sup>Nteye kotoköse Yutayek luketap piko, kucorok oṅkuṅalale ṅalek ce miyotec om ṅalek ce kimwowu Paulo oṅkucup cek neto.

<sup>46</sup>Ntene kutosyikey Paulo oko Parnapa om nyikanatet kumwoy kule, “Akwek kuce piko ce kumisyini cenyosye cemwoci ṅolyontetap Yiyintet. Ntene omnye katay akwek oṅkasot kule puryo kot kuponto latik cenyoru soponto nyemo poku, kunyo mocepakaktak acek oṅkyipe wule mite lamek.

<sup>47</sup>Omnye kikonec acek Mokoryontet ntarastini kunkolonwec kule: ‘Kwakweyiṅ ani nyi yiku lakweyetap lamek, sukuṅet sut kosopet kupunto wule kiṅete koret kumukul.’ ”

<sup>48</sup>Nteye kotolime lamek ṅalecato, kuṅerec cek koromun oṅnkukasta lokoywekap Mokoryontet. Kuyen mpecek piko co kikwey Yiyintet kule mosukunyor soponto nyemo poku.

<sup>49</sup>Kutosyikey ṅolyontetap Mokoryontet om wulyo tokol om koronoto.

<sup>50</sup>Ntene kowurur Yutayek kowurta piko ce kantoyik cepo moṅet oko korukap lamek ce tokunotin ce soye Yiyintet, oṅkucec kutanṅany Paulo oko Parnapa oṅnkukwet kupete koremwa.

<sup>51</sup>Yoto kulelekyi kiyokik tertitap kerekokwa picoto oṅkunomen kupa okoy Ikoniom.

<sup>52</sup>Kunyor konomik om Antiyok ṅerekwek ce caṅ oṅkunyor Muyet Nyetilil.

## **Kiyokik 14**

<sup>1</sup>Nteye kimite cek Ikoniom, kupa Paulo oko Parnapa kotapkokwetap Yutayek kuyu wulo kiyunto om Antiyok nyepo Pisitiya oṅkuṅalal ṅalek okoy kuweckey Yutayek oko Kirikik ce caṅ.



- <sup>2</sup>Ntene kowurur Yutayek ce puryo kot kuyen kuñem lamek kuwec kasoteywekwa kutay mpo yeya.
- <sup>3</sup>Yoto kopur kiyokik wuloto kuwany pesyos ce cañ. Kuñalal om nyikanat ñalek cepo Mokoryontet, nye kipor Mokoryontet nkit kule po manta lokoywekwa ce nöme poypoyenyi, omnye kikoci kiyokik swamet kwiyy tukuk cepo kakitat oko pelutok.
- <sup>4</sup>Yoto kupciwunekey oyeny luketap piko om moñet, kucäm alake ñalekap Yutayek, nto alak kucäm ñalek cepo kiyokik.
- <sup>5</sup>Yoto koyomokey lamek oko Yutayek oko poytoyikwa oñkucomncin kule citañany kiyokik oñkuwire rwontok.
- <sup>6</sup>Ntowo kunket kiyokik ñalecato, kumwey kupa okoy Listira oko Terpe ce moñösyek cewoyec cepo Likoniya oko korosyek ce lekite wuloto.
- <sup>7</sup>Wokumwayta cek om wuloto lokoywek ce toponec.
- <sup>8</sup>Kimite citake Listira nye kipok kerencok nye kikomwal kuceke kiceyi nye mowesetoti mpo kisic.
- <sup>9</sup>Yoto kulimnta cicoto ñalekap Paulo, okoy kukäs Paulo kule ponto cicoto koyenet oñkyimuce cisop.
- <sup>10</sup>Kurotot topon oñkupol om kutit nyewo kumwoy kule, “Det yoñe kerencokuk topon!” Kuñet cicoto kuran kuyo oñkucec kuwesetot.
- <sup>11</sup>Nteye kotoköse luketap piko kito nye kwakiy Paulo, kupol cek om ñelyeptap Likoniyek kumwoy kule, “Korek kukwontyec acek yiyik ce kerkey pic!”
- <sup>12</sup>Yoto kutoci cek Parnapa kaynet kukure Seu, nto Paulo kutoci kaynet kukure Erme, omnye neto kunye kiñololintet nyewo.
- <sup>13</sup>Yoto kuñet tisintet nyepo Seu nye kimite kotap Yiyintenyi moñet sañ, kuwo wokukwer yeyik oñkusut sinentet okoy yepo kurketap moñet. Kimöce neto oko luketap piko kule ceyici kiyokik korosek.
- <sup>14</sup>Ntowo kulim kiyokik Paulo oko Parnapa tukuk ce kimöce cekto kule kwiyy, kupac co sirokwa oñkurway okoy kwenutap piko oñkupol kumwoy kule,
- <sup>15</sup>“Merekyo, omne sayiy akwek tukucu? Ciku acek pic ce cekerekeye akwek! Cemite acek yu cerorwok lokoywek ce toponec, ayaste akwane wule mite tukucu moponto latik oñkowekikey wule mite Yiyintet nye sopot nye kitany koret torot oko ñony, oko ruretyet, oko tukuk tokol ce mite koret.
- <sup>16</sup>Kikwasta Yiyintet om pesyosyek co kitil pikap koret tokol kupesetat oñkurup kusay kuyu wule moktoy.
- <sup>17</sup>Ntene kikopor okokoy tukuk ce toponec ceyiye. Omnye konok ropta nye ropene om pesyosyek ce cemokyini, oñkukonok omik soñet opiyöñe oñkoñjerec om mukuleywekwok.”



- <sup>18</sup>Nka kot kiñalal kiyokik ñalecato, kipuryo kot komuc kot kukerekta piko moyici cekto korosek.
- <sup>19</sup>Yoto kukwane Yutayek alake Antiyok nyepo Pisitiya oko Ikoniom; oñkwokujem piko okoy kuwekyikey wule mite cekto. Kuwire cekto Paulo rwontok oñkocutune moñet kusote kule kame.
- <sup>20</sup>Ntowo korurukikey konomik komut Paulo, kuñet oñkuwo okoy moñet. Ntowo kuyekune kunomen neto oko Parnapa kupa okoy kapunto Terpe.
- <sup>21</sup>Kumwayta Paulo oko Parnapa lokoywek ce toponec om moñetap Terpe kuwec kuyen piko ce cañ. Oñkuweckey cek kupa okoy kupunto Listira oko Ikoniom oñkutosyikey kupa okoy kupunto Antiyok nyepo Pisitiya.
- <sup>22</sup>Kunet cekto piko co kikoyen kukwilokis mukuleywekwa oñnkuyomis kumwoci kopurto koyenotet nyepo manta. Kumwoci kule, “Misyinec cepunte toñoñutek ce cañ sukuñet ciwut poytosisyetap Yiyintet.”
- <sup>23</sup>Nto om letut kukwey poyik om oteputek tokol wule kimite pikap Yiyintet oñnkusomnci kukir omik, oñnkukoci kopurtokey Mokoryontet nyo kikokenekey cekto.
- <sup>24</sup>Nteyu kowo kupunto cek koretap Pisitiya yoto kukwa okoy kupun Pampiliya.
- <sup>25</sup>Kumwayte lokoywek Peruka, oñnkupa kurekto okoy Atalia.
- <sup>26</sup>Kulany cekto rapet om wuloto oñnkupa kuketitakey okoy Antiyok wulo kicesomncine kupeta poypoyetap Yiyintet om yisyet nyi kukwikey cekto koyitita.
- <sup>27</sup>Ntowo kupun Antiyok koruruc wanak pikap Yiyintet oñnkumwoci wule kuyatita Yiyintet aret kuyoty lamak kayen
- <sup>28</sup>Kopur cek wuloto kuwany pesyos ce cañ kupuntokey piko co kikoyen.

## Kiyokik 15

- <sup>1</sup>Yoto kukwane piko alake Yuteya okoy kupun Antiyok oñkwokucec kunet mpo yeya piko co kikoyen kumwoci kule, “Ye puryo kot cewonak akwek kuyu wule mwoytoy ntarastinekap Moses kupuryo kot omuci kot osopce.”
- <sup>2</sup>Kutintentyin Paulo oko Parnapa tintenot nyewo koromun oko picoto okoy kupcikey ñalekwa om ñalek ce nöme ñalecato. Yoto kurwoc cek okoy kucömncin kule misyini Paulo oko Parnapa oko piko alak cepo Antiyok kupa Yerusalem wokukäs kiyokik oko poyik om ñalek ce nöme ñalecu.
- <sup>3</sup>Yoto kuyokto pikap Yiyintet cek kupa, kunomen kupunte Foyinisiya oko Samariya oñnkumwaytat om wuloto wule kuwekakey lamak kuwekyikey wule mite Yiyintet. Kukoci lokoywecoto ñerekwek ce cañ mpo yeya piko co kikoyen.
- <sup>4</sup>Ntowo kupunto cekto Yerusalem kuñerekyi pikap Yiyintet oko kiyokik oko poyik. Yoto kumwoci cek cut ñalek tokol ce kukukalya Yiyintet cekto kwiy.





- <sup>5</sup>Ntene kuyon piko alake co kikoyen cepo luketap Farasayek onnkumwoy kule, “Roke cewon cekto onnkyemwoci kurip ntarastinekap Moses.”
- <sup>6</sup>Yoto koruruckey wanak kiyokik oko poyik kurwoke nolyontonoto.
- <sup>7</sup>Nto om letut yu kowo kurwoc cek kuloyit, kuŋet Petero kuyo onnkumwoy kule, “Mpo yeyamwani, onnket akwek kule om pesyosyek co kutil kikweya ani Yiyintet om wule omite akwek kule saŋet omwoci lokoywek ce toponec lamek, sukuŋet cek kulim onnkuyen.
- <sup>8</sup>Yiyintet kunye nkete mukuleywekap piko kunye kwepor cömisyet om wule mite lamek kukoci Muyet Nyetilil kuyu wulo kikonec acek.
- <sup>9</sup>Kunyo puryo kot kupciyec Yiyintet Yutayek oko lamek. Ntene kukukalya miyotyonic ce mite mukuleywekwa omnye kweyen.
- <sup>10</sup>Kunyo yawut omne sasyem akwek Yiyintet kule cetorci terekok piko co kukuyen, torokocato kuco kipuryo kot komuc mpo kukonyo kot kutor onnkupuryo kot cimuc mpo acek nkit kot cetor?
- <sup>11</sup>Puryo kot kuyunyo! Ciyeni acek kule mocisopec om poypoyetap Mokoryontet Yesu kuyu wulo mocisopto cekto.”
- <sup>12</sup>Kusisio piko tokol ye kimite Parnapa oko Paulo kuroru n̄alek cepo kakitat oko pelutok ce kikwiŋ Yiyintet kupunte wule mite cekto om wule mite lamek.
- <sup>13</sup>Nteyu kowo kuŋalal okoy kuwany. Kuŋalal Yakopo kumwoy kule, “Mpo yeya, olimwo ani pa!
- <sup>14</sup>Kotokuŋolole kuroru pantanyi Simon wule kiporunto kunyo Yiyintet cömisyenyi om wule mite Lamek, omnye kikwey om wule mite cek piko ce kokwek pikyi.
- <sup>15</sup>Nömntos topon n̄alecu oko n̄alekap workoyik, kuyu wulo mwowu silutekap Yiyintet kule,
- <sup>16</sup>“Om letutap n̄alecu mosoketukey ani, mwowu Mokoryontet yunyoto, mosatec kotap Tauti nyo kilul; mosatec yec wule kitorpup, onnkoyon̄te yec kuyo.
- <sup>17</sup>Sukuŋet piko alake tokol kuceny Mokoryontet, mpo Lamek tokol ce kyokur ani nkit kwek pikwani,
- <sup>18</sup>Yunyoto wule mwoytoy Mokoryontet, nye kipor n̄alecutecu ikye po keny.’ ”
- <sup>19</sup>Kutosyikey Yakopo kumwoy kule, “Om kasoteywekwani, asoti kule puryo kot kurokenec acek citaŋany Lamek co wekyinikey wule mite Yiyintet.
- <sup>20</sup>Ye koto yunyo, roke cesilyi acek parwet, cemwoci kule puryo kot kuroke tokwam cekto omit alak tokol ce puryo kot kutililec ce kocesoci kupoyit kerkeyik, onnkuripkey kusanekey sakwayanat, onnkutay mokwam tyon̄ik co cikete nto korotik.
- <sup>21</sup>Omnye kicesumane ntarastinekap Moses korikapkok okokoy ye pesyosyekap Sapat, onnkyemwayte n̄alekyi moŋosyek tokol.”



<sup>22</sup>Yoto kucäm kiyokik oko poyik wanak oko pikap Yiyintet tokol, kukwey piko alak om kwenumwa oᅇnkuyokto kupa Antiyok kupetakey Paulo oko Parnapa. Kukwey cekto Yuta nye cekure kaynet ake Parnapa oko Sila, picoto oyeny kuce kiyweye mpo yeya cekto.

<sup>23</sup>Oᅇnkukoci wokukoyto parwani sumone kule. “Acek mpo yeyamwoᅇ kiyokik oko poyik. Kacisupayak akwek mpo yeya cepo lamek ce minye Antiyok, oko Siriya, oko Silisiya.

<sup>24</sup>Kucelim acek kule kikwa piko alake wule omite akwek cekwone wuli cemite acek, oᅇnkwokuntankwarak kowurta kasoteywekwok om ᅇalek ce kikwokumwowok. Kipuryo kot cikoci acek picoto kamukeywek mpo kisic ce kimuce kwiy ᅇalek co kikwi.

<sup>25</sup>Kunyo kucetuye acek wanak om kirwoket oᅇnkuyirwoc okoy ce comncine kule ciyoku piko kukwa wulo omite akwek, kwontokey picoto oko mpo yeya cämänik Parnapa oko Paulo,

<sup>26</sup>ce kikokoyito soppnwekwa om yisyetap Mokoryontet Yesu Kristo.

<sup>27</sup>Kunyo kociyoku Yuta oko Sila, ce mosukwokumwowok cek nkit om kutuwakwa ᅇalek cekey oko cu kocetil acek parwani.

<sup>28</sup>Omnye kweporkey topon om swametaᅇ Muyet Nyetilil oko om wule cemite acek kule, puryo kot kurok cekonok acek akwek nyikisin ake tokol, ntene tos pate ntarastinecu ce roke orip akwek.

<sup>29</sup>Monte tokyam omit ce kocesoci kerkeyik, monte tokyam korotik, monte tökyam tyony nye kaciket, oripkey asanekey sakwayanat. Mosopur akwek topon ye koripkey om wule mite ᅇalecutecu tokol. Cämetaᅇkey.”

<sup>30</sup>Yoto kuyomis cekto piko co kiciyoktoy kunomen kupa Antiyok. Ntowo kupunto Antiyok, koruruc piko tokol co kikoyen oᅇnkukoci parwet.

<sup>31</sup>Nteyu kowo kusuman piko parwet okoy kuwany, kunyor ᅇerekwek ce caᅇ om lokoywek ce kimite parwet.


<sup>32</sup>Kuᅇololyi Yuta oko Sila ce ki workoy, kumwoci ᅇalek ce caᅇ mpo yeya piko co kikoyen kule rokekey kopurto cek swametaᅇ oᅇnkukwilokis.

<sup>33</sup>Nteyu kowo kupeni cekto wuloto kuwany pesyos ce ᅇeri, kuyomis mpo yeyamwa cek kusomnci kupeyok. Yoto kuketitaᅇey cek kupa wule mite piko co kiyoku.

<sup>34</sup>[Ntene kucäm Sila kule opur wuloto.]

<sup>35</sup>Kopur Paulo oko Parnapa Antiyok kupontokey oko piko alak ce caᅇ. Kunetis oᅇnkumwayta ᅇolyontetaᅇ Mokoryontet.

<sup>36</sup>Nto om letutap orok ce ᅇeri, kumwoci Paulo Parnapa kule, “Kany cipe yec cerutoci mpo yeya cemite moᅇosyek tokol co kikicemwaytate ᅇolyontetaᅇ Mokoryontet sukuᅇet cekäs kule mite cekto kutosyinikey kulene om koyenet.”



<sup>37</sup>Kimöce yoto Parnapa kule cepetekey tokol oko Marko.

<sup>38</sup>Ntene kusot Paulo kule puryo kurok kupatakey. Omnye kitoyis Marko mapetakey cekto okoy kuwany yisyet. Ntene kiweckey kuketitakey kupokokyi cek Pampiliya.

<sup>39</sup>Yoto kutintentyin tukway okoy kupcikey. Kuwetokey Parnapa Marko kulany rapet nye kiweti Kupro.

<sup>40</sup>Kukwey Paulo Sila oṅnkunomen kupa, kuyomis mpo yeya cek oṅnkusomnci kupeta poypoyetap Yiyintet.

<sup>41</sup>Kuwo Paulo kupunte Siriya oko Silisiya kuṅololyinoti kukwil pikap Yiyintet ce kimite wuloto.

## **Kiyokik 16**

<sup>1</sup>Kuwo Paulo okoy kupunto Terpe oko Listira. Kimite wuloto citake nye kikoyen nye cekure Timosewo weritap korko nye Cepyutaya nye kikoyen mpene, ntene ki Kirikin kwan.

<sup>2</sup>Yoto kuṅalale mpo yeya piko co kikoyen tokol ce kimite Listira oko Ikoniom Timosewo.

<sup>3</sup>Kumac Paulo kule cepetekey Timosewo, Yoto kuwon Paulo Timosewo, omnye kinkete Yutayek tokol ce kimite wuloto kule Kirikin kwan.

<sup>4</sup>Nteye kimite cek kupeti kupunte moṅosyek, kumwoci piko co kikoyen kuporci ntarastinek co kicömncin kutilta kiyokik oko poyik om Yerusalem, oṅnkumwoci kuywey oṅnkurip ntarastinek coto.

<sup>5</sup>Yoto kutosyikey pikap Yiyintet kukwilokis om koyenet oṅnkutosyinikey kucoṅitu piko ce keyen pesyosyek tokol.

<sup>6</sup>Kupa cek kupunte koretap Prukeya oko Kalatiya. Kipuryo kot kucömnci Muyet Nyetilil cekto kumwayte lokoywek koretap Asia.

<sup>7</sup>Ntowo kupunto cek kurikta kiyotyetaṅ Musia kusyem kule cipe okoy cepunte koretap Pisiniya, ntene kipuryo kot kucömncini Muyet Nyetilil nyepo Yesu.

<sup>8</sup>Yoto kunomen kupa kupunte Musia oṅnkurekto okoy Troa.

<sup>9</sup>Kukäs Paulo kwomowunoto ṅoṅutyet nye kikäs citap Maketoniya kukeyo kusome neto kumwoci kule, “Co, yowu okoy Maketoniya ce kalyec acek!”

<sup>10</sup>Yoto pakenke yu kowo kukäs Paulo ṅoṅutyonoto, ceyiyekey acek kule cenomen cipe Maketoniya omnye kacinket kule kokurec Yiyintet wocemwoci pikap wuloto lokoywek ce toponec.

<sup>11</sup>Cenomene acek Troa celany rapet kyay ceculakisyey okoy cepunte Samosrake, ntowo kuyekune cepunte Neapoli.



- <sup>12</sup>Ceñete wuloto cipe okoy cepunte Filipi nye moñet nyewo nyepo tayta om koretap Maketoniya nye kiminye Romek. Cepeni ciwany pesyos cemite moñonoto.
- <sup>13</sup>Nteye kipesyetap Sapat, cipe moñet sañ okoy yepo oyinet tapan wule kicisotyini kule toskey mite otepto nye cesome. Cipur ñony yoto oñknyeñololyi koruk ce kikikorurukikey yoto.
- <sup>14</sup>Akenke om korucoto nye kilime ñalekyacek ku korko nye cekure Litiya nyepo moñetap Siatira nye kyolyoy sirok ce mur kwornec, nye kisoye neto Yiyintet okokoy. Kuñany Mokoryontet mukuleynyi kulimnta topon ñalek ce kimwowu Paulo.
- <sup>15</sup>Yoto cepatisan neto oko pikap konyi tokol. Ntowo kupok kumwowec acek kule, “Akwa cipe wocipurune komwani ye kacämnte akwek kule koyentyi ani Mokoryontet kupoyit manta.” Kusaysayec acek okoy cipe.
- <sup>16</sup>Nto mite pesyet ake ye kicemite acek cepeti otepto cesome, yoto kutuyenec mutworinto nye tye nye kiponto oyinot, nye kiñorsyoti nye kisutyini mokorenikiy pesanik ce cañ om ñorsyet.
- <sup>17</sup>Kunamec acek oko Paulo cepoto oñnkupolon kumwowu kule, “Picu kuce mutworikap Yiyintet nye mite torot koromun ce mwowok akwek aret wule mocisoptok.”
- <sup>18</sup>Kikwiye cepoto kuyunyitenyi kuwany pesyos ce cañ, okoy kunyer Paulo koromun, kuwekyikey oñnkumwoci oyinot kule, “Komwowuñ om swameta kaynetap Yesu Kristo kule, ñet wete neto!” Yoto pakenke kuñet oyinotonoto kuwete cepoto.
- <sup>19</sup>Ntowo kukäs mokorenikiy kule kopot aret wule kunyortoy cekto pesanikwa ce kwenekey, kunäm Paulo oko Sila oñnkukwer kupa matepo wule mite poytoyik.
- <sup>20</sup>Nteyu kowo kukwer cek okoy taytap ketik; kuñalal kumwoy kule, “Yutayek picu, ce kosut tankwarat moñenyacek.
- <sup>21</sup>Nete cek piko kapurto nye yirye ntarastinekyacek. Ciku acek Romek, kunyo puryo kot cimuci kot cenäm nto cerup kopurto nyeyunyo!”
- <sup>22</sup>Yoto kuñetyi pikap kokwet tokol kuporye cekto; kupac ketik sirokap Paulo oko cepo Sila, oñnkumwayta cepas korokonik.
- <sup>23</sup>Nto om letut yu kowo cepas korokonik ce cañ, cekerta mopusi oñnknyemwoci sikorintet nye ripe, kurip topon mente kucilil kumwey.
- <sup>24</sup>Nteyu kowo cemwoci sikorintet ñalecato, kukerta nye cekto mopusit nyepo orit oñnkurate kerekokwa nyororonik kuratita kereywek ce nyikisec.
- <sup>25</sup>Ntowo kupunto komoy kwen ye kimite Paulo oko Sila kusome oñnkutume kukostoy Yiyintet, kumite yoto mopusinek alake cut kulimntoy.
- <sup>26</sup>Yoto pakenke kuriñriñ koret koromun kutimtim koto tokol, kuyotokis pakenke kurkotik tokol cepo mopusit, oñnkutyokokis nyororonik ce kacerate mopusinek tokol.



- <sup>27</sup>Nteye kotoköse sikorintet nye ripe mopusit, ntopere akäs kayotokis kurkotikap mopusit tokol, yoto kusot kule tos koy komwey mopusinek tokol, kucut rotwenyi, nteye kimite kumöce kule aparkey nkit.
- <sup>28</sup>Yoto kupol Paulo om kutit nyewo kumwoy kule“Mente awurtekey! Cemite acek tokol yu!”
- <sup>29</sup>Kukurto sikorintet cesut tarit oñkulapat kuwo orit wokoputyi yepo kerekokap Paulo oko Sila kupotone om Muyotet.
- <sup>30</sup>Yoto kukwer neto cekto kukwa sañ oñnkutepe kule, “Merekyo, mosaiy ne ani ye sosop?”
- <sup>31</sup>Kumwoci kule, “Yen cömisye oñnkikasekey Mokoryontet Yesu mosicisopiñ nyi wanak oko pikap kañuñ.”
- <sup>32</sup>Kumwoci cek neto ñolyontetap Mokoryontet oko piko alak cepo kanyi.
- <sup>33</sup>Kukwer sikorintonoto cekto pesyonoto komoy oñnkuwokusityi mwoyokwa. Yoto pakenke cepatisan sikorintonoto wanak oko pikap kanyi tokol.
- <sup>34</sup>Kukwer neto Paulo oko Sila kupa konyi torot oñnkukoci omik kwam. Kuñjerec neto oko pikap kanyi koromun omnye kokuyen yoto cekto Yiyintet.
- <sup>35</sup>Ntowo kuyec koret, kuyokto ketik sikarekwa cewoyec kupa wule mite sikorintet nyo ripsi wokumwoci kule, “Tyakte pico kupecikey.”
- <sup>36</sup>Yoto kumwoci sikorintet nye kiripsi Paulo kule, “Kokuyok ketik ñolyontet kumwoy kule cityaktak akwek. Kunyo roke apecikey poninekwok möt topon om kalya.”
- <sup>37</sup>Ntene kumwoci Paulo sikarek kule, “Kumwayta cek cepasec acek om konyekap piko tokol nye puryo kot kuwosontyec kot kunyortec lelis oñnkurok ciku acek Romek, oñnkukertec mopusi! Kunyi möce cekto yawut kule cityaktec acek om sisyt nye moköse ci? Puryo kot kuyunyo! Misyini kukwa cek nkit oñnkwokutyaktec acek.”
- <sup>38</sup>Yoto kupa sikarek cewoyec wokumwoci ketik ñalecato, nteye kotolime ketik kule koko Romek Paulo oko Sila, yoto kumuyo.
- <sup>39</sup>Kupa ketik okoy wule mite mpo Paulo oñnkwokurenykey, oñnkukwererune mopusi oñnkusom kumwoci kule apecikey añete moñet.
- <sup>40</sup>Kunomen Paulo oko Sila kupete mopusi oñnkupa okoy kotap Litiya, ntowo kupunto wuloto wokunyor mpo yeya co kikoyen, kumwoci ñalek ce kwile oñnkunomen kupecikey.

## Kiyokik 17

- <sup>1</sup>Kunomen cekto poninekwa kupunte koretap Ampipoli oko Apoloniya okoy kupunto Sesolonika wule kimite kotapkok nyepo Yutayek.



- <sup>2</sup>Kuyu wule kiyunto kopurtap Paulo, yoto kowut kotapkok kuwany Sapatinek somok kutintentyintos oko Yutayek kuporcini ñalek ce kinumune wule mite silutekap Yiyintet,
- <sup>3</sup>ce mwowu kupor manta kule mosukutañany Ñapanet, oñkuyinet kotutune met. Kumwoy kupor kule, “Yesu nyitenyi omwowok ani akwek kunye Ñapanet.”
- <sup>4</sup>Yoto kayen Yutayek alake oñkuyomokey oko Paulo oko Sila, oko mpo luketap Kirikik ce cañ co soye Yiyintet oko koruk ce tokunotin ce cañ.
- <sup>5</sup>Ntene kucorok Yutayek oñkoruruc piko sokoranik ce kiwur om moñet oñkupol om moñet tokol kumukul. Yoto kupa wokuput kurketap kotap Yason kusyeme kule cenyoru Paulo oko Sila sukuñet cekweru kukwa wule mite piko.
- <sup>6</sup>Ntene kipuryo kot wokunyor. Kunam Yason oko mpo yeya alak oñkucut kukwer wule mite poytoyikap moñet, oñkupol kumwoy kule, “Kokowurta picu koret wulyo tokol! Kunyi kakwa okoy moñenyacek?”
- <sup>7</sup>Kunyi Yason nye kurip picu kwek toyekyi om konyi. Yiye picu tokol ñalek ce yirye ntarastinekap Kinko Nyewo kumwowu kule mite yec kinko ake nye cekure Yesu.”
- <sup>8</sup>Ntowo kulim piko oko poytoyikap moñet ñalecato; kunyer kupol kukwanykwanynkey.
- <sup>9</sup>Nto om letut yu kowo konomune cek Yason oko piko alak pesanik ce keyoñe, kwasta kupecikey.
- <sup>10</sup>Ntowo kwimen kutuyit koret, kuyomis mpo yeya co kikoyen Paulo oko Sila kupa Pereya. Ntowo kupunto woloto kowut kotapkok nyepo Yutayek.
- <sup>11</sup>Kisiken pikap wuloto kupël piko cepo Sesolonika, omnye kilimnta cek lokoywek om ñerekwek, oñkusuman kukir silutekap Yiyintet pesyosyek tokol sukuñet kukäs kule po manta ñalek ce kimwowu Paulo.
- <sup>12</sup>Yoto kuyen piko ce cañ, oñkuyen mpecek Kirikik koruk ce tokunotin oko moronik ce cañ.
- <sup>13</sup>Ntowo kulim Yutayek cepo Sesolonika kule kumwayte Paulo ñolyontetap Yiyintet Pereya, yoto kukwa cek okoy wuloto oñkwokucec kowurur luketap piko.
- <sup>14</sup>Yoto pakenke lakwar, kunäm mpo yeya co kikoyen Paulo oñkuyomis kuwo koret nye mite ruretyet tapan. Ntene kuñetune Sila oko Timosewo Pereya.
- <sup>15</sup>Kupetakey Paulo piko co kiyomise neto okoy kupunto tokol Asene. Oñkuketitakey cut kupa okoy Pereya. Kumwoci Paulo cek kunkolontyi kule womwoci Sila oko Timosewo kukwa kusorkey lakwar okoy kupun wule mite neto ye kemukakay.
- <sup>16</sup>Nteye kimite Paulo kukonye Sila oko Timosewo om Asene, yoto kunyer mukuleynyi koromun yu kowo kukäs kerkeyik ce cañ ce kimite moñet kumukul.
- <sup>17</sup>Yoto kutintentyin neto oko Yutayek oko lamek co soye Yiyintet om kotapkok, oñkutintentyin pesyosyek tokol oko piko ce kituytos oko neto wulo po matepo.





- <sup>18</sup>Kutintentyin oko mpo piko muswokik alak cepo Epikuronik oko Stoyik. Kumwoy alake kule, “Syeme mwaskeyantani menket kiy tokol kule omwowu ne?” Kumwoy alake kule, “Yunye syeme kule aᅇalale anet ᅇalekap Yiyikap korosyek alak.” Kimwoy cek kuyunyoto, omnye kimwoytoy Paulo ᅇalek ce nōme Yesu oko kotutunetap met.
- <sup>19</sup>Yoto kukwer cek Paulo okoy kokwet nye kipure ye cekure Areopako, oᅇnkumwoy kule, “Cemōce acek kule cinket konetisyoni lel nyi ᅇolole nyi.
- <sup>20</sup>Omnye tokulelac nye tompo kot celim acek ᅇalecu ᅇolole nyi, kunyo cemōce cinket poru ne?”
- <sup>21</sup>Omnye kipuryo kiy ake nye kikwiye pikap Asene oko toyek ce kiwuci kumiᅇis wuloto, ntene kiᅇolole oᅇnkulimntoy ᅇalek ce kutokutoku.
- <sup>22</sup>Yoto kuyone Paulo taytap kokwet om Areopako oᅇnkuᅇalal kumwoy kule, “Pikap Asene! Kwakāsak ani akwek om tukuk tokol kule oyiku pic ce osoye Yiyik koromun.
- <sup>23</sup>Omnye ye kwomite owesetoti opuntote moᅇemwoᅇ akās oteputek wule cepele korosek okoy onyuru otepto ake nye mite silutek ce kicesil kule, ‘Po nyi Yiyintet nye mocinket.’ Kunyo nyoto mocinket nyo osoye akwek nka kot monketi kunye Yiyintet nyoto nye omwowok ani akwek.
- <sup>24</sup>Yiyintet nyoto kunye kitany koret kumukul oko tukuk tokol ce mite koret, nyoto kunye Mokoryontet nye poytoy torot oko ᅇony. Ntene puryo kot kuminye korik ce kitece piko yewuniyekwa,
- <sup>25</sup>oᅇnkupuryo kot kumōce kiy ake nye koyici piko neto om yewuniyekwa kuyu nye panan. Omnye neto nkit nye kocini piko tokol soponto oko komuᅇnto oko tukuk alak tokol.
- <sup>26</sup>Kinyosyo kunyo kutany cito akenke nye kiyi piko tokol om koret tokol kumukul. Neto nkit nye kiyoyec kenysisyek oᅇnkusat kiyotonik tokol om koret wule ᅇete wule minye piko.
- <sup>27</sup>Kikwiyy kuyunyoto kule sukuᅇet piko kuceny kutaptapat nto sukunyor cek neto. Ntene ᅇalek cepo manta kucu kule, puryo kot kumite Yiyintet wule low om wule mite ci tokol om acek.
- <sup>28</sup>Omnye, ‘Cesoptosi acek, oᅇnkyepesetoti, oᅇnkyemite koret om kamukeywekyi.’ Kuyu wulo kimwoy mpo piko alake ᅇololikap ceptyonkocok cikwakwek kule, ‘Ciku mpo acek lekokyi.’
- <sup>29</sup>Kunyo ye ciku lekokyi, kupuryo kot kuroke cisot kule Yiyintet ku kiy nye kerkey oko kerkeyin nye karin nye lekecece nto rwa nye kikwiyy piko kupul om ᅇomnon.
- <sup>30</sup>Kunyo kikwasta Yiyintet nye kipuryo kot kumany om pesyosyek co kitil ye kipuryo kot kunket piko. Ntene mwowu yawut kumwocini piko cepo koret tokol kuweckey oᅇnkurenkeny kwasta miyotyoni.



<sup>31</sup>Omnye kikwey neto pesyet nye mosukuwosontyine ci ake tokol nye mite koret tokol kumukul oṅnkumutyi musankut nyepo manta om kamukeywekap cito nyo kikwey neto nkit. Kikopor ṅalecu kupoyit manta om wule mite ci ake tokol, omnye kiṅet cicoto kotutune met.’’

<sup>32</sup>Nteye kotolime piko alake kuṅolole Paulo ṅalek ce nōme kotutunetap met, kurorici cek neto. Ntene kumwoy piko alake kule, ‘‘Cemōce acek kule celim ṅolole nyi ṅalecu yec pesyet ake.’’

<sup>33</sup>Yoto kunomen Paulo kuṅete kokwet

<sup>34</sup>Ntene kuyen alake oṅnkuyomokey oko neto, cekto coto ku mpo Tionisio nye kikirwokintet om kokwetap Areopako, oko korko nye cekure Tamari oko piko alak.

## Kiyokik 18

<sup>1</sup>Om letutap ṅalecato, kunomen Paulo om Asene kuwo okoy Korinso.

<sup>2</sup>Wokunyor om wuloto Yutoyintet nye cekure Akwila nye kiceyici Ponto nye kitokucone Italia oko korkenyi Priskila. Omnye kikwetune Kinko Nyewo Klautiyo Yutayek tokol kuṅete Rom. Kuwo Paulo wokukäs cekto.

<sup>3</sup>Oṅnkopurcin kwiyis tokol omnye kikwiyisi Paulo yisyet nye kerkey oko nye kikwiye cekto kunope wemanik sukuṅet kunyor pesanik ce kolyekey.

<sup>4</sup>Kuṅalale Paulo kotapkok pesyosyek tokol ye pesyetap Sapat kutintentyin oko cek kusyem kule acutu kuyen Yutayek oko Kirikik.

<sup>5</sup>Ntowo kupun Sila oko Timosewo kukwane Maketoniya. Kwiyis Paulo pesyosyek tokol nye puryo kot kwiye yisyet ake kumwoytoy lokoywek kuporcini Yutayek kule Yesu kunye Dapanet.

<sup>6</sup>Nteyu kowo kutay cek ṅalekap Paulo oṅnkumwoci ṅalek ce miyotec, kunäm Paulo sirokyi oṅnkulelekyi tertitap sirok oṅnkumwoci kule, ‘‘Ye kopotye akwek, kwakwek nkit ce nōmok lelisto! Puryo kot ku ani. Kuceke yawut pesyoni kuwo tay, mosowo ani womwoci lokoywek lamek.’’

<sup>7</sup>Yoto kunomen kupakakta cekto oṅnkuwo wokopurune kotap lomintet ake nye kisoye Yiyintet nye kicekure Tito Yusto nye kilekite kanyi kotapkok.

<sup>8</sup>Kuyen Krispo nye kinyewo nyepo kotapkok kuyen Mokoryontet wanak oko pikap kanyi tokol. Kulim pikap Korinso alake ce caṅ lokoywek okoy cepatisan cekto.


<sup>9</sup>Nto mite kwomowut ake, kukäs Paulo ṅoṅutyet nye kimwoci Mokoryontet neto kule, ‘‘Mente amuy, tosyikey ṅalal mente asis,

<sup>10</sup>omnye opontekey ani oko nyi, puryo ci nye muce kuporyeniṅ kowurtiṅ, omnye oponte ani pikwani ce caṅ ce mite moṅoni.’’

<sup>11</sup>Yoto kopur Paulo wuloto kuwany kenyit akenke oko orok lö kunete piko ṅolyontetap Yiyintet.



- <sup>12</sup>Ntowo cekwey Kalio kwek poytoyintetap Akaya, yoto koruruckey Yutayek oṅnkunäm Paulo kukwer kuwo kok wokuwosontyi.
- <sup>13</sup>Kumwoy cek kule, “Cici kunye syeme kule aṅem amas piko sukuṅet kusay Yiyintet om aret nye puryo kot kucöme ntarastinek!”
- <sup>14</sup>Nteyu kikirik kucec kuṅalal Paulo. Yoto kumwoci Kalio Yutayek kule, “Nto komite lelis nye miyat nto ḡolyo nye miyat nye kociwurta nto kamuyte ani olimwok topon akwek Yutayek.
- <sup>15</sup>Ntene omnye mite pate tintenotet nyepo ḡalekap koyenotet oko ntarastinekwakwek, möce akäs oṅnkamut akwek nkit, omnye puryo kot oyiku ani ketintetap ḡalek ceyuco!”
- <sup>16</sup>Yoto kukwet Kalio cek kupete kokwet.
- <sup>17</sup>Kurotyi piko tokol kunäm Sosene nyewo nyepo kotapkok oṅnkupir om taytap kokwet. Ntene om coto tokol, kusisyecikey Kalio kuyu nye mokiy nyepo lat.
- <sup>18</sup>Yoto kopur Paulo Korinso kuwany pesyos ce caṅ kupontokey oko mpo yeya piko co kikoyen nto pestos. Oṅnkunomen kulany rapet oko Akwila oko Priskila kupa okoy Siriya. Nteye kitompo kunomen Paulo kuwalkey om Kenseria oṅnkurwac metinyi.
- <sup>19</sup>Yoto kupunto Efeso wule kipokokyi neto Akwila oko Priskila, oṅnkuwo nkit okoy kotapkok oṅnkutintentyin oko Yutayek.
- <sup>20</sup>Kusom cek Paulo kule cipur tokol oko neto kuloyit. Ntene kutay.
- <sup>21</sup>Nteye kimite kunomene kumwoci kule, “Ye kacäm Yiyintet mosoweckey ani aco wule omite akwek.” Kunomene Efeso kulany rapet.
- <sup>22</sup>Ntowo kurekune Kaysariya kuwo kulaṅnta Yerusalem wokusupay pikap Yiyintet; oṅnkunomen kuwo Antiyok.
- <sup>23</sup>Kopur Paulo wuloto pesyos ce ḡeri nto nomene kuwo kupunte korosyepak Kalatiya oko Prukeya kuṅololyinoti kukwil piko tokol co kikoyen.
- <sup>24</sup>Yoto kuco okoy kupun Efeso yutoyintet ake nye cekure Apolo nye kiceyici Alekisantaria, nye kiṅolole kutok topon oṅnkusumanat nye ḡom nye kinket koromon silutekap Yiyintet.
- <sup>25</sup>Kikikonetkey neto konket ḡalekap aretap Mokoryontet. Yoto om ḡerekwek ce caṅ oko mukuleyto nye topon kuṅalal Apolo kunetis topon ḡalek ce nöme Mokoryontet Yesu. Ntene kinket neto pate potisonisyet nyo kinete Yowana.
- <sup>26</sup>Kucec kuṅalal om nyikanatet om kotapkok. Nteye kotolime Priskila oko Akwila ḡalekyi, kukwer kuwo komwa oṅnkuwo kunet kuporci topon ḡalek cepo aretap Yiyintet.
- <sup>27</sup>Nteyu kowo kunket mpo yeya piko co kikoyen cepo Efeso kule möce Apolo kule ayay ruretyet okoy opunte Akaya, yoto kukalya kusilyi parwet nye kosutyi mpo yeya piko co kikoyen ce kimite wuloto kumwoci kule kuṅerekyi neto. Ntowo kupunto



Apolo wuloto, kwiyis topon kwek kokolyoyintet nyewo om wule mite piko co kikoyen kupunto poypoyetap Yiyintet

<sup>28</sup>Omnye kitinten om swamet nyewo koromun okoy kupël Yutayek om taytap piko tokol, kuḡalal kupor kukwane silutekap Yiyintet kule, Yesu kunye Ḋapanet kupoyit manta.

## Kiyokik 19

<sup>1</sup>Nteye kimite Apolo Korinso, yoto kuwo Paulo kupunte kwenutap koret okoy kupunto Efeso. Kunyorta wuloto konomik alak.

<sup>2</sup>Yoto kutepe Paulo cekto kule, “Kyonyoru akwek Muyet Nyetilil yo kyoyeni?” Kuwec cut kumwoy kule, “Puryo! Tompo mpo kot celim acek kule mite Muyet Nyetilil.”

<sup>3</sup>Kutepe Paulo cek kule, “Kunyo kicepatisanak akwek patisanet oḡnkono?” Kuwec kumwoy kule, “Potisonisyetap Yowana.”

<sup>4</sup>Kumwoy Paulo kule, “Potisonisyetap Yowana kunye kipo piko ce renyekey kwasta miyotyoniḡwa; kunyo kimwoci pikap Israel kule misyini kuyen cekto neto cito nyo cono om letunyi, nyoto ku Yesu.”

<sup>5</sup>Ntowo kulim cekto ḡalecato cepatisan om kaynetap Mokoryontet Yesu.

<sup>6</sup>Yoto kukemer Paulo yewuniyekyi metewokwa, kunyor cekto Muyet Nyetilil; kicec kuḡalal nelyepik alak oḡnkumwayta lokoywekap Yiyintet.

<sup>7</sup>Kipuntoy picoto ce kirice tokol taman ok oyeny.

<sup>8</sup>Kuwany Paulo wuloto orok somok kuweti kotapkok oḡnkuḡololyini piko om nyikanatet. Kutintentyin oko cekto oḡnkusyem kumwoci ḡalek cepo poytoyisyetap Yiyintet.

<sup>9</sup>Ntene kutoyis piko alake kuwuryo oḡnkuḡutay meyen oḡnkumwoy ḡalek ce miyotec kumwoci piko ce rupe aretap Yiyintet om taytap piko tokol. Yoto kuḡet Paulo kupakakta cek, kukwey oḡnkuweto piko co kikoyen oḡnkuḡololyi kunet cek pesyosyek tokol om sukulutap Turano.

<sup>10</sup>Kutosyikey Paulo kwiyis kuyunyoto kuwany kenyisyek oyeny okoy kulim piko tokol ce kimite Asia ḡolyontetap Mokoryontet Yesu, Yutayek wanak oko Kirikik.

<sup>11</sup>Yoto kwiy Yiyintet tukuk cepo kakitat kupël cepo kwak kupunte yewuniyekap Paulo.

<sup>12</sup>Okoy cesute mpo tamparinekyi oko sirok ce kitiny porto, cesutyini piko ce mnyontos, kusopco porwonikwa oḡnkuḡetyo kupete oyik ce miyotec.

<sup>13</sup>Yoto kucec Yutayek alake cepsokesyisyeḡ ce kipesetoti sukukwetoti oyik, kusyem mpecek kukwet oyik ce miyotec om wule piko ce kiponto oyik kwiyisye kaynetap Mokoryontet Yesu. Kumwoci cekto oyik kule, “Okwetok ani akwek om kaynetap Yesu nyo mwoytoy Paulo.”



- 14**Piko ce kikwiye kuyunyoto ku werik tisap cepo Yutoyintet tisintet nyewo nye kicekure Sekewa.
- 15**Ntene kuwekyi oyik ce miyotec kumwoci kule, “Onŋket ani Yesu, oŋnkonket mpo Paulo, nto akwek ku ŋo?”
- 16**Yoto kuran cito nyo kiponto oyik oŋnkuporye cek tokol om swama okoy kupël kukwet kumwey kupa saŋ püc nye puryo kot kupunto sirok oko mwoyok ce kanyor.
- 17**Kulim oŋnkunket ŋalecato piko tokol ce kiminye Efeso, Yutayek oko Kirikik. Kumuyo tokol koromun oŋnkukasta kuywey kaynetap Mokoryontet Yesu.
- 18**Kukwa piko ce caŋ co kikoyen oŋnkwokumwoy kutor om tayta piko tokol tukuk ce miyotec ce kikwiye cekto.
- 19**Kusut mpo piko tokol ce kitepe sokeyek kitapunekwa oŋnkoruruc wanak oŋnkupele taytap piko tokol. Ntowo ciyit pesanik ce kiyeme kyale kitapunecato tokol kupunto silinkinek Elifunek konom.
- 20**Om aret nye yunyoto nyepo swama, yoto kutosyikey kuner kucäm piko ce caŋ ŋolyontetap Mokoryontet oŋnkukwilakay kupoyit swama koromun.
- 21**Nto om letut yu kowo kwiyo kis ŋalecato, kusot Paulo om moyenyi kule mawo opunte Maketoniya oko Akaya, oŋnkowo okoy Yerusalem, kumwoy yoto kule, “Ye kopunte wuloto, mosowo yec mpo okoy wakäs Rom.”
- 22**Kuyokto kokolyoykyi oyeny Timosewo oko Erasto kunyosyo kupa Maketoniya, oŋnkupeni neto kupur koretap Asia kuwany pesyos ce ŋeri.
- 23**Om pesyosyecoto ye kitoku cukurotet nyewo om Efeso om wule mite piko co rupe aretap Mokoryontet.
- 24**Kimite wuloto citake nye cekure Temetrio nye kitonye karik ce kiyuytye kotap Yiyintet korko nye cekure Artemi; nye kinyoru piko ce kikwicini neto yisyonoto pesanik ce caŋ.
- 25**Yoto kukur koruruc pikyi ce kyiyisiyi oko piko alak ce kikwiye yisyet nye kerkey oko nyenyi oŋnkumwoci kule, “Merekyo, oŋnket akwek kule cenyortoy acek mokoryontinyo yisyonni,
- 26**kunyo kwakäs oŋnkolim akwek nkit ŋalek ce yiye cici cekure Paulo, nyi mwocini piko kule, Yiyik ce kerkeyik co kikwiye piko kuce puryo kot kupo manta mpo kisic. Kunyo kokomukta kot kuwec piko ce caŋ, puryo kot ku wuli po Efeso nkit pate, ntene karik kunäm koretap Asia tokol.
- 27**Kunyo mite kaŋoyenotet kule mosukuwur kamonkesyentini nyacek oŋnkunyor kaynet nye miyat. Puryo kot kuyo mpo nkit pate, ntene oko yec kule mosiciwurta kupot woyinnyi nye soye ci tokol om Asia oko koret tokol kumukul!”
- 28**Nteye kotolime piko tokol ŋalecato, kunyer oŋnkucec kupol kumwoy kule, “Nyewo Artemi nyepo Efesoyek!”



<sup>29</sup>Kutisto polotet nyewo kunäm mojet tokol; kurway cek oṅnkunäm Kayo oko Aristariko pikap Meketoniya ce kipontotikey oko Paulo, oṅnkukwer lakwar okoy kupunto kotap arerosyek.

<sup>30</sup>Yoto kumäc Paulo nkit kule awo wule mite piko, ntene kuyete piko co kikoyen.

<sup>31</sup>Kuyok ṅalek piko alake cewoyec cepo koret ce kicoronutepak Paulo kumwoci kule mente kot kuco cokuporkey om kotap arerosyek.

<sup>32</sup>Yoto kupol piko om kirwoket koromun; kumwowu alake ṅalek alak, kumwowu alake ṅalek alak, omnye kikiwur kirwoket nye kipuryo kot kunkete piko ce caṅ kule ṅolyo ne nye kerurukikey cekto.

<sup>33</sup>Yoto kucämnta piko alake kule Alekisanta nyepo ṅalecu, omnye kikwer Yutayek neto kuco cokuyone tay. Yoto kuwuse Alekisanta piko yewuniyekyi kule kusiono saṅalal asyem ayetkey.

<sup>34</sup>Ntowo kunket piko kule Yutoyintet neto, kupol tokol om kutit akenke kuwany sawanik oyeny kupole kumwowu kule, “Nyewo Artemi nyepo Efesoyek!”

<sup>35</sup>Nto om letut komuc Koronintet nyepo mojet kuṅololyi piko okoy kusiono. Nteyu kowo kusiono piko, kumwoy neto kule, “Pikap Efeso, ṅo cito nye puryo kot konket kule, mojetap Efeso, kunye ripe kotap Yiyintet nyewo Artemi oko rwantet nyetilil nyo kusuwune torot.

<sup>36</sup>Puryo ci nye muce kot kutintentyi tukucutecu. Kunyo misyini osisie, monte cimomnci kot oyi kiy nye miyat.

<sup>37</sup>Omnye kokweru akwek picu kukwa yu, ce puryo kot kunyapan tukun cepo kotap Yiyintenyto nto mpo kucup Yiyintenyto nye korko.

<sup>38</sup>Kunyo ye ponto Temetrio oko pikyi co toṅsi ṅolyo nye ṅunye om wule mite citake tokol, mite pesyosyek co cemute musankunek oko poytoyik co mute musankunek roke wokuwosontyinekey cek wuloto.

<sup>39</sup>Nteye mite ṅalek alake ce omöce akwek ce pële co, mosicirwoke ṅalek coto kokwetap pikap koret nyepo kwak.

<sup>40</sup>Omnye ciṅoyeni kule muce cewosontyec acek om pararetap ṅalek ce kokwiyokis pesyoni. Puryo kot cimuce kot cikalyec acek om polotoni, kunyo moceponte ṅolyo nye cimuci cemwowu ceyetekey.”

<sup>41</sup>Nteyu kowo kuṅalal kuyunyoto okoy kuwany, kuyomis kumwoci piko kuseret kupecikey.

## Kiyokik 20

<sup>1</sup>Nto om letut yu kowo kusiono ṅalek, kukur Paulo kutuyo wanak piko co kikoyen oṅnkuṅololyi cek ṅalek ce kwile oṅnkuyomis oṅnkunomen kuwo okoy Maketoniya.





- <sup>2</sup>Kuwesetote kupunte korosyecoto oṅnkumwoci cekto lokoywek ce caṅ ce kwile. Yoto kuco okoy kupun koretap Akaya,
- <sup>3</sup>wule kipur kuwany orok somok. Nteye kimate kuyiytoykey kule onomen ayay okoy opunte Siriya, yoto kusow konket kule kakwiyta Yutayek rurumut kule cepakāca. Kusot oṅnkuwoṅnkyi kule maweckey opunte aretap Meketoniya.
- <sup>4</sup>Kiwetoykey Paulo yoto picu; Sapatro weritap Piriko citap Pereya, oko Aristariko oko Sekunto pikap Sesolonika, oko Kayo citap Terpe, oko Timosewo oko Tukiko oko Trofimo pikap koretap Asia.
- <sup>5</sup>Kupa cek kunto tay wokukanyec acek Troa.
- <sup>6</sup>Nto om letutap sakwetap mukatyantet nye mokutunat, cenomene acek Filipi celany rapet, yoto cipe ciwany pesyosyek mut okoy wocenyorte cekto Troa wule kiwo cepeni ciwany wuloto pesyosyek tisap.
- <sup>7</sup>Nteye kipesyetap Santey kosoleny ciruruckey acek wanak oko piko co kikoyen kyomisye cepetec mukatyantet. Yoto kuṅololyi Paulo piko, ntene kutosyikey kuṅalal okoy kupunto komoy kwen, omnye kinomen kuwecinikey tun ye koyekune.
- <sup>8</sup>Kimate yoto tarinek ce caṅ ce kiloytos ce kimate koto nyepo parak wule kicirurukikey acek.
- <sup>9</sup>Kimate oyiperyontet ake nye cekure Eutiko nye kikipure ye kipo pastit; ntowo kutosyikey Paulo kuṅalal kuloyit, kunuc neto okoy kunamnta rwonto, yoto kusuwune koto nyepo somok nye mite koto parak okoy wokupir ṅony. Wocenāme ṅony nye kame.
- <sup>10</sup>Kuwo Paulo kurekto lakwar oṅnkuputyi kokupuyekey kunām oṅnkumwoy kule, “Osisie morirye, tokusopot cito!”
- <sup>11</sup>Oṅnkulaṅnta Paulo kuwo koto parak oṅnkuwokupetec mukatyantet oṅnkwan. Yoto kutosyikey kuṅalal okoy kuyec koret ntonomene kuwecikey.
- <sup>12</sup>Kukwer cekto oyiperyontonoto kuwo ka kukosop, kuṅerec cek ṅerekwek ce caṅ koromun.
- <sup>13</sup>Cipe acek tay wule mite rapet, oṅnkyelany cipe okoy cepunte Aso. Omnye kicemöce kule wocilany Paulo rapet om wuloto. Kimwowec acek neto cipe kuyunyoto, omnye kiwo neto kupunte oret nyepo koret.
- <sup>14</sup>Ntowo kunyorcec acek neto Aso, cilany kulany rapet oṅnkyenomen cipe okoy Mitulene.
- <sup>15</sup>Cenomene wuloto om rapet, ntowo kuyekune cepunte koret nye tokyintos oko Kiyō. Nto pesyet nye kirupe cepunte Samo, nto pesyet nyepo somok cepunte Melito.
- <sup>16</sup>Omnye kicām Paulo kule akeyitye Efeso om rapet mente kot olilennkey om Asia. Omnye kisortokey lakwar kule ye kemukakay opunte Yerusalem ye pesyetap Pentekoste.



- <sup>17</sup>Nteye kimate Paulo Melito kuyokto cito kuwo Efeso wokukur poyik cepo pikap Yiyintet kule kukwa kwokutuyo oko neto.
- <sup>18</sup>Nteyu kowo kupun picoto, kumwoci Paulo cekto njalek kule, “Ojnkhet akwek wule yunto kapurto nyimwani om pesyosyek tokol ce kicipurcine oko akwek kuceke pesyet nyepo tayta ye kyopunu ani Asia.
- <sup>19</sup>Kyoyisye yisyenyu kuyu mutworintetap Mokoryontet om poypoyet oko lokik ojnkopunte syemutok ce kikwontyo om rorumunekap Yutayek.
- <sup>20</sup>Ojnkhet akwek kule puryo kot awujenak ani akwek njolyo ake tokol nyepo latik nye muce kukalyak, kuyu wulo kyomwowok ojnkhanatek om taytap piko tokol oko om korikwok.
- <sup>21</sup>Kyomwowu asowu koromun Yutayek oko lamek omwoci kule misyini kuweckey kwasta miyotyoni ojnkukwekyikey wule mite Yiyintet ojnkuyen Mokoryontet Yesu.
- <sup>22</sup>Kunyo amite yawut oweti Yerusalem omnye aywey kupoyto Muyet Nyetilil nye puryo kot ojnketi kito nye mosukwiyakay om wule amite ani om wuloto.
- <sup>23</sup>Ojnketi kule kukosowo Muyet Nyetilil om mojosyek tokol ce kwopunte kule keno ani pate mopusi oko tonjutek.
- <sup>24</sup>Ntene asute sponmwani kuyu kiy nye puryo kot kuponto latik om wule amite ani, sajnet ayitite yisyetap poninekwani anjnkawany yisyet nye kikono Mokoryontet Yesu; nye omwoytoy lokoywek ce toponec cepo poypoyetap Yiyintet.
- <sup>25</sup>“Kyowesetote ani opunte wule amite akwek tokol, amwoytoy opuru poytoyisyetap Yiyintet. Kunyo ojnkhet ani yawut kule puryo ci mpo akenke om akwek nye muce kot tokukas ani yec.
- <sup>26</sup>Kunyo omwowok owolikey pesyoni kule ye kopot citake tokol om akwek kupuryo kot kunyimwani lelisto mpo kisic.
- <sup>27</sup>Omnye kyomwowok akwek nye puryo kot awujenak tukuk tokol ce kikwiya Yiyintet.
- <sup>28</sup>Akaste oripkey akwek nkit ojnkhorip piko tokol co kikonok akwek Muyet Nyetilil. Oyiku mesewekap pikap Yiyintet ce kiwec neto nkit kwek ceci om korotikap Werinyi nkit.
- <sup>29</sup>Omnye anjnketi kule ye konomen ani, mosukukwa wule omite akwek suyik ce koromec ce puryo kot kotuce kecirek.
- <sup>30</sup>Mosukupunto pesyet nye mosukujet piko alake om kwenumwakwek kujalal njalek cepo mwiynan kuperper kumas piko co kikoyen kurup aretap picoto.
- <sup>31</sup>Kunyo oripkey akaste, ojnkasot ojnkhet kule om lokik ce canj cepo komoy oko pet, kyanet ani asowu ci tokol om akwek kuwany kenysyek somok.
- <sup>32</sup>“Kunyo mopokokyok ani kuripok Yiyintet oko poypoyetap njolyontenyi. Neto nye mokutecak topon kukonok kupeyok ce kerkey oko cepo pikyi tokol.



- <sup>33</sup>Kipuryo kot acorokyi pesya nyepo ci nto mpo sira.
- <sup>34</sup>Oṅket akwek tokol kule om yewuniyekwani cutecu kuce kyoyisye tukuk ce kipoyo oko piko co kicepontekey.
- <sup>35</sup>Kyoporwok ani om tukuk tokol kule yisyet nyepo swama kunye aret nye roke cikalye acek piko co puryo kot kuponto swamet, cisoti ṅalekap Mokoryontet Yesu co kimwoy kule, ‘Mite ṅerekwek ce caṅ ye cepciytoy kupël ye cekoniṅ.’ ”
- <sup>36</sup>Nteyu kowo kuṅalal Paulo okoy kuwany, kukutuny wanak oko cekto tokol oṅnkusom.
- <sup>37</sup>Ntowo kuwany; kiriryo piko tokol oṅnkunäm kumot kuṅatut Paulo kupirci cämetaṅkey.
- <sup>38</sup>Kinerekis piko yoto koromun om ṅalek ce kimwoy Paulo kule komo komuce cekto yec kukäse neto konyekwa. Yoto kupa cekto kuyomis Paulo okoy kupunto ye kimite rapet.

## Kiyokik 21


- <sup>1</sup>Nteyu kowo cisupaykey acek oko cekto, cepciykey celany acek rapet cipe ceculakisye kyay okoy cepunte Kosi, nto pesyetap oyeny cepunte Roto, nto kuceke yoto cetosyikey cipe okoy cepunte Patara.
- <sup>2</sup>Cenyorte wuloto rapet nye nomene kuweti Foyinisiya, celany cepete nyoto .
- <sup>3</sup>Cipe okoy cepunte wule cekäs Kupro om komosta tö, yoto cipe okoy cepunte Siriya, wokuyo rapet Tiro wule kiwocirekyi terekok ce kisute.
- <sup>4</sup>Cenyorte wuloto piko alak ce kikoyen cipur oko cekto ciwany pesyosyek tisap. Kumwoci picoto Paulo om swametaṅ Muyet Nyetilil kule mente kuwo Yerusalem.
- <sup>5</sup>Nteyu kowo ciwany wuloto pesyosyek ce kicipur, cenomen poninekyo, kuyomisec piko tokol koruk oko lekok okoy cepunte moṅet saṅ, yoto cekutuny om yepo ruretyet tapan oṅnkyesom.
- <sup>6</sup>Ntowo ciwany, cisupaykey acek oko cekto, oṅnkyipe acek wocelany rapet, kunomen cek, kuweckey kupa ka.
- <sup>7</sup>Cetosyikey acek cipe poninekyo om rapet kuceke Tiro okoy cepunte Ptolemayi, wule kiwo cisupay mpo yeya; oṅnkyipur wanak oko cekto ciwany pesyet akenke.
- <sup>8</sup>Ntowo kuyekune, cenomen cipe okoy cepunte Kaysariya. Nteye kicemite wuloto cipe kotap Filipino mwoytoyintetap lokoywek wocipur oko neto. Neto kunye akenke om piko tisap co kicekweye Yerusalem,
- <sup>9</sup>Kiponto tipikyī amwan ce puryo kot cimüt ce kimwoytoy ṅolyontetap Yiyintet.
- <sup>10</sup>Nteyu kowo cipur wuloto ciwany pesyos ce ṅeri, yoto kucone workoyontet Yuteya nye cekure kaynenyi Akapo.



- 11**Yoto kuco okoy wule cemite acek, oṅnkunām porowetap suwe nyepo Paulo; oṅnkurate kerenkokyi oko yewuniyekyi oṅnkumwoy kule, “Komwoy Muyet Nyetilil kule, yunyi wule mokuratita Yutayek citap porowoni po suwe om Yerusalem, oṅnkukoyito kunām lamek.”
- 12**Ntowo celim acek ṅalecato, cesom acek oko pikap wuloto cesaysay Paulo kule mente kuwo Yerusalem.
- 13**Ntene kuwec kumwoy kule, “Kiy ne nyi oyiye akwek, yu korirye kuyu nyi, omöce kule ceyiri mukuleymwani? Oyiku yiytat nye puryo kot ku kule cerata pate, ntene mpo womeci Yerusalem om kaynetap Mokoryontet Yesu.”
- 14**Ntowo kucis ye mocewec acek neto, kyaste pate, oṅnkyemwowu kule, “Cesome kwi yokis cepo Mokoryontet kuyu wule moktoy.”
- 15**Nto om letut yu kowo cipur wuloto ciwany pesyos ce ṅeri, ceyiyekey acek cerat tukukyo oṅnkyenomen cipe celaṅte Yerusalem.
- 16**Yoto cepetekey acek wanak oko konomik alak cepo Kaysariya, kukwerc acek okoy kotap Manason citap Kupro nye kikikoyen om pesyosyek ce kipo tay, nye kicepeti acek yoto kule wocipurune kanyi.
- 17**Ntowo cepunte Yerusalem, kuṅerekyec acek mpo yeya koromun.
- 18**Ntowo kuyekune cepetekey tokol oko Paulo wocekäs Yakopo. Kimite yoto poyik tokol cepo pikap Yiyintet.
- 19**Kosupay Paulo cekto oṅnkuṅalal kuporci topon ṅalek tokol ce kikwi Yiyintet om wule mite lamek om yisyet nye kikwi neto.
- 20**Ntowo kulim cekto ṅalekyi, kuṅerec tokol kukasta Yiyintet. Oṅnkumwoci cek Paulo kule, “Yeya mucu nyi nkit käs wule yunto, kule mite mpo Yutayek pokolwokik ce caṅ ce kiwekey kuyen oṅnkukwilotin tokol om ntarastinekyo.
- 21**Kunyo kucemwoci cekto ṅalek alak ce nömiṅ nyi kule; neti nyi Yutayek tokol ce minye korosyekap lamek mwocini kule kwasta cekto ntarastinekap Moses, oṅnkimwoci kutay mawon lekokwa, oko kule kutay marup kopurtap Yutayek.
- 22**Kunyo mokyiy kulene? Omnye porukey kupoyit manta kule; mosukulim cek kule kweco nyi.
- 23**Kunyo roke yiy ṅalek ce mocemwowuṅ nyi. Mite yu piko amwanu ce kakuwalkey kawalat,
- 24**wetekey nyi picuteçu oṅnkuwayiy tokol oko cekto ntaṣimnyet nye cipukte ṣimnyontet oṅnkikoyite nyi pesanikwa sukurwac cekto metewokwa, sukuṅet konket piko tokol kule puryo kot kupo manta ṅalek co kuceṅololeniṅ nyi. Ntene kupor kule yiku Yutoyintet nye rupe ntarastinekap Moses.



- <sup>25</sup>Nto ñalek ce nöme piko co lamek co kikoyen, kicirwoc oñknyesilyi cek parwet cemwoci kule, puryo kot kuroke kwam omit ce kocesoci kerkeyik oko korotik, nto tyony nye kaciket kume, oñnkusanekay sakwayanat.”
- <sup>26</sup>Yoto kukwer Paulo picoto, ntowo kuyekune kwiyyo neto oko picoto ntasimnyet nye cipukte simnyontet, oñnkuwo Paulo kotap Yiyintet wokumwayta ye pekune pesyet nye cipukte simnyontet, oko pesyet nye mosukukonune neto kokotutepak ci tokol om cekto.
- <sup>27</sup>Nto tompo kot kupunto pesyosyek tisapu kukösyi Yutayek cepo koretap Asia kumite Paulo kotap Yiyintet orit. Yoto kowurur cekto luketap piko ce cañ oñnkunäm Paulo.
- <sup>28</sup>Kupol cek kumwoy kule, “Pikap Israel! Pikap Israel! Akalyec! Akalyec! Cito nyitenyi nyo wesotote koret tokol kumukul kunete piko tokol konetisyenyi kumwoci kule kusenkerac acek pikap Israel, oñnkumwoci kutay ntarastinekap Moses oko koyi po Yiyintet. Kunyi kokwer mpo lamek kwokowut kotap Yiyintet kunyere koyi tilil!”
- <sup>29</sup>Kimwoy cek kuyunyoto omnye kukukösyi cekto yikwe Paulo moñet kupontotikey Trofimo citap Efeso, kusot cek kule toskoy kokwer Paulo neto kuco kotap Yiyintet orit.
- <sup>30</sup>Yoto kutonkworokis ñalek om moñet tokol kumukul, kukwa kurwoy piko tokol koruruckey oñnkunäm Paulo kucutune kotap Yiyintet; yoto pakenke cecker kurkotikap kotap Yiyintet.
- <sup>31</sup>Nteye kimite luketap piko ce cañ kusyeme kule cepakäc Paulo kume, yoto kupunto ñalek wule mite nyewo nyepo sikarekap Romek cemwoci kule kutankwarakay Yerusalem tokol kumukul.
- <sup>32</sup>Kunäm nyo pakenke sikarekap Romek alak cewoyec oko sikarek oñnkukwer kupa lakwar wule mite luketap piko. Nteye kotoköse piko neto oko sikarek kwasta nye komokupire Paulo.
- <sup>33</sup>Kuwo nyewo nyepo sikarek okoy ye kimite Paulo oñnkunäm oñnkumwayta cerate nyororonik oyeny, oñnkutep kule, “Do cici, kakwiyyo ne?”
- <sup>34</sup>Yoto kupol piko alake om kwenutap piko kumwoy ñalek alak, kumwowu yec alake ñalek alak, okoy kupoty nyewo nyepo sikarek ñolyontet nyepo manta om polotet. Kumwayta cekwer Paulo kuwo kaytap sikarek.
- <sup>35</sup>Yoto cekwer Paulo okoy kupunto yepo loñntowutokap kaytap sikarek kukonopoti sikarek neto omnye kikiwuryo piko tokol koromun.
- <sup>36</sup>Kimite yoto piko ce cañ korwowu kunomu ce kipolonu kumwowu kule, “Apakäc cico kume!”
- <sup>37</sup>Nteyu kirikik cekwer Paulo kowut kaytap sikarek orit kukopunto yepo kurket, yoto kuñololyi Paulo nyewo nyepo sikarek kumwoci kule, “Omuci ani pa omwowuñ nyi ñolyo?” Kutepe nyewo sikarek neto kule, “Dololi nyi so ñelyeptap Kirikik?”



<sup>38</sup>Puryo kot kwinyi ne cico po Misiri nyo kicece weywekatet om pesyosyek co kutil kuntoci piko Romek Elifunek amwan ce ponto karikap poryet kupa kitela.’’

<sup>39</sup>Kuwekyi Paulo kumwoci neto kule, “Oyiku ani Yutoyintet sikwo nye kiceyico moŋetap Taruso om Silisiya, citap moŋet nye tokunot, osomiŋ kule cömwo oŋololyi piko.’’

<sup>40</sup>Kucömnci nyewo Paulo kuŋalal. Yoto kuyo Paulo oŋnkuwuse yewuniyekyi piko, nteyu kowo kusiono kuŋololyi om ŋelyeptap Puraniyek.

## Kiyokik 22

<sup>1</sup>Kuŋalal Paulo kumwoy kule, “Merekyo mpo yeya, oko mpo Papa, olimwo ani pa aŋalal ayetkey om taymwakwek!’’

<sup>2</sup>Ntowo kulim kule koŋololyine neto cekto ŋelyeptap Puraniyek, yoto kusiono. Kutosyikey Paulo kumwoy kule,

<sup>3</sup>“Oyiku Yutoyintet sikwo nye kiceyico Taruso om Silisiya, ntene kyanere moŋonitenyi, Kamaliel kunye kineto. Kunyo kicineta topon koromun wule yunto ntarastinekap mpo kukonyo. Kyoyiku ani nyikan pesyosyek tokol om yisionutekap Yiyintet kuyu wule ayunte akwek piko tokol cu omite yo pesyoni.

<sup>4</sup>Kyotoŋonyi ani oŋnkyopoköci piko ce kirupe aret nyitenyi; kyonöme koruk oko moronik oŋnkakerte tokol mopusi.

<sup>5</sup>Muce tisintet nyewo oko kokwet tokol kunket kule po manta ŋalecutecu omwowu ani. Kikono cekto poronok ce kicesilyi Yutayek mpo yeya ce kiminye Tamasko. Yoto onomen awo wuloto kule wanäm picutecu oŋnkarate nyororonik oŋnkokweru kukwa Yerusalem sukwocitaŋany.’’

<sup>6</sup>“Nteye kyomite oweti om aran karikte apunte Tamasko ye kipet kwen, yoto kucone lakweyet parak lakwar kuyu kaweket oŋnkomutwo ani.

<sup>7</sup>Oputyi ŋony; oŋnkalim kutit nye mwowo kule, ‘Saulo! Saulo! Omne seteŋonyo ani nyi?’

<sup>8</sup>Owekyi atepe kule, ‘Mokoryontet, nyi ku ŋo?’ Kumwowo kule, ‘Ani nyo Yesu nyepo Nasaret nyo toŋonyi nyi.’

<sup>9</sup>Yoto kukäs piko ce kicepontekey lakweyet ntene kipuryo kot kulim kutit nye kiŋololwo ani.

<sup>10</sup>Atepe ani kule, ‘Mokoryontet mosayiy ne ani?’ Kumwowo Mokoryontet kule, ‘Dete ŋoŋy; oŋnkiwo okoy Tamasko, mosuwocemwowuŋ om wuloto yisionutek tokol ce kikwiytowuŋ Yiyintet kule yiy.’

<sup>11</sup>Yoto omnye kikikokora lakweyet, kunäma piko ce kicepontekey yewut oŋnkuretoto okoy Tamasko.





- 12“Kimite Tamasko citake nye cekure Ananiya, cito nye kipo tini nye kirupe ntarastinekyo nye kiyweye kucömntoy Yutayek tokol ce kiminye wuloto.
- 13Kuco yoto okoy wule amite oñnkucokuyonje yepo komosmwani, oñnkumwoy kule, ‘Yeya Saulo, käste yec.’ Yoto pakenke akäste ani akäs neto.
- 14Kumwoy kule, ‘Yiyintetap mpo kukonyo nye kukweyiñ sejet nket cömisyenyi oñnkikäs Mutworintenyi nyepo manta; oñnkilim neto kuñololuñ om kutinyi.
- 15Omnye meseyeku muncururwenyi nye mesemwoci pikap koret tokol ñalek ce kekäs oñnkilim nyi.
- 16Kunyo konye ne yawut? ðet yony lakwar kur kaynetap Mokoryontet oñnkikany cepatisaniñ cipukto miyotyonicuk.’
- 17“Aweckey ani aco Yerusalem, nteye kyomite osome om kotap Yiyintet, yoto akäs ñoñutyet,
- 18nye kyakäs Mokoryontet nye kimwowo kule, ‘Sorci lakwar, nomen wete Yerusalem, omnye puryo kot komuce piko kot kuyen ñalekwani ce mwowu nyi.’
- 19Owekyi omwoci kule, ‘Mokoryontet nkete cek tokol topon kule kyoweti ani korikapkok oñnkanäm oñnkopir piko tokol ce yeniñ nyi.
- 20Nto mpo pesyet nyo kicepoköce Stefano muncururweñuñ, kyomite ani yoto añnkacäm wule kicepakakta kume, oñnkorip siropak piko co kiporisyi.’
- 21Yoto kumwowo Mokoryontet kule, ‘Iwo, omnye mosoyoktiñ ani iwo wule mite lamek.’ ”
- 22Kusisio piko kulimnta ñalekap Paulo okoy kumwoy ñalecato, yoto kucec kupol koromun kumwoy kule, “Anate cico kuwete koret! Apakäc kume! Omnye puryo kot kurok kusop!”
- 23Kupol cek koromun kuwuse sirokwa oñnkuswortoy tejek kupa parak.
- 24Kumwoci nyewo nyepo sikarek pikyi kukwer Paulo kuwo kaytap sikarek orit, oñnkumwoci sikarek kupas neto sukuñet kutok omne sukupol Yutayek kutay neto kuyunyi.
- 25Ntene yu kowo cerat kule cepas, kumwoci Paulo nyewo ake nyepo sikarek nye kimite keyonje yoto kule, “Cömwok akwek ntarastinek kule apas cito nye kikwek Romin ye tompo kot cewosontyi om lelis nye kukwi?”
- 26Nteye kotolime nyewo nyoto ñalecato, kuwo wule mite nyewo oñnkutepe kumwoci kule, “Möce nyi kule ayiy ne? Omnye Romin cici!”
- 27Yoto kuwo nyewo wule mite Paulo oñnkutepe kule, “Mwowo ani, yiku nyi Romin!” Kuwec Paulo kumwoy kule, “Oyiku.”
- 28Kumwoy nyewo kule, “Kyanyoru ani soyiku Romin omnye kyayale pesan ce cañ.” Ntene kuwekyi Paulo kumwoci neto kule, “Ntene kiceyito ani.”



<sup>29</sup>Yoto pakenke kunata piko ce komöce kule cepas Paulo. Ntene kumuy nyewo nyepo sikarek yu kowo kulim kule Romin Paulo, kunyi kakacerate neto nyororonik.

<sup>30</sup>Ntowo kuyec koret, kumac nyewo nyepo sikarek kule oñknet ñalek cepo manta, ñolyo ne nye wosontyini Yutayek Paulo. Yoto kukur kumwoci tisik cewoyec oko kokwet tokol kutuyo, oñnkukwer Paulo cokuyoñe taymwacek.

## Kiyokik 23

<sup>1</sup>Kurotot Paulo topon piko ce kimate kokwet, oñnkunjalal kule, “Merekyo mpo yeya, kyopur ani nye topon koromun om mukuleymwani oko sponmwani om taytap Yiyintet kuceke keny okoy yawut pesyoni.”

<sup>2</sup>Yoto pakenke kumwoci tisintet nyewo Ananiya piko ce kimate ye kilekite Paulo kusyec neto kwarmatut.

<sup>3</sup>Kumwoci Paulo neto kule, “Mosukusyeciñ Yiyintet nyi totet nyi kiciyil kulelit! Mite nyi kepur yo wosontyo kuyu wule yunto ntarastinek, kunyi mite yec yirye ntarastinek mwocini piko kusyeca ani!”

<sup>4</sup>Kumwoci piko ce kimate keyoñe ye kilekite Paulo kule. “Kecup tisintet nyewo nyepo Yiyintet!”

<sup>5</sup>Kuwec Paulo kumwoy kule, “Mpo yeya, kopuryo kot oñknet kule neto ku tisintet nyewo, omnye mwowu silutekap Yiyintet kule, ‘Mente kot omwoci ñalek ce miyotet poytoyintetap pikuk.’ ”

<sup>6</sup>Ntowo konket Paulo kule piko ce kimate kokwet alak ku Satusayek nto alak ku Farasayek, yoto kuñalal kukurto om kutit nyewo kumwoy kule, “Merekyo mpo yeya! Oyiku ani Farasoyintet nye weritap Farasoyintet, kunyo amite ani cewosontyo om yu omnye acöme kokenotet kule mosukotutune met piko co kipok.”


<sup>7</sup>Yoto pakenke yu kowo kumwoy Paulo ñalecato, kucec kowokut kutintentyin Farasayek oko Satusayek okoy kupciykey piko ce kimate kokwet.

<sup>8</sup>Omnye kimwowu Satusayek kule puryo kot komuce kot kotutune met piko co kipok, oñnkumwoy yec kule puryo kot kimate malaykanik nto oyik. Ntene kucöme Farasayek kule mite tukucutecu tokol ku somok.

<sup>9</sup>Yoto kuñetñet kuwoyit polotet okoy kuyoñ konetikap ntarastinek cepo luketap Farasayek oñnkutinton kumwoy kutor kule, “Puryo kot cekösyi acek cici lelis nye miyat, pesyet ake nto kuñololyi muyet ake nto malayket neto.”

<sup>10</sup>Yoto kutosyikey tintenotet oko wokutyet okoy kumuy nyewo nyepo sikarek kule muce cekto kusor Paulo kusacasac. Kumwoci sikarek kupa kwenutap piko oñnkocut Paulo om swama kucone wule mite cek oñnkukwer kuwo kaytap sikarek orit.

<sup>11</sup>Nto om kwomowunoto, kuyoñe malayketap Mokoryontet komostap Paulo, oñnkumwoci kule. “Titir! Kuyu wulo keporu nyi mwowu ñalekwani om yuteyu po Yerusalem kunyo meseyiy mpo kuyunyoto om Rom.”



<sup>12</sup>Ntowo kuyec koret, koruruckey kutuyo wanak Yutayek oṅnkurwoc kuyiyta rurumut. Kuwalkey cek kumwoy kule, puryo kot kwomisiyi nto kuyesyo kiy ake tokol okoy ye kacepakäc Paulo.

<sup>13</sup>Kipuntoy ce keyitye artam piko tokol ce kikiyiytakey kule ceporisye.

<sup>14</sup>Kupa cek wule mite tisik cewoyec oko poyik oṅnkumwoci kule, “Kaciwalkey acek tokol koromun kule, puryo kot cecemcemi kiy tokol okoy ye kacepakäc Paulo.

<sup>15</sup>Kunyo oyokte akwek oko kokwet yawut ḡolyontet kuwo wule mite nyewo nyepo sikarekap Romek, sukuṅet kukwer Paulo kuco wule omite akwek, ayiytekey kuyu nye omöce kule cinket ḡalek cepo manta cepo musankunyi. Mosiceyiytekey acek om aran oṅnkyepakäc neto kutompo kot kupun wuloto.”

<sup>16</sup>Yoto kulim weritap cekwametitap Paulo ḡalek cepo rurumunoto. Kunomen nyo kuwo okoy kupunto kaytap sikarek orit oṅnkuwokumwoci Paulo.

<sup>17</sup>Kukur Paulo sikorintet akenke nyewo oṅnkumwoci kule, “Kwer pa nyi oyiperyontoni kuwo okoy wule mite nyewo nyepo sikarek, omnye ponto ḡolyontet nye möce kule amwoci neto.”

<sup>18</sup>Kukwer sikorintonoto oyiperyontonoto okoy kupunto wule mite nyewo nyepo sikarek oṅnkumwoci kule, “Kokuro mopusyontet Paulo oṅnkusomo kule akweru oyiperyontoni kuco wule mite nyi, omnye ponto ḡolyontet nye möce kumwowuḡ.”

<sup>19</sup>Yoto kunäm nyewo nyepo sikarek oyiperyontonoto yewut oṅnkukwer kuwo tapan, oṅnkutepe möt kule, “Ponte nyi ḡolyo ne nye möce kule amwowo ani.”

<sup>20</sup>Kumwoci kule “Kukurwoc oṅnkucömncin Yutayek kule cesomiḡ nyi pesyetap tun, seṅet kweru Paulo kuco kokwet kuyu nye möce kokwet kule cinket ḡalek cepo manta cepo musankunyi.

<sup>21</sup>Ntene mente kot ocömnci, omnye mite piko ce keytye artam ce mosukuyiytakey kurip kule cenäm neto. Omnye kukuwalkey picoto tokol kumwoy kule puryo kot kwome cek omit nto kuyesyo okoy ye kapakäc neto. Mite yawut kuyiytoykey kunyo konye pate ḡalek ce memwowu nyi.”

<sup>22</sup>Kumwoci nyewo nyepo sikarek oyiperyontonoto kule, “Mente kot omwoci citake kule kemwowo ani ḡalecu.” Oṅnkumwoci oyiperyontonoto kuwecikey.

<sup>23</sup>Yoto kukur nyewo nyepo sikarek alak cewoyec oyeny, oṅnkumwoci kule, “Akwey sikarek pokolwokik oyeny kupa Kaysariya, wanak oko sikarek cepo Farasinek tomonwokik tisap, oko cepo ḡotwek pokolwokik oyeny; aṅnkayiytekey kunomen pesyoni ye mite sawet somok nyepo komoy.

<sup>24</sup>Okoci Paulo Farasinek ce kowete, oṅnkokwer topon okoy kupunto wule mite poytoyintet Filekis.”

<sup>25</sup>Yoto kusil nyewo nyepo sikarek parwet nye kisil kule.

<sup>26</sup>“Ani nyo Klautiyo Lusua. Osupoyiḡ nyi poytoyintet nye Cekonyite Filekis.



<sup>27</sup>Kunam Yutayek cici okoy kurik kupakäc cekto neto. Yoto awo ani oko sikarek okoy wosoru onumune cek, omnye kyonyoru oṅnket kule kikwek neto Romin.

<sup>28</sup>Nteye kyomöce ani kule oṅnket lelisto nye wosontyini cekto neto, yoto okwer kuwo kokwemwacek.

<sup>29</sup>Ntene anyoru kule puryo lelis nye miyat nye kikwiyy nye roke cepakäce nto mpo ceroty mopusi. Dalek ce wosontyini cek neto kuce nömekey oko tintenotetap ntarastinekwa pate.

<sup>30</sup>Nto om letut cemwowo kule kakwiyya Yutayek rorumut kule cepakäc neto. Acäm ani kule okweru kuco wule mite nyi, oṅnkomwoci piko co wosontyini neto kukwa kwokumwoy om tayṅṅuyi ḡalek ce wosontyini cek neto.”

<sup>31</sup>Yoto kunäm sikarek Paulo oṅnkukwer kuyu wulo kacemwoci, kukwer cek neto kwomowunoto okoy kupunto Antipatri.

<sup>32</sup>Ntowo kuyec koret, kuweckey sikarek cepo kerenkok kuketkey kukwa kaytap sikarek, oṅnkupakakta sikarek cepo Farasinek kukwer Paulo.

<sup>33</sup>Yoto kukwer cek neto okoy kupunto Kaysariya, oṅnkukoci parwet poytoyintet oṅnkuporci Paulo.

<sup>34</sup>Kusuman poytoyintet parwet oṅnkutepe Paulo kule cepoytowuneniṅ kureryantet oṅnkono. Nteyu kowo kunket kule cone Silisiya,

<sup>35</sup>kumwoy kule, “Mosolimuy ani ḡalekuk ye kakwa piko co wosontyini nyi okoy kupun yu.” Yoto kumwayta ceripune Paulo kaytap Erote.

## **Kiyokik 24**

<sup>1</sup>Nto om letutap pesyosyek mut, kurekto Ananiya Tisintet nyewo kuwo Kaysariya wanak oko poyik alak oko Puritet nyepo ntarastinek nye cekure kaynenyi Tertulo. Koyonje cek taytap poytoyintet Filekis oṅnkumwoci ḡalek ce wosontyini Paulo.

<sup>2</sup>Yoto cekur Tertulo kuco. Kuyat nyo musankut kuḡalal kuwosontyi Paulo kumwoy kule, “Mokoryontet Filekis nye cekonyite! Om ḡomnonetap Poytoyisyeyuy kunye kukonec acek kalyet kuwany kenysiyek ce caṅ, kunyo mite ce weywece tukuk ce roko kyyi om toponiyetap korenyacek.

<sup>3</sup>Ceyerekyini acek ḡalecutecu tokol okokoy om wulyo tokol oko om pesyosyek tokol, oṅnkyikostiṅ acek nyi koromun.

<sup>4</sup>Puryo kot amöce kule awaḡeniṅ poroyinṅuy, kunyi osomiṅ om toponiyeyuy kule limwec acek ḡalekyacek cu ḡeri.

<sup>5</sup>Kucinket acek oṅnkyenyoru kule miyat cici koromun, neto nye wurure kutoytoy Yutayek om koret tokol, neto yec kunye kantoyintetap luketap citap Nasaret.

<sup>6</sup>Cenäm acek neto, ceyiyekey kule cewosontyi kuyu wule yunto ntarastinekyo,



- <sup>7</sup>Ntene kuonto pararet Lusia nyewo nyepo sikarek oŋnkuco kunumenenec acek oko om swama.
- <sup>8</sup>Yoto kumwoy Lusia kule roko kukwa piko co wosontyini neto wule mite nyi. Ye kekir nyi tepe cicitenyi, mesenket nkit kukwane wule mite neto ŋalek tokol cu cewosontyini acek.’’
- <sup>9</sup>Kuwasan Yutayek tokol kumwoy kule po manta ŋalekyoto tokol.
- <sup>10</sup>Yoto kuwus Poytoyintet kumwoci Paulo kuŋalal. Kucec Paulo kuŋalal kumwoy kule. “Oŋnket ani kule kweyiku nyi ketintetap pikap koroni kuwany kenysisyek ce caŋ, kunyo oŋlololi ani ŋalekwani oyetekey nye puryo kot oponte muyot.
- <sup>11</sup>Omnye mucu nyi nkit nket ŋalek cepo manta kule tompo kot kukeytya pesyosyek tamanu ok oyeny kuceke ye kyalaŋnte ani awo Yerusalem wasay.
- <sup>12</sup>Kipuryo kot kunyorwo Yutayek otitentyintosi oko citake tokol om kotap Yiyintet, nto kunyorwo mpo owururi piko om korikapkok, nto mpo om wulyo ake tokol om moŋet.
- <sup>13</sup>Kunyo puryo kot komuce cekto kot kumwowuŋ nyi mpo yawut pesyoni ŋalek cepo manta ce wosontyo ani cekto.
- <sup>14</sup>Ntene ocöme ani om konyekukyi kule osoye ani Yiyintetap mpo kukonyo omnye arupe aret nyelel nyo mwowu cek kule puryo kot kupo manta. Ntene oŋnkoyen ŋalek tokol ce silotin om ntarastinekap Moses oko ŋalek cepo kitapunekap workoyik.
- <sup>15</sup>Oponte mpo ani kokenotet om wule mite Yiyintet nye kerkey oko nyo cöme cek picutecu wosontyo ani, kule mosukotutune met piko tokol co kipok ce toponec oko ce miyotec.
- <sup>16</sup>Kunyo osyeme ani oyiyisye pesyosyek tokol kuyu wule yunto cekto; kule opurte moyet nye topon om wule mite Yiyintet oko wule mite piko tokol.
- <sup>17</sup>“Ntene om letut yu kowo awany kenysisyek ce caŋ nye kimomite Yerusalem, yoto awo ani osutyi pikap korenyu pesanik ce kikolye oŋnkokoyte korosek co cikoytoy.
- <sup>18</sup>Nteye kyomite oyiye ŋalecutecu kuye kinyorwo ani cekto amite kotap Yiyintet orit om letut yu kowowawany ayiy ntasimnyet nyo cipukte simnyontet. Kipuryo kot opontekey yoto piko ce caŋ, kipuryo mpo kot kumite yoto cukurotet.
- <sup>19</sup>Ntene kimite yoto Yutayek ce kikwone koretap poytoyisyetap Asia. Cekto picoto kuce keroke kumite yawut yuteyu po tayŋuŋyi kuwosontyo ani ye ponteno ŋolyo ake tokol.
- <sup>20</sup>Kunyo yaste kuŋalal kumwoy piko cu mite yu yawut lelis ne nye kinyorta cekto yo kyoyoŋe kokwet,
- <sup>21</sup>tos pate ŋolyontoni akenke nye kyokurte omwowu yo kyoyoŋe taymwacek kule, ‘Amite ani yu pesyoni, cewosontyo omnye ayeni kule mosukotutune met piko co kipok.’’’



<sup>22</sup>Yoto kuker Filekis kokwet omnye kinkete ñalekap piko co kikoyen, aņnkumwoci cek kule, “Mosamüt musankumwoņ ye kaco Lusua nyewo nyepo sikarek.”

<sup>23</sup>Kumwoci Filekis sikorintet nyewo kule ceripune Paulo mopusi, ntene kumwayta cikoci poroyinto nye yeme nye puryo kot cekerektoy coronutekyi makwa kwokwici neto tukuk ce möce.

<sup>24</sup>Om letutap pesyos ce ñeri, kuco Filekis oko korkenyi Trusila nye ki ceptap Yutayek. Yoto kumwayta cekwer Paulo kuco cokumwoci cek ñalek ce nöme koyenet om Kristo Yesu.

<sup>25</sup>Ntene yu kowo kutosyikey Paulo kuñalale ñalek cepo manta ce nöme toponiyet oko ripetapkey oko ñalek cepo pesyetap musankut nye mosukuco, yoto kumuy Filekis oņnkumwoy kule, “Kayem co pesyoni, wekany mosokuriņ ani pesyet ake ye oponte poroyinto.”

<sup>26</sup>Kisote Filekis om aret ake kule muce kukono Paulo pesanik ce kalena. Kuyuyit nyoto kukure neto Paulo om pesyosyek alak oņnkwokuñalal tukway.

<sup>27</sup>Ntowo kutil kenysiyek oyeny, kunam Porika Festo poytoyisyet kuker Filekis. Yoto kumac Filekis kule kucäma Yutayek, kupakakta Paulo kuratat om mopusi.

## Kiyokik 25

<sup>1</sup>Nteyu kowo kuwany Festo pesyosyek somok kuceke kopun koret nye kipoytoy, yoto kunomene Kaysariya kulaņta kuwo Yerusalem.

<sup>2</sup>Nteye kimite wuloto, kuwasan tisik cewoyec oko kantoyikap Yutayek kuwosontyi Paulo. Kusom cek Festo kule kucäm kukwer Paulo kuco Yerusalem.

<sup>3</sup>Omnye kikwiyy rurumut kule cenäm neto kuconi om aran oņnkypakäc.


<sup>4</sup>Kuwekyi Festo kumwoci cekto kule, “Ceripune Paulo mopusi om Kaysariya, kunyo mosonomen aweckey ani lakwar awo kaysariya;

<sup>5</sup>roke akwey akwek kantoyikwok cepetekey sukuņet wokuwosontyi ye kukwiyy lelis nye miyat.”

<sup>6</sup>Kopur Festo wanak oko cekto kuwany pesyosyek sisit nto taman, oņnkunomen kurekto kuwo Kaysariya. Ntowo kuyec koret, kopure neto ñeceretap kokwet nye cemute musankunek oņnkumwayta cekwer Paulo kuco kokwet.


<sup>7</sup>Nteyu kowo kuco Paulo; kuyon Yutayek ce kikwone Yerusalem komut neto, oņnkucec kuwosontyi kumwoy ñalek ce caņ ce nyikisec ce kipuryo kot komuce mpecek nkit kot kupor kule po manta ñalecato.

<sup>8</sup>Ntene kuñalal Paulo kuyetkey kumwoy kule, “Puryo kot ayiy ani lelis nye miyat nye yirye ntarastinekap Yutayek nto mpo nye nöme kotap Yiyintet, nto mpo kule kyawurte om wule mite Kinko Nyewo.”





- <sup>9</sup>Ntene omnye kimöce Festo kule kucäm Yutayek, yoto kutepe neto Paulo kumwoci kule. “Möce kule awo Yerusalem wocewosontyineniñ wuloto om taymwani?”
- <sup>10</sup>Kumwoy Paulo kule, “Amite ani yu kukoyoñe taytap ñeceretap kokwetap Kinko Nyewo nye cemute musankunek, wule roke cewosontyineno, kunyo puryo kot ayiy lelis nye miyat om wule mite Yutayek kuyu wulo kenket nyi nkit topon.
- <sup>11</sup>Ye kyoyiri ntarastinek, nto ye kyayiy lelis nye roke cepakäca, kupuryo kot osome kule osop. Ntene ye puryo kot kumite lelis nyepo manta nye wosontyo cekto, kupuryo ci nye muce kot kukoyito awo wule mite cekto. Kunyo ocururoni kule kuwo musankut wule mite Kinko Nyewo.”
- <sup>12</sup>Yoto kulolyin Festo oko kirwokikyiy cepo kokwet, ntowo kuwany; kuwekyi kumwoci Paulo kule, “Kesom nyi kule awo wule mite Kinko Nyewo, kunyo mosukutastakey musankuñuñ kuwo wule mite Kinko Nyewo.”
- <sup>13</sup>Nto om letutap pesyos ce ñeri; kukwa okoy kupun kaysariya Kinko Akripa oko Pernike kurutoci kwokusupay Festo.
- <sup>14</sup>Nteyu kowo kopur cek pesyos ce ñeri, kumwoci Festo Kinko Akripa musankutap Paulo kule, “Mite citake yuteyu nye kipokokyi Filekis mopusi;
- <sup>15</sup>nteye kyomite ani Yerusalem kuñalal kuwosontyi tisik cewoyec oko poyikap Yutayek kusomo kule omutyi neto musankut kulot.
- <sup>16</sup>Ntene omwoci ani cek kule, puryo kot kukopurtap Romek kukoyito ci tokol nye cewosontyini kutompo kot kuwosontyin oko piko co wosontyini neto; oñnkukoci poroyinto kuñalal kuyetkey om konyekwa.
- <sup>17</sup>Ntowo kukwa cek okoy kupun yuteyu, yoto monolilennkey ani awany mpo pesyo, nteye kipesyet nye koyekune opure ñeceretap kokwet nye cemute musankunek añnkamwayte cekwer neto kuco kokwet.
- <sup>18</sup>Yoto kuyoñ piko co kiwosontyini, ntene kipuryo kot kumwoy kupor lelis nye miyat nye kikwiy cici kuyu wule kyosotitoy ani kule mosukumwoy.
- <sup>19</sup>Dalek tokol ce kimwoy cek pate kuce po tintenotet nye ponto cek oko neto ce nöme ñalekap tinimwa oko cepo citake nye kime nye cekure Yesu nye mwowu Paulo kule sope.
- <sup>20</sup>Yoto kupotwo ani wule manyorte ñalek cepo manta om ñalecu. Atepe Paulo ye möce kule awo Yerusalem wocewosontyine wuloto musankunyi.
- <sup>21</sup>Ntene kutasta kucururan Paulo musankut, oñnkusom cerip okoy kumüt Kinko Nyewo musankunyi. Yoto amwayte cerip neto okoy okoyite kuwo wule mite Kinko Nyewo.”
- <sup>22</sup>Kumwoci Akripa Festo kule, “Amöce mpo ani kule alim ñalekap cicitenyi.” Kumwoy Festo kule, “Meselim ñalekyi tun.”



<sup>23</sup>Ntowo kuyec koret kukwa kotap kokwet Akripa oko Pernike om woyinto oko koyweyisyet, kupontonukey cewoyec cepo sikarekap poryet oko kantoyik cewoyec cepo moŋet. Yoto kumwayta Festo cekwer Paulo kuco kokwet.

<sup>24</sup>Kuŋalal Festo kumwoy kule, “Kinko Akripa, oko akwek piko tokol cu cepontekey: Akäs pa akwek cici, nye kiwosontyi Yutayek tokol om wule amite ani om Yerusalem oko yuteyu ce mite. Kipol kumwoy kule puryo kot kuroke tokusop mpo kisic.

<sup>25</sup>Ntene puryo kot anyoru ani aŋŋket kule kikwiyl lelis nye miyat nye roke cepakäce. Ntene omnye kitasta kucururan musankut nkit kuwo wule mite Kinko Nyewo, acäm ani kule okoyite kuwo wule mite Kinko Nyewo.

<sup>26</sup>Ntene puryo kot oponte ani ŋolyontet nyepo manta nye mosilyi Kinko Nyewo. Kunyo kokweru kuco yu po taymwakwek, ntene kupëlis om tayŋuŋyi Kinko Akripa! Sukuŋet ye kacenay acek okoy cenyoru ŋalek cepo manta cepo musankunyi, anyoru mpo ani ŋolyontet nye mosil.

<sup>27</sup>Omnye porukey om wule amite ani kule puryo kot ku ŋolyo nyepo ŋomnon akoyite ani mopusy kupuryo kot kopunto ŋalek cepo manta cepo musankut nye cewosontyini.”

## Kiyokik 26

<sup>1</sup>Kumwoci Akripa Paulo kule, “Kacecömuŋ ŋalal ŋalekuk yetkey.” Yoto koyito Paulo yewunyi oŋŋkuŋalal kuyetkey kumwoy kule:

<sup>2</sup>“Kinko Akripa! Kakäs kule oponte ani kupeyoy pesyoni aŋalal ŋalek ce oyetekey om tayŋuŋyi om ŋalek tokol ce wosontyo ani Yutayek.

<sup>3</sup>Omnye nketi nyi nkit topon koromun kopurwek tokol oko ŋalekap tintenotetap Yutayek. Kunyo osomiŋ kule muytoci oŋŋkilimwo ŋalek topon.

<sup>4</sup>“Nkete cek Yutayek tokol wule kyopurtoy ani kuceke oyiku lekwa. Nkete kule kyopurune ani om saponmwani tokol wuli po korenyacek oko Yerusalem.

<sup>5</sup>Kikonket kuloyit ye möce kule citoru, kule oyiku ani Farasoyintet nyepo luketap piko cepo tininyo nye ceripekey koromun.

<sup>6</sup>Kunyo amite ani koyoŋe yu pesyoni cewosontyo omnye okonye kokenotet nye kikurtoci Yiyintet mpo kukonyo.

<sup>7</sup>Kurtoyot nyoto kunye mite kukonye kule mosicenyoru orustunwek co taman ok oyeny cepo pikyacek ye mite cekto kusoye Yiyintet komoy oko pet, ntene omwowuŋ ani nyi kinko nye cekonyite kule om kokenisyoni kunye cewosontyineno ani Yutayek.

<sup>8</sup>Kinko! Omne sukuwuyityok akwek Yutayek ye moyen kule muce Yiyintet koŋet kotutune met piko ce kipok?

<sup>9</sup>“Ani nkit nye kyosyeme koromun ikye kule yisyemwani ayiy kiy ake tokol nye amuci okoy opot kaynetap Yesu nyepo Nasaret.




- <sup>10</sup>Kyayiy kuyunyoto om Yerusalem. Ani mpo nye kyorotyini mopusi pikap Yiyintet ce tililec ce caŋ om kamukeywek ce kikonu tisik cewoyec. Nteye kicemutyini cekto musankut kule cepakäc, kyocöme ani oporci kirot kule cepakäc.
- <sup>11</sup>Kyotoŋonyi okokoy om korikapkok tokol, osyeme kule sukuŋet kutay cek koyenemwa. Onyerci cek koromun okoy onomen awo mpo okoy apunte moŋosyekap lamek wanäm aŋnkataŋany cekto.
- <sup>12</sup>“Yoto om ŋolyontonitenyi, onomen ani awo Tamasko oponte kamukeywek oko woyinto nye kikono tisik cewoyec.
- <sup>13</sup>Komwowuŋ ani Kinko nye cekonyite kule, nteye kyomite yoto oweti om aran ye kimite asista pet kwen, yoto akäs ani lakweyet nye kicone parak nye kiluw kupël lakweyetap asista oŋnkukweny komutwo ani oko piko ce kicepontekey.
- <sup>14</sup>Ciputyi acek tokol ŋony, yoto alim ani kutit nye kiŋalal kumwowo om ŋelyeptap Puraniyek kule, ‘Saulo! Saulo! Omne setaŋanya ani nyi? Korom koromun ye meyamnkey kosur.’
- <sup>15</sup>Yoto atepe ani kule, ‘Mokoryontet, nyi ŋo?’ Kumwowo Mokoryontet kule, ‘Ani nyo Yesu nyo toŋonyi nyi.
- <sup>16</sup>Ntene ŋete ŋony, omnye koporunkey ani saŋet akweyiŋ yiku kiyokintet oko muncururwemwani nye meseporci piko alak ŋalek ce kekäs nyi pesyoni om wule amite ani, oko ŋalek ce mosoporun ani nyi om pesyosyek ce mite tay.
- <sup>17</sup>Mososoruŋ ani nyi om wule mite pikap Israel oko wule mite lamek; wuloto ku wule mosoyoktiŋ ani,
- <sup>18</sup>siweŋany konyekwa oŋnkiwec kukwane menonet sukunyor lakweyet; oŋnkukwane wule mite swametap poytoyisyetap oyinot, oŋnkuwekyikey wule mite Yiyintet, sukuŋet kunyor koyenet kupunte wule amite ani oŋnkyikalya cekto miyotyoni kwa, oŋnkunyor otepto om wule mite pikap Yiyintet ce kweyotin.’ ”
- <sup>19</sup>“Kunyo Kinko Akripa, kipuryo kot amuci ani atay molimnci ŋoŋutyet nye kyonyoru kucone torot.
- <sup>20</sup>Ntene kyanyosye oporci ŋalek pikap Tamasko oko cepo Yerusalem, nto okeri pikap koretap Yuteya tokol wanak oko lamek, omwoci kule misyini kurenynkey cekto oŋnkuwekyikey wule mite Yiyintet oŋnkwiŋ tukuk ce poru kule karenynkey cekto.
- <sup>21</sup>Om ŋalecutecu ye sukuŋet Yutayek kunäma ye kyomite kotap Yiyintet oŋnkusyem kule cepakäca.
- <sup>22</sup>Ntene okoy pesyoni; kyonyoru kakalyayet nye cone wule mite Yiyintet. Kunyo amite ani koyoŋe yu omwocini ŋalek ce kyakäs piko tokol cewoyec oko ce minkec, nye puryo kot omwowu alak; ntene omwowu pate ŋalek ce kimwoy workoyik oko Moses kule mosukwi yokis.
- <sup>23</sup>Coto kuce mwowu kule mosukutaŋany Dapanet oŋnkwek cito akenke nye kunyosyo kotutune met, oŋnkwek nye mosukoporci lakweyet Yutayek oko lamek.’ ”



- <sup>24</sup>Nteye kimite Paulo kuḅolole kuyetekey kuyunyoto, yoto kupol Festo kukurto om kuti nyewo kumwoy kule, “Paulo! Kopunuḅ met! Kukowurtiḅ nyi sumanet nyewo met!”
- <sup>25</sup>Kumwoy Paulo kule, “Mokoryontet nye cekonyite, puryo kot kupunwo met, oḅololi ḅalek ce toponec ce toloyec cepo manta.
- <sup>26</sup>Kinko Akripa oḅololuḅ ḅalecutecu oponte nyikanatet tokol, omnye nketi nyi ḅalecutecu tokol. Kunyo oḅnket kupoyit manta kule kenket mpenyi ḅolyo ake tokol om ḅalecutecu omnye kipuryo kot kyiye ḅalecutecu wule wuḅat mpo kisic.
- <sup>27</sup>Kinko Akripa, yeni nyi ḅalekap workoyik? Oḅnketi ani kule yeni nyi.”
- <sup>28</sup>Kumwoci Akripa Paulo kule, “Soti nyi kule mucu kot aweca ani oyiku Kristoyin om ḅalek ce keḅalale poroyini nwac pate?” Kuwec Paulo kumwoy kule,
- <sup>29</sup>“Nka kot nto om poroyinto nye nwac nto nye koy, ntene osome wule mite Yiyintet kule, puryo kot kwinyi nkit pate, ntene wanak oko akwek piko tokol cu lime ḅalekwani pesyoni ce roke cekto kukerkeyitu oko ani, tos pate nyororonicu aponte!”
- <sup>30</sup>Yoto kuḅet kinko oko poytoyintet Festo oko Pernike oko piko ce kimite kokwet.
- <sup>31</sup>Nteyu kowo kupa tapan, kuḅalal kwicek nkit kumwoy kule, “Puryo kot kwiy cici lelis nye roke cepakäc nto mpo ceroty mopusi.”
- <sup>32</sup>Kumwoci Akripa Festo kule. “Kocimuce cityakta cici kuwecikey ntomo nye kucururan kutasta musankut kuwo wule mite Kinko Nyewo.”

## Kiyokik 27

- <sup>1</sup>Nteyu kowo kecäm kule roke celany acek rapet cepete okoy Italia. Yoto cikoyto Paulo oko mopusinek alak cikoci Yuliyo nyewo nyepo sikarekap luketap Romek ce cekure sikarekap Kinko Nyewo.
- <sup>2</sup>Yoto celany acek rapet nye kicone Atramito nye kirikik kunomen kuwo kupunte moḅosyek ce mite tapantap ruretyet om koretap poytoyisyetap Asia. Cenomen cepete rapet. Kicepontotikey acek yoto Aristariko citap Maketoniya nye cone Sesolonika.
- <sup>3</sup>Nto ye pesyetap oyeny cepunte Siton. Kicöme Yuliyo Paulo, yoto kucömncini kuwo wokukäs coronutekyi oḅnkyikoci kiy ake tokol nye kimöce.
- <sup>4</sup>Cenomene wuloto celany rapet cipe cerup ruretyet tapan cekerektekey Kupro nye koret nye kikwen peko omnye kiwuse yomet ye kicone tay.
- <sup>5</sup>Yoto cipe kyay ruretyet ye lekite Silisiya oko Pampiliya okoy cepunte Mura moḅetap Lukiya.
- <sup>6</sup>Kunyor nyewo nyepo sikarek om yoto rapet nye kicone Alekisantaria nye kikirik kunomen kuwo Italia, kulanyec acek rapanato.



- <sup>7</sup>Cenomene wuloto cipe möt ciwany pesyos ce cañ om wuyinto nyewo okoy cepunte Kunito moñet nye mite ruretyet tapan. Yoto kucis yomet yemo cipe tay. Cerekte cerup tapantap koretap Kurete nye kikwen peko nye tokyintos oko Salmone.
- <sup>8</sup>Cipe möt om wuyinto cerup ruretyet tapan tapan okoy cepunte ye cekure loyta nye topon. Kilekite yoto moñetap Laseya.
- <sup>9</sup>Cipur wuloto ciwany pesyos ce cañ okoy kukoromit kucis ye mocetosyikey cipe poninekap ruretyet, omnye kikikeyta pesyet nyo cekure, “Cekire Omik.” Yoto kumwoci Paulo cekto ñomnononi kule,
- <sup>10</sup>“Merekyo, kakäs ani kule miyat pantap ruretyet, kuceke yuteyu, omnye mosukuwuryo tukuk ce mite rapet oko mpo rapet oñnkupotyso sponwekap piko.”
- <sup>11</sup>Ntene kucäm nyewo nyepo sikarek ñalekap cito nye poytoy rapet oko citap rapet kupël ñalek ce kimwoy Paulo.
- <sup>12</sup>Kipuryo kot kutopon ruretyet yoto nye kimuce kot cipur okoy ciwany pesyosyekap koyitityet tokol. Yoto kucäm piko ce cañ kule roke cenomen cesyem kyay ruretyet okoy cepunte Foyinike ye kemukakay, sukuñet cekto wokukerektekey loytop ruretyet om koretap Kurete, nyoto ku Loyta nye mite ruretyet tapan nye tokyinikey kwenutap tö oko rarakatay, oko kwenutap makentany oko rarakatay wule kimuce cek wokopur kuwany pesyosyekap koyitityet om wuloto.
- <sup>13</sup>Yoto kucec kuwus yomet nye kisic nye cone tö, kusot piko kule konyol kacenyoru kito nye kocemöce. Kunum cek kito nyo ciyoñnte rapet oñnkupa kurup kulekityi koretap Kurete tapan tapan.
- <sup>14</sup>Ntene yoto pakenke nye mnoloyit, kuwus yomet nyewo nye cekure, “Yometap kwenutap makentany oko koñasis” nye kicone koret.
- <sup>15</sup>Kuket kuyoñnto rapet okoy kucis ye mocipe cetokyikey yomet, yoto kyaste kusutec.
- <sup>16</sup>Cipe okoy wocekerektekey tapantap koret om komostap tö nyepo koret kisic nye kikwen peko nye cekure Kawuta. Cesyem om wuyinto nyewo koromun okoy ciyoñnte rapet nye miniñ.
- <sup>17</sup>Nteyu kowo kuloñune cek rapet nye miniñ, kunäm porok co cikolye oñnkurate komut rapet nyewo; omnye kikimuyo kule muce cek kupa kot wokuryac ñaynet om tapantap koretap Lipiya. Yoto kurek cek siret nyo sute rapet oñnkwasta kusut yomet rapet.
- <sup>18</sup>Kutosyikey kuwus yomet nyewo koromun, nto om pesyetap oyeny, kucec cek kunum terekok ce kimite rapet oñnkuwirici peko.
- <sup>19</sup>Nto om pesyet nye kirupe, kunum cek tukuk ce kiciyisye om rapet om yewuniyekwa oñnkuwirici peko.
- <sup>20</sup>Ciwany pesyosyek ce cañ nye kipuryo kot ceköse asista nto mpo kokelik. Kutosyikey kuwus yomet nyewo koromun okoy cisot kule komocesoptosi.



<sup>21</sup>Nteyu kowo kopur piko kuwany pesyosyek ce caŋ nye puryo kot kwome omit, yoto kuyone Paulo yepo taymwa oŋnkuŋalal kumwoy kule, “Merekyo, kiroke olimwo ani akwek nto kipuryo kot cenomen cekwane koretap Kurete, nto puryo kot cenyoru miyotyoko potyet nyeyunyi.

<sup>22</sup>Kunyo osomok akwek kule, otitir! Akwil mukuleywekwok omnye komo kume ci mpo akenke om akwek, rapet pate nye mosukwaran.

<sup>23</sup>Omnye kucontyo ani laŋat komoy Malayketap Yiyintemwani nyo osoye oŋnkuco kuyone ye amite,

<sup>24</sup>oŋnkumwowo kule, ‘Paulo, mente omuy! Mesewo okoy weyone taytap Kinko Nyewo. Kunyo kās pa kakoniŋ nyi Yiyintet om toponiyenyi saponwekap piko tokol cu opontekey om rapet.’

<sup>25</sup>Kunyo, merekyo otitir! Omnye Oyeni okenekey ani Yiyintet, kunyo mosukwiyyaŋalek cepo manta kuyu wule kucemwoytowo.

<sup>26</sup>Ntene mosukusutec yomet okoy cepunte koret ake nye kikwen peko.’”

<sup>27</sup>Nteye kipesyetap kwomowutap taman oko amwan kumite kusutec yomet kutokyec wulin oko wuli om ruretyetap Metiterenian. Ntowo kupunto komoy kwen om pesyoto kusow kunket piko co sute rapet kule yunye kacerikte cepunte koret.

<sup>28</sup>Yoto kurate rwantet porowet oŋnkukoyito kuwo peko orit kuyoyec, ntowo ciyoyec cekās kule mite peko koyinto nyepo kokwoyutek artam kuwo ŋony. Cipe kuminiŋ, ciyoyec, nteye pere cekās cekās kule mite peko koyinto nyepo kokwoyutek sosom kuwo ŋony.

<sup>29</sup>Yoto kumuyo piko ce sute rapet kule muce kuwo rapenyacek kot wokuryac rwontokap ruretyetapan. Kukoyito cek karik amwan co ciyone rapet let, oŋnkusom kule kuyec koret pate.

<sup>30</sup>Kusyem piko co sute rapet kule cemwey cewuŋatekey, kunām cek rapet nye miniŋ aŋnkukoyito kuwo peko orit kwiyiytakey nye yunye möce kule wocetosyi cikoci rapet tay karik co ciyone.

<sup>31</sup>Kumwoci Paulo nyewo nyepo sikarek kule, “Ye puryo kot kopur orit piko co sute rapet, kupuryo kot omuci akwek kot osopce mpo akanke.’”

<sup>32</sup>Yoto kumüt sikarek porok ce nöme rapet ye miniŋ oŋnkwasta kuwo peko orit.

<sup>33</sup>Ntowo kurik kuyec koret, kusom Paulo piko tokol kwomis omik kumwoci kule, “Pesyoniyi kuye pesyetap taman ok amwan omite akwek okoniŋyisi osoti pate nye moyome kiy mpo kisic.

<sup>34</sup>Kunyo osomok akwek kule oyomisye, omnye möce saponwekwok omik ye sosopce. Omnye komokupote putyontetap metitap ci ake tokol om akwek.’”

<sup>35</sup>Nteyu kowo kuwany neto kumwoy ŋalecato kunam mukatyantet oŋnkusomnci kukasta Yiyintet om taytap piko tokol, oŋnkupetec kwam.





<sup>36</sup>Yoto kutitir ci tokol, oṅkwomis omik.

<sup>37</sup>Kicemite acek piko tokol rapet orit ce kicepuntoy pokolwokik oyeny ok tomonwokik tisap ok lö.

<sup>38</sup>Nteyu kowo kwomis piko tokol okoy kupiyon kunäm cekto nkanuk ce kimite rapet orit oṅkuwirici ruretyet sukuṅet kukuskusit rapet.

<sup>39</sup>Ntowo kuyec koret, kipuryo kot konket piko co sute rapet kule koret oṅnkono tapantap koronoto. Ntene kukäs cekto loytap ruretyet ye kimite ṅaynet, kusot kule ye kemukakay komuce kusut rapet okoy kupunto yoto.

<sup>40</sup>Yoto kumüt porok co kacerate karik co yoṅntoy rapet oṅnkupokoky karik peko orit, oṅnkutyac porok co rote nkwyatet nyo cesute rapet oṅnkuyonṅto siret nyepo rapet tay kutokyikey yomet sukuṅet kusut yomet rapet kuwo ruretyet tapan.

<sup>41</sup>Ntene kuwo rapet okoy kuryac tulwetap ṅaynet nye mite peko orit, kunam rapet wule po tay ṅaynet nye puryo kot kutwoyekey oṅnkumite kolucluce kupetece yomet rapet wulo po let om swama.

<sup>42</sup>Yoto kurwoc sikarek kule roke cepakäc mopusinek tokol sukuṅet mente kot kupir peko mpo akenke kway okoy kupunto koret oṅnkumwey kupecikey.

<sup>43</sup>Ntene kimöce nyewo nyepo sikarek kule osoru kusop Paulo, yoto kuyete neto sikarek mokwiy kito nye kimöce kule ceyiy. Kumwoci nyewo nyepo sikarek piko tokol ce kimuce kupir peko; kunyosyo kurane rapet oṅnkupir peko kupa okoy ruretyet tapan.

<sup>44</sup>Nto piko co koṅet, kupa co kupir peko kunämat pawunekap rapet co kokwilyo. Kuyuyit nyoto wule kicepete acek okoy cepunte koret tapan oṅnkyesopce piko tokol.

## **Kiyokik 28**

<sup>1</sup>Nteyu kowo cesopce cepunte piko tokol koret tapan, yoto cinket kule cekure koronoto kikwen peko Malta.

<sup>2</sup>Kuṅerekyec acek pikap koronoto kwek coronut. Kulowec mata oṅnkukonec ceyuy omnye kikicec kuropen ropta oṅnkukayitit.

<sup>3</sup>Koruruc Paulo siririk oṅnkukoci mata, yoto kucone erenet nye kowon mata oṅnkumwolmwolcikey yewunyi.

<sup>4</sup>Nteye kotoköse pikap koronoto erenet nye kesikinine yewutap Paulo, kuṅalal nkit kumwoy kule, “Porukey kule porin cici, ntene komo kusope nyun yawut, nka kot kokosope neto ruretyet.”

<sup>5</sup>Ntene kulelec Paulo erenet kulelekyi mata nye puryo kot kwiye neto kiy mpo kisic.

<sup>6</sup>Kukany picoto kule kukwa yewutap Paulo nto kule kumilcikey ṅony kume. Nteyu kowo kukany cek kuloyit nye puryo kot kukäs kiy nye keyakay om wule mite Paulo; kuwec kasoteywekwa kumwoy kule, “Yiyintet cici!”



- <sup>7</sup>Kimite ye kulekite yoto mparenikap cito nyewo nyepo koronoto kikwen peko, nye kicekure kaynenyi Pupliyo. Kuṅerekyec acek cicoto kukwerec cipe kanyi wociku toyekyi oṅnkupayec topon kuwany pesyosyek somok.
- <sup>8</sup>Kimite yoto kwanitap Pupliyo kukoru kwiriri nye kimnyone yeset oṅnkuyitoy korotik. Yoto kuwo Paulo koto nye kirwe oṅnkusomnci kukemer yewuniyekyi kusop yoto.
- <sup>9</sup>Nteyu kowo kwiyakay ṅolyontonoto, yoto kukwa pikap koronoto tokol ce kimnyontos kwocisop tokol kusopco.
- <sup>10</sup>Kukonec acek pikap koronoto kokotutek ce caṅ, nteye kicenomeni kukoci cek rapet tukuk tokol ce kicemöce acek om poninekyo.
- <sup>11</sup>Nto om letut yu kowo cipur acek ciwany orok somok, celany rapet nye kicone Alekisantaria nye cekure, “Yiyik ce sorom.” Nye kikiyoṅe koronoto kikwen peko kuwany pesyosyekap koyitityet.
- <sup>12</sup>Cipe okoy cepunte moṅetap Sirakusa wule kicipur ciwany pesyosyek somok.
- <sup>13</sup>Cenomene wuloto om rapet cipe cimutu okoy cepunte moṅetap Rechio. Ntowo kutil pesyet akenke, yoto kuwus yomet nyewo nye cone tö, cipe ciwany pesyosyek oyeny cepunte moṅetap Poteyoli nye mite ruretyet tapan.
- <sup>14</sup>Cenyorte wuloto mpo yeya alak ce kikoyen ce kismec acek kule cipur oko cekto kuwany pesyosyek tisap. Yoto cipe okoy cepunte Rom.
- <sup>15</sup>Kulim mpo yeya piko co kikoyen ce kimite Rom kule kacekwa acek, yoto kukwa kutorokwec okoy kwokunyorcec moṅetap Apiyo oko Korikap toyek somok. Nteye kotoköse Paulo cekto, kukasta Yiyintet oṅnkutosyikey kutitir kunyor swamet.
- <sup>16</sup>Nteyu kowo cepunte Rom, cecömnci Paulo kopur nkit oko sikorintet akenke nye kiripe neto.
- <sup>17</sup>Ntowo ciwany pesyosyek somok, kukur Paulo kukwa kuyomokey kantoyikap Yutayek cepo wuloto, nteyu kowo koruruckey cekto, kuṅalal Paulo kumwoci kule, “Merekyo mpo yeya! Nka kot kipuryo kot ayiy ani lelis nye miyat om wule mite pikyacek, nto awurte kapurto nyo kikonec acek mpo kukonyo. Kicenäma ani cerata oyiku mopusyo om Yerusalem oṅnkyikoyito awo wule mite Romek.
- <sup>18</sup>Kukiro co okoy kumac kule cityakta omnye kipuryo kot kunyor cek kule kyayiy ani lelis nye miyat nye roke cepakäcena.
- <sup>19</sup>Yoto ntowo kutoyis Yutayek, kusutyo ani acururan ataste musankut kuco wule mite Kinko Nyewo nye puryo kot ku kule oponte ani musanku nye amöce kule owosontyi pikwani.
- <sup>20</sup>Kunyo saṅet osomok kule akäsak oṅnkyeṅalal oko akwek, omnye oyiku ani ratat porowoni oponte omnye ocome kokenotetap pikap Israel.”



<sup>21</sup>Kumwoci cekto Paulo kule, “Tompo kot cenyoru acek parwet nye cone Yuteya nyepo ñalek ce nömiñ nyi, tompo mpo kot kuco okoy kupun wuli cemite acek yeya mpo akenke nye kucokumwoy nto kuñalale ñalek ce miyotec ce nömiñ nyi.

<sup>22</sup>Ntene cemöce acek kule celim kasoteywekukyi om ñalek ce nöme Lukonitenyi. Omnye kucinket acek kule ñolole piko kwapi Lukonitenyi mite nyi om wulyo tokol.’”

<sup>23</sup>Yoto kukwey cek oko Paulo pesyet nye mokutuyo yec. Ntowo kupunto pesyonoto, kukwa Yutayek ce cañ koyoto kipurune Paulo. Kucec Paulo kuñololyi cek kuceke korrone okoy kutuyit koret. Kuñalal kutetyi cek lokoywek cepo poytoyisyetap Yiyintet kusyem kule anet cek kuyen Yesu, oñnkuporci wule yunto ñalek om ntarastinekap Moses oko silutekap workoyik.

<sup>24</sup>Kuyen alake ñalekap Paulo ntene kutoyis alake.

<sup>25</sup>Yoto kunomen kupa kukotoytocin kwicek nkit, om letut yu kowo kumwoci Paulo cekto ñolyontoni akenke kule, “Kiñalal Muyet Nyetilil topon kumwoci mpo kukonyo kupunune wule mite workoyontet Isaya!

<sup>26</sup>Omnye kimwoy kule, ‘Iwo wule mite picu wemwoci kule: mosolimnte oñnkolimnte, ntene oñnkupuryo kot olime, mosakäste, ntene oñnkupuryo kot oñnketi;

<sup>27</sup>omnye koliliyotin kasoteywekap picu; kiker yitikwa, kunyo kikomis konyekwa. Nto kukostoy konyekwa, nto kulimntoy yitikwa, nto kwemuçe kunket kasoteywekwa, nto kwemuçe kuweckey kukwa wule amite ani, kimwoy Yiyintet kuyunyoto, Sañet ani asop cekto kusopco.’ ”

<sup>28</sup>Kutosyikey Paulo kumwoy kule, “Kunyo möce oñnket akwek kule kucesytyi lamek lokoywek cepo kosopetap Yiyintet. Mosukulim cekto!’”

<sup>29</sup>[Nto om letut yu kowo kuwany Paulo kumwoy ñalecato, kunomen Yutayek kupa kutintenoti koromun cekto kwicek nkit.]

<sup>30</sup>Kopur Paulo kumiñis wuloto kuwany kenysisyek oyeny, kuminye koto nye kikwole kukoyitoy pesanik, oñnkutoroce piko tokol ce kikwoni kwokuköse neto.

<sup>31</sup>Yoto kumwoytoy ñalek cepo poytoyisyetap Yiyintet, oñnkunetis kumwoy ñalek cepo manta ce nöme Mokoryontet Yesu Kristo. Kiñolole om nyikanat kutok nye puryo ci nye kikerektoy neto.



## Romek

### Romek 1

- <sup>1</sup>Cone parwani wule amite ani Paulo mutworintetap Yesu Kristo, nye Kiyokontet nye kikwey oṅnkukur Yiyintet sukuṅet kumwaytat lokoywekyi ce toponec.
- <sup>2</sup>Lokoywek ce toponec coto kuce kikurto Yiyintet kenye kupunune wule mite workoyiky oṅnkysesil om silutekap Yiyintet ce tililec.
- <sup>3</sup>Dalecato kuce nöme Werinyi Yesu Kristo nye kiceyi kuyu cito kucone keseniyantetap Tauti.
- <sup>4</sup>Ntene kicipor om swamet nyepo Muyet Nyetilil kule neto kunye Weritap Yiyintet; omnye kitutune met. Nyoto ku Yesu Kristo Mokoryontenyö.
- <sup>5</sup>Kikono ani Yiyintet kupunte wule mite Yesu om kupeyok ce kicekono oyiku kiyokintet kupo Kristo saṅet antoci piko cepo yemosyek tokol kuyen oṅnkuyweyis.
- <sup>6</sup>Picoto ku mpo akwek piko co mite Rom co kicekurok opoyitu Kristo.
- <sup>7</sup>Kunyo akwek piko tokol ce mite Rom, ce cöme Yiyintet oṅnkukur cekto kwek pikyi ce tililec, akante kukonok Yiyintet Papanyo oko Mokoryontet Yesu Kristo poypoyet oko kalyet.
- <sup>8</sup>Anyosyi ani akaste Yiyintenyu kupunte wule mite Yesu Kristo om wule omite akwek tokol, omnye mite kulime piko cepo koret tokol koyenet nye oponte akwek om wule mite neto.
- <sup>9</sup>Nkete Yiyintet kule osomwok ani okokoy ye omwoytoti lokoywekyi ce toponec cepo Werinyi.
- <sup>10</sup>Osome Yiyintet om cömisyenyi kule roke komukakay yawut saṅet orutocok ani.
- <sup>11</sup>Omnye amöce koromun kule akäsak akwek sukuṅet akwilak onyöru swamet.
- <sup>12</sup>Ntene kupëlis mosicikalyekey acek tokol yoto, kukalyak akwek koyenet nyimwani aṅnkukalya ani koyenet nyimwakwek.
- <sup>13</sup>Mpo yeya, amöce ani kule oṅnket kule kwasyem aret ce caṅ kule aco wule omite, ntene kukerekta kito ake ye mayiy kuyunyoto. Amöce kule cakäs yisyönutek ce tililec om wule omite akwek kuyu wulo yunto om wule mite lamek.
- <sup>14</sup>Omnye oponte ani oyici yisyet Kirikik oko mpo piko ce lamek, piko ce ḡomec oko ce perper.
- <sup>15</sup>Kunyo amöce koromun kule omwowok akwek piko co mite Rom lokoywek ce toponec.
- <sup>16</sup>Omnye akenekey ani owoṅnkyi lokoywek ce toponec, swametap Yiyintet kunye sope piko tokol ce kikoyen, nyosye kunyo Yutayek oko lamek.



- <sup>17</sup>Omnye poru lokoywek ce toponec wule muce kusatitakey kunyol piko om wule mite Yiyintet. Punte coto koyenet pate kuceke tayta okoy letut. Kuyu wule mwowu silutekap Yiyintet kule, “Mosukusop cito nyetilil om koyenet nye ponto.”
- <sup>18</sup>Ciporu nyerunotet nyepo Yiyintet kucone torot kucontyini piko ce miyotec oko ce ponto mwiynanet, picoto kuce kerektoy ñalek cepo manta.
- <sup>19</sup>Toku topon wule yunto Yiyintet, omnye Yiyintet nkit nye poru tukucoto.
- <sup>20</sup>Kuceke ye kitany Yiyintet koret, kicipor kutok topon tukukyi ce motoku, coto ku swamet nyenyi oko kamukeywekyi, kunyo porukey neto om tukuk ce kicitany, puryo kot komuce cekto kot kutuckey mpo kisic.
- <sup>21</sup>Kikonket cekto Yiyintet, ntene kipuryo kot kuyweye cekto neto kuyu wule cemokyini nto mpo kokasta. Ntene kimo kuponto kasoteywek cikwa ñomnon mpo kisic, pesetote menonet pate.
- <sup>22</sup>Sutekey cekto kule ciku ñomec ntene solontoy pate.
- <sup>23</sup>Ye kotosoye Yiyintet nye mopoku, kuweckey yec kusay tukuk ce poku kuyu ci nye poku, nto kukerkeyitu toritek nto tyonjik nto erenoy.
- <sup>24</sup>Kunyo kikwasta Yiyintet kwiy cekto tukuk ce somis ce corokyini mukuleywek cikwa, yiye cek kwicek nkit ñalek cepo kalilan.
- <sup>25</sup>Wece ñalekap Yiyintet cepo manta kwek mwiynanet oñnkusay tyonjin ce kicitonye ye kotosoye Yiyintet nye cikostoy okokoy okoy okokoy. Yunyoto.
- <sup>26</sup>Omnye yiye piko tukuk ce yucu! Kwasta Yiyintet cekto wokwiy ñalek cepo kalilan. Kutay koruk moyiyisye topon porwonik cikwa om aret nye topon, ntene kwicininkey cek kwicek nkit sakwayanat.
- <sup>27</sup>Kunyo mpo moronik kwasta co ye mokopurcin oko korukwa oñnkwicin cek kwicek nkit sakwayanatet, mokunyor cekto toñoñutek ce yeme om ñalek ce miyotec ceyucoto.
- <sup>28</sup>Omnye toye piko morip ñomnonet nyepo manta nye nöme Yiyintet. Kunyo kucämnta kule kurup konetik ce kipok kasoteywek Kunyo yiye ñalek ce meroke kot kwiy.
- <sup>29</sup>Ponto miyotyey wok tokol, kuyu ñokis, moroñyantit. Ponto cekto corokiyinotet, porisyet, koperperisyet, oko kowotyontit, oñnkuñorsyi cekto,
- <sup>30</sup>oñnkuñololekey kwapi, senkere cekto Yiyintet. Sokoran ce silekey, tosyinikey pate kusote wule mokwiyta ñalek ce miyotec. Puryo kot kulimncini cekto piko cepo kamwa, puryo kot kuponto ñomnon. Puryo kot kuripe kirotiyet nyimwa, oñnkupuryo kot kuporcini piko alak tolosyet nto mpo kurire kukalya.
- <sup>31</sup>Nkete cekto kule mwowu ntarastit nyepo Yiyintet kule, roke kupok piko ce pure kopurto nye yunyoto. Puryo kot kutosyinikey cekto kwiye ñalecutecu pate, ntene cömntoy cekto kukasta piko alak ce yiye ñalecato.



## Romek 2

- <sup>1</sup>Kunyo Corwenyu, mutyini nyi piko alak musankut? Puryo kot oponte nolyo nye wosoni nka kot nyi ku no? Omnye ye kewosontyi nyi piko alak kulot musankut, ntene onkikiye nyi nhalcato, kuporkey kule wosontyinikey nyi nkit.
- <sup>2</sup>Cinket acek kule Yiyintet kunye po manta ye komutyi musankut piko ce yiye nhalak ceyucoto.
- <sup>3</sup>Ntene nyi corwemwani nyo mutyini musankut piko alak ce yiye nhalacutecu onkurok yec yiye nyi nkit. Soti kule mesecilile musankut nyepo Yiyintet?
- <sup>4</sup>Nto tos nyile nyi tolosyenyi nyewo oko kwilatenyi oko muytocinotet nyenyi. Puryo nket nyi kule toponiyetap Yiyintet kunye ntowuŋ nyi serenynkey?
- <sup>5</sup>Kunyo om mukuleyto nyenun nye wuy nye miyat, kuye mite tosyini tononutec cekuk om pesyet nye moceŋany cipor nyerunotetap Yiyintet ye mute musankut nyepo nhalak cepo manta.
- <sup>6</sup>Omnye mosukupucici Yiyintet ci tokol kuyu wule yunto yisyenyi, nye kikwiŋ.
- <sup>7</sup>Tosyinikey piko alake kwiye yisyet nye topon, onkuceny woyinto oko koyweisyet oko soponto nye mopoku, mosukukoci Yiyintet picoto soponto nye mopoku.
- <sup>8</sup>Nto piko alak co soy onkutay nhalak cepo manta, onkurup nhalak ce miyotec, mosukuporci Yiyintet picoto nerekeyi.
- <sup>9</sup>Mosukutaŋany onkunyor mwoninto piko tokol ce yiye nhalak ce miyotec, nyosye Yutayek oko mpo Kirikik.
- <sup>10</sup>Ntene mosukukoci Yiyintet woyinto oko koyweisyet oko kalyet piko tokol co yiye nhalak ce toponec, kunyosye Yutayek oko mpo Kirikik.
- <sup>11</sup>Omnye sute Yiyintet kuyoyec piko tokol.
- <sup>12</sup>Omnye piko tokol co puryo kot kupunto ntarastinek onkwiŋ miyotyec, kuce potos kuyu piko ce puryo kot kupunto ntarastinek. Nto piko tokol, ce yiye miyotyec onkurok kupunto ntarastienk kuce mosicemutyi musankut kuyu wule yunto ntarastinek.
- <sup>13</sup>Puryo kot ku piko ce lime ntarastinek kuce toponec om taytap Yiyintet, ntene piko co yiye kuyu wule mwoytoy ntarastinek kuce mocecämnta kule tililec om wule mite Yiyintet.
- <sup>14</sup>Ye karup Lamek kuywey ntarastinek, kuporkey kule ponto cekto ntarastinek nka kot kupuryo kot kuponto ntarastinek.
- <sup>15</sup>Poru cekto om kopurto nyimwa kule silotin mukuleywekwa orit nhalak ce nöme ntarastinek. Poru yec mpo kasoteywekwa kule po manta nhalacutecu omnye wosontyini kasoteywekwa ce sote onkuyet kukalya cekto, om





<sup>16</sup>pesyet nyo mute Yiyintet musankut nyepo yisyonutek cepo ñalek ce wuñotin cepo piko tokol. Kuyu wule yunto lokoywek ce toponec ce omwoytoy ani kupunte Yesu Kristo.

<sup>17</sup>Ntene nyi nyo kurekey kule Yutoyin, oñnkikenekey ntarastinek, oñnkisilekey Yiyintet.

<sup>18</sup>Nketi tukuk tokol ce möce Yiyintet kule yiy nyi, kunyo kinetkey om wule mite ntarastinek kule kwey kiy nye topon.

<sup>19</sup>Nketi nyi kupoyit manta kule yiku nyi kantoyintet nyepo piko co korotin, oñnkuyiku lakweyet nyepo piko ce mite menonet.

<sup>20</sup>Yiku nyi konetintet nyepo piko ce perper oko lekoy ce minkec. Nketi nyi kupoyit manta kule om ntarastinek ku wule mite ñomnonet.

<sup>21</sup>Nyi nyo neti piko alak, omne menetkey nyito nkit? Mwoytoy nyi kule, “Monte cecorsye!” Oñnkurok yec corsyi nyi!

<sup>22</sup>Mwowu mpo kule, “Monte cesakwayan.” Oñnkurok yec yiye nyi sakwayanadet? Senkeri nyi koromun kerkeyik ce kerkey Yiyintet, oñnkurok yec core nyi tukuk ce mite korik orit.

<sup>23</sup>Silekey kule ponte ntarastinek, oñnkurok yec yirye ntarastinek sutu kalilan om wule mite Yiyintet.

<sup>24</sup>Mwowu silutekap Yiyintet kule, “Yutayek kuce kwesokyi sukuñet kuñalale Lamek kwapi kaynetap Yiyintet.”

<sup>25</sup>Ponto wonset nyimwakwek latik ye korip ntarastinek. Ntene ye koyiri ntarastinek kuporkey wonset nyimwoñ kuyunye puryo kot cewonak.

<sup>26</sup>Kunyo nteye korip lomin nyo mowonat ñalek ce mwowu ntarastinek, kupuryo kot kusute Yiyintet cicoto kuyunye kicewon?

<sup>27</sup>Kunyo Lamek co mowonotin kuce mosukumutwok musankut akwek Yutayek ce oponte ntarastinek oñnkoyiku wonotin oñnkurok yec oyirye ntarastinek.


<sup>28</sup>Ntene ño nye Yutoyin nyepo manta nye kicewon kupoyit manta? Puryo kot ku Yutoyin kunye po wonset nyenyi porto nyepo sañ pate

<sup>29</sup>Ntene Yutoyintet nyepo manta kunye Yutoyin nyepo porto orit, nye kicewon mukuleyto nyenyi orit, nye yiye yisyet nyepo Muyet Nyetilil, ntene puryo kot ku nyepo ñalek pate. Nyoru cicoto kakastayet kucone wule mite Yiyintet, puryo ku kule kucone wule mite piko.

### Romek 3

<sup>1</sup>Kunyo toponiyo ne nye pëlisyi nye ponto Yutoyin? Nto latik ne ce ponto wonset?

<sup>2</sup>Cañ koromun om aret ake tokol! Nyepo tayta kunyi kule, kicikoci Yutayek kurip lokoywek ce toponec cepo Yiyintet.




- <sup>3</sup>Kunyo mokwiy kulene ye puryo kot kuponto Yutayek alake koyenet? Kuporkey so om ñolyontoni kule puryo kot cikenekey Yiyintet?
- <sup>4</sup>Puryo kot kuyunyo mpo kisic! Yiyintet kunye po manta nka kot komuce kwek ci ake tokol mwiyn, kuyu wulo mwowu silutekap Yiyintet kule, “Misyini cinket kule poye manta ye keñalal, misyini lotisiyi musankuñuñ ye kocewosontyiñ.”
- <sup>5</sup>Ntene nteye kaciy acek miyotyey, yoto kuye kupor kule po manta Yiyintet? Mocemwowu kulene? Mocemwowu so kule, puryo kot kupo manta Yiyintet ye kucetañany acek? Kañalal kuyu ci.
- <sup>6</sup>Puryo kot kuyunyo! Ye puryo kot kupo Yiyintet manta, komuce neto kulene kot kwek ketintet nye mutyini koret musankut?
- <sup>7</sup>Ntene nteye mwiynanemwani kunye poru topon woyintap Yiyintet, omne sicewosontyo ani om miyotyey?
- <sup>8</sup>Cimuci pa cemwowu kule, kyiy miyotyey sukuñet kuco toponiyet? Mwowu piko co ñomsu kule ce mwowu acek kuyunyoto. Kicemutyi cekto musankut nyepo manta.
- <sup>9</sup>Kunyo Ceponte acek pa Yutayek soponto nye topon kupël Lamek? Puryo kot kuyunyo mpo kisic! Kwoporu ani keny kutok topon kule mite Yutayek oko Lamek tokol ñonyutap miyotyey.
- <sup>10</sup>Kuyu wulo mwowu silutekap Yiyintet kule: “Puryo ci mpo akenke nye tilil,
- <sup>11</sup>Puryo mpo akenke nye ñom, puryo mpo nye cenye wule mite Yiyintet,
- <sup>12</sup>Kiweckey piko tokol kwasta Yiyintet kimosokis piko tokol puryo mpo akenke nye yiye ñolyo nye topon, puryo mpo akenke.
- <sup>13</sup>Kerkey kutuwak cikwa mwenon ce kicetupci pic ce yototin, oñnkukwone kutuwak cikwa ñalek ce miyotec ce kerkey oko mwonet nyepo erenoy.
- <sup>14</sup>Kunyyi kutuwak cikwa cupisyonok ce mwonec
- <sup>15</sup>Sorcini lakwar ye mokutumto korotik.
- <sup>16</sup>Turpupoti kwaranta aret wule punte oñnkupakakta toñuñutek.
- <sup>17</sup>Puryo kot konkete aret nyepo kalyet,
- <sup>18</sup>Oñnkupuryo kot kuponto koyweyisyey nye yweye Yiyintet.”
- <sup>19</sup>Kunyo cinket kule ñalek tokol ce mite orit kuce nöme piko tokol ce poytoy ntarastinek, sukuñet mpo yec kuker kutuwak cepo piko alak, sukumutyi Yiyintet musankut koret tokol.
- <sup>20</sup>Omnye puryo ci mpo akenke nye muce cesat kunyol om taytap Yiyintet ye korip ntarastinek. Kito nye yiye ntarastinek kunye porcini cito kule kwiy miyotyey.
- <sup>21</sup>Ntene kuciñuñ yawut aret nye sate piko kunyolom wule mite Yiyintet, nyoto kunye puryo kot konömekey oko ntarastinek.



- <sup>22</sup>Sate Yiyintet piko kunyol kupunto koyenemwa om Yesu Kristo. Yiye Yiyintet kuyunyoto om wule mite piko tokol ce cöme Kristo omnye puryo pciyatet mpo kisic.
- <sup>23</sup>Kikowurta piko tokol, kunyo mitowune cekto wule low om wule mite kosopotet nyepo Yiyintet.
- <sup>24</sup>Nto ye cesöte cekto kunyol om kokotutyetap Yiyintet nye pöc om poypoyet kupunte wule mite Yesu Kristo nye kikokalyec acek.
- <sup>25</sup>Kikon Yiyintet Yesu Kristo sukuñet kwek met nyenyi aret nye cikolye piko miyotyoni. Kupunte koyenet nye ponto cekto om wule neto. Kikwi Yiyintet kuyunyoto sukuñet kupor yisyenyi nyepo manta. Kimuytoci neto nye kipuryo kot kumany miyotyoni piko om pesyosyek co kitil.
- <sup>26</sup>Kunyo poru yawut om pesyosyecu kule po manta neto oñkusöte kunyol cito om wule mite Yesu Kristo.
- <sup>27</sup>Kunyo muce cesilekey ne? Puryo kiy! Omne? Omnye möce pa kule ciywey ntarastinek? Puryo! Ntene omnye ciyeni ce cömisye pate.
- <sup>28</sup>Omnye cinket ciwoñkyi kule satoktos kunyol cito om wule mite Yiyintet om koyenet pate, ntene puryo kot omnye kikwi yñalek ce mwowu ntarastinek.
- <sup>29</sup>Nto osoti akwek kule Yiyintet kunye Yiyintet nyepo Yutayek nkit pate? Puryo kot ku Yiyintet neto ne nyepo mpo Lamek? Neto kunye Yiyintet nyepo mpo Lamek.
- <sup>30</sup>Omnye akenke Yiyintet Mosukusat neto Yutayek kunyol om wule mite neto kupunte koyenet nyimwa oñkusat kunyol mpo Lamek kupunto koyenet nyimwa.
- <sup>31</sup>Poru pa ñolyontoni kule ye kiciyen kuroke cetay ntarastinek? Puryo kot kuyunyo mpo kisic! Ntene misyini cerip ntarastinek.

#### Romek 4

- <sup>1</sup>Kunyo mocemwowu ñolyo ne nye nöme kukonyo Apram. Kinyor kiy ne?
- <sup>2</sup>Nto yunye kicesat Apram kunyol om wule mite Yiyintet om tukuk ce kikwi, nto ponto neto kito nye silekey, ntene puryo komuce kusilekey taytap Yiyintet.
- <sup>3</sup>Mwowu silutekap Yiyintet kule, “Kucäm Apram Yiyintet, nto omnye kiyen, yoto kuye kusut Yiyintet neto yu ci nyetilil.”
- <sup>4</sup>Cikocini cito nye yiyisi musyaret, ntene puryo kot ciyite musyaret nyoto kwek kokotutek, ciyite kuyu kiy nye konyor kupo yisyet nye kokwi.
- <sup>5</sup>Nto cito nyo puryo kot kwiy yisyet, ntene kukenekey Yiyintet nyo kolyoy piko co menket neto, ciyite kule tilil neto nyoto.
- <sup>6</sup>Dalecutecu kuco kiporu Tauti ye kiñolole ñerekwek cepo cito nye cöme Yiyintet. Ye puryo kupunto yisyonutek ceci latik, kimwoy kule:



<sup>7</sup>Ponto kupeyoy piko co kicikalya miyotyoni cikwa, piko co kicinum miyotyoni cikwa

<sup>8</sup>Ku nerekat cito nyo puryo kot koyityini Mokoryontet kule ponto miyotyeyet.

<sup>9</sup>Po ra pa nerekwecutecu kiŋolole Tauti pate piko co kicewon? Puryo kot kuyunyo! Po nerekwek coto mpo piko co mowonotin. Omnye kocinum ŋalek kukwane silutekap Yiyintet kule. “Kicäm Apram Yiyintet; kunyo omnye kiyen, yoto kucäm Yiyintet neto kwek ci nyetilil.”

<sup>10</sup>Kunyo kikwi yokis ŋalecu oyu? Kutompo kot cewon Apram nto om letut yu kacewon? Kikwi yokis kunyo kutompo kot cewon, ntene puryo kot ku om letut yu kacewon.

<sup>11</sup>Kicewon Apram om letut, kunyo wonsenyi kunye pelutyet nye poru kule kicäm Yiyintet Apram kwek ci nyetilil omnye kiyen kutompo kot cewon; sukuŋet kwek neto kukonyitap piko tokol ce yene Yiyintet oŋnkucäm neto cekto kule po manta nka kot kupuryo kot kuwonotin.

<sup>12</sup>Apram kunye kukonyitap piko co wonotin, ntene nye puryo kot ku kule omnye wonotin, ntene omnye purtoy cekto soponto nyepo koyenet nye kerkey nyo kiponto Apram kutompo kot cewon.

<sup>13</sup>Kikurtoci Yiyintet Apram oko kesenisyekyi kule mosukwek nyimwa koret. Kipuryo kot cekurtoci omnye kirip Apram ntarastinek, ntene omnye kiyen sukuŋet kucäm Yiyintet kule ci nyetilil neto.

<sup>14</sup>Omnye ye piko co ripe ntarastinek kuce mosikonti tukuk ce kikurto Yiyintet, kuporkey kule puryo kot kupunto latik ye kiciyen, oŋnkupuryo kot koponto latik kurtoyeyetap Yiyintet.

<sup>15</sup>Omnye ntarastinek kuce sutu kunyer Yiyintet, ntene ye puryo kot kimite; kupuryo mpo kot kimite kawurtayet nyepo ntarastinek.

<sup>16</sup>Kunyo co kikurto Yiyintet kuce yoŋe koyenet, sukuŋet kuporkey kutok kupoyit manta kule kikwone poypoyetap Yiyintet, nyepo pöc om wule mite kesenisyekap Apram, nye puryo kot kupo pate piko co ripe ntarastinek, ntene mpo piko co kikoyen kuyu wule kikwiya Apram. Omnye Apram kunye kukonyacek tokol.

<sup>17</sup>Kuyu wulo mwowu silutekap Yiyintet kule, “Kayiyiŋ ani nyi yiku kukonyitap yemosyek ce caŋ.” Kunyo topon kiroyet om taytap Yiyintet, omnye kiyen Apram. Yiyintet kunye ŋete kotutune met piko, oŋnku nye muce kwiy kutok kiy nye kipuryo kutoku.

<sup>18</sup>Kiyen Apram oŋnkukenis yoto kuye kipuryo kot kurok kukenis, kunyo kikwek neto kukonyitap yemosyek ce caŋ. Kuyu wulo mwoytoy silutekap Yiyintet kule, “Mokucaŋit kesenisyekuk.”



<sup>19</sup>Nka kot kiponto neto yoto kenysyek ce kirice pokol, kipuryo kot kucas om koyeneni ye kesot porto nyenyi nye kikerkeyit nye kime. Nto mpo ye kesot sononetap Sara.

<sup>20</sup>Kipuryo kot kwasta neto koyeneni. Kikenekey neto koromun kurtoyetap Yiyintet. Kikoci koyenet nyenyi swamet, yoto kukasta neto Yiyintet.

<sup>21</sup>Omnye kinkete neto kupoyit manta kule mosukoyitita Yiyintet tukuk ce kikurto.

<sup>22</sup>Kuyunyoto om koyeneni kuyit Yiyintet neto kwek ci nye kinyol.

<sup>23</sup>Dalecu “Kwek ci nye kinyol.” Kuce kipuryo kot cesilyi neto nkit,

<sup>24</sup>kicesilwec mpo acek co cecöme kule ciku pic ce kinyol, acek coto kuce ciyeni neto nyo kiñet Yesu Mokoryontenyö kotutune met.

<sup>25</sup>Kicikoyto Yesu kumeci miyotyönik cicacek oñknyiñet kotutune met sukuñet kusatec acek cenyolu om wule mite Yiyintet.

## Romek 5

<sup>1</sup>Kunyo ye kicesatec acek cenyolu om wule mite Yiyintet kupunte koyenet, kunyo ceponte kalyet oko neto kupunte Mokoryontenyö Yesu Kristo.

<sup>2</sup>Kisutwec acek neto koyenet cenyoru kupeyokap Yiyintet ce cemite ciportoy yawut. Kunyo ceñereci om kokenotet nye ceponte om woyintap Yiyintet!

<sup>3</sup>Ceñereci mpo om toñoñutekyo omnye cinket kule sutu toñoñutek muytocinotet,

<sup>4</sup>oñkusutu muytocinotet cämntayet nyepo Yiyintet, oñkutec cämntayet nyitenyi kokenotet.

<sup>5</sup>Puryo kot kulotwec acek kokenotet omnye kikoci Yiyintet koyenet kowut mukuleywekyacek orit kwiysisye Muyet Nyetilil, nyoto kunye kokotutyetap Yiyintet nye kikonec.

<sup>6</sup>Omnye ye kimo ceponte acek swamet, yoto kumeci Kristo piko ce miyotec om pesyosyek ce kikwey Yiyintet.

<sup>7</sup>Kiy nye wuy ye mokumeci citake cito nyetilil. Mukoktos om aret ake kusyem cito ake kot kumeci cito nyetilil!

<sup>8</sup>Ntene kiporwec Yiyintet wule cömntec acek; omnye ye kito ceponte acek miyotyönik, yoto kuye kumecec Kristo!

<sup>9</sup>Kunyo ye kicesatec acek cenyolu om wule mite Yiyintet om metap Kristo, porukey kupoyit manta kule mosicesorwec acek om wule mite nerekwekap Yiyintet kupunte neto.

<sup>10</sup>Kiciku acek ikye punik cepo Yiyintet, ntene kiwecec yawut ciku coronutekyi kupunte metap Werinyi. Kunyo omnye ciku yawut coronutekap Yiyintet, aret cetya nyun ce cimuci cisopec om soponto nyepo Kristo!



<sup>11</sup>Ntene nka kot ku coto tokol, cejereci acek om wule mite Yiyintet kupunte Mokoryontet Yesu Kristo nye kiwecec ciku coronutekap Yiyintet.

<sup>12</sup>Kunyo, kuyu wulo kico miyotyey koret kupunune cito akenke, oñnkusut kunäm met piko tokol, omnye kikowurta piko tokol.

<sup>13</sup>Kupoyit manta kimite miyotyey koret kutompo kot cekon ntarastinek, ye puryo ntarastinek kupuryo kot ciyite miyotyey.

<sup>14</sup>Kunyo kipayta miyotyey piko kuceke Atam okoy kupun Moses, kipayta oko mpo piko co kipuryo kot kowurta kuyu Atam, nye kikwiri ntarastinekap Yiyintet. Atam kunye kikerkey oko neto nyo kicikene kuco.

<sup>15</sup>Ntene puryo kot kukerkey cutecu tukway, omnye puryo kot kukerkey kokotuyetap Yiyintet nyepo pöc pate oko miyotyeyetap Atam. Manta kule kipok piko ce cañ kupo miyotyey nyoto po cito akenke. Ntene cemosi nyewo koromun poypoyetap Yiyintet. Kunyo mpo kokotuyenyi nye kocini piko ce cañ kupunte poypoyetap cito nyoto akenke Yesu Kristo.

<sup>16</sup>Kunyo pciyat kokotuyetap Yiyintet oko miyotyey nyepo cito akenke, nyoto kunye kisutyi kulot piko musankut nyepo lelisto. Ntene kikwiy piko miyotyeyonik ce cañ, yoto kuco kokotuyet nyepo numune piko lelisto.

<sup>17</sup>Po manta kule om miyotyey nyepo cito akenke yoto kupoytoyis miyotyey kupo cito nyoto akenke. Ntene nyewo koromun yisyey nye kikwiy cito akenke Yesu Kristo! Co mosukunyor poypoyetap Yiyintet nyewo koromun oko kokotuyet nyepo tililinto kuce mokupoytoyis kupëlis om soponto kupunte Kristo.

<sup>18</sup>Kunyo kuyu wulo kisut miyotyey nyepo cito okenke musankut om wule piko tokol, kuyunyoto kusut yisyey nye topon nyepo cito akenke kalyet oko soponto om wule mite piko tokol.

<sup>19</sup>Kuyunyoto kikwiri cito akenke ntarastinek kwiy miyotyey sukuñet kowurta piko ce cañ, kuyunyoto wule mosicesatita kunyol piko ce cañ om wule Yiyintet kupunte cito akenke nye kimecec.

<sup>20</sup>Ye kicece ntarastinek yoto kutosyikey kawurtayey, ntene ye kotosyikey miyotyey, kutosyikey mpo koromun poypoyetap Yiyintet.

<sup>21</sup>Kunyo kuyu wulo poytoyisyi miyotyey kwiyisyey met. Kunyo poytoyisyi mpo poypoyetap Yiyintet kwiyisyey toponiyey nye ntowec acek om wule mite soponto nye mopoku kupunte Yesu Kristo Mokoryontenyoy.

## Romek 6

<sup>1</sup>Kunyo mocemwowu kulene? Mocetosyikey pa cipurte miyotyey sukuñet kutosyikey poypoyetap Yiyintet?

<sup>2</sup>Puryo kot kunyunyo mpo kisic! Kicepoku acek nye kimokyiye miyotyey, kunyo cimuci kulene yec cipurte miyotyey?





- <sup>3</sup>Puryo kot oŋnket akwek kule acek tokol co kicepatisanec ciyomec oko Kristo, kuce kicepatisanec ciyomec oko met nyenyi.
- <sup>4</sup>Kunyo om patisanet nyinyacek kuye yoto ye kicemuyec acek oko Kristo oŋnkyepoku kuyu neto, sukuŋet ciŋetec kuyu wulo kiciŋetitoy Yesu kotutune met om swametap woyinto nyepo Papa, kunyo mpo acek mosicesopce om soponto nyelel.
- <sup>5</sup>Omnye ye kicemuyec acek om met nyenyi, kuyunyoto mosiciyomec oko neto om kotutunet nyenyi.
- <sup>6</sup>Cinket kule kicepakäc soponto nyinyacek nyepo kenya oko Yesu om murtowontet sukuŋet kyaranta swamet nyepo miyotyet, sukuŋet komo ciku acek yec mutworikap miyotyet.
- <sup>7</sup>Omnye ye kame cito kukacityac neto om wule mite swamet nyepo miyotyet.
- <sup>8</sup>Ntene ye kicepoku acek oko Kristo, ciyeni kule mosicesopce oko neto.
- <sup>9</sup>Omnye cinket kule kikitutune met Kristo, kunyo kimo kume yec mpo kisic, kimokupoytoy met neto.
- <sup>10</sup>Met nye kime kunye met nye kimeci miyotyet aret akenke nkit, nto soponto nye ponto yawut kunye soponto nyepo Yiyintet.
- <sup>11</sup>Kunyo möce asot akwek nkit om aret nye yunyoto kule kicepoku nye mokyiy miyotyet, ntene oŋnkyesoptosi om Yiyintet om koyomotet nye opontekey oko Kristo.
- <sup>12</sup>Puryo kot kuroke yec kot tokupayta miyotyet porwonikwok ce poku. Saŋet acäm corokyinotet nyepo porto.
- <sup>13</sup>Monte kot acämnte akwek kereryantet ake tokol nyepo porto kwiy miyotyet Ntene okoytekey opoyitu Yiyintet kuyu pic ce kiciŋet kotutune met oŋnkocämnte soponto nyimwoŋ tokol kopurune wule mite neto, sukuŋet kiyiyisye kupo ŋalek cepo manta.
- <sup>14</sup>Puryo kot kumisyini kupaytak akwek miyotyet, omnye puryo kot kupoytok ntarastinek, ntene poytok poypoyetap Yiyintet.
- <sup>15</sup>Kunyo mokyiy kulene? Mokyiy so miyotyet omnye puryo kot kupoytec ntarastinek? Puryo kot kuyunyo!
- <sup>16</sup>Oŋnket akwek ŋolyontoni kupoyit manta kule ye kecämntekey yiku mutworin, nye yweyi citake kuye yiku yoto mutworin nyepo mokoryontonoto yweyi nyito, nka mpo ye yweyi miyotyet nyo sutu met, nto ye koyweyisyet nyo sutu soponto cenyol om wule mite Yiyintet.
- <sup>17</sup>Ntene cikasta Yiyintet nye kikwiŋ topon, omnye kyoyiku akwek mutworik cepo miyotyet, ntene kunyo kyacäm yawut om mukuleywekwok ŋalek cepo manta ce kyonyorte konetisyet nyo kicinetak.
- <sup>18</sup>Kicityakenak akwek miyotyet okoy oyiku mutworik cepo ŋalek cepo manta.



<sup>19</sup>Oṅololi ani oyiyisye ṅalek cepo kwak omnye miniṅ ṅomnonet nyimwoṅ kuyu wolo kikyokoytekey akwek om pesyosyek alak oyiku mutworik cepo simnyontet oko leliswek, om yisyet nyepo miyotyeyet. Kunyo yawut möce ocämntekey kuyunyoto oyiku mutworikap toponiyet om yisyetap tililinto.

<sup>20</sup>Ye kitoyiku akwek mutworikap miyotyeyet kuye kipuryo kot kupoytok yoto toponiyet.

<sup>21</sup>Ntene kyonyoru akwek yoto ne om tukuk ce oliloni ye mayiy yawut, omnye sutu coto met.

<sup>22</sup>Kicityaktak yawut akwane miyotyeyet; kunyo oyiku mutworikap Yiyintet. Kito nye monyoro ku citililok oṅnkonyoru soponto nye mopoku om pesyet nyepo letut.

<sup>23</sup>Omnye musyaret nyepo miyotyeyet ku met. Ntene kokotutyetap Yiyintet nyepo pöc ku soponto nye mopoku om koyomotet oko Yesu Kristo Mokoryontenyo.

## Romek 7

<sup>1</sup>Mpo yeya, oṅnket akwek kupoyit manta ṅalek ce amöce ani kule omwowu, omnye oṅnketi tokol ntarastinek. Poytoy ntarastinek pate cito ye tokusope.

<sup>2</sup>Kuyu korko nye mütat. Ripe nyo ntarastinek om wule mite santenyi ye tokusope, ntene ye kame santenyi, yoto kuye kutyak om wule ntarastinek cepo santenyi.

<sup>3</sup>Nteye kepurcini neto oko citake ye tokusope santenyi mosicekur kule kasakwayen korkonoto. Ntene ye kame santet, komo kuripe neto ntarastinek, kunyo komokwiye sakwayanat ye kemüt citake.

<sup>4</sup>Mpo yeya, yunyoto om wule omite akwek kyopoku om wule mite ntarastinek, omnye oyiku kereryantetap porto nyepo Kristo, kunyo opoye yawut neto nyo kiciṅet kotutune met sukuṅet cepoyitu acek latik om yisyet nyepo Yiyintet.

<sup>5</sup>Omnye ye kitoceponte acek soponto nyepo cito; kuye kikwiysisi yoto corokiyinetet nye miyat kupunte ntarastinek ce kimite porwonikyacek oṅnkusut met.

<sup>6</sup>Ntene yawut acek co kicityacec cekwane wule mite ntarastinek, kuce kicepoku cekwane wuloto, kinömec ciku mopusin. Kunyo kimokiyisi om aret nyepo keny nyepo ntarastinek ce silotin, ntene kyiyisi om aret nyelel nyepo Muyet Nyetilil.

<sup>7</sup>Kunyo moceṅalal ce mwowu kulene? Mocemwowu pa kule ponto ntarastinek miyotyeyet? Puryo kot kuyunyoto? Ntene ntarastinek kuce porwo ani sukuṅet oṅnket miyotyeyet. Kipuryo kot omuci kot oṅnket corokiyinetet nto kipuryo kot kumwoy ntarastinek kule. “Mente ocorokiyi kiy.”

<sup>8</sup>Kinyor miyotyeyet poroyinto sukuṅet kowurur corokiyinetet ake tokol nye mitowune wule omite ani, omnye kikwiysis kupunte ntarastinek. Omnye miyotyeyet kunye kiy nye kime ye puryo kot kumite ntarastinek.

<sup>9</sup>Kimite pesyosyek alak om sponmwani ye kipuryo kot oṅnket ntarastinek, ntene ntowo kuco ntarastit, yoto kotut miyotyeyet, yoto amey ani:



- 10**Nto ntarastit nye kicemöce kule sukuñet kusutwo soponto, kunye nyoto nye kisutwo ani met.
- 11**Omnye yu kowo kunyor miyotyeyet poroyinto kupunte ntarastinek, yoto kuperpera ani okoy kupakäca.
- 12**Tilil ntarastinek kwine nkit, tililec koyomiset, oñnkupo manta, oñnkutopon.
- 13**Poru pa ñalecu kule kito nye topon kunye kisutwo ani met? Puryo kot kuyunyo! Miyotyeyet kunye kisut, omnye kikwiysisye miyotyeyet kito nye topon sukuñet kusutwo ani met oñnkupor kutok wule yunto miyotyeyet. Kunyo porwec ntarastinek kule miyotyeyet ku miyotyeyo kupoyit manta.
- 14**Cinket kule mite ntarastit kupo muyet, ntene poyto ani porto, kicalya ani sayiy miyotyeyet.
- 15**Puryo oñnketi kito nye oyiye, omnye puryo kot oyiye kito nye amöce kule ayiy ntene añnkayiy kito nye puryo kot amöce kule ayiy.
- 16**Ye oyiye ani ce puryo kot omöce kule ayiy, kuporkey kule ocöme kule toponec ntarastinek.
- 17**Omnye puryo kot ku ani nye oyiye kiyitenyi, ntene miyotyeyet nye mitowune wule amite ani orit nye yiye.
- 18**Oñnketi kule puryo kiy nye topon nye mite pormwani, omnye nka kot amöce kule nto ayiy kiy nye topon, kupuryo kot omuci kot ayiy.
- 19**Puryo kot oyiye kito nye topon nye amöce kule ayiy, ntene owece oñnkayiy kito nye miyat nyo puryo kot amoce kule nto ayiy.
- 20**Kunyo ye oyiye kito nye puryo kot omöce kule nto ayiy, kuporkey kule puryo kot ku ani nye oyiye kiyoto ntene miyotyeyet nye mitowune wule omite kunye yiye.
- 21**Kunyo oköse ani kule yiyisi ntarastit kuyunyoto. Omnye ye amöce kule ayiy kito nye topon, ku miyotyeyet pate nye okweye ani.
- 22**Oñnerekyini om sponmwani nyepo Muyet ntarastinekap Yiyintet.
- 23**Ntene oköse ntarastit nye cone kasoteywekwani, kunyo sutwo oyiku mopusyontet nyepo ntarastitap miyotyeyet nye mite kwiyisi om pormwani orit.
- 24**Opo! Oyiku ani ci nye kitany koromun! Do nye mosukusorwo om wule mite porto nyi mokusuto wule mite met?
- 25**Makaste Yiyintet nye kisorwo kupunte Mokoryontenyo Yesu Kristo. Kunyo soponto nyimwani nye oponte kunyi. Ani nkit kunye oripe ntarastinekap Yiyintet om kasoteywekwani, oñnkurok kwiyisi porto nyimwani kwicini yisyyet miyotyeyet.

## Romek 8

- 1**Kunyo puryo kot kuponto yawut musanku piko co ponto koyomotet oko Kristo Yesu.



- <sup>2</sup>Omnye ntarastit nyepo Muyet Nyetilil nyo sutwec soponto oṅnkoyomec oko Yesu Kristo, kunye kikotyaca ani acone wule mite ntarastitap miyotyey oko met.
- <sup>3</sup>Omnye kito nye puryo kot komuce ntarastinek omnye puren porto kunye kikwiyy Yiyintet nyoto. Kimutyi Yiyintet miyotyey musankut, omnye kiyok Werinyi nkit nye kicono porto nye kerkey nyepo cito nye ponto miyotyey sukuṅet kunum miyotyey.
- <sup>4</sup>Kikwiyy Yiyintet kuyunyoto sukuṅet ciyitita kupoyit manta ntarastinek om wule ce mite acek co cipuri kopurto kuyu wule moktoy Muyet Nyetilil, ntene puryo kot kuyu wule moktoy soponto nyepo porto.
- <sup>5</sup>Omnye piko co purtoy soponto kuyu wule moktoy porto kuce poytoy kasoteywekwa tukuk ce möce porto. Nto piko co purtoy soponto kuyu wule moktoy Muyet Nyetilil, kupoytoy kasoteywekwa tukuk ce möce Muyet Nyetilil.
- <sup>6</sup>Ye kapayta kasoteywekuk tukuk ce möce porto, kusutu met, ntene ye kapayta kasoteywekuk tukuk ce möce Muyet Nyetilil kuye mesenyoru soponto oko kalyet.
- <sup>7</sup>Kunyo yiku cito puniyontetap Yiyintet ye kapayta kasoteywekyi tukuk ce möce porto, omnye puryo kot kurupe neto ntarastinekap Yiyintet, puryo kot kurupe mpo kisic.
- <sup>8</sup>Puryo kot komuce koṅerec Yiyintet piko co rupe tukuk ce möce porwonikwa.
- <sup>9</sup>Ntene puryo kupoytok akwek porto, poytok Muyet Nyetilil, ye puren om wule omite akwek ci ake tokol nye puryo kot kuponto Muyet Nyetilil, kunye moponto nyoto Kristo.
- <sup>10</sup>Ntene ye mitowune Kristo wule omite akwek, nka kot kipok porwonikwok om miyotyey, kusopcotin sopenwek nye kicesatak onyolu om wule mite Yiyintet.
- <sup>11</sup>Ye mitowune wule omite akwek Muyet Nyetilil nyepo Yiyintet nyo kiṅet Yesu kotutune met, kuporkey kule nyoto kiṅet Kristo kotutune met kunye mosukukoci soponto porwonikwok cepoku kupunte Muyet Nyetilil nyoto mitowune wule omite akwek.
- <sup>12</sup>Kunyo mpo yeya, ceponte pesen puryo kot ku pesento nye yocec porto kule cipur kuyu wule moktoy porto.
- <sup>13</sup>Omnye mosopoku ye kurup kapurto nyepo porto. Ntene mososopce ye kapakäc yisyonutek ce möce porto om swametap Muyet Nyetilil.
- <sup>14</sup>Lekokap Yiyintet piko tokol co ntocini Muyet Nyetilil nyepo Yiyintet.
- <sup>15</sup>Omnye Muyet Nyetilil nyo kikonok akwek Yiyintet kunye puryo kot kuwecok oyiku mutwor oṅnkomye, ntene wecok oyiku lekokap Yiyintet. Kunyo citeyi acek om swametap Muyet Nyetilil kule, “Apa” Nye mwowu kule, “Papa.”
- <sup>16</sup>Muyet Nyetilil nkit nye mitowune sopenwekyacek orit kunye poru kule ciku lekokap Yiyintet.



- <sup>17</sup>Kunyo nteye ciku lekokyi; kuporkey kule mosicenyoru kupeyok ce kikonorci neto pikyi, oṅnkunti oko Kristo tukuk ce kikonorci Yiyintet neto. Omnye ye kakeyemnte toṅoṅutek oko Kristo kuye mosiceyemnte mpo woyinto oko neto.
- <sup>18</sup>Asoti ani kule toṅoṅutek ce cetoṅonyi acek om pesyosyecu kuce puryo kot cimuce mpo kisic kot ciyoyeke woyinto nye mosiceṅoṅwec acek.
- <sup>19</sup>Omnye mite kukoṅisyi koromun tukuk tokol ce kicitany okoy ye mociṅoṅ kutok lekokaṅ Yiyintet.
- <sup>20</sup>Omnye kicewosontyi tukuk ce mite koret kwek ce moponto latik, puryo kot omnye kicām nkit, ntene omnye kicām Yiyintet nkit, oṅnkurok yec kumite kokenotenyi.
- <sup>21</sup>Kule mosicityac pesyet ake koret kucone mutworyontit nye nunat oṅnkunyor woyinto nyewo nyepo lekokaṅ Yiyintet.
- <sup>22</sup>Cinket kule mite kosiltos kutoṅonye om mwoninto okoy pesyoni tukuk tokol co kicitany kuyu korko nye möce kucāmnyek.
- <sup>23</sup>Ntene puryo kot ku tukuk ce kicitany nkit pate, mpo acek co ceponte Muyet Nyetilil nyepo Yiyintet nye kokotuyet nyepo tayta, kuce cemite mpo acek cerire cekonye ye mokuwecec Yiyintet ciku lekokyi oṅnkusor porwoyacek.
- <sup>24</sup>Omnye kisopec om kokenotet nyitenyi pate. Ntene kokenotet nye ceköse kunye puryo kot ku kokenotet nyoto. Omnye ṅo nye muce kuken kiy nye mite kuköse?
- <sup>25</sup>Kunyo nteye cikeni acek kito nye puryo ceköse, kuroke cemuytoci ciken kiyoto.
- <sup>26</sup>Kuyunyoto Muyet Nyetilil kolyec acek; omnye moceponte swama, puryo kot cinket wule cesomtoy kuyu wule misyinec cesom. Muyet Nyetilil nkit kunye kolyec oṅnkusorwec om wule mite Yiyintet, om ṅalek ce nyikisec koromun ce memuci ci kuṅalal.
- <sup>27</sup>Yiyintet nye köse mukuleywek orit kunye nkete wule yunto kasoteywek cepo Muyet Nyetilil. Omnye Muyet Nyetilil kunye kolyoy kuporcini pikap Yiyintet kuyu wule yunto cömisyetap Yiyintet.
- <sup>28</sup>Cinket kule yiyisyi Yiyintet topon om kiy ake tokol om wule mite piko co yene neto. Picoto kuco kikir Yiyintet kuyu wule moktoy.
- <sup>29</sup>Yiyintet kunye kikwey kenye oṅnkutapan pikyi sukuṅet kukerkeyitu oko Werinyi, sukwek Werit poretyet om wule mite mpo mutakwam ce caṅ.
- <sup>30</sup>Kunyo kikir Yiyintet piko co kikwey kutapan, nto picoto kikir neto kuce kicesat kunyol om wule mite neto, nto coto kicesat kunyol om wule mite neto kuce kunyor mpo woyinto.
- <sup>31</sup>Kunyo mocoṅalal cemwowu kulene? Ye mitowune Yiyintet wule ce mite acek, kuṅo nye muce kuporyenec?
- <sup>32</sup>Neto nyo kipuryo kot kukalya Werinyi nkit, ntene kukoyto kupo acekto kunye memuce kulene kot kukonec acek tokol oko Werinyi?



<sup>33</sup>Do nye muce kuwosontyi pikap Yiyintet ce kikwey?

<sup>34</sup>Do nye muce kumutyi kulot musankut cekto? Puryo kot ku Kristo Yesu, nyo kime oṅnkotutune met kupoyit manta, kunyo mite yawut kukepure yewutap tay nyepo Yiyintet kuyetyecec acek!

<sup>35</sup>Kunyi ṅo yec nye muce kot kupesyec acek om wule mite cömisyetap Kristo. Muce pa wuyinto? Nto mwoninto? Nto toṅoṅutek? Nto rupet? Nto sirok? Nto kyoran? Nto met?

<sup>36</sup>Kuyu wulo mwowu silutekap Yiyintet kule: “Ce mite miyotyec nyepo kule cepakäcec om pesyo tokol kupo nyito. Ciyitec kuyu kecir ce cemöce wocetil’”

<sup>37</sup>Ntene om coto tokol, cipëlisi kupoyit manta kupunte neto nyo kicämec.

<sup>38</sup>Omnye oṅnketi ani kupoyit manta kule, nka malaykanik, nto poytoyik alak cepo torot, nto kamukeywek, cepo pesyosyecu, nto cepo pesyosyek cokwoni.

<sup>39</sup>Nka mpo koret torot, nto koret ṅony, puryo kiy nye mite koret nyitenyi kicitany nye muce kenysis kot kupesyec acek om wule mite cömisyet nye kicenyoru acek kipunte Kristo Yesu Mokoryontenyo.

## Romek 9

<sup>1</sup>Oṅololi ani ṅalek cepo manta, opoye Kristo nye moperperisiyi: Kasoteywekwani ce poytoy Muyet Nyetilil kuce poru kule puryo kot operperisiyi.

<sup>2</sup>Oponte nerekwec ce caṅ oko mwoninto nyewo om mukuleymwani.

<sup>3</sup>Omnye aomöce kule cecupo oṅnkocone wule mite Kristo om kaynetap mpo yeyamwani cepo yememwani ce cetupce.

<sup>4</sup>Cekto kuce pikap Israel ce kikwey Yiyintet. Kikwey kwec lekoyi oṅnkunyor woyintap Yiyintet. Kikoci kiroyet oko ntarastinek, ponto mpo sayet nyepo manta, oṅnkikurtoci Yiyintet cekto.

<sup>5</sup>Cekto kuce mucokoronikap mpo kukonyo taman ok oyeny. Kicone Kristo kuyu ci arenyacek. Kante cikasta Yiyintet okokoy okoy okokoy, Yunyoto.

<sup>6</sup>Puryo kot omwowu kule kimokwiyisiyi kurtoyeta Yiyintet. Omnye puryo kot kupo piko tokol cepo Israel Yiyintet.

<sup>7</sup>Oṅnkupuryo kot ku lekokap Yiyintet piko tokol ce kesenisyekap Apram. Omnye kimwoci Yiyintet Apram kule, “Kupunte Isaka kuye mesonyoru nyi mucokoronik.”

<sup>8</sup>Poru ṅalecu lekok co kiceyi kuyu kwak, kuce puryo kot kweku co lekokap Yiyintet, ntene lekok cepo kiroyet kuce ciyite kule mucokoronik cepo manta.

<sup>9</sup>Omnye kikirto Yiyintet om ṅalecu kule, “Mosoketukey ani om pesyet nye kweyat, kunyo mosukuyi Sara werit.”





<sup>10</sup>Ntene puryo kot ku ñalecu nkit pate, omnye lekopak Rapeka oyeny kuce kiponto kwan akenke nyoto ku kukonyo Isaka.

<sup>11-12</sup>Ntene ye kitompo ceyi cekto oñnkutompo kot kwiy kiy nye topon nto nye miyat, kimwoci Yiyintet Rapeka kule; “Mosukwici Werit nyewo yisyet Werit nye miniñ” Kwiyakay kuyunyoto sukuñet kutok kupoyit manta kule kweye Yiyintet cito nye kokur nye puryo kot kuyoñe tukuk ce yiye piko.

<sup>13</sup>Kuyu wulo kicesil kule, “Kyacäm ani Yakopo, ntene asenker Esawu.”

<sup>14</sup>Kunyo mecemwowu kulene? Mocemwowu kule puryo kot kwiy Yiyintet cepo manta? Puryo kot kuyunyo mpo kisic!

<sup>15</sup>Omnye kimwoci Yiyintet Moses kule, “Mosakalye ani ci tokol nye kakwey, mosarire ci tokol nye kacäm.”

<sup>16</sup>Kunyo puryo kot ku kito nye möce cito nto nye yiye cito nye ponto latik, ntene kwone pate kokolyoyisyet nyepo Yiyintet nkit.

<sup>17</sup>Omnye mwocini silutekap Yiyintet Farawo kule, “Kyakweyiñ ani nyi yiku kinko kule sukuñet oporu kamukeywekwani, oñnkoporu cinket kaynemwani om koret tokol kumukul.”

<sup>18</sup>Kunyo rire kukalya Yiyintet ci tokol nye keyen neto.

<sup>19</sup>Kunyo mesemwowo ani akenke om akwek kule “Ye yunyoto, omne yu tokumite kulele Yiyintet cito? Do nye muce kukereka Yiyintet om kito nye möce?”

<sup>20</sup>Ntene corwenyu, nyi ku ño ci nye mucu ñalal wekyi Yiyintet. Puryo kot kutepe teret cito nyo kikwi teronoto kule, “Omne seyia ani nyi kuyunyi?”

<sup>21</sup>Ntene ponto cito nyo yiye terenik kwiyisye menet kuyu wule moktoy, muce kwiyisye menonoto akenke kwiy terenik oyeny, akenke kunye kyiyisye om sokwonutek, nto ake kunye kyiyisye kwak okokoy.


<sup>22</sup>Kunyo yunyoto kupoyit manta wule kikwiya Yiyintet. Kimöce kule oporu nyerunotet nyenyi oko kamukeywekyi. Yoto kumuytoci oñnkukoñis koromun om wule mite piko ce kinyerci neto, co kiceyiyta kule kyaranta.

<sup>23</sup>Kimöce mpo kule oporu woyinto nyenyi nyo kicekonec acek ciku piko cepo kokolyoyisyenyi, acek coto kuce kikiwiya neto sukuñet kunyor woyinto nye nyi.

<sup>24</sup>Omnye acek kuco kicekurec, nye puryo kot ku Yutayek pate nkit, ntene mpo Lamek.

<sup>25</sup>Kuyu wulo mwowu kitaputap Yosiya kule, “Piko ce kipuryo kot ku cikwani, mosokure ani cekto, ‘Pikwani’ Yemet nye kipuryo kot ocöme, Mosokure ani. ‘Cämanenyu’

<sup>26</sup>Nto om wulyo ake tokol wule kicemwocine cekto kule, ‘Puryo kot oyiku pikwani’ ku wuloto wule mosicekure cekto lekopak Yiyintet nye sope.”



<sup>27</sup>Kunyo kurtoy kumwowu mpo Isaya ñalek ce nöme Israel kule, “Nka kot ku cañ pikap Israel cete coñinto ñaynet nye mite tapantap ruretyet, ntene tukusic pate ce mokusopco.”

<sup>28</sup>Omnye mosukuwosontyi Mokoryontet musankut koret om lakwar.

<sup>29</sup>Kerkey oko wulo kiñor Isaya kenya kumwoy kule, “Nto kipuryo kot kupokokwec acek Mokoryontet nyepo kamukeywek tokol kesenisyek, nto kicekerkeyitu Sotom, nto kicekerkeyitu mpo oko Komora.”

<sup>30</sup>Kunyo mocemwowu ne? Mocemwowu kule Lamek co kipuryo kot kusyeme kule cesatkey cenyolu om wule mite Yiyintet kuce kicesat kunyol om wule neto omnye kiyen.

<sup>31</sup>Nto pikap Israel ce kiceny ntarastit nye sukuñet kusat cekto kunyol om wule mite Yiyintet kuce mnonyor?

<sup>32</sup>Omne? Omnye kito nye kikwiyy kunye puryo kot kunöme koyenet, ntene nöme pate yisyonutek. Yoto kunoc cekto rwantet nyo nokisiyi.

<sup>33</sup>Kuyu wulo kicesil om silutekap Yiyintet kule, “Akäs pa, kokoci Siyon rwantet nye noce piko. Rwa nye noce piko koputis; Ntene puryo kot kolilone ci tokol nyo yene neto.”

## Romek 10

<sup>1</sup>Mpo yeya, amöce ani om mukuleymwani kule nto cisop pikwani, osomncini cekto Yiyintet.

<sup>2</sup>Oñnkonketi kule yweye cekto Yiyintet koromun, ntene puryo kot kucone koyweyisyyet nyimwa ñomnonet nyepo manta.

<sup>3</sup>Omnye tompo kot konket aret wule wektoy Yiyintet kunyol piko om wule mite neto, ntene kusyem cekto aret nyimwa nkit, kunyo puryo kurup cekto aret nyepo Yiyintet nyo säte piko kunyol.

<sup>4</sup>Omnye Kristo kunye woñntoy ntarastinek sukuñet kusatakay kunyol om wule mite Yiyintet ci tokol nye kikoyen.

<sup>5</sup>Ñalek ce kisil Moses ce nöme wule cesotitokey cenyol piko om wule mite Yiyintet ye kacerup ntarastinek kucu kule, “Mosukusop cito nye yiye ñalek ce mwowu ntarastinek.”

<sup>6</sup>Mwowu silutekap Yiyintet ce nöme wule cesotitokey cenyol om wule mite Yiyintet kupunte koyenet kule, “Mente atep kwinyi nkit mwowu kule, ño nye mosukuwo torot.” Yoto kuye kacesut Kristo kuco ñony.

<sup>7</sup>Mente mpo atep mwowu kule, “Do nye mosukuwo koret ñony?” (Yoto kuye kocesut Kristo kotutune met.)



<sup>8</sup>Dalek ce mwowu kucu kule, “Korikyok akwek lokoywekap Yiyintet om kutuwakwok oko mukuleywekwok orit.” Lokoywek coto kuce cemwoytoy acek cepo koyenet.

<sup>9</sup>Omnye ye kejalal nyi nkit om kutiŋun mwowu kule, Yesu kunye Mokoryontet oŋnkiyen om mukuleyŋuŋ orit kule kiŋet Yiyintet Yesu kotutune met kuye mocisopiŋ.

<sup>10</sup>Omnye om koyenet nyinyacek kuye cesotokisye cenyolu om wule mite Yiyintet. Ye kacejalale acek kutuwakyo yoto kuye cisopec.

<sup>11</sup>Mwowu silutekap Yiyintet kule: “Puryo kot kolilone ci tokol nye kokuyen neto.”

<sup>12</sup>Omnye puryo kot kumite pciyatet om kwenutap Yutoyin oko Lomin. Mokoryontet akenke kunye Mokoryontet nyepo piko tokol oŋnkukocini kupeyok cepo Mokoryontit piko tokol.

<sup>13</sup>Kuyu wulo mwowu silutekap Yiyintet kule, “Mosicisop ci tokol nye kure kaynetap Mokoryontet.”

<sup>14</sup>Ntene muce kulene kukur kaynet nyenyi, ye puryo kot kucömis? Komuce cekto kulene kot kuyen ye tompo kot kulim lokoywek? Komuce cekto kulene kulim lokoywek ye puryo cito nye komwoci.

<sup>15</sup>Muce piko kulene kumwaytat lokoywek ye puryo kiyokik ce kiciyokto? Kuyu wolo mwoytoy silutekap Yiyintet kule; “Toponec koromun kerekokap cito nyo sutu Lokoywek ce toponec!”

<sup>16</sup>Ntene puryo kot kuyen piko tokol lokoywek ce toponec. Kimwoy Isaya nkit kule, “Mokoryontet, ŋo nye kicäm Lokoywekyacek?”

<sup>17</sup>Kunyo coni koyenet ye kacelimnte lokoywek, oŋnkukwoni lokoywek ye kacemwayta lokoywek cepo Kristo.

<sup>18</sup>Nteye katep kule, manta kule puryo kot kulim piko lokoywek? Ntene kilim cekto kuyu wulo mwowu silutekap Yiyintet kule: “Kiwo polotet nyepo ŋalek cikwa kupunte koret tokol, kipunto ŋalek cikwa wule kiŋet koret.”

<sup>19</sup>Atep yec kule, kipuryo kot konket pikap Israel? Moses kunye po tayta nye kimwoy kule: “Mosokonok ani acorokyi piko ce puryo kot ku yemet nyepo manta, mosokonok onyerci yemet nye perper nye puryo kot kuponto ŋomnon.”

<sup>20</sup>Kunyo kinyikan Isaya yo kimwowu kule, “Kinyorwo ani piko ce kipuryo kot kuceŋoto, Kyoporkyikey piko ce kipuryo kot kutepo ani.”


<sup>21</sup>Ntene kujalal ce nöme Israel kumwoy kule: “Kyoyite ani yewuniyek kwani kuwany pesyet tokol, atoroc pic ce kitoyis, ce molimwo.”

## Romek 11

<sup>1</sup>Kunyo katep ani kule, kitay so Yiyintet pikyi? Puryo kot kuyunyo! Oyiku mpo ani Israel, oyiku keseniyantetap Apram, opoye aretap Penjamin.



- <sup>2</sup>Puryo kot kutay Yiyintet pikyi ce kikwey ikye keny. Oṅnket akwek ṅalek ce mwowu silutekap Yiyintet ye kiwosontyini Eriya pikap Israel om wule mite Yiyintet kule.
- <sup>3</sup>“Mokoryontet, kipakāc cekto workoyik, oṅnkoturpup oteputek ce pele korosek, ani nkit pate akenke nye kwoṅetu, kunyi syeme kule cepakāca.”
- <sup>4</sup>Ntene kuwekyi Yiyintet kumwoci neto ṅolyo ne? Kumwoci kule. “Kwakwey ani pikyu elifunek tisap ce puryo kot kusoye yiyintet nyepo mwiynan Paal.”
- <sup>5</sup>Kunyo yunyoto mpo yawut pesyosyecu, mite piko ce ṅeri ce kikwey Yiyintet om poypoyenyi.
- <sup>6</sup>Cone kweyisyet nyenyi poypoyet pate, ntene puryo kot ku tukuk ce kikwiw cekto. Omnye nto kikwiw Yiyintet kupo tukuk ce kikwiw piko; nto puryo kot kupo poypoyet nyenyi manta.
- <sup>7</sup>Kunyo ce mwowu ne? Puryo kot kunyor piko cepo Israel kito nye kicenye. Luket nyepo piko ce ṅeri ce kikwey Yiyintet ce kinyor. Kimiṅitu cut alake nye molime kursyetap Yiyintet.
- <sup>8</sup>Kuyu wulo mwowu silutekap Yiyintet kule: “Kikoci Yiyintet kuperperitu mukuleywek cikwa, puryo kukāste konyek cikwa, nto mpo kulimnta yitik cikwa okay pesyoni.”
- <sup>9</sup>Kimwoy Tauti kule: “Roke kwek sokwonutek musatit nye tekat mwenet nye kitany cekto nyo sucini!
- <sup>10</sup>Roke kukoryo konyek cikwa sukuṅet mente kot kukāsta: mente kot kumuny cekto co kesene terekok ce nyikisec.”
- <sup>11</sup>Kunyo katep kule, kicinoc Yutayek sukuṅet kosuto cekto? Puryo kot kuyunyo! Kiwurta kwiy miyotyeyet, kunyo kacontyi kosopet Lamek sukuṅent kucorok Yutayek.
- <sup>12</sup>Kunyo ye miyotyoni cepo Yutayek kuce kisut mokoryontit om koret tokol, oṅnku miyotyeyet nyimwa nye kisuto kunye kisutyi kupeyok wule mite lamek. Kunyo kupeyok ce tya nyun ce cetosyini kucanṅit ye keyen Yutayek tokol.
- <sup>13</sup>Oṅololwok ani yawut akwek Lamek, oyiku kiyokintet nyepo Lamek, mososilkey om yisyenyu,
- <sup>14</sup>sukuṅet asutyi kucorok mpo yeyamwani Yutayek, oṅnkamuc kot osop alak om cekto.
- <sup>15</sup>Omnye ye kicetoye cekto, yoto kuye kikwiye koret corwantit oko Yiyintet, kunyo mosukwiw kulene ye kacecām cekto? Yiku yoto kotutunet nye numu met.
- <sup>16</sup>Ye tilil mukatya kereryantet nye kisic nye kocikoci Yiyintet kwek korosek cepo tayta, kutilil mpo mukatyantet tokol kumukul. Nteye tilil tikityantet nyepo ketit nye kocikoci Yiyintet, kutililec mpo sarisyek tokol.
- <sup>17</sup>Kiceyepa sarisyek alak cepo ketitap seitunit nyo cipote oṅnkiyomo kupite sarisyek cepo ketit seitunit nyepo samiyita, Akerkeyekey akwek oko ketit seitunit nyepo



samiyita, kunyo omite yawut oyemntoy swamet nyepo soponto nye topon nyepo Yutayek.

<sup>18</sup>Kunyo puryo kot kumisyini onyil piko co kuceyepta kuyu sarisyek. Omuci akwek osilkey kulene? Oyiku sarisyek pate, puryo kot otinye tikityek, tikityek kuce tiyok akwek.

<sup>19</sup>Ntene mesemwowu kule, “Kiceyep sarisyek sukuṅet kutok poroyinto nyimwani.”

<sup>20</sup>Manta, kiceyepta cekto omnye kipuryo kot kuyen, yoto pure nyi otepto omnye kiyen, ntene mente apurte kasoteywek cepo silotet kupo ḡaleca, ripkey.

<sup>21</sup>Omnye kipuryo kot kwasta Yiyintet Yutayek ce kerkey sarisyek cepo ketit. Soti nyi kule muce kwastiṅ.

<sup>22</sup>Ceköse om ḡaleca kule ponto Yiyintet poypoyet nyewo oṅnkunyeker koromun om wule mite piko co kikosuyto, ntene tala om wule mite nyi ye ketosyikey om poypoyenyi, nteye puryo, mosiceyeptiṅ mpe nyito.

<sup>23</sup>Nteye katay Yutayek kwasta toyisyet nyimwa, mosiceketyi cekto ye kimate. Omnye muce Yiyintet kuketyi cekto ye kimate.

<sup>24</sup>Okerkeye akwek Lamek oko saryantet yepo ketit seitunit nyepo samiyita nye kaceyep oṅnkiyomo kupite ketit seitunit nye cipote oṅnkurok kupuryo kot kucomntös. Kerkey Yutayek oko ketit seitunit nye cipote, kunyo mosukulekitit koromun ye mokuketyi Yiyintet sarisyek kupite ketimwa nyepo keny.

<sup>25</sup>Mpo yeya, mite ḡalek cewuṅotin cepo manta ce amöce ani kule oṅnket akwek. Omnye mosukuripok nye mosutekey kule ciku ḡomec. Coto kucu kule, puryo kot kopure toyisyet nyepo Israel okokoy, ntene pure pate okoy ye kakwa lamek tokol wule mite Yiyintet.

<sup>26</sup>“Kuyunyoto wule mecisopto pikap Israel tokol, kuyu wulo mwoytoy silutekap Yiyintet kule: Mosukucone kosopintet Siyon, Mosukunum miyotyoniḡ tokol cepo kesenisyekap Yakopo.

<sup>27</sup>Mosayiy ani kirotyani oko cekto, ye onumu miyotyoniḡwa.”

<sup>28</sup>Omnye kitay cekto lokoywek ce toponec, kunyo kikwek Yutayek pikap Yiyintet kupo toponiyemwakwek Lamek. Ntene omnye kikwey Yiyintet cekto, kunyo coronutekyi kupo toponiyetap mpo kukomwa.

<sup>29</sup>Omnye puryo kot kuwec Yiyintet kasoteywekyi om kule ḡo nye kweye neto oṅnkukoci kupeyok.

<sup>30</sup>Ntene akwek Lamek, kyotoye Yiyintet om yun kipo tay, ntene kukalyak yawut Yiyintet omnye kitoyis Yutayek.

<sup>31</sup>Om aret nyeyu nyitenyi nye kicerirenak akwek, kunyo toye Yutayek, yawut Yiyintet sukuṅet kukalya neto mpececko.



<sup>32</sup>Omnye kiwec Yiyintet piko tokol kwek mopusinek cepo toyisyet kule sukuṅet kuporci kukalya cekto tokol.

<sup>33</sup>Wo koromun mokoryontit nyepo Yiyintet! Wo mpo ṅomnonet nyenyi oko muswokyontit, ṅo nye muce kumwoci neto kito nye mokwiy? Do nye muce kunket arosyekyi?

<sup>34</sup>Kuyu wule mwowu silutekap Yiyintet kule: “Do nye nkete kasoteywekap Mokoryontet, Do nye muce kukoci neto ṅomnonet?”

<sup>35</sup>Do nye kukoci neto kenysis kiy? Sukuṅet kuket kiyoto.”

<sup>36</sup>Omnye kitany neto tukuk tokol, kunyo mitowune tukuk tokol kamukeywekyi. Kopurune woyinto wule mite Yiyintet okokoy. Yunyoto.

## Romek 12

<sup>1</sup>Kunyo osomok ani akwek mpo yeya, om poypoyetap Yiyintet nyewo nye kikonec kule okoyte porwonikwok kwek korosek ce tililec om wule mite Yiyintet. Oyiysisye yisyonutekyi ce ṅerece neto. Nyoto kunye sayet nyepo manta nye roke osoye akwek.

<sup>2</sup>Monte cecām soponto nyepo koret; nyepo pintap pesyosyecu. Ntene ayaste kuwec Yiyintet kasoteywekwok cepo orit sukuṅet oṅnket cōmisyetap Yiyintet nye topon oṅnkoṅerec neto kupoyit manta.

<sup>3</sup>Oṅololwok ani akwek tokol om kupeyok ce kikono Yiyintet. Ntene asoti kule puryo kot kuroke kusutkey ci ake tokol om akwek kusirte ye misyini. Möce kusot ci tokol kwine nkit wule tento koyenet nye kikoci Yiyintet.

<sup>4</sup>Ceponte kereryanik wok ce caṅ om porto akenke, ntene oṅnkuponto kereryantet ake tokol yisyet nye yiye.

<sup>5</sup>Kuyunyoto om wule ce mite acek nka kot ciku caṅ, ntene ciku akenke om koyomotet oko Kristo, Omnye kiciyomec tokol ciku akenke kuyu wulo yunto porto.

<sup>6</sup>Kunyo roke ciyisye kokotutekyacek ce pciyotin kuyu wule yunto kupeyok ce kikonec Yiyintet. Ye kicekonec acek kokotutyet nye cemwoytoy lokoywek, kumisyini ciyisye kuyu wolo yunto koyenet nye ceponte.

<sup>7</sup>Nteye kule kiyi yisyonutek, kumisyini kiyiisye. Nteye kule cinetisiyi, kumisyini cinetisiye.

<sup>8</sup>Nteye kule cititiri piko alak, kumisyini kiyi kuyunyoto. Nto ci ake tokol nye pcicini piko alak tukuk, kumöce kule kupciyta nyoto ce yeme. Nto cito nye ponto kamukeywek; kumöce nyoto kwiyisye swama; nto cito nyo kolyoyisiyi kumisyini kwiyis nyoto om ṅerekwek.

<sup>9</sup>Misyini kupoyit cōmisyet manta. Asenker miyotyet, oṅnkorip pate kiy tokol nye topon.





- <sup>10</sup>Ocäm̄nkey akwek kwakwek nkit kuyu mpo yeya ce tupco, oṅnkuywey ci ake tokol citake.
- <sup>11</sup>Oyiyisyē swama, monte cepuren. Oyici Mokoryontet yisyet om mukuleyto akenke.
- <sup>12</sup>Kukonok koyenet nyimwoṅ ṅerekwek, omuytoci om ṅerekwek, oṅnkosome okokoy.
- <sup>13</sup>Opcici tukuk piko cepo Yiyintet co moponto kiy, oṅerekyi atoroc om korikwok toyek ce mukulec konyek.
- <sup>14</sup>Osomnci kupeyok piko co toṅonyok, osomnci kupesyok ntene monte cecup.
- <sup>15</sup>Oṅerece oko piko co mite kuṅerec, omesye oko co mite kumesyi.
- <sup>16</sup>Opurte kasoteywek cepo moyet akenke akwek kwakwek nkit, monte cesilekey, ntene ocäm̄ yisyonutec co cenyile, monte cesutkey kule ciku ṅomec.
- <sup>17</sup>Ye kokwiwuṅ citake miyotyō monte ceyokune miyotyēt ake. Oyiye tukuk ce toponec ce cōme piko tokol.
- <sup>18</sup>Oyiy akwek nkit kiy ake tokol nye mukoktos sukuṅet opurte kalyet oko piko tokol.
- <sup>19</sup>Coronutekwani, monte ceyokukey, ntene ayaste kwiy co pate nyerunotet nyepo Yiyintet, omnye mwowu silutecap Yiyintet kule, “Mosoyoku ani, ani nye Mosoketu.”
- <sup>20</sup>Ntene ayiy kuyu wolo mwowu silutecap Yiyintet kule, “Ye ponto puniyontet nyenṅṅ rupet, ipay, ye ponto melelya, ikoci peko. Omnye ye keyiy kuyunyoto, kukerurukyī metit nyenyi oṅonyntit nyepo nesek’”
- <sup>21</sup>Monte kupēlok miyotyēt, ntene oyiyisyē toponiyet sukuṅet opēl miyotyēt.

### Romek 13

- <sup>1</sup>Misyini kuywey ci tokol poytoyik cepo koret. Omnye kwone kamukeywek tokol wule mite Yiyintet. Kunyo konu Yiyintet poytoyik co yiyisyi yawut.
- <sup>2</sup>Ci tokol nye katay poytoyik ce yiyisyi yawut, kukatay cito nyoto piko co kikwey Yiyintet, nto cito nye kayiy kuyunto kukomutyikey neto nyoto musankut nkit.
- <sup>3</sup>Omnye puryo kot kumuye piko ce toponec poytoyik cepo koret, ntene muytos piko co miyotec. Ye memöce nyi kule amuye poytoyik kumöce kule yiy ce toponec, mosukukastiṅ nyi cekto.
- <sup>4</sup>Omnye mutworintetap Yiyintet neto nye yiyisyi kupo toponiyet nyenṅṅ. Ye keyiy ṅalek ce miyotec, kuroke muyi om wule mite neto, omnye po manta kamukeywek kupiriṅ nyi. Neto kunye mutworintetap Yiyintet, kunyo yiyisyē nerekwecap Yiyintet om wule mite piko co miyotec.
- <sup>5</sup>Möce aywey poytoyik co ponto kamukeywek, nye puryo ku kule omnye nerek Yiyintet, ntene omnye nketi nyi nkit om ṅomnoneṅṅ.
- <sup>6</sup>Kuyunyoto omne sokweye akwek mosoret, omnye yiye poytoyik yisyetap Yiyintet ye yiye yisyemwa.



- <sup>7</sup>Kunyo okwecini tukuk ce yoce cekto. Okwey mosoret, okweye mosoret nyepo mosonok oṅnkaywey piko tokol cewoyec.
- <sup>8</sup>Monte cipurte pesen nyepo citake ntene acäm̄nkey akwek nkit, ci ake tokol nye kacäm̄ latyenyi kunye iyititoy cicoto ntarastinek.
- <sup>9</sup>Omnye ntarastinecu kule, “Mesekwayan, meporisye, mecorsye, mecoroku.” Kuce yomntos kwek ntarastit akenke nye mwowu kule, “Misyini kucäm̄ cito latyenyi kuyu wulo cöm̄ntoykey nyi nkit.”
- <sup>10</sup>Ye kucäm̄ cito latyenyi kupuryo kot komuce yici miyotyö. Kunyo ye kokecömis kuye kaciyitita ntarastinek tokol.
- <sup>11</sup>Misyini ayiy kuyunyoto omnye oṅnket akwek sawet kule kopunto pesyosyek, oṅetye rwonto omnye kolekitit yawut ye mocisopec kusir wule kicisotitoy acek kunyo.
- <sup>12</sup>Kapok menonet, kayec koret kwek pet, okany kyaste mokyiyisi yisyet nyepo menonet, okany cenäm̄ Karik cepo poryet nye ceporye wule mite lakweyet.
- <sup>13</sup>Okany cepesetate kuyu piko cepo lakweyet nyepo pet kwen, nye puryo kot ceṅerece tumwonik ce miyotec oko pokitet, nto sakwayanadet, oko syepisyet, oko wokutyet oko corokyinotet.
- <sup>14</sup>Ntene alac Mokoryontet Yesu Kristo, kwek loṅet, ayaste monte cisot tukuk ce corokyini porwonikwok.

## Romek 14

- <sup>1</sup>Atoroc opurcine oko cito nye moponto swamet om koyenet. Ntene mente cetintentyine oko neto om ṅalek cepo kasoteywekyi nkit.
- <sup>2</sup>Ponto citake koyenet nye muce kwam kiy ake tokol, ntene kuponto citake yec koyenet nye puryo kot kupo swama, kwome nyoto nkuyek pate.
- <sup>3</sup>Puryo kot kuroke kunyil nyo ome kiy ake tokol nyo puryo kot kwome, oṅnkupuryo kot kuroke kumut musankut cito nyo ome nkuyek pate kumutyi nyo ome kiy ake tokol. Omnye kicäm̄ Yiyintet mpene cito nyoto.
- <sup>4</sup>Nyi ku ṅo nye mucu kot mutyi musankut mutworintetap cito ake. Ntene Mokoryontenyi nye mosukupor kule yonye nto mosukosuto cito, kunyo muce kuyo omnye mokoryontet kunye keyoṅnto neto.
- <sup>5</sup>Sote cito ake kule pesyo nyewo koromun pesyet akenke kupël pesyosyek alak, kusote citake yec kule kerkey pesyosyek tokol. Roke kukwilakay ci tokol om kasoteywekyi.
- <sup>6</sup>Ci tokol nye ripe topon pesyet akenke, kwiye nyo kuyunyoto om koyweyisyet nye yweye Mokoryontet. Ci tokol nye ome kiy ake tokol, kwiye nyoto kuyunyoto om koyweyisyet nye yweye Mokoryontet, omnye kostoy neto Yiyintet, ci tokol nye katay



nye puryo kot kwome tukuk alak, kwiye nyoto kuyunyoto om koyweyisyet nye yweye Mokoryontet, omnye kostoy Yiyintet om omik.

<sup>7</sup>Omnye puryo ci mpo akenke om acek nye sope kwine nkit, oṅnkupuryo nye me kwine nkit.

<sup>8</sup>Ye ce soptosi acek, kupo Yiyintet nkit, nteye kocepoku kukocepeku kupo Mokoryontet. Kunyo ye cesoptosi nto ye kacepoku cepoye Mokoryontet.

<sup>9</sup>Omnye kime Kristo oṅnkotutune met sukuṅet kwek Mokoryontet nyepo piko ce soptos oko ce kipok.

<sup>10</sup>Kunyo omne semutyi nyi yeyaṅuṅ musanku, nyi nyo iyome nkuyek pate? Omne senyil nyi yeyaṅuṅ nyi nyo iyome kiy ake tokol? Mosiciyone acek tokol taytap Yiyintet sukuṅet kumutwec musankut.

<sup>11</sup>Omnye mwowu silutekap Yiyintet kule, “Mwowu Mokoryontet kule, Ayiku Yiyintet nye Sopot, Mosukukutuṅe ci tokol taymwani, Mosukuṅalal ci tokol kumwoy kule, Oyiku ani Yiyintet.”

<sup>12</sup>Kunyo mosukoyit ci ake tokol om acek tukuk ceci koyityi Yiyintet.

<sup>13</sup>Kunyo akente kyaste mocemutyinikey musankunek. Ntene möce asot kule mente teyyi kiy nye muce kot kunoc yeyaṅuṅ nto kuwec kusuci miyotyet.

<sup>14</sup>Koyomotet nye oponte ani oko Mokoryontet Kristo kunye kikono oṅnket kupoyit manta kule toponec omik tokol. Ntene ye cöme cito ake kule puryo kot kutoponec omik tokol, kuporkey kule puryo kot kutoponec omik coto om wule mite cicoto.

<sup>15</sup>Ye komwontyi yeyaṅuṅ om kito nye iyome nyi kuporkey kule puryo kot yiyisye nyi cömisyet. Kunyo mente ayaste kot kowurta omik ce iyome nyi cito nye kimeci Kristo!

<sup>16</sup>Mente ayaste kot kunyor kaynet nye miyat tukuk ce kure nyi kule toponec

<sup>17</sup>Omnye poytoyisyetap Yiyintet kunye puryo kot kunömekey oko tukuk ce kyome nto ce ceye, ntene nömekey pate oko tililinto oko kalyet oko ṅerekwek ce konu Muyet Nyetilil.

<sup>18</sup>Kunyo ci tokol nye yicini Kristo yisyet om aret nyeyu nyitenyi kunye nyoru cömisyetap Yiyintet oṅnkucämnta ci tokol neto.

<sup>19</sup>Kunyo möce cetyikyini acek okokoy tukuk ce sutu kalyet, oṅnkyikalyekey acek kwacek nkit.

<sup>20</sup>Monte ciwurte kwaran yisyet nyepo Yiyintet kukesac omit pate. Möce kyam omik wok tokol, ntene miyat ye kakyam kiy nye muce kowurta citake kot kosuci miyotyö.

<sup>21</sup>Kunyo pëlisyi ye kacetay mokyam peny, nto ceye komek nto kiyi mpo kiy ake tokol nye sutyini kosuto yeyaṅuṅ.



<sup>22</sup>Rip koyenet nye ponte kwek nye nketi nyi nkit oko Yiyintet. Ponto kupeyoy cito nye puryo kot kumutyinikey musanku ye mite kwiye ñalek ce nkete nkit kule po manta!

<sup>23</sup>Nteye mune neto omik ce ome, kumutyini Yiyintet neto musankut ye kam omnye puryo kot kunömekey oko koyenet nyenyi. Nto kiy ake tokol nye puryo kot kunömekey oko koyenet kunye miyoty nyoto.

## Romek 15

<sup>1</sup>Roke ceponte acek swamet om koyenet sukuñet cikalye piko co moponto swamet cetorci terekokwa. Puryo kot kuroke ciñerekey acek kwacek nkit.

<sup>2</sup>Ntene misyini ci ake tokol om acek kuñerec mpo yeyanyi sukuñet kukalya om koyenet nyimwa.

<sup>3</sup>Omnye kipuryo kot kuñerekey Kristo nkit, ntene kikwiw kuyu wulo mwoytoy silutekap Yiyintet kule, “Kitica ani cupisyet nyo ñolole piko co cupiñ nyi.”

<sup>4</sup>Omnye ñolyo ake tokol nye kicesil kenye om silutekap Yiyintet kunye kicesil sukuñet kunetec acek, sukuñet cikenisye, oñknyemuytoci oñknyetitir ye cesumoni silutekap Yiyintet.

<sup>5</sup>Kunyo kante kukonok akwek Yiyintet nyepo muytocinotet oko kotitrotet, sukuñet onyuru akwek kwakwek nkit kasoteywek ce kerkey, ye korup wule yunto Yesu Kristo.

<sup>6</sup>Sanjet oyiku kutit akenke, akaste Yiyintet oñku kwanitap Mokoryonteny Yesu Kristo.

<sup>7</sup>Kunyo oñerekyinikey akwek kwakwek nkit kupo woyinto nyepo Yiyintet, kuyu wulo kicämak Kristo.

<sup>8</sup>Omnye komwowok ani kule kikwek Yesu Mutworintetap Yutayek sukuñet kupor kule kiyitita Yiyintet kupoyit manta kurtoyutek ce kimwoci neto mpo kukonyo.

<sup>9</sup>Sukuñet komuc Lamek kukasta Yiyintet om poypoyenyi kuyu wolo mwowu silutekap Yiyintet kule: “Kunyo mosakastiñ ani nyi om wule mite Lamek. Mosotum akaste kayneñuñ”

<sup>10</sup>Kumwoy yec kule: “Añerec Lamek oko pikap Yiyintet ce kweyotin!”

<sup>11</sup>Kumwoy yec kule: “Akaste Mokoryontet akwek Lamek tokol. Akaste koromun akwek piko tokol!”

<sup>12</sup>Mwowu mpo Isaya yec kule: “Mosukuco keseniyantetap Yese; nye mosukuñet kupayta Lamek; mosukukenekey cekto neto.”

<sup>13</sup>Kunyo akente kukonok akwek Yiyintet nyepo kokenotet ñerekwek tokol, oko kalyet kupunte koyenemwoñ nye oponte om wule mite neto, sukuñet kutosyikey kuner koyenet nyimwoñ om swameta Muiyet Nyetilil.



- <sup>14</sup>Mpo yeya, oṅnket ani kule oponte akwek toponiyet nyewo koromun, oṅnketi kule oponte ṅomnonet tokol; kunyo omuci anetkey akwek kwakwek nkit.
- <sup>15</sup>Ntene om parwani kosilwok om nyikanatet ṅalek ce kasotwok. Kwoyiyisye kuyunyoto om kamukeywek ce kikono Yiyintet.
- <sup>16</sup>Oyiku mutworintetap Yesu Kristo nye oyiyisi om wule mite Lamek. Oyiyisi kuyu tisintet ye omwoytoy lokoywek ce toponec ce kwone wule mite Yiyintet; sukuṅet kwek Lamek kokotutyet nye cömntoy Yiyintet, oṅnkusat Muyet Nyetilil.
- <sup>17</sup>Kunyo om koyomotet nye oponte om Yesu Kristo, omuci osilkey om yisyet nyepo Yiyintet.
- <sup>18</sup>Mosaṅalale om nyikanatet ṅalek pate ce kikwiye Kristo kupunte wule amite ani antoci Lamek kuywey Yiyintet om ṅalek oko yisyonutek.
- <sup>19</sup>Om swamet nye kicipor om pelutok cepo kakitat oko om swametap Muyet Nyetilil. Kunyo om poninek kuceke Yerusalem okoy Iluriko. kyamwaytate okoy awany lokoywek ce toponec ce nöme Kristo.
- <sup>20</sup>Dolyontet nye amöce ani kwak okokoy kunye amöce kule anwaytate lokoywek ce toponec om wule tompo kot kulim piko ṅalek cepo Kristo, nye puryo kot amöce kule otosyi yisyet nye kicece cito ake.
- <sup>21</sup>Kuyu wulo Mwowu silutekap Yiyintet kule, “Mosukukäs piko ce kitompo kot cemwoci Lokoywekyi, Mosukonket piko ce tompo kot kulim mpo kisic.”
- <sup>22</sup>Om ṅolyontoni, kucekerekta ani aret ce caṅ ye maco orutocok akwek.
- <sup>23</sup>Ntene omnye kwawany yawut yisyonutekwani om komosta nyitenyi, oṅnkurok kyamac kuloyit kule aco wule omite akwek.
- <sup>24</sup>Mosayiy kuyunyoto yawut amöce kule cekäsak akwek om poninekwani ye otili oweti Supaniya. Amöce kule akalya ani akwek opunte wuloto, om letut ye kocipur oko akwek om ṅerekwek pesyos ce ṅeri.
- <sup>25</sup>Ntene yawut pakenke amite ani oweti Yerusalem om yisyetap Yiyintet nyepo piko cepo wuloto .
- <sup>26</sup>Omnye kucäm nkit pikap Yiyintet cepo Meketoniya oko Akaya kule cikalye cikoci kokotutek pikap Yiyintet pononik ce mite Yerusalem.
- <sup>27</sup>Kucäm cekto nkit, ntene ṅalek cepo manta kucu kule, ponto cek pesento kule misyini kukalye cekto pononik omnye pcicintos Yutayek oko Lamek kupeyok cepo soponto nyetilil, kunyo misyini kukalya cekto Yutayek om tukuk cepo porto.
- <sup>28</sup>Ntene ye kawany ani yisyet nyitenyi ye kokoci cekto pesanik tokol ce kiciruruki, mosonomen poninek coto.
- <sup>29</sup>Oṅnketi kule ye kaco wule omite akwek mosoconte kupeyok tokol cepo Kristo.



<sup>30</sup>Osomok ani akwek mpo yeya om Mokoryontet Yesu Kristo oko om cömisyet nye konu muyet kule ciyomekey oko ani. Oṅnkosomwo Yiyintet koromun.

<sup>31</sup>Osomwo oripokisye topon om wule piko ce puryo kuyen cepo Yuteya, oṅnkucām piko ce mite Yerusalem yisyet nyimwani.

<sup>32</sup>Kunyo mosaco wule mite akwek oponte ṅerekwek ce caṅ ye kacām Yiyintet, oṅnkunṅerekyi tontonet nye topon om wule omite akwek.

<sup>33</sup>Kante Kopur Yiyintet nyepo kalyet oko akwek tokol. Yunyoto.

## Romek 16

<sup>1</sup>Kaporwok ani akwek yeyanyo Foipe nye kokolyoyintet nyepo pikap Yiyintet ce mite Kenkeriya.

<sup>2</sup>Atoroc neto om kaynetap Mokoryontet kuyu wulo roke kwiya pikap Yiyintet. Akalye om kakalyayet ake tokol nye möce. Omnye kukakalya neto piko ce caṅ oṅnkukalya mpo ani nkit.

<sup>3</sup>Osupoywo ani Prisika oko Akwila, ce kikiyisyi tokol yisyetap Yesu Kristo.

<sup>4</sup>Cekto kuce kikoyto saponwek cikwa kusorwo ani. Okostoy cekto koromun nye puryo ku ani nkit, ntene kostoy mpo pikap Yiyintet tokol cepo Lamek.

<sup>5</sup>Osupoywo mpo pikap Yiyintet ce rurukeyi kot nyimwa. Osupoywo corwemwani nye ocöme koromun Epaineto. Neto kunye cito nye kinyosyo kuyen Kristo om koretap Asia.

<sup>6</sup>Osupoywo Mariyam nye kikwiysis yisyet nyewo koromun om wule omite akwek.

<sup>7</sup>Osupoywo Antroniko oko Yunia pikwani ce Yutayek ce kicepontekey tokol om mopusi. Kicinket cekto koromun om wule mite Kiyokik. Cekto kuce kunyosyo kwek Kristayek kutompo kot oyiku ani.

<sup>8</sup>Osupoywo Ampliato nye corwemwani koromun om Mokoryontet.

<sup>9</sup>Osupoywo Urpano nye kiyisyi tokol yisyet nyepo Kristo oko Staku nye corwemwani koromun.


<sup>10</sup>Osupoywo Apele nye kicinket kule po manta koyenet yenyi om wule mite Kristo. Osupoywo pikap Yiyintet cepo kotap Aristopulo.

<sup>11</sup>Osupoywo Erotiyana nye Yutoyin oko mpo yeya Kristayek cepo kaytap Narkisi.

<sup>12</sup>Osupoywo Trufena oko Trufosa ce yiyisyi yisyetap Mokoryontet, oko corwemwani Perusi, nye kikwiysis yisyet nyewo nyepo Mokoryontet.

<sup>13</sup>Osupoywo Rupo cito nye tokunot om Mokoryonetet, oko kamet nye kisuto ani kuyu Werinyi.

<sup>14</sup>Osupoywo Asunkrito oko Plekon oko Erme oko Patropa, oko Erima oko mpo Yeya Kristayek alak tokol ce pontokey oko cekto.





- <sup>15</sup>Osupoywo Filoloko oko Yulia oko Nereya oko cekwam, oko Olumpa oko piko tokol cepo Yiyintet cepontokey oko cekto.
- <sup>16</sup>Asupaykey akwek nkit oṅaṅutkey kuyu mpo yeya. Kesupayak akwek pikap Yiyintet tokol cepo Kristo.
- <sup>17</sup>Mpo yeya, konkolonwok ani kule, oripkey koyenet nyepo piko, co toye konetisyet nyo kicinet cekto, oripkey pico.
- <sup>18</sup>Omnye puryo kot kwicini yisyet Mokoryontet Yesu Kristo piko ce yiye ṅaleca, ntene poye pate mucesta nyimwa nkit. Omnye perpere cekto kumas kasoteywekap piko ce moponto ṅolyo; kwiysisye ṅalekwa ce ṅerekyini piko.
- <sup>19</sup>Kilim ci ake tokol koyenet nyimwoṅ nyepo lokoywek ce toponec, kunyo oyiku ani ṅerekat om wule omite akwek. Amoce kule oṅomekitu om kiy ake tokol nye topon, oṅnkumöce kule opur nye moponte lelis nyepo miyotyet.
- <sup>20</sup>Nto Yiyintet nye lukune kalyet nyinyacek kunye mosukoturpup Setanit kopurune kerenkokwok ṅony. Opurte akwek poypoyet nyepo Mokoryontet Yesu.
- <sup>21</sup>Kesupayak akwek Timosewo nye kyiyisiy acek tukway yisyet, kunyo kesupayak mpo Lukio oko Yason, oko Sosipatro ce Yutayek cekto.
- <sup>22</sup>Ani Tertiyō nye kusile parwani, kasupayak om Mokoryontenyō.
- <sup>23</sup>Kesupayak akwek Kayo nye apurune ani kanyi oṅnku konyi kunye rurukeynikey pikap Yiyintet. Kesupayak Erasto konorintet nyepo pesanikap moṅet oko yeyanyo Kwarto.
- <sup>24</sup>[Kunyo opurte akwek tokol poypoyetap Mokoryontenyō Yesu Kristo. Yunyoto]
- <sup>25</sup>Akante cikaste cikoci Yiyintet woyinto. Muce neto kukonok akwek okwilokisyē om koyenet, kuyu wule yunto lokoywek ce toponec om kenysisyē co kitil.
- <sup>26</sup>Kunyo yawut, kucipor kutok ṅalecutecu kupunte silutekap workoyik oko wule mwoytoy Yiyintet nye mopoku, kuciporci yawut yemosyēk tokol, sukuṅet kuyen oṅnkuyweyis.
- <sup>27</sup>Kupoyit woyinto Yiyintet nye neto nkit kunye ṅom kupunte wule mite Yesu Kristo okokoy oko okokoy. Yunyoto.



## 1 Korinsoyek

### 1 Korinsoyek 1

- <sup>1</sup>Cone parwani wule amite ani Paulo nye kicekur kwek Kiyokintetap Yesu Kristo om cömisyetap Yiyintet, oṅnkucone wule mite yeyanyo Sosene.
- <sup>2</sup>Casilyini pikap Yiyintet cepo Korinso, piko tokol ce kicekur kwek pikap Yiyintet cetililec om koyomotet oko Yesu Kristo, wanak oko piko tokol ce mite wulyo ake tokol ce kure kaynetap Mokoryontenyo Yesu Kristo, nye Mokoryontemwa oṅnku Mokoryontenyacek.
- <sup>3</sup>Kante kukonok Yiyintet Papanyo oko Mokoryontet Yesu Kristo poypoyet oko kalyet.
- <sup>4</sup>Okostoy ani okokoy Yiyintenyu om wule amite akwek, omnye kikonok neto poypoyet kupunte Yesu Kristo.
- <sup>5</sup>Omnye koyomet nye oponte akwek oko Kristo kunye kukonok mokoryontit nyepo tukuk tokol, kupontokey wanak oko ḡalalet tokol oko ḡomnonet tokol.
- <sup>6</sup>Kikwilokis koromun om wule omite akwek lokoywek ce nöme Kristo,
- <sup>7</sup>nye puryo kot omuytoy monyoru kupeyok tokol ye tomitte okonye ciṅoṅ Mokoryontenyo Yesu Kristo.
- <sup>8</sup>Mosukuripok kukwilak kuyunyoto okoy pesyet nyepo letut, sukuṅet otoku nye puryo kot oponte lelis om pesyetap Mokoryontenyo Yesu Kristo.
- <sup>9</sup>Yiyintet kunye cikosekey, nyoto kunye kikurok akwek oyomekey oko Werinyi Yesu Kristo Mokoryontenyo.
- <sup>10</sup>Osomok ani akwek mpo yeya om kamukeywekap Mokoryontenyo Yesu Kristo kule, ocömmcine tokol om ḡalek ce oṅolole sukuṅet komo kumite pciyatet om wule omite akwek nkit. Ntene oyomekey tokol wanak om kasoteywontet akenke oṅnkotyikyṅi ḡolyo akenke.
- <sup>11</sup>Mpo yeya, kumwowo ani kupoyit manta piko alake cepo kaytap Klowe kule oponte akwek wokutyet om kwenumwoṅ.
- <sup>12</sup>Dolyontet nye omwowu kunyi kule, mwowu citake tokol om akwek ḡolyontet nye pciyat. Mwowu ake kule, “Opoye ani Paulo.” Kumwoy ake kule, “Opoye ani Apolo.” Kumwoy ake kule, “Apoye ani Kefa.” Kumwoy ake kule, “Opoye ani Kristo.”
- <sup>13</sup>Pciyat pa Kristo? “Paulo kunye kimecok akwek om Murtowontet? Kicepatisanak akwek oyiku konomikap Paulo?”
- <sup>14</sup>Okostoy ani yiyintet omnye kipuryo kot apatisan ci ake tokol om akwek, tos pate Krispo oko Kayo.
- <sup>15</sup>Kunyo puryo ci nye muce kumwoy kule kicepatisana om kaynetap Paulo.



- 16**(Ntene kasoty yec kule kyapatisan ani Stefana oko pikap kanyi, ntene puryo kot omuci kot asot kule kyapatisan yec citake.)
- 17**Kipuryo kot kuyokto ani Kristo wepotisonisye, ntene kiyokto wamwayte lokoywek ce toponec, oṅnkamwayte nye puryo kot oyiyisye ḡomnonet nyepo piko sukuṅet mente kot kupokune swamet metap Kristo om murtowontet.
- 18**Omnye lokoywek ce nōme metap Kristo om murtowontet kuce sute piko co mite kupotos kule perperyo pate. Ntene cesute acek cu cemite cisopec kule swametap Yiyintet.
- 19**Omnye mwowu silutekap Yiyintet kule; “Mosayarante ani ḡomnonetap piko co ḡomec, mosonumu kasoteywekap piko co muswokik.”
- 20**Kunyo poru ḡaleca kule, mite ono piko ce ḡomec nto muswokik? Nto kirwokik ce ḡomec cepo koroni? Kukupor Yiyintet kule perperyo pate ḡomnonet nyepo koroni.
- 21**Omnye kikwi Yiyintet kuwuyit nye puryo kot komuce konket piko neto om ḡomnonet nye nyimwa nkit. Ntene kicām Yiyintet kule osop piko ce yene kwiysisye, ḡolyontoni. “Perperyet”, coto ku lokoywek cu cemwoytoy acek.
- 22**Mōce Yutayek cepo kakitat kule sicinket cepo manta, kucenye lamek ḡomnonet.
- 23**Cemwoytoy acek Kristo nye kimeci murtowontet, lokoywek coto kuce konokut om wule mite Yutayek oṅnkwek perperyo om wule mite lamek.
- 24**Ntene om wule mite piko co kikur Yiyintet nka Yutayek nto lamek, lokoywekyu ku Kristo nye neto kunye swamet nyepo Yiyintet oṅnku ḡomnonet nyepo Yiyintet.
- 25**Omnye kito nye poruke y kuyu perperyetap Yiyintet, kunye ḡomnon nyoto kupēl ḡomnonetap piko. Nto kito nye poruke y kuyunye purenotatap Yiyintet kunye ponto swamet kupēl swamet nyepo piko.
- 26**Mpo yeya, mōce asot yawut wule kyoyunte akwek yo kikurok Yiyintet. Kuyu wule yunto sopontap koret, kipuryo kot oyiku ḡomec alake om akwek. Kipuryo kot oponte kamukeywek alake om akwek, kipuryo kot ciyweyok oyiku tokunotin alake om akwek.
- 27**Ntene kikwey Yiyintet tukuk cesute koret kupoyit perperyo sukuṅet kusornen piko co ponto ḡomnonet. Kikwey Yiyintet tukuk co sute piko kule puryo kot kuponto swamet sukuṅet kosornen piko co ponto swama.
- 28**Kikwey Yiyintet tukuk co cetoye oṅnkyenyile om koret, mpo ce puryo kot kutoku, sukuṅet kwaranta tukuk co sute koret kule ponto latik.
- 29**Poru ḡalecu kule puryo ci mpo akenke nye muce kot kusilkey om taytap Yiyintet.
- 30**Ntene kikoyomok akwek Yiyintet oko Kristo Yesu, kunyo kikwey Yiyintet Kristo kwek ḡomnonet nyinyacek, omnye kisatec acek cenyolu om wule mite Yiyintet. Kiciku pikap Yiyintet, kunyo kicityacec.



<sup>31</sup>Kunyo kuyu wulo mwowu silutekap Yiyintet kule: “Ye möce ci ake tokol kule osilkey kumisyini kusilekey kito nye kikwiw Mokoryontet.”

## 1 Korinsoyek 2

<sup>1</sup>Mpo yeya, yo kyoconi ani wule omite akwek comwowok ñalekap Yiyintet cepo manta ce woñotin, kipuryo kot oyiyisye yoto ñalek ce koyec oko ñomnonet nyewo.

<sup>2</sup>Omnye yo kicepontekey kyasot kule ayutye kiy ake tokol oñkasot Yesu Kristo nkit oko meni nye kimeci mortowontet.

<sup>3</sup>Kipuryo kot oponte swama ye kicepontekey ntene kypotoni pate om muyotet.

<sup>4</sup>Kunyo ñalalemwani oko lokoywek ce kyomwowu kuce kipuryo kot kupo polot nyepo ñomnon nyepo cito. Ntene kiporu kupoyit manta swametaf Muyet Nyetilil nyepo Yiyintet.

<sup>5</sup>Kunyo puryo kuroke kopurune koyenet nyimwoñ ñomnonet nyepo cito, ntene kopurune swametaf Yiyintet.

<sup>6</sup>Ntene oñololi ani ñalek cepo ñomnon ye oñololyini piko co kikilyo om koyenet, ntene puryo kot ku ñomnon nyepo koroni nto swamet nyepo poytoyik cepo koroni ce mite yawut kucucucktoy kupoku.

<sup>7</sup>Domnonet nye oñololi kunye ñomnonet nyepo Yiyintet nye wuñat om wule mite piko, nye kikwey Yiyintet kenye kupoyit woyinto nyinyacek. Kikwiw kunyo mpo kutompo citany koret.

<sup>8</sup>Puryo mpo akenke om poytoyik cepo koroni nye nkete ñomnonet nyitenyi. Nto yunye kikikonket nto kipuryo kot kuwuyitoci cekto neto murtowontet.

<sup>9</sup>Ntene kuyu wulo mwoytoy silutekap Yiyintet kule: “Tukuk ce tompo kot kukäs koñnta kenysis, nto kulim yitik, tompo kusot mukuleyap cito, tukuk coto kuce kikwiytoci Yiyintet piko co cöme cekto neto.”

<sup>10</sup>Ntene kikoporwec acek Yiyintet ñalekyi ce wuñotin kwiysisye Muyenyi Nyetilil. Cenyé Muyet Nyetilil kiy ake tokol nka mpo nye wuñat om wule mite Yiyintet.

<sup>11</sup>Omnye ño nye nkete kasoteywekap cito, tos pate Muyet nye mite soponto nyenyi orit. Kuyunyoto Muyet Nyetilil kunye nket ñalek tokol ce nöme Yiyintet.

<sup>12</sup>Kunyo puryo kot cenyoru acek muyetaf soponto nyepo koret, ntene kicekonec Muyet Nyetilil nye cone wule mite Yiyintet, sukuñet cinket kokotutek tokol ce kikonec Yiyintet.

<sup>13</sup>Kunyo puryo kot ceñololi acek ciyiyisye ñalek ce kinet ñomnonet nyepo cito, ntene om ñalek cepo manta ce kinet Muyet Nyetilil, ye ce mite ceñolyini piko co ponto Muyet Nyetilil.



<sup>14</sup>Puryo kot kunyuru cito nye moponto Muyet Nyetilil kokotutek ce kwone wule mite Muyet Nyetilil nyepo Yiyintet. Puryo kot kunkete, sute kuyu perperyo pate, omnye nkete pate latik cikwa nkit.

<sup>15</sup>Muce cito nye ponto Muyet Nyetilil kunket latik cepo kiy ake tokol, ntene puryo ci mpo akenke nye muce konket wule yunto neto.

<sup>16</sup>Kuyu wule mwoytoy silutekap Yiyintet kule; “Do nye nkete kasoteywekap Mokoryontet? Do nye muce kukoci neto ḡomnonet?” Kunyo ceponte acek kasoteywekap Kristo.

### 1 Korinsoyek 3

<sup>1</sup>Kunyo mpo yeya, kipuryo kot oḡololwok ani kuyu piko ce ponto Muyet Nyetilil nyoto, ntene kyḡololwok kuyu piko cepo koroni, ce lekoy ce minkec om koyenet om wule mite Kristo.

<sup>2</sup>Kyapayenak ani ceko ntene nye puryo kot ku omik ce wuyec, omnye kitompo kot ayem akwek, kunyo nka mpo yawut tompo kot ayem.

<sup>3</sup>Omnye topuri kuyu piko cepo koroni. Ye tokumite corokyinotet om kwenumwakwek, oḡnkowokutosi akwek kwakwek nkit kupuryo kot kupuru coto kule oyiku piko cepo koroni cepurtoy kopurto nyepo koret?

<sup>4</sup>Ye mwowu akenke om akwek kule, “Apoye ani Paulo” Kumwoy ake kule: “Apoye ani Apolo” Kupuryo ne kot oyiyisi akwek kuyu piko cepo koret?

<sup>5</sup>Ntene Apolo ku ḡo? Nto Paulo ku ḡo? Ciku acek pate mutworikap Yiyintet ce kintowok sukuḡet oyen. Yiye ci ake tokol om acek yisyet nye kikoci Yiyintet.

<sup>6</sup>Ani kunye kyakole kupuswontet. Apolo kunye kipise peko kupuswontet.

<sup>7</sup>Ntene Yiyintet nye kikoci kupit. Kunyo puryo kot ku nyewo koromun cito nyo kole, nto mpo nyo pise peko. Yiyintet nyewo omnye neto kunye kocini kupit.


<sup>8</sup>Kerkey kwoyecin cito nyo kole oko nyo pisisyi, ntene mosukukoci Yiyintet ci ake tokol om acek kuyu wule yunto yisyet nyo kikwi.

<sup>9</sup>Omnye ciku acek piko ce kyicintosi om yisyet nyepo Yiyintet oyiku akwek mparenikap Yiyintet oḡnkoyiku koto nyenyi.

<sup>10</sup>Kuyu wule yunto kokotutyet nye kikono ani, kunyo kyacec yisyet nyepo tekset kuyu cito nye ḡom, kunyo mite citake kutece kutosyi, ntene misyini kurip ci ake tokol wule tektoy.

<sup>11</sup>Omnye puryo komuce citake kucec yisyet ake kusir yisyet akenke nyepo manta nyo kicece, nyoto ku Yesu Kristo.

<sup>12</sup>Mosukutec piko alake koto kwiyisye Saput nto karin nyelel, nto rwontok ce piciyec, kwiyisye alak ketik nto suswek nto solik.



<sup>13</sup>Kunyo mosicekäs toponiyet nyepo yisyet nyepo ci tokol om pesyet nye cone Kristo. Omnye pesyet nyoto kunye mosukuṅoṅ yisyo nyepo ci tokol, mosukusyem mata kupor wule yunto toponiyet nye ponto.

<sup>14</sup>Ye kemukta mata yisyet nye kikwiw cito, mosukukoci cicoto kokotutyet.

<sup>15</sup>Ntene ye kalay kupok yisyet nye kikwiw cito mosukupot yisyonoto, ntene oṅknyisop neto kuyu nye kacilil kupunte mata.

<sup>16</sup>Oṅket akwek kupoyit manta kule, oyiku akwek kotap Yiyintet, kunyo minye Muyet Nyetilil mukuleywekwok orit!

<sup>17</sup>Ye karanta kowurta citake kotap Yiyintet, mosukwaranta Yiyintet cicoto, omnye tilil kotap Yiyintet. Kunyo oyiku akwek kotap Yiyintet.

<sup>18</sup>Puryo kot kuroke kuperperkey citake nkit, ye sote citake om akwek kule oyiku ṅom, kuyu wule yunto kopurto nyepo koret, kuroke kuweckey kuperperit sukuṅet kuṅomit kupoyit manta.

<sup>19</sup>Omnye kiy ake tokol nye sute koret kule po ṅomnon, kunye perperyo pate nyoto om taytap Yiyintet. Kuyu wulo mwowu silutekap Yiyintet kule, “Tēce Yiyintet piko ce ṅomec om ṅomnonemwa.”

<sup>20</sup>Kumwowu yec silutekap Yiyintet alak kule: “Nkete Yiyintet kule puryo kot kuponto latik kasoteywek cepo piko ce ṅomec.”

<sup>21</sup>Kunyo puryo ci nye misyini kusilkey om tukuk ce muce kwiw piko. Ntene cikwakwek tukuk tokol kupoyit manta.

<sup>22</sup>Nto mpo Paulo nto Apolo nto Kefa, nto koret, nto soponto, nto met, nto pesyosyecu, nto pesyosyek co kwoni, kuce cikwakwek tokol.

<sup>23</sup>Opoye akwek Kristo, nto Kristo kunye po neto Yiyintet.

## **1 Korinsoyek 4**

<sup>1</sup>Roke oṅketec kule ciku acek mutworikap Kristo ce kicikoci kurip ṅalekap Yiyintet cepo manta ce wuṅotin.

<sup>2</sup>Kito akenke nye cemokyini mutworintet nyoto ku kule kikokenekey Mokoryontet.

<sup>3</sup>Kunyo asute kwek ṅolyo nye miniṅ ye komutwo ani akwek musankut, nto mpo ye komutwo piko musankut. Puryo mpo kot omutyinikey ani nkit musanku.

<sup>4</sup>Puryo kot oṅketi kule oyiku lelat, ntene puryo kuporu kule moponte lelis, Mokoryontet kunye mutwo ani musankut.

<sup>5</sup>Kunyo puryo kuroke omut musanku kutompo kot kupunto pesyet nye kweyat. Möce kukany musankut okoy kuco Mokoryontet. Mosukuco oṅkuluci lakweyet tukuk cepo menonet oṅkupor ṅalek ce wuṅotin ce mite mukuleywekap piko orit. Yoto kuye kunyor ci tokol kakastayet ye yeme nye cone wule mite Yiyintet.





- <sup>6</sup>Mpo yeya, sukuṅet akalyak; koyoyeke ṅalecu tokol Apolo oko anito. Koyiyisye kwek koporunot sukuṅet oṅket akwek kule mwowu ne ṅolyontoni, “Orip monte cekeyte silutek.” Puryo kuroke ci ake tokol om akwek kusil citake oṅnkunyal ake.
- <sup>7</sup>Do nye kikonij nyi yiku nyewo kupël piko alak? Kipuryo kot kukonij Yiyintet tukuk tokol ce ponte? Nteye kinyoru, omne sesilkey kuyunye kipuryo kot ku kokotut?
- <sup>8</sup>Oponte akwek yawut tukuk tokol ce omöce! Kwomokoren kenya! Kwoyeku kinkonik nka kot puryo kot ciku acek! Kunyo amöce ani kule ntoyiku akwek kinkonik sukuṅet ciku mpo acek kinkonik oko akwek.
- <sup>9</sup>Omnye osoti ani kule, kukupartec Yiyintet acek kiyokik ciku cepo letutap piko tokol, kuyu pic ce kocimutyi musankut cepakäc, om taytap koret oko malaykanik oko piko.
- <sup>10</sup>Ciku acek perper kupo kaynetap Kristo, ntene oyiku akwek ṅomec om Kristo! Puryo kot ceponte acek swamet, ntene oponte akwek swamet! Cenyilec acek, ntene ciyweyok akwek!
- <sup>11</sup>Ce ponte acek rupet oko melelya okoy mpo yawut. Kicilac sorokotok, cepirec, cimpokoti om koret tokol.
- <sup>12</sup>Kyiyisyi om swamet sukuṅet cikalyekey. Ye kocecupec, cesomnci acek cekto kupeyok. Ye kacitaṅanyec, yoto cemuytoci.
- <sup>13</sup>Ye kacecupec cewekyi om ṅalek cepo tolosyet. Kicekerkeyitu acek oko tutwek cepo koret. Kiciku kwontun nyepo koret okoy kupunto pantanyi.
- <sup>14</sup>Kosilwok ani kuyunyitenyi, ntene nye puryo kot omöce kule sukuṅet asornenok. Kayiy kuyinyi saṅet anetak kuyu lekokwani ce ocöme koromun.
- <sup>15</sup>Omnye nka mpo ye oponte akwek konetik kantoyik pokolwokik ce caṅ om sponwekwok om wule mite Kristo, ntene oponte Papa akenke pate. Omnye kyoyiku ani papamwoṅ om soponto nye oponte akwek om Kristo, omnye kyosutwok lokoywek ce toponec.
- <sup>16</sup>Kunyo kosomok kule orup wule ayunte ani.
- <sup>17</sup>Kunyo koyoku Timosewo kuco wule omite akwek. Neto kunye werimwani cämanet nye cikenekey om Mokoryontet. Mosukusutwok neto akwek arosyek cikwani om Kristo ce oneti pikap Yiyintet om wulyo tokol.
- <sup>18</sup>Kusilkey alake om akwek, kusote kule puryo kot aconi ani orutocok akwek.
- <sup>19</sup>Kunyo ye kacäm Mokoryontet mosaco lakwar saṅet akäs ani nkit nye puryo kot ku ṅalek ce ṅolole pate, ntene akäs mpo kito nye mokwiy piko co silekay.
- <sup>20</sup>Omnye Puryo kot ku ṅalek pate poytoyisyetap Yiyintet, ntene swamet.
- <sup>21</sup>Oṅnkono nye okweye akwek? Maconte Korokto nto maconte mukuleyto nyepo cömisyet oko tolosyet?

## 1 Korinsoyek 5



- <sup>1</sup>Kunyo kucemwoy kupoyit manta kule, oponte akwek sakwayanatet nye miyat koromun nye puryo mpo kot cenyortoy wule mite lamek co menket Yiyintet. Kucemwowo kule purtoykey cito korketap kwan!
- <sup>2</sup>Kunyo omuci akwek osilkey kulene? Roke onerekisye koromun, oṅkokwet cito nye kweye ṅaleca kuṅete wule amite akwek!
- <sup>3</sup>Ntene nka kot amite wule low om porto om wule omite akwek, ntene opontekey oko akwek om kasoteywekwani om kaynetap Mokoryontet. kwomutyi ani kenye musankut cito nye kikwiṅ ṅolyontoni miyat.
- <sup>4</sup>Kunyo ye koyomekey akwek wanak, oṅknyepontekey oko akwek om kasoteywekwani om swametaṅ Mokoryontenyō Yesu Kristo nye mitowune wule cemite acek.
- <sup>5</sup>Yoto kuye roke okoyte portap cicoto kuwo wule mite Setanit kyaranta, sukuṅet cesor soponto nyenyi om pesyetap Mokoryontet.
- <sup>6</sup>Puryo kot kuroke osilkey akwek! Oṅkṅeti ṅolyontoni mwowu kule, “Kocini mumarek ce tukusic kukut pusek tokol.”
- <sup>7</sup>Misyini onumu mumaryantani nye ponto miyotyēt nyepo kenye sukuṅet otillitu onyolu akwek topon, sukuṅet akerkeyitu oko pusek ce puryo kot cetase mumarek, kuyu wulo oṅkṅeti ani kule oyiye akwek kuyunyoto. Kunyo kukwitita kenye sakwenyo nyepo Keytayet, omnye kicekon Kristo nye Keciryetaṅ korosyontet nyepo sakwetap Keytayet!
- <sup>8</sup>Möce kyam kunyo sakwenyo nye puryo kot ku mukatyantet nyepo kenye nyepo miyotyēt oko sakwayanatet, ntene om mukatyantet nye moponto mumaryantet, nyoto ku mukatyantet nyepo tililinto oko manta.
- <sup>9</sup>Om parwet nyo kyosilwok ani, kyomwowok kule monte ciyomekey oko piko to sakwoyonot.
- <sup>10</sup>Ntene kipuryo omwowu kule piko ce menket Yiyintet, co sakwoyonot nto co moroṅis nto ce yirye ntarastinek nto co soye kerkeyik! Omnye ye kotay akwek cekto kuporkey kule kaṅete koret sukuṅet komonyortosi oko cekto.
- <sup>11</sup>Dolyontet nye kyomwowu kunyi kule, puryo kot kurok kot oyomekey akwek oko cito nye kurekey kule oyiku yeya oṅnkurok yec kwiye sakwayanat nto moroṅya nto nye soye kerkeyik nto nye perpersyi nto nye pokite nto nye corsyi. Monte mpo cipur oṅnkoyomisyi oko cito nye yunyo!
- <sup>12-13</sup>Ntene puryo kot ku yisyemwani omutyi musanku piko cepo saṅ. Yiyintet kunye mosukumutyi cekto musankut. Ntene puryo ra kot kurok omutyi akwek musankut piko cepo lukemwoṅ? Kuyu wulo mwowu silutekap Yiyintet kule, “Onumune kucone lukemwoṅ cito nye miyat.”

## 1 Korinsoyek 6



- <sup>1</sup>Ye ponto citake om akwek wokutyet oko yeya ake, kuroke kulene kusut neto musankut kuwo wule mite piko ce menket Yiyintet, ye kotomwocini kusat ñaleca pikap Yiyintet.
- <sup>2</sup>Puryo kot oñket akwek kule pikap Yiyintet kuce mutyini musankut koret? Kunyo ye akwek kuce mosomutyi musankut koret, kupuryo kot omuci mpo kot amut musankut cepo ñalek ce tukusic?
- <sup>3</sup>Puryo kot oñket kule acek kuce mosicemutyi malaykanik musankut? Mosukupurunenec kulene mocemut musankut nyepo soponto nyitenyi?
- <sup>4</sup>Kunyo nteye kakwa ñalek ce yucoto mososut ra ñaleca kupa wule mite piko co menkete wule yunto koyenet nyepo pikap Yiyintet?
- <sup>5</sup>Dolyo nyo nyepo kalilan koromun om wule omite! Puryo kot kumite cito akenke wule omite akwek nye ñom nye muce kumut musankunek cepo mpo yeya?
- <sup>6</sup>Ntene kwere yeya ake yeya ake wokuwosontyi om taytap piko co menket Yiyintet.
- <sup>7</sup>Kunyo poru kule kwosute koromun omnye owosontyinikey nkit. Omne macäm akwek ye kalel citake kwiwok miyotyeyet? Omne mocäm akwek ye kanyapanak piko alake?
- <sup>8</sup>Kunyo yec oyicinikey akwek nkit miyotyonikey, onyapankey akwek nkit oñkocorokyikey nkit mpo yeya!
- <sup>9</sup>Oñket akwek kupoyit manta kule puryo komuce kot kunyor ci nye miyat poytoyisyyetap Yiyintet. Monte ciperperkey omnye puryo kot kunyuru poytoyisyyetap Yiyintet piko ce, syepisyi koruk, nto ce soye kerkeyik, nto ce sakwoyot, nto co cesyepekey moronik nkit,
- <sup>10</sup>nto ce corsyi, nto pokitisyek, nto ceñomsyi, nto ce ponisyi, nto ce moroñis, nto ce corik.
- <sup>11</sup>Kyokerkeykey akwek picoto, ntene kiciwunok om miyotyonikey oñkoyokoytok opoyitu Yiyintet. Kicesatak onyolu om wule mite Yiyintet kupunte Mokoryontenyö Yesu Kristo om Muyet Nyetilil nyepo Yiyintenyö.
- <sup>12</sup>Mosukumwoy citake kule, “Ce cömwo ani ayiy kiy ake tokol.” Yunyoto, ntene puryo kot kutoponec tukuk tokol. Omuci omwowu kule, “Ce cömwo ani ayiy kiy ake tokol, ntene puryo kot ocöme kot kusuto kito ake oyiku mutworintenyi.”
- <sup>13</sup>Mosukumwoy citake kule, “Po omik moyet, oñnkupo moyet omik.” Yunyoto manta, ntene mosukunum Yiyintet coto tukway. Porto nyepo cito kunye puryo kot kupo sakwayanat, ntene po Mokoryontet nto Mokoryontet kunye poye porto.
- <sup>14</sup>Kiñet Yiyintet Mokoryontet Yesu kotutune met oñnku neto kunye mosukunetec citutune met om swamenyi.



<sup>15</sup>Oṅnket akwek kule porwonik cikwok kuce kereryanik cepo portap Kristo. Omuci ra anām kereryantet nyepo portap Kristo oṅnkayiy kwek portap korko ce moroniyo? Memukoktos!

<sup>16</sup>Puryo kot oṅnket akwek kule ye kokuyomo cito porto nyenyi oko korko nye cemoroniyo kukokwek akenke oko neto? Poru silutekap Yiyintet kutok topon kule, “Mosukwek picoto oyenku porto akenke.”

<sup>17</sup>Ntene ye keyomokey cito oko Mokoryontet kokwek Muyet nyenyi akenke oko neto.

<sup>18</sup>Asanekey sakwayanat. Puryo kot kowurtoy cito porto ye kayiy miyotyoni alak tokol, ntene wurtoy cito porto nyenyi nkit ye kayiy sakwayanatet.

<sup>19</sup>Puryo kot oṅnket akwek kule porto nyemwoṅ kunye kotap Yiyintet nye minye Muyet Nyetilil? Puryo kot opoyekey akwek nkit, ntene opoye Yiyintet.

<sup>20</sup>Kikwalenak akwek neto peyit nyewo, kunyo oyiyisye porwonikwok kukasta woyintap Yiyintet.

## 1 Korinsoyek 7

<sup>1</sup>Kunyo teputyet nye nöme ṅalek co kyosile akwek. Topon ye kepur cito nye motinye korko.

<sup>2</sup>Ntene omnye mite syemutok cepo sakwayanatet, kuroke kuponto ci tokol korkenyi; oṅnkuroke kuponto korko tokol santenyi.

<sup>3</sup>Roke kwiy morono koyitita yisyenyi kuyu moron, oṅnkuroke kwiy korko koyitita yisyenyi tokol kuyu korko; oṅnkoyitita ci ake tokol om cekto kito nye möce ake.

<sup>4</sup>Puryo kot kupoytoy korko porto nyenyi, ntene santenyi nye poytoy, kunyo puryo mpo kot kupoytoy santet porto nyenyi, ntene korket nye poytoy.

<sup>5</sup>Monte cetoyekay tos pate ye kocömcine tukway, sukuṅet onyuru poroyinto nye osome, oṅnkoyomkey yec sukuṅet mente kot kunyor Setanit poroyinto nye kasyemenak omnye korom ye moripkey.

<sup>6</sup>Komwowok ṅalecu, nye puryo kot kokonok kwek ntarastit, ntene ṅolyo nyepo ṅomnon.

<sup>7</sup>Amöce kule ntepur piko tokol kuyu wule oyunte ani, ntene ponto ci tokol kokotutyet nye kikokoci Yiyintet. Kicikoci citake kokotutyet nyi, cikoci citake kokotutyet ake.

<sup>8</sup>Kunyo, omwocini ani piko co puryo kot komütis oko koruk musukik, kule topon koromun ye kopur akwek nkit kuyu wule ayunte ani.

<sup>9</sup>Ntene nye puryo omuci kot akarekte makatet nyepo porwonikwok, omütisye moronik oṅnkymütak koruk. Omnye topon ye kocimütis kusir ye kotoloytos porwonik cikwok.

<sup>10</sup>Oponte ntarastit nyepo piko co kikomütis, nye puryo kot ku nyimwani nkit ntene po Mokoryontet: puryo kot kumisyini kupakakta korko santenyi.



- 11**Ye kotepe kot kwiw kuyunyo, kumisyini wokopur kwine nkit, nto kuḡalal oko santenyi okoy kucäm̄nkey yec. Puryo kot kumisyini kukwet morono korkenyi.
- 12**Omwocini piko alak tokol, (ani nye omwowu puryo kot ku Mokoryontet) kule, ye ponto cito nye Kristoyin korket nye puryo kot kucömis oḡnkucäm̄ korkonoto kule opurtkey oko neto, kupuryo kot kumisyini kukwet korkonoto.
- 13**Nteye kemüt korko nye Kristoyin cito nye puryo kot kucömis oḡnkucäm̄ cicoto kule opurtkey korkonoto kupuryo kot kumisyini kukwetkey korkonoto.
- 14**Omnye cewece kuyen Yiyintet cito nye puryo kot kucömis ye keyomokey oko korkenyi, oḡnkuwec kuyen Yiyintet korket nye puryo kot kucömis ye keyomokey oko santenyi nye Kristoyin. Nto yunye kipuryo kot kuyunyoto nto kuyeku lekokwa lekoy ce menket Yiyintet, ntene kuyu wule yunto; cöme Yiyintet cekto.
- 15**Ntene ye möce citake tokol nye puryo kot kucömis kule ayaste cito nye Kristoyin kuroke kwiw nyoto kuyunyoto. Om ḡalek cayucoto, kuponto kukwey nkit cito nye Kristoyin nye morn nto korko. Omnye kikurok akwek Yiyintet opurte kalyet.
- 16**Nyi korko nye Kristoyin nketyine nto mucu pesyet ake kot sop santeruḡ nye puryo kot ku Kristoyin. Ntenyi santet nketyine nyi nto mucu pesyet ake sop korkeḡuḡ.
- 17**Kutosyikey kopur ci tokol kopurto kuyu wulo yunto kokotutyet nye kikoci Yiyintet, oḡnkuyu wule kiyunto ye kikure Yiyintet neto, ntarastit nyitenyi nye oneti ani pikap Yiyintet tokol.
- 18**Ye kecäm̄ cito nye wonat kursetap Yiyintet, kupuryo kuroke kunum pelutyet nyepo wonset. Ye kacam cito nye mawonat kursetap Yiyintet, kupuryo kot kuroke cewon.
- 19**Omnye ye kicewoniḡ nto ye puryo kot cewoniḡ, ḡolyontet nyewo kuye kaciywey ntarastinekap Yiyintet.
- 20**Misyini kopur ci tokol kuyu wule yunto yo kicöme kursetap Yiyintet.
- 21**Kiyiku ra mtuworin yo kikuriḡ nyi Yiyintet? Kunyo mente asot, ntene ye ponto poroyinto kot cityanciḡ kuroke yiyisy.
- 22**Omnye neto nyo kikur Mokoryontet ku mutworin kunye kikwek citap Mokoryontet nye kicityac, kuyunyoto mpo cito nye tyakat nye kikur Kristo, kunye kikwek nyoto mtuworintenyi.
- 23**Kikwalak akwek Yiyintet, kunyo monte ciku mutwor cepo piko.
- 24**Mpo yeya, roke ci tokol kopurto koyomotet oko Yiyintet kuyu wule yunto kopurto yo kicekure neto.
- 25**Kunyo, ḡolyontet nye nöme piko co tompo komütis: puryo kot oponte ntarastit nye cöne wule mite Mokoryontet, ntene kakonok kasoteywekwani kuyu ci nye ponto latik nye roke cikenekey om poypoyetap Mokoryontet.
- 26**Kuyu wule yunto toḡoḡutek cepo pesyosyecu, kasot ani kule roke kopur cito kuyu wule yunto.



- <sup>27</sup>Ye kimütisye nyi mente asyem kule akwet korket. Ye tompo kot mütisye nyi. Mente asot kule amütisye.
- <sup>28</sup>Ntene ye kemütisye kupuryo kot yiy miyoty. Nteye kacimüt korko nye tompo kot cimüt; kupuryo kot kwiy neto miyoty. Ntene mosukutaŋany toŋoŋutek cepo koret piko co kemütis kunyo amoce ani kule osopok akwek coto.
- <sup>29</sup>Mpo yeya, ŋolyontet nye omwowok kunyi kule, komo kumite poroyinto nye yeme! Kunyo kuceke yawut kuwo tay, misyini kopur piko co kikomütis kuyunye tompo komütis.
- <sup>30</sup>Kopur piko co rirtos kuyunye monerekyotin, kopur piko co rorye kuyunye puryo kot kunerekyotin. Kopur co olyoyisiy kuyunye puryo kot kuponto tukuk ce kikwal.
- <sup>31</sup>Kopur piko co yiyisye tukukap koret kuyunye puryo kot kusute tukucoto kasoteywekwa. Omnye kuyu wule yunto koret yawut, kunye komo kopure kuloyit.
- <sup>32</sup>Amöce ani kule oyiku akwek piko ce puryo kot kusote koromun. Sote cito nye puryo kot komütis yisyetap Mokoryontet, möce kule aŋerec Mokoryontet.
- <sup>33</sup>Ntene sote cito nye kikomütis ŋalek ce nöme koret, omnye möce kule aŋerec korkenyi.
- <sup>34</sup>Kunyo cicute neto om komoswokik oyeny. Sote yisyetap Mokoryontet korko nye puryo kot cimüt, nto cepto nye mukul nye menket morn, omnye möce kule kutililit porto oko soponto, ntene sote korko nye kicimüt ŋalekyi cepo koret omnye möce kule aŋerec santenyi.
- <sup>35</sup>Komwowok ani akwek ŋalecu omnye amöce kule akalyak. Puryo kot asyeme kule akonok nyikisinto, ntene amöce kule ayiy akwek ŋolyontet nyepo manta nye rotat oŋnkokoytekey ayiy yisyetap Mokoryontet nye puryo kot omune.
- <sup>36</sup>Nto om wule mite cito nye köse kule puryo kot opuri topon om wule mite cepto nye möce neto kule amüt, oŋnkuponto makatet nyewo, kuroke kwiy kuyu wule moktoy komütkey, omnye puryo kot kumite miyoty.
- <sup>37</sup>Ntene ye kokuwoŋnkyi cito om mukuleynyi nkit nye puryo kot cisimnci, oŋnkukwilat om kasoteywekyi kule marup kuyu yeya, oŋnkuwoŋnkyi kito nye möce kule ayiy, kakwiy topon ye kayiy kuyunyoto.
- <sup>38</sup>Kunyo sukunjet kwiy topon cito nye kemüt cepto, oŋnkwiye mpo topon kusirto cito nye puryo kot komüt cepto.
- <sup>39</sup>Puryo kot kutyakat korko nye kicimüt ye tokusope santenyi, ntene ye kame santenyi yoto kunyor poroyinto kuwo wokomüt santet ake nye kacäm neto. Ntene oŋnkumisyini kwek kamütisyet nyepo Kristayek.
- <sup>40</sup>Ntene möce kopurto ŋerekwek ye kepur nye puryo kot cimüt. Kasoteywekwani cutecu oŋnkosoti kule oponte Muyet Nyetilil nyepo Yiyintet.

## 1 Korinsoyek 8





- <sup>1</sup>Kunyo, yawut ñolyontet nye nöme omik ce kocesoci Kerkeyik. Cinket kuyu wulo cemwoytoy kule, “Ceponte acek tokol ñomnonet.” Ntene ñomnonet nyoto kunye sute cito kusutkey parak om silotet, ntene teksi cömisyet.
- <sup>2</sup>Ye sote cito kule oñnketi kito ake, kunye menkete kiyoto kupoyit manta kuyu wule misyini.
- <sup>3</sup>Ntene cito nye cöme Yiyintet kunye nkete Yiyintet mpene cicoto.
- <sup>4</sup>Kunyo ñolyontet nye nöme ye kakyam omik ce kocesoci karkeyik, cinket acek kule kerkeyinto kunye kiy pate nye puryo kot kumite koret mpo kisic. Cinket kule mite Yiyintet akenke pate nkit.
- <sup>5</sup>Omnye nka kot kumite co cekure kule yiyik ce cañ oko mokorenik ce cañ.
- <sup>6</sup>Nto om acek kumite Yiyintet nye Papa akenke nkit pate, nye kitoñintet nyepo tukuk tokol, oñnku nye cesope acek om neto, oñnkumite Mokoryontet akenke Yesu Kristo nye kicitany tukuk tokol kupunte neto, oñnku nye cesoptosi acek om wule mitowune neto.
- <sup>7</sup>Ntene puryo kuponto ci tokol ñomnoni. Kikonketune piko alake kerkeyik kuloyit. Kunyo okoy yawut ye kam omik ce kocesoci kerkeyik kusot kule kakyam ce punyo kot kupo Yiyintet, ntene omnye moponto kasoteywek cikwa swamet kusot kule kakwiw miyotyet.
- <sup>8</sup>Omik kuce puryo kot komuce kusat kunyol saponwekyo om wule mite Yiyintet, puryo kot kupotwec acek kiy ye mnakyam, oñnkupuryo kot cenyoru kutos kiy ye kakyam.
- <sup>9</sup>Kunyo oripkey, monte kiyiy kuyunyoto omnye muce piko alak ce puryo kot kuponto swamet kosuci miyotyet.
- <sup>10</sup>Omnye ye kakäsiñ cito nye puryo kot kuponto swamet mite nyi nyo yiku ñom yomisyi om kotap kerkeyik kupuryo kotitire cicoto ñalecato kwam omik ce kocesoci kerkeyik.
- <sup>11</sup>Kunyo mokwaran cicitenyi moponto swamet, omnye kesac ñomnonet nyeñunyi. Yeya nyitenyi kunyo kimecini Yesu Kristo neto.
- <sup>12</sup>Kunyo om aret nyeyunyitenyi, keyiy nyi miyotyet om wule mite Kristo oñnkiyiy miyotyet om wule mite yeyañuñ oñnkipar kasoteywek cikwa co moponto swamet.
- <sup>13</sup>Kunyo, ye muce kusutyi omik kosuto yeyamwani komo oyome ani yec penynto mpo kisic, sukuñet mente kot osutyi kosuto yeyamwani.

## 1 Korinsoyek 9

- <sup>1</sup>Puryo kot oyiku ani ne cito nye tyakat? Puryo kot oyiku kiyokintet? Tompo kot akäs ani ne Mokoryontenyo Yesu? Puryo kot oyiku akwek ne pikap Mokoryontet om yisyet nye kyayiy ani?



- <sup>2</sup>Nka kot puryo kot kucöme piko alake kule ayiku ani kiyokintet, ntene ocöme akwek, omnye akwek pelutyet nye poru kule ayiku ani kiyokintet nyepo Mokoryontet.
- <sup>3</sup>Ye karenya piko, ñalek ce omwowu ye oyetekey kucu kule.
- <sup>4</sup>Puryo kot ceponte acek ne kamukeywek kyam omik oñkyeyesye kupo yisyet nye kiciy?
- <sup>5</sup>Puryo kot ceponte kamukeywek cepetekey korko kuyu piko ce tupco om Mokoryontet. Kuyu wulo kiytoy kiyokik alake oko mpo Kefa oko mpo yeyanyitap Mokoryontet.
- <sup>6</sup>Nto acek nkit so oko Parnapa ce yiyisi sukuñet cenyoru omik ce kyome?
- <sup>7</sup>Kikäs ño kenyis sikorin nye pcicinikey musyaret nkit? Nto kikäs ño kopotin nye puryo kot kwome omik cepo mparenysi? Nto mesewontet oñkono nye puryo kot kulwe ceko cepo kecikeyi?
- <sup>8</sup>Omwowu ani so ñalecu om kamukeywek cepo cito? Puryo kot kumwowu ntarastinek kuyunyoto?
- <sup>9</sup>Omnye kicesil om ntarastinekap Moses kule, “Mente arat yeyto kutit ye mite kuwore nkanuk.” Kuno sote pa Yiyintet yeyto?
- <sup>10</sup>Kimwoy Yiyintet ñalecato kunämece acek. Kicesil ñalecutecu kunämece kupoyit manta! Cito nye potisiy mparet oko cito nye wore omik, kuce yiyisi kukene kule cepicine omik.
- <sup>11</sup>Kicekol acek om wule omite akwek kupuswek cepo Yiyintet. Kuno ñolyo pa nyepo kakitat ye kokenyuru acek latik cepo kisisyet om wule omite akwek.
- <sup>12</sup>Nteye ponto piko alake kamukeywek kunyor latik om wule omite akwek, kupuryo kot ceponte acek ne kamukeywek ce pëlisiy? Ntene tompo kot kyiyisy acek kamukeyweca, kuno kucemuytoci wuyinwek tokol sukuñet mente kot cesutyi konokut aret nyepo lokoywek ce toponec cepo Kristo.
- <sup>13</sup>Oñket akwek kupoyit manta kule, nyortoy piko co yiyisi kotap Yiyintet omik kukwane kotap Yiyintet, oñkupicintos omikap korosek piko co koytoy korosek om otepto nye pele korosek.
- <sup>14</sup>Kuno kimwoy Mokoryontet kuyunyoto kule roke kunyuru musyaret piko co mwoytoy lokoywek ce toponec om yisyet nye yiye.
- <sup>15</sup>Ntene tompo kot oyiyisy ani kamukeyweco mpo akenke. Kuno puryo mpo kot osile yawut parwani kule sukuñet kyiwu yunyoto. Omnye puryo ci nye muce kuwec silotet nyimwani kwek ñalek cepo püc pate, roke amey ani kusir ye kotoyostoy kukereka citake ye mosilkey.
- <sup>16</sup>Puryo kot oponte ani kamukeywek osilkey pate omnye omwoytoy lokoywek ce toponec, ntene kicemwowa kule yiy kuyunyoto. Kuno ñolyo nye miyat koromun ye puryo kot amwayte lokoywek ce toponec!



<sup>17</sup>Nto kyayiy yisyet omnye ocöme nkit nto kwomoce kule cekono musyaret, ntene oyiye kuyu yisyo nye kikono Yiyintet.

<sup>18</sup>Kunyo onyuru musyara ne? Onyuru pate musyaret nye omwoytoy lokoywek ce toponec nye puryo kot amöce kule cekono kiy, nye puryo mpo kot oyiyisyete kwapi kamukeywek om yisyemwani nyepo lokoywek ce toponec.

<sup>19</sup>Oyiku ani tyakat nye puryo kot oyiku mutworin nyepo citake tokol, ntene aweckey oyiku mutworin nyepo ci tokol sukuñet awec ce cañ kuyu wule mukoktos.

<sup>20</sup>Ye amite oyiyisyete om wule mite Yutayek, apuri kuyu Yutoyin sukuñet awec cekto, nka kot kupuryo kot omite ñonyutap ntarastinekap Moses, ntene opuri kuyu nye poyto ye amite oyiyisyete oko piko cepoytoy ntarastinek sukuñet awec cekto.

<sup>21</sup>Kuyunyoto ye opontekey lamek, opuri kuyu lamek, ce moponto ntarastinek sukuñet awec lamek. Puryo kot kupuru coto kule moyweyi ani ntarastinek omnye poyto ntarastinekap Kristo.

<sup>22</sup>Apuri ani kuyunye moponte koyenet nyepo swamet ye pontekey oko piko ce moponto koyenet nyepo swamet sukuñet awec cekto. Kyoyiku kiy tokol om wulo mite tokol, sukuñet onyuru piko ce mosoru.

<sup>23</sup>Oyiye ñalecu tokol kupo toponiyetap lokoywek ce toponec sukuñet onyuru kupeyokyi.

<sup>24</sup>Oñket akwek kupoyit manta kule konye mweyek piko tokol ce mwenekey ntene pëlisye akenke nye nyuru kokotutyet. Kunyo okonyi akwek mweyek sukuñet opëlisye onyuru kokotutyet.

<sup>25</sup>Ripekey koromun ci ake tokol nye mite wule cinete piko co konye mweyek. Yiye kuyunyoto kule cenyuru kokotutyet nyepo nkwyatet nyepo taptet nye poku lakwar. Ntene kyiye acek kule cenyuru kokotutyet nye mopoku.

<sup>26</sup>Kunyo akonyi ani otyikini kule awañte topon. Puryo kot otuluci ani kuyu ci nye tuluce tapan.

<sup>27</sup>Otoñonyi porto nyimwani oñkorip sukuñet mente kot cetaya om letut ye komwoci piko alak lokoywek.

## **1 Korinsoyek 10**

<sup>1</sup>Mpo yeya, amöce ani kule oñket akwek kito nye kikwiyakay om wule mite mpo kukonyo co kirupe Moses. Kikum kukerekta polyet cekto tokol okoy kway topon tokol ruretyet nye arrar.

<sup>2</sup>Kicepatisan cekto tokol om polyet oko ruretyet kwek konomikap Moses.

<sup>3</sup>Kikwam tokol mukatyantet nyepo Yiyintet,

<sup>4</sup>oñnkuye tokol peko cekosune wule mite Yiyintet ce kikwone rwantetap Yiyintet. Rwantet nyoto kunye kipesetoti oko cekto nyoto kunye Kristo.



- <sup>5</sup>Ntene kipuryo kot kuḡerec Yiyintet om wule mite cekto ce caḡ, kunyo kiseretyi muswek cikwa koret nyepo kitela.
- <sup>6</sup>Kunyo porwec tukucutecu kusowec acek tokol kule puryo kot kuroke cecäm tukuk cepo miyoty kuyu wule kiyunto cekto.
- <sup>7</sup>Nto mpo kule cesay kerekeyik kuyu wulo kikwiya alake om cekto, kuyu wulo mwowu silutekap Yiyintet kule, “Kipur piko ḡony kwomis oḡnkuyesyo oḡnkuḡetyo kutum.”
- <sup>8</sup>Puryo kot kumisyini ceiy acek sakwayanat kuyu wulo kikwiya alake om cekto okoy kupok pesyet akenke alake om cekto ce kiyite elifunek tiptem ok somok.
- <sup>9</sup>Puryo kot kumisyini cesyem acek Mokoryontet kuyu wule kikwiya alake om cekto okoy kupakäc erenok cekto.
- <sup>10</sup>Puryo kumisyini kot aḡunyḡuny akwek kuyu wule kikwiya alake om cekto okoy kupakäc malayket nyepo met cekto.
- <sup>11</sup>Kikwi yokis ḡaleca om wule mite cek sukuḡet kwek koporunot om wule mite piko alake, kunyo kicesil ḡalecato sukuḡet kusowec acek. Omnye ce mite acek pesyosyek ce karik kuponto pesyet nyepo letut.
- <sup>12</sup>Cito nye sote kule omite koyony topon kuroke kuripkey sukuḡet mente kosuto.
- <sup>13</sup>Syemutok tokol ce kokwontyok kuce kerkey oko syemutok cepo kwak ce kwontyini piko tokol. Ntene ripe Yiyintet kurtoyenyi, kunyo puryo kot kucöme kule cesyemak akwek kusir wule tento swamet nyimoḡ. Ntene ye kasyemak mosukukonok neto swamet nye omukte oḡnkuporwok aret nye mopunte.
- <sup>14</sup>Kunyo coronutekwani, oripkey monte cesay kerekiiyik.
- <sup>15</sup>Oḡlololwok kuyu piko ce oyiku ḡomec, kunyo akäs akwek nkit ḡalek ce mwowu ani.
- <sup>16</sup>Cikompet nyepo kupeyok nye cikoste acek Yiyintet kunye puryo kot cezemntoy acek om korotikap Kristo ye koceyesye cikompet nyenyi? Nto Mukatyantet nyo cepeteci kunye puryo kot cezemntoy cepcicine om portap Kristo ye kyome?
- <sup>17</sup>Mite mukatyantet akenke pate, kunyo nka kot ciku acek caḡ, ntene ciku porto akenke. Omnye cezemntoy cepcicine mukatyantet nyoto akenke.
- <sup>18</sup>Asot pa Yutayek piko co ome korosek ce cikoytoy kuce yemntoy kupcicin yisyetap Yiyintet om otepto nye pele korosek.
- <sup>19</sup>Dolyo ne nye amoce ani kule omwowu? Amoce pa kule omwowu kule, kerekeyin nto kito nye kicikoci kerekeyinto kunye kiy nyepo latik?
- <sup>20</sup>Puryo kot kuyunyo! Komwowu kule kiy nye kocesoci oyik om mesetap piko co menket Yiyintet kuce kocikoci coto kupoyit oyik, ntene puryo kot kocikoci Yiyintet. Kunyo puryo amoce ani kule ayomekey akwek oko oyik.



<sup>21</sup>Puryo kot omuci akwek ayemnte oyesye cikompet nyepo Mokoryontet oṅnkoyesye yec cikompet nyepo oyik. Kunyo puryo kot omuci oyomisye mesetap Mokoryontet oṅnkoyomisye yec mesetap oyik.

<sup>22</sup>Nto ce möce acek kule kunyer Mokoryontet? Cisoti acek kule ceponte swamet kupël neto?

<sup>23</sup>Cemwowu kule, “Ce comwec kiy kiy ake tokol.” Yunyoto, ntene puryo kot kuponto latik tukuk tokol. “Ce comwec kiy kiy ake tokol”, ntene puryo kot kuponto kakalyayet tukuk tokol.

<sup>24</sup>Puryo ci nye roke kumwoy kule acenye tukuk ce nöme neto nkit, ntene möce kuköse tukuk ce nöme piko alak.

<sup>25</sup>Omuci akwek ayal kiy ake tokol nye kyoloy om motepetap panyek nye puryo kot atepe kupo ṅalek ce nöme kasoteywekwok.

<sup>26</sup>Omnye mwowu silutekap Yiyintet kule, “Po Mokoryontet koret oko tukuk tokol ce mite orit.”

<sup>27</sup>Ye kokurok akwek cito nye tompo kocömis kule kwa yomisye omik oṅnkocäm roke oyam kiy ake tokol nye kacekonok nye puryo kot otepe ṅolyo nye nöme kasoteywekwok.

<sup>28</sup>Ntene ye komwowok citake kule, “Kocesoci omicu kerekeyik.” Mente kyam yoto omicoto kupo toponiyet nyepo cito nyo komwowok oṅnkupo toponiyet nyepo kasoteywekyi.

<sup>29</sup>Puryo kot ku cekuk kasoteywek coto, ntene po cito nyin ake. Kunyo mokutep citake kule, “Omne sukurip kasoteywek cepo cito ake kito nye mayiy ani?”

<sup>30</sup>Ye kakaste ani Yiyintet om omikyu, omne sukurenya ani citake om omik ce oyome okostoy Yiyintet?”

<sup>31</sup>Kunyo, kiy ake tokol nye oyiye akwek ye koyomisyi, nto ye koyesyi, kumöce oyiye coto tokol kupo woyintap Yiyintet.

<sup>32</sup>Opuri kapurto nye puryo kot komuce kusutyi Yutayek wuyinto nto mpo lamek nto mpo pikap Yiyintet.


<sup>33</sup>Opuri kuyu wulo opurtoy ani. Omnye asyeme kule aṅerec ci tokol om tukuk tokol ce ayiye nye puryo kot asotyini toponiyet nyimwani nkit, ntene om toponiyetap piko tokol kule, sukuṅet cesoru cekto kusopco.

## 1 Korinsoyek 11

<sup>1</sup>Kunyo orup wule ayunte ani, kuyu wulo arupe ani wule yunto Kristo.

<sup>2</sup>Okostok ani akwek, omnye osoti okokoy oṅnkorup kanetisyet nye kyanetak.

<sup>3</sup>Ntene möce kule oṅnket akwek kule Kristo kunye nyewo om wule mite ci ake tokol. Nyewo santet om wule mite korkenyi, kunyo nyewo Yiyintet om wule mite Kristo.



- <sup>4</sup>Kunyo ci tokol nye mwoytoy ḡolyontetap Yiyintet om sayet nyepo piko tokol kuyenot metit nyenyi kesornen cicoto Kristo.
- <sup>5</sup>Nto korko nye soye nto mwoytoy ḡolyontetap Yiyintet om sayet nyepo piko tokol kupuryo kot koyen metinyi kunye kesornen korkonoto santenyi. Omnye kerkey nye rwakat metinyi.
- <sup>6</sup>Ye puryo kot kuyen korko metinyi, kuroke kurwac putek, ntene omnye kiy nyepo kalilan ye karwac korko metit, kunyo roke kuyen metinyi.
- <sup>7</sup>Puryo kot kuroke kuyen morono metinyi omnye poru tonto oko woyintap Yiyintet. Ntene poru korko woyinto nyepo cito.
- <sup>8</sup>Omnye kipuryo kot citany moron kucone wule mite korko, ntene kicone korko wule mite morono.
- <sup>9</sup>Kipuryo mpo kot citany moron kupo korko, ntene kicitany korko kupo moron.
- <sup>10</sup>Kunyo misyini kuponto korko kito nye yene metinyi kupo malaykanik nye poru kule poytoy santenyi neto.
- <sup>11</sup>Ntene om soponto nyepo Mokoryontenyi, puryo kot kumite korko ye puryo moron, oṅnkupuryo kot kumite morono ye puryo korko.
- <sup>12</sup>Kuyu wulo kicitany Korko kucone wule mite morono, kuyunyoto kunyo iye yawut korko moron, ntene kwone tukuk tokol wule mite Yiyintet.
- <sup>13</sup>Amut akwek nkit musankut, misyini pa kusome korko om tuyet nyepo pikap Yiyintet ye puryo kuyen metit?
- <sup>14</sup>Puryo kot kunetak akwek ne koret kule sornon ye kepit morono putek?
- <sup>15</sup>Ntene toponec kuromun putek om wule mite korko, kicikoci neto putek ce koyec sukuṅet kuyene metit.
- <sup>16</sup>Ye möce citake kule otinten, ḡalek tokol ce omwowu ani kucu, puryo kot ceponte acek nto mpo pikap Yiyintet kopurto ake nyepo sayet.
- <sup>17</sup>Puryo kot okostok ani akwek om ḡalek cu amöce omwowok, ye koyomekey akwek om sayet nyimwoṅ oyiye ce miyotec ye kotoyiye ce toponec.
- <sup>18</sup>Nyepo tayta kunyi kule, kicemwowo kule mite piko ce tintentyinos kupciykey ye koyomekey akwek pikap Yiyintet. Acöme ani kule pesyet ake po manta ḡaleca.
- <sup>19</sup>Omnye roke kumite peiyatet om wule omite akwek sukuṅet cinket kutok piko cepo manta.
- <sup>20</sup>Ye koyomekey akwek wanak kupuryo kot okwoni kule kwokyam omikap Mokoryontet.
- <sup>21</sup>Omnye ye oyomisiyi kutosyinikey citake kwan omiky nkit okoy kwam alak rupet, kupokit piko alake.





<sup>22</sup>Omne? Puryo kot oponte akwek korikwok wule oyomisye oṅnkoyesye? Oṅnkokoci kolilonis piko ce moponto kiy? Nto onyile akwek pikap Yiyintet? Momwowok ani ne? Makastak om ṅalecato? Puryo kot okostok.

<sup>23</sup>Omnye ṅalek ce kikono ani Mokoryontet kuce kyanetak kule; om kwomowut nyo kiceṅomntoy neto, kunām yoto Mokoryontet Yesu Mukatyantet,

<sup>24</sup>oṅnkusomci kukasta Yiyintet, oṅnkupetec oṅnkumwoy kule, “Nyi kunye pormwani nye kacekonok akwek, oyiye kuyunyi ye asoteno ani.”

<sup>25</sup>Kuyunyoto om letutap omik, kunām cikompet oṅnkumwoy kule, “Cikomponi kunye kirotyet nyelel nyepo Yiyintet nye kociporune pelutyet nyepo korotik. Ye koye akwek, oyiye kuyunyoto ye asoteno ani.”

<sup>26</sup>Omnye om pesyo tokol ye kayam Mukatyantet oṅnkoye cikomponi kuye omwoytoy yoto metap Mokoryontet okoy kuco neto.

<sup>27</sup>Kunyo, ye kam citake mukatyantet oṅnkuye cikomponi om aret nye puryo kot kuyeme mosukulel cicoto kowurta porto oko koritikap Mokoryontet.

<sup>28</sup>Kunyo misyini kukaskey citake nkit topon kunyo kutompo kwam mukatyantet oṅnkuye cikompet.

<sup>29</sup>Omnye ye puryo kot konkete neto kito nye poru portap Mokoryontet ye ome mukatyantet oṅnkuyesye cikompet ku kosutyikey cicoto nkit musankut ye mite kwomisyi oṅnkuyesyi.

<sup>30</sup>Yunyoto sukuṅet kumnyonis moponto swamet alake ce caṅ om akwek, oṅnkupoty mpo alak.

<sup>31</sup>Ye kocemutyikey acek nkit musankut nyepo manta, kupuryo kot cemutwec musankut.

<sup>32</sup>Ntene omnye Mokoryontet kunye mutwec musankut oṅnkupirec, sukuṅet mente cemutwec musankut wanak oko koret.

<sup>33</sup>Kunyo mpo yeya, ye koyomekey akwek wanak kule kyam omikap Mokoryontet, roke akanynkey tokol.

<sup>34</sup>Nteye ponto cito ake rupet, ku misyini kwomis kunyo kanyi, sukuṅet mente kumutwok akwek Yiyintet musankut ye koyomekey wanak. Nto ṅalek ce nōme tukuk alak mosicasat ani ye kaco.

## **1 Korinsoyek 12**

<sup>1</sup>Mpo yeya, amōce ani kule oṅnket akwek ṅalek cepo manta, ce nōme kokotutek ce kwone wule mite Muyet Nyetilil.

<sup>2</sup>Oṅnket kule yo kito oyiku akwek pic ce monket Yiyintet, ku kipoytok yoto kerkeyik ce moponto sopen ce kimosok omosokisye.




- <sup>3</sup>Kunyo misyini oḡnket kule puryo ci nye ntocini Muyet Nyetilil nye muce kot kucupis kumwoy kule, “Kupot Yesu.” Oḡnkupuryo ci nye muce kuḡalal kumwoy kule, “Yesu kunye Mokoryontet,” okoy ye ntocini Muyet Nyetilil nyoto.
- <sup>4</sup>Mite kokotutek ce pcyotin wok ce caḡ, ntene konu tokol Muyet Nyetilil akenke.
- <sup>5</sup>Mite mpo arosyek wok ce caḡ ye cikolyoyisyi, ntene keyicini Mokoryontet akenke.
- <sup>6</sup>Mite arosyek wok ce caḡ wule muce cito kwiyiyta yisyonutek, ntene Yiyintet akenke nye kocini ci ake tokol kwiy yisyonutek tokol.
- <sup>7</sup>Kocini Muyet Nyetilil ci ake tokol kopur wule yunto, sukuḡet kukalya piko tokol.
- <sup>8</sup>Kocini Muyet Nyetilil cito ake ḡomnonet oḡnkukoci Muyet nyitenyi akenke cito ake lokoywek cepo konketotet.
- <sup>9</sup>Kocini Muyet nyitenyi akenke cito ake koyenet, oḡnkukoci cito ake swamet nye sorse.
- <sup>10</sup>Kocini Muyet Nyetilil cito ake swamet nye yiye tukuk cepo kakitat, oḡnkukoci cito ake kokotutyet nye muce kuḡalal kupor lokoywekap Yiyintet, oḡnkukoci yec mpo cito ake komuc kot kumwoy pcyatet nyepo kokoteywek cepo Muyet Nyetilil oko ce puryo kot kupo Muyet Nyetilil. Kukoci yec cito ake komuc kot kuḡalal ḡelyepik alak, kukoci cito ake kupor kule mwowu ne ḡelyepicoto.
- <sup>11</sup>Ntene Muyet Nyetilil akenke nyitenyi kunye yiye tukucutecu tokol. Kocini neto ci ake tokol kokotutek ce pcyotin kuyu wule moktoy.
- <sup>12</sup>Omnye kerkey Kristo oko porto nye akenke nye ponto kereryanik wok ce caḡ oḡnkurok ku akenke porto nka kot kiciy cituyo kereryanik wok ce caḡ ce pcyotin.
- <sup>13</sup>Kuyunyoto mpo acek tokol Yutayek oko Lamek, oko mutworik, oko piko co kicityac, kicepatisanec ciku porto akenke om Muyet Nyetilil akenke, kunyo kicekonec ceye Muyet Nyetilil akenke.
- <sup>14</sup>Omnye porto kunye puryo kot ku kiy akenke, ntene ponto kereryanik wok ce caḡ.
- <sup>15</sup>Nto kwemuce kerenket kumwoy kule, “Puryo kot opoye ani porto omnye puryo kot oyiku yewut.” Kupuryo ra kot komuce kerenket mopoyit porto?
- <sup>16</sup>Nto kumwoy mpo yitit kule, “Puryo kot opoye ani porto omnye moyiku koḡnta.” Komuce ra kot kukereka mopoyit porto.
- <sup>17</sup>Nto kikwek porto tokol koḡnta, nto kilime ḡalek kulene? Nto kikwek porto tokol yitit, nto kiḡutoy cito kulene?
- <sup>18</sup>Kunyo kuyu wule yunto, kikoci Yiyintet porto tukuk wok ce pcyotin kuyu wule moktoy.
- <sup>19</sup>Nto yunye kikwek porto kiy akenke nto mite porto kulene?
- <sup>20</sup>Kunyo ponto porto kereryanik ce caḡ ntene akenke porto.



- <sup>21</sup>Kunyo puryo kot komuce koŋnta kumwoci yewut kule, “Puryo kot omociŋ ani nyi.” Nto mpo yec kumwoci metit kerekok kule, “Puryo kot omöcok ani akwek’”
- <sup>22</sup>Ntene ŋalek cepo manta kucu kule, kereryanik cepo porto ce cisote kule puryo kuponto swamet kuce ce möce coto koromun.
- <sup>23</sup>Nto kereryanik cepo porto co ce nyile kule puryo kuponto latik koromun, kuce cikostoy acek kule ponto woyinto, nto kereryanikap porwonik cicacek co puryo kot kutoku topon, kuce ceripe coto topon.
- <sup>24</sup>Kereryanik co toku topon kuce puryo kot kumoce kule cerip topon. Yiyintet nkit kunye kituyo porwonikyacek, sukuŋet kukoci woyinto kereryanik co puryo kot kuponto latik.
- <sup>25</sup>Kunyo puryo kot kupciyat porto, ntene yicintos kereryanik tokol cepo porto.
- <sup>26</sup>Ye kataŋany kereryantet akenke nyepo porto, yoto kataŋany mpo cut tokol oko kereryantet nyoto. Nteye kacikasta kereryantet akenke nyepo porto, kuŋerec kereryanik cut tokol.
- <sup>27</sup>Kunyo oyiku akwek tokol porto nyepo Kristo oŋnkupo yec ci ake tokol om akwek porto nyenyi.
- <sup>28</sup>Om piko cepo Yiyintet, kikokoci neto ci tokol yisyenyi. Cepo tayta ku kiyokik, cepo oyeny ku workoyik, cepo somok ku konetik oko co yiye tukuk cepo kakitat, oko co sopsi, oko co kolyoyisiyi, oko co poytoyisiyi, oko co ŋolole ŋelyepik alak.
- <sup>29</sup>Puryo kot kweku piko tokol kiyokik. Puryo kot kweku piko tokol workoyik. Puryo kot kweku piko tokol konetik. Puryo kot kwiye piko tokol tukuk cepo kakitat.
- <sup>30</sup>Puryo kot ku ponto piko tokol kokotutek ce sopsi, moŋolole piko tokol ŋalyepik alak, nto mpo kuŋor kumwoy kule mwowu ne ŋalecato.
- <sup>31</sup>Ntene okoci mukuleywekwok kucorokyi kokotutek ce woyec koromun. Kunyo moporwok ani aret nye topon nye pelisiyi.

## 1 Korinsoyek 13


- <sup>1</sup>Nka mpo ye amuci ani aŋalal ŋelyepik cepo piko, nto ŋelyepik cepo Malaykanik, ntene oŋnkupuryo kot oponte cömisyet, ku kerkey ŋalalemwani oko kiy nye kyiye nto kerkey twolik ce kwerekey.
- <sup>2</sup>Nto mpo ye aponte swamet nyepo workoyontit nye omuci aŋnket tukuk tokol ce wuŋotin oŋnkoponte ŋomnonet tokol, oŋnkoponte mpo koyenet nye omuci aŋet tulonok, ntene oŋnkurok yec moponte cömisyet, ayiku ani püc pate.
- <sup>3</sup>Ye omuci mpo okoyte tukuk tokol ce oponte, okoci pononik; oŋnkokoyte cepel porto nyenyu, ntene ye moponte cömisyet, kupuryo kot onyuru kiy.
- <sup>4</sup>Cömisyet ku muytocinotet oko poypoyet, cömisyet kunye puryo kot ku corokyinot nto koperperisyo nto silotet.



- <sup>5</sup>Puryo kot kwiye cömisyet sornon, nto puryo kot kunyeru lakwar, cömisyet kunye puryo kot kuyukyini mukuley ñolyo.
- <sup>6</sup>Puryo kot kuñerekyini cömisyet miyotyet, ntene ñerekyini pate ñalek cepo manta.
- <sup>7</sup>Ripe cömisyet kiy ake tokol, oñnkuyene kiy ake tokol, ponto kokenotet om kiy ake tokol, oñnkumuytocini kiy ake tokol.
- <sup>8</sup>Cömisyet kunye puryo kot kupoku kenysis, mosukupok ñorsyet, mosukupok ñalalet nyepo ñelyepik, mosukupok ñomnonet.
- <sup>9</sup>Omnye puryo kot cinket tukuk ciwoñnkyi oñnkupuryo kot ceñorsyi ciwoñnkyi.
- <sup>10</sup>Ntene ye kakwa tukuk cepo manta, yoto kuye mosukupoty co mocinket ciwoñnkyi.
- <sup>11</sup>Ye kyoyiku ani lekwa, kyosoti kuyu lekwa, kyonketi ñalek kuyu lekwa, nteyu kowo ayiku ci nyewo ayaste cepo lekwantit.
- <sup>12</sup>Kito nye ceköse acek yawut kunye kerkey oko kerkeyin nye motoku topon nye ceköse ciyoyit. Ntene om letut mokwocekäs acek Yiyintet om konyekyacek. Añnketi ani yawut kereryantet ake pate, ntene mosonket topon koromun om pesyosyek co kwoni kuyu wulo kicinketo.
- <sup>13</sup>Kunyo om tukucutecu somok, koyenet kokenotet, oko cömisyet nye nyewo nye pëlisyi cömisyet.

## 1 Korinsoyek 14

- <sup>1</sup>Kunyo möce otyiki koromun onyuru cömisyet. Okoci kurup mukuleywek cikwok kokotutek cepo Yiyintet ntene kupëlis oñnket amwayte lokoywekap Yiyintet.
- <sup>2</sup>Cito nyo ñolole ñelyepik alak kunye puryo kuñololyini nyo piko, ntene ñololyini Yiyintet. Omnye puryo ci nye lime ñalekyi. Ñolole neto ñalek cepo manta ce wuñotin om swametap Muyet Nyetilil.
- <sup>3</sup>Ntene cito nyo mwoytoy lokoywekap Yiyintet kunye ñololyini nyo piko, kukalya kutitir oñnkuñerec cekto.
- <sup>4</sup>Cito nyo ñolole ñelyepik alak, kolyoykey neto nkit. Ntene cito nyo mwoytoy lokoywekap Yiyintet kunye kolyoy pikap Yiyintet tokol.
- <sup>5</sup>Amöce ani kule nto añalal akwek tokol ñelyepik alak, ntene amöce kupëlis kule oponte kokotutek ce mwoytoy lokoywekap Yiyintet. Omnye cito nye ñolole kumwowu lokoywekap Yiyintet kunye ponto nyoto latik kupël cito nyo ñolole nelyepik alak, tos pate ye mite yoto cito ake nye koror topon ñalek ce mwowu cicoto, sukuñet kukalya pikap Yiyintet tokol.
- <sup>6</sup>Kunyo mpo yeya, mosonyoru akwek latik pa, ye kaco ani wule omite oññkyañalale ñelyepik alak? Puryo mpo kisic, tos pate ye kosutwok ani ñoñutyet ake nye cone wule mite Yiyintet, nto ñomnonet ake, nto lokoywek alak cekwone torot nto konetisyet ake.



- <sup>7</sup>Nka mpo tukuk co moponto soponto kuyu kurerut nto pukantit, muce citake kunket kule tum ne nye pute ye puryo kot ceput kutok topon.
- <sup>8</sup>Ye puryo kot kukut cito kontit kutok topon, komuce kulene piko kuyiytakey kupa poryet?
- <sup>9</sup>Kuyunyoto mpo muce kunket cito ake kulene ñalek ce ñololi nyi ye ñolole ñelyepik alak ce puryo kot celime topon? Mosukusut yomet pate ñalekuk!
- <sup>10</sup>Mite ñelyepik wok ce cañ, ce mite koret tokol, oñnkurok kuponto ñelyepta ake tokol kito nye poru.
- <sup>11</sup>Ntene ye puryo kot añket ani ñelyepta nye ceñolole, mosukwek cito nyo ñolole tontet om wule amite ani, oñnkoyeku ani tontet om wule mite neto.
- <sup>12</sup>Kunyo ye omöce akwek koromun kule cenyoru kokotutek cepo Muyet Nyetilil, kumöce asyem oyiyisye añalal kupëlis ñalek co kolyoy pikap Yiyintet.
- <sup>13</sup>Kunyo misyini cito nyo ñolole ñelyepik alak kusome kokotutek sukuñet konket kule mwowu ne ñalek co ñolole neto.
- <sup>14</sup>Omnye ye kosom ani om ñelyepta nye menket ake, kusome mukuleyto nyimwani manta, ntene oñnkupuryo kot kumite kasoteywek wule mite ñolyontonoto.
- <sup>15</sup>Kunyo masayiy kulene? Mososom om mukuleymwani ntene oñnkosom mpo om kasoteywekwani, mosotum om mukuleymwani, ntene oñnkotum mpo om kasoteywekwani.
- <sup>16</sup>Ye kesom kaste Yiyintet om mukuleyto pate, kumuce kulene cito ake nye püc pate nye mite kusome kumwoy kule, “Yunyoto.” Om somseñuñyi nyepo kakastayet? Puryo komuce neto kot konket ñalek ce mwowu nyi.
- <sup>17</sup>Nka kot kutopon somset nyeñuñ nyepo kakastayet om wule mite Yiyintet, kupuryo kot kukolyoy mpo kisic cito nyin ake.
- <sup>18</sup>Okostoy Yiyintet omnye oñololi ani ñelyepik alak kupëlok akwek tokol.
- <sup>19</sup>Ntene pëlisyi ye kañalal ñalek mut ce toku om sayet nyepo pikap Yiyintet sañet anet piko alak, kusir ye kañalal ñalek elifunek ce cañ om ñelyepik ce puryo kot kulime piko.
- <sup>20</sup>Mpo yeya, monte cipurte kasoteywek cepo lekwantit, opur kuyu lekoy om wule miyotyet. Ntene oñnkopurte kasoteywek cepo piko ce woyec.
- <sup>21</sup>Kicesil om silutekap Yiyintet kule: “Komwoy Mokoryontet kule, Mosoñolyolyi ani picu, oyiyisye piko cepo ñelyepik alak, oko kutuwak cepo piko alak, ntene nka mpo yoto kupuryo kot kulimwo pikwani.”
- <sup>22</sup>Kunyo ñalalet nyepo ñelyepik alak kunye porcini ñalek piko co puryo kot kuyen, nto ñalalet nye cemwoytoy lokoywekap Yiyintet kunye porcini ñalek piko co kikoyen.



- <sup>23</sup>Kunyo ye keyomokey pikap Yiyintet oṅnkucec kuṅalal om ṅelyepik alak, oṅnkukwa orit piko cepo saṅ nto piko co puryo kot kuyen, kupuryo kot kumwowu cek kule kopunwok akwek metewok?
- <sup>24</sup>Ntene ye kuṅalal piko tokol lokoywek cepo Yiyintet, oṅnkukwa orit piko alak cepo saṅ nto piko co puryo kot kucömis, mosukonket cito miyotyenyi om ṅalek ce kalim ce cemwowu mosukumutyikey musankut.
- <sup>25</sup>Mosukonket om moyenyi, mosukukutuny oṅnkusay Yiyintet kuror kumwoy kule, “Oponte akwek Yiyintet kupoyit manta.”
- <sup>26</sup>Mpo yeya, ṅalek ce omwowu cu. Ye koyomekey akwek om sayet, kuponto cito ake tumnto, kuponto ake konetisyet, kuponto ake ṅoṅutyet nye cone wule mite Yiyintet, kuponto ake ṅalalet nyepo ṅelyepik alak, oṅnkumuce cito ake mpo kupor kule mwowu ne ṅalek ce komwoy. Kumöce kule kukalya ṅalecato tokol pikap Yiyintet.
- <sup>27</sup>Ye möce cito ake kule waṅalal ṅelyepik alak, kumöce kuṅalal piko oyenku nto somok kurupekey picoto oṅnkuroke cito ake kupor topon kito nye mwowu ṅalecato.
- <sup>28</sup>Nteye puryo kot kumite yoto cito ake nye muce kot kupor kule mwowu ne ṅalecato, kuroke kuis nye maṅalal cito nyo ṅolole ṅelyepik alak om tuyet, ntene kuṅalal neto kwine nkit oko Yiyintet.
- <sup>29</sup>Misyini kuṅalal pate piko oyeny nto somok ce kocikoci lokoywekap Yiyintet, oṅnkulimnta piko alak kukäs koyoyec topon ṅalek ce mwowu.
- <sup>30</sup>Nteye kanyor cito ake nye kepur tuyet lokoywek ce kwone wule mite Yiyintet, kumisyini kuis cito nyo koṅolole.
- <sup>31</sup>Omuci akwek piko tokol ce mite tuyet oṅalale akenke akenke sukuṅet anetkey cititirok.
- <sup>32</sup>Möce cito nyo mwoytoy lokoywek cepo Yiyintet kurip topon ṅalek ce ṅolole.
- <sup>33</sup>Omnye Yiyintet kunye puryo kot kupo tankwarat, ntene Yiyintet nyepo kalyet. Kuyu wule yunto om wulyo tokol wule mite pikap Yiyintet,
- <sup>34</sup>Möce kuisio koruk ye mite cek tuyet nyepo pikap Yiyintet. Puryo kot ce cömcini cekto kuṅalal kuyu wulo mwowu ntarastinek.
- <sup>35</sup>Ye möce kule cinket ṅolyo ake tokol, kuroke kutepe sanikwa ye mite korikwa. Dolyo nyepo kalilan ye kuṅalale korko tuyet nyepo pikap Yiyintet.
- <sup>36</sup>Kicone so ṅolyontetap Yiyintet wule omite akwek? Nto kico wule omite akwek nkit?
- <sup>37</sup>Ye sote cito ake kule oyiku kiyokintetap Yiyintet, nto sote kule oponte kokotuyet nyepo soponto nyetilil, kumisyini konket cicoto kule ṅalecu osilwok ani kuce kwone ntarastinekap Yiyintet.
- <sup>38</sup>Ye katay malim ṅalecu, kumerok mpo olimnci akwek neto.





<sup>39</sup>Kunyo mpo yeya, asat mukuleywekwok om mwaytayet nyepo lokoywekap Yiyintet, ntene monte omwaytatet akerekte njalalet nyepo njelyepik alak.

<sup>40</sup>Misyini kiyi kiy ake tokol topon om aret nye rotat.

## 1 Korinsoyek 15

<sup>1</sup>Mpo yeya, amöce ani yawut kule asotwok akwek lokoywek ce toponec co kyomwowok, coto kuco kyonyoru ce kikwil koyenet nyimwoj.

<sup>2</sup>Lokoywek coto, kuce lokoywek ce toponec co kyomwowok. Mososopce ye kanäm topon lokoywek ce toponec, tos ye kyoyen parak pate.

<sup>3</sup>Kyomwowok njalek ce woyec koromun ce kyonyoru mpo ani, kule, kimeci Kristo miyotyoni kyacek, kuyu wulo kicesilyo om silutekap Yiyintet,

<sup>4</sup>kule kicemuy neto, oñkynjet kotutune met om pesyet nyepo somok kuyu wule kicesilyo om silutekap Yiyintet.

<sup>5</sup>Oñnkuporkyikek neto Kefa, oko yec kiyokik taman ok oyeny.

<sup>6</sup>Oñnkuporkyikek neto yec aret akenke konomiki ce kikeyte pokolwokik mut ce tokusoptos coto okoy kunyi nka kot kipok alake.

<sup>7</sup>Yoto kuporkyikek Yakopo oko yec kiyokik tokol.

<sup>8</sup>Nto om letutap coto tokol, kuporwokey mpo ani kuyu lekwa nye kiciwos.

<sup>9</sup>Omnye oyiku ani nye miniñ koromun om kiyokik, nye puryo kot kuyeme cekureno kiyokin, omnye kyotojonyi koromun pikap Yiyintet.

<sup>10</sup>Ntene oyuye wule ayunte om poypoyetap Yiyintet, kunyo puryo kot kupoyit püc poypoyenyi nye kikono ani, ntene kyayiy yisonutek ce cañ kupël kiyokik alak tokol, nka kot kipuryo kot ku ani nkit nye kyoyiye, ntene om paypoyetap Yiyintet nye yiyisi om kule amite.

<sup>11</sup>Kunyo ye kwone wule amite ani nto kwone wule mite cek kuce, njelecato ce cemwoytoy acek tokol oñnku njalecato ce kyoyen akwek.

<sup>12</sup>Kunyo yawut, ye lokoywek ce cemwoytoy kucu kule, kicinjet Yesu kotutune met, komuce kulene piko alake om akwek kumwoy kule puryo kot komuce kotutune met piko ce kipok?

<sup>13</sup>Nteye manta njalek coto kuporkey kule kipuryo kot cinjet Yesu kotutune met.

<sup>14</sup>Nteye kipuryo kot cinjet Yesu kotutune met, kuporkey kule po püc pate njalek ce kicemwowok acek, oñnkupoyit koyenet nyimwoj püc pate.

<sup>15</sup>Oñnkuporkey kule ciperperisiy acek om wule mite Yiyintet omnye kicemwowu kule kinjet Yiyintet Yesu kotutune met. Ye po manta kule puryo kotutune met piko ce kipok.



- <sup>16</sup>Kunyo ye puryo kot kotutune met piko ce kipok, kuporkey kule kipuryo kot kotutune met Yesu.
- <sup>17</sup>Nteye kipuryo kot kotutune met Yesu kuporkey kule koperperisyo pate koyenet nyimwoŋ oŋnkutoyiku potyotin om miyotyoniwok.
- <sup>18</sup>Kuporkey mpo yec kule kipoty mpo piko co kipok kucöme cekto Kristo.
- <sup>19</sup>Nteye kokenotet nyinyacek om wule mite Kristo kunye topon om soponto nyepo pesyosyecu pate, nye puryo kito ake yec, kuporkey kule roke cerirenec cikalyec acek kupël ci tokol om koret tokol.
- <sup>20</sup>Ntene nyoyontet nyepo manta kunyi kule, kicinjet kotutune met Kristo nye kikwil kule mosicinjet kotutune met mpo piko co kipok.
- <sup>21</sup>Kuyu wulo kico met kupunune wule mite cito, kuyunyoto mosicitutune met kupunte wule mite cito.
- <sup>22</sup>Kuyu wulo kipok piko tokol omnye kipunune cekto koyomotet nye ponto oko Atam, kuyunyoto mosicinjet kotutune met piko tokol kupunune koyomotet nye ponto oko Kristo.
- <sup>23</sup>Ntene oŋnku ci tokol om otepto nyenyi kwine nkit om pesyet nyo cone neto. Kristo kunye po tayta, kuker piko cepto Kristo.
- <sup>24</sup>Nteye kapok coto kuco pesyet nyepo letut, ye mosukokoyto neto poytoyisyet kukoci Yiyintet om letut ye kakwaranta poytoyisyonik tokol oko swamanik oko kamukeywek.
- <sup>25</sup>Omnye misyini kupoytoyis Kristo okoy kupël Yiyintet puniki tokol oŋnkukoci kopurune nyonyutap kerenkoki.
- <sup>26</sup>Puniyontet nyepo letut nye mosicipël ku met.
- <sup>27</sup>Omnye mwowu silutekap Yiyintet kule, “Kikokoci Yiyintet kopurune tukuk tokol nyonyutap kerenkoki.” Poru nyalecu kule, “Tukuk tokol.” Kunye puryo kot kumite orit mpene Yiyintet nyo kikoci kopurune tukuk tokol nyonyutap Kristo.
- <sup>28</sup>Ntene ye kocikoci kopurune tukuk tokol poytoyisyet nyepo Kristo, kunyo Werit nkit nye mosukuwekey kupurune nyonyutap Yiyintet nyo kikokoci kopurune tukuk tokol wule mite Kristo, sukuŋet kupayta Yiyintet tukuk tokol.
- <sup>29</sup>Kunyo yawut yec, nto piko ce kicipatisan om kaynetap piko co kipok? Mosukunyor coto kiy ne? Nteye po manta kule puryo kot kotutune met piko co kipok, kunyo omne sicepotisone cekto om kaynetap co kipok?
- <sup>30</sup>Nto acek omne sicetany kila sawa.
- <sup>31</sup>Mpo yeya, orice ani met okokoy, kupo silotet nye oponte om wule omite akwek om soponto nyepo Kristo kunye sutwo omwowu nyalecutecu.



- <sup>32</sup>Kiy ne nye omuci onyuru ani kuyu cito nye kyoporye oko tyonjik om wuli po Efeso. Kunyo ye puryo kot komuce kotutune met piko co kipok, Kyaste nas, kyomisye onkyeyesye omnye mocepoku tun.
- <sup>33</sup>Monte ciperperak: “Coronutek ce miyotec kuce wurtoy kopurto nye topon.”
- <sup>34</sup>Oketyikey akwek kasoteywek cikwok cepo manta, ayaste arustunwekwok cepo miyotyot. Komwowu ani nalecu kusornenok akwek, omnye menkete piko alake om akwek Yiyintet.
- <sup>35</sup>Mosukutep citake kule, “Muce kotutune met piko ce kipok kulene? Mosukunyor cekto porto nye yu ne?”
- <sup>36</sup>Yiku nyi perper! Ye kekol nyi kupuswontet, ku puryo kot kume kunyo nto turu kupit.
- <sup>37</sup>Kole nyi koci nony kupuswontet nkit, onkopo nkanu nto kupuswo ake tokol, ntene puryo kot ku ketit tokol nye pite kuwoyit.
- <sup>38</sup>Kocini Yiyintet kupuswontonoto porto kuyu wule moktoy. Kocini kupuswo ake tokol porto nye nyenyi nkit.
- <sup>39</sup>Puryo kot kukerkey panyek cepo tukuk tokol ce soptos. Ponto piko panyek cikwa, kuponto tyonjik panyek cikwa, kuponto toritek panyek cikwa, kuponto purpurunek panyek cikwa.
- <sup>40</sup>Kunyo mite mpo tukuk cepo koret torot oko tukuk cepo koret nony, kumite toponiyet nyepo tukuk cepo torot, onkumite toponiyet nyepo tukuk cepo nony.
- <sup>41</sup>Ponto asista toponiyet nye nyenyi nkit, kuponto arawet toponiyet nye nyenyi nkit, onkuponto kokelik toponiyet wok ce cepciyotin, omnye puryo kot kukerkey kokelik om toponiyet nye ponto.
- <sup>42</sup>Mosukwiytakey nyoto om pesyet nyo tutune met piko. Nune porto ye kacemuy, puryo kot kunune porto ye kakotutune met.
- <sup>43</sup>Cemuye porto nye puryo kot kuponto woyinto, ntene tutune met porto nye ponto woyinto. Cemuye porto nye puryo kot kuponto swamet, ntene tutune met porto nye ponto swamet.
- <sup>44</sup>Cemuye kuyu porto nyepo kwak, ntene tutune met kwek porto nye ponto soponto nyepo okokoy. Ye mite porto nyepo kwak, kumite yec mpo porto nye ponto soponto nyepo okokoy.
- <sup>45</sup>Omnye mwowu silutekap Yiyintet kule, “Kicitany Atam cito nyepo tayta kusop kuponto soponto nyepo kwak,” ntene Atam nyepo letut kunye konu Soponto nyepo Muyet Nyetilil.
- <sup>46</sup>Puryo kot kunyosyi kuco soponto nyepo okokoy, ntene soponto nyepo kwak nye nyosyi ntekere soponto nyepo okokoy.
- <sup>47</sup>Kicitany Atam nyepo tayta kucone tenjek, ntene cone Atam nyepo oyeny torot.



<sup>48</sup>Kerkey piko cepo koret oko cito nyo kicitanye tejek cepo koret, kukerkey piko cepo torot oko cito nyo cone torot.

<sup>49</sup>Kuyu wulo kicilac acek tonto nyepo cito nyo kicitanye tejek, kuyunyoto musicilac tonto nyepo cito nyo cone torot.

<sup>50</sup>Mpo yeya, ñalek ce koporu ani kucu kule, puryo kot kunyuru porto oko korotik poytoyisyet nyepo Yiyintet, oñnkupuryo kot kunyuru kito nye nune kito nye puryo kot kunune.

<sup>51-52</sup>Olim omwowok ñalecu wuñotin kule, puryo kot cepoku acek tokol, ntene ye kaciy kontit nyepo letut mosicewecac acek lakwar kuyu wulo lekecectoy koñnta. Omnye ye kaciy kontit mosokuñetyo piko nye komo kopoku mosicewecewecac acek tokol.

<sup>53</sup>Omnye misyini kulac kito nye nune kito nye puryo kot kunune, oñnkulac kito nye me kito nye puryo kot kume.

<sup>54</sup>Yoto ye kacilac kito nye nune kilokyi kito nyo puryo kunune, oñnkyilac kito nye me cilokyi kito nye puryo kot kume. Yoto kuye kwitita kupoyit manta silutekap Yiyintet kule, “Kakyaranta met, kupok poryet!”

<sup>55</sup>“Nyi met, pëlisyi nyi oyu? Nyi met, ono swamet nyenñu.”

<sup>56</sup>Nyortoy met swamet nye wutisye wule mite miyotyeyet, kunyortoy miyotyeyet swamet nye wutisye wule mite ntarastinek.

<sup>57</sup>Ntene cikaste Yiyintet nye konec acek cipëlisye kupunte Mokoryontenyo Yesu Kristo.

<sup>58</sup>Kunyo mpo yeya cãmanik, oyoñnkye okwilokisye topon, oyiyisye okokoy om yisyemwoñ nyepo Mokoryontet, omnye oñnketi akwek kule puryo yisyo nye oyiye om yisyetap Mokoryontet nye moponto latik.

## 1 Korinsoyek 16

<sup>1</sup>Kunyo yawut ñalek ce nöme pesanik co ciruruce sukuñet cikalye pikap Yiyintet ce mite Yuteya. Misyini ayiy akwek kuyu wulo kyomwocini ani pikap Yiyintet cepo Kalatiya.

<sup>2</sup>Roke kukonune ci ake tokol om akwek pesanik tukusic ce kanyor kuyu wule muktoy ye pesyetap santey, sukuñet mente yec kot ciruruc pesan ye kaco ani wule omite akwek.

<sup>3</sup>Nteye kaco ani, mosoyokte piko ce kakwey akwek nkit kupa Yerusalem kusut kokotutekwok.

<sup>4</sup>Nteye keporkey kule mite latik owetekey ani picoto, kuye cepetekey tokol.

<sup>5</sup>Masoco wule omite akwek om letut ye kawo opunte Meketoniya, omnye amoce kule apunte wuloto.



- <sup>6</sup>Mosopur oko akwek pesyos ce ɲeri, nto pesyet ake opur awany pesyosyek cepo koyitityet tokol. Yoto kuye okalya om poninekyu om wulyo ake tokol wule mosowo.
- <sup>7</sup>Omnye puryo kot amoce ani kule copur oko akwek awany pesyos tukusic pate ye okeytoy. Asoti kule mosopur oko akwek awany pesyos ce caɲ ye kacäm Mokoryontet.
- <sup>8</sup>Ntene mosopur wuli po Efeso okoy pesyetap Pentekoste.
- <sup>9</sup>Yatat kurket om wuli, mite yisyet nyewo nka kot kumite piko ce caɲ ce kerektoy yisyet.
- <sup>10</sup>Ye kuco Timosewo okoy wule omite akwek kumöce kule atoroc oɲerekyi, sukuɲet kuɲerec om wule omite akwek; omnye yiyisi yisyetap Mokoryontet kuyu wulo oyiyisi ani.
- <sup>11</sup>Puryo kuroke kot kunyil citake neto, ntene möce akalye kutosyikey poninekyi om kalyet sukuɲet kuketkey kuco amite ani, omnye amite okonye neto oko mpo yeya alak.
- <sup>12</sup>Kunyo ɲalek ce nöme yeya Apolo, kwasaysay ani neto oko mpo yeya alak kule kuco kurutocok akwek, ntene tompo kuwoɲnkyi kule aco yawut pakenke, mosukuco ye kanyor poroyinto.
- <sup>13</sup>Oɲomekitu, oɲnkoyoɲnkye okwilokisye om koyenet, oyiku nyikon oɲnkopoyitu swama.
- <sup>14</sup>Oyiye yisyonutek tokol om cömisyet.
- <sup>15</sup>Oɲnket akwek Stefana oko pikap kanyi, cekto kuce piko ce kinyosyo cewec kwek Kristayek om Akaya kunyo kicikenekey cekto om yisyet nyepo pikap Yiyintet. Mpo yeya, osomok ani kule
- <sup>16</sup>arup kantoyintet nyepo piko ceyucoto oko ci ake tokol nye kolyoyisi oɲnkwiysisi wanak oko cekto.
- <sup>17</sup>Oyiku ani ɲerekat omnye kukwa mpo Stefana oko Fortunato oko Akayiko, omnye kukwiye cekto tukuk ce kumo oponte akwek poroyinto nye oyie.
- <sup>18</sup>Kukuɲereca ani cekto, oɲnkuɲerecak mpo akwek, möce oɲnketi akwek piko ce yuco.
- <sup>19</sup>Kesupayak akwek pikap Yiyintet cepo koretap Asia. Kesupayak akwek Akwila oko Prisika pikap Yiyintet ce tuytos om koto nyimwa om kosupoyisyet nyepo poypoyet om Kristo.
- <sup>20</sup>Kesupayak akwek mpo yeya tokol ce mite wuli asupayikey akwek aɲatutkey kuyu mpo yeya.
- <sup>21</sup>Ani nkit nye kosile ɲalecu om yewumwani. Kasupayak ani Paulo.
- <sup>22</sup>Ye puryo kot kucöme ci ake tokol Mokoryontet, kucupot nyoto! Ico Mokoryontet!
- <sup>23</sup>Opurte akwek tokol poypoyetap Mokoryontenyo Yesu.



<sup>24</sup>Kopur cömisyet nyimwani wule omite akwek tokol om koyomotet oko Yesu Kristo.  
Yunyoto.





## 2 Korinsoyek

### 2 Korinsoyek 1

- <sup>1</sup>Cone parwani wule omite ani Paulo nye kiyokintetap Yesu Kristo om cömisyetap Yiyintet oṅnkucone wule mite yeyanyo Timosewo. Cesilyini pikap Yiyintet cepo Korinso oko pikap Yiyintet tokol cepo Akaya.
- <sup>2</sup>Kante kukonok Yiyintet Papanyo oko Mokoryontet Yesu Kristo poypoyet oko kalyet.
- <sup>3</sup>Cikasta Yiyintet kwanitap Mokoryonteny Yesu Kristo. Papa nyoto nyepo poypoyet oṅnku nye konu kokolyoyisyet tokol!
- <sup>4</sup>Kolyec acek neto wuyinwek tokol, sukuṅet cimuc cikalye piko co ponto wuyinwek wok tokol, ciyisye kokolyoyisyet nye kerkey nyo kicenyoru kucone wule mite Yiyintet.
- <sup>5</sup>Omnye kuyu wulo ceponte toṅoṅutek cecaṅ ce kerkey oko cepo Kristo, kuyunyoto cenyoru mpo kokolyoyisyet nyewo kupunte wule mite Kristo.
- <sup>6</sup>Ye kacetaṅany acek, kukacetaṅany kupo kokolyoyisyemwoṅ oko kosopet, nteye kacikalyak mpo akwek mosicikalyak oṅnkyekonok swamet omuytoci toṅoṅutek ce kerkey ce cemuytocini acek.
- <sup>7</sup>Kunyo mowewecikey kenysis kokenotet nye ceponte acek om wule omite akwek. Cinket kule kuyu wulo onyuru mpo akwek toṅoṅutek ce kerkey cicacek, kunyo mosonyoru mpo akwek kakalyayet nye cenyoru acek.
- <sup>8</sup>Mpo yeya, ce möce kule oṅnket akwek wuyinto nye kicenyoru acek om Asia. Kicenyoru wuyinto nyewo nye nyikisit koromun okoy cemwowu kule komo cesoptosi.
- <sup>9</sup>Kicisot yoto kule kacemutwec musankut nyepo met. Ntene kikwiyakay kuyunyoto sukuṅet komo cikenekey swamet nyinyacek nkit, ntene cikenekey Yiyintet nyo ṅete piko kotutune met.
- <sup>10</sup>Kisorwec Yiyintet om met nye miyat nye yunyoto, kunyo kicikenekey kule mosukusorwec yec.
- <sup>11</sup>Kunyo ye kokalyec acek akwek osomwec, yoto kuye mosukupunto somset nyepo piko ce caṅ wule mite Yiyintet om poypoyenyi nkit.
- <sup>12</sup>Ḍolyontet nye cesilekey acek kunyi, porwec kasoteywekyacek kopurto wule kicipurte acek om koroni, nto kupēlis om wule omite akwek. Kicipurte kopurto nye toku nyepo manta nyetilil, nyoto kunye kopurto nye konu Yiyintet om poypoyenyi nye puryo kot ku ṅomnon nyepo cito.
- <sup>13</sup>Omnye cesilwok acek pate ṅalek ce omuci asuman oṅnkonket. Asoti ani kule mosonket akwek topon.



<sup>14</sup>Dalek ce oṅnketi akwek yawut kererya kuce mosonket coto om pesyetap Mokoryontet Yesu, oṅnkyinket kule oponte akwek ṅolyontet nye osilekey om wule ce mite acek kuyu wule cesilekey mpo acek om wule omite akwek.

<sup>15</sup>Kyonket ani topon ṅalecutecu saṅet ayiytekey orutocok akwek nyepo tayta sukuṅet onyuru kupeyok aret oyeny.

<sup>16</sup>Omnye kyaiytekey yoto kule orutocok akwek om poninekyu cepo Meketoniya oko yec ye owecekey saṅet anyoru kakalyayet nyimwakwek om poninekwani ye oweti Yuteya.

<sup>17</sup>Kyoteltelen ani so yoto ye kyoyiytoy coto? Ye oyiytoykey ani so oyiytoykey kuyu cito nyepo koret? Nye muce omwowu kule “Yunyoto, Nto moyunyoto, om yoto pakenke?”

<sup>18</sup>Yiyintet kunye po manta! Kurtoyemwani om wule omite akwek kipuryo kot kule. “Yunyoto,” nto “Moyunyoto.”

<sup>19</sup>Omnye Yesu Kristo Weritap Yiyintet, nyo kimwowok Silwano oko Timosewo oṅnkomwowok ani kunye kipuryo kot ku kule, “Yunyoto,” nto “Puryo” Ntene om wule mite neto ku kule, “Yunyoto.”

<sup>20</sup>Omnye kupunte wule mite neto kuye koyitita Yiyintet kurtoyet nyenyi tokol. Kunyo sukuṅet cemwowu acek kule “Yunyoto” Kupunte wule mite neto cikaste Yiyintet.

<sup>21</sup>Omnye Yiyintet kunye kwile soponto nyinyacek oko nyimwakwek om wule mite Kristo. Yiyintet nkit kunye kiṅapec kukweyec acek.

<sup>22</sup>Neto kunye kiṅapenec pelutyet nyenyi oṅnkukoci Muyet Nyetilil mukuleywekyacek kwek kwilatet nyepo tukuk ceponto neto ce cicacek.

<sup>23</sup>Yiyintet nye muncururwet nyimwani. Nkete mukuleyto nyimwani! Kipuryo kot aco ani Korinso omnye kyakalyak akwek.

<sup>24</sup>Puryo kot cesyeme acek kule ceckerak koṅ om ṅalek ce mocām, omnye oponte koyenet nye kwilat, ntene ciku piko ce kiciyisi tokol kupo ṅerekwek cikwakwek.

## 2 Korinsoyek 2

<sup>1</sup>Kunyo kyowoṅnkyi ṅolyontoni om mukuleymwani kule puryo amoce aco wule omite akwek osutwok nerekwek.

<sup>2</sup>Omnye ye kanerecak ani akwek, ku ṅo yec cito nye ṅetu nye muce kuṅereca ani? Nyoto kunye cito nyo kyanerec ani!

<sup>3</sup>Kuyunyoto sukuṅet osilwok ani parwani, kupuryo kot amoce yec kule aco cokunerekis piko ce ketenereco ani, omnye oṅnketi topon kule ye ayiku ani ṅerekat, kuye mosonerec mpo akwek.



- <sup>4</sup>Kyosilwok yoto oponte wuyinto oko nerekwek ce mite mukuleyto oko lokik, nye kimomöce kule onerekisye, ntene kyomöce kule sonket kule ocömok ani akwek koromun.
- <sup>5</sup>Ye mite citake nye kinerec cito ake, kipuryo kot kunereca ani, ntene kinerecak akwek tokol, nka kot momoce ani kule omwontyok akwek.
- <sup>6</sup>Yeme cico lelisto ye komutyi akwek piko ce caṅ musankut.
- <sup>7</sup>Kunyo misyini akalye akwek oṅnkotitir neto, sukuṅet mente kot kunyikisyi nerekwek okoy kutoyis kuwoṅnkyi.
- <sup>8</sup>Osomok ani möce oporci kule ocöme akwek neto.
- <sup>9</sup>Kyosilwok ani parwana. Kule asyemak akäs oṅnkomuci otitir; oṅnkomuci kot arup konetisyyet nyepo tukuk tokol.
- <sup>10</sup>Ci ake tokol nye kokalye akwek lelis nye kakwiy mosakalye mpo ani neto ṅolyo ake tokol, nteye kakalye; kukakalye om Kristo om kaynemwakwek.
- <sup>11</sup>Cinket ṅomnonet nyepo Setanit kunyo puryo kot kuroke cikoci acek poroyinto kot kuperperec.
- <sup>12</sup>Nteyu kowo apunte ani Troa amwayte lokoywek ce toponec cepo Kristo, onyuru yoto kule kiyat Mokoryontet aret nyepo yisyyet om wuloto.
- <sup>13</sup>Ntene kyasot koromun omnye kipuryo kot onyuru yeyanyo Tito. Yoto oyomis pikap woloto oṅnkonomen awo Meketoniya.
- <sup>14</sup>Ntene cikaste Yiyintet! Omnye om koyomotet nye ceponte oko Kristo kunye ntowec Yiyintet okokoy cipëlisye. Yiyisyenec acek neto sukuṅet cemwayte lokoywek ce toponec kupunte wulyo tokol kuyu kiy nye poṅu topon.
- <sup>15</sup>Omnye cekeyekey acek oko korosek ce poṅu topon ce pele Kristo sukunet kupunto wule mite Yiyintet. Peti korosecoto wulyo tokol wule mite piko co mite cisope oko co peti wokusoptos.
- <sup>16</sup>Korosyontoni poṅu topon kunye poru soponto om wule mite piko co cisope, oṅnkupor met om wule mite piko co peti wokupotos. Kunyo ṅo nye muce yisyoni?
- <sup>17</sup>Puryo kot cerkeyekey acek oko piko alak ce caṅ ce yiyisye lokoywekap Yiyintet kupoyit kamonkesyantit. Ntene omnye kikoyoktec acek neto, kunyo ceṅololi om tay nyi cepo manta om poypoyet, kuyu mutworikap Kristo.

## 2 Korinsoyek 3


- <sup>1</sup>Poru pa ṅalecu kuyunye cemite acek yec cesilekey? Ce moce ra poronok ce portec acek om wule amite akwek, nto akwek om wule cemite acek, kuyu wulo yiytoy piko alake?
- <sup>2</sup>Oyiku akwek nkit parwet nyinyacek nye kicesil mukuleywekyacek orit, nye cinkete oṅnkusumone piko tokol.



- <sup>3</sup>Porukey kutok topon kule oyiku akwek parwet nye cone wule mite Kristo, nye kicesutu acek, nye puryo cesile winet, ntene kicesile Muyet nyepo Yiyintet nye sopot, nye puryo kot cesil rwantet, ntene kicesil mukuleywekap piko.
- <sup>4</sup>Cemwowu acek ñalecu omnye cikenekey Yiyintet kupunte Kristo.
- <sup>5</sup>Puryo kot ku kule ceponte swamet nyinyacek nkit, cesutekey kule cimuci kiyiy yisyoni. Ntene cone swamet wule mite Yiyintet.
- <sup>6</sup>Neto kunye kikonec acek cimuc kot kiyiy yisyet nyepo kirotyet nyelel, omnye puryo kot ku ntarastinek co silotin, ntene Muyet Nyetilil. Sutu ntarastinek ce silotin met. Ntene konu Muyet Nyetilil soponto.
- <sup>7</sup>Ntene ye ntarastinek ce sutu met kuce kicesil kutok om rwontok kuce kicekon om woyinto nyewo okoy kutiñ ye mokukäs pikap Israel tokoytap Moses omnye kilekecec.
- <sup>8</sup>Kupuryo kot cekonu ne Muyet Nyetilil om woyinto nyewo kupëlis?
- <sup>9</sup>Kunyo ye ponto woyinto ye cemutyini piko kulot musankut, kupuryo kot kuponto woyinto kupëlis ye cikocini piko tililinto!
- <sup>10</sup>Omnye om ñolyontoni, kuporkey kule kito nye kiponto woyinto ikye kunye kimo kuponto nyoto yawut woyinto, omnye kutok woyinto ake nye pële nyoto.
- <sup>11</sup>Omnye ye kimite ikye woyinto nye kipure pesyos ce ñeri, kunyo tya nyun woyinto nyo poyitu okokoy!
- <sup>12</sup>Ciku acek nyikon omnye ceponte kokenotet nyitenyi.
- <sup>13</sup>Puryo kot cekerkeyekey oko Moses nye kiyene tokoynyi siret kule sukuñet mente kukäs pikap Israel wule yunto lakweyet nye kimite kipoku.
- <sup>14</sup>Kikerokis kasoteywekwa kupoyit manta, kunyo tokoyene siret nyoto kasoteywekwa okoy kunyi ye mite cek kusumane kitapunek cepo kirotyet yoswaket. Cinumu pate siret nyoto ye keyomokey cito oko Kristo.
- <sup>15</sup>Nka mpo okoy pesyosyecu, ye cesumone ntarastinekap Moses, kumite kuyene siret nyoto kasoteywekwa.
- <sup>16</sup>Ntene cinumu siret nyoto, ye kowekyikey cito wule mite Mokoryontet.
- <sup>17</sup>Kunyo, “Mokoryontet” nyo mwowu ñalecu kunye Muyet Nyetilil nyoto. Nto om wulyo tokol wule mitowune Muyet Nyetilil, kutyokotin piko cepo wuloto.
- <sup>18</sup>Kunyo acek tokol kuce ciportoy woyinto nyepo Mokoryontet, om tokocik ce puryo kot kuyenotin. Woyinto nyoto cone wule mite Mokoryontet, nye Muyet Nyetilil nye wecec acek cekerkeyitu oko tonto nyenyi om woyinto nyewo kupëlis.

## 2 Korinsoyek 4

- <sup>1</sup>Kikonec acek Yiyintet kiyiy yisyoni om poypoyenyi, kunyo cetosyinikey ceponte titirotet.



- <sup>2</sup>Kicetay tukuk tokol ce wuŋotin cepo menonet cepo sornon, puryo kot kyiyisye yec koperperisyo, nto mpo cemas ŋolyontetap Yiyintet, cineti kutok nye mocewunye ŋalek cepo manta. Cemöce kule cekonu konetisyet kucäm ci tokol topon om taytap Yiyintet.
- <sup>3</sup>Omnye ye wuŋotin lokoywek ce toponec cu cemwowu acek, kuwuŋotin pate om wule mite piko co peti wokupotos.
- <sup>4</sup>Puryo kot kucömisyi cekto omnye kiker oyinoto nyepo koroni kuyene menonet kasoteywekwa cikwa. Sukuŋet mente kukäs cekto topon lakweyet nye mite lokoywek ce toponec cepo tililinto nyepo Yesu Kristo; nye tonto nyepo manta nyepo Yiyintet.
- <sup>5</sup>Omnye puryo kot cemwoytoy acek ŋalek ce cicacek nkit. Cemwoytoy Yesu Kristo nye Mokoryontet, oŋnku ciku acek mutworik cikwok om kaynetap Yesu.
- <sup>6</sup>Yiyintet nyo kimwoy kule “Mosukoluci lakweyet menonet.” Kunye Yiyintet nyoto nye kikoci koluci lakweyet nyenyi mukuleywek cicacek, sukuŋet kusutwec lakweyet nyepo ŋomnonetap woyinto nyepo Yiyintet nye luwu om tokoytap Kristo.
- <sup>7</sup>Oŋnkurok yec acek cu ceponte soponto nyitenyi konorat kuce ceckerkey oko terenik cepo menon, sukupor kule Yiyintet kunye ponto swamet tokol, ntene puryo kot ku nyinyacek.
- <sup>8</sup>Cetoŋonyi om aret tokol, ntene puryo kot kupotwec titiret, ceconoŋeni, ntene puryo kot kupokunenec kokenotet.
- <sup>9</sup>Cinyolilec, ntene puryo kot kupotwec kiy, ceŋwolec, ntene puryo kot kuwoŋntec.
- <sup>10</sup>Cesutoti acek pesyosyek tokol metap Yesu om porwonikyacek, sukuŋet kuporkey cekäs soponto nyenyi Kristo om porwonik cicacek.
- <sup>11</sup>Cemite acek okokoy om saponwek cicacek ŋoyenyontit nyepo met om kaynetap Yesu, sukuŋet kutok cekäs soponto nyenyi Kristo om porwonik cicacek cu poku.
- <sup>12</sup>Poru ŋolyontono kule yiyisyi met om wule cemite acek, ntene kwiysisyi soponto om wule omite akwek.
- <sup>13</sup>Mwowu silutekap Yiyintet kule, “Kyaŋalal ani, omnye kyoyen.” Ceŋololi mpo acek om koyenet nyepo Muyet Nyetilil nye kerkey nyoto.
- <sup>14</sup>Cinketi kule Yiyintet nyo kiŋete kotutune met Yesu, kunye musukuŋetec acek citutune met oko Yesu oŋnkusutwec wanak oko akwek cekwa taynyi.
- <sup>15</sup>Omnye cikwakwek cutecu tokol, kunyo mite kupuntoy poypoyetap Yiyintet wule mite piko ce caŋ, mosukokasta cekto om sayet kupo woyintap Yiyintet.
- <sup>16</sup>Puryo cecose acek mocetitir om ŋolyontoni, nka kot mite kucostos porwonik cicacek wule po panyek, ntene kumite kutosyinikey pesyosyek tokol saponwek cicacek cepo orit.
- <sup>17</sup>Ntene toŋoŋutecutecu tukusic oŋnkuminkec kuce mosukukonec acek woyinto nyewo nye mopoku nye pële toŋoŋutek.



<sup>18</sup>Omnye puryo kot ceköse acek tukuk ce toku, ntene ceköse pate tukuk ce motoku. Pure pesyos ce ɲeri tukuk ce toku, ntene pure okokoy tukuk ce motoku.

## 2 Korinsoyek 5

<sup>1</sup>Cinket acek kule, ye kacipuryet kuyu menet porto nyi ceponte acek om koret, mosukukonec Yiyintet koto ake nye moceminy om torot. Koto nyoto kunye kitece neto nkit nye pure okokoy.

<sup>2</sup>Kunyo om yawut cerirtosi nye ce möce kule cekonec koto nyenyo nye kicetekwec nye mite torot.

<sup>3</sup>Omnye ye kacilacec komo cipuri püc nye moceponte sira.

<sup>4</sup>Omnye ye tocemite acek ceminye wemet nyi po koret, mosicekäs kule citoɲonyec. Puryo ku kule omnye cemöce kule cewirte porto nyi ceponte om koret, ntene ce möce pate kule cilokwec porto nyepo torot, sukuɲet cilum porto nyi po koret.

<sup>5</sup>Yiyintet nkit kunye kikwiytowec acek wekwekatenyi; kunyo kikonec Muyet Nyetilil nyenyi kwek kurtoyet nyepo tukuk tokol ce pontewec acek neto.

<sup>6</sup>Kunyo ce ponte acek titirotet okokoy, omnye cinketi kule ye tocemite ceponte porto om wuli po koret, kuporkey kule cemite wule low om wule mite kotap Mokoryontet.

<sup>7</sup>Omnye soponto nyinyacek kunye po koyenet, nye puryo ku ceköste.

<sup>8</sup>Ceponte titiret nyewo, kunyo ce möce kule cepakakte porto nyi ceponte oɲnkyipe wocipur oko Mokoryontet.

<sup>9</sup>Ntene om kiy ake tokol, ce möce kule ciɲerec neto; ye ce mite wuli po koret nto ye kacipe wulin po torot.

<sup>10</sup>Omnye mosiciyone acek tokol taytap Kristo sukuɲet kuwosontyec. Mosukunyor ci tokol kito yeme kuyu wule yunto ɲalek ce kikwiɲ om soponto nyepo porto, ye kikwiɲ ce toponec nto ce miyotec.

<sup>11</sup>Cinket acek kito nye poru ye kiciywey Yiyintet, kunyo cesyeme kule cesaysay kucömis piko. Kikonec Yiyintet kuwoɲnkyi kupoyit manta, kunyo asoti kyonketo mpo ani akwek om mukuleywekwok.

<sup>12</sup>Puryo kot cesyeme yec kule ciporukey acek om wule omite akwek, ntene cemite cesyeme kule ciporwok ɲalek ce toponec; sukuɲet osilkey akwek om wule ce mite acek, oɲnkomuc owekyi piko ɲalek co silekey kuyu wule yunto cekto wulopo saɲ nye puryo kot kuyu wule yunto kopurto nyenyi nkit.

<sup>13</sup>Ye kipunwec acek metewok, kukipunwec kupo Yiyintet, nteye ceponte ɲomnonet, ku ceponte kupo toponiyenyi.

<sup>14</sup>Omnye ripec acek cömisyet nyepo Kristo. Kicinket ciwoɲnkyi kule kime cito akenke kumeci piko tokol, nye poru kule mosukupok piko tokol kuyu neto.





- <sup>15</sup>Kimeci neto piko tokol sukuṅet piko co sopcotin komokusoptos kwicek nkit ntene kukosopco om wule mite neto, nyo kime oṅknyṅet kupo cekto.
- <sup>16</sup>Kunyo kuceke yawut kuwo tay, kimo ciyoyeci acek ci ake tokol kuyu wule yunto soponto nyepo cito nyepo koret, nka kot kimite pesyosyek ce kiciyoyeci Kristo kuyu cito, kimo kuyu nyo yawut.
- <sup>17</sup>Ye kociyomo citake oko Kristo, kokwek nyoto kataṅanet nye lel, omnye kuwo yoswaket oṅnkuco cito nyelel.
- <sup>18</sup>Yiye Yiyintet ṅalecutecu tokol, kunyo kiwecec acek Kristo cekwane puniyontit okoy ciku coronutekyi, oṅnkukonec yisyet nye cewece mpo piko alak kwek coronutekyi.
- <sup>19</sup>Lokoywek cicacek kucu kule, mite Yiyintet kuwece kwek piko tokol coronutekyi kupunte Kristo. Kipuryo kurip koyit Yiyintet miyotyoni kwa om tukuk ce kikwi y cekto. Kikonec lokoywek cepo wule cewektoy piko kwek coronutekyi.
- <sup>20</sup>Kunyo cemite acek yawut ceṅolole kuyu kiyokikap Kristo, Yiyintet nkit nye ṅololwok kupunte wule cemite acek, kunyo cesomok om kaynetap Kristo kule ocomisyen om wule mite Yiyintet.
- <sup>21</sup>Kipuryo kot kuponto Kristo miyotyoni, ntene kikoci Yiyintet kusut miyotyoni cicacek sukuṅet cenyoru acek ṅalek cepo manta ce konu Yiyintet.

## 2 Korinsoyek 6

- <sup>1</sup>Kunyo kuyu wulo kiyisyi acek oko Yiyintet cesomok monte ce cām kupot pūc pate poypoyet nyo kyonyoru kucone wule mite Yiyintet.
- <sup>2</sup>Kuyu wulo mwowu Yiyintet kule, “Kyolimūṅ ani om pesyet nye kicecām, Kyakalyiṅ om pesyet nyepo kosopet.” Limnte! Kunyo pesyet nyitenyi nye cenyorune cōmisyetap Yiyintet, pesyoni kunye pesyet nyepo kosopotet.
- <sup>3</sup>Puryo kot cemōce acek kule kunyor citake tokol konokut, sukuṅet kuwur wurat yisyet nyinyacek. Kunyo cesyeme kule mente cekerekte aret nyepo citake.
- <sup>4</sup>Ntene ciporu kule ciku mutworikap Yiyintet om kiy ake tokol nye kyiye, omnye cemuytocini koromun wuyinwek tokol oko toṅoṅutek tokol.
- <sup>5</sup>Kicepirec, kicekerktec mopusi, kicewunuktec, kiciyisyen kot cecosyen nye puryo rwonto oṅnkwamec rupet.
- <sup>6</sup>Kunyo kiciporu acek kule ciku mutworikap Yiyintet om tililinto, oko ṅomnonet, oko muytocinotet oko tolosyet om swametap Muyet Nyetilil oko cōmisyet nyinyacek nyepo manta,
- <sup>7</sup>oko lokoywek cicacek cepo manta om swametap Yiyintet. Dalek ce tililec cepo manta kuce karik ce kiyisyen ce porye oṅknyeyetekey.



<sup>8</sup>Ciyweyec acek, oŋnkyenyilec, cecupec, oŋnkyikastec, cesutec kuyu mwiynot, oŋnkurok ceŋololi ŋalek cepo manta.

<sup>9</sup>Cesutec kuyu pic ce mocinket, oŋnkurok konketec piko tokol. Cesutec kuyu pic ce kipok, oŋnkurok ciku sopcotin kuyu wulo oköse akwek. Nka kot kicitaŋanyec, ntene puryo kot cepakäcec.

<sup>10</sup>Nka kot kicinerecec, ntene ceŋereci okokoy. Cekerkeyekey nye ciku ponon, ntene cewece kwek piko ce caŋ mokoren. Cekerkeyekey nye ciku ponon, oŋnkurok ceponte tukuk tokol.

<sup>11</sup>Mpo yeya, Korinsoyek! Kocceŋololwok acek akwek ciporwok kutok, kuceŋany mukuleywek cicacek.

<sup>12</sup>Puryo kot ceker cewuny mukuleywek cico om wule omite. Ntene akwek kuce kwaker awuny mukuleywek cikwok om wule cemite acek.

<sup>13</sup>Oŋololi yawut kuyunye oyiku akwek lekokwani, möce oŋany mukuleywek cikwok oporwec kopurto nye kerkey nye ceponte acek om wule omite akwek.

<sup>14</sup>Monte ceiyisye oyoyeckey oko piko co puryo kot kuyen, omnye puryo kot komukoktos kuyunyo. Muce kucomnyo ŋalek cepo manta oko miyotyey? Muce kopurcini kulene lakweyey oko menonet?

<sup>15</sup>Muce kucömncin kulene Kristo oko setanit? Kiy ne nye muce kwicin cito nyo kikoyen oko nye tompo koyen?

<sup>16</sup>Kumuce kulene kwicin kotap Yiyintet oko ototoywek cepo piko co menket Yiyintet? Omnye ciku acek kotap Yiyintet nye sopot! Kuyu wulo kimwoy Yiyintet nkit kule, “Mosatec ani konyu wuli mite pikwani, Oŋnkominy wule mite cekto, Mosoyeku Yiyintet nyimwa, kwek cekto pikwani.”

<sup>17</sup>Mwowu mpo Mokoryontet kule, “Misyini apakakte cek, oŋnkakwane wule mite cekto. A sanekey kiy nye puryo kot kutilil. saŋet atorocak ani.

<sup>18</sup>Mosoyeku ani Papamwoŋ, oŋnkoyiku akwek werikwani oko tipikwani. Mwowu Mokoryontet nyepo kamukeywek tokol kuyunyoto.”

## 2 Korinsoyek 7

<sup>1</sup>Corunutekwani cämanik! Kicekurtowec ŋalecutecu tokol. Kunyo möce kule cesitkey acek om wule mite kiy ake tokol, nye wurtoy kumiyatit porto nto mukuleyto. Möce cetililitu ciwoŋnkyi topon, oŋnkyipurte koyweyisye om wule mite Yiyintet.

<sup>2</sup>Oŋoŋwec mukuleywek cikwok, tompo kot celel acek om wule mite citake tokol, nto tompo mpo kot kyarante nto ciperper acek ci ake tokol.

<sup>3</sup>Puryo kot omwowu ani ŋalecu nye orenyok akwek, kuyu wulo kyomwowok kunyo kule oyiku akwek cämanik ce cepontekey okokoy ye cesoptosi nto ye cepoku.



- <sup>4</sup>Okenenokey ani akwek koromun ye oᅅololwok, kunyo osilenokey akwek koromun. Oponte titirotet nyewo om wuyinwekyo tokol. Oponte ani ᅅerekwek ce caᅅ kusirto.
- <sup>5</sup>Kipuryo kot cimuny acek mpo yu kowo cepunu Meketoniya. Kimite wuyinwek wulyo tokol, kumite wokutyet wule mite alake oko muyotet nye kimite mukuleywek cicacek.
- <sup>6</sup>Ntene Yiyintet nyo titire piko ce kokwilyo mukuleywek kunye kititirec omnye kico Tito.
- <sup>7</sup>Kipuryo kot ku kule omnye kico neto, ntene om ᅅalekyi ce kimwoy, kuyu wule kyotitirte akwek neto. Kimwowec kule ömoce akwek koromun kule cekasa, oyiku nerekotin omnye oyiku yiytotin oyetyeco ani, kunyo oyiku yawut ᅅerekat.
- <sup>8</sup>Omnye nka kot kinerecak akwek parwemwani, momwowu kule akalya omnye kyosil parwanato. Kyasowu oᅅnket kule kinerecak om pesyos ce ᅅeri pate, ntene nka kot kikyamwowu kule akalya,
- <sup>9</sup>oyiku yawut ᅅerekat, nye puryo ku kule omnye kyanerecak, ntene omnye kiwecak nerekwec okoy arenynkey awec kopurto nyimwoᅅ. Kikwiyisye Yiyintet nerekwec coto, kunyo puryo kot ciwurtak.
- <sup>10</sup>Omnye nerekwec ce yiyisye Yiyintet kuce wece mukuleyto kunyor soponto. Kunyo mocetoye ᅅolyo nyeyunyo! Ntene sutu met nerekwec cepo koret.
- <sup>11</sup>Akäs pa wule kikwiyta Yiyintet om nerekwec kwakwek coto; kikonok asot koromun, nye kipor kule moyiku akwek lelotin! Om nerekwec oko ᅅoyenotet, oko kasoteywek, oko cömisyet oko yiytayatet, yoto omutyi musankut piko ce lelotin! Kwoporu kule moponte akwek lelis om ᅅolyontono tokol.
- <sup>12</sup>Kunyo nka kot kyosilwok ani parwanato, kipuryo kot asile kupo cito akenke nye kilel, nto kupo mpo cito akenke nye kicelel om wule mite neto. Ntene kyosilwok oporu kutok om taytap Yiyintet cömisyet nyewo nye oponte akwek om wule cemite acek.
- <sup>13</sup>Kuyunyoto sukuᅅet cetitir acek. Kipuryo kot kotitirec acek pate, ntene kiᅅerecec koromun Tito kuporwec aret nye kyakalye akwek neto.
- <sup>14</sup>Kyosilenokey ani akwek om wule mite neto, kunyo puryo kot awurte akwek om wule ämite ani. Kiceᅅololwok okokoy ᅅalek cepo manta, kunyo kukuporkey kule po manta silotet nyo kucemwocini acek Tito.
- <sup>15</sup>Tosyinikey kunere cömisyet nyenyi om wule omite akwek, ye kesotak kule kyoyiku yiytotin olimnci, oko kuyu wule comuye opotontye atoroc oᅅerekyi neto.
- <sup>16</sup>Ayiku ani ᅅerekat koromun omnye omuci okenenokey akwek koromun om kiy ake tokol.

## 2 Korinsoyek 8



- <sup>1</sup>Mpo yeya, cemöce acek kule oñket akwek ñalek ce kikwiw poypoyetap Yiyintet om pikap Yiyintet cepo Meketoniya.
- <sup>2</sup>Kicesyem syemutok ce wuyec cepo toñonutek ce kipunte cekto, ntene kuñerec cek koromun kutil, omnye kuñerec oñnkupciw tukuk ce kiponto nka kot ki ponon.
- <sup>3</sup>Komwowok cepo manta kule kipciw cekto kuyu wule ki muktoy, oñnkutil coto kikonec acek kwicek nkit.
- <sup>4</sup>Oñnkusaysayec acek kule roke cecomnci cekto kukalya pikap Yiyintet om Yuteya.
- <sup>5</sup>Kikon cek ce cañ kusir ce kicisotyini! Nyepo tayta kunye kikoytokey cekto om wule mite Mokoryontet oñnkukonnkey mpo yec om wule ce mite acek om cömisyetap Yiyintet.
- <sup>6</sup>Kuyuyit nyoto sukuñet cesom acek Tito nyo kicece yisyoni kuwañnta kukalyak awany yisyoni pciyat nyepo cömisyet.
- <sup>7</sup>Oyiku akwek mokoren koromun om tukuk tokol ce oponte om koyenet, oko ñalalet, oko ñomnonet, oko swamet nye amöce kule kyiye ce toponec, oko cömisyet nye acömec acek. Kunyo cemöce kule okolyoyisyepo mpo akwek om yisyoni po cömisyet.
- <sup>8</sup>Puryo kot amöce ani kule okonu ntarastinek, ntene oporwok wule moktoy piko alake kule cikolyoyisyepo. Sukuñet oñket kule po cömisyet nyimwoñ manta.
- <sup>9</sup>Omnye oñket akwek poypoyetap Mokoryontenyö Yesu Kristo, nka kot ki mokoryo neto kuyu wule kiyunto, ntene kiweckey kwek panan kupo akwek, kule sukuñet omokoren akwek kupunte pananiyantit nyenyi.
- <sup>10</sup>Kunyo okonok ñomnonet nyimwani om ñolyontoni kule, roke awany akwek yawut yisyet nyo kyocec kenyit nyankwe. Oyiku akwek cepo tayta; puryo kot ku kule oyiyisyepo pate, ntene kyocöme kule kyiyisyepo.
- <sup>11</sup>Otosyikekey kuyunyoto okoy awany yisyet. Otitir awany yisyonoto kuyu wule kikyokoytekey oyiyisyepo tukuk ce oponte.
- <sup>12</sup>Ye möce cito kule okolyoyisyepo okonu, kucöme Yiyintet kokotutyet nye muce kukon; neto ntene puryo kot kuce moponto.
- <sup>13</sup>Puryo kot kuroke kule cetorwok akwek nyikisinto sukuñet cikuskus nyikisinto nyepo alak.
- <sup>14</sup>Omnye oponte akwek yawut tukuk ce cañ kuporkey kule misyini akalye piko co möce kokolyoyisyepo, nto punto pesyosyek ce omöce akwek kokolyoyisyepo oñnkuponto cekto tukuk ce cañ, mosukukalyak akwek cekto yoto. Om aret nyeyunyitenyi kuye mosiciyoyec piko tokol.
- <sup>15</sup>Kuyu wulo mwoytoy silutekap Yiyintet kule, “Cito nye kiruruc ce cañ, kunye moponto ce cañ, nto nye kiruruc ce ñeri kunye puryo kot kurorci.”
- <sup>16</sup>Cikostoy Yiyintet koromun nye kikoci Tito mukuleyap kokolyoyisyepo nye kerkey oko nyinyacek, kumac kule kukalyak akwek.



- <sup>17</sup>Kicesom acek neto kuco wulo omite akwek, ntene kimite kuyiytat kwine nkit kule aco.
- <sup>18</sup>Kociyoku neto oko yeya akenke nye ciyweye koromun om wule mite pikap Yiyintet om yisyenyi nye mwoytoti Lokoywek ce toponec.
- <sup>19</sup>Kunyo kikwey pikap Yiyintet neto kule cepesetate oko acek ye cemwoytoti yisyet nyepo cömisyet nyepo woyinto nyepo Mokoryontet oṅnkuporu kule cemöce kakalyayet.
- <sup>20</sup>Ceripekey acek koromun kule mente kot cesutu kaṅunṅunyet om wule cerialtoy kokotutecutecu konu piko.
- <sup>21</sup>Yisyet nye cetyikini acek kunye ce möce kule kiyi kito nyepo manta om taytap Yiyintet oko taytap piko.
- <sup>22</sup>Kunyo kociyoku acek cekto oko yeyanyo ake nye kucekir acek neto aret ce caṅ okoy cinket kule titirot koromun kule okolyoyisyey. Kunyo omnye kenenokekey neto akwek, möce koromun kule akalyak akwek.
- <sup>23</sup>Nto Tito kunye cito nye kiyisyi acek tukway cikalyak akwek. Nto mpo yeya cut alak cekwontoykey neto kuce sutu woyintap Kristo om kaynetap pikap Yiyintet.
- <sup>24</sup>Oporci akwek cekto cömisyet nyimwoṅ sukuṅet kukäs pikap Yiyintet tokol oṅnkunket kule cepoye acek manta ye cesilenokey akwek.

## 2 Korinsoyek 9

- <sup>1</sup>Puryo kot kuroke osilwok ani akwek ṅalek ce nöme kokolyoyisyet nyo mite cesutyini pikap Yiyintet.
- <sup>2</sup>Oṅnket kule omöce kule cikolyoyisyey, kunyo kwosilkey ani om wule mite pikap Meketoniya omwoci kule, “Mpo yeya cepo Akaya kuce kiyiytakey kukolyoyis kuceke kenyt nyankwe.” Kunyo kokowurur cömisyet nyimwoṅ cekto.
- <sup>3</sup>Koyoku yawut mpo yeya cutecu sukuṅet mente kwek silotet nyinyacek ṅal cepo kutit pate, ntene kupoyit manta kuyu wulo kwomwowu kule oyiku akwek yiytotin okolyoyisyey.
- <sup>4</sup>Nto pesyet ake ye kacekwantekey acek pikap Meketoniya oṅnkwochenyuru kule puryo kot oyiku akwek yiytotin, kupuryo kot cecurokyisyi acek nkit, yoto mosocurokisyey mpo akwek omnye kicesilkey wokutil.
- <sup>5</sup>Kunyo kwasot kule misyini omwoci mpo yeya cutecu kunyosyeno kukwa wule omite akwek oṅnkwokuyiyta kokotutek co kyokurte akwek kutompo kot kupunte pesyet, sukuṅet ye kopunu ani conyuru kukuciya topon, yoto kupor kule okonu akwek kokotutek nye ocöme nye puryo kot omnye kocisimncok
- <sup>6</sup>Möce oṅnket kule, “Nye kakol kupuswek ce ṅeri, kunye nyoru omik ce ṅeri, nto nye kakol kupuswek ce caṅ, kunye nyoru omik ce caṅ.”



- <sup>7</sup>Kunyo misyini kukon ci ake tokol kuyu wule kacämnta nkit om moyenyi nye puryo kot kumwowu kule kokoyte püc pate nto kocisimnci. Omnye cöme Yiyintet nyo konu om ñerekwek.
- <sup>8</sup>Kunyo muce kukonok ce cañ kusir ce omöce sukuñet onyuru ce cañ om kiy ake tokol nye omöce akwek, sukuñet akalya yisyet tokol nye topon.
- <sup>9</sup>Kuyu wulo mwoytoy silutekap Yiyintet kule, “Pciytoy Yiyintet püc pate, kupcici pononik, Pure cömisyet nyenyi okokoy okoy okokoy.”
- <sup>10</sup>Kunyo Yiyintet nyo kocini kolintet kupuswek oñnkukoci omik ce ome, kunye mosukukonok kukoci kuteris kupityo kupuswek cikwok, sukuñet kupityo kupuswek ce cañ cepo poypoyemwoñ.
- <sup>11</sup>Mosukukonok Yiyintet akwek oyiku mokoren kuyemak sokolyoyisyie okokoy, sukuñet kukasta piko ce cañ Yiyintet om kokotutek ce cikwakwek ce kyokoci kupunte wule mite cekto.
- <sup>12</sup>Omnye puryo kot kukolyoy pikap Yiyintet nkit pate tukuk cu okonu akwek, ntene sutu mpo kakastayet nyewo om wule mite Yiyintet
- <sup>13</sup>Kunyo om yisyet nyimwakwek nyitenyi, kunye sutu kukasta piko ce cañ Yiyintet omnye oyeni akwek lokoywek ce toponec cepo Kristo, oko kokolyoyisyet nye okolyoy piko alak.
- <sup>14</sup>Yoto ye mosukusomwok cekto akwek koromun omnye oponte poypoyet nye pciyat nye kikoporwok Yiyintet.
- <sup>15</sup>Cikaste Yiyintet om kokotutekyi ce cañ ce mociyite.

## 2 Korinsoyek 10

- <sup>1</sup>Osomok ani Paulo nkit, om kokolyoyisyet oko tolosyetap Kristo. Ani nyo cemwowu kule oyiku tala ye cepontekey oko akwek, ntene oyiku nyeker om wule omite akwek ye mocepontekey.
- <sup>2</sup>Osomok akwek kule ye cepontekey oko akwek monte cesutwo anyekeritu om wule mite piko co sote kule kyiyisyi acek cerupe cepo koret.
- <sup>3</sup>Manta kule cemite acek koret, ntene puryo ceporye kyiyisyie cepo koret.
- <sup>4</sup>Karik ce kyiyisyie om poryet kuce puryo kot kupo koret, ntene kyiyisyie karikap Yiyintet cepo swamet ce turpupe totet tokol nye wuyi. Kyorontoy tintenotet nyepo mwiynan.
- <sup>5</sup>Citurpupi ñolyo ake tokol nyepo silot nye kacamwoy cekerekte ñomnonet nyepo Yiyintet. Cenome ñolyo kwek mopusyo oñnkyewec kuywey Kristo.
- <sup>6</sup>Ye kopurukey akwek kule kocepoyitu manta, yoto kuye moceyiytekey acek cemutyi musankut piko co mocömisiyi.





<sup>7</sup>Oköse akwek tukuk kuyu wule yunto wulo po saŋ. Mite pa citake wule omite akwek nye nkete kule oyiku citap Kristo? Kunyo möce kukäskey wule yunto neto nkit, omnye cepoye mpo acek Kristo kuyu neto.

<sup>8</sup>Omnye puryo kot oliloni ani nka kyosilikey wokusirto om kamukeywek ce kikonec acek Kristo. Kamukeywek coto kuce cetecenok, ntene puryo kot kuce citurpupenok.

<sup>9</sup>Mömöce ani akerkeyitu nye osyeme kule omuyok akwek om poronokwani.

<sup>10</sup>Omnye mosukumwoy citake kule, “Koromec koromun oŋnkuponto swamet poronokap Paulo, oŋnkurok yec ku moponto neto swama ye cepontekey oko neto, oŋnkupuryo kiy ŋalekyi!”

<sup>11</sup>Möce konket nyoto kule puryo kot kupciyotin ŋalek ce cesile acek om poronokyo ye mocepontekey oko ŋalek ce kyiye ye cepontekey oko akwek.

<sup>12</sup>Ntene puryo kot kuroke cesutkey acek nkit nto ciyoyekey acek nkit oko piko co sutekey parak. Perper coto koromun. Kiwecekey oŋnkuyoyekey picoto kwicek nkit oŋnkusutekey parak kuyoyekey kopurto nye nyimwa nkit!

<sup>13</sup>Ntene acek kuce puryo kot cemöce kusirte silotet nyenyo ye cemokyini, mosukuŋete pate wule tento yisyet nye kikonec Yiyintet. Yisyet nyinyacek nyoto kunye kiciy om wule omite akwek.

<sup>14</sup>Acek kuce kicenyoŋe cesutwok akwek lokoywek ce toponec cepo Kristo kutompo kot kuco citake, kunyo ye kocesilkey acek om wule omite akwek; kupuryo kot kocesirte kukeyte ye cemokyini.

<sup>15</sup>Kunyo puryo kot cesilekey yisyet nye kikwiŋ piko alake kusirte ye ŋete nye kikonec Yiyintet. Ntene ce möce kule kuner kutosyikey koyenet nyimwoŋ, sukuŋet cimuc kot kiyi yisyet nyewo om wule omite, nto yisyet nyoto kunye ŋete ye kimwoy Yiyintet.

<sup>16</sup>Yoto kuye sukuŋet cimuc acek cemwayte lokoywek ce toponec om korosyek alak kukeyte wulo omite akwek nye puryo kot cesilekey yisyet nye kikwiŋ citake kenyo om komosta nyenyi.

<sup>17</sup>Ntene kuyu wulo mwowu silutekap Yiyintet kule, “Ci tokol nye möce kule osilkey kuroke kusilkey om yisyet nye kikwiŋ Mokoryontet.”

<sup>18</sup>Omnye poyitu cito manta ye kacämnta Yiyintet neto, ntene puryo kot kuye kosilkey neto kwine nkit.

## 2 Korinsoyek 11

<sup>1</sup>Osome ani kule omuytoco kuminiŋ, nka kot kaperperitu kutya.

<sup>2</sup>Acorokyok ani akwek, kuyu wulo corokyok Yiyintet. Akerkeyekey akwek cepto nye mukul nye menket moron nye kyomokyi cito ake, cito nyoto ku Kristo.



- <sup>3</sup>Ntene oponte muyotet kule muce kuwuryo kasoteywek okoy otay nyimwoŋ nyepo manta nyepo Kristo kuyu wulo kiperpertoy Erenet Kawa kwiyisye mwiynanet nyewo nyepo ŋomnon.
- <sup>4</sup>Omnye omuci akwek omuytoci kot olimnci ci ake tokol nye kocomwowok Yesu ake yec, nye puryo kot ku Yesu nyo kicemwowok acek oŋnkocäm yec lokoywek oko ototoywek alak nye puryo kot ku Muyet Nyetilil oko lokoywek ce toponec co kyonyorte wule cemite acek.
- <sup>5</sup>Osoti kule puryo kot oyiku nye miniŋ koromun om wule mite co cekure “Kiyokik cewoyec.”
- <sup>6</sup>Pesyet ake moyiku muswokin om ŋalalet, ntene oponte ŋomnonet nye oŋnketi kiy ake tokol. Kicemwowok acek akwek ŋalecoto tokol, oko om aret ake tokol nye mukoktos.
- <sup>7</sup>Kyomwowok lokoywek ce toponec cepo Yiyintet, nye kipuryo kot osomok kule ayal okonu kiy ake tokol. Kyosutok opoyitu akwek tayta opoyitu ani letut. Kyayiy yoto so miyat?
- <sup>8</sup>Kyanyapan so pesanik cepo pikap Yiyintet cepo wulyo ake omnye kyacäm kokolyoyisyet nyimwa, yo kyoyiyisi om wule omite akwek?
- <sup>9</sup>Nteye kyomite wule omite akwek, kipuryo kot ayimak ani kule akalya ye kyomöce pesanik, omnye kisutwo ani mpo yeya cepo Meketoniya kiy ake tokol nye kyomöce. Kuyu wulo kiyunto yoto om kunyo, kuyunyoto wule mosukwiytakey om pesyosyek cokwoni, puryo omuci ani kot okonok akwek nyikisin.
- <sup>10</sup>Owolikey cepo manta om Kristo nye mitowune wule omite kule, puryo kot kusise silotet nye oponte ani om koretap Akaya tokol kumukul.
- <sup>11</sup>Omne somwowu ani kuyinyi? Omnye mocömok ra? Nkete Yiyintet kule ocömok ani!
- <sup>12</sup>Mosotosyikey ani ayiye ŋalek cu amite ayiye yawut, sukuŋet mente kunyor kiyokik cut alake kito nye mokusilekey kumwoy kule yiyisi cekto kuyu wulo kyiyisi acek.
- <sup>13</sup>Puryo kot ku kiyokik co cepo manta, po mwiynan, perperisi om yisyet nyimwa oŋnkuwekey kule ciku kiyokikap Kristo.
- <sup>14</sup>Kunyo puryo kot cimuce cikite! Nka mpo Setanit komuce kuwekey nkit kukerkeyit oko malayket nyepo lakweyet!
- <sup>15</sup>Kunyo puryo kot ku ŋolyo nye cikite ye keporkey mutworikiyi kwiye cepo manta cepo lakweyet. Mosukunyor om letut ce yeme om tukuk ce kikwiye.
- <sup>16</sup>Kotosyi omwowok kule, mente kot kusot citake kule oyiku ani solwo. Ntene ye osote kuyunyoto, kuroke osuto kule oyuye nyoto, sukuŋet osilkey silotet nyenyu nye miniŋ.



- <sup>17</sup>Manta kule ñalek cu omwowu yawut kuce munomwowo Mokoryontet kule omwowu. Oñololi kuyu solwo om ñolyontoni po silotet.
- <sup>18</sup>Ntene omnye mite piko ce cañ ce silekey cepo koret, kunyo mosilekey mpo ani kuyunyoto.
- <sup>19</sup>Oyiku akwek ñerekotin kot omuytoci piko ce perper! Oyiku ñomec koromun!
- <sup>20</sup>Omnye omuytocini ye kakwiyak citake oyiku mutwor, mpo ye koñomok, mpo ye katëcak, mpo ye kanyilak, mpo ye kasyecak.
- <sup>21</sup>Osornene ye macämnte kule, kiciku nyokorec ye mokyiy tukucoto. Ntene ye möce citake kule osilkey om kiy ake tokol - Oñololi kuyu solwo - Osilekey mpo ani.
- <sup>22</sup>Puraniyek so cekto? Oyiku mpo ani. Lekokap Israel so cekto? Oyiku mpo ani. Mucokoronikap Apram so cekto? Oyiku mpo ani.
- <sup>23</sup>Mutworikap Kristo so cekto? Oyiku mpo ani. Oñololi ñalecu kuyu punmetyo. Oyiku mutworin nyepo Kristo kupël cekto. Kyatañany om yisyet nye wuyi, kiceroty mopusi kuwany pesyosyek ce cañ, kicepasa aret ce cañ, kyacilile met aret ce cañ.
- <sup>24</sup>Kipasa Yutayek aret mut korokonik sosom ok sokol.
- <sup>25</sup>Kipasa Romek aret somok. Kicewirena rwontok aret akenke. Kipuryet rapet nye kyowete aret somok. Kyopur peko orit awany sawanik tiptem ok amwan pet oko komoy.
- <sup>26</sup>Ye kyowesetoti ani poninek ce cañ kyonyoru yoto toñonutek cepo oyinosyek ce keyin, oko corik, oko toñonutek ce kitañanya mpo yeya Yutayek oko lamek. Kyonyoru toñonutek om moñosyek, oko toñonutek cepo tyoñik cepo samiyita, oko toñonutek cepo ruretok, oko toñonutek cepo coronutek cepo mwiynan.
- <sup>27</sup>Kyoyiyisye atañany, opuri pesyosyek alak nye puryo kot orwe rwonto. Kikwama rupet oko melelya. Kyopur pesyosyek alak nye moponte omik ce oyome, oko koto nye ominye, oko sirok ce malac.
- <sup>28</sup>Kunyo puryo kot omwowu ani ñalek tokol. Oponete pesyosyek tokol nyikisinto nyimwani nyepo yisyet nye nöme pikap Yiyintet.
- <sup>29</sup>Ye puryo kot kuponto citake swamet, opur ani nye moponte swamet, ye kesuci citake miyotyet, opur mpo ani kwapi.
- <sup>30</sup>Ye kosilkey ani, mosilkey om ñalek ce poru kule moponte ani swamet koromun.
- <sup>31</sup>Kopurto kupeyok okokoy kaynetap Yiyintet nye kwanitap Mokoryontet Yesu! Nye nkete kule puryo kot operperisiyi ani.
- <sup>32</sup>Ye kyomite Tamasko, yoto kumwoci kinko Areta poytoyintet kukoci sikarek kurip kurkotik cepo moñet sukunäma ani.
- <sup>33</sup>Ntene ciwuteno cikaput nyewo oñkyipunteno pastit om totetap moñet okoy omweye wule mite neto.



## 2 Korinsoyek 12

- <sup>1</sup>Mososilkey ani nka kot puryo kot kwiye kiy nye topon. Ntene mosañalale kirwotik oko ñoñutek ce kikono Mokoryontet.
- <sup>2</sup>Oñnket ani cito akenke Kristoyintet nye kicenäm oñnkyekwer kuwo koret nyepo somok wulin po torot om kenysisyek taman ok amwan co kitil. Moñnket kule kukwiyakay kuyunyoto manta nto kuponto porto nto om muyet nto kyakäs ani ñoñutyet, Yiyintet nye nkete.
- <sup>3</sup>Oñnket kule kicesut cicoto kuwo wule topon (ntene moñnket yec kule kikwiyakay kuyunyoto nto kyakäs ani ñoñutyet, Yiyintet nye nkete.)
- <sup>4</sup>Kilim neto om wuloto ñalek ce wuñotin ce memuce kot kuñalale cito.
- <sup>5</sup>Kunyo mosilkey ani kupo cicoto, ntene puryo kot osilkey om ñalek ce nömo ani, tos pate om tukuk ceporu purenotet nyimwani.
- <sup>6</sup>Nto kwomöce ani kule osilkey, nto kupuryo kot oyiku solwo, omnye nto kwomwowu ñalek cepo manta. Ntene puryo kot osilekey, omnye momöce kule kusotyö citake kule opoye ani parak kusir ce kikäs oyiye nto ñalek ce kilim oñololi ani.
- <sup>7</sup>Ntene sukuñet kuripo mente kot osutkey ani om silotet kupo tukuk cepo kakitat ce kyakäs aret ce cañ. Kicekono ani mwoninto nyepo porto nye yu kötet nye mite porto, nye yiyisyi kuyu kiyokintetap Setanit sukuñet kupiro oñnkukereka mosilkey kusirto.
- <sup>8</sup>Kyosom ani Mokoryontet aret somok kule kunumuneno kiyitenyi.
- <sup>9</sup>Kuwec kumwoy kule, “Poypoyet nyimwani kunye yemiñ nyi, omnye swamet nyimwani kunye tökune purenotet nyenñuñ.” Kunyo oyiku ñerekat koromun osilkey omnye moponte swamet, sukuñet kuripo swamet nyepo Kristo.
- <sup>10</sup>Kunyo oñerekyini purenotet; oko cupisyet, oko nyikisinto, oko toñoñutek, oko wuyinwek kupo kaynetap Kristo. Omnye ye oyiku puren kuye yoto ye oponte swamet.
- <sup>11</sup>Oyiyisyi ani kuyu solwo. Ntene akwek kuce kwosokyo ayiy kuyunyoto. Akwek kuce kweroke acämnta ani. Omnye nka kot moponte latik, ntene puryo kot oyiku miniñ om aret ake tokol om wule mite, “Kiyokikwok coto.”
- <sup>12</sup>Kyoporwok kule oyiku ani kiyokintet om tukuk ce kyaiyy om wule omite akwek om muytocinotet nyewo, coto ku pelutok oko tukuk cepo kakitat, oko yisyonutek cepo swamet.
- <sup>13</sup>Ntene kyoyiku akwek miyotec kulene kupël pikap Yiyintet alak, tos ani nkit pate nye mnosomok kokolyoyisyet. Osomok akalya omnye mnoyiyisyet cepo manta!
- <sup>14</sup>Aret nyepo somok nyitenyi nye oyiku ani yiytat aco wule omite akwek, momöce kule catañanyak. Omocok akwek, ntene momöce pesan. Omnye puryo kot kukiy nyepo kwak kukonorci lekok poyik tukuk, ntene poyik ce konorcini lekok tukuk.



- <sup>15</sup>Mosaŋerec ani ye koyiyisye tukuk tokol ce oponte oŋnkokoytekey mpo ani nkit sukuŋet akalyak akwek. Omuci ocäm ani kuminiŋ aŋnkacämak ani akwek koromun?
- <sup>16</sup>Kunyo mosocam akwek kule kipuryo kot onyikisyok ani. Ntene mosukumwoy citake kule, kyatecak oyiyisye mwiynanet.
- <sup>17</sup>Kyomwowok ani so kuyunyoto ayiyisye ci ake tokol om nyo kyoyoku kuco wulo omite?
- <sup>18</sup>Kyosom ani Tito kuco kucontoykey yeya Kristoyintet ake, omwowu so kule kiŋomwok akwek Tito? Puryo kot kyiyisye acek oko neto kasoteywek ce kerkey oko kopurto nye kerkey?
- <sup>19</sup>Pesyet ake osoti akwek kule om ŋalecu tokol kuce cemite acek ceyetekey om wule omite akwek. Puryo kot kuyunyo! Ceŋololi kuyu wule moktoy Kristo kule ceŋalal om taytap Yiyintet. Mpo yeya cämānik, nto kiy ake tokol nye kyiye kunye kyiye kule sukuŋet cikalyak akwek.
- <sup>20</sup>Oponte muyotet kule ye kopunu wulo omite akwek, mosiconyorwok kupuryo kot oyiye kuyu wule omoktoy ani, oŋnkokäs akwek kule puryo kot ayiye ani kuyu wule omoktoy akwek. Oponte Muyotet kule mosonyoru wokutyet oko corokyinotet, nyerunotet, soynonet, cupisyet, ŋomset, silotet, oko cukurotet.
- <sup>21</sup>Oponte muyotet kule ye kaco yec mosukusorneno Yiyintet nyimwani om tayta nyimwakwek, kunyo mosarir ani om wule mite piko ce caŋ ce kikwiyy miyotyeyet ce tompo kot kurenynkey om ŋalek ce somis ce kikwiyy cepo sakwayanadet oko corokyinotet nye miyat.

## 2 Korinsoyek 13

- <sup>1</sup>Aret nyepo somok nyitenyi orutocok ani akwek kuyu wulo cemwoytoy kule, “Cemute musankut ye kaŋalal piko muncururwanik oyeny nto somok.”
- <sup>2</sup>Yo kyopontekey oko akwek om panta nyepo oyeny, kyosowu yoto piko ce kikwiyy miyotyeyet ikye, oŋnkosowu mpo piko alak tokol. Kunyo asowok mpo yawut ye amite wule low, nteye kaco yec aret nyepo somok kupuryo ci nye muce kucilile toŋoŋutek.
- <sup>3</sup>Mosokäs akwek nkit kule ŋolole Kristo kupunte wule amite ani. Puryo kot kupuren Kristo om wule omite akwek, ntene yiyisyi swamet nyenyi om wule omite.
- <sup>4</sup>Omnye nka kot kimoponto neto swamet yo kicewuyitocini murtowontet, ntene sopot yawut om swamet nyepo Yiyintet. Moceponte mpo acek swamet om koyomotet nye ceponte oko neto, ntene om tilyanadet nye ceponte acek oko akwek kunye mosicesopce oko neto om swametaŋ Yiyintet.
- <sup>5</sup>Akäskey akwek nkit oŋnkomutyikey musankut oŋnket kule ceponte koyenet. Oŋnket pa kule mitowune Kristo wule omite akwek? Tos pate ye kyosute koromun.
- <sup>6</sup>Asoti ani kule mosonket akwek kule puryo kot cisute acek.



- <sup>7</sup>Cesome acek Yiyintet sukuṅet mente kot ayiy akwek lelis, nye puryo kot ku kule sukuṅet kuporu kule kuciy acek topon, ntene sukuṅet ayiy akwek cepo manta; nka kot ku kuporukey kuyunye kicisute acek.
- <sup>8</sup>Omnye puryo kot cimuci acek kot kyiy tukuk ce toyeky oko ṅalek cepo manta, kyiy pate ceporyecini.
- <sup>9</sup>Omnye ciku acek ṅerekotin ye moceponte swamet oṅkoponte akwek. Kunyo cesome kule onyolu akwek owoṅkyi.
- <sup>10</sup>Osilwok ani parwani kutokumite wule low om wule omite, sukuṅet ye kaco mente conyercok oyiyisy kamukeywek ce kikono Mokoryontet. Kamukeywek cutecu kuce otecenok puryo kot oturpupenok.
- <sup>11</sup>Kunyo mpo yeya, cemutakwey! Asyem anyoru toponiyet, alimnte ṅomnonet nyimwani, acömmcine akwek kwakwek nkit. Opurte kalyet, kuye sukuṅet opurte akwek Yiyintet nyepo cömisyet oko kalyet.
- <sup>12</sup>Osupayiky om ṅatutet nyetilil nyepo tupcet, Kasupayak akwek pikap Yiyintet tokol.
- <sup>13</sup>Poypoyetap Mokoryonteny Yesu Kristo, oko cömisyetap Yiyintet, oko koyomotet nyepo Muyet Nyetilil kopur oko akwek tokol.





## Kalatiyek

### Kalatiyek 1

<sup>1</sup>Cone parwani wule amite ani Paulo; kiyokintet nye kipuryo kot kukweya ani piko nto kukweya cito, ntene kikweya Yesu Kristo nkit oko Papa nyo kiŋet Yesu kotutune met.

<sup>2</sup>Ani oko mpo yeya ce cepontekey kuce cesilwok akwek pikap Yiyintet ce mite koretap Kalatiya.

<sup>3</sup>Cesomwok onyuru poypoyet oko kalyet nye cone wule mite Papanyo oko Yesu Kristo.

<sup>4</sup>Kristo nye kiywey cömisyetap Yiyintenyo oŋnku Papanyo oŋnkukoytokey neto sukuŋet konum miyotyoniŋ cicacek om pesyosyecu miyotec.

<sup>5</sup>Kunyo kante kupoyit woyinto wule mite Yiyintet okokoy okoy okokoy. Yunyoto.

<sup>6</sup>Kwakitenak ani akäs kule omoce akwek kule kyaste lakwar Yiyintet nyo kikurok om poypoyetap Kristo, oŋnkolimnte yec lokoywek alak.

<sup>7</sup>Dalek cepo manta kucu kule, puryo kot kumite yec lokoywek alake ce toponec. Komwowu kuyunyoto omnye mite piko alake ce mosok akwek ce syeme kule cewecwec piko cepo Kristo.

<sup>8</sup>Ntene nka mpo acek nto mpo malayket nye cone torot, oŋnkusyem cokumwowok akwek lokoywek ce pciyotin ce puryo kot kukerkey oko lokoywek co kicemwowok acek, kuporkey kule misyini kucup Yiyintet cicoto.

<sup>9</sup>Kicemwowu acek ŋalecu kunyo om tay, kunyo omwowu ani yec otosyini kule, ye komwowok akwek ci ake tokol lokoywek ce toponec ce puryo kot kukerkey oko lokoywek co kyocäm akwek, misyini kucup Yiyintet cicoto.

<sup>10</sup>Poru ra yawut ŋalekwani cutecu kuyunye asyeme kule sukuŋet kucäma piko? Puryo kot kuyunyo! Amöce kule kucämnta Yiyintet! Osoŋi akwek kule asyeme ani kule aŋerec piko? Nto kwosyeme kule aŋerec piko pate, nto puryo kot oyiku mutworintet nyepo Kristo.

<sup>11</sup>Omwowok ani akwek mpo yeya kule, lokoywek ce toponec co kyomwowok akwek kuce kipuryo kot kutowu cito.

<sup>12</sup>Kipuryo mpo kot kukono nto kuneta ani ci ake tokol. Ntene Yesu Kristo nkit nye kiŋoŋwo kuporwo ŋaleca.

<sup>13</sup>Kyolim akwek ŋalek cepo manta cepo kopurto nye kyoponte ani ye kitorupe ntarastinek tokol cepo Yutayek. Oŋnketi akwek wule kyotoŋoŋntoy ani pikap Yiyintet, nye kipuryo kot omuye, nye kyosyeme kule opot kupoty.

<sup>14</sup>Kyopëli ani piko cepo pinta nyimwani om aret nye kyorupe tinitap Yutayek oko om aret nye kyorupe ntarastinek cepo mpo kukunyo.



- <sup>15</sup>Ntene Yiyintet nkit om poypoyenyi nye kikweya ani kutompo kot cejiyo, nto om letut kukono oyici neto yisyet,
- <sup>16</sup>oṅnkuporwo kuṅoṅwo Werinyi kule saṅet womwoci lamek lokoywekyi ce toponec. Kipuryo kot awo wule mite ci ake tokol watepe kukono ṅomnonet nyepo kito nye mayiy.
- <sup>17</sup>Kipuryo mpo kot awo ani Yerusalem wakäs kiyokik co kinyosyo kwek kiyokik. Puryo kot kuyunyo. Kyanyosye awo Arapia, nto om letut oketukey yec Tamasko.
- <sup>18</sup>Yoto om letutap kenyisyek somok, onomen ani awo Yerusalem orutoci Petero, kule saṅet kukono lokoywek. Wopur oko neto awany pesyosyek taman oko mut.
- <sup>19</sup>Ntene kipuryo kot amuc ani yoto kot akäs kiyokik alak. Kyakäs pate Yakopo mutakwametitap Mokoryontenyo.
- <sup>20</sup>Owolikey ani om taytap Yiyintet kule po manta ṅalek tokol cu osile nye puryo kot ku mwiynan.
- <sup>21</sup>Nto om letut, onomen awo okoy opunte koretap Siriya.
- <sup>22</sup>Ntene kipuryo kot konketo Kristayek cepo Yuteya om pesyosyecoto tokol.
- <sup>23</sup>Kilime cek pate kumwowu piko kule, “Citye kisyeme kule ataṅanyec acek kunyi mite yawut kumwoytoti koyenet nye kisyeme neto ikye kule opot kupot.”
- <sup>24</sup>Kunyo kukasta cekto Yiyintet om wule amite ani.

## Kalatiyek 2

- <sup>1</sup>Nto om letutap kenyisyek taman ok amwan onomen ani aketitekey yec Yerusalem cepetekey Parnapa, yoto akwer cepetekey oko Tito.
- <sup>2</sup>Kyawo alaṅte omnye kiṅoṅwo kuporwo Yiyintet kule roke awo ani wuloto. Wocetuye acek om kirwoket nye kiwuṅat oko kiyokik cewoyec nkit, oṅnkoporci cekto lokoywek ce kyomwoci ani lamek. Kipuryo kot amöce ani kule kupot pöc pate yisyemwani nye kyaiy, nto yisyet nye kyomite oyiye yoto.
- <sup>3</sup>Kipuryo mpo yoto kot cisimnci kule cewon Tito nye kicepontekey acek tukway, nka kot ki ci nye Kirikin.
- <sup>4</sup>Ntene kimöce piko alak kule cewon neto. Kikwa picoto ce kipuryo kot kupo luket nyinyacek oṅnkwokowut orit kuyu wotik kule sukuṅet kuwot oṅnkukäs kalyet nye ceponte acek om Kristo. Kimöce cekto kule cewecwecec acek ciku mutwor.
- <sup>5</sup>Ntene kipuryo kot cecömnci ṅalekwa mpo kisic, sukuṅet ceripok acek opurte okokoy lokoywek ce toponec.
- <sup>6</sup>Komwowu kule kantoyik co sutekey kule ciku cewoyec. Akure ani cekto kantoyik. Ntene yoyece Yiyintet piko tokol, omnye puryo kuköse neto kule yunto tontap cito nyepo saṅ. Kunyo kipuryo kot kuneta ani kantoyicoto ṅolyo nyelel.



- <sup>7</sup>Dalek ce kikäs cekto pate om wule amite ani kucu kule, kikono Yiyintet yisyet nye omwoytoti omwoci lamek lokoywek ce toponec, kuyu wulo kicikoci Petero yisyet kumwocinot Yutayek lokoywek ce toponec.
- <sup>8</sup>Omnye Yiyintet nyo kikocini Petero kwek kiyokintet nyepo Yutayek kunye kikono mpo ani oyiku kiyokintet nyepo lamek.
- <sup>9</sup>Kunyo Yakopo oko Kefa oko Yowana ce kicinket kule cekto kuce tolocikap piko cepo Yiyintet, kuce kinket kule kikono ani Yiyintet yisyoni pciyat. Yoto cisupaykey oko cekto cenämncyewuniyek, oṅknyelimncine kule ani oko Parnapa mosicipacek wule mite lamek, kupa cekto wule mite Yutayek.
- <sup>10</sup>Kimite ṅolyontet akenke nye kicecomncine kule misyini cisoti acek pononik. Dolyontet nyoto kunye kyoyisye ani swama okokoy kunyi.
- <sup>11</sup>Ntene yoto ntowo kucu Petero okoy kupun Antiyok, apolyi ani neto koromun om taytap piko tokol om ṅalek ce kitoku ce kipuryo kot kupo manta ce kikwiye.
- <sup>12</sup>Kikwomisyi neto kunyo oko mpo yeya cepo lamek kutompo kot kukwa piko ce kiyoku Yakopo; Ntene ntowo kupun picoto, kutoyis Petero nye komokwomisyi oko piko cut, omnye kinyokorit om wule mite piko co kimöce kule roke cewon lamek.
- <sup>13</sup>Yoto kuyomokey Petero oko Yutayek ce nyokorec oṅkwiṅ ṅolyontoni po perperyo okoy kowut mpene Parnapa wule mite cekto picoto kinyokorec.
- <sup>14</sup>Nteyu kowo akäs ani kule puryo kot kurupe cekto aret nye rotat nyepo lokoywek ce toponec, yoto omwoci ani Petero om taytap piko tokol kule, “Yiku nyi Yutoyin, kunyo kwemite kwak puri kopurto nyepo lamek nye puryo kot kupo Yutayek, omne sesimnci nyi kule misyini kopur lamek kapurto nyepo Yutayek?”
- <sup>15</sup>Po manta kule kiceyiyec acek ciku Yutayek, ntene puryo kot ciku lamek co ponto miyotyonic.
- <sup>16</sup>Kunyo cinket acek yec kule satoktos cito kunyol om wule mite Yiyintet om koyenet nye keyen pate Yesu Kristo, ntene puryo kot ku kule kocerip ntarastinek; kunyo kiciyen mpo acek Yesu Kristo sukuṅet cesatokisye cenyolu om wule mite Yiyintet kupunte koyenet nye ceponte om wule mite Kristo.
- <sup>17</sup>Kunyo ye cemite acek cesyeme kule cesatokisye om wule mite Yiyintet om koyomotet nyenyo nye kiciyomekey oko Kristo, oṅkutok kuporkey yec kule ciku pic ce ponto miyotyonic kuyu wule yunto lamek, kupor pa ṅalecato kule yiyisyi Kristo yisyet nye kolyoy miyotyonic? Puryo kot kuyunyo mpo kisic!
- <sup>18</sup>Ye kasyem ani yec atec kuyonṅ ntarastinek ce kikyawirte kupotyö, kuporkey kule amite owurtoy.
- <sup>19</sup>Nto kuyu wule yunto ntarastinek, kyamey om wule mite ntarastinek sanṅet arup soponto nyepo Yiyintet. Kicepakäca ani oko Kristo om murtowontenyi.



<sup>20</sup>Kunyo kimosope kwani nkit, ntene Kristo kunye mitowune soponto nyimwani orit. Soponto nye osope ani yawut, kunye soponto nye osope om koyenet nye oyentyini Weritap Yiyintet; nye kicāma oṅnkukoyito soponto nyenyi kumeco ani.

<sup>21</sup>Puryo kot otoye ani poypoyetap Yiyintet. Ye muce kot kusatokis kunyol piko om wule mite Yiyintet kupunte ntarastinek, kuporkey kule kime Kristo pūc pate.

### **Kalatiyek 3**

<sup>1</sup>Akwek Kalatiyek solonocu! Kicepanak? Akwek kuce kuciporwok akās om konyek kule kicewuyitoci Yesu kumeci murtowontet.

<sup>2</sup>Kunyo omwowo ani pa akwek ṅolyontoni akenke: Kyonyoru Muyet Nyetilil nyepo Yiyintet omnye kyorup Ntarastinek nto omnye kyolim oṅnkocām lokoywek ce toponec?

<sup>3</sup>Omuci akwek osolwonken kulene? Kyocece ocām Muyet Nyetilil nyepo Yiyintet, kunyo omōce yawut kule wociwaṅnte om ṅalek cepo swamet nyimwoṅ nkit?

<sup>4</sup>Mokwek ṅal cepo pūc pate ce puryo kot kuponto latik ṅalek tokol co kyaiyi akwek. Dalek cepo manta kucu kule, puryo komokomukoktos kot kuyuyit nyo.

<sup>5</sup>Ye kikonok Yiyintet akwek Muyet Nyetilil oṅnkwiṅ ṅalek cepo kakitat om wule omite akwek, kuporkey pa kule yiye Yiyintet kuyunyoto omnye orupe akwek ntarastinek nto omnye kyolim oṅnkocām lokoywek ce toponec.

<sup>6</sup>Kerkey ṅaleca oko wule mwoytoṅ silutekap Yiyintet om ṅalek ce nōme Apram ce mwowu kule; “Kiyen Apram kucām Yiyintet, nto om letut nyepo koyenet nyenyi nyoto, yoto kucām Yiyintet Apram kwek ci nyepo manta.”

<sup>7</sup>Kunyo yunyoto om wule omite akwek, misyini aṅket kule, piko ceponto koyenet nyoto kuce mucokoronik cepo Apram.

<sup>8</sup>Kiṅor silutekap Yiyintet kule mosukusat Yiyintet kunyol lamek om wule mite neto om koyenet. Kumwoy silutekap Yiyintet cepo lokoywek ce toponec ce nōme Apram kule, “Mosukukoci Yiyintet kupeyok piko cepo koret tokol kupunte wule mite nyi.”

<sup>9</sup>Kuyen Apram kucōmis yoto cikoci neto kupeyok, kunyo cikocini piko tokol kupeyok ye kocōmis kuyu wulo kicikocinto Apram.

<sup>10</sup>Kunyo piko tokol ce kenekey kule ceripe ntarastinek, kuce kicesoci. Omnye mwowu silutekap Yiyintet kule, “Ci ake tokol nye puryo kot kurupe oṅnkuywey ṅolyo ake tokol nye kicesil kitaputap ntarastinek kunye kicesoci cicoto!”

<sup>11</sup>Porukey yawut topon kule, puryo ci nye muce kusatakay kunyol om wule mite Yiyintet ye karup ntarastinek, omnye mwowu silutekap Yiyintet kule, “Mosisisop ci ake tokol nye nyolunot om wule mite Yiyintet om koyenet pate.”

<sup>12</sup>Ntene puryo kukenekey ntarastinek koyenet omnye mwowu silutek kule, “Ci ake tokol nye yiye ṅalek tokol ce mwowu ntarastinek kunye mosukopurto neto nyoto ntarastinek.”



- 13**Kristo kunye kisorwec acek om wule mite cupisyet nyepo ntarastinek, omnye kinum neto nkit cupisyet nyo sutu ntarastinek. Mwowu silutekap Yiyintet kule, “Ci ake tokol nye kiciketyi ketit kunye cupot.”
- 14**Kunyo kikwiw Kristo kuyunyoto sukuṅet kupeyokap Yiyintet co kikikurtoci Apram cikoci coto lamek kupunte wule mite Kristo Yesu, oko kule siceṅet mpo acek om koyenet cenyoru kokotutyet nyepo Muyet Nyetilil nyo kikutoy Yiyintet.
- 15**Mpo yeya, mosoporwok ani ayuye soponto nyepo kwak kule, “Ye kokwicin piko oyenku oṅnkusil kirotyet, kupuryo yec cito ake om picoto nye mucé kot kot kwiri kirotyet nyoto; nto mpo kutayi ṅolyontet ake om kirotyanato.”
- 16**Kunyo Kikurtoci Yiyintet Apram oko mucokorenyi, puryo kot kumwowu kule, “Oko mucokoroniki,” Nye poru kule pic ce caṅ, mwowu pate kule, “Oko wule mite mucokoreṅuṅ.” Nye poru kule akenke pate. Nto nyoto akenke ku Kristo!
- 17**Dolyontet nye amöce ani kule omwowu kunyi kule, kikwiw Yiyintet kirotyet oṅnkukurto kumwoy kule mosorip kirotyanato, kunyo ntarastinek ce kikwoni letutap kenyisyek pokolwokik amwan ok sosom kuce puryo kot komuce kot kwiri oṅnkunum kirotyet nyo kikutoy Yiyintet keny.
- 18**Kunyo ye nömekey tukuk ce konu Yiyintet oko ntarastinek, kupuryo kot kunömekey oko kirotiyenyi. Ntene kikoci Yiyintet Apram kirotyet omnye kikurtoci neto.
- 19**Kunyo omne sicekon ntarastinek? Kicekon cetos sukuṅet kupor wule yunto kawontyontit; ntene kicemöce kule sukopur pate okoy pesyet nye cone mucokoretap Apram nyo kikicekurtoci. Kisut malaykanik ntarastinek. Kiyöṅe citake kwenutap Yiyintet oko malaykanicato.
- 20**Ntene puryo kot cemöce cito nye yiyisiy kuyöṅe kwen omnye mite cito akenke, nyoto ku Yiyintet akenke nkit pate.
- 21**Porukey pa ṅalecu kule toyekey ntarastinek oko kurtoyetaṅ Yiyintet? Puryo kot kuyunyo! Omnye nto kicekon ntarastinek ce ponto kamukeywek ce mucé kusop piko, nteporukey kule cimuce cesat kunyol piko om wule mite Yiyintet kupunte wule mite ntarastinek.
- 22**Ntene kimwoy silutekap Yiyintet kule “Kupayta miyotyét koret kumukul, sukuṅet kunyor piko ce kikoyen kokotutyet nyo kicekurto nye cekonu om koyenet nye ponte cito om wule mite Kristo.”
- 23**Kutompo kot kuco koyenet, kicemite yoto ciku acek rototin om mopusi om poytoyisyetaṅ ntarastinek cekonye okoy ciṅoṅ koyenet nyitenyi musukuco.
- 24**Kunyo kerkey ntarastinek oko konetintet nye kiripec acek okoy kuco Kristo. Sukuṅet kuco cokusatec cenyolu om wule mite Yiyintet cepunte koyenet.
- 25**Kunyo kipunto yawut pesyetaṅ koyenet, kuporkey kule kimokuripec acek konetintet nyankwe.



<sup>26</sup>Kyopunte akwek tokol koyenet sukuṅet oyiku lekopak Yiyintet ce kikoyomokey oko Yesu Kristo.

<sup>27</sup>Omnye kicepatisanak oyomekey oko Yesu Kristo, kunyo kyolac kerkeyinto nyepo Yesu Kristo.

<sup>28</sup>Kunyo puryo kot kumite pciyatet nyepo Yutayek oko Kirikik, nto nye pciye mutworik oko co puryo ku mutworik, nto nye pciye moronik oko koruk, oyiku akwek tokol akenke om koyenet om wule mite Yesu Kristo.

<sup>29</sup>Nteyu oyiku akwek tokol pikap Kristo, kuporkey kule oyiku mucokoronikap Apram ce mosonyoru kokotutyet nye kikurto Yiyintet.

#### **Kalatiyek 4**

<sup>1</sup>Dalek ce amöce ani omwowu kucu kule, ye tominiṅ wero nye mosikonti tukuk tokol cepo kwan, kwoyecin neto yoto oko mutworintet, nka kot ku neto nyepo tukuk tokol,

<sup>2</sup>Ye tokuminiṅ weroto kumite piko alake ceripe neto oko tukukyi okoy kupunto pesyet nyo kikwey kwan.

<sup>3</sup>Om aret nyeyunyoto kiciku mpo acek mutworik cepo poytoyisyet nyepo oyik cepo koret ye kitompo ciku piko cewoyec.

<sup>4</sup>Ntene ntowo kupunto pesyet nye yiytat topon, yoto kuyok Yiyintet Werinyi nkit nye kiyi korko oṅnkyepayta kuyu wule yunto ntarastinek cepo Yutayek.

<sup>5</sup>Yoto kutyacec acek piko ce kipaytec ntarastinek sukuṅet ciku lekopak Yiyintet.

<sup>6</sup>Kito nye poru kule oyiku akwek lekokyi kunye kiyok Yiyintet Muyet Nyetilil nyepo Werinyi kuco mukuleywek cicacek orit. Muyet Nyetilil nyoto kunyo kursyi kule, “Apa,” nye mwowu kule, “Papa.”

<sup>7</sup>Kunyo kimo oyiku yawut mutwor, ntene oyiku lekokyi. Nteye ye oyiku lekokyi kuporkey kule oyiku kontiyik.

<sup>8</sup>Kipuryo kot oṅnket akwek ikye keny Yiyintet, kunyo kyoyiku yoto mutwor cepo oyik ce puryo kot ku yiyik mpo kisic.

<sup>9</sup>Ntene yawut om pesyosyecu kyonket Yiyintet, nto momwowu kule kikonketok Yiyintet akwek, omne samac yec kule cewekyikey wule mite poytoyisyetap oyik ce moponto swama oṅnkupuryo kot kuponto latik. Omne samac akwek kule ceketyikey ciku mutwor cikwa!

<sup>10</sup>Toripe ntarastinek cepo pesyosyeyek oko orok, (oko wule yunto pesyoyek alake cewoyec) oko kenyisyek!

<sup>11</sup>Kunyo kwasot ani kule mosukupot püc pate yisyet nye kyayiye atañany om wule omite akwek.

<sup>12</sup>Mpo yeya, osomok kule opur kopurto nye kerkey oko nyimwani, omnye akerkeyekey ani oko akwek, tompo oyiwo ani akwek ṅolyo nye miyat.





- 13** Omuci akwek asot omne somwowok ani lokoywek ce toponec om panta nyo kipo tayta; omnye kyomnyoni.
- 14** Ntene kipuryo kot anyila nto mpo ataya ani akwek, nka kot kisyemak kunyikisyok porto nye kyomnyoni. Kyatoroca yoto kuyu wule omuci atorokte malayketap Yiyintet oko kuyu wule omuci atorokte Yesu Kristo!
- 15** Kyoyiku yoto nerekotin, kukwiy kulene yawut? Omwowok ani nkit kule, nto kimukoktos yoto, ntokyomuci akwek kot olotu konyek cikwok oṅkokono!
- 16** Kunyo kwoyiku ani so yawut puniyontet nyimwoṅ omnye omwowok ṅalek cepo manta?
- 17** Mite piko alake ce poru nerekwek kucāmak akwek, ntene oṅkupuryo kot kutoponec ṅalek cemöce. Dalek cemöce cekto pate ku kule cepciyak akwek om wule amite ani sukuṅet oṅerekyi akwek cekto.
- 18** Dolyo nye topon kwak okokoy ye nerekwok akwek piko alake om ṅalek ce toponec, nka mpo ye mocepontekey oko akwek.
- 19** Lekokwani ce minkec, otoṅonyi ani om mwoninto kuyu korko nye möce kucāmkey sukuṅet oyiyok akwek om aret nyepo oyeny oṅkopurune Kristo wule omitowune akwek.
- 20** Amöce ani kule ntokopontekey oko akwek om pantanyi, saṅet oṅket ṅolyontet nye momwowu. Omnye asotok ani akwek koromun.
- 21** Omwowo ani pa yawut akwek piko co möce kule kupaytec ntarastinek? Puryo kot olime akwek ṅalek ce mwowu ntarastinek?
- 22** Mwowu ntarastinek kule kiponto Apram werik oyeny, kipo werit ake korko nye mutworin, nto werit ake kupo nyo korko nye momutworin.
- 23** Kiceyi werit nyepo korket nyo mutworin kuyu wulo keyitoy piko tokol, ntene werinyi nyepo korket nye momutworin kunye kiceyi nyo om kurtoyot nyepo Yiyintet.
- 24** Tyonkoc nyi nye poru ṅalek cepo orit. Kerkey korucoto oyenku oko kirotyanik oyeny. Korket akenke kunye cone tulwetap Sinai nyoto ku Akar nye yiye lekoc ce mutwor.
- 25** Kerkey Akar oko tulwetap Sinai nye mite koretap Arapia nye ciyuye Yerusalem nyepo pesyosyecu, omnye mutworin Yerusalem oko lekokyi.
- 26** Ntene kerkey Yerusalem nyepo torot oko korket nye momutworin, nyoto ku yeyonyacek.
- 27** Omnye mwowu silutekap Yiyintet kule, “ṅerec korko nye son, nye tompo kot kuyi lekwa! Pol om nerekwek, nyi nye tompo kot kās mwonin nyepo lekwa! Omnye mosukuyi korko nye kicetay lekoc ce caṅ, kupël korko nyo pontekey santenyi.”
- 28** Ntene akwek mpo yeya, oyiku akwek lekocap kirotyet nyepo Yiyintet kuyu wulo kiyunto Isaka.



<sup>29</sup>Kitaŋany om pesyosyecoto werit nyo kiceyi kuyu wule ceyitoy piko tokol kutaŋany werit nyo kiceyi om swametap Muyet Nyetilil. Kunyo kuyunyoto mpo yawut.

<sup>30</sup>Ntene mwowu ne silutekap Yiyintet cu mwowu kule, “Kwet korket nyo mutworin oko werinyi; omnye puryo kot komukoktos kot kontiyis kupcicin tukukap kwan werit nyepo korko nye mutworin oko werit nyepo korko nye momutworin.”

<sup>31</sup>Kunyo mpo yeya, puryo kot ciku acek lekokaŋ korko nye mutworin, ntene ciku lekokaŋ korko nye momutworin.

## Kalatiyek 5

<sup>1</sup>Kikutyacec acek Kristo sukuŋet komo kyiku mutwor. Kunyo oyoŋnkye okwilokisye, monte yec kot tokunāmak kutiŋnkyok ŋony mucokit nyepo mutworyontit.

<sup>2</sup>Ani nyo Paulo nkit nye oŋololwok akwek, kunyo möce alim topon. Ye kocām akwek kot cewonak, koporukey kule puryo kot kuponto Kristo latik mpo kisic om wule omite akwek.

<sup>3</sup>Omöce ani kule otosyikey yec akwil ŋolyontoni omwoci citake tokol nye kacām kot cewon kule, mosukuratakay cito nyoto kurip ŋalek tokol ce mwowu ntarastinek.

<sup>4</sup>Nto piko alak ce mite wule omite akwek ce syeme kule cerup ntarastinek sukuŋet cesatokisye om wule mite Kristo. Omite akwek piko coto saŋ om wule mite poypoyetap Yiyintet.

<sup>5</sup>Daleca ku cecemite acek cikeneni om Muyet Nyetilil nyepo Yiyintet nye mite kwiyisi om koyenet nyinyacek.

<sup>6</sup>Omnye ye kiciyomekey acek oko Kristo, kupuryo kot ku ŋolyo nyewo mpo kisic ye kacewonak nto ye puryo kot cewonak. Dolyontet nyewo ku koyenet nye yiyisi kupunte cömisyet.

<sup>7</sup>Kyomite akwek oyiyisi topon! Do nye kikerektak ye marup ŋalek cepo manta? Kiperperak picoto kulene?

<sup>8</sup>Nka kot kiperperak cito nyoto kwiyisye ŋalek ce yune; kipuryo kot kukwone ŋaleca wule mite Yiyintet nyo kikurok akwek,

<sup>9</sup>kuyu wulo cemwoytoy kwak kule, “Muce mumarek ce tukusic kukoci kukut pusek cepo teret nyewo.”

<sup>10</sup>Ntene tomite ani okenenokey akwek kule puryo kot omuci yec kot asot ŋalek alak, omnye kiciyomekey cepoyitu Mokoryontet akenke. Mosukumutyi Yiyintet musankut ci ake tokol nye mosok akwek nka kot ku nye yu ne.


<sup>11</sup>Mpo yeya, omne yu toce mite citoŋonyo ani okoy kunyi; ye kokomwoytoti ani kule topon wonset. Nto yunye kipo ŋaleca manta, nto puryo kot oponte ani wuyin om ŋalek ce omwoytoti cepo murtowontetap Kristo.



- <sup>12</sup>Kuyu piko co mosok akwek, amöce ani kule kutosyikey cek om aret nyimwa okoy wokulotokis cekto nkit.
- <sup>13</sup>Nto akwek mpo yeya, kicekurok oñnkityaktak, kunyo monte kiyisye kalyet nyoto sukuñet kupaytak corokyinotet nyepo tukuk ce möce porwonik cikwok, kunyo oiyisye koromun cömisyet okolyoykey akwek kwakwek nkit.
- <sup>14</sup>Omnye ciyomntos ntarastinek tokol kwek akenke om ntarastit akenke nyo mwowu kule, “Cäm lyatyenjuñ kuyu wulo cömtoykey nyi nkit.”
- <sup>15</sup>Nteye kowuskey kuyu tyonjin oñnkatañanykey akwek nkit, kumöce oripkey omnye omuci kwayarantekey akwek nkit.
- <sup>16</sup>Dolyontet nye omwowok ani akwek kunyi kule, ayaste kwiysis Muyet Nyetilil kupayta sponwek cikwok, ntene monte ciñrec porto om tukuk ce möce porto nyepo cito.
- <sup>17</sup>Omnye tukuk ce möce porwonikyo kuce toyeykey oko tukuk ce möce Muyet Nyetilil. Nto tukuk ce möce Muyet Nyetilil kuce toyeykey oko tukuk ce möce porto nyepo cito. Coto tukway kuce punik ce senkerekey, kunyo puryo kot oyiye akwek tukuk ce möce kule kiyi.
- <sup>18</sup>Nteye ntowok akwek Muyet Nyetilil, kupuryo kot omite yec ñonyutap ntarastinek.
- <sup>19</sup>Tukuk ce toku koromun ce yiye porto nyepo cito kucu, kuyu sakwayanat, simnyo, makatet nye miyat.
- <sup>20</sup>Sayetap ototoywek, ponisyet, puniyontit, wokutyet, corokyinot, cemukuleyo, mucesta,
- <sup>21</sup>oko pokitet, oko tumwonik ce miyotec, oko ñalek alak tokol cekey oko coto. Kunyo osowok ani yawut kuyu wulo kikyasowok ikye kunyo kule, puryo kot kunyuru piko ce yiye ñaleca poytoyisyetap Yiyintet.
- <sup>22</sup>Ntene konu Muyet Nyetilil, cömisyet, ñerekwek, kalyet, muytocinotet, poypoyet, toponiyet, cikaseninkey,
- <sup>23</sup>sikenotet oko ripetapkey. Puryo yec ntarastit nye toye ñalek ceyucutecu.
- <sup>24</sup>Piko cepo Kristo kuce kipakäc soponto nyepo corokyinotet oko tukuk tokol ce möce porto.
- <sup>25</sup>Muyet Nyetilil nye ceponte acek; kunye roke kurip sponwek cicacek.
- <sup>26</sup>Puryo kot kuroke cenyim nto puryo kot kuroke cewuskey acek nkit, nto mpo cecorokyi citake.

## Kalatiyek 6

- <sup>1</sup>Mpo yeya, ye kacenäm citake tokol kwiye ñolyo nye miyat, roke asat akwek piko co oponte mukuleywek ce toponec cito nyoto kawur, ntene roke ayiy kuyunyoto om aret



nye topon, oṅnkosyem oripkey akwek nkit sukuṅet mente cesyemak mpo akwek kuyu cicoto.

<sup>2</sup>Otorcikey akwek kwakwek nkit terekok, omnye om aret nyeyunyoto kuye mosorup akwek ntarastinek cepo Kristo.

<sup>3</sup>Omnye ye sotekey citake kule oyiku nye tokunot oṅnkurok kupöc pate, ku keperperkey cicoto nkit.

<sup>4</sup>Ntene roke kukäskey ci ake tokol wule yunto neto nkit, nteye köse kule oyiye ṅalek ce toponec, kumöce kusilkey om tukuk ce kikwiyy nye puryo kot kuyoyece ce kikwiyy cito ake.

<sup>5</sup>Omnye ponto ci ake tokol terekwet nyenyi nkit nye tore.

<sup>6</sup>Möce cito nyo cinete lokoywek ce toponec kupcicin mokoryontit nye ponto oko konetintet nyenyi.

<sup>7</sup>Monte ciperperkey akwek kwakwek nkit, omnye puryo kot ciperpere Yiyintet. Tukuk ce kole cito; kuce tukuk ce mosukukis cicoto.

<sup>8</sup>Ye kakol cito mparet nyepo corokyinotet nyepo porto nyenyi, ku mparanato nye mosukukise omik cepo met. Nteye kakol cito mparet nyepo Muyet Nyetilil, ku mparanato nye mosukukise omik cepo soponto nye mopoku.

<sup>9</sup>Kunyo puryo kuroke cecosye acek mokyiy ṅalek ce toponec. Omnye ye kakyiy yisyonutek ce toponec, mosukupunto pesyosyek ce mocekisisye acek omikyö.

<sup>10</sup>Omnye om pesyo tokol nye kacenyöru poroyinto, kumisyini cikalye piko tokol, ntene kupölis mpo yeya co kikoyen.

<sup>11</sup>Akäs pa akwek nyukutanik cewoyec ce kosilwok ani om yewumwani nkit.

<sup>12</sup>Piko tokol ce möce kule cesilkey ciporu momitek cepo porwonik cikwa kuce syeme kule cisimncok cewonak akwek. Kunyo yiye kuyunyoto pate kule sukuṅet mente citaṅanyec kupo murtowontetap Kristo.

<sup>13</sup>Omnye nka mpo picoto cewone, kuce puryo kot kurupe mpecek ntarastinek, kunyo möce cek kule cewonak akwek sukuṅet kusilkey om momitek nye mite porwonik cikwakwek.

<sup>14</sup>Ntene puryo kot osilekey ani om kiy ake tokol, tos pate om murtowontetap Mokoryontenyö Yesu Kristo. Omnye om murtowontet nyenyi, kunye asute kule kipok ṅalek cepo koret om wule amite ani oṅnkyamey om wule mite ṅalek cepo koret.

<sup>15</sup>Puryo kot ku ṅolyo nyewo ye kacewon cito nto ye puryo kot cewon. Dolyontet nyewo koromun pate, kuye ketililkey cito.

<sup>16</sup>Nto om wule mite piko co rupe ṅalecu om porwonik cikwa, osomncini ani cekto kule opurte kalyet oko kokolyoyisyet wanak oko Israel nyepo Yiyintet.



**17**Mawaṅte omwowa kule, kuceke yawut kuwo tay, mente kot tokutaṅanya yec ci ake tokol; omnye momitek ce oponte om porto nyimwani kuce pelutok ce poru kule ayiku ani mutworintetap Yesu.

**18**Mpo yeya, osomwok kule opurte akwek poypoyetap Mokoryontenyo Yesu Kristo. Yunyoto.



## Efesoyek

### Efesoyek 1

<sup>1</sup>Cone parwani wule amite ani Paulo nye kiyokintetap Yesu Kristo om cömisyetap Yiyintet. Osilwok akwek pikap Yiyintet ce minye Efeso ce kikoyen sopenwek cikwa Yesu Kristo.

<sup>2</sup>Kante onyuru poypoyet oko kalyet nye cone wule mite Papanyo Yiyintet oko Mokoryontet Yesu Kristo!

<sup>3</sup>Kante cikaste Yiyintet oŋnku kwanitap Mokoryontenyö Yesu Kristo! Omnye kikonec acek kupeyok om koyomet nye ceponte oko Kristo, omnye kikonec kokotutekyi tokol cepo wulin po torot.

<sup>4</sup>Kikweyec acek ciku pikyi om Kristo kutompo kot citany koret sukuŋet ciku piko ce tililec ce moponto lelis om tayta nyenyi.

<sup>5</sup>Kicäm Yiyintet kenye kule masawecec acek cekwa wule mite neto ciku lekoyi cepunte wule mite Yesu Kristo. Kicäm om ñerekwekyi oko yiytayetet nyenyi nkit.

<sup>6</sup>Kikwiyy ñolyontoni kule sukuŋet cinket acek kokotutekyi ce woyec ce kicekonec püc pate kupunte Werinyi cämenet.

<sup>7</sup>Kicityacec acek oŋnkyikalyec miyotyonykyo kupunte met nyepo Kristo. Ponto Yiyintet poypoyet nyewo koromun,

<sup>8</sup>kikonec acek kuyemec kuyunyoto om ñomnonet nyenyi tokol oko kuyu wule nketitoy.

<sup>9</sup>Kikwiyy Yiyintet kito nye kimöce kuporwec acek yiytayet nye wuŋat nye kiciyya kenye kule mosawaŋte aponune Kristo.

<sup>10</sup>Yiytayet nyepo Yiyintet nye mosukuwaŋta ye kopunto pesyet nye topon; kunye mosukoyomo yoto tukuk tokol ce kicitany cepo torot oko ñony oŋnkwek Kristo kantoyintet nyewo.

<sup>11</sup>Kikiyy tukuk tokol kuyu wule kikikwiyya oŋnkutilta Yiyintet. Kunyo kikweyec Yiyintet acek Yutayek ciku pikyi om koyomotet oko Kristo nye kikwiyya oŋnkutilta neto nkit kutompo kot citany koret.

<sup>12</sup>Kunyo misyini acek Yutayek co ciku piko cepo tayta ce cikeni Kristo, cikaste woyinto nyepo Yiyintet.

<sup>13</sup>Kunyo yunyoto mpo om wule omite akwek lamek co kyoyen Kristo yo kicemwowok lokoywek cepo manta, coto kuce lokoywek ce toponec ce kisutwok akwek kosopotet. Kikoci Yiyintet pelutyet nye poru kule oyiku akwek pikyi, pelutyet nyoto ku Muyet Nyetilil nye kikirto.





<sup>14</sup>Muyet Nyetilil kunye poru kukwile kule mocenyoru acek tukuk co kikurtoci Yiyintet pikyi, oṅkuporwec kupoyit manta kule mosukutyakta piko ceci. Kunyo akente cikaste woyinto nyenyi.

<sup>15</sup>Kunyo kuceke ye kyalim koyenet nyimwoṅ om wule mite Yesu Kristo oko cömisyet nye ocöme akwek piko tokol cepo Yiyintet,

<sup>16</sup>tompo kot ayaste ani kuceke yoto nye mokostoy Yiyintet osomwok akwek ye osome sayutekwani.

<sup>17</sup>Osome Yiyintetap Mokoryontenyö Yesu Kristo, Papa nyepo woyinto, sukuṅet kukonok Muyet Nyetilil nyepo ṅommonet nye muce kuṅoṅwok Yiyintet sukuṅet oṅket neto.

<sup>18</sup>Osome kule kuyotokis kasoteywek cikwok okäs lakweyet oṅkonket kokenotet nyo kicekurcok, oko mokoryontit nyewo koromun nye cikite kuce kupeyok ce kikurtoci neto pikyi.

<sup>19</sup>Oṅkonket kule cemosi nyewo koromun swamet nyenyi nye mite kwiysisi om wule cemite acek co ciyeni. Swamet nye ceponte kunye kerkey oko swamet nyewo

<sup>20</sup>nye kikwiysisye neto yo kiṅete kotutune met Kristo oṅkukoci kopure yewunyi nyepo tay om torot.

<sup>21</sup>Poytoy Kristo om wuloto poytoyik tokol cepo torot, oko mokorenik ce ponto kamukeywek oko swamet. Kaynenyi kunye nyewo kupël kaynok tokol cepo koroni oko cepo koret nyin ake.

<sup>22</sup>Kikoci Yiyintet kupayta Kristo tukuk tokol, oṅkukoci Yiyintet neto metit nyepo porto.

<sup>23</sup>Porto nyoto ku pikap Yiyintet. Neto kunye kocini kupeyok

## **Efesoyek 2**

<sup>1</sup>Kikyopoku akwek ikye om leliswek oko miyotyönik ce kyoyiye.

<sup>2</sup>Kyorupe yoto soponto nye miyat nyepo koret. Kipoytok yoto muyet nyepo swametap oyinot nyepo parak, nyoto kunye poytoy mpo yawut piko ce meyweye Yiyintet.

<sup>3</sup>Kickerkeyekey acek tokol oko cekto. Kicipuri kopurto nye kicerupe corokiyinotet nyenyö nyepo tukuk cepo koret oko tukuk ce möce porwonikyacek. Kunyo kuyu wulo yunto sopontap koret, misyinec mpo acek kumutwec Yiyintet musankut.

<sup>4</sup>Ntene ponto Yiyintet poypoyet nyewo koromun nye mociyoyece nye cömec acek.

<sup>5</sup>Omnye nka kot kikicepoku acek om miyotyönik ce kiceponte, ntene kukonec Yiyintet soponto citutu oko Kristo. Kunyo poypoyetap Kristo kunye kisopok akwek.

<sup>6</sup>Kiciṅetec acek citutune met oko Kristo oṅkuyomec oko neto sukuṅet cepoytoyisye oko neto om poytoyisyet nyepo torot.



- <sup>7</sup>Kikwiyy ɲolyontoni sukuɲet kupor kuwany kenysisyek ce caɲ cekwoni poypoyenyi om cömisyet nye kipor Yesu Kristo.
- <sup>8</sup>Omnye kicisopok akwek om cömisyetap Yiyintet kupunte koyenet nye oponte. Kipuryo kot kukule om yisyet nyimwakwek nkit, ntene om kokotutyetap Yiyintet.
- <sup>9</sup>Puryo kot kumite ɲolyo nye roke cesilekey omnye puryo kot ku yisyet nyimwakwek nkit.
- <sup>10</sup>Kityacec Yiyintet acek sukuɲet kyiy yisyonutek ce toponec om koyomotet nye cepunte oko Yesu Kristo, kiyiytowec kenyy kuyunyoto kule kyiy.
- <sup>11</sup>Möce asot akwek wule kyoyunte ikye, akwek Lamek co kicekurok kule, “Mowonotin” Kikurok akwek kuyunyoto piko co kurekey kule, “Ciku wonotin.” Ntene wonset kunye po porto nyepo saɲ pate.
- <sup>12</sup>Kyoyiku yoto kweyotin om wule mite Kristo. Kyoyiku toyek ce kipuryo kot opoye pikap Yiyintet ce kweyanik. Kipuryo kot oponte akwek kiroyet nye kikiyy om kurtoyot nye kikurtoci Yiyintet pikyi. Kyomite yoto omnye koret nye kipuryo kot oponte kokenotet oɲkipuryo mpo kot oponte Yiyintet.
- <sup>13</sup>Ntene om koyomotet nye oponte yawut oko Kristo akwek piko co kyomitowune wule low, kuce kicekurok olekititu om korosyontetap metap Yesu Kristo.
- <sup>14</sup>Yesu Kristo nkit kunye kisutwec acek kalyet, omnye kikoyomo Yutayek oko lamek kwek akenke. Kikoturpup neto totet nye kipciye picoto kwek punik; omnye kikwiyyise porto nyenyi.
- <sup>15</sup>Kinum ntarastinek oko ɲalek alak tokol ce ponte ntarastinek cepo Yutayek. Kikwiyy kuyunyitenyi kule sukuɲet kuyomokey Yutayek oko Lamek kwek aret akenke. Yoto kuye kisutu kalyet.
- <sup>16</sup>Kimeci neto murtowontet kule sukuɲet kunum puniyontit. Murtowontet kunye kiyomo neto Yutayek oko lamek kwek porto akenke oɲnkuwec kukwa wule mite Yiyintet.
- <sup>17</sup>Kunyo kico Kristo cokumwayta lokoywek ce toponec ce kipoyit piko tokol, Lamek co kumite wule low, oko Yutayek co kilekite wule mite neto.
- <sup>18</sup>Acek Yutayek oko lamek cepunte tokol wule mite Kristo om koyomotet oko Muyet Nyetilil siceɲet cepunte taytap Yiyintet Papanyo.
- <sup>19</sup>Kunyo, kimoyiku akwek Lamek toyek ce punonik alak, ntene oyiku pikap koret wanak oko pikap Yiyintet, coto kuce piko cepo kanyi.
- <sup>20</sup>Oyiku akwek kereryantet akenke nyepo koto nye mite cetece, koto nye kicece kiyokik oko workoyik. Nto Yesu Kristo nkit kunye tolocta.
- <sup>21</sup>Yesu kunye tiye kuyonɲto koto tokol oɲnkukoci kutekakay okoy kwek koto nyetilil om Mokoryontet.



<sup>22</sup>Om koyomotet oko neto kunye omite akwek cetecok wanak oko piko alak tokol sukuŋet oyiku koto nye minye Yiyintet kupunte Muyet Nyetilil.

### Efesoyek 3

<sup>1</sup>Om ɲolyontoni kuye sukuŋet osomwok Yiyintet ani Paulo nyo mopusyontet nyepo Yesu Kristo kupo Lamek.

<sup>2</sup>Kwalim akwek kupoyit manta kule kikono ani Yiyintet yisyoni om poypoyenyi kupo toponiyet nyimwakwek.

<sup>3</sup>Kiŋoŋwo oŋnkuporwo ani Yiyintet yiytayetet nyenyi nye wuŋat. (Kwosil ani ɲalek ce tukusic ce nōme ɲalecato,

<sup>4</sup>Nteye kosuman akwek ɲalek ce kwosil mosonket wule oŋnketitoy ani ɲalek ce wuŋotin cepo Kristo.)

<sup>5</sup>Kipuryo kot cemwoci piko ɲalecutecu wuŋotin om pesyosyek co kitil. Ntene kukuporci Yiyintet yawut om Muyet Nyetilil kiyokiky ce tililec oko workoyik.

<sup>6</sup>Dolyontet nye wuŋat kunyi kule, yomntoskey Yutayek oko Lamek oŋnkunyor tokol kupeyok cepo Yiyintet kupunte lokoywek ce toponec. Kwek cekto piko cepo koto akenke oŋnkunyor tokol kirotyet nyo kimwowu Yiyintet kupunte wule mite Yesu Kristo.

<sup>7</sup>Kicekono ani oyiku mutworintet nyepo Lokoywek ce toponec om kokotuyet nye pciyat nye kikono om swamenyi nye yiyisyi.

<sup>8</sup>Oyiku ani miniŋ koromun om wule mite piko tokol cepo Yiyintet, oŋnkurok kikono Yiyintet yisyoni pciyat nye osutyini Lamek lokoywek ce toponec cepo Mokoryontit nyepo Kristo nye mopoku.

<sup>9</sup>Oŋnkanet okoy kukäs piko tokol wule mokyiyta yisyet nyepo Yiyintet nye wuŋat. Yiyintet nye kitonye tukuk tokol kunye kirip kuwuny yiytayetet nyenyi okoy kutil kenyisyek co kitil.

<sup>10</sup>Kule sukuŋet konket om pesyosyecu malaykanik oko poytoyik cepo torot wule yunto ɲomnonet tokol nyepo Yiyintet. Domnonet nyoto kunye yomntos pikap Yiyintet.

<sup>11</sup>Kikwiŋ Yiyintet kuyunyoto kuyu wule yunto yiytayet nyenyi nyepo kenŋ, coto kuce kikoyitita kupunte Mokoryontenyō Yesu Kristo.

<sup>12</sup>Om koyomotet nye ceponte acek oko neto, oŋnkupunte koyenet nye ceponte om wule mite neto, kunye kicityacec cimuc cipe taytap Yiyintet.

<sup>13</sup>Kunyo kosomok ani kule monte komuyok toŋoŋutek cu otoŋonyi ani om kaynemwakwek. Ponto latik ɲalecu tokol om wule omite akwek.


<sup>14</sup>Kunyo om ɲolyontoni, kuye saŋet akotuŋe taytap Papa.



- <sup>15</sup>Nyoto kunye Papa nye nyortoy kaynet nyepo manta piko tokol cepo koret torot oko cepo koret nyony.
- <sup>16</sup>Osome ani Yiyintet om Mokoryontit nyepo woyinto nyenyi, kukonok akwek onyuru swamet om mukuleywekwok orit kupunte Muyet nyenyi Nyetilil.
- <sup>17</sup>Sukuñet kutec Kristo konyi mukuleywekwok orit kupunte koyenet. Osome kule onyuru akwek tikityek ce kwilotin oñkonerye om cömisyet,
- <sup>18</sup>sañet akwek wanak oko pikap Yiyintet tokol onyuru swamet nye oñket kule para koromun, oñnkukoy, oñnkukoy kuwo parak, oñnkukoy kuwo nyony koromun cömisyet nyepo Kristo.
- <sup>19</sup>Osome ani kule oñket akwek cömisyet nyenyi, nka kot mocimuce kot cinket topon, kuyunyoto oñkonyoru kupeyok ce yemok.
- <sup>20</sup>Wule mite Yiyintet nye muce kwiy tukuk ce cañ, kupëlis ce cesome nto ce cisoti acek, om swamet nye mite kwiyisi om wule cemite acek.
- <sup>21</sup>Kopurune woyinto wule mite Yiyintet, kupunte pikap Yiyintet oko Yesu Kristo, kuceke pinta ake okokoy okoy okokoy! Yunyoto.

#### **Efesoyek 4**

- <sup>1</sup>Kunyo osomok ani akwek. Ani kunye oyiku mopusyontet omnye oyiye yisyet nyepo Mokoryontet. Möce opurte soponto nye oyoyeci oko nyo kikonok Yiyintet ye kikurok.
- <sup>2</sup>Otoloyitu, oñkopoyoyitu, oñkomuytocini okokoy, sonyoru cömisyet okolyoykey akwek kwakwek nkit.
- <sup>3</sup>Kikoyomok Muyet Nyetilil oyiku akenke, kunyo asyem orip koyomet nyoto, opurte kalyet akwek kwakwek nkit.
- <sup>4</sup>Mite porto akenke oko Muyet Nyetilil akenke, kuyu wulo mite konketotet akenke nye kikurtowok akwek Yiyintet.
- <sup>5</sup>Mite Mokoryontet akenke nkit oko koyenet akenke, oko patisanet akenke.
- <sup>6</sup>Mite Yiyintet akenke nkit nye Papa nyepo piko tokol oñku nye Mokoryontet nye poytoy tukuk tokol, nye yiyisi om tukuk tokol, oñnkumitowune tukuk tokol wule mite neto.
- <sup>7</sup>Kicikoci ci ake tokol om acek kokotutek ce pciyotin kuyu wule moktoy Kristo.
- <sup>8</sup>Kuyu wulo mwowu silutekap Yiyintet kule, “Yo kiweti torot wule low, kikwer neto yoto oyik ce miyotec. Kikoci piko kokotutek.”
- <sup>9</sup>Kunyo poru ne nyoyontoni mwowu kule, “Yo kiweti neto torot wule low.” Poru kule kinyosyo kuco nyony.



- <sup>10</sup>Kunyo neto nye cito nye kirek kuco ḡony, kunye neto nye kiwo torot wule low koromun sukuḡet kupayta koret tokol kumukul.
- <sup>11</sup>Neto kunye kikoci piko kokotutek, kukwey piko alak kwek kiyokik, kwek alak workoyik, kwek alake mwoytoyik cepo lokoywek ce toponec, kwek alake mesewek, kwek alake konetik.
- <sup>12</sup>Kikwiy kuyunyitenyi sukuḡet kuyiyta piko tokol cepo Yiyintet om yisyet nyepo Kristayek, nyoto kunye yisyet kutec porto nyepo Kristo.
- <sup>13</sup>Kunyo mosiciyomekey acek om koyomotet nyoto akenke om koyenet nyinyo oko ḡomnonet nye ceponte nye conket Weritap Yiyintet. Mosiciku piko cewoyec okoy cepunte koyinto nyepo wule tento Kristo.
- <sup>14</sup>Yoto kuye komo ceckerkeyekey acek oko lekoy ce sute yomet kuroye wuli oko wuli, nto yomet nyoto kunye konetisyet nyepo piko ce perperisyi. Piko coto kuce ntocini piko alak kumosokis kwiysisye ḡomnonet nye kitowu cekto nkit.
- <sup>15</sup>Ntene mocoḡalal yoto ḡalek cepo manta om mukuleyto nyepo cōmisyet, misyini cenerye om aret ake tokol om wule mite Kristo nye metit nye ntowec.
- <sup>16</sup>Yomntos Kristo kutuyo tukuk tokol cepo porto oḡnkupayta. Nomntos tukuk tokol sukuḡet kwek porto akenke. Kunyo ye keyis tukuk tokol topon kuyu wule cemoktoy, yoto kuye sukuner porto tokol topon om cōmisyet.
- <sup>17</sup>Kunyo osomwok ani aḡnkasyem asowok om kaynetap Mokoryontet kule ayaste monte yec tocipur kupurto nye kerkey nyepo Lamek co ponto soponto nyepo kasoteywek ce puryo wol.
- <sup>18</sup>Ponto kasoteywek cikwa menonet, puryo kot kuponto cek soponto nyo konu Yiyintet, omnye puryo kot kunkete oḡnkupuryo kot kucōme mpo kisic.
- <sup>19</sup>Kimo kuponto kalilan ake tokol, kicāmnta pate kule kyiye ḡalek ce miyotec nye kimokuyweyisyi ye mokwiḡ ḡolyo ake tokol nye samis.
- <sup>20</sup>Ntene kipuryo kot anetkey akwek ḡalek cepo Kristo ceyucoto!
- <sup>21</sup>Kyolim akwek kupoyit manta ḡalek cenōme Yesu. Kicinetak kuyu konomikyḡ ḡalek cepo manta ce mite wule mite neto.
- <sup>22</sup>Kunyo awirte kapurto nyimwoḡ nyepo kenye nye kiwur nye kipo corokyinotetap koperperisyet.
- <sup>23</sup>Misyini awec kulelakitu mukuleywek cikwok.
- <sup>24</sup>Misyini alac siret nyepo soponto nyelel nye kicitany kukerkeyit oko Yiyintet nye porukey om soponto nyepo manta nye rotat oḡnkutilil.
- <sup>25</sup>Kunyo awirte koperperisyo, mōce kuḡalal ci tokol ḡolyo nyepo manta om wule mite yeyanyi, omnye ciku acek tokol luket akenke nyepo porto nyepo Kristo.



- <sup>26</sup>Ye Kotepe kot onyeru, monte kusutwok nyerunotet kot yiy miyotyey, monte cipurte nyerunotet kot kwimen koret.
- <sup>27</sup>Monte cikoci setani nyewo nyepo oyik poroyinto.
- <sup>28</sup>Misyini kwasta cito nyo kicorin corsyet oñkucec kwiyis sukuñet kunyor omik om aret nyepo manta, oñkucec kukalya pononik.
- <sup>29</sup>Ye oñololi, monte kot kukwane kutuwak cikwok ñalek ce miyotec, oyiyisye pate ñalek cetoponec ce kolyoy, sukuñet kukalya ñalek ce oñololi akwek piko co lime.
- <sup>30</sup>Monte kot cinerec Muyet Nyetilil nyepo Yiyintet, oñkupor kukwil kule mosukupunto pesyet nye mosukutyacak Yiyintet. Omnye Muyet Nyetilil kunye pelutyet nye poru kule opoye akwek Yiyintet.
- <sup>31</sup>Awirte meyintap mo ake tokol oko sokornat oko nerekwec. Monte kyiyisye polot oko cupisyet, awirte senkerat ake tokol.
- <sup>32</sup>Ntene otoloyitu oñkopoyoyitu om mukuleywekwok om wule mite ci tokol om akwek. Akalyakey akwek kwakwek nkit kuyu wulo kikalyak. Yiyintet kupunte wule mite Yesu Kristo.

## Efesoyek 5

- <sup>1</sup>Omnye oyiku akwek lekoka Yiyintet ce camanik, kunyo misyini akerkeyitu neto.
- <sup>2</sup>Misyini kurip soponto nyimwoñ cömisyet kuyu wulo kicämec acek Kristo oñkukon soponto nyenyi kupo acek sukuñet kwek kokotutyet nye poñu topon nye korosyontet nye ñerece Yiyintet.
- <sup>3</sup>Kunyo ye oyiku akwek lekoka Yiyintet, kupuryo kuroke kot celimncok sakwayanat nto kopurto nye miyat nto moroñyantit.
- <sup>4</sup>Puryo mpo kot ku topon oyiyisye ñalek cepo kawotyontit, nto perperyo nto ñalek ce somis. Ntene möce akaste Yiyintet pate.
- <sup>5</sup>Möce oñket ñalecu kule, puryo kot komuce kot kunyor kontisyet om poytoyisyet nyepo Kristo oko nyepo Yiyintet ci nye yiye sakwayanat, nto nye ponto kopurto nye miyat, nto nye moroñya (omnye moroñyantit kunye poru sayet nyepo kerkeyik)
- <sup>6</sup>Monte kuperperak ci ake tokol kwiyisye ñalek cepo mwiynan pate omnye ñalek ceyucoto kuye sukuñet kunerekyi Yiyintet piko ce puryo kot kulimncini neto.
- <sup>7</sup>Kunyo ayaste kwiyat kwicek nkit piko ceyucoto.
- <sup>8</sup>Kyomite akwek ikye menonet, ntene omite yawut wule mite lakweyet.
- <sup>9</sup>Omnye lakweyet kunye sutu kupuswek wok cecañ cepo toponiyet oko tililinto oko ñalek cepo manta.
- <sup>10</sup>Asyem anetkey ñalek ce ñerece Yiyintet.



- <sup>11</sup>Ayaste monte ayiy tukuk cepo menonet ce puryo kot kuponto latik co yiye piko, ntene otoru kukwa wule lakwey.
- <sup>12</sup>Omnye nyolyo nyepo kalilan koromun mpo ye mocejalale wule wuñat ñalek ce yiye cek.
- <sup>13</sup>Nteye kocipor ceñany tukuk tokol kukwa wule lakwey yoto kuye cipor kutok topon wule yunto tukucoto.
- <sup>14</sup>Omnye toku topon kiy ake tokol nye kaceñany kutok, kuyunyoto sukuñet cemwoy kule, “Ñet cito nyo mite rwonto! tutune met! Mosukukoniñ Kristo lakweyet.”
- <sup>15</sup>Kunyo möce orip topon wule opurtoy akwek, monte cipur kopurto nyepo piko co perper, ntene opur kuyu piko ce ñomec.
- <sup>16</sup>Oyiyisye topon poroyinto ake tokol nye oponte, omnye miyotec pesyosyecu.
- <sup>17</sup>Kunyo monte ceperperitu, ntene möce asyem oñket kito nye möce Mokoryontet kule ayiy.
- <sup>18</sup>Monte cepokitye komek ce muce kowurtak, ntene möce opiyony Muyet Nyetilil,
- <sup>19</sup>Möce otumncinikey kwakwek nkit om tumwonik cepo kakastayet, oko om tumwonik ce kostoy Yiyintet, oko tumwonik ce tililec. Möce otumnci Mokoryontet tumwonik ce rurtos ce kwone mukuleywekwok.
- <sup>20</sup>Akaste Yiyintet Papa okokoy om kiy ake tokol kupunte kaynetap Mokoryontet Yesu Kristo!
- <sup>21</sup>Möce ayweyikey akwek nkit omnye oyweyi akwek Kristo.
- <sup>22</sup>Möce koruk ayweyi sanik cikwok, kuyu wulo oyweyi akwek Mokoryontet.
- <sup>23</sup>Omnye moron kunye nyewo om wule mite korkenyi, kuyu wulo nyewo Kristo om wule mite pikap Yiyintet, nyoto kunye porto nyenyi, nto Kristo nkit kunye Kosopintet.
- <sup>24</sup>Kunyo misyini kuywey koromun koruk sanik cikwa, kuyu wulo yweye cekto pikap Yiyintet om Kristo.
- <sup>25</sup>Möce moronik acäm koruk cikwok kuyu wulo kicämnta Kristo pikap Yiyintet oñkukoyito soponto nyenyi kumeci cekto.
- <sup>26</sup>Kikwiyy kuyunyoto kule sukuñet kowun kutililitu pikap Yiyintet om nyolyontenyi oko peko,
- <sup>27</sup>kule sukuñet kukwer pikap Yiyintet kukwa wule mite neto kuponto toponiyet tokol nyetilil nye moponto lelis, oñkupuryo kot kuponto tisyet nto nye moponto kiy ake tokol nye miyat.
- <sup>28</sup>Kunyo misyini moronik kucäm korukwa kuyu wulo cömtoy cek porwonik cikwa nkit. Ci nye kacäm korkenyi kunye kacämñkey neto nyoto nkit.





<sup>29</sup>Omnye puryo ci nye senkere porto nyenyi nkit, ntene poye oṅnkurip topon kuyu wulo riptoy Kristo pikap Yiyintet.

<sup>30</sup>Omnye ciku acek piko cepo porto nyepo Kristo.

<sup>31</sup>Kuyu wulo mwowu silutekap Yiyintet kule, “Om ṅolyontoni kuye sukuṅet kupakakta cito kwan oko kamet oṅnkuyomokey oko korkenyi, yoto kwek piko oyenku porto akenke.”

<sup>32</sup>Mite ṅalek ce woyec cepo manta ce wuṅotin om ṅalecu po silutekap Yiyintet. Asoti ani om kasoteywekwani kule nömekey oko Kristo oko pikap Yiyintet.

<sup>33</sup>Ntene nömekey mpo yec ṅalecu oko akwek, kunyo möce kucäm ci ake tokol om akwek korkenyi kuyu wulo cömtoykey neto nkit, oṅnkumöce konket korko kule oyweyi santenyi.

## Efesoyek 6

<sup>1</sup>Akwek lekok, yisyemwakwek kuyu Kristayek aywey poyik co kiyok, omnye yisyet nyoto nyepo manta.

<sup>2</sup>Ntarastit nyi kule, “Ywey kon oko komet.” Kunye po tayta nye ponto kurtoyoni kule,

<sup>3</sup>sukuṅet kunyol kiy ake tokol om wule mite nyi, oṅnkipur koret wany kenyisyek ce caṅ.

<sup>4</sup>Poyik, monte cesut lekokwok om aret nye miyat nye muce kusutyi kunerekis, ntene möce anet kuneryo kuyweyis topon kuyu Kristayek.

<sup>5</sup>Akwek mutworik, möce aywey mokorenikwok om muyotet, möce oyiyisye mukuleyto akenke nye topon kuyu nye ayweyi Kristo.

<sup>6</sup>Monte kyiyi kuyunyoto ye mite cek kukösok kuyu piko ce möce kule ciṅerece piko, ntene oyiyi yisyet nye möce Yiyintet om mukuleyto akenke kuyu mutworikap Kristo.

<sup>7</sup>Oyiyi yisyonutek om ṅerekwek kuyu nye oyicini Mokoryontet nye puryo kot ku kule oyicini piko.

<sup>8</sup>Möce oṅnket kule mosukukoci Mokoryontet musyaret ci ake tokol nka mpo mutworin nto nye puryo ku mutworin; kupo yisyet nye topon nye yiye.

<sup>9</sup>Akwek mokorenik, möce oyiyi mpo akwek kuyunyoto om wule mite mutworikwok, mönte cimuyi cekto, möce oṅnket kule opoye akwek, oko mutworikwok Mokoryontet akenke nye mite torot, nye mutyini musankut ci ake tokol kuyoyec kuckerkeyit.

<sup>10</sup>Dolyontet nyepo letut, möce otitir om koyomotet oko Mokoryontet oṅnkoyiyisye swamet nyenyi nyewo.

<sup>11</sup>Anäm loṅet nyepo Yiyintet, sukuṅet amukte tekutek ce miyotec cepo setani nyewo nyepo oyik.



- <sup>12</sup>Omnye puryo kot cepoye acek piko, ntene cemite cepoye oyik ce miyotec ce motoku ce mite koret torot, oko ce poytoyisi, oko ceponto kamukeywek, oko ceponto swamet nyewo, om kenyisyecu po menonet.
- <sup>13</sup>Kunyo anäm yawut loñet nyepo Yiyintet sukuñet amukte pesyet nye miyat, nteye kopoye kot awany, yoto kuye anyoru ye koyoñe.
- <sup>14</sup>Kunyo oyoñknye topon, okoci kwek ñalek cepo manta porowet nye orote suwenutek cikwok, oñkolac tililinto kwek loñet nyepo karnet nye kerektoy teket.
- <sup>15</sup>Akante kukwilakay yiytayetet nye omwoytoy lokoywek ce toponec cepo kalyet kwek kweyonik cikwok cepo krenkokwok.
- <sup>16</sup>Anämte okokoy koyenet kwek loñet, sukuñet kukereka kotyek tokol ce loyotin ce wutu oyinoto nye miyat.
- <sup>17</sup>Acäm kasopotet kwek nyo kutwetap karnet nyimwoñ oñkwek ñolyontetap Yiyintet rotwetap cok nye konu Muyet Nyetilil.
- <sup>18</sup>Ayweye ñalecu tokol om somset nye osome kokolyoyisyet nyepo Yiyintet. Osome om pesyo ake tokol om swamet nyepo Muyet Nyetilil. Kunyo otir, monte kyaste, osomnci pikap Yiyintet okokoy.
- <sup>19</sup>Osomwo mpo ani sukuñet kukono Yiyintet lokoywek ce ye kañalal amuc añalal om nyikanatet aparte lokoywek ce toponec ce wuñotin.
- <sup>20</sup>Oyiku ani kiyokin nyepo lokoywek ce toponec nka kot omite mopusi. Osomwo sukuñet añalal om nyikanatet kuyu wulo misyini añalalye.
- <sup>21</sup>Tekiko yeya nyacek oñku mutworintet nyepo manta om yisyetap Mokoryontet kunye mosukumwowok akwek ñalek tokol ce nömo ani, sukuñet oñket akwek wule opurtoy ani.
- <sup>22</sup>Kunyo koyoku kuco cokumwowok wule cipurtoy acek om wuli oñkutitirok.
- <sup>23</sup>Kante kukoci Yiyintet Papa oko Mokoryontet Yesu Kristo kalyet oko cömisyet mpo yeya tokol om koyenet.
- <sup>24</sup>Opurte poypoyet piko tokol co yene Mokoryontenyö Yesu Kristo om cömisyet nye puryo kot kupoku.



## Filipik

### Filipik 1

- <sup>1</sup>Cone parwani wule ce mite acek Paulo oko Timosewo mutworikap Yesu Kristo. Cesilwok akwek pikap Yiyintet tokol ce kikoyomokey oko Yesu Kristo ce mite Filipi, wanak oko kantoyikwok kosik oko kokolyoyikwok.
- <sup>2</sup>Kante kukonok akwek Yiyintet Papa oko Mokoryontet Yesu Kristo poypoyet oko kalyet.
- <sup>3</sup>Okostoy ani Yiyintenyu okokoy om pesyo ake tokol ye kasotak akwek.
- <sup>4</sup>Nteye osome osomwok akwek tokol om nerekwek.
- <sup>5</sup>Omnye kwakalya ani akwek om yisyet nye cemwoyoyt lokoywek ce toponec kuceke pesyet nyo kipo tay okoy yewut pesyoni.
- <sup>6</sup>Kunyo anket ani kupoyit manta kule Yiyintet nyo kinyosye yisyenyi om wule omite akwek kunye mosukutosyi yisyenyi kuwo tay okoy kupunto ye pesyetap Yesu Kristo.
- <sup>7</sup>Omite akwek mukuleymwani orit! Kunyo nolyo nye porukey topon ye kasot kuyunyoto om wule omite akwek. Omnye kukyiyisye tokol topon yisyoni kikono Yiyintet. Nka mpo yawut amite mopusi oko mpo ye oyiku tyakat yo oporye oyete kule kukwilokis lokoywek ce toponec.
- <sup>8</sup>Yiyintet nkit kunye nkete kule omwowok ani n̄alek cepo manta ye komwowu kule cōmisyet nyewo nye oponte ani om wule omite akwek; kunye cone mukuleyap Yesu Kristo nkit.
- <sup>9</sup>Osomwok kule, roke kutosyikey kuner okokoy cōmisyet on̄kuwoyit n̄omnonet oko kasoteywek cepo manta.
- <sup>10</sup>Sukuŋet amuc akwek kot akwey n̄alek cepo manta cep̄lisyi, sotililitu nye moponte lelis ye kopunto pesyet nyepo Kristo.
- <sup>11</sup>On̄nkunyor saponwek cikwok n̄alek cepo manta ce konu Yesu Kristo nkit om woyinto oko kakastayetap Yiyintet.
- <sup>12</sup>Mpo yeya, amöce kule on̄ket akwek kule n̄alek ce kukwiyyokis om wule amite ani kuce kwekoci kutosyikey lokoywek ce toponec.
- <sup>13</sup>Kunyo kukunket kupoyit manta piko tokol ce ripo ani om kaytap kinko nyewo oko piko tokol ce mite wuli, kule amite ani mopusi omnye oyiku mutworintetap Kristo.
- <sup>14</sup>Rotisyet nyi amite ani kunye kwekoci kukwilokis mpo yeya ce caŋ om wule mite Mokoryontet, kunyo kutosyikey cek kunyor nyikanatet nye puryo kot kumuytos ye mwoytoy lokoywek cepo Yiyintet.
- <sup>15</sup>Ntene mwoytoy piko alake om cekto n̄alek cepo Kristo om corokyinot oko nyekernatet, kumwoytoy piko alak n̄alekyi om toponiyet.



- 16**Yiye picoto kuyunyoto om cömisyet nye ponto om wule amite ani, omnye kikonket kule kiono ani Yiyintet yisyet nye oporye oyetyecini lokoywek ce toponec.
- 17**Nto piko alak kuce puryo kot kumwoytoy ñalekap Kristo kupoyit manta, ntene mwoytoy pate om mukuleywek cepo corokyinot. Sote cek kule cimuci cesutwo ani wuyinto ye tomite mopusi.
- 18**Puryo kot ku ñolyo nyewo! Oyiku ñerekat kuyu wulo cimuce cemwayta ñalekap Kristo om aret ake tokol nye mukoktos, nka ye kacemwayta om aret nye topon nto om aret nye miyat. Kunyo mosotosyikey ani añerec,
- 19**omnye oñketi kule mosicityakta om letut om somotet nye osome akwek oko kokolyoyisyet nye cone wule mite Muyet Nyetilil nyepo Yesu Kristo.
- 20**Doloyontet nye amöce koromun om mukuleymwani oñkokeni kunyi kule, puryo kot oyostoy yisyenyu. Om pesyosyek tokol, nka mpo pantanyi mosonyoru titiret nyewo koromun, sukuñet soponto nyimwani tokol osutu koyweyisyet om wule mite Yesu Kristo, nka ye tosope nto ye kamey.
- 21**Kristo kunye soponto om wule amite ani.
- 22**Ntene ye kotosyikey ani tosop oñkkyiy yisyet nye topon nyepo latik, kuporkey kule puryo mpo kot oñket kule oñkono yisyet nye topon nyepo manta nye makwey.
- 23**Omnye nömo ani ñalecutecu tukway. Amöce ani koromun kule nto kapakakte soponto nyi aponte oñkowo wopur oko Kristo, omnye kito nyoto nye topon nye pëlisyi.
- 24**Ntene kito nye topon nye pëlisyi koromun om wule omite akwek kunyi kule, roke topur ani osope.
- 25**Oñket ani kupoyit manta kule mosopur osope oñkkyipurcine oko akwek tokol, sukuñet kutosyikey ñerekwekwok oko koyomotet.
- 26**Kunyo ye kaco ani yec okoy wule omite akwek, mosonyoru ñerekwek ce kosilekey om wule omite kuyu yeyamwoñ om Yesu Kristo.
- 27**Kunyo ñolyontet nye pëlisyi yawut kunyi kule, roke kopurto nyepo sponwek cikwok oko nyepo piko alak kopur kuyu wule moktoy lokoywek ce toponec cepo Kristo, sukuñet nka mpo ye kaco ani nto kopuryo kot aco, mosalim kule cokwilokisye oñkoponte soponto nyepo koyomotet nye kyoyiku akenke oñkoyiku luket nye tyikyini kiy akenke, nyoto ku koyenet nyepo lokoywek ce toponec.
- 28**Monte ciywey punik cikwok, opurte nyikanatet okokoy, mosukupor kule opëlisyi akwek opël cekto, omnye Yiyintet kunye konok akwek opëlisye.
- 29**Omnye kicekonok akwek kupeyok nye oyicini yisyet Kristo, ntene puryo kot omnye oyeni akwek neto pate, ntene möce atañany om kaynenyi.
- 30**Kunyo ciyomekey oko ani om poryet. Cicitenyi kunyo kyolim akwek oporyecini ani ikye, kunyo to ku cicitenyi kunye tomite ani oporyecini kuyu wulo olime akwek.



## Filipik 2

- <sup>1</sup>Tosukey ra swamet om sponwek cikwok ye opoye Kristo nto puryo? Oponte akwek tolosyet oko kokolyoyisyet om wule mite ci ake tokol om akwek?
- <sup>2</sup>Kunyo onjereco ani kuyema topon ye opurtoy kasoteywontet akenke, onnkoyomekey, onnkoyome sponwek cikwok, onnkocomncine nyolyo ake tokol akwek kwakwek nkit.
- <sup>3</sup>Monte cipurte corokyinot nto silot nyepo perperyo. Ntene möce otoloyitu onnkosut piko alak kwek cewoyec kupëlok akwek.
- <sup>4</sup>Monte cisot tukuk ce nömok akwek, ntene osoti tukuk ce nöme piko alak.
- <sup>5</sup>Möce oponte akwek kopurto oko kasoteywek ce kerkey co kiponto Yesu Kristo.
- <sup>6</sup>Kikerkey Yesu okokoy oko Yiyintet, Ntene kipuryo kot kusyem om swamet kule oyoyeckey oko Yiyintet,
- <sup>7</sup>Ntene kicämnta nkit kwasta woyinto, Onnkusutkey kuyu mutworin, onnkwek ci, onnkuporkey kuyu ci nye yu acek.
- <sup>8</sup>Kutalayit onnkurup aret nyepo koyweyisyet okoy kunyor met, met nyepo murtowontet.
- <sup>9</sup>Om nyolyontoni, kuye sukuñet kukoci Yiyintet neto atepto nyewo om torot, onnkukoci kaynet nye pële koynok tokol.
- <sup>10</sup>Sukuñet om kaynetap Yesu, Kuye kukutuny tukuk tokol cepo torot oko koret nyony, oko cepo kapkompic onnkusay neto.
- <sup>11</sup>Onnkurarta kutor tokol kule Yesu kunye Mokoryontet, om woyinto nyepo Yiyintet Papa.
- <sup>12</sup>Kunyo coronutekwani, kuyu wulo kyoyweya ani akwek okokoy yo kicepontekey, kunyo ayweya yawut koromun kupëlis ye mocepontekey. Olimnte nhalak ce omwowok. Otosyikekey oyiyisye om koyweyisyet oko potanet, sukuñet awanante kosopet nyimwoñ.
- <sup>13</sup>Omnye mite Yiyintet nkit kwiysisyi om wule omite akwek, sukuñet kuwecak ocömisye onnkoywey arup nhalkeyi ce njerece neto.
- <sup>14</sup>Oyiye kiy ake tokol nye puryo kot onjunyonyi nto otinteni.
- <sup>15</sup>Sukuñet oporukey oyiku piko ce tililec ce puryo kot kuponto lelis, kuyu lekopak Yiyintet ce toponec ce minye koret nyepo piko ce kiwuryo ce mosotin.
- <sup>16</sup>Mosokoci akwek cekto lokoywek cepo sponto. Ye kayiy kuyunyoto mosonyoru ani nyolyontet nye kosilekey om wule omite akwek om pesyetap Kristo, omnye mosukupor kule kipuryo kot kupotyö püc pate titiret nyimwani oko yisyonutek tokol ce kyayiy.



<sup>17</sup>Koyenet nyimwakwek kunye korosyontet nye cikocini Yiyintet, kunyo muce pesyet ake kot kacitata korotik cikwani sukutosyi kuwoyit korosyontet nyimwoŋ. Ye keyakay kuyunyoto mosañerec koromun wanak oko akwek tokol.

<sup>18</sup>Kunyo misyini añerec mpo akwek tokol wanak oko ani.

<sup>19</sup>Asoti ani kule ye kacäm Mokoryontet Yesu Kristo, mosoyoku Timosewo kuco lakwar wule omite akwek. Amöce kule kutitiro lokoywek ce kwone wule omite akwek.

<sup>20</sup>Timosewo pate nye sote ñalek ce karkey oko cikwani, oñkusotok akwek.

<sup>21</sup>Sote ci ake tokol tukuk ce nöme soponto nyenyi nkit pate, ntene puryo kot kusote yisyetap Yesu Kristo.

<sup>22</sup>Kunyo oñket akwek nkit latik ce ponto Timosewo. Oñket yisyet nye kikiyi acek tukway kuyu werit oko kwan. Kikiyisye tukway cemwaytate lokoywek ce toponec.

<sup>23</sup>Asoti kule mosoyoku ani neto kuco wulo omite akwek ye konket wule mosukupeta ñalek cikwani nkit.

<sup>24</sup>Kunyo okenekey Mokoryontet kule mosamuc ani nkit aco lakwar okoy wule omite akwek.

<sup>25</sup>Kwasot kule roke oyoku yeyanyo Epafrotito kuketkey wulo omite akwek. Neto kunye kiyokintet nyimwakwek nye kikalya ani koromun. Kiyisye ceporye yisyet kukolyo ani.

<sup>26</sup>Möce neto kule nto akäsak akwek, kunyo kukusot koromun omnye kyolim akwek kule kikumnyan.

<sup>27</sup>Kikumnyan manta nye kikirik kume ntene kukalya Yiyintet. Kipuryo kot kukalya Yiyintet neto nkit pate, ntene kikalya mpo ani kusop neto omnye kinumuneno lokik ce cañ.

<sup>28</sup>Kunyo amöce koromun kule oyoku neto kuco wulo omite akwek sukuñet añerec akwek ye kokäs neto oñkupok lokik cikwani ce kwoponte.

<sup>29</sup>Oñrekyi neto om ñerekwek tokol kuyu yeya om Mokoryontet. Möce kule ayweyi akwek piko tokol ce kerkey oko neto.

<sup>30</sup>Omnye kicilile yosic kume om yisyet nyepo Kristo, kikoyito soponto nyenyi sukuñet kukalya ani om kaynamwakwek.

### Filipik 3

<sup>1</sup>Kunyo mpo yeya, ñalek ce owoñnte ani kucu kule, kante kukonok Mokoryontet akwek ñerekwek ce cañ, Puryo kot kuyuye moketyikey ñalek ce kyosil ikye, mosukutosyi kukalyak opur topon.

<sup>2</sup>Oripkey piko ce yiye ñalek ce miyotec, ñokica kuce piko ce simncini kule cewon porto nyepo sañ.



- <sup>3</sup>Omnye ciku acek piko ce kicewonec wonset nyepo manta, omnye cesoye Yiyintet om swamet nyepo Muyet Nyetilil oṅnkyesilekey pate soponto nye ceponte om Kristo. Puryo kot cikenekey acek mpo kisic wonset oko sokwonutek.
- <sup>4</sup>Ye kekenekey piko wonset oko sokwonutek, oṅnkusot kule cimuce cisopec ye karup ntarastinecutecu, kuporukey kule opēli ani cekto om ṅalecutecu.
- <sup>5</sup>Omnye kicewona ani ye kyoponte pesyosyek sisit pate, oyiku Isroloyin sikwo, nyepo kotap Penyamin, oyiku Puraniyantet sikwo. Oyiku Farasayantet nyepo manta kuyu wulo ceriptoy ntarastinek.
- <sup>6</sup>Kunyo kyoyiku nyikan koromun nye kyotoṅonyi pikap Yiyintet. Kyoyiku ci nyepo manta nye kipuryo kot oponte lelis omnye kyoripe ntarastinek tokol.
- <sup>7</sup>Ntene osute ani yawut tukuco tokol kuyu tukun ce puryo kot kuponto latik omnye kyoyentyi Kristo.
- <sup>8</sup>Puryo kot ku tukuk ceyucoto pate, ntene asute kule puryo kot kuponto latik tukuk alake tokol, nye pēlisiyi pate kuye konket Yesu Kristo Mokoryontenyu. Kyawirte tukuk oko toponiyet nye ponto tukucoto tokol. Kyosut kukerkeyitu tukuk tokol tutwek sukuṅet onyuru Kristo.
- <sup>9</sup>Oṅnkoyomekey ani oko neto ciku akenke. Kunyo kimo oponte yec toponiyet nye nyimwani nkit nye kerkey oko nyo cenyuru ye cerupe ntarastinek. Oponte ani yawut toponiyet nyepo manta nye cekonu kupunune koyenet om Kristo. Toponiyet nyoto kunye cone wule mite Yiyintet nye ciyoyeke koyenet.
- <sup>10</sup>Dolyontet nye amocē ani pate ku kule oṅnket Kristo oṅnkonket swamet nyepo kotutunetap met nyenyi, oṅnkyeyemnte tukway toṅoṅutek ceci oṅnkakerkeyitukey ani oko neto om met nyenyi.
- <sup>11</sup>Oṅnketi mpo kule mosiciṅeta otutune met oṅnkonyoru soponto.
- <sup>12</sup>Puryo mpo kot osutekey ani kule kwayitite ṅalecu tokol, nto mpo kule kyonyolu owoṅnkyi. Ntene amite otosyinikey asyeme kule anyoru ṅalecu omnye kisuto keny Kristo oyiku nyenyi.
- <sup>13</sup>Mpo yeya, oṅnket kule tompo kot opunte wule mite ṅalecu, ntene ṅolyontet nye oyiye kunyi, amöce ayutye ṅalek ce kyopokokyi let oṅnkasyem oyiyisye sukuṅet anyoru tukuk ce mite tay.
- <sup>14</sup>Kunyo amite olopoti otokynikey aret nyoto saṅet apēlisye anyoru kokotutyet nyepo soponto nyepo torot nyo konu Yiyintet kupunune wule mite Yesu Kristo.
- <sup>15</sup>Möce cisoti kuyunyitenyi acek co kicenerye ciku Kristayek. Ntene ye ponto piko alake om akwek kasoteywek ce pciyotin, mosukuporwok akwek Yiyintet topon.
- <sup>16</sup>Kunyo nka kot kuyunyoto, kuroke cetosyikey cipe tay cerupe ntarastinek cetecu kicerup acek kuceke keny okoy kunyi.





<sup>17</sup>Mpo yeya, asyem akwek tokol opur kuyu wule ayunte ani. Kiciporwok aret nyepo manta, kunyo möce olimnci piko co rupe aret nyo kiciporwok.

<sup>18</sup>Kwomwowok ani akwek ñalecutecu aret ce cañ, kunyo otosyini omwowok aponte lokik. Mite piko ce cañ ce kokopur kopurto nye miyat kwek punik cepo murtowontet nye kimeci Kristo.

<sup>19</sup>Kunyo mosukowoñnkyi picoto kwaranta sponwek cikwa om wule mite mata nye momise. Omnye soye picoto corokyinotet nyepo porwonik cikwa. Silekey cek tukuk ce kotosutyini kolilonis. Sote cekto pate tukuk cepo koroni.

<sup>20</sup>Ntene ciku acek piko cepo koret nyepo torot. Kunyo cemite cekeni Mokoryontet Yesu Kristo nye mosukucone torot cokusopec.

<sup>21</sup>Mosukuwec neto porwonikyacek ce kuskus kukerkeyitu oko porto nyenyi nye ponto woyinto. Mosukwiye neto ñalecu tokol om swamet nye yiyisyeye wece tukuk tokol cepo koret.

## Filipik 4

<sup>1</sup>Kunyo mpo yeya, ocömok ani akwek koromun, oñkomöce kule nto akäsak. Oñereco ani akwek koromun, kunyo oyiku pelutyet nyimwani nye poru yisyet nyimwani. Mpo yeya, möce oyiyisyeye topon om sponwekwok om wule mite Mokoryontet.

<sup>2</sup>Osomok ani akwek Ewotia oko Suntike kule roke asat oñkocomncine ñalek cikwok kuyu pic ce tupco om Kristo.

<sup>3</sup>Mpenyi corwemwani nyepo manta nye kicintosi tukway, amöce ani kule kalye nyi koruco, omnye kiciyisyeye acek oko cekto yisyet nyewo koromun cemwayte lokoywek ce toponec wanak oko Klement, oko piko tokol ce kicesil kaynokwa kitaput nyepo soponto.

<sup>4</sup>Roke añerec akwek okokoy om sponwek cikwok om wule mite Mokoryontet. Kunyo otosyini omwowu kule, añerec!


<sup>5</sup>Oporci piko tokol kule oyiku akwek toloyec. Karik kucu Mokoryontet.

<sup>6</sup>Monte cisot kiy ake tokol, ntene om somutek cikwok tokol ye omite osome Yiyintet kiy ake tokol nye omöce, kumöce osome okokoy om mukuleyto nye kostoyisyi.

<sup>7</sup>Mosukurip kalyet nyepo Yiyintet mukuleywekwok oko kasoteywekwok om Yesu Kristo. Kalyet nyoto kunye puryo kot komuce kunket kasoteywek cepo piko.

<sup>8</sup>Mpo yeya, ñalek cepo letut kucu, orip kasoteywek cikwok om ñalek cepo manta, oko cepo sikonotet, oko ce rototin, oko ce tililec, oko ce toponec, oko cepo koyweyisyet.

<sup>9</sup>Oyiyisyeye ñalek co kyolim oñkokäs akwek oyiye ani, oko konetisyet oko yisyonutek ce kyonket akwek om wule amite ani. Kunyo mosopurte akwek kalyet nyo konec acek Yiyintet.



- 10**Oponte ani ñerekwek ce cañ koromun om soponto nyimwani, om wule mite Mokoryontet! Omnye om letutap pesyosyek ce cañ, kwacec akwek yawut akalya ani. Puryo kot omwowu kule kikyotaya nye mokolyo, ntene omnye kipuryo kot oponte poroyinto.
- 11**Oñnkupuryo yec kot omwowu ani ñalecu kuyunyi omnye asoti kule kicetaya, omnye kyanetkey wule opurtoy ani kwani nkit.
- 12**Oñnket wule mopurte ye moponte tukuk ce yeme oko ye oponte tukuk ce yeme. Kyanetkey ani ñalecu sukuñet amuc apur kuyu ci nye yemo kiy tokol, mpo ye koyomisye okoy opiyony nto mpo ye monoyomisye okoy opiyony, nto ye komokoren nto mpo ye kapanan.
- 13**Amuci amukte wuyinto ake tokol om swamet nye kono ani Kristo.
- 14**Ntene kyayiy akwek topon akalya ani om toñonutekwani.
- 15**Oñnket akwek Filipik kule om pesyosyek co kipo tay yo kyomwoytoy ani lokoywek ce toponec yo kyocone Maketoniya kwakwek nkit om pikap Yiyintet ce kikalya kukono pesanik ce kyoyiyisye.
- 16**Mpo ye kyomite Sesolonika, kyosutwo ani akwek yoto kokolyoyisyet nyepo pesanik aret oyeny.
- 17**Puryo kot amöce kule anyoru kokotutek, ntene amöce pate kule akäs latik ce kotosyikey om wule omite akwek.
- 18**Kunyo aponte ani yawut tukuk tokol ce yemo kusirte ce amöce. Kuyema topon yawut tukuk omnye kwonyoru kokotutewok ce kwokonu akwek ce kusutu Epafrotito. Kerkey kokotutecu oko korosek ce poñu topon ce puntoy wule mite Yiyintet oñnkuñerec neto.
- 19**Kunyo Yiyintemwani om Mokoryontinyi nyewo koromun nye mosukukonok akwek tukuk tokol ce omöce kupunte wule mite Yesu Kristo.
- 20**Kopurune Woyinto wule mite Papanyo Yiyintet okokoy oko okokoy - Yunyoto.
- 21**Asupay pikap Yiyintet tokol ce kipoyit Yesu Kristo. Kesupayak akwek mpo yeya cepo wuli ce cepontekey oko ani.
- 22**Kesupayak akwek pikap Yiyintet tokol ce mite wuli, ntene kupëlis piko ce mitowune kaytap Kinko nyewo.
- 23**Kunyo opurte akwek tokol poypoyetap Mokoryontet Yesu Kristo.



## Kolosayek

### Kolosayek 1

- <sup>1</sup>Cone parwani wule amite ani Paulo nye kikwey Yiyintet kwek kiyokintetap Yesu Kristo. Oṅnkucone wule mite yeyanyo Timosewo.
- <sup>2</sup>Cesilyini pikap Yiyintet mpo yeya ce cikenekeny om Kristo cepo koretap Kolosaya. Kante kukonok Yiyintet Papanyo poypoyet oko kalyet.
- <sup>3</sup>Cikostoy acek okokoy Yiyintet kwanitap Mokoryonteny Yesu Kristo ye ce mite cesomwok.
- <sup>4</sup>Omnye kicelim koyenet nye oponte akwek om wule mite Yesu oko cömisyet nye ocöme piko tokol cepo Yiyintet.
- <sup>5</sup>Kwone ṅalecutecu tukway kokenotet nyo kicekonorwok akwek om torot. Kokonotet nyoto kunye po ṅalek cepo manta cepo lokoywek ce toponec co kyolim akwek kunyo.
- <sup>6</sup>Mite lokoywecoto toponec kukonu kupeyok oṅnkutosyinikey om koret tokol kuyu wulo yunto om wule mite akwek, kuceke pesyet nyepo tay nyo kyolime poypoyetap Yiyintet oṅnkonket ṅalecato kuyu ṅalek cepo manta.
- <sup>7</sup>Mutworintet nye kerkey oko acek Epafra oṅnku cāmanenyacek kunye kinetak akwek ṅaleca. Neto kunye cito nye kikoyen nye yicin yisyet Kristo om kaynentyacek.
- <sup>8</sup>Kico neto cokumwowec acek cömisyet nye oponte akwek nyo kikonok Muyet Nyetilil.
- <sup>9</sup>Kunyo, kuceke pesyet nye kicelim acek ṅaleca, munakyaste mpo pesyo akenke nye mocesomwok. Cesome acek kule roke oṅnket akwek topon cömisyet nyepo Yiyintet oṅnkonyoru ṅomnonet om mukuleywekwok orit saṅet oṅnket ṅalek tokol ce konu Muyet Nyetilil.
- <sup>10</sup>Cesome kule otosyikey akwek opurte okokoy soponto nye ponto latik om wule mite Yiyintet, oṅnkeri akwek neto koromun, saṅet ayiy yisonutek wok tokol cepo toponiyet, oṅnkotosyikey anetkey ṅalek ce caṅ cepo Yiyintet.
- <sup>11</sup>Cesome kule roko kukwilak akwek Yiyintet om woyinto nyepo swamenyi nyewo, sukuṅet amuc otitir om swama oṅnkomuytoci oṅnkoṅnerec om kiy ake tokol nye kacontyok.
- <sup>12</sup>Oṅnkokaste Papa Yiyintet nye kikonok ayam onyuru otepto nyimwoṅ om koret nyepo lakweyinto om wule mite pikyi cetililec.
- <sup>13</sup>Omnye neto kunye kisorunenec acek wule mite poytoyisyyet nyepo menonet, oṅnkukwerwec cekwa okoy wule mite poytoyisyyet nyepo Werinyi Camanet.
- <sup>14</sup>Kunyo Werit nye kikalyec acek miyotyonyiky oṅnkutyaktec.
- <sup>15</sup>Kristo kunye tonto nye toku nye kerkey oko Yiyintet nyo puryo kot kutoku. Neto kunye Werit poretyet nyewo nye poytoy tukuk tokol ce kicitany om koret tokol.



- <sup>16</sup>Om wule mite neto kunye kitany Yiyintet tukuk tokol ce mite koret torot oko koret ñony, cetoku oko cemotoku wanak oko swamet nyepo oyik oko poytoyik oko kamukeywek. Kitany Yiyintet koret tokol kupunte wule mite neto, oñkwek nyenyi.
- <sup>17</sup>Kimite neto om towunot kutompo kot citany kiy ake tokol, neto nye nöme kuyomo kwek kiy akenke koret tokol.
- <sup>18</sup>Neto metitap porto, nto porto nyoto ku pikap Yiyintet ce kikoyomekey. Neto kunye lukune soponto nyepo porto, sukuñet kopoyit tay om tukuk tokol.
- <sup>19</sup>Yiyintet nkit kunye kicäm oñnkukwey kule mokunyor Werit tonto nyepo Yiyintet.
- <sup>20</sup>Kunyo kicäm Yiyintet kupunte wule mite Werit, sukuñet kuket kuwec koret kucu wule mite neto. Kisut Yiyintet kalyet om metap Werinyi nyo kimeci murtowontet, kunyo kiwec tukuk tokol kukwa yec wule mite neto. Tukucoto tokol kuce mite koret tokol torot oko ñony.
- <sup>21</sup>Kyomitowune akwek ikye wule low om wule mite Yiyintet, kunyo kikyawecekey akwek oyiku punik cepo Yiyintet om tukuk cemiyotec ce kyaiy oñnkasot.
- <sup>22</sup>Kunyo kikweyak akwek yawut Yiyintet aketitekey wule mite neto kupunte metap porto nyepo Werinyi, nye kiceyi, oñnkume sukuñet kuwecak akwek otillitu oñnkotoponitu nye komoponte miyotyö mpo kisic.
- <sup>23</sup>Kunyo misyini otosyikey om koyenet nye kwilat nyepo manta nyo kyonyoru, monte kyastekey ciluclucak kot akwane kokenotet nyo kyonyoru nyo kyolim akwek lokoywek ce toponec. Lokoywecutecu toponec kuce kicemwaytate koret tokol kumukul. Kunyo ani Paulo kunye kicekweya oyiku mutworintet nyepo ñalecu.
- <sup>24</sup>Kunyo oyiku ani yawut ñerekat om toñonutekwani. Omnye om toñonutek cikwani cepo porto nyimwani kuye okolyoy awañnte toñonutek cepo Kristo ce kinet kupo porto nyenyi, coto ku luketap Yiyintet.
- <sup>25</sup>Kunyo kikweya Yiyintet oyiku mutworintet nyepo pikap Yiyintet. Kikono ayiy yisyoni kupo toponiyet nyimwakwek. Yisyet nyoto kunye omwoytoti topon lokoywekyi.
- <sup>26</sup>Ñalecutecu kuce kikiwuñe Yiyintet piko cepo pinutek tokol kuwany kenysisyek ce cañ ntene kuñon om letut kuporci pikyi.
- <sup>27</sup>Omnye kikwiyy Yiyintet kuyunyitenyi kule oporci pikyi ñalekyi ce wuñotin, ñalecutecu kuce po mokoryonti oko woyinto ce mokyini Yiyintet piko tokol, nto ñalecoto kucu kule mitowune Kristo wule omite akwek orit, nye poru kule mosonyoru akwek woyintotap Yiyintet.
- <sup>28</sup>Kunyo cemwocini acek piko tokol ñalek cepo Kristo. Cisowu oñnkyinet ci ake tokol om ñomnonet ake tokol nye mukoktos, sukuñet cekweru ci ake tokol kucu wule mite Yiyintet. Kukokwek cito nye kikil nye ponto koyomotet oko Kristo.
- <sup>29</sup>Otitiri ani añnkatañany ye sukwiyyokis ñalecutecu, oyiysisye swamet nyewo nye konu Kristo nye mite kwiyisi om wule amite ani.



## Kolosayek 2

- <sup>1</sup>Kunyo akany omwWowok wule kyotitirte ani oyiwok akwek yisyet oᅅnkoyici piko ce mite Laotisea oko mpo piko alak tokol ce tompo kot kukäsa ani om konyekwa.
- <sup>2</sup>Ayiye kuyunyoto sukuᅅet kutosyikey kutitir mukuleywekwa ce toponec oᅅnkuyomokey cekto kwek akenke om cömisyet, oᅅnkunket mokoryontit tokol nye konu ᅅomnonet nyepo ᅅaleca, oᅅnkunyor ᅅalekap Yiyintet ce woᅅotin, nyoto ku Kristo.
- <sup>3</sup>Kristo kunye Funkuwet nye yote wule kiwuᅅekey Mokoryontit tokol nyepo ᅅomnonet oko kokenotetap Yiyintet.
- <sup>4</sup>KomwWowok ani akwek ᅅalecu sukuᅅet mente kot tokuperperak citake om ᅅalek alak cepo tintenot nyepo mwiynan nka kot ku ᅅalek ce toponec ceyune.
- <sup>5</sup>Omnye nka kot mopontekey ani oko akwek om porto ntene cepontekey oko akwek om kasoteywek. Kunyo ayiku ᅅerekat koromun akäs kopurto nye kwilat oko koyenet nye oponte akwek om wule mite Kristo.
- <sup>6</sup>Kuyu wulo kyocäm akwek Yesu Kristo kwek Mokoryontet, kunyo misyini oyomekey oko neto.
- <sup>7</sup>Opur kuyu pic ce kwilotin tikityet cekwok om wule mite neto; atec kuneryo sponwek cikwok om wule mite neto, oᅅnkokwilokisye okokoy om koyenet nyimwoᅅ kuyu wule kicinetitak, oᅅnkotosyikey akaste okokoy Yiyintet nyewo.
- <sup>8</sup>Misyini oripkey akäs kule mente kot kumasak citake om konetisyet nyepo ᅅalek cepo mwiynan ce moponto latik ce kwone konetisyet nye kirup piko kuceke kenye, oko ᅅomnonetap oyik cepo koret, ce puryo kot kukwone wule mite Kristo nkit.
- <sup>9</sup>Omnye mitowune soponto tokol nyepo Yiyintet wule mite Kristo kuyu cito.
- <sup>10</sup>Kunyo kicekonok akwek soponto tokol, oᅅnkyiyomok oyiku akenke oko neto. Neto kunye nyewo nye poytoy poytoyik oko kamukeywek alak tokol.
- <sup>11</sup>Yo kyoyomntosikey akwek oko neto kuye yoto ye kicewonok akwek. Ntene puryo kot ku wonset nyo wone piko porto, ntene wonset nyepo Kristo nkit, nyoto kunye soronet nye kicityacec cekwane swamet nyepo porto nyi ponto miyotyeyet.
- <sup>12</sup>Omnye yo kicepotisonok akwek kuye kicemuyok yoto oko Kristo. Nto patisanet yec kuye kyotutune met oko Kristo kupunte koyenet nyimwoᅅ om swamet nyepo Yiyintet nye yiyisi nye kiᅅet Yesu Kristo kotutune met.
- <sup>13</sup>Kikipok ikye sponwek cikwok om wule mite Yiyintet om miyotyonyik ce kyoponte, oko yec omnye kyoyiku akwek Lamek ce kyomite saᅅ om ntarastinek. Kunyo kikwerwok akwek yawut Yiyintet kwonyoru soponto kuyu Kristo! Kikukalyec Yiyintet acek miyotyonyiko tokol.
- <sup>14</sup>Kupël neto ntarastinek, oᅅnkunum wule kicesil pesenutek cicacek ce miyotec, oᅅnkukwertoci murtowontet kupok.



<sup>15</sup>Nteye kimate Yesu Murtowontet, kutyacekey nkit kucone wule mite poytoyisyet nyepo oyik oko kamukeywek ce kinöme neto. Kipël neto oyik oñnkunam kuyu sira oñnkuwesetot kupartat kukäs piko tokol.

<sup>16</sup>Kunyo puryo kot kurok kwiwok akwek citake ntarastinek ce nöme omik ce moyam, nto yisyet, nto ce nöme pesyosyek ce tililec, nto ce nöme sakwet nyepo arawet nye kolel, nto ce nöme pesyetap Sapat.

<sup>17</sup>Daleca tokol kuce rurwet nyepo ñalek ce mosukukwa, nto ñalek cepo manta ku Kristo.

<sup>18</sup>Monte kot acäm kot kumutwok musanku citake tokol nye sutekey kule oyiku nyewo opëlisye, omnye köse neto ñoñutok ce kweyotin. Kusyem kukerekey ñalek cepo mwiynan oko soyutek cepo malaykanik. Kwontos cicoto pöc pate om kasoteywek cepo koret.

<sup>19</sup>Kikwasta neto nye kimo kurupe Kristo nye metit nye poytoy oñnkupoye porto tokol oñnkotuyo om wule kicituye om melilok oñnkuner kuyu wulo moktoy Yiyintet kule kuner.

<sup>20</sup>Kyopoku akwek oko Kristo, kicityakenak poytoyisyet nyepo oyik cepo koret! Kunyo omne sopur akwek kuyunye opoye koroni? Omne sacäm akwek cirwokwok kule,

<sup>21</sup>“Monte kot anäm kiya? Monte kot acemcem kiya? Monte kot otiny tukuk alak?”

<sup>22</sup>Puryo kot kuponto tukuco latik ye kokyiyisye. Ntarastinecoto kuce kikwiye oñnkunet cito.

<sup>23</sup>Porukey manta kuyunye ponto ñaleca ñomnon om ñalek ceponto ce ceripekey oko muyotet nyepo kopreperisyet nyepo portap cito. Ntene oñnkupuryo kot kuponto latik cepo manta ce muce kot kurip tukuk ce möce porto.

### **Kolosayek 3**

<sup>1</sup>Kyotutune met akwek oko Kristo, kunyo misyini asat mukuleywek cikwok kukäs tukuk ce mite torot wule mite Kristo kukepure ñecerenyi om yewutap tay nyepo Yiyintet.

<sup>2</sup>Okoci kukäs pate kasoteywek cikwok tukuk ce mite torot, ntene monte cekäs tukuk ce mite koret ñony.

<sup>3</sup>Omnye kyopoku akwek, kunyo kiwuñokis saponwek cikwok oko Kristo om wule mite Yiyintet.

<sup>4</sup>Kristo kunye soponto nyimwakwek nyepo manta, nteye cony kuporukey neto, mpo akwek mosoporukey oko neto oñnkonyoru woyinto nyenyi!

<sup>5</sup>Kunyo misyini apakäc corokyinotet nyepo koret nyo mite kwiysisyi om wule omite akwek, kuyu sakwayanat, simnyo, corokyinot nye samis, oko sayet nye miyat (Omnye sayet nye miyat kunye kacesay kerkeyik)



- <sup>6</sup>Omnye mosukukwontyi nerekwekap Yiyintet piko co puryo kot kuyweye cek neto om tukuk ceyucutecu.
- <sup>7</sup>Kyomite akwek ikye pesyosyek alak opurtoy soponto nye yunyoto oko piko alak ce kyominye tokol.
- <sup>8</sup>Kunyo oyiku akwek yawut Kristayek, misyini ayaste tukucu tokol, kuyu nerekwek, nyerunotet, kowotyontit, oko mwiynanet, oko ñalek ce somis ce kwone kutuwak cikwok.
- <sup>9</sup>Monte ciperperkey akwek kwakwek nkit om ñal cepo mwiynan, omnye kyowirte akwek soponto nyo kipo kenya kupetakey kopurto nye miyat.
- <sup>10</sup>Kunyo kyolac soponto nyel. Nyoto kunye cito nye mite cilelite okokoy sukuñet oñknet Yiyintet nyo kitonyok akwek akerkeyitu oko neto.
- <sup>11</sup>Om soponto nyitenyi lel kunye puryo kot kumite pciyatet om wule mite Yutoyintet oko Kirikintet, nto cito nye wonat oko cito nye mawonat, nto cito nye lomin, nto piko ce Lamek alak tokol, nto ci nye mutworin oko cito nye momutworin, ntene Kristo kunye po ñalek tokol, oñnkumitowune kiy ake tokol wule mite Kristo.
- <sup>12</sup>Kunyo ye kikweyak akwek Yiyintet oyiku pikyi ce cämanik, kumisyini opurte moyet oko mukuleyto nye kolyoyisyi, oko tolosyet oko poypoyet oko muytocinotet.
- <sup>13</sup>Okolyoykey akwek nkit, nteye ponto ci ake tokol om akwek ñolyo nye ñunye om wule mite citake, kumisyini kumuyta oñnkukalya nyin, kuyu wulo kikokalyak akwek Mokoryontet.
- <sup>14</sup>Ntene ce pëlisyi om ñalecu tokol ku cömisyet; Omnye cömisyet kunye kwile kuyomntos sukuñet kutoponitu tukuk tokol kwek akenke.
- <sup>15</sup>Kalyet nye konu Kristo kunye roke kwek ketintet om mukuleywekwok orit. Kikurok akwek Yiyintet sukuñet onyoro kalyet nyitenyi soyiku pic ce kikwek porto akenke, kunyo okostoyisyi.
- <sup>16</sup>Lokoywekap Kristo wanak oko mokoryontit tokol nye ponto kuce roke kopurune mukuleywekwok orit. Onetisye oñnkowokyikey akwek nkit om ñomnonet tokol. Otumnci Yiyintet tumwonik cepo kakastayet oko tumwonik cepo ñerekwek oko tumwonik cetililec, okostoy Yiyintet om mukuleywekwok orit.
- <sup>17</sup>Kunyo tukuk tokol ce oyiye akwek, nto ñalek ce oñololi; kuce roke oyiye om kaynetap Mokoryontet Yesu ye omite akwek okostoy Yiyintet Papa kupunte wule mite Yesu.
- <sup>18</sup>Misyini aywey akwek koruk sanikwok, omnye roke ayiy kuyunyoto kuyu kristayek.
- <sup>19</sup>Misyini acäm moronik korukwok, monte cewuse.
- <sup>20</sup>Akwek lekok, yisyemwakwek kuyu Kristayek aywey okokoy mpo kon oko mpo komet, omnye ñerece ñalek ceyucoto Yiyintet.





<sup>21</sup>Akwek poyik oko cepyosok, monte cewuse lekokwok, omnye sutyini ñalek ceyucoto kumuyo pate.

<sup>22</sup>Akwek mutworik, aywey mokorenikwok cepo koret om ñalek tokol, monte oyiyisiye pate ye mite cek kukosök sukuñet kukastak.

<sup>23</sup>Ntene oyiye kiy ake tokol oyicini Mokoryontet kukowoñkyi om mukuleywekwok tokol ntene nye puryo kot oyicini piko.

<sup>24</sup>Misyini oñket kule mosukuyokwok akwek Mokoryontet, mosonyoru musyaret nye kikonorci neto pikyi, omnye Kristo kunye Mokoryontet nye oyicini akwek yisyet.

<sup>25</sup>Nto ci ake tokol nye yiye ñalek ce miyotec, nka kot ku cito nye yune, mosicikoci nyoto musyaret nyepo tukuk ce miyotec ce kikwiye; omnye yoyece Yiyintet piko tokol.

#### **Kolosayek 4**

<sup>1</sup>Akwek mokorenik, opoytoy mutworikwok topon oñkoyoyeci topon, oñketi kule oponte mpo akwek Mokoryontet nye mite torot.

<sup>2</sup>Otosyikey osome okokoy, oñkoripkey ye okostoy Yiyintet.

<sup>3</sup>Nteye omite osome, osomwec mpo acek sukuñet kukonec Yiyintet kuyotwec kurket cenyoru poroyinto cemwaytate lokoywek ce wuñotin cepo Kristo, omnye ñalecato ce kisokyo ani sicekerta mopusi.

<sup>4</sup>Kunyo osomwo sañet añalal ñalek ce toku om aret nye topon kuyu wule omuktoy.

<sup>5</sup>Oñomekitu koromun om ñalek ye oñololyini piko co tompo kot kucömis co tokumite sañ, oyiyisiye topon poroyinto nye oponte.

<sup>6</sup>Möce kutoponit ñelyepta nyimwoñ oñkoñerece piko, oñkumöce oñket ñalek cepo manta ye owekyini citake tokol ñolyo.

<sup>7</sup>Yeyanyo nye cämanet Tukiko nye kikoyen nye yiyisiye oñku mutworintet nye kerkey oko acek om yisyetap Mokoryontet nye mosukuco cokwumwowok akwek ñalek tokol ce nömo ani.

<sup>8</sup>Kunye koyoku kuco wule omite akwek, kule sukuñet cokuñerecak kumwowok ñalek cekwone wule ce mite acek oko wule cipurtoy acek tokol.

<sup>9</sup>Contoykey neto Onesimo cito nyinyacek nye kokoyen oñku yeyanyo nye ceman nye cone koremwoñ. Mosukukwa cek oñku kwokumwowok ñalek tokol cekwone wuli cemite acek.

<sup>10</sup>Kesupayak akwek Aristariko nye cepontekey acek tukway om mopusi oko Marko nye tupco oko Parnapa.

<sup>11</sup>Oko Yoswa nye cekure kaynet ake Yusto (Kunyo kyolim akwek ñalek cepo Marko, roke atoroc oñerekyi neto ye kaco wule omite akwek) Picutecu pate kuce Yutayek ce



kikwek Kristayek ce mite kwiysisi oko ani yisyet nyepo poytosyisyetap Yiyintet. Kukukalya ani cekto koromun.

<sup>12</sup>Kesupayak akwek mpo Epafra nye cito akenke nyepo koremwoŋ oŋnku mutworintet nyepo Yesu Kristo. Neto nye somwok akwek okokoy nye memunye kule saŋet okwilokisye oyiku Kristayek ce kwilotin ce kikoywey cömisyet tokol nyepo Yiyintet.

<sup>13</sup>Omwowok ani nkit yisyet nyewo nye yiye neto om kaynamwakwek oko mpo pikap Laotisea oko piko cepo Yerapoli.

<sup>14</sup>Kesupayak akwek Luka cepsakityantet nye cämanet nyinyacek oko Tema.

<sup>15</sup>Osupoywec koromun mpo yeyanyo ce mite Laotisea oko yeya Nimfa oko pikap Yiyintet ce mite kanyi.

<sup>16</sup>Ye kacesumonwok akwek parwani okoyite wocesumontyi pikap Yiyintet cepo Laotisea, nto kapok oyiytekey mpo akwek cesumonwok parwet nye mokucone Loatisea.

<sup>17</sup>Omwoci Arkipo kule, “Möce käs kule keyiy okoy wany topon yisyetap Mokoryontet nyo kicekonij.”

<sup>18</sup>Yewumwani nkit nye kosile ŋalekyu: Ani Paulo nye kasupayak akwek. Kunyo Monte ceyutye kule amite ani Mopusi. Osomwok kule opurte akwek poypoyetap Yiyintet.



## 1 Sesaloniyeke

### 1 Sesaloniyeke 1

<sup>1</sup>Cone parwani wule ce mite acek Paulo oko Silfano oko Timosewo. Cesilwok akwek pikap Yiyintet ce mite Sesolonika. Piko coto kuce po Papa Yiyintet oko Mokoryontet Yesu Kristo. Kante opurte akwek poyoyet oko kalyet.

<sup>2</sup>Cikostoy acek akokoy Yiyintet om wule omite akwek tokol, oṅkyeṅalalenak okokoy ye ce mite cesome.

<sup>3</sup>Omnye cisoti acek om taytap Yiyintet oṅku Papa; kuyu wulo oyiyisye akwek koyenet nyimwoṅ kutok oko kuyu wulo konok cömisyet nyimwoṅ oyiyisye om swamet, oko kuyu wulo kwilat koromun cömisyet nyimwoṅ om wule mite Yesu Kristo.

<sup>4</sup>Mpo yeya, cinket acek kule cömok Yiyintet; kunyo kikweyak oyiku pikyi.

<sup>5</sup>Omnye kipuro kot cesutwok acek lokoywek ce toponec om ṅalek pate, ntene kicesutu mpo swamet oko Muyet Ntilil oko ṅomnonet tokol nyepo ṅalecato. Oṅket wule kicipurtoy acek yo kicepontekey oko akwek. Kicipur kuyunyoto kupo topiniyet nyimwakwek.

<sup>6</sup>Kyacec mpo akwek yoto opurte kopurto nye kerkey oko nyinyacek oko nyepo Mokoryontet. Nka kot kyonyuru yoto wuyinwek ce caṅ, ntene kyatoroc akwek lokoywek om ṅerekwek co konu Muyet Nyetilil.

<sup>7</sup>Yoto oporukey oyiku piko ce kekassenak piko tokol co kikoyen cepo Meketoniya oko Akaya.

<sup>8</sup>Omnye kipuryo kot ku ṅolyontetap lokoywek pate ce kyotaste celime Meketoniya, ntene kipunte koyenet nyimwoṅ ceṅalale om wulyo tokol. Kunyo puryo kot ceponte acek yec ṅolyontet ake nye mocemwowu.


<sup>9</sup>Dolole picoto nkit wule kyotoroktec acek akwek yo kicetorocec, oṅnkumwoy wule kyawektekey akwek ayaste kerkeyik oṅnkowekyikey wule mite Yiyintet. Sukuṅet oyici Yiyintet nye sopot yisye nyepo manta,

<sup>10</sup>oṅnkoken Werinyi nye mosukucone torot. Nyoto ku Yesu Kristo nyo kiṅet Yiyintet kotutune met, kunye kosopintet nye kisorwec om wule mite nerekwec cepo Yiyintet ce mosukukwa.

### 1 Sesaloniyeke 2

<sup>1</sup>Mpo yeya, oṅket akwek nkit kule kipuryo kot kupoyit püc pate rutoyenyacek yo kicekwoni wule omite akwek.

<sup>2</sup>Oṅket kule kikicitanyec acek kunyo oṅkyecupec om Filipi kutompo cepunu wule omite akwek om Sesolonika. Ntene kutitirec Yiyintenyoy okoy cemwowok lokoywek ce toponec cekwone wule mite neto, nka kot kimite piko ce caṅ ce kitoyisyi.



- <sup>3</sup>Puryo kot kumasat konetisyet nye kicinetak acek akwek, nto mpo ku kule ponto kosotey ce miyotec, nto mpo kule cesyeme ciperper ci ake tokol.
- <sup>4</sup>Ntene ce möce kule cejalal okokoy kuyu wule moktoy Yiyintet, omnye kikweyec onnkukonec lokoywek ce toponec. Puryo kot cesyeme kule ciñerec piko, ntene ce möce kule ciñerec Yiyintet nyo syeme mukuleywek cicacek.
- <sup>5</sup>Onnket akwek kupoyit manta kule, kipuryo kot cekwa wule omite akwek cesutu ñalek cepo kutit sañ pate, puryo mpo kot ciyiyisyey ñalek ce kicewunye kule cemöce pesanik, Yiyintet nye nkete coto.
- <sup>6</sup>Kipuryo kot cesyem kule cenyoru kakastayet nye cone wule mite ci ake tokol, kuyu nye cone wule omite akwek, nto mpo nye cone wule mite piko alake,
- <sup>7</sup>Nka kot kicimuci acek cemakenak akwek tukuk alak kuyu kiyokik cepo Kristo. Ntene kicetoloyitu yo kicepontekey akwek kuyu yeyo nye ripe lekokyi.
- <sup>8</sup>Kunyo kicecämak acek koromun, yoto okoy cekonok, puryo kot ku lokoywekap Yiyintet pate, ntene kicekonok mpo saponwek cicacek.
- <sup>9</sup>Mpo yeya, möce asot kupoyit manta kuyu wulo kiciyisyey acek cetitir! Kiciyisyey pet oko komoy sukuñet mente kot cesutyi nyikisin ci ake tokol om akwek, onnkurok yec cemwowok lokoywek ce toponec ce kwone wule mite Yiyintet.
- <sup>10</sup>Akwek kuce onnketi ñalecato onnkonket mpo Yiyintet nkit, kule kicipurte acek kapurto nyetilil nyepo manta nye kipuryo kot kupunto lelis om wule omite akwek co kyocömisyey.
- <sup>11</sup>Onnket wule kiceriptok acek akwek kuyu wulo riptoy kwan lekokyi.
- <sup>12</sup>Kicititirok, onnkyipaypayak onnkyesomwok kule opurte soponto nye ñerece Yiyintet nyo kikurok kwonyoru poytoyisyenyi oko wonyinto.
- <sup>13</sup>Mite ñolyontet ake nye cikostoy acek Yiyintet okokoy, nyoto kunyi kule, yo kiciporwok acek akwek ñolyontetap Yiyintet, olim yoto onnkoyen nye puryo kuyu ñolyo nyepo cito, ntene kuyu ñolyontetap Yiyintet. Kunyo yunyoto kupoyit manta, omnye mite Yiyintet kwiyyisyey om wule omite akwek co kyoyen.
- <sup>14</sup>Nto akwek mpo yeya, kyotañany toñonutek ce kerkey oko cepo pikap Yiyintet cepo Yuteya. Kuyu wule kitañany pikap koremwoñ, kunyo kitañany mpecek Yutayek,
- <sup>15</sup>co kipoköce Mokoryontet Yesu onnkupakäc workoyik onnkukwetec acek sañ. Puryo kot kuñerece piko coto Yiyintet, kunyo punik cekto cepo piko tokol.
- <sup>16</sup>Omnye kusyem kule cekerktec mente cemwoci Lamek wule mocisopto. Miyotyey nyitenyi nye kinyit miyotyonyik cikwa ce cañ ce kikwiyy cekto. Kunyo konyor cekto yawut om letut nerekwec cepo Yiyintet.
- <sup>17</sup>Mpo yeya, yu kowo cepakaktak acek akwek kumuniñ, kunyo nka kot puryo kot cekosekey om konyek, ntene kicepontekey oko akwek om kasoteywek, kicesyem koromun kule cekasenak yec konyek.



<sup>18</sup>Kicemöce kule ceketukey wule omite akwek. Kyasyem ani Paulo aret ce cañ kule aco wule omite akwek, ntene kukureka Setanit.

<sup>19</sup>Ntene akwek nkit, nye puryo kot ku piko alak, oyiku kokenotet nyinyacek. Kunyo om akwek nkit kuce cesilekey acek om taytap Mokoryontet Yesu Kristo ye kaco.

<sup>20</sup>Akwek kuce cesilekey oñnkoyiku ñerekwek cicacek cepo manta.

### 1 Sesalonyek 3

<sup>1</sup>Yoto yu kowo cekäs kule komocimuci tocemuytoci, cecäm kule cipur Asene kwacek nkit,

<sup>2</sup>oñkyyoku Timosewo yeyanyo nye kyyisyi acek tokol yiysyetap Yiyintet cemwoytoy lokoywek ce toponec cepo Kristo, sukuñet kuce cokotitirok oñnkukalyak koyenet nyimwoñ.

<sup>3</sup>Sukuñet mente kot kumasak ci ake tokol omnye konyoru toñoñutek coto. Oñket akwek nkit kule toñoñutek ce yucoto kuce tukuk ce poru cömisyet nyepo Yiyintet om wule cemite acek.

<sup>4</sup>Omnye yo kicepontekey, kicemwowok kutompo kot kupunto pasyosyek kule mosicitañanya, kunyo kukwiyokis yawut kuyunyoto.

<sup>5</sup>Kuyiyit nyoto sukuñet oyoku ani Timosewo, omnye kimomuci kot tomuytoci yec. Kyoyoku ani neto kule cokukäs wule yunto koyenet nyimwoñ. Kwomöce kule oñket kule titirot koyenet nyimwoñ kot kwamukte oyinot, nto pesyet ake kupoyit püc pate yisyet nye kikyiy acek.

<sup>6</sup>Kunyo kuweckey yawut Timosewo okoy wule ce mite acek kusutu lokoywek cekwone wule omite akwek cepo ñerekwek ce nöme koyenet oko cömisyet nyimwoñ. Kumwowec kule asotec acek akwek topon okokoy oñnkomöce koromun kule cekäsec kuyu wulo cemöce mpo acek kule cekäsak akwek.

<sup>7</sup>Mpo yeya, koyenet nyimwoñ kunye kwetitirec acek om wuyinwekyo oko toñoñutekyo tokol.

<sup>8</sup>Kunyo ponto soponto latik om wule cemite acek yawut ye kwokwilokisye akwek,

<sup>9</sup>Cimuci acek yawut cikaste Yiyintet om wule omite akwek. Cikostoy om ñerekwek ce ceponte om taytap Yiyintet kupo akwek.

<sup>10</sup>Cesome acek neto pet oko komoy om mukuleywekyo, kule sukuñet cekäsak akwek om konyekyo, sicekonok swamet nye omöce om koynet nyimwoñ.

<sup>11</sup>Yiyintenyö nkit oñnku Papa oko Mokoryontenyö Yesu, kunye roke kuyiytowec acek aret sukuñet cekwa wule omite akwek!

<sup>12</sup>Mokoryontet nkit kunye roke kukonok kutosyikey kuwoyit cömisyet nyimwakwek om wule omite akwek kwakwek nkit, oko wule mite piko tokol; kuyu cömisyet nye ceponte acek om wule omite akwek.



<sup>13</sup>Om aret nyeyunyoto kuye mosicekwil acek mukuleywek cikwok oṅnkonyolu opoyitu manta, oṅnkotililitu om taytap Yiyintenyō oṅnku Papa om pesyet nyo conī Mokoryontenyō Yesu wanak oko piko tokol ce kikwek pikyi.

## 1 Sesaloniyeḱ 4

<sup>1</sup>Mpo yenya, ḡolyontet nyepo letut kunyi kule, oṅnket kucone wule cemite acek wule yunto kopurto nye misyini cipurte sukuṅet kuṅerec Yiyintet. Ntene kapurto nyoto kunyo oponte akwek. Cesomok acek yawut koromun om kaynetap Mokoryontenyō Yesu kule otosyikey ayiy kupēlis.

<sup>2</sup>Omnye oṅnket konetisyet nyepo ḡalek co kicinetak acek akwek om kamukeywekap Mokoryontet Yesu.

<sup>3</sup>Kito nye möce Yiyintet kunyi kule, otillilitu nye puryo kot oponte sakwayanat mpo kisic.

<sup>4</sup>Möce ci ake tokol om akwek konket kule misyini komüt korket nyenyi om aret nye topon nyetilil,

<sup>5</sup>Nye puryo kot ku om aret nyepo corokyinotet nye miyat kuyu wulo yiytoy piko co puryo kot konket Yiyintet.

<sup>6</sup>Kunyo om ḡolyontoni, puryo kot kuroke kot kowurta nto mpo kot kumas citake yeyanyi. Kicemwowok acek ḡelyontoni ikye, kicisowok koromun kule mosukotaṅany Yiyintet piko ce yiye ḡalecutecu miyotec.

<sup>7</sup>Kipuryo kot kukurec acek Yiyintet kule sukuṅet cipurte yec soponto nyepo sakwayanatet, ntene möce kule cipurte soponto nyetilil.

<sup>8</sup>Kunyo ci ake tokol nye katay konetisyoni kunye kupryō kot kutay konetisyet nyepo cito, ntene kukatay cicoto Yiyintet nyo kikonok akwek Muyet Nyetilil.

<sup>9</sup>Puryō kot kuroke cesilwok ḡalek ce nöme cömisyet wule roke acämnte piko alak co kicömis. Kikonetak akwek Yiyintet wule roke acämntekey akwek kwakwek nkit.

<sup>10</sup>Kunyo kopurto nyeyunyoto omite akwek oporcini mpo yeya tokol cemite Meketoniya, kunye kopurto nyoto nye cesomok kule otosyikey kupēlis.

<sup>11</sup>Otosyikey opurte pate soponto nye topon oṅnkasot oyiyisye yewuniyeḱ cikwok sukuṅet onyōru pesanik cepo omik ce oyome kuyu wulo kikicemwowok acek kunyo.

<sup>12</sup>Om aret nyeyunyitenyi kuye kuyweyak piko ce puryo kot kucömis. Puryō kot kuroke okenekey citake tokol om tukuk ce omöce.

<sup>13</sup>Mpo yeya, cemöce acek kule oṅnket akwek ḡalek cepo manta ce nöme piko co kipok, sukuṅet monte cemuye kuyu wulo yunto piko co puryo kot kuponto kokenotet.

<sup>14</sup>Cecöme kule kime Yesu oṅnkotutune met; kunyo ciyeni kule mosukoṅet Yiyintet kotutune met piko co kipok kuyene Yesu.



<sup>15</sup>Konetisyetap Mokoryontet nyitenyi cemwowok kule, acek co cesoptosi om posyonoto cono Mokoryontet kuce cepeti tay cintoci piko co kipok.

<sup>16</sup>Mosukuco polotet nye ñetñete piko. Nyoto kunye kutit nyepo malayket nyewo nyo kontitap Yiyintet. Mosukurek Mokoryontet nkit kucone torot kuco ñony. Mosukunyosyo kuñetyo kotutune met piko co kipok kukicäm Kristo.

<sup>17</sup>Yoto cirurucec acek piko co cesoptosi om pesyonoto oñkyepetekey cekto cetorokte Mokoryontet cetuye om polyet om wulin po parak, oñkyipur oko Mokoryontet okokoy.

<sup>18</sup>Kunyo añereckey otitirkey akwek kwakwek nkit oyiyisye ñelacutecu.

## 1 Sesalonyek 5

<sup>1</sup>Mpo yeya, puryo kot kuroke cisilwok acek ñalek ce nöme pesyosyek oko kenysisyek ye mokwiyokis tukucutecu.

<sup>2</sup>Omnye oñket akwek nkit topon kule mosukuco pesyetap Mokoryontet kuyu corintet nye cono komoy.

<sup>3</sup>Pesyosyek coto kuye mwowu piko kule, “Mite kiy ake tokol topon nye puryo ñoyenot.” Yoto pakenke kuye mosukwaran cekto lakwar! Puryo ci nye cilile. Mosukukerkeyit oko mwoninto nyo contyini korko nye karik kucämñkey lakwet.

<sup>4</sup>Ntane akwek mpo yeya, puryo kot omite wule po menonet, kunyo puryo kot kuroke kucerak pesyonoto kuyu corin.

<sup>5</sup>Opoye akwek tokol lakweyet; oñkoyiku piko cepo pet. Puryo kot ciku acek piko cepo komoy nto mpo ciku cepo mononet.

<sup>6</sup>Kunyo puryo kot kuroke ceruye kuyu piko alak; misyini cekosu oñkyepoyoyitu.

<sup>7</sup>Ruytos piko ye komoy, oñkupokitos ye komoy.

<sup>8</sup>Ntene cepoye acek pet, kunyo misyini cepoyoyitu, misyini cenäm koyenet oko cömisyet kwek loñet nyepo teket, oñkyilac kutwet nyepo karnet kwek kokenotet nyepo kosopotet.

<sup>9</sup>Kipuryo kot kukweyac acek Yiyintet nye kimecec kule sukuñet cetañany kunerekyec neto, ntene kikweyec sukuñet cenyoru kosopotet kupunune wule mite Mokoryontenyö Yesu Kristo.

<sup>10</sup>Omnye kimecec acek sukuñet cipur wanak oko neto. Ye cesoptosi nto ye kacepoku om pesyet nye cono.

<sup>11</sup>Kunyo roke otitirkey akwek nkit oñnkokyokyey kuyu wulo oyiytoy yawut.

<sup>12</sup>Mpo yeya, cesomok acek akwek kule aywey topon piko co yiyisi om wule omite, piko co kuce kikwey Mokoryontet sukuñet kunetak oñnkuntowok.





- <sup>13</sup>Aywey cekto koromun oṅnkocäm yisyet nye yiye. Opurte kalyet akwek kwakwek nkit.
- <sup>14</sup>Mpo yeya, cesomok acek kule, asowu co puren, otitir piko co muytos, akalye piko co moponto swamet, omuytoci ṅalek cepo piko tokol.
- <sup>15</sup>Möce akäs kule puryo ci om akwek nye yokte miyotyeyet kuyakte miyotyeyet ake, Ntene möce otyikyiy ayiy ṅalek ce toponec okokoy om wule omite akwek kwakwek nkit oko om wule mite piko tokol.
- <sup>16</sup>Oṅerece okokoy.
- <sup>17</sup>Osoye Yiyintet okokoy.
- <sup>18</sup>Okostoyisyey om ṅolyo ake tokol. Möce Yiyintet kule ayiy akwek kuyunyoto om soponto nye oponte om Yesu Kristo.
- <sup>19</sup>Monte cekerekte Muyet Nyetilil.
- <sup>20</sup>Mönte cenyil lokoywek cepo ṅorsyet.
- <sup>21</sup>Ntene asyem wule yunto ṅolyo ake tokol, oṅnkoriṅ ṅalek ce toponec.
- <sup>22</sup>Asanekey miyotyeyo ake tokol.
- <sup>23</sup>Yiyintet nyo kikonec kalyet kunye roke kukonok akwek otillitu om aret ake tekol, oṅnkoriṅ topon mukuleywek cikwok oko saponwek cikwok oko porwonik cikwok, sukuṅet komoponte lelis ake tokol om pesyet nyo cony Mokoryontenyey Yesu Kristo.
- <sup>24</sup>Neto nyo kikurok akwek kunye po manta, kunyo mosukwiy kuyunyoto kupoyit manta.
- <sup>25</sup>Mpo yeya, osomwec mpo acek tokol.
- <sup>26</sup>Asupay mpo yeya tokol om kasupoyisyey nye ceṅotukekey nye poru tupcet.
- <sup>27</sup>Kosomok any akwek om kamukeywekap Mokoryontet kule osumontyiy pawany mpo yeyey tokol.
- <sup>28</sup>Kunyo opurte akwek tokol poypoyetap Mokoryontet Yesu Kristo.



## 2 Sesaloniyeke

### 2 Sesaloniyeke 1

<sup>1</sup>Cone parwani wule ce mite acek Paulo oko Sila oko Timosewo. Cesilwok akwek pikap Yiyintet cepo Sesolonika. Piko coto kuce kipoyit Yiyintet Papanyo oko Mokoryontet Yesu Kristo.

<sup>2</sup>Kante kukonok akwek Yiyintet Papa oko Mokoryontet Yesu poypoyet oko kalyet.

<sup>3</sup>Mpo yeya, misyini cikaste acek Yiyintet okokoy om wule omite akwek. Dolyo nyepo manta ye kaciy acek kuyonyoto, omnye mite kunere koyenet nyimwoŋ koromun, oŋnkutosyinikey cömisyet nye oponte akwek om wule mite piko alake.

<sup>4</sup>Kunyo cesilekey acek nkit om ŋalek ce nömok akwek om taytap pikap Yiyintet. Cesilekey acek omnye omite akwek otosyinikey omuytoy oŋnkocömisiyi nka kot oponte toŋoŋutek tokol oko nyolilutek ce omite opunte yawut.

<sup>5</sup>Akwek kuce oporu wule mosukumutita Yiyintet musankut nyepo ŋalek cepo manta, kunyo mosukupor ŋalecutecu kule oyeme akwek onyuru poytoyisyenyi nye omite akwek yawut otoŋonye.

<sup>6</sup>Mosukwiw Yiyintet ŋolyontet nyepo manta, mosukutaŋany neto piko co mite kutoŋonyo akwek yawut,

<sup>7</sup>oŋnkutyacak akwek co omite otoŋonyi yawut oko mpo acek. Mosukwiw kuyunyoto om pesyet nyo porukey Yesu kucone torot oko malaykanikiyi ce ponto swamet nyewo.

<sup>8</sup>Mosukulay mata nyewo nye rikitite, sukuŋet kutaŋany piko co menket Yiyintet: oko piko co puryo kot kuyweye lokoywek ce toponec cepo Mokoryontet Yesu Kristo.

<sup>9</sup>Mosukutaŋany cekto om aranet nye mopoku, oŋnkukweyokis om taytap Mokoryontet nye puryo kot kunyuru woyinto nyenyi nyewo.

<sup>10</sup>Mosukwiw yokis ŋalecu om pesyet nye cono neto cokunyor woyinto om wule mite pikyi oŋnkunyor kuywey piko tokol co kikoyen. Mosoyiku akwek alak om picoto omnye kyocäm lokoywek co kicemwowok acek.

<sup>11</sup>Kunyo po wulo sukuŋet cesomwok acek okokoy. Cesome Yiyinteny kule kukonok akwek soponto nyepo latik nyo kicurcok kwonyoru. Cesome kule roke kukonok Yiyintet om swamenyi tukuk ce omöce akwek cepo toponiyet oŋnkusat kunyol yisyet nyepo koyenet nyimwoŋ.

<sup>12</sup>Om aret nye yunyitenyi kuye sukuŋet kunyor woyinto kaynetap Mokoryontet Yesu om wule omite akwek, oŋnkonyoru akwek woyinto om wule mite neto om poypoyetap Yiyinteny oko Mokoryontet Yesu Kristo.

### 2 Sesaloniyeke 2

<sup>1</sup>Mpo yeya, ŋalek ce nöme pesyet nye cone Mokoryontet Yesu Kristo, oko ye mosicirurucec acek sukuŋet cetuye oko neto.



- <sup>2</sup>Cesomok acek akwek kule monte kupotpotenis kasoteywek cikwok lakwar nto mpo onyeru om n̄alek ce cemwowu kule kupunto pesyet nyepo Mokoryontet. Pesyet ake kimwoy citake n̄aleca nye kiṅorsyi nto nye kimwoytoy lokoywek. Nto kicemwoy pesyet ake kule kicesil acek parwet nye mwowu n̄alecato.
- <sup>3</sup>Monte kot kuperperak ci ake tokol om aret ake tokol. Omnye puryo kot kwititoy pesyonoto okoy kunyosyo kuco cukurotet nyepo letut; oṅnkutok neto nyo miyat. Nyoto kunye weti wule mite mata nye momise.
- <sup>4</sup>Mosukutay neto kiy ake tokol nye soye piko oṅnkutay kiy ake tokol nye sute piko kule po Yiyintet. Mosukusutkey kwek nyewo nyepo kiy ake tokol, oṅnkowut kotap Yiyintet oṅnkopur ṅony kusutkey kwek Yiyintet.
- <sup>5</sup>Puryo kot tosoti akwek kule kyomwowok ani n̄alecutecu tokol yo kicepontekey oko akwek?
- <sup>6</sup>Oṅnket akwek kito nye kerektoy Neto okoy kwitita pesyet nye kicekwey sukuṅet kuporkey.
- <sup>7</sup>Omnye mite yawut kwiyisi miyotyey nye motoku, ntene ṅolyontet nye mokwiyakay kunye puryo kot kwiyoktos okoy cinate kuwo tapan neto nyo kerektoy.
- <sup>8</sup>Yoto kuye mosukoporkey kutok Neto nye miyat.
- <sup>9</sup>Mosukupakäc Mokoryontet Yesu nyoto miyat kwiyisiye muyet nye cone kutinyi oṅnkwaranta om pesyenyi nyewo ye kaco neto. Mosukuco Neto nye miyat om swametap Setanit oṅnkwiw tukuk wok tokol cepo kakitat oko pelutok cepo mwiynan ce cikite,
- <sup>10</sup>oṅnkwiwisiye kaperperisyo ake tokol nye miyat om wule mite piko co mokwaran. Mosukwaran picoto omnye kipuryo kot kutoroc oṅnkucäm n̄alek cepo manta sukuṅet kusopco.
- <sup>11</sup>Om ṅolyontoni kuye kukoci Yiyintet kwiyis mwiynanet om wule mite cek sukuṅet kücäm cekto n̄alek cepo mwiynanet.
- <sup>12</sup>Kunyo n̄alek ce mokutok kucu kule, mosicewosontyi cemutyi musankut piko tokol co puryo kot kuyen n̄alek cepo manta, ntene kücäm pate ṅerekwek cepo miyotyey.
- <sup>13</sup>Mpo yeya, misyini cikaste acek Yiyintet okokoy om wule omite akwek co kicämak Mokoryontet, Omnye kikweyak Yiyintet opoyitu tayta ce kicisop om swametap Muyet Nyetilil sukuṅet kwiyak oyiku pikyi cetililec
- <sup>14</sup>Kikurok akwek Yiyintet kwonyoru n̄alecu kupunte lokoywek ce toponec co kicemwowok acek. Kikurok sukuṅet kwonyoru woyinto nyepo Mokoryontenyeno Yesu Kristo.
- <sup>15</sup>Kunyo mpo yeya, okwilokisiye oyoṅnkye topon akwil n̄alek cepo manta ce kicinetak om kutit nto parwet.



<sup>16</sup>Cesomwok Mokoryonteny Yesu Kristo nkit oko Yiyintet Papanyo nye kicämec om poypoyenyi nye mopoku oko kokenotet nye topon.

<sup>17</sup>Kante kutitir neto mukuleywek cikwok oṅnkukonok okwilokisye sukuṅet ayiy oṅnkomwowu ṅalek ce toponec.

## 2 Sesalonyek 3

<sup>1</sup>Mpo Yeya, osomwec acek sukuṅet kutosyikey kutisto lakwar lokoywekap Mokoryontet oṅnkupēlis kuwoyit kuyu wulo kiyunto om wule omite akwek.

<sup>2</sup>Osomwec mpo sukuṅet kusorwec Yiyintet om wule mite piko ce kiwuryo oṅnkwiye miyotyēt, omnye puryo kot kuponto piko tokol koyenet.

<sup>3</sup>Ntene Mokoryontet kunye po manta, mosukukwilak onyuru swamet oṅnkuripok topon om wule mite Neto nye miyat.

<sup>4</sup>Kikonec acek Mokoryontet cikasenakey akwek, kunyo cinket kule oyiyisiyi akwek kupoyit manta, kunyo motosyikey ayiye ṅalek ce cemwowok acek.

<sup>5</sup>Kante kuntoci Mokoryontet mukuleywek cikwok okoy onyuru cömisyēt nyepo Yiyintet oko muytocinotet nye konu Kristo.

<sup>6</sup>Mpo yeya, cemwowok acek cinkolonwok om kaynetap Mokoryontet Yesu kule, oripkey wule mite mpo yeya alake tokol ce puren ce puryo kot kuripe ṅalek co kicinet acek.

<sup>7</sup>Omnye oṅnket akwek nkit topon kule misyini orupe kuyu wulo kiciytoy acek. Kipuryo kot ciku puren yo kicepontekey oko akwek.

<sup>8</sup>Kicole omik tokol ce kikyome, kiciyisiyi om swamet pet oko komoy sukuṅet mente cekonok akwek wuyin ake tokol.

<sup>9</sup>Kiciy kuyunyoto nye kipuryo kot ku kule omnye kimocimuci kot cemwowok akwek kule apayec, ntene kiciy kuyunyoto kule sukuṅet akäsenec wule yunto soponto nyinyacek nye roke arup.

<sup>10</sup>Kicemwowok ye kitocepontekey oko akwek kule, “Puryo kot kuroke kwomis ci ake tokol nyo puryo kot kumöce kule oyiyisiye.”

<sup>11</sup>Cemwowu acek ṅalecato omnye kicelim kule mite piko alake ce puren ce puryo kot kwiye yisyēt ake, ntene cukure cekto yisyonutek cepo piko alak.

<sup>12</sup>Cemwocini acek oṅnkysisowu picoto om kaynetap Mokoryontet Yesu Kristo kule, misyini kopurto cekto soponto nye topon oṅnkwiyy yisyonutek sukuṅet kunyor pesanik ce kolyekey.

<sup>13</sup>Ntene akwek mpo yeya, monte cecosye ye mayiy yisyēt nye topon.

<sup>14</sup>Ye katay ci ake tokol nye mite wule omite akwek macäm ṅalecu mite parwani kocesilwok acek, okäs cico topon, oṅnkoyaste kwiyat nkit, sukuṅet kusornen neti nkit.



- <sup>15</sup>Ntene monte cesut nyoto akwek puniyo, asowu kuyu yeya.
- <sup>16</sup>Kunyo Mokoryontet nkit nyo konu kalyet kunye roke kukonok akwek kalyet om pesyosyek tokol, onku om aret ake tokol. Opurtekey akwek Mokoryontet.
- <sup>17</sup>Ani nyo Paulo nkit om yewumwani nye kosile kasupoyisyoni. Kasupayak koromun. Osile ani kwak yunyitenyi. Yewumwani nyitenyi nyepo manta.
- <sup>18</sup>Opurte akwek tokol poypoyetap Mokoryontenyo Yesu Kristo.



## 1 Timosewo

### 1 Timosewo 1

- <sup>1</sup>Cone parwani wule amite ani Paulo nye kiyokintetap Yesu Kristo om kamukeywekap Yiyintet Kosopintenyö, oko Yesu Kristo nye kokenotet nyinyacek.
- <sup>2</sup>Osiluj Timosewo werimwani nyepo manta om koyenet. Kante kukoniñ Yiyintet Papa oko Yesu Kristo Mokoryontenyö poypoyet oko cömisyet oko kalyet.
- <sup>3</sup>Amöce ani kule ipur nyi Efeso kuyu wulo kikyosomiñ yo kyonomeni aweti Meketoniya. Mite piko alake wuloto ce mite kunete konetisyet nyepo mwiynan, kunyo misyini mwoci kwasta lakwar.
- <sup>4</sup>Mwoci picoto kwasta ñalaletap tyonkocok oko koynok ce cañ cepo mpo kuko ce moponto ye ñete, omnye sutu ñaleca tintenotet pate, ntene puryo kot kwiye yisyetap Yiyintet nye kiceyiyta, nyoto kukokenotet nye kicinket.
- <sup>5</sup>Komwowu ani ñalecu sukuñet kuñetñet kutosyi cömisyet nye cone wule mite mukuleyto nyetilil oko konketotet nye toku oko koyenetet nyepo manta.
- <sup>6</sup>Kupotyï piko alak aret om ñalecu, kunyo kuwekyikey cekto aret nyepo ñalalet nyepo perperryo.
- <sup>7</sup>Möce kule ciku konetik cepo ntarastinekap Yiyintet, ntene oñnkurok yec kupuryo kot konkete ñalek cikwa nkit, oñnkupuryo mpo kot kunkete tukuk ce ñolole kuyunye nkete.
- <sup>8</sup>Cinket acek kule toponec ntarastinek, ye kokyiyisyet toponec kuyu wule cemoktoy.
- <sup>9</sup>Misyini cinket kule kipuryo kot cekon ntarastinek kupo piko ce toponec, ntene kicekon kupo piko ce yirye ntarastinek oko sokoranik oko co puryo kot konket Yiyintet, oko co ponto miyotyeyet, oko co puryo kot kuponto tini, oko co miyotec mukuleywekwa. Kicekon kupo piko co poköce mpo kwan nto mpo kamet, oko co porisyi,
- <sup>10</sup>oko co ponto sakwayanetet, oko co ponto soponto nye miyat, oko co core piko, oko co mwiynec oñnkunolole ñalek cepo mwiynan nto mpo kwiy kiy ake nye monomekey oko konetisyet nyepo manta.
- <sup>11</sup>Mitowune konetisyet wule mite lokoywek ce toponec ce kicekono, coto kuce lokoywek ce toponec ce kicekono ani, coto kuce lokoywek ce toponec cekwone wule mite nyewo oñnku Yiyintet nyepo kupeyok.
- <sup>12</sup>Okostoy ani Mokoryontet Yesu Kristo nye kikono swamet om yisyemwani. Okostoy omnye kisuto opoyitu latik okay kukweya oyici yisyet,
- <sup>13</sup>nka kot kyonolole kwapi oñnkocup ani neto. Ntene kikalya Yiyintet omnye kipuryo kot oñnketi ce kyoyiye yoto.



<sup>14</sup>Yoto kukono ani Yesu poyoyenyi nyewo oŋnkukono koyenet oko cömisyet nye ceponte acek om koyomotet oko Yesu Kristo.

<sup>15</sup>Dolyontet nyepo manta nye roke cetac oŋnkyiyen kupoyit manta kunyi kule! Kico Yesu Kristo koret cokusop piko ce ponto miyotyeyet. Ani akenke om cekto nye miyat kupëlis.

<sup>16</sup>Dolyontoni nye sukuŋet kukalya kurire ani Yiyintet, kumöce kule sukuŋet ayiku koporunotet nyepo tayta nyepo muytocinotet. Kimöce kule oyiku ani kantoyintet nye porcini piko co mokuyen om letut sukunyor cekto soponto nye mopoku.

<sup>17</sup>Om wule mite neto Kinko nye mopoku, nye puryo kot kume, nye puryo kot kutoku, nye Yiyintet akenke nkit, kunye roke kopurune koyweyisyet oko woyinto okokoy oko okokoy. Yunyoto.

<sup>18</sup>Lekwenyu Timosewo, kakoniŋ ntarastini, nömekey ŋalecu oko ŋorsyet nye kiceŋor keny nye nömiŋ nyi. Kunyo roke yiyisyeye ŋaleca kwek karik ce meporye poryet nye topon.

<sup>19</sup>Rip koyenet nyeŋuŋ oko kasoteywek ce toku topon. Kutay piko alake morip ŋalek cepo kasoteywek cikwa, kunyo kukwaranta koyenet nyimwa.

<sup>20</sup>Om picoto ku mpo Imenayo oko Alekisanta. Picoto kuce kwokoyte ani kupa wule mite Setanit sukuŋet wocinet kwasta komo kucupe cekto Yiyintet.

## **1 Timosewo 2**

<sup>1</sup>Kunyo ŋolyontet nyepo tayta; asome kule, somet oko kakastayet kuce möce osome okostoy Yiyintet kupo piko tokol.

<sup>2</sup>Osomnci kinkonik oko poytoyik ce ponto kamukeywek, sukuŋet cipurte soponto nye topon, nye paypay, nyepo kalyet, nye ciyweye Yiyintet, oŋnkyeripkey om kiy ake tokol.

<sup>3</sup>Topon koromun ye kaciy kuyunyoto omnye ŋerece Yiyintet Kosopintenyö,


<sup>4</sup>nye möce kule cisop piko tokol oŋnkunket ŋalek tokol cepo manta.

<sup>5</sup>Omnye mite Yiyintet akenke oŋnku mite cito akenke nye yomntos Yiyintet oko piko, nyoto ku Yesu Kristo,

<sup>6</sup>nyo kikokoytokey kwolis sukuŋet piko tokol. Dolyontet nyoto kipor kupoyit manta om pesyet nyepo manta kule möce Yiyintet kule cisop piko tokol.

<sup>7</sup>Kuyunyoto sukuŋet cekweya ani oyiku kiyokintet oŋnkoyiku konetintet nyepo Lamek nye mwoytoy lokoywek cepo koyenet nyepo manta. Omwowu ŋalek cepo manta nye moperperisyi.

<sup>8</sup>Amöce ani kule kusome moronik om wulyo tokol, coto kuce kikokenekey Yiyintet kupoyit manta, oŋnkusome kuyitoy yewuniyekwa ce tililec nye puryo kot kuponto nerekwek nto mpo tintenotet.





<sup>9</sup>Amöce mpo kule kuñomekitu koruk oñnkulackey om aret nye topon. Puryo kot kuroke kulet koruk putek nto kukoci yitik Sapunek nto karik ce piciyec, nto kulac sirok cepo pesan ce cañ.

<sup>10</sup>Ntene möce kwiye yisyet nye topon kuyu wule cemoktoy om wule mite koruk co yweye Yiyintet.

<sup>11</sup>Misyini kunetkey koruk om sisyyot oñnkuyweyis om kiy ake tokol.

<sup>12</sup>Puryo kot acömnncini ani kunetis koruk nto mpo kule kupayta moronik. Misyini kusistos.

<sup>13</sup>Omnye kicenyosyo citany Atam nto cikere Awa.

<sup>14</sup>Ntene korket kunye kiciperper sukuñet kwiri ntarastitap Yiyintet. Puryo kot ku Atam nye kiciperper sukuñet kwiyy miyyotyey, ntene korket nye kiciperper sukuñet kwiyy miyyotyey.

<sup>15</sup>Ntene mocisop korko omnye koyi lekok. Ye komuytoci kurip topon koyenet oko cömisyyet oko tililinto, oñnkuripkey.

### **1 Timosewo 3**

<sup>1</sup>Dolyontet nyepo manta kunyi kule, ye kamac cito kule oyiku kantoyintet kosintet nyepo pikap Yiyintet, kukamac yisyyet nyetilil nye topon.

<sup>2</sup>Misyini Kantoyintet kosintet nyepo pikap Yiyintet kwek cito nye moponto lelis, Misyini kuponto korket akenke, oñnku cito nye paypay nye ripekey, oñnkuponto tolosyyet. Misyini kutoroce kuñerekyini toyek ce mocinket kukwa kanyi, oñnkuponto ñomnonet nye muce kunetis.

<sup>3</sup>Puryo kot kuroke kwek pokityo, nto pororin, ntene ci nye siken oñnkuponto tolosyyet nye puryo kot kucorokyini pesan.

<sup>4</sup>Misyini kwek cito nye muce kurip topon piko cepo kanyi oñnkunet lekoky kuyweyis om aret ake tokol.

<sup>5</sup>Omnye ye puryo kot konket cito kurip piko cepo kanyi nkit, komuce kulene kot kurip piko cepo Yiyintet?

<sup>6</sup>Puryo kot kumisyini kwek ci nye kotokowute koyenet. Omnye muce kusilekey kusutkey torot okoy kosuci cemutyi musankut kuyu wulo kicemutyini setani nyewo nyepo oyik.

<sup>7</sup>Misyini kwek ci nye yweye piko tokol cepo sañ. Sukuñet mente kot cenyil oñnkosuci musatit nyepo setani nyewo nyepo oyik.

<sup>8</sup>Piko ce yiyisyi kukolyoy pikap Yiyintet kuce misyini kwek piko ce ponto kopurto nyepo soponto nye topon nyepo manta ce cikenekey. Puryo kot kumisyini kuye komek ce cañ, nto moroñis cepo pesan.



- <sup>9</sup>Misyini kukwil cekto topon koyenet nyepo manta nye kicipor oṅnkuponto ḡomnonet nye toku.
- <sup>10</sup>Misyini cenyosye cesyem cekto kunyo, nteye kacekäs kule yeme, yoto kuye cikoci kwiyis.
- <sup>11</sup>Misyini kuponto mpo korukwa kopurto nyepo soponto nye topon om koyenet om kiy ake tokol.
- <sup>12</sup>Misyini kuponto kokolyoyintet korket akenke, oṅnkomuce kurip lekokyi oko piko cepo kanyi.
- <sup>13</sup>Omnye piko co yiye topon yisyet nyepo kokolyoyisyet kuce muce cekto nkit kunyor cinket topon, oṅnkomuc kuḡalale om nyikanat ḡalek ce nöme koyenet nyimwa nye ponto om wule mite Yesu Kristo.
- <sup>14</sup>Ye amite osiluḡ ani parwani, asoti kule mosaco lakwar okoy cakäsiḡ.
- <sup>15</sup>Ntene ye kotepe kot olilennkey, mosukumwowuḡ parwani wule misyini cipurte acek nkit piko cepo kaytap Yiyintet, coto kuce pikap Yiyintet nye sopot oṅnku tolocta nye tiye ḡalek cepo manta.
- <sup>16</sup>Puryo ci nye muce kutay kule woyec koromun ḡalek ce wuḡotin cepo tininyo ce mwowu kule: “Kicipor neto kuponto porto nyepo cito, Kipor Muyet Nyetilil kule po manta neto. Kikäs malaykanik neto, Kicemwayte ḡalekyi wule mite piko cepo yemosyek tokol, Kiciyen neto om koret tokol, kunyo, kicesut kuwo torot om woyinto.”

## 1 Timosewo 4

- <sup>1</sup>Mwowu Muyet Nyetilil kutok topon kule, om pesyosyek ce kwoni, mosukuwirta piko alake koyenet, mosukucäm oyik cepo mwiynanet ake konetisyet nyepo oyik ce miyotec.
- <sup>2</sup>Konetisyet nyoto kunye cone wule mite piko ce mwiynot ce perperisyi. Piko coto kuce kipok kasoteywek cikwa kuyunye kicepele karin nye layat.
- <sup>3</sup>Netisyi pico kumwoy kule puryo kot kuroke cimütis koruk, nto kule kyam omik alak, oṅnkurok yec kitany Yiyintet omicoto kule sukuḡet kyome om letut ye kacesomnci kukostoyis piko co kikoyen, oṅnkunket cepo manta.
- <sup>4</sup>Omnye topon kiy ake tokol nye kitany Yiyintet, momite kiy nye roke cetay, ye kacesomnci kupeyok oṅnkyam om kakastayet.
- <sup>5</sup>Omnye ḡolyontetap Yiyintet oko ḡalek ce kocesomncine kuce wece kutililit kiyoto.
- <sup>6</sup>Ye kenet nyi ḡalecu mpo yeya, kuye meseyeku kiyokintetap Yesu Kristo nye topon, oṅnku yoto ye poyekey nyi nkit ḡalek cepo koyenet oko konetisyet nyepo manta nyo kwerip nyito.



- <sup>7</sup>Möce tay sanekey wule mite piko co menket Yiyintet, oko tyonkocok cepo perperyo co puryo kot kurok ceñalale. Tosyikey nkit netkey soponto nyepo Yiyintet.
- <sup>8</sup>Omnye ponto latik alak ye kacerip porto, ntene kuponto latik ce cañ ye kocerip tinit nyepo manta, omnye kurtoy coto soponto nyepo pesyosyecu oko soponto nye mosukuco letut.
- <sup>9</sup>Po manta ñolyontono, nye roke cecäm kupoyit manta.
- <sup>10</sup>Kuyunyoto omne sukuñet cetitir acek kyiyisye swamet, omnye kicikenekey Yiyintet nye sopot nye kosopintet nyepo piko tokol co kikoyen.
- <sup>11</sup>Polyi oñkinet ñalecu.
- <sup>12</sup>Mente ayaste kot kunyiliñ ci ake tokol omnye teyiku miniñ, ntene porci piko co kikoyen kukäseniñ om ñalalet nyeñuñ oko kopurto nyeñuñ, oko cömisyet nyeñuñ, oko koyenet nyeñuñ oko om tililinto nyeñuñ.
- <sup>13</sup>Möce syem koromun weti sumanet nyepo piko tokol nyo cesumone silutekap Yiyintet, oko mwaytayet nyepo lokoywek oko konetisyet okoy opunu ani.
- <sup>14</sup>Mente kot ayaste kupeyok co ponte nyi co kicekoninñ ye kiñolole workoyik oñkukemerinñ poyik yewuniyekwa.
- <sup>15</sup>Möce yeyisye yisyonutek cutecu oñkikwilakisye nyi nkit sukuñet kukäs ci tokol yisyet nyeñuñ nye tosyinikey.
- <sup>16</sup>Ripkey nyi nkit oñkirip konetisyet nyeñuñ. Tosyikey iyiy ñalecutecu, omnye ye keyiy, mesesopkey nyi nkit oko piko co lime ñalekuk.

## 1 Timosewo 5

- <sup>1</sup>Mente kot polyi poyo nyewo, ntene ñolyolyi kuyu Papanuñ. Sute oyiperik oyoyecine kuyu mpo yeyeuñ.
- <sup>2</sup>Sute cepyosok cewoyec kuyu mpo komet, sut tipik kuyu mpo cekwomet om mukuleyto nye tilil.
- <sup>3</sup>Ywey koruk co musukik, coto kuce musukik cepo manta.
- <sup>4</sup>Ye ponto korko nye musuk lekok nto mucokoroniky, kumoce kunetkey kunyo kunket yisyonutek cepo tinimwa om wule mite mpo kwan oko mpo kamet. Om aret nye yunyitenyi kuye kwici cekto yisyet mpo kwan oko mpo kamet oko mpo kukomwa oko mpo kokomwa. Omnye ñalek ceyucoto kuce ñerece Yiyintet.
- <sup>5</sup>Korko nye musuk nyepo manta kunye moponto ci nye kolyoy, nye kikokenekey oñkutosyinikey kusome Yiyintet kokolyoyisyet pet oko komoy.
- <sup>6</sup>Ntene korko nye musuk nye weti wule mite ñerekwek kunye kime nyo kusope.
- <sup>7</sup>Möce koci cekto ntarastini, sukuñet komo kuponto lelis.



- <sup>8</sup>Ntene ye puryo kot kuripe cito piko tilyonutekyi, nto nye puryo kot kuripe piko cepo kanyi, kuporukey kule katay cito nyoto koyenet oṅnkowurta cito nyoto kusir cito nye puryo kot kuyen.
- <sup>9</sup>Mente osil kaynetap musuk korko nye tokuminiṅ okoy ye kiyosit nye ponto kenyisyek tomonwokik lö, oṅnku nye kikomüt santet akenke pate.
- <sup>10</sup>Misyini ku musuk nye kiciyweye om yisyonutekyi ce toponec, nye kinet lekokyi topon, nye kitoroce toyek, nye kiwune krenkokap pikap Yiyintet, nye kikolyoy ce ponto wuyinwek, oṅnkunye kikokoytokey kwiye yisyonutek tokol ce toponec.
- <sup>11</sup>Mente osil koynokap koruk musukik ce tokuminkec, omnye ye kotepe kot kucorok porwonik cikwa kumac kule cimütec yec, yoto kuye kwasta nye komo kurupe Kristo,
- <sup>12</sup>kuye kalel kwiri kawalemwa nye kipo tay om wule mite Kristo.
- <sup>13</sup>Dalek alak kucu kule, netekey cekto kupuren kowurta poroyinwek cikwa, kupesetoti kupunte korin kuṅololote ṅomso pate, oko ṅalek cepo porwonik cikwa, oṅnkuṅalale ṅalek ce meroke kuṅalale.
- <sup>14</sup>Amöce ani kule cimüt koruk musukik ce tokuminkec, sukuyi lekok oṅnkurip korikwa, sukuṅet mente kukoci punikyacek poroyinto kot kuṅalalene kwapi.
- <sup>15</sup>Omnye kuwekey kenye musukik alake oṅnkurup Setanit.
- <sup>16</sup>Ntene ye ponto korket nye kikoyen koruk ce musukik ce tilyonutekyi ce mite konyi, kuroke kurip neto cekto, puryo kot kuroke kwosyi nyikisinto pikap Yiyintet, sukuṅet co kurip musukik ce mite kwicek nkit ce moponto ci nye mokurip.
- <sup>17</sup>Misyini poyik co yiye yisyet nye topon kuyu poyik kunyor musyaret aret oyeny, nto kupēlis poyik ce titire kumwoytoti lokoywek oṅnkunetis.
- <sup>18</sup>Omnye mwowu silutekap Yiyintet “Mente arat yeyito kutit ye mite kuwore nkanuk”. Oṅnkumwoy yec kule, “Misyini cito nye yiyisi kunyor musyaret.”
- <sup>19</sup>Mente kot acäm lelis nye nöme pontet ake tokol okoy ye komwoy piko ayenku nto somok kule lelat.
- <sup>20</sup>Polyi reny piko tokol ce yiye miyotyeyet om taytap piko tokol sukuṅet kunyokoritu piko cut alake.
- <sup>21</sup>Komwowuṅ oyomiseniṅ om taytap Yiyintet oko Yesu Kristo oko Malaykanik ce tililec kule, misyini rip ntarastinecu nye puryo kot yele kereryantet ake, ntene yiye yoyeci pate.
- <sup>22</sup>Mente kot osorci lakwar kot kemer ci ake tokol yewuniyekuk kupo yisyetap Yiyintet. Mente kot wutekey miyotyonyik cepo piko alak, ripkey tililitu.
- <sup>23</sup>Mente taye peko nkit, ntene iye nfinyonik tukusic sukuṅet kukalyiṅ moyet oko porto nye mnyoni kwak okokoy.



<sup>24</sup>Toku nye cimuce cekäs topon miyotyonic cepo piko alak, kunyo sute miyotyonicoto cekto wule mite musankut, ntene mosukutok cekäs miyotyonic cepo piko alak om letut.

<sup>25</sup>Om aret nye yunyoto kuye ceköse kutok topon yisyonutek ce toponec, nka kot mpo ce puryo kot kutoku topon, kupuryo kot kuwuḡotos.

## 1 Timosewo 6

<sup>1</sup>Misyini mutworik tokol kukäs kule roke kuywey mokorenik cikwa, sukuḡet komo kuḡolole ci ake tokol kwapi kaynetap Yiyintet oko konetisyet nyinyacek.

<sup>2</sup>Mutworik co kikoyen mokorenik cikwa kuce puryo kot kuroke kunyilsyo meyweyis kumwoy kule omnye mpo yeya cut, ntene möce kwiyis kunyol topon, omnye mokorenik co mokunyor latik om yisyet nye yiye cekto kuce mpo yeya mpecek ce cöme cekto. Misyini net ḡalale yisyonutekyu.

<sup>3</sup>Ci ake tokol nye nete konetisyet ake tokol nye pciyat oḡnkupuryo kot kucöme ḡalek cepo Mokoryontenyö Yesu Kristo oko konetisyet nyepo tininyo.

<sup>4</sup>Kunye ponto cito nyoto silotet nyewo koromun, oḡnkupuryo kot konket kiy. Ponto corokyinotet nye miyat nyepo tintenotet oko wokutyet nye nöme ḡalek pate. Kunyo sutu ḡaleca corokyinotet oko wokutyet oko ḡomset oko kasoteywek ce miyotec;

<sup>5</sup>oko tintenotet nyepo okokoy nye moponto ye ḡete nyo cone wule mite piko co kowuryo kasoteywek cikwa, ce kimokuponto ḡalek cepo manta. Sote cekto kule tinit kunye aret nye cenyorune mokoryontit.

<sup>6</sup>Kupoyit manta, sutyini tinit cito kwek mokoryo koromun, ye kayem neto tukuk ce ponto.

<sup>7</sup>Omnye kipuryo kot cekwante acek kiy koret, kunyo puryo kot cepetoy kitake!

<sup>8</sup>Ye ceponte omik oko sirok kuroke kuyemec coto.

<sup>9</sup>Ntene piko co möce kule ce mekoren kuce sucini syemutok oḡnkunäm musatit nyepo cerokyinotet nye miyat nyepo perperyet ce cute cekto okoy kupa wule mite arantayet.

<sup>10</sup>Omnye corokyinotet nyepo pesan ku wule lukune miyotyonic cepo wok tokol. Kusyem piko alake kule cenyoru pesanik okoy kumosokis om aret nyepo koyenet, kunyo kokowurta cek mukuleywekwa om kasoteywekwa ce caḡ ce miyotec.

<sup>11</sup>Ntene nyi nyo yiku citap Yiyintet, kunye möce ripkey om wule mite ḡalecato tokol, syem tyikiy pate toponiyet, poyitu Yiyintet, nye ponte koyenet oko cömisyet oko muytocinotet oko sikenotet.

<sup>12</sup>Syem porye poryet nye topon nyepo koyenet, rip kwil koromun soponto nye mopoku nyo kicekurciḡ yo kiwolikey renynkey om tayatap piko ce caḡ.

<sup>13</sup>Komwowuḡ om tayatap Yiyintet nyo kocini tukuk tokol soponto, oko taytap Yesu Kristo nyo kiwalkey kupor topon koyenenyi om taytap Pontio Pilato kule,



- 14**Ywey ntarastinek, oŋnkirip tililitu om koyenet nye meponte lelis, okoy Pesyet nye cone Mokoryontet Yesu Kristo.
- 15**Mosukupor Yiyintet yec Yesu Kristo om pesyenyi nyepo manta. Yiyintet nyoto kunye cikostoy oŋnku poytoyintet nkit, nyepo kinkonik, oŋnku poytoyintet nyepo mokorenik.
- 16**Neto nkit kunye sopot okokoy, mitowune wule mite lakweyet nye puryo kot kurice ci ake tokol. Puryo ci kenysis nye kikäs neto. Kopurune wule mite neto koyweyisyet ake poytoyisyet nyewo okokoy oko okokoy. Yunyoto.
- 17**Mwoci sowu piko co mokoren ce ponto tukuk cepo koret mente kusikey, mente kukeneky tukuk cepo mokoryontinek, ntene kukeneky Yiyintet nyo konec acek tukuk tokol sukuŋet kuŋerecec.
- 18**Mwoci kwiy ŋalek ce toponec, oŋnkumokoren kwiy yisyet nye topon, oŋnkwicin topon oko piko alak tokol.
- 19**Om aret nye yunyoto kuye sukuŋet kukonore torot mokoryontit nye kwilat nyepo pesyosyek cepo tay oŋnkomuc kunyor soponto nyepo manta nye cemöce.
- 20**Arenyo Timosewo, rip kiy ake tokol nye kicekoniŋ. Ripkey ŋalalet nye puryo kot kupo Yiyintet oko tintenotet nyepo mwiynanet nye kure piko alake kule ŋomnon.
- 21**Sutekey piko alake kule ceponte, kunyo kupoty i picoto aret nyepo koyenet. Opurte akwek tokol poypoyet.



## 2 Timosewo

### 2 Timosewo 1

- <sup>1</sup>Cone parwani wule amite ani Paulo nye kicäm Yiyintet kwek kiyokintetap Yesu Kristo, nye kiciyok cokumwoy ñalek ce nöme soponto nyo kicekurto, nyoto kunye ceponte acek om koyomotet oko Yesu Kristo.
- <sup>2</sup>Osiluñ werimwani camanet Timosewo. Kante kukoniñ Yiyintet Papa oko Yesu Kristo Mokoryontenyo poyoyet oko cömisyet oko kalyet.
- <sup>3</sup>Okostoy ani Yiyintet nye ayicini yisyet kupoyit manta kuyu wule kikwiytoy mpo kukomwani. Okostoy ye amite asotiñ nyi okokoy ye osome pet oko komoy.
- <sup>4</sup>Tasoti ani lokik, kunyo amöce koromun kule akäsiñ sukuñet añerec kuyema.
- <sup>5</sup>Tasoti koyeneñuñ nyepo mukuleyto orit. Koyenet nyoto kunye ponto mpo kokonuñ Loyis oñkuponto mpo komet Ewunike.
- <sup>6</sup>Kunyo kosotuñ ani nyi kule rip topon kokotutek co kikonij Yiyintet yo kyokemerij yewuniyekwani.
- <sup>7</sup>Omnye kipuryo kot kukonec Yiyintet mukuleyto nyepo nyekernan, ntene kikonec swamet, oko cömisyet oko ripetapkey.
- <sup>8</sup>Kunyo mente alilan ye memwayte ñalekap Mokoryontet, mente mpo alilan om wule amite ani nyi oyiku mopusyontenyi. Tañany toñonutek om swametap Yiyintet kupo toponiyetap lokoywek ce toponec.
- <sup>9</sup>Kisopec Yiyintet oñnkukurec ciku pikyi, nye puryo kot kupo tukuk ce kikyiy acek, ntene om cömisenyi nkit oko poyoyet. Kikonec poyoyet nyoto ikye towunot kupunte koyomotet oko Yesu Kristo.
- <sup>10</sup>Kunyo kuciporwec yawut omnye kico kosopintenyo Yesu Kristo. Kiker neto swamet nyepo met. Kunyo kikopor soponto nye mopoku kupunte lokoywek ce toponec.
- <sup>11</sup>Kikweya ani Yiyintet oyiku kiyokintet oñnku konetintet nye amwocini piko lokoywek ce toponec.
- <sup>12</sup>Kuyunyoto omne sukuñet kunyi amite yawut otoñonyi kuyunyitenyi. Ntene moliloni, omnye oñnketi kupoyit manta cito nye kyoyen, oñnkonket kule muce kurip neto topon kito nye kikonorwo okoy pesyonoto.
- <sup>13</sup>Rip topon ñalek cepo manta co kyanetiñ ani nyi sukuñet rip oñnkipurte koyenet oko cömisyet nye ceponte acek om koyomotet oko Yesu Kristo.
- <sup>14</sup>Rip topon cepo latik co kicekoniñ om swametap Muyet Nyetilil nye mitowune wule cemite acek.
- <sup>15</sup>Nketi nyi kule kimweyeno ani ci tokol om koretap Asia, om coto ku mpo Pukelo oko Eromokene.





<sup>16</sup>Roke kukalya Yiyintet piko cepo kotap Onesiporo, omnye kiñerec kutitiro ani aret ce cañ. Kipuryo kot kunömnci kalilan kule oyiku ani mopusyo.

<sup>17</sup>Pakenke yu kowo kupun neto Rom, yoto kuceny wule amite okoy kunyorwo.

<sup>18</sup>Nketi topon yisyonutek ce cañ ce kikwiyy neto om Efeso. Roke kukoci Mokoryontet neto poypoyenyi nkit om pesyonoto po letut.

## 2 Timosewo 2

<sup>1</sup>Nyi werimwani, poyitu swama om poypoyet nye cone wule mite koyenotet nyepo Yesu Kristo.

<sup>2</sup>Näm ñalek ce kilim nyi oneti ani om taytap piko ce cañ cekikäs, oñnkikoci ñalecato kunäm oñnkurip piko co kenekey nyi cekto, ce muce kunet mpo piko alak.

<sup>3</sup>Mpenyi, tañany toñonutek cekuk kuyu sikorintetap Kristo nye topon.

<sup>4</sup>Sikorintet nye mite poryet kunye puryo kot kucöme kowutekey yisyonutek cepo piko cepo ka omnye tyikyini kule oyiyisye topon sañerec nyewo nyenyi.

<sup>5</sup>Puryo ci nye orerene ñweyek nye muce kot kupëlis kunyor kokotutyet nye cipëlisye ye puryo kot kurip ntarastinek cepo ñweyek.

<sup>6</sup>Kopotintet nye yiyisyi om swamet kunye roke kunyosyo kunyor omik ce kacekis cepo tayta.

<sup>7</sup>Möce sot ñalecu omwowuñ ani, omnye mosukukalyiñ Mokoryontet okoy nket ñalek tokol.

<sup>8</sup>Sot Yesu Kristo nye kimocokeretap Tauti kunye kicinjet kotutune met, kuce lokoywek ce toponec coto ce amwoytoy ani.

<sup>9</sup>Otoñonyi omnye amwoytoy lokoywek coto toponec, kunyo oyiku mpo ratat pinkonok kuyu corin. Ntene puryo kot kuratat pinkonok ñolyontetap Yiyintet.

<sup>10</sup>Omuytocini ani kiy ake tokol kupo toponiyetap piko kweyanik cepo Yiyintet, sukuñet kunyor mpecek soponto nye mitowune wule mite Yesu Kristo wanak oko woyinto nye mopoku.

<sup>11</sup>Manta koromun ñalecu mwowu kule: “Ye kicepoku acek oko neto, mosicesopce mpo oko neto.

<sup>12</sup>Ye kocetosyikey cemuytoci, kuye mosicepoytoyisye oko neto, Ye kacetay acek neto, mosukutayec acek mpo neto.

<sup>13</sup>Ye puryo kot ciyeni acek, ntene kukwilat neto okokoy. Omnye memuce kot kutaykey neto nkit.”

<sup>14</sup>Sotyi pikuk ñalecu, oñnkisowu cekto koromun om taytap Yiyintet, mente kuwokut kutintentyin om ñal ce muponto latik ce puryo kot kusutu toponiyet ntene wurtoy pate piko ce lime.



- <sup>15</sup>Syem koromun porukey om taytap Yiyintet yiku ci nye ce cömntoy kuyu cito nye puryo kot kolilone om yisyenyi. Ntene nye nete kutok topon ñolyontetap Yiyintet nyepo manta.
- <sup>16</sup>Sanekey koromun ñalalet nyepo perperyo nye puryo kot kupo Yiyintet, nye kwetyini piko wule low om wule mite Yiyintet.
- <sup>17</sup>Konetisyet nyoto kunye kerkey mwayet nye kiyenyakay nye mite kwome panyek. Om picoto oyeny ce netisyi ku Umenayo oko Pileto.
- <sup>18</sup>Kimosokis kutay aret nyepo manta, kunyo wurtoy cek koyenet nyepo piko alak ce kikoyen kumwowu kule kipunto kenya kotutunetap met nyinyacek.
- <sup>19</sup>Ntene mocetwoye cetyem tolocta nye kipolyi Yiyintet ñony. Nto ñalek ce kicesil tolocta kucu kule: “Nkete Mokoryontet piko ceci, kunyo ci ake tokol nye mwowu kule opoye Yiyintet, kunye misyini kwasta miyotyeyet.”
- <sup>20</sup>Mite koto nyewo terokok saninek oko pokulinec cepo wok tokol, kicitanye alak karik cepo pesanik, citanye alak sapunek, citanye alak ketik, citanye alak menonik. Ponto alake latik koromun, kupuryo kot kuponto alake.
- <sup>21</sup>Ye kasatkey citake kutililit om wule mite tukucutecu miyotec kuye mosukwek nyoto terek nyepo latik om wule mite mokoryontenyi, nye kicitapan kutililit kupoyit Yiyintet oñkkyiyta kwiyyisyo tokol nye topon.
- <sup>22</sup>Yaste corokyinotet nyeñuñ nye kipo lekwantit, tyikiyi rip ñalek cepo manta oko koyenet oko cömisyet oko kalyet pontekey wanak oko piko ce kure kaynetap Mokoryontet om mukuleywekwa ce tililec wulin po orit.
- <sup>23</sup>Sanekey tintenotet nyepo perperyo nye puryo ñomnon, nketi nyi kule satu coto wokutyet.
- <sup>24</sup>Puryo kot kumisyini kwek pororin cito nye mutworintetap Mokoryontet, möce kwek ci nye tala om wule mite piko tokol, oñku konetintet nye topon nye muytoy,
- <sup>25</sup>nye paypay ye mite kukete piko co tintentyintos oko neto om poypoyet, omnye muce kukoci Yiyintet poroyinto kurenynkey picoto oñkunket ñalek cepo manta.
- <sup>26</sup>Yoto kuye mosukusow cekto om kasoteywekwa oñkucilile musatit nyepo Setani nyewo nyepo oyik nye kinäm oñkukoci kurup kuyu wule moktoy neto.

## 2 Timosewo 3


- <sup>1</sup>Möce nketi nyi ñalecu! Kule mite wuyinto om pesyosyek cepo letut.
- <sup>2</sup>Mosukwek piko soyi, cemoronjis cesilekey, oñkuperperis, mosukucup Yiyintet, ce meyweye poyik co kiye cekto, ce puryo kot kuñerece, ce puryo kusote Yiyintet,
- <sup>3</sup>Ce puryo kot kukolyoyisyi, ce kawot, ce ñomnsi, ce pararot, ce nyekerec, ce senkere ce toponec.
- <sup>4</sup>Ce ñomntoyisyi, ce silekey koromun, mosukucäm ñerekwek kupël Yiyintet.



- <sup>5</sup>Mosukurip tinit wulo po saŋ, ntene oŋnkutay swamet nyenyi. Asanekey koromun picoto.
- <sup>6</sup>Peti picoto alake wokowut korin oŋnkupayta koruk co moponto swamet, ce kinyikisiy miyotyoni ce leliswekwa oŋnkupayta corokyinotet tokol.
- <sup>7</sup>Korucoto kuce syeme okokoy kule cinetkey ntene puryo kot kunkete ŋalek cepo manta.
- <sup>8</sup>Kuyu wule kitoyis Yane oko Yampure kutay Moses. Kunyo toye mpo picutece ŋalek cepo manta kuyunyoto. Kiwuryo kasoteywek cepo picutece oko koyenet nye moyeme.
- <sup>9</sup>Ntene puryo kot kupuntoy cekto wule low, mosukonket piko tokol perperiyemwa kuyu wule kiyunto pico ayenku Yane oko Yampure.
- <sup>10</sup>Ntene kwerup nyi konetisyet nyimwani oko kopurto nyimwani, oko kito nye otyikyini ani, om soponto, oko muytocinotet nyimwani, oko cömisyet nyimwani, oko titirotet nyimwani,
- <sup>11</sup>oko toŋoŋutek cikwani, oko nyalilya nyimwani. Nketi nyi tukuk tokol ce kikwiyo kis om wule omite ani om Antiyok oko Ikoniom oko Listira. Toŋoŋutek cewoyec ce cotitir omuytoci, ntene kukalya Mokoryontet acone wule mite coto tokol.
- <sup>12</sup>Mosicitaŋany kupoyit manta piko tokol co möce kule cipurte kopurto nyepo Yiyintet om koyomotet oko Yesu Kristo.
- <sup>13</sup>Ntene mosukutosyi kuwuryo koromun piko ce miyotec oko koperperik. Mosukuperperis, oŋnkuperperkey cekto nkit.
- <sup>14</sup>Ntene tosyikey nyi yiy ŋalek cepo manta co kicinetiŋ oŋnkwikwil cömisyet.
- <sup>15</sup>Nketi nyi kule silutekap Yiyintet ce muce kukoniŋ ŋomnonet nye sutuŋ kosopotot om koyenet nye ponte om Yesu Kristo.
- <sup>16</sup>Silutek ce kicesil kuce kintoci Yiyintet cesil tokol, kunyo ponto latik koromun ye kocinetisyek kwek ŋalek cepo manta, oko ye cerenye co kimosokis, oko ye kacesate leliswek oko ye kocinetisyek kopurto nye topon.
- <sup>17</sup>Sukuŋet kukwilakay kunetkey citap Yiyintet okoy kuyem kwiy topon yisyo ake tokol nye topon.

## 2 Timosewo 4

- <sup>1</sup>Kasowuŋ ani om taytap Yiyintet oko taytap Yesu Kristo nye mosukumutyi musankut piko tokol ce kipok oko ce ceptos, oko omnye mosukuco poytoyisyenyi, omwowuŋ kule.
- <sup>2</sup>Mwayte ŋolyontet, syem mwayte ye toponec pesyosyek nto mpo ye miyotec, ketu, reny, titir, netisyek om muytocinotet.



- <sup>3</sup>Omnye mosukupunto pesyosyek ce memuce kot kulimnta piko konetisyet nyepo manta, ntene mosukurup corokyinotet nye nyimwa nkit, oṅnkoruruc konetik cikwa nkit ce mosukumwoci ṅalek ce lime yitik cikwa nkit.
- <sup>4</sup>Mosukutoyis nye komo kulime ṅalek cepo manta, oṅnkulim ceptyonkocok cepo mwiynanet pate.
- <sup>5</sup>Ntene misyini ripkey nyi nkit om aret ake tokol, yiy yitite yisyenṅṅ kuyu mutworintetap Mokoryontet.
- <sup>6</sup>Omnye karik cikoyito ani oyiku korosyontet, kopunto pesyet nyimwani nye opokokte soponto nyi.
- <sup>7</sup>Kwoporye poryet nye topon, kunyo kwawany kamwenet, Kworip koyenet.
- <sup>8</sup>Kunyo konyo ani yawut kutwet nye kwopēlisye, nyoto kunye kutwet nyepo tililinto nye mosukukono Mokoryontet, nye ketintet nyepo manta om pesyonoto. Puryo kot kukono ani nkit, ntene kocini mpo piko tokol co koṅisyi om koyenet ye mokucone neto.
- <sup>9</sup>Syem sorukey co lakwar okoy wuli amite ani.
- <sup>10</sup>Omnye kukusuci Tema ṅerekwek cepo koret, kunye kutaya kunomen kuwo Sesolonika. Kuwo Kresene Kalatiya, kuwe Tito Talmatia.
- <sup>11</sup>Opontekey ani pate oko Luka. Kweru okwantekey Marko omnye ponto latik mokukalya ani yisyet.
- <sup>12</sup>Kwoyokte Tekikos kuwo Efeso.
- <sup>13</sup>Ye keco, sutwo kotit nye kyopokokyi Krapo om Troa. Sutu mpo kitapunek, ntene kupēlis kitapunek cepo syerok.
- <sup>14</sup>Kokwiwo ani kumiyat koromun Alekianta kitoṅintetap karik, mosukuyokyi Yiyintet nkit om ṅalek ce kikwiwo.
- <sup>15</sup>Möce ripkey wule mite neto, omnye kitintentyi om swamet ṅalek ce kicemwowu acek.
- <sup>16</sup>Puryo ci mpo akenke nye kikalya ani ye kyonṅololi oyetekey nyepo tayta, kitaya ci tokol. Puryo kot kurok kuyityi Yiyintet cekto lelisto nyoto.
- <sup>17</sup>Ntene kiripo ani Mokoryontet kukono swamet okoy amuc kot aṅalale ṅolyontet nye yeme kulim Lamek tokol, cesoruneno metap tilisyet.
- <sup>18</sup>Mosukusorwo ani Yiyintet om wule mite miyotyēt ake tokol oṅnkukwero topon okoy wule mite poytoyisyenyi nye mite torot. Kunyo kopurune woyinto wule mite neto okokoy oko okokoy. Yunyoto.
- <sup>19</sup>Osupoywo ani Prisika oko Akwila oko pikap kotap Onesiporo.
- <sup>20</sup>Kipur Erasto Korinso, kunyo kyopokokyi Trofimo Melito omnye kimnyone.



<sup>21</sup>Syem sorukey co lakwar kutompo kot kukatitit koret. Kesupayak Epulo oko Pute oko Lina oko Klautiya oko mpo yeya alak tokol.

<sup>22</sup>Kopurune Mokoryontet mukuleyηη. Opurte akwek tokol poypoyetap Yiyintet.



## Tito

### Tito 1

- <sup>1</sup>Cone parwani wule amite ani Paulo nye mutworintetap Yiyintet oŋnku kiyokintetap Yesu Kristo. Kicekweya ani oŋnkyiyokto wakalye otosyi koyenet nyepo pikap Yiyintet kweyanik oŋnkanet cekto kunket ŋalek cepo manta cepo tininyo,
- <sup>2</sup>nye kokenotet nyepo soponto nye mopoku. Kikurto Yiyintet soponto nyitenyi ikye keny om towunot; kunyo puryo kot kuperperisyi.
- <sup>3</sup>Oŋnkuŋoŋwec ŋolyontoni om pesyet nye yeme. Kicekono ani kule mwayte ŋolyontoni, kunyo omwowu kuyu wulo kimwowo Yiyintet kosopintenyoy.
- <sup>4</sup>Osiluŋ ani nyi Tito werimwani nyepo manta om koyenet nye ceponte. Kante kukoniŋ nyi Yiyintet Papa oko Yesu Kristo kosopintenyoy poypoyet oko kalyet.
- <sup>5</sup>Kyopokokyin ani nyi Kurete kule sukuŋet sat yisyet nye kikiŋet nye kimöce kule takyiy om wuloto. Kyomwowuŋ yoto kule kwey poyik ce kentoci pikap Yiyintet om moŋet ake tokol.
- <sup>6</sup>Pontet nye cekweye kunye moponto lelis ake tokol. Misyini kuponto korket akenke pate, oŋnkukikoyen lekokyi ce puryo kot kusokaran nto ce kimosokis.
- <sup>7</sup>Kosintet kunye kantoyintet nye ripe piko cepo Yiyintet, kunyo puryo kot kuroke kuponto lelis, puryo kot kumisyini ku ci nye silekey koromun, nto nye nyeru lakwar, nto pororin, nto nye moroŋya nyepo pesanik.
- <sup>8</sup>Misyini kwek ci nye poyisyi oŋnkucome tukuk ce toponec. Misyini kwek cito nye ripekey nkit, nye siken, nye paypay oŋnkumuytoy.
- <sup>9</sup>Misyini kwek cito nye kwilat om lokoywek ce toponec; nye cikenekey oŋnkurupe konetisyet nyinyacek. Om aret nye yunyitenyi kuye mosukotitir neto piko alak om konetisyet nyepo manta, oŋnkupor ŋolyontet nye masat om wule mite piko co toye ŋolyontonoto.
- <sup>10</sup>Omnye mite piko ce caŋ ce mosotin ce perpere piko alak om ŋalekwa cepo perpereryo, nto piko ce pëlisyi om koperperisyonoto ku piko co kuweckey kukwane tinitap Yutayek.
- <sup>11</sup>Roke cekereкта ŋalekwa, omnye mite cekto kumose piko cepo kestonik tokol kunete konetisyet nye puryo kot kuroke cinet, omnye möce kule cenyoru pesanik om aret nyepo sornon.
- <sup>12</sup>Kimwey akenke om picoto, nyoto kunye sute cekto kule workoyontemwa, kimwoy kule, “Pikap Kurete kuce kaperperot, cepo kwak, tyoŋin ce miyotec, oŋnkucemoyetis ce puren.”
- <sup>13</sup>Kimwoy neto cito nyoto ŋalek cepo manta, kunyo misyini polyi nyi cekto koromun sukuŋet kunyor koyenet nyepo manta,



<sup>14</sup>nye komo kurupe cekto tyonkocok cepo Yutayek oko ntarastinek cepo piko co kitay n̄alek cepo manta.

<sup>15</sup>Tilil kiy ake tokol om wule mite piko co tililec kwicek nkit, ntene puryo kiy nye tilil om wule mite piko co kiwuryo oṅnkupuryo kot kucōmisiyi, omnye kiciwurta ṅomnonet oko kasoteywek cikwa.

<sup>16</sup>Sutakey cekto kule cinket Yiyintet, oṅnkurok kutoye Yiyintet om yisyonutekwa ce yiye. Kisenkeris oṅnkutoyis nye puryo kot kuyeme kwiy kiy nye topon.

## Tito 2

<sup>1</sup>Möce kule net nyi n̄alek ce rupe konetisyet nyepo manta.

<sup>2</sup>Mwoci poyik kutoloyitu oṅnkuṅomekitu oṅnkuripkey ce ponto koyenet nye kwilat, oko cōmisyet oko muytocinotet.

<sup>3</sup>Mwoci mpo cepyosok kopurto soponto nyetilil. Puryo kumisiyini kot kwek semsemot nto mpo kwek pokitis. Misyini kunetis cek konetisyet nyepo n̄alek cepo manta ce toponec,

<sup>4</sup>sukuṅet koruk ce minkec kucām sanikwa oko lekok,

<sup>5</sup>oṅnkuripkey kutililitu oṅnkwek koruk ce toponec om korikwa ce yweye sanikwa. Sukuṅet komokuṅolole kwapi ci ake tokol lokoywek cepo Yiyintet.

<sup>6</sup>Oṅnkinwoci mpo Oyiperik kuripkey kuyunyoto.

<sup>7</sup>Möce ripkey mpenyi nkit sukuṅet poru yisyonutek ce toponec om kiy ake tokol nye yiye. Misyini netisyet kupoyit manta oṅnkiyiyisyet swama.

<sup>8</sup>Yiyisyet n̄alek ce toku cepo manta ce memuce kot kunyil kutay citake, sukuṅet kusornen punik cekuk omnye moponto ṅolyo nye miyat nye mokuṅalalenecek acek.

<sup>9</sup>Möce kuywey mutworik mokorenikwa, oṅnkuṅerec om kiy ake tokol, nye puryo kot kutintentos.

<sup>10</sup>Mpo kucor kiy ake tokol nyepo mokorenikwa. Ntene misyini kupor kule ciku toponec okokoy oṅnkyiye yisyet nye kacemwowec, sukuṅet kusut kakastayet om wule mite konetisyetap Yiyintet kosopintenyō om kiy ake tokol nye yiye.

<sup>11</sup>Omnye kiceṅany kutok poypoyetap Yiyintet kosut kosopotet om wule mite piko.

<sup>12</sup>Netec kuporwec acek kupeyok coto kule kyaste soponto nye puryo kot kupo Yiyintet oko corokyinotet nyepo koret. Oṅnkyeripkey cipurte soponto nye topon nye rotat nye cōme Yiyintet;

<sup>13</sup>ye ce mite cikeni pesyet nyepo kupeyok ce cemöce koromun. Pesyet nyoto kunye pesyet nye mosukutok woyinto nyewo nyepo Yiyintenyō oṅnkukosopintet Yesu Kristo.





<sup>14</sup>Kikonnkey neto nkit cokusorwec acek om wule mite miyotyoni ak tokol, onkusatec cetililitu onkuwecec ciku pikyi, onkukonec kiyi yisonutek ce toponec.

<sup>15</sup>Net nyi cekto nalcu, onkiyiyisy kamukeywek tokol ye mite titiri, onkipolyi piko co lime nalc cekuk. Mente kot kunyiliŋ ci ake tokol.

### Tito 3

<sup>1</sup>Möce sowu pikuk kuywey poytoyik oko piko co ponto kamukeywek, onkulimnci onkuyiytakey kwi yiso ake tokol nye topon.

<sup>2</sup>Mwoci mente kuŋom kuŋalale cek kwapi ci ake tokol nye puryo kot kuponto parar, ntene möce kuponto sikenotet oko kopurto nye topon nyepo okokoy om wule mite piko tokol.

<sup>3</sup>Omnye kiciku acek ikye perper nye kipuryo kot ciyweyisyi. Kikicepotye cerup aret ake nye kiciku mutworik cepo corokyinotet cepo nalc wok tokol. Kicipurtoy sokornatet oko corokyinotet, nye kicesenkeri piko onkyesenkerkey acek kwacek nkit.

<sup>4</sup>Ntene ntowo kupor Yiyintet kosopinteny toponiyet oko cömisenyi om wule mite piko,

<sup>5</sup>yoto kusopac acek. Kipuryo kot ku kule omnye kiciy acek kiy ake tokol nye topon, ntene om cömisenyi nkit kunye kisopec kusir kowunet nye kikonec acek Muyet Nyetilil nye yiyotet nyelel oko soponto nyelel.

<sup>6</sup>Kikonec acek Yiyintet Muyet Nyetilil kuyomec kupunune wule mite kosopinteny Yesu Kristo,

<sup>7</sup>sukuŋet cesatec cenyolu om wule mite Yiyintet kusir poypoyeny onkyenyoru soponto nye mopoku nye cemite ciken.

<sup>8</sup>Dalc cepo manta coto. Amöce ani kule titirci nyi nalcato sukuŋet piko co yene Yiyintet kusot kukoytokey kwi yis yisonutek ce toponec. Toponec onkuponto latik nalcuteccu om wule mite piko.


<sup>9</sup>Ntene syem koromun tay tintenotet oko pararet nyepo nalc ce nöme ntarastinek. Puryo kot kuponto nalc latik mpo kisic.

<sup>10</sup>Möce sowu aret oyeny cito nye sutu pciyatet; nto kapok yaste kwiyat neto nkit oko nalc ky.

<sup>11</sup>Nketi nyi kule kuwur cicoto onkuporu miyotyoni ky kule masat.

<sup>12</sup>Ye koyoku ani Artema nto Tukiko kuco wule mite nyi kuroke syem koromun ico okoy punu wuli amite ani om Nikopoli, omnye kwayiytekey kule wopur wuloto okoy awany pesyosyek cepo koytityet.

<sup>13</sup>Syem koromun kalye Sena nye nkete ntarastinek oko Apolo sukuŋet kusorkey lakwar kucec poninekwa onkikas kule kanyor cekto kiy ake tokol nye möce.



<sup>14</sup>Mwoci kunetkey piko ceco kukoytokey kwiyis yisyonutek ce toponec, sukuŋet kunyor tukuk ce kolyoy cekto, puryo kot kuroke kupurto kapurto nyepo soponto nye moponto latik.


<sup>15</sup>Kesupayak akwek piko tokol ce cepontekey oko ani. Asupay mpo akwek coronutek cicacek om koyenet. Opurte akwek tokol poypoyet nyepo Yiyintet.



## Filemon

### Filemon 1

- <sup>1</sup>Cone parwani wule amite ani Paul nye ratat om mopusi kupo Yesu Kristo, oṅkucone wule mite yeyanyo Timosewo. Cesiluṅ acek nyi corwenyo Filemon nye kiyiysi tokol,
- <sup>2</sup>oko yeyanyo Apia oko sikorintet nye kiyiysi tokol Arkipo oko pikap Yiyintet tokol ce tuytos koṅuṅ.
- <sup>3</sup>Kante kukonok akwek Papanyo oko Mokoryontet Yesu Kristo poypoyet oko kalyet.
- <sup>4</sup>Yeya Filemon, osomuṅ ani okokoy ye amite osome, oṅkokostoy Yiyintemwani.
- <sup>5</sup>Omnye olime cömisyet nye ponte nyi om wule mite pikap Yiyintet tokol oko koyenet nye ponte om wule mite Mokoryontet Yesu Kristo.
- <sup>6</sup>Osome kule roke kutosyikey kupoyit swama koyomotet nye ceponte acek oko nyi kuyu piko ce kikoyen sukuṅet cinket kupeyok tokol ce ceponte om soppnwwekyo om wule mite Kristo.
- <sup>7</sup>Yeya, kosutwo ani cömisyet nye ponte nyi ṅerekwek ce caṅ oko titiret, omnye kweṅerec nyi mukuleywekap pikap Yiyintet tokol.
- <sup>8</sup>Kwomuci ani oyiku nyikan om Kristo kot omwowuṅ kule yiy kito nye misyini ceyiy.
- <sup>9</sup>Ntene cömisyet kunye sutwo ani osomiṅ ye kotoyiye kuyunyo. Oyiye kuyunyoto nka kot koyiku ani Paulo kiyokintet nyepo Yesu Kristo. Kunyo amite yawut mpo pantanyi oyiku mopusyo kupo kaynetap Yesu.
- <sup>10</sup>Kunyo kosomiṅ om kaynetap Onesimo nye Werimwani nkit om Kristo. Omnye kwoyiku ani kwan om koyenet omite mopusi.
- <sup>11</sup>Kipuryo kot kuponto neto latik om pesyosyek alak om wule mite nyi, ntene ponto yawut om wule cemite acek tukway ani oko nyi.
- <sup>12</sup>Kunyo koyoku kuketkey wule mite om mukuleyto akenke.
- <sup>13</sup>Kwomöce ani kule opurte neto om wuli ye tomite mopusi kupo lokoywek ce toponec, sukuṅet kukalya om otepto nyeṅuṅyi.
- <sup>14</sup>Ntene puryo kot amöce kule osomiṅ ṅolyo nye puryo kot cäm nkit, puryo kot kuroke cisimnciṅ kule talayitu, ntene möce ye kecäm nyi nkit.
- <sup>15</sup>Pesyet ake kiwete Onesimo wule mite nyi kuwany pesyos ce ṅeri kule sukuṅet kuketkey kwopur tukway okokoy.
- <sup>16</sup>Kimo kumutworin yawut, ntene kitosyikey kupël mutworin omnye kikwek yeya om Kristo. Kikwek cito nyepo latik koromun om wule amite ani oṅkuponto latik ce caṅ om wule mite nyi kuyu mutworin oṅku yeya om Mokoryontet!



- <sup>17</sup>Kunyo; ye cömo ani nyi nye cicintosi tukway, kuroke toroc ñerekyi neto kuyu wulo ketetorokto ñerekyo ani.
- <sup>18</sup>Ye kikwiyy neto ñolyo nye miyat om wule mite nyi, nto ye ponto pesento nyenñuñ, yitwo ani pesento nyoto.
- <sup>19</sup>Kosil ani nkit om yewumwani kule, “Ani Paulo nkit nye mosoyoku peaento.” (Puryo kot kuroke osotuñ ani nyi kule yoco ani nyi soppnñuñ)
- <sup>20</sup>Kunyo yeya, kalya comwo ñolyontoni om kaynetap Mokoryontet, roke ñerec mukuleyto nyimwani kuyu yeya om Kristo.
- <sup>21</sup>Oñnket ani kupoyit manta ye osile ñalecu kule meseyiy kuyu wulo kosomiñ, oñnkonket kule meseyiy tosyikey kukeyta.
- <sup>22</sup>Ntene yec oñnkoyiytowo koto nye moru, omnye, oñnket kule mosukuwec Yiyintet somet nyo osome akwek, mosukukalya Yiyintet aco okoy wule omite akwek.
- <sup>23</sup>Kasupayiy Epafra nye cepontekey om mopusi om kaynetap Yesu Kristo.
- <sup>24</sup>Kunyo kesupayiy piko co kyyiysi acek tokol, Marko oko Aristariko oko Tema oko Luka.
- <sup>25</sup>Opurte akwek poypoyetap Mokoryontet Yesu Kristo.



## Puraniyek

### Puraniyek 1

- <sup>1</sup>Kinjololyi Yiyintet mpo kukonyo om kenyisyek co kitil aret ce caɗ oko om wok ce caɗ kupunune wule mite workoyik.
- <sup>2</sup>Ntene kuɗololwec acek om pesyosyecu po letut kupunune wule mite Werinyi. Kitany Yiyintet koret kupunte Werit oɗnku neto nye kikwey Yiyintet kupayta tukuk tokol cemite koret.
- <sup>3</sup>Lekecece neto om lakweyet nyepo woyintap Yiyintet. Kerkey neto Yiyintet kuwoɗnkyi, kunyo ripe neto koret kumukul om swamet nyepo ɗolyontenyi. Nto om letut yu kowo kowun miyotyoni ce piko tokol, kopure yewutap tay nyepo Yiyintet nyewo koromun om koret.
- <sup>4</sup>Kikoci Yiyintet Werit kwek nyewo kupɛl malaykanik, kuyu wulo nyewo mpo kaynet nyenyi kupɛl nyepo malaykanik.
- <sup>5</sup>Omnye tompo kumwoci Yiyintet kenysis malayket ake tokol kule, “Yiku nyi Werimwani; koyiku ani pesyoni Papaɗuɗ!” Tompo mpo kot kumwoci kule, “Mosoyiku ani Papanyi, oɗnkwek neto Werimwani.”
- <sup>6</sup>Ye kikirik kuyok Yiyintet Werinyi poretyet kuce koret, kimwoy kule, “ Misyini kusay malaykanik tokol ce po Yiyintet neto.”
- <sup>7</sup>Kimwoy Yiyintet ɗalek ce nɔme malaykanik kule, “ Yiyintet kunye wece malaykanik kwek yomet, oɗnkuwec mutworiki kwek ɗelyepik ce po mata”
- <sup>8</sup>Ntene mwowu ɗalek ce nɔme Werit kule, “Ayi Yiyintet, ɗecereɗuɗ nyepo poytoyisyet kunye pure kenysis okoy kenysis! Poytoy pikuk om poytoyisyet nyepo manta.
- <sup>9</sup>Cɔme ɗalek ce tililec, oɗnkitay senker ce miyotec. Kunyo Yiyintet nye Yiyintetuɗ kunye kikwey nyi, oɗnkuɗapeniɗ mwayta nyepo ɗerekwek ce po woyinto nyewo koromun, kupɛl ce kikoci coronutekuk”
- <sup>10</sup>Kumwoy mpo kule, “Mokoryontet, nyi kunye kitany koret om yun kipo towunot, Kitanye yewuniyekuk koret torot.
- <sup>11</sup>Mosukupotyoto coto, mosukuyosekitu tokol kuyu siroy, ntene meseɗetu nyi;
- <sup>12</sup>Meseriny nyi cekto kuyu kotit. Mpecek mosukuwecwekey kuyu siroy. Ntene yuye nyi nyoto okokoy, nye puryo kupoku sopoɗuɗ.”
- <sup>13</sup>Tompo kot kumwoci Yiyintet kenysis malayket kule: “Pure nyi yu po yewumwani nyepo tay, okoy okoci punikuk kwek ɗeceret nyepo kerenkokuk.”
- <sup>14</sup>Kunyo malaykanik tokol kuce mukuleywek ce muyet pate ce yicini yisyet Yiyintet. Ce yoktoy neto wokukalya piko ce mosukunyor kosopotet.



## Puraniyek 2

<sup>1</sup>Kunyo misyini cekwil topon ñalek cepo manta ce kicelim sukuñet mente kot cemosokisye kupotwec aret.

<sup>2</sup>Kicipor kule po manta lokoywek ce kisutyi malaykanik mpo kukonyo, nto ci ake tokol nye kipuryo kot kurup nto kuywey kunye kinyor nyo citañany kuyem.

<sup>3</sup>Kunyo cimuci acek kulene kot cecilil ye puryo kot ce cöme ñalek cepo kasopotet nyewo nye tenyo? Mokoryontet nkit nye kinyosyo kupor kosopotenya, nto piko co kilim ñalekyi kuce kiporwec acek kule manta ñalecu kupoyit manta.

<sup>4</sup>Kunyo kitosyi Yiyintet tukukyi cepo manta ce poru, omnye kikwiyy pelutok ceporu swamet oko tukuk wok ce cañ cepo kakitat. Kipciyta mpo kokotutek cepo Muyet Nyetilil kuyu wule moktoy neto.

<sup>5</sup>Kipuryo kot kukoci Yiyintet malaykanik kwek poytoyik cepo koret nye mosukuco, koret nyi ceñolole acek.

<sup>6</sup>Ntene mwowu om wulyo ake om silutekap Yiyintet kule “Yiyintet! Cito ku kiy ne nye mucu nyi kot sot? Nto ci pate kunye kiy ne nye mucu nyi kot rire?”

<sup>7</sup>Kitany nyi neto kopur pesyos ce ñeri kuminiñ kupël malaykanik, kilokyi nyi neto kutwet nyepo woyinto oko koyweyisyyet,

<sup>8</sup>oñkupayta tukuk tokol ce kitany.” Mwowu ñaleca kule, kikoci Yiyintet cito kupayta tukuk tokol, ntene kuyu wule yunto yawut puryo kot ceköse acek kule poytoy cito tukuk.

<sup>9</sup>Ntene ceköse yawut Yesu Kristo nyo kicirek kuminiñit kupël malaykanik kuwany pesyos ce ñeri, sukuñet kumeci piko tokol kupunte poypoyetap Yiyintet. Ceköse kule kicilokyi Woyinto oko koyweyisyyet om met nye kitañany.

<sup>10</sup>Dolyo nyepo manta kule Yiyintet nye kitany oñnkuripe tukuk tokol, kunye kisat kunyol Yesu kupunte toñoñutek, sukuñet kukwer lekok ce cañ kwokunyor woyinto nyenyi. Omnye Kristo kunye ntocini cekto wokunyor kosopotet.

<sup>11</sup>Neto kunye söte kutililitu piko om miyotyoniakwa, neto wanak oko piko co kicesat kutililitu kuponto Papa akenke. Kuyu wulo puryo kot kunomkyini kalilan Yesu ye mokukure cekto kule mpo yeya.

<sup>12</sup>Mwowu kule, “Mosomwoci ani mpo yeyamwani kayneñuñ, mosakastiñ nyi om kwenutap luket nyimwa tokol.”

<sup>13</sup>Mwowu mpo yec kule, “Mosokenekey ani Yiyintet.” Mwowu mpo yec kule, “Amite ani yu opontekey oko lekok ce kikono Yiyintet.”

<sup>14</sup>Kunyo lekok kuce piko ce ponto porto oko korotik. Kuweckey Yesu nkit kukerkeyit oko cekto nye kiponto porto nye kerkey nyimwa. Kikwiyy kuyunyoto kupunte met nyenyi sukuñet kwaranta setani nyewo nyepo oyik . Setanit kunye kiponto kamukeywek om wule mite met,



<sup>15</sup>yoto kuye sukuṅet kutyac piko co kikwek mutworik cepo okokoy ye kisoptos, omnye kiyweye met.

<sup>16</sup>Omnye porukey kupoyit manta kule kipuryo kuco neto cokukalya malaykanik, ntene kuyu wulo mwowu silutek kule, “Kukalya lekokap Apram.”

<sup>17</sup>Kunyo kiweckey neto kukerkeyit mpo yeyanyi om aret ake tokol sukuṅet kwek Tisintet nyewo nye paypay oṅnkupo manta om yisyetap Yiyintet nye kolyoy piko miyotyoniḱwa.

<sup>18</sup>Kunyo muce Yesu yawut kukalya piko co cesyeme, omnye kicesyem neto oṅnkytanḱany.

### **Puraniyek 3**

<sup>1</sup>Mpo yeyamwani ce tililec, ce kikur Yiyintet kunyor woyinto nyepo torot! Asot pa akwek Yesu Kristo, nye kiyok Yiyintet kwek Tisintet nyewo nyepo koyenet nye ciyeni acek.

<sup>2</sup>Kiywey kukeneky neto Yiyintet nyo kikwey neto kwiy yisyenyi kuyu wule kiywey mpo Moses Kotap Yiyintet tokol.

<sup>3</sup>Cito nye tece koto kunye nyoru kakastayet kupël koto nkit. Kuyunyoto ponto Yesu cikasta koromun kupël Moses.

<sup>4</sup>Cito kunye kitece koto ake tokol nye tekat. Ntene kitece Yiyintet tukuk tokol.

<sup>5</sup>Kikwiye Moses cepo manta tokol om kotap Yiyintet orit kuyu mutworintet, kuḱalale yoto tukuk ce mosukumwoy Yiyintet om pesyosyek ce kwoni.

<sup>6</sup>Ntene Kristo kunye po manta kuyu weritap Yiyintet nye ponto kamukeywek kupayta kotap Yiyintet. Kunyo ciku acek konyi ye kacenäm cekwil koromun kokenotet nyoto nye mite cikeni.

<sup>7</sup>Kunyo kuyu wulo mwowu Muyet Nyetilil kule, “Ye kolim pesyoni kutitap Yiyintet,

<sup>8</sup>monte cekwil mukuleywekwok, kuyu wulo kikwiya mpo kukomwoṅ, ye kitoye cekto Yiyintet, kuyu wulo yo kyomite kitela, yo kyosyem Yiyintet.

<sup>9</sup>Wuloto ku wule kisyemeno ani mpo kukomwoṅ, mwowu Yiyintet, okoy kukäs cekto yisyonutekwani ce kyayiy awany kenysisyek artam.

<sup>10</sup>Kunyo kyonerekyi ani piko ce kipo pesyosyecoto, okoy omwowu kule, ‘Kimosokis cekto okokoy om mukuleywekwa, puryo kot konkete arosyekwani.’

<sup>11</sup>Kyonyeru okoy awalkey okurtoci kule, ‘Puryo kot amuci kot okoci cekto wule kemuḱe.’ ”

<sup>12</sup>Mpo yeya, oripkey sukuṅet mente kot kumite kwenumwakwek cito nye ponto mukuleyto nye miyat nye yunyo nye muce kutay Yiyintet nye sopot.





<sup>13</sup>Ntene kito nye möce kule ayiy akwek nye tokunömec om ñolyontoni mwowu kule, “Pesyoni” Kunye möce kule cititirkey acek kwacek nkit om pesyo ake tokol oñknyekäs kule puryo kot kumite ci ake tokol om akwek nye kapayta miyotyey okoy kunyekerit kutay Yiyintet.

<sup>14</sup>Omnye ciku tokol akenke oko Kristo, ye kacekwil ce nöme ñolyontet nye topon nye kiceponte kunyo okoy kupunte pesyet nyepo letut.

<sup>15</sup>Mwowu silutekap Yiyintet kule; “Ye kolim pesyoni kutitap Yiyintet, monte cekwil mukuleywekwok, kuyu wulo kyoyunte yo kyotoye Yiyintet”.

<sup>16</sup>Mpo ño piko co kilim kutitap Yiyintet, oñnkurok kutoyis? Coto ku piko tokol ce kikweru Moses kukwane koretap Misiri.

<sup>17</sup>Mpo ño piko co kinyercini Yiyintet kuwany kenysisyek artam? Picoto kuco kiwurta kwiye miyotyey okoy kupok kuwoñkey kuñetune muswek cikwa kitela.

<sup>18</sup>Piko oñnkoco co kiwolcinikey kukurtoy Yiyintet kule, “Puryo kot okoci cekto wule kemuñe?” Picoto kuco kitoyisi.

<sup>19</sup>Kunyo ceköse yawut kule kipuryo kot kowut cekto orit omnye kipuryo kot kuyen.

#### **Puraniyek 4**

<sup>1</sup>Kunyo ye kikurtowec Yiyintet kule mosicenyoru kamuñet nyo kimwoy. Kumöce ciyweyisye sukuñet mente kot cekäs kule kopoty akenke om akwek nye monyor komuñto nyoto.

<sup>2</sup>Omnye kucelim lokoywek ce toponec kuyu wulo kilime cekto piko cepo keny. Kipuryo kot kunyor cekto latik om lokoywek ce kilim omnye kipuryo kot kuyen.


<sup>3</sup>Kunyo acek co kicecäm kule mosicenyoru kamuñet nyo kikurtowec Yiyintet, kuyu wule kimwoy kule, “Kyawalkey akurte om nerekwewani kule, Puryo kot amuci okoci cekto wule kemuñe.” Kimwoy Yiyintet kuyunyitenyi nka kot kikipok yisyenyi om pesyet nye kitonye neto koret.

<sup>4</sup>Omnye kimwoy ce nöme pesyetap tisap om komosta ake om silutek kule, “Kimuny Yiyintet ye pesyetap tisap nye puryo kot kwiye yisyenyi ake tokol.”

<sup>5</sup>Mwowu mpo yec om ñalek ce nöme ñalecu kule, “Puryo kot amuci kot okoci cekto wule kemuñe.”

<sup>6</sup>Puryo kot kupa wokomuny oko Yiyintet piko co kinyosyo kulim lokoywek ce toponec omnye kitoyis. Kunyo mite piko alake ce ce cömncini kupa orit oñnkuwokomuny oko Yiyintet.

<sup>7</sup>Poru kupoyit manta kule, kikwey Yiyintet pesyet ake nye cekure kule, “Pesyoni.” Kimwoy ñaleca om letut kukatil kenysisyek ce cañ kupunune wule mite Tauti om silutek ce kicesil kule, “Ye kolim pesyoni kutitap Yiyintet, Monte cekwil mukuleywekwok.”



- <sup>8</sup>Nto yunye kikikontoci Yoswa piko okoy kunyor kamuḡet nyepo Yiyintet, nto kipuryo kot kuḡolole Yiyintet ce nōme pesyet ake yec.
- <sup>9</sup>Kunyo tokumite pesyet nye munye pikap Yiyintet kuyu wulo kimunye neto om pesyetap tisap.
- <sup>10</sup>Omnye citake tokol nye kanyor komuḡnto nyo kikirto Yiyintet kunye kemuny om yisyonutekyi kuyu wulo kimunye Yiyintet om yisyonutekyi.
- <sup>11</sup>Kunyo möce cesyem koromun okoy cenyoru komuḡet nyoto sukuḡet kupuryo kot kumite akenke om akwek nye kopoty, kuyu wulo kiyunto cekto omnye kipuryo kot kunyor kamuḡet.
- <sup>12</sup>Sopot ḡolyontetap Yiyintet oḡnkuponto swamet. Datip kupēl ḡatipinto nyepo rotwetap cok. Mute kuwo orit koromun okoy kuponto ye tuytos soponto oko mukuleyto, oko okoy wule tuytos melilok oko mwaytap kowet. Dolyontoni kunye syoce topon corokyinotet oko kasoteywek cepo mukuleywek cepo piko.
- <sup>13</sup>Puryo kiy nye muce kuwunynkey om wule mite Yiyintet. Toku kiy ake tokol nye kicitany om konyekyi. Kunyo wociportoykey acek tokol, om tayta nyenyi.
- <sup>14</sup>Kunyo misyini cekwil acek koromun koyenet nye ceponte, omnye ceponte Tisintet nyewo nye kinyosyo kuwo taytap Yiyintet, nyoto ku Yesu Weritap Yiyintet.
- <sup>15</sup>Tisintet nyewo nyoto kunye puryo kot kutoye mekalyec kurirenec om purenotet nye ceponte. Ntene neto kunye kicesyem om aret ake tokol kuyu wulo cesyemntec acek.
- <sup>16</sup>Kunyo misyini cetitir cekwa tay wule mite poypoyet nyepo ḡeceretap Yiyintet sukuḡet cenyoru kokolyoyisyet oḡnknyenyoru poypoyet nye kolyec om pesyet nye ce möce kokolyoyisyet.

## Puraniyek 5

- <sup>1</sup>Cekweye tisintet nyewo ake tokol kucone kwenutap piko oḡnkkyikoci kwiy yisyet nyepo Yiyintet om kaynetap piko. Sukuḡet kukoytoy kokotutek oko korosek ce tise miyotyoni kwa.
- <sup>2</sup>Omnye puryo kuponto neto swama om aret ake tokol, komuce kupaypayit om wule mite piko ce menket kiy oḡnkwiye leliswek.
- <sup>3</sup>Omnye puryo kot kuponto swamet neto nkit, kumisyini kukoytoy korosek cepo miyotyoni ceci nkit oko miyotyoni cepo piko tokol.
- <sup>4</sup>Puryo ci nye kweyekey nkit kwek tisintet nyewo. Ntene Yiyintet nkit nye kure sukwek tisintet nyewo kuyu wulo kikirto Aron.
- <sup>5</sup>Kunyo kipuryo kot kusutkey Kristo nkit sukwek tisintet nyewo, ntene Yiyintet kunye kikwey neto nyo kimwowu kule, “Yiku nyi Werimwani, koyiku ani pesyoni Papanuḡ.”



<sup>6</sup>Kimwoy om komosta ake kule: “Yiku nyi tisintet nyewo okokoy kenysis, nye rupe tisyontitap Melikisantek.”

<sup>7</sup>Ye kimite Yesu koret kisome kukurtoy om kutit nyewo oko lokik kusome Yiyintet nye muce kot kusorune neto wule mite met. Celimnci neto omnye kiyweye Yiyintet.

<sup>8</sup>Kunyo nka kot ki Weritap Yiyintet, ntene kinetkey kuyweyis kupunte toŋoŋutek ce kitaŋany.

<sup>9</sup>Nteyu kowo cesat kunyol, yoto kwek neto wule lukune kosopotet nyepo piko tokol co yweye neto.

<sup>10</sup>Yoto kukwey Yiyintet neto kwek tisintet nyewo, nye rupe tisyontitap Melikisantek.

<sup>11</sup>Ceponte acek ŋalek ce caŋ ce mocemwowu ce nöme ŋolyontoni, ntene korom ye mocerorwok omnye oyiku wuyec ye monket.

<sup>12</sup>Omnye nka kot kwoyiku akwek pesyosyecu konetik, ntene omöce yec cito nye kenetak ŋalekap Yiyintet cepo tayta. Ye koto oyome omik ce wuyec, kunyi tolwe ceko.

<sup>13</sup>Omnye lekwa ci tokol nye luwe ceko, omnye menkete cepo manta oko ce puryo kot kupo manta.

<sup>14</sup>Po omik cewuyec piko ce woyec co kikonetkey oŋnkonket ŋalek ce miyotec oko ce toponec.

## **Puraniyek 6**

<sup>1</sup>Kunyo roke cipe tay om konetisyet nyewo nye kilot, oŋnkyepokokyi let konetisyet nyo kinyosyi nyepo Kristo. Puryo kot kuroke yec ce konu konetisyet, nye ciyene Yiyintet oko kuyu wule cerenyntyoykey om miyotyonykyo cepo keny.

<sup>2</sup>Coto ku konetisyet nye nöme Potisonisyet, kakameretap yewuniyek, kotutunetap met oko musankut nye mopoku.

<sup>3</sup>Kunyo cipe tay! Mosikyiy pate kuyunyoto ye kacäm Yiyintet.

<sup>4</sup>Omnye cimuce kulene ceketu kot kurenynkey yec piko co kimosokis? Kikinyor lakweyetap Mokoryontet Yiyintet, kikicemcem kokotutyet nyepo torot, oŋnkunyor Muyet Nyetilil.

<sup>5</sup>Kikonket cekto keny kule topon ŋolyontetap Yiyintet, oŋnkunyor swamet nyepo koret nyin conii.

<sup>6</sup>Yoto kwasta cekto koyenet nyimwa, komokomukoktos kot cewec cekto yec kot kurenynkey, omnye mite kuwuyitocini murtowontet Weritap Yiyintet oŋnkuparta kunyil piko.

<sup>7</sup>Kocini Yiyintet kupeyok teŋekap koret kwak ye koropentyi kuye peko, yoto kupityo omik cepo latik om wule mite piko co potisyi.



<sup>8</sup>Ntene ye kopityo kotok, oko samiyita, kupuryo kot kuponto yoto latik, oṅnkurik kucup Yiyintet, nto nyepo letut cepele mata kuloyo.

<sup>9</sup>Ntene mpo yeya, nka kot kaceṅalal acek kuyunyi, ntene cikenenokey akwek kupoyit manta. Cinket kule oponte kupeyok cepo kosopotet nyimwoṅ.

<sup>10</sup>Puryo kot kuwurat Yiyintet, kunyo puryo kot kuyutye yisyet nye kyayiy oko nye tomite oyiye nyo kyoporci om yisyet nye kyokalye pikap Yiyintet.

<sup>11</sup>Dolyontet nyewo nye ce möce acek kunyi kule, kutitir ci tokol om akwek okoy pesyet nyepo letut, sukuṅet kwitita kupoyit manta tukuk ce okeni akwek.

<sup>12</sup>Mocemöce kule opuren, ntene ce möce kule akerkeyitu piko ce kikoyen oṅnkumuytoy, sukuṅet kunyor tukuk ce kikirto Yiyintet.

<sup>13</sup>Yo kiwolekey Yiyintet kukurtoci Apram. Kiwalkey neto kwine nkit, omnye kipuryo nyewo nye pële neto nye mokuwolyikey.

<sup>14</sup>Kimwoy kule, “Mosokonij ani nyi kupeyok oko mucokoronik ce caṅ”

<sup>15</sup>Yoto kumuytoci Apram okoy kunyor tukuk ce kikirto Yiyintet.

<sup>16</sup>Ye kewalkey cito, kuwolyinikey citake nyewo kupël neto, nto kawalet kunye sate kuwany tintenot ake tokol.

<sup>17</sup>Möce Yiyintet kule oporu kutok topon piko ce mosukunyor tukuk ce kikirto neto kule puryo kuwecwece kenysis kito nye tyikini, yoto kutosyi kawalet nyenyi kirotyet.

<sup>18</sup>Kunyo kikwiyisye Yiyintet tukuk oyeny, ce mocimuce kot cewec oṅnkupuryo kot kuperperisi Yiyintet, tukucoto ku kurtoyenyi oko kawalenyi. Kunyo acek co cemwecini wule mite neto kuce möce cekwilokisye om kurtoyey nyo kicikoci taynyacek.

<sup>19</sup>Ceponte acek kurtoyey nyitenyi kunye kito nye kwile mukuleywekyacek, po manta nye cikenekey, punte siret wule kiceṅar om kotap Yiyintet nyepo torot okoy kupunto otepto nyetilil nyepo orit.

<sup>20</sup>Kinyosyo Yesu kuwo wuloto om kaynenyacek, omnye kikwek tisintet nyewo nyepo okokoy nye kirupe tisyontitap Melikisantek.

## Puraniyek 7

<sup>1</sup>Melikisantek kunye Kinko nye kipo Salem oṅnku tisintet nyepo Yiyintet nyewo nyepo torot. Kunye kituye Apram kucone poryet wule kikiporye kot kukwet kinkonik. Yoto kusomnci Melikisantek neto kupeyok.

<sup>2</sup>Kukoci Apram neto taman om pokol cepo tukuk tokol ce kikipor. (Dolyontet nyepo tayta nye poru kaynani, Melikisantek ku kule, “Kinko nyepo toponiyet,” kunyo omnye ki Kinko nyepo Salem, porwec kaynenyi kule, “Kinko nyepo kalyet.”)

<sup>3</sup>Puryo kot cinket kwan nto kamet nto mpo kukonyi. Mocinket ye kiceye nto ye kime. Kerkey neto oko Weritap Yiyintet, kunyo tisintet neto okokoy.




- <sup>4</sup>Kunyo möce okäs woyinto nye kiponto. Apram nye kukonyo nyewo kunye kikoci neto taman om pokol cepo tukuk ce kikiporune poryet.
- <sup>5</sup>Kunyo mucokoronikap Lefi ce tisik kuce cömncini Ntarastit koruruc taman om pokol om wule mite pikap Israel. Kunyo ruruce cekto wule mite mpo Yeyamwa pikap Israel nka kot ku mucokoronikap Apram coto.
- <sup>6</sup>Melikisantek kunye kipuryo ku mucokoretap Lefi, ntene kinyor taman om pokol ce kikoci Apram nye kicekurtoci oṅnkusomnci kupeyok nyo kikikurtoci Yiyintet.
- <sup>7</sup>Dolyontet nyepo manta kunyi kule, somncini nye miniṅ nyewo kupeyok.
- <sup>8</sup>Nyuru tisik co poku taman om pokol, ntene ce nöme Melikisantek, kinyor cito nye sope taman om pokol kuyu wulo mwowu silutek.
- <sup>9</sup>Omnye cimuce mpo cemwoy kule, Lefi nyo nyuru taman om pokol kunye kikon taman om pokol kupunte Apram,
- <sup>10</sup>omnye kitompo kot ce yi Lefi nye kitokumitowune porto nyepo kukonyi Apram yo kinyoru Melikisantek.
- <sup>11</sup>Kicikoci pikap Israel Ntarastinek kupunte tisyontit nyepo Lefik. Kunyo ntoyune kinyolunot yisyet nyepo tisik, nto kipuryo kot kuroke kutok yec tisintet ake nye piciyat, nyoto ku tisintet nyerupe Melikisantek nye puryo kot ku Aron.
- <sup>12</sup>Omnye ye kacewecwec tisyontit, kumöce mpo kule cewecwec ntarastinek.
- <sup>13</sup>Mokoryontet nyo nye ceṅolole om ṅalecu kunye po aret ake. Aret nyoto kunye tompo kot kwiyis cito mpo akenke kwek tisintet om meset nyetilil.
- <sup>14</sup>Cinket kutok topon kule kicone Mokoryontenyo kotap Yuta. Kunye kipuryo kot kuṅalale Moses ce nöme tisik cekwone koto nyitenyi po Yuta.
- <sup>15</sup>Kunyo kutok topon koromun kule, kutok Tisintet ake nye kerkey oko Melikisantek.
- <sup>16</sup>Kipuryo kot kwek neto tisintet om ntarastinek cepo piko, kikwek tisintet om swametap soponto nye moponto ye ṅete.
- <sup>17</sup>Omnye mwowu silutekap Yiyintet kule, “Meseyeku tisintet okokoy, om tisyontit nyepo Melikisantek.”
- <sup>18</sup>Kunyo kicinum citore tapan ntarastit nyepo kenye, omnye puryo kot kuponto swamet oko moponto latik.
- <sup>19</sup>Omnye puryo kot kusat ntarastinekap Moses kunyol kiy ake tokol. Kunyo kucekon yawut kokenotet nye topon nye cimuci cekwa celekityi wule mite Yiyintet.
- <sup>20</sup>Ntene mite kawalet nyepo Yiyintet. Kipuryo kot kumite kawalet yo kiyiku alake tisik.
- <sup>21</sup>Kikwek Yesu tisintet om kawalet yo kimwowu Yiyintet kule, “Kakuwalkey Mokoryontet kunyo puryo kot kuwece kasoteywekyi, ‘Meseyeku nyi tisintet okokoy.’”



- <sup>22</sup>Kunyo pciyatet nyepo Yesu kunye kwile kule kirotyet nyenyi kunye topon nyepo manta.
- <sup>23</sup>Mite mpo pciyatet ake yec. Ki caŋ tisik coto omnye kipok nye kipuryo kot komuce kutosyikey om yisyemwa.
- <sup>24</sup>Ntene Sope Yesu okokoy. Kunyo puryo kot kuweti yisyenyi oko tisyontit wule mite citake.
- <sup>25</sup>Kunyo muce neto yawut oko okokoy kusop piko co kwoni wule mite Yiyintet kupunte neto, omnye sope okokoy sukuyetyecini cekto om wule mite Yiyintet.
- <sup>26</sup>Kunyo Yesu nye Tisintet Nyewo nye yemekey oko tukuk ce cemöce acek. Kunye Tilil, moponto lelis, nto miyotyö, kweyat om wule mite piko co ponto miyotyö, oŋnkukicilaŋnta kuwo kopurune torot wule low.
- <sup>27</sup>Puryo kot kukerkey oko tisik alak, momöce kule kukoyto kwak korosek cepo miyotyönik kunyosye kunyo cepo ceci nkit ntekere cepo miyotyönik cepo piko tokol. Kikon korosyontet nyepo aret akenke nkit nye yeme. Yoto kuyo kikonukey neto nkit.
- <sup>28</sup>Kweye ntarastinekap Moses piko co puryo kot kutoponec kuwoŋnkyi kwek Tisik. Ntene kurtoyö nyepo Yiyintet nye kiwalkey nye kiconi letutap. Ntarastinek kunye kikweye Werit nyetilil okokoy.

## Puraniyek 8

- <sup>1</sup>Kunyo, ŋolyontet nyewo nye cemwowu acek kunyi kule; Ceponte acek Tisintet nyewo kupoyit manta nye yunyo, nye pure yewutap tay nyepo ŋeceretap Yiyintet nyepo Kamukeywek om torot.
- <sup>2</sup>Mite kwiysisi kuyu Tisintet nyewo om Otepto Nyetilil nye Pëlisyi, nyoto kunye wemet nyepo manta nye kitec Mokoryontet, nye kipuryo kot kutece ci.
- <sup>3</sup>Cekweye Tisintet ake tokol kule sukuŋet kukoytoy kokotutek oko korosek ce cikocini Yiyintet. Kunyo misyini kuponto mpo Tisintet nyinyo nyewo kito nye koytoy.
- <sup>4</sup>Nto yunye kupo neto koret, nto komoyeku Tisintet mpo kisic, omnye mite tisik ce caŋ ce koytoy kokotutek kuyu wulo mwoytoy Ntarastinekap Yutayek.
- <sup>5</sup>Yisyyet nye yiye cekto kuyu tisik kunye kerkeyinto oŋnku rurwet nyepo meset nyetilil nye mite torot. Kerkey wule kiyunto om Moses. Omnye ye kikirik kutec wemet, yoto kumwoci Yiyintet neto kule, “Käs kule ketec kiy ake tokol kuyu wulo kukuciporuŋ om tulwo.”
- <sup>6</sup>Ntene kuyu wulo yunto, kicikoci Yesu yisyyet nyepo tisyontit nyewo kupël nyimwacek, kuyu wulo topon kirotyet nye kikwiytoy neto om kwenutap Yiyintet oko piko, omnye kiyonje kirotyet nyitenyi tukuk ce toponec kupëlis.
- <sup>7</sup>Omnye nto kipuryo kot kuponto lelis kirotyet nyo kipo tayta, nto kipuryo kot kumöce Yiyintet kukon kirotyet nyepo oyeny.



<sup>8</sup>Ntene kireny Yiyintet pikyi yo kinjolole kumwowu kule, “Mwowu Mokoryontet kule, mite kukwoni pesyosyek, ye masayiy ani kirotyet nyelel oko pikap Israel oko kotap Yuta.

<sup>9</sup>Puryo kot kukerkey kirotyet nyoto oko nyo kyoyiye ani oko mpo kukomwa, om pesyet nyo kyokwerune ani cekto kukwane koretap Misiri. Kipuryo kot kurip kuywey kirotyet nyoto kyoyiye ani oko cekto. Kunyo kyayaste ani nye kimolimncini, yunyoto wule mwoytoy Mokoryontet.

<sup>10</sup>Mwowu Mokoryontet kule, kirotyet nye masayiy ani oko pikap Israel om pesyosyek ce kwoni kunyi, Mosokoci kupurune ntarastinekwani kasoteywekwa orit, mososil mukuleywekwa orit. Mosoyeku ani Yiyintemwa, onkwek cekto pikwani.

<sup>11</sup>Puryo ci om cekto nye muce kunet citake nto mpo kunet yeyanyi kumwoci kule, ‘Roke nket Mokoryontet.’ Omnye mosukonketo piko tokol, kuceke lekwa nye miniñ okoy cito nyewo.

<sup>12</sup>Omnye mosakalye ani leliswekwa, nye kamosoti yec miyotyoniwa.’’

<sup>13</sup>Ye kanjalale Yiyintet kumwoy kule kirotyet nyelel, kuporkey kule sute Yiyintet kule kiyosit kirotyet nyo kipo tay, kunyo kiy ake tokol nye mite kuyositu kunye mosukupot lakwar.

## **Puraniyek 9**

<sup>1</sup>Kiponto kirotyet nyo kipo tay ntarastinek cepo sayet oko otepto nye tilil nye kikweye cito.

<sup>2</sup>Kicetec yoto wemet sañ nye cekure Otepto Nyetilil. Kimite orit kito nye yoñe tarit, oko meset, oko mukatyantet nye kacesoci kupoyit Yiyintet.

<sup>3</sup>Otepto nyepo oyeny kunye kiceñare siret. Kumite otepto nye cekure. Tilil wule po Cetililec.

<sup>4</sup>Nye kimite meset nyepo Saput nye kicepele korosek ce poñu oko santukut nyepo kirotyet nye kicilume Saput, oko teret nyepo Saput nye kimite orit Mana, oko koroktap Aron nye kiponto sokek ce kipityo, oko rwontok oyeny ce kicesil ntarastinek.

<sup>5</sup>Kimite parak om yoto tyonjik alake ce cekure Cerupin ce poru woyintop Yiyintet, ce kiponto kepepok ce keyene otepto nyepo yo cikolye miyotyoni. Ntene puryo kot kumite yawut poroyinto nye cimuce cerorune wule kiyunto tukucoto tokol.

<sup>6</sup>Kiceyiyta tukucoto kuyunyoto. Kunyo kiwute tisik pesyosyek tokol wemet nyepo sañ wokwiye yisyonutekwa.

<sup>7</sup>Ntene Tisintet Nyewo nkit pate kunye kiwute wemet orit nyepo oyeny aret akenke om kenyit akenke. Kisute yoto korotik ce kikoytoy kwek korosek cepo leliswek ceci nkit oko leliswek ce kikwiye piko nye puryo kot kunkete kule kyiye miyotyeyt.





- <sup>8</sup>Nete Muyet Nyetilil kupor kutok topon om tukucutecu kule tompo kuyatakay aret nye weti Otepto Nyetilil nye Pëlisyi, ye tokumite kutekat Wemet nyepo saŋ.
- <sup>9</sup>Pelutyet nyitenyi nye poru wule yunto pesyosyecu. Poru kule kokotutek oko korosek cepo tyoŋik ce kocikoci Yiyintet kuce puryo kot kusöte kunyol mukuleyap cito nyo soye.
- <sup>10</sup>Omnye nömekey coto tokol oko omit, oko ce ceye, oko sokwonutec wok tokol ce cipukte simnyo. Ntarastinek coto kuce nöme wule po porto saŋ ce mite kwiyisi okoy kupunto pesyet nye mokusat Yiyintet tukuk tokol.
- <sup>11</sup>Ntene kico Kristo kuyu Tisintet nyewo nyepo tukuk ce toponec ce mite yawut. Wemet nye yicini neto kunye nyewo oŋkusatat nye pëlisyi, nye puryo kot ku wemet nyo kikwiye piko. Kunye puryo kot kupo koroni kicitonye.
- <sup>12</sup>Yo kiwute Yesu Otepto Nyetilil nye Pëlisyi aret akenke kuwany kupok, kipuryo kot kusut yoto korotik cepo warek nto tuka wokukoyto kwek korosek, ntene kiweto korotiki nkit oŋnkukonec acek kosopotet nye mopoku.
- <sup>13</sup>Kunyo nteye korotikap warek oko cepo yeyik oko aryantet nyepo rorta nye kacepel kuce ye kocitotoci piko ce puryo kot kutililec, komuce kowun kutililitu om miyotyoni kwa.
- <sup>14</sup>Kunyo, omnye manta coto, ku aret cetya nyun ce muce kowun korotikap Kristo nye kikonkey kupunte Muyet nye mopoku kwek korosyontet nye nyolunot om wule mite Yiyintet. Korotikap Yesu kuce wece kutoponitu kasoteywek cicacek sukuŋet kyiy yisyet nyepo Yiyintet nye sopot.
- <sup>15</sup>Kunyo, Kristo kunye söte kirotyet nyelel sukuŋet kunyor piko co kikir Yiyintet soponto nye mopoku nyo kikirto. Muce kwiyakay ŋolyontoni omnye kime Kristo sukuŋet piko kukwane miyotyoni kwa co kikikwiye ye kitokupoytoy ntarastit nyepo keny.
- <sup>16</sup>Ye mite kirotyet nye kiwalkey cito, kumöce cinket kule kime cicoto.
- <sup>17</sup>Omnye puryo kwiyisi ŋolyo nyepo kirotyet ye tokusope nyo kiwölekey kukurto. Yiyisi pate ye kame cito nyo kikirtoy.
- <sup>18</sup>Kuyunyoto omne sukuŋet ciyisye korotik cekwil kunyol kirotyet nyepo tay.
- <sup>19</sup>Kinyosye Moses yoto kumwoci piko ntarastinek tokol kuyu wule kiyunto. Nto om letut kunäm korotikap tuka oko warek oŋnkutankware peko, oŋnkutotoci kitaputap ntarastinek oko piko tokol kwiyisye ketit nye mwa koromun nye cekure Isop oko putekap kecirek ce murwonec.
- <sup>20</sup>Kimwoy kule, “Koroticu kuce kwile kukwilakay kirotyet nyo kukonok Yiyintet kule orip.”
- <sup>21</sup>Om aret nye yunyoto kutotoci Moses korotik wemet oko kiy ake tokol nye kyiyisye ye cesoye.



<sup>22</sup>Kito nyepo manta kuyu wulo yunto ntarastinek kunyi kule, korotik kuce wune kutililit kiy ake tokol. Kunyo puryo kot cimuce cikalya miyotyoniik ye puryo kot citata korotik

<sup>23</sup>Kunyo tukucutecu ce akerkeye oko tukuk cepo torot kuce kicesat kutililitu om aret nye yunyitenyi. Ntene tukuk cepo torot kuce möce korosek ce pëlisyi.

<sup>24</sup>Omnye kipuryo kot kowut Yesu Otepto Nyetilil nye kicitanye yewuniyek, nye kerkeyinto nyepo manta. Ntene kiwo torot, wule mitowune yawut kuporyewec acek om taytap Yiyintet.

<sup>25</sup>Kiweti Tisintet nyewo aret akenke om kenyt akenke Otepto Nyetilil, kisute yoto korotik cepo tyonjik, ntene kipuryo kot kokoytokey Kristo kuwo orit aret ce cañ,

<sup>26</sup>omnye nto kikwiyy kuyunyoto nto kimuce kutany aret ce cañ kuceke ye kicitany koret. Ntene wule kikwiyyta kunye kiporkey yawut aret akenke om pesyosyecu po letut, sukuñet kunum miyotyoniik, omnye kikoytokey nkit kwek korosyontet.

<sup>27</sup>Mosukume ci tokol aret akenke, nto om letut kuco musankut.

<sup>28</sup>Kuyunyoto kicekon Kristo aret akenke kwek korosyontet nye numu miyotyoniik cepo piko ce cañ. Mosukuco aret nyepo oyeny, nye puryo kot kuconi kule casat miyotyey, ntene coni cokusop piko ce mite kukonye neto.

## Puraniyek 10

<sup>1</sup>Ntarastinekap Yutayek kuce poru pate kuyu rurwet nyepo wule yunto kerkeyinto nyepo tukuk ce toponec ce mite tay, nye puryo kot kuporu wule yunto tukucoto kupoyit manta. Kunyo komuce kulene ntarastinek kot kusat kunyol piko ce kenekey korosek pate, cekyicini Yiyintet kila kenyt?

<sup>2</sup>Nto yunye piko co soye Yiyintet, kuce kiciwun miyotyoniikwa kupoyit manta nto puryo kot konkete kule mite miyotyey. Nto kiciyonnto nye mokyiye korosek.

<sup>3</sup>Kunyo kuyu wule yunto korosek co cikoytoy kila kenyt kuce sowu kunket piko miyotyoniikwa om kenyt ake tokol.

<sup>4</sup>Omnye puryo kot komuce kenys kot kowun miyotyoniik korotik cepo yeyik oko warek.

<sup>5</sup>Omnye ye kikirik kuco Yesu koret, kimwoci Yiyintet kule: “Puryo kot möce nyi korosek oko kokotutek, ntene kiyiytowo ani nyi porto.

<sup>6</sup>Puryo kot ñerekyini korosek ce cepele kumukul, nto kokotukek ce numu miyotyoniik.

<sup>7</sup>Yoto omwowu kule, ‘Yiyintet omite yu kule ayiy kito nye möce nyi kule ayiy ani, kuyu wulo kicesilyo ñalek ce nōmo ani om kitaputap Ntarastinek.’ ”

<sup>8</sup>Kimwoy nyepo tayta kule, “Kipuryo kot möce nyi nto ñerekyini korosek oko kokotutek oko mpo korosek cepo tyonjik ce cepele.” Kimwoy kuyunyoto nka kot cikoytoy korosecutecu tokol kuyu wulo mwoytoy ntarastinek.




- <sup>9</sup>Oṅnkumwoy yec kule, “Yiyintet amite yu saṅet ayiy kiy tokol nye möce nyi kule ayiy ani.” Kunyo kinum kuwec Yiyintet korosek tokol co kipo tay, sukunet kuker yeto korosyontet nyepo oyeny.
- <sup>10</sup>Omnye Yesu Kristo kunye kiwany yisyet nye kimokyini Yiyintet. Omnye kisatec acek cetililitu om miyotyoni aret akenke om porto nye kime, kuyem nyoto.
- <sup>11</sup>Yonye tisintet Yutoyintet ake tokol kila pesyo oṅnkwi yisyet nye koytoy kokotutek ce caṅ ce kerkey, ntene puryo kot komuce kot konum kokotutecoto miyotyoni.
- <sup>12</sup>Ntene Kristo kunye kikon kokotutyet akenke nyepo okokoy nye numu miyotyoni oṅkopure yewutap tay nyepo Yiyintet.
- <sup>13</sup>Kunyo mite kopure wuloto okokoy pesyet nye mokukoci Yiyintet kwek puniki nyecerok cepo kerekoki.
- <sup>14</sup>Kunyo om korosyontenyi akenke, kunye kisat kunyol okokoy piko ce kimo kiponto miyoty.
- <sup>15</sup>Kwile mpo Muyet Nyetilil kumwowu nyepo tayta kule,
- <sup>16</sup>“Mwowu Mokoryontet kule, Mosaiy ani kirotyani oko cekto om pesyosyecoto, mosokoci kopurune ntarastinekwani mukuleywek cikwa, mososil kowut kasoteywekwa orit.”
- <sup>17</sup>Oṅnkumwoy yec kule: “Yoto kuye komosoti yec miyotyoniwa oko ṅalek ce miyotec ce kikwi.”
- <sup>18</sup>Kunyo, ye kicikalya pic miyotyoniwa kupuryo kot kutocemöce yec kokotutek ce numu miyoty.
- <sup>19</sup>Kunyo mpo yeya, cimuci yawut ciwut Otepto Nyetilil nye puryo kot cemuytosi, omnye kime Kristo kupo acek.
- <sup>20</sup>Neto kunye kiyotwec aret nyelel nyepo soponto nye cepunte totetap siret, nyoto kunye porto nyepo Kristo nkit.
- <sup>21</sup>Ceponte Tisintet nyewo nye poytoy kotap Yiyintet.
- <sup>22</sup>Kunyo akente cekwa cekite wule mite Yiyintet nye ceponte mukuleyto nyepo manta, oko koyenet nye kwilat, oko mukuleywek ce kicesit cinum kasoteywek ceponto leliswek, oko porwonik ce kiciwune peko ce tililec.
- <sup>23</sup>Möce kule cekwil kokenotet nye ceponte, omnye cinket kupoyit manta kule mosukoyitita Yiyintet kurtoyete nye kikirto.
- <sup>24</sup>Möce kule cisot wule moceriptekey. Cikalyekey acek kwacek nkit om cömisyete oṅkwi yisyet nye topon.
- <sup>25</sup>Monte kyaste nye komo cetuytosi om kirwoke kuyu wulo yiytoy piko alake yawut. Ntene möce cititirkey koromon kuyu wule kokäs kule karik Pesyetap Mokoryontet.



- <sup>26</sup>Omnye ye kocetosyikey kiyi miyotyey cinketi oṅnkurok yec kicinket ṅalek cepo manta. Kupuryo kot kumite yec korosyontet ake nye muce kunum miyotyoni.
- <sup>27</sup>Kito nye koṅet pate ku cemuye om kito nye mokwiyakay, nyoto ku musankut nyepo mata nye loye nye mokwaranta piko co toye Yiyintet!
- <sup>28</sup>Cepoköce kume nye mocesoye ci ake tokol nye koyiri ntarastinekap Moses, ye mite piko oyenku nto somok ce kiköse ye kiyiye cicoto ṅolyontonoto.
- <sup>29</sup>Kunyo asot pa, mosukutaṅany kulene cito nyo nyile Weritap Yiyintet? Do nye nyile kule puryo kot kupo latik korotik cepo kirotyet nyo kisope neto miyotyey? Do nye cupe Muyet Nyetilil nyepo poypoyet? Sot pa misyini cicoto kunyor taṅanynta nye tya?
- <sup>30</sup>Omnye cinket cito nye kimwowu kule, “Mosoyoku ani,” Oṅkumwoy yec kule, “Mosukumutyi Mokoryontet pikyi musankut.”
- <sup>31</sup>Dolyo nyepo muyot koromun ye kesuci cito yewuniyekap Yiyintet nye sopot!
- <sup>32</sup>Möce asot wule kyoyunte akwek om letut yu kowo kulucok lakweyet nyepo Yiyintet. Kyotaṅany om tukuk ce caṅ oṅnkurok otitir nye kipuryo kot kupëlok wuyinwek.
- <sup>33</sup>Kicecupok pesyosyek alak om taytap piko tokol oṅnkyitaṅanyak oṅnkoyomekey mpo oko piko alak ce kicitoṅonye kuyunyoto.
- <sup>34</sup>Kyotaṅany mpo oko piko ce mite mopusi, oṅnkomuytoci om ṅerekwek cenyapan tukukwok tokol, omnye kyonketi kule ceponte kito ake nye topon nye pëlisyi nye pure okokoy.
- <sup>35</sup>Kunyo monte kyaste titirotet nyimwoṅ omnye mosukukonok kokotutyet nyewo.
- <sup>36</sup>Möce omuytoci sukuṅet ayiy kito nye möce Yiyintet, oṅnkonyoru kito nyo kikurto neto.
- <sup>37</sup>Kuyu wulo mwowu silutekap Yiyintet kule, “Om poroyinto nye miniṅ yawut, ye mosukuco neto nyo con, puryo kot kulilenekey.
- <sup>38</sup>Ntene mosokuyen oṅnkusopco pikwani co yiye cepo manta. Nteye kotepe kot kuketitakey ake let, kupuryo kot oṅerekyini ani nyoto.”
- <sup>39</sup>Puryo kot ciku acek piko co ketitoykey let okoy kupoty. Ntene ceponte koyenet, kunyo mosicisopec.

## Puraniyek 11

- <sup>1</sup>Koyenet kunye poru kule po manta tukuk ce ce mite ciken, oṅnkyinket kule po manta co moceköse om konyek.
- <sup>2</sup>Om koyenet nyimwa, kunye kisutyi piko ce kipo keny kucämnta Yiyintet cekto.



- <sup>3</sup>Om koyenet kunye sukuŋet cinket acek kule ŋolyontetap Yiyintet kunye kitany koret om tukuk ce toku kukwane tukuk ce motoku.
- <sup>4</sup>Om koyenet kunye kisutyi kucämnta Yiyintet kule topon korosyontet nyepo Apel kusir nyepo Kain. Kicämnta Yiyintet kule po manta Apel kupunte koyenet nye kiponto, omnye Yiyintet nkit kunye kicäm kokotutyetap Apel. Kunyo nka kot kime keny kutoku kwiyisyi koyenenyi.
- <sup>5</sup>Om koyenet kunye kisutyi cesut Enok kuwo torot kusope nye kipuryo kot kume. Kipuryo kot cenyor neto omnye kisut Yiyintet kuwo torot. Mwowu silutekap Yiyintet kule, kiŋerece Enok Yiyintet kunyo kutompo kot cesut kuwo torot.
- <sup>6</sup>Puryo kot kuŋerekyini Yiyintet ci tokol ye moponto koyenet. Omnye ci tokol nye coni wule mite Yiyintet kunye misyini kuyen kule mite Yiyintet, kunyo kocini musyaret piko ce cenye wule mite neto.
- <sup>7</sup>Om koyenet kunye kikoci kulimnta Nuwa kosowunotetap Yiyintet nye kimwoci tukuk ce kikwoni ce kipuryo kot komuce Nuwa kot kukäs. Yoto kulimnci neto Yiyintet, kutec Rapet nye kisop neto oko piko tokol cepo kanyi. Yoto kumutyi musankut koret oŋnkunyor kupeyok co cenyoru ye ponte koyenet.
- <sup>8</sup>Om koyenet kunye kisutyi Aprayam kulimnci Yiyintet yo kikure kunomen kuwo koret ake nye kikikurtoci kule sokoci kwek nyenyi. Yoto kunomen Aprayam nye kipuryo kot konkete wule weti.
- <sup>9</sup>Om koyenet kunye kisutyi Aprayam kumiŋis kuyu tontet om koret nye kikikurtoci Yiyintet neto. Kiminye wemanik kuyu Isaka oko Yakopo, ce kikikurtoci Yiyintet mpecek.
- <sup>10</sup>Kikonye Aprayam moŋet nye kicetec topon, moŋet nyoto kunyo kicece oŋnkutec Yiyintet nkit.
- <sup>11</sup>Om koyenet mpo kunye kinyorta Sara swamet okoy kukoyakay nka kot kikiyosit nye kimemuce kuyi lekoy. Kinket neto kule kikirto Yiyintet kunyo kikenekey Yiyintet.
- <sup>12</sup>Kunyo nka kot kime cicitenyi akenke Aprayam, kiyi mucokoronik ce caŋ cete kokelik cepo torot oŋnkucaŋit cete coŋintap ŋaynet nye mite ruretyet tapan.
- <sup>13</sup>Kipok picutecu tokol kuponto koyenet. Kutompo kot kunyor cek tukuk ce kikirto Yiyintet, ntene kikäs cekto kutokumite tukucoto wule low, oŋnkuŋerekyi, oŋnkucäm kutor kulim piko kule minye cek koret kuyu toyek ce wuwen.
- <sup>14</sup>Piko ce mwowu ce yucoto kuce poru kutok manta kule cenye cekto koret nye nyimwa nkit.
- <sup>15</sup>Nto yunye kimite cekto kusote koret nyo kikwone, nto kwemuce kunyor poroyinto nye kaketitekey wuloto.



- <sup>16</sup>Nto om wule yunto, möce cekto yawut koret nye topon, nyoto ku koret nyepo torot. Kunyo sukuṅet melilone Yiyintet ye kacekur kule Yiyintetap picoto. Omnye kikwiytoci neto nkit cekto moṅet.
- <sup>17</sup>Om koyenet kunye kusutyi Aprayam kukoyto werinyi Isaka kwek korosyontet, ye kisyeme Yiyintet neto. Aprayam kunye kikurtoci Yiyintet, oṅnkurok yec kucäm kule okoyte werinyi akenke kwek korosyontet.
- <sup>18</sup>Kikimwoci Yiyintet neto kule, “Mesenyeru mucokoronik kukwane wule mite Isaka.”
- <sup>19</sup>Kinket Aprayam kule muce Yiyintet kot koṅet kotutune met piko, kunye kipor kuyunyoto omnye kiceketyi Isaka kuyunye ketutune met.
- <sup>20</sup>Om koyenet kunye kikoci Isaka kusomnci Yakopo oko Esawu kupeyok cekwoni om letut.
- <sup>21</sup>Om koyenet kunye kikoci Yakopo ye kikiyosit kusomnci kupeyok werikap Yosep tokol yo kitepene korokto oṅnkusay Yiyintet.
- <sup>22</sup>Om koyenet kunye kikoci Yosep kuṅalale ye kikirik kume kule mosukupete lekoka Israel Misiri oṅnkumwayta wule möce cemuyta koyek ceci.
- <sup>23</sup>Om koyenet kunye kikoci kwanitap Moses oko kamet kuwuny neto kuwany arok somok, omnye kikäs cekto kule lekwa nye topon koromun kunyo kimeneywey ntarastinekap kinko.
- <sup>24</sup>Om koyenet kunye kikoci kutay Moses yu kowo kuner kuwoyit mocekure weritap ceptap kinko Farawo.
- <sup>25</sup>Yoto kucäm kule ataṅany oko pikap Yiyintet kusir ye koto ṅerece ṅerekwekap miyotyet nyepo pesyos tukusic.
- <sup>26</sup>Kikäs neto kule cupisyet nyepo toṅoṅutek kupo Kristo kunye Mokoryontit nyewo kupël mokoryontit tokol nye kimite Misiri. Omnye kinket neto kokotutyet nye mosukunyor om letut,
- <sup>27</sup>Om koyenet kunye kikoci Moses kuṅete koretap Misiri nye kipuryo kot kuywey ntarastinekap kinko Farawo, oṅnkumuytoci koromun kuyunye kiköse Yiyintet nye motoku.
- <sup>28</sup>Koyenet nyenyi kunye kikoci kucec sakwetap keytayet, oṅnkumwayta ciyile korotik kurkotik, sukuṅet mente kot kupakäc malayket nyepo met werik poretok cepo pikap Israel.
- <sup>29</sup>Om koyenet kunye kikoci kway pikap Israel ruretyet nye arra kuyu koret nye yamat. Ntwo kusyem pikap Misiri kule kyay yoto kwaranta peko tokol.
- <sup>30</sup>Om koyenet kunye kikoci kulul totetap moṅetap Yeriko, om letut yu kowo komut pikap Israel kuwany pesyosyek tisap.



- <sup>31</sup>Om koyenet kunye kikoci kusop nye mnacepakäc Rakap cemoniyontet oko piko co kipuryo kot koyene Yiyintet, omnye kiwuny neto topon wotik.
- <sup>32</sup>Momwowu yec ñal ne ce cañ? Puryo kot oponte poroyinto nye moñalale mpo, Parak, Samuson, Yafesa, Tauti, Samuel, Kition oko workoyik.
- <sup>33</sup>Om koyenet kiporye cekto tokol korosyek alak okoy kupëlis. Kikwiyy ñalek cepo manta okoy kunyor tukuk ce kikirto Yiyintet. Kirat cekto kutuwakap ñetumwek,
- <sup>34</sup>oñnkomis motik ce rikittos koromun. Kipuryo kuponto swamet, ntene kinyor swamet, kiponto swamet om poryet okoy kuporye kot kupël lukosyek cepo piko alak.
- <sup>35</sup>Om koyenet kunye kimuce kunyor koruk kotutune met pikwa ce kipok. Piko alak ce kitay mocityakta kuce kicitany kupok, sukunet ciñet kotutune met kunyor soponto nye topon.
- <sup>36</sup>Kicecup alak oñnkyepas, cerate alak nyororonik, oñnkyekerta mopusi.
- <sup>37</sup>Kicewire rwontok, cesacasac alak ceyepe rotokap cok, kupesetat kulokoti syerokap kecirek oko cepo warek, kiponon, kicitany, oñnkyinyalil.
- <sup>38</sup>Kunäm koret cekto kwapi koromun! Kupesetat kumpakate pate kitela, oko lakamosyek kuminye kepenonik oko mwenonik.
- <sup>39</sup>Kicämnta Yiyintet picutecu tokol kupo koyenemwa. Ntene kipuryo kot kunyor tukuk ce kikirto Yiyintet,
- <sup>40</sup>omnye kikwiytowec Yiyintet acek yiytayetet nye pëlisyi. Kito nye kimöci Yiyintet ku cenyolu acek wanak oko cekto.

## Puraniyek 12

- <sup>1</sup>Nto acek kuce ceponte luket nyewo nyepo muncururwanik ce kimutwec. Kunyo akany cewirte acek kiy ake tokol nye muce kukerektec, oko miyotyey nyo kinämec kukwilec. Okany cirway ñweyek nye kacemuytoci om kamwenet nyi ceponte.
- <sup>2</sup>Akente cirotote cetokyikey Yesu nye kicece koyenet nyinyacek oñnku neto kunye mosukoyitita. Kupo ñerekwek ce kimite kukonye neto, kunye kikoci neto kumuytoci om murtowontet nye kipuryo kot kolilan. Kunyo kikopure yewutap tay om yepo ñeceretap Yiyintet.
- <sup>3</sup>Asot pa wuyinto nye kipunte Yesu, kimuytoci senkeratet nyewo nyepo piko ce miyotec! Kunyo monte cecosye nto mpo kwilyo mukuleywekwok.
- <sup>4</sup>Omnye om wuyinto nye oporye akwek miyotyey, kunye tompo oporye okoy cepakäcak awaste korotik.
- <sup>5</sup>Kwoyutye akwek so ñalek cekwilok ce kimwowok Yiyintet kuyu lekokyi? Mwowu kule, “Lekwenyu, mente kot areny katañanyetap Mokoryontet, Mente anyokoritu ye kapolyiñ.





- <sup>6</sup>Omnye toņonye Mokoryontet ci tokol nye cōme, oņnkunyolile ci tokol nye kacām kwek lekwenyi.”
- <sup>7</sup>Omuytoci toņoņutek kuyunye kopirok Papa, omnye toņoņutek ce otoņonyi akwek kuce poru kule sutok Yiyintet kuyu Lekokyi. Mite pa lekwa nye puryo kot kupire kwan?
- <sup>8</sup>Ye puryo kot cepirok akwek kuyu wule yunto lekokyi, kuporukey kule puryo kot oyiku lekokyi cepo manta, ntene oyiku pate pantayek.
- <sup>9</sup>Ceponte acek mpo papa cepo koret ce kiyec cepirec, ntene ciyweyi cekto. Kunyo puryo kot kuroke ne ciyweye acek kupēlis Papa nyepo torot sukuņet cesopce!
- <sup>10</sup>Kipirec acek mpo papa kisic kuyu wule kostoy kule topon. Ntene pirec acek Yiyintet kupo toponiyet nyinyacek sukuņet cenyoru tililinto nyenyi.
- <sup>11</sup>Puryo kot kutopon pirotet om pantanyi, ntene mwa nye puryo kot kutopon, ntene om letut mosukunyor kalyet oko tililinto co kicepire.
- <sup>12</sup>Kunyo onōmnci torot yewuniyekwok ce nyelnyeltos oņnkokwil kutuņokwok co potontos.
- <sup>13</sup>Otosyikekey apesetate arup aret nye rotat, sukuņet mente kumnyan kerenket nye mwole, ntene kusop .
- <sup>14</sup>Otyikyiyi opurte kalyet oko piko tokol oņnkopurte soponto nyetilil, omnye puryo ci nye muce kot kukās Mokoryontet ye moponto sponoto.
- <sup>15</sup>Oripkey mente kwasta ci tokol poypoyetap Yiyintet. Oripkey mente kot kupitenak akwek ketit nye mwa nye muce kowurta piko ce caņ om mwonet nyenyi.
- <sup>16</sup>Oripkey mente kusekweyan nto nye moponto tini ci ake tokol om akwek kuyu Esawu nyo kikwalya poretyantit nyenyi kuyu werit nyewo kwale omik cepo aret akenke.
- <sup>17</sup>Oņnket akwek kule kamac om letut kule onyuru kupeyok ce kosomnci kwan, ntene ceyete omnye kipuryo kot kurenynkey om ņalek ce kikwiyy nka kot kisyem kurir lokik kule anyoru.
- <sup>18</sup>Puryo kot akwa akwek kuyu pikap Israel ye kikwoni tulwetap Sinai, nye kiponto mata nye loye oko menonet nye tuyi mis oko yomet kisonet,
- <sup>19</sup>oko kontit nye ciye oko polotet. Nteyyu kowo kulim piko polotet, yoto kusom kule mente kot tocelim ņolyo ake,
- <sup>20</sup>omnye kipuryo kot komuce kumuytoci ntarastit nye kimwowu kule, “Mpo ye karik kutiny pate tyony tulwet mosicewire rwontok kume.”
- <sup>21</sup>Ki ņolyo nyewo koromun nye kicekās yoto okoy kumwoyy Moses kule, “Komuyi oņnkapotan.”



<sup>22</sup>Ntene omite akwek yawut kukoyoŋe taytap tulwetap Siyon oŋku moŋet nyepo Yiyintet nye sopot nye Yerusalem nyepo torot, wule kerurukikey malaykanik ce caŋ ce mociyite.

<sup>23</sup>Kakwa akwek wule mite koyomotet nyepo poretokap Yiyintet ce kicesil kaynokwa om torot. Kakwa wule mite ketintet nyepo piko tokol, wule mite mukuleywek cepo piko cepo manta ce kicesat kunyol.

<sup>24</sup>Kakwa wule mite Yesu Kristo nye kisat kirotyet nyelel om korotikiyi ce kicitata ce porwec ŋalek ce toponec kupël co kipo Apel.

<sup>25</sup>Kunyo, möce oripkey mente kot otay malim ŋalekap nyo ŋololwok, kuyu cekto co kitay molimnci neto nyo kisowu cek om wuli po koret, kuce kipuryo kot kusopco. Cimuci acek kulene cesopce ye kacetay mocelimnci neto nyo sowec kucone torot!

<sup>26</sup>Kitimtim polotet nyenyi yoto koret, ntene kukurto yawut kumwoy kule, “Mosotimtim koret yec, ntene puryo kot ku koret nkit pate, mosotimtim mpo torot.”

<sup>27</sup>Dolyontoni mwowu kule, “Yec” Kunye poru kutok topon kule, tukuk ce kicitany kuce citimtime oŋknyinum sukuŋet kuŋet co mociimtime.

<sup>28</sup>Kunyo misyini cikostoyisiyi acek omnye kicenyonu poytoyisyyet nye mocimuce kot citimtim. Kunyo akany cikaste cikoci Yiyintet sayet nye misyini nye yeme ceponte koyweyisyyet oko muyotet.

<sup>29</sup>Omnye Yiyintenyi kunye mata nye orontoy.

### **Puraniyek 13**

<sup>1</sup>Otosyikey acämŋkey akwek kwakwek nkit kuyu mpo yeya om Kristo.

<sup>2</sup>Mente ceyutye moŋerekyi atoroc oŋkopay toyek. Mite piko alake ce kikwiyy kuyunyoto okoy kuŋerekyi malaykanik nye kipuryo kot kunkete.

<sup>3</sup>Möce asoti piko ce mite mopusi oŋkosut kuyunye opontekey tokol om mopusi. Möce asoti mpo piko co mite kutoŋonye oŋkosut kuyunye otoŋonyi mpo akwek oko cekto.

<sup>4</sup>Möce kuywey piko tokol komütisyyet, nye puryo kumisyini kowurta morono nto korko komütisyyet nyenyi. Omnye mosukumutyi Yiyintet musankut piko co syepisiyi, oko sakwoyotik.

<sup>5</sup>Monte ciku pic ce corokyini pesan, okany kuyemak tukuk ce oponte, omnye kimwoy Yiyintet kule, “Puryo kot oyostok ani mpo kisic oŋkupuryo kot owirtin.”

<sup>6</sup>Kunyo sukuŋet cenyoru nyikanatet ceŋalal ce mwowu kule, “Mokoryontet kunye kokolyoyintemwani, puryo kot amuye. Mosukwiyyena ani ne cito ake?”

<sup>7</sup>Möce osoti kantoyikwok co kimwowok lokoywekap Yiyintet; Asot topon wule kipurtoy om kopurto nyimwa. Möce otyikiyi Koyenet nyimwa.



- <sup>8</sup>Yesu Kristo kunye yunyoto omutun, oṅnkuyunyoto yawut, oṅnku mokuyuyit nyoto okokoy.
- <sup>9</sup>Mönte kot kumasak konetisyonik ce lelac kot ape tapan; Omnye poypoyetap Yiyintet kunye kwile mukuleywek cikwok, puryo ku ntarastinek ce nöme omik ce tompo kot kukalya ci tokol nye rupe ntarastinek.
- <sup>10</sup>Puryo kot kuponto kamukeywek tisik ce yiyisi om kotap wemet kot kwam korosek ce mite meset nyetilil.
- <sup>11</sup>Sutu tisintet nyewo korotik cepo tyoṅik okoy Otepto Nyetilil nye Pëlisyi, sukuṅet kukoyto kwek korosek cepo miyotyoni, ntene cepele panyekap tyoṅicoto kayta saṅ.
- <sup>12</sup>Kunyo kitaṅany mpo Yesu kuyunyoto kumeci kurketap moṅet saṅ sukuṅet kowun miyotyoni cepo piko om korotiki nkit.
- <sup>13</sup>Kunyo akente cipe kayta saṅ wecenyoru tokol kalilanta nye kinyor Yesu.
- <sup>14</sup>Omnye puryo kot kumite moṅet nye ceminye acek kenysisyok om wuli po koret, ce mite cecenye moṅet nye mosukuco.
- <sup>15</sup>Kunyo akente cetosyikey cikoci Yiyintet korosek ce cikoste kupunte Yesu, om kutuwak ceṅolole kuṅoṅu kaynenyi.
- <sup>16</sup>Monte ceyutye mayiy tukuk ce toponec oṅnkokolyoykey kwakwek nkit, omnye korosek coto ce ṅerece Yiyintet.
- <sup>17</sup>Ayweyi kantoyikwok oṅnkolimnci ntarastinek ce mwowu. Omnye mite cekto kuripe mukuleywekwok nye memunye, omnye mosukuporci cekto Yiyintet yisyet nye kikwi. Ye kaywey akwek cekto mosukwiyis topon om ṅerekwek, nteye puryo, mosukwiyisi kunerekotin. Kunyo puryo kot kukolyok akwek ceyuco.
- <sup>18</sup>Otosyikey osomwec mpo acek, cinketi acek kule ceponte ṅomnonet nye cinketi cepo manta, omnye cemöce kule kyiye okokoy ṅalek cepo manta.
- <sup>19</sup>Otosyinikey ani osoysoyok akwek kule osomwo sukuṅet kuketwo Yiyintet aco lakwar okoy wule omite akwek.
- <sup>20</sup>Yiyintet nye kiṅet kotutune met Mokoryontenyö Yesu Kristo, neto kunye mesewontet nyewo nyepo kecirek, omnye kitata korotiki ce kikwil kirotyet nyepo kenysisyok.
- <sup>21</sup>Akente kukonok akwek Yiyintet nyepo kalyet kiy ake tokol nye topon nye omöce sukuṅet ayiy ce möce neto. Roke kwiy neto kito nye ṅerekyini kupunte Yesu Kristo. Kunyo kopurune woyinto wule mite Kristo okokoy okoy okokoy! Yunyoto.
- <sup>22</sup>Mpo yeya, osomok kule omuytoci om ṅalecu po kotitrotet. Kosilwok pate parwet nye nwac.
- <sup>23</sup>Omoce ani kule oporwok kule kucityakta yeyanyo Timosewo kuwete mopusi. Ye kotepe kot kupun wuli lakwar, mosocontekey okoy wule omite akwek.



<sup>24</sup>Osupoywec kantoyikwok tokol oko pikap Yiyintet tokol! Kesupayak mpo yeya cepo Italia.

<sup>25</sup>Opurte akwek tokol poypoyetap Yiyintet.



## Yakopo

### Yakopo 1

- <sup>1</sup>Ani nyo Yakopo nye Kiyokintetap Yiyintet oṅnkupo Mokoryontet Yesu Kristo. Osupoyi pikap Yiyintet cepo arosyek taman ok oyeny ce kiseretyi koret tokol.
- <sup>2</sup>Mpo yeya, möce aṅerec akwek ye kokwontyok syemutok wok ce caṅ,
- <sup>3</sup>omnye oṅnketi kule ye kacesyem koyenet nyimwoṅ yoto kuye omuytoci.
- <sup>4</sup>Ntene möce akäs kule komuytoci nye puryo kot osutoy okoy pesyet nyepo letut, sukuṅet opoyitu manta owoṅnkyi nye puryo kot kupotwok kiy.
- <sup>5</sup>Ye moponto ci ake tokol om akwek ṅomnonet, kumöce kusom Yiyintet nye mosukukoci. Omnye kocini Yiyintet piko tokol poypoyet nye puryo kot kukweye.
- <sup>6</sup>Ntene möce kusome kuponto koyenet nye puryo kot kuponto montuwok oyeny. Omnye cito nye ponto montuwok oyeny, kunye kerkey nyo oko peko cepo ruretyet ce wuse yomet kuroye wuli oko wuli.
- <sup>7-8</sup>Cito nye yunyoto kunye puryo kot kuwoṅnkyi om kasoteywekyi, nye potpotone om kiy ake tokol nye yiye, kunye mente kot kusot kule mosonyoru kiy kucone wule mite Mokoryontet.
- <sup>9</sup>Möce kusilkey yeya nye panan ye kelaṅnta Yiyintet nyoto.
- <sup>10</sup>Oṅnkuṅerec mpo yeya ake tokol nye kocirekto. Omnye mesukupot Mokoryontit kuyu taptet nyepo ketit.
- <sup>11</sup>Omnye mwoku asista oṅnkulay kupel ketit okoy kosuto taptet oṅnkupot toponiyet nyenyi. Kunyo mosikyaranta kuyunyoto cito nye mokoryo ye mite kwiyisyi yisyonutekyi.
- <sup>12</sup>Ḍerekat kuponto kupeyoy cito nye kwilat om koyenet ye kacesyem, omnye ye kacesyem kot komukta; mosukunyor soponto kwek kokotutyet nyo kikurtoci Yiyintet piko ce cöme neto.
- <sup>13</sup>Ye kacesyem cito kuyunyoto, kupuryo kot kuroke kumwoy kule, “Kasyema Yiyintet.” Omnye memuce setanit kot kusyem Yiyintet, oṅnkupuryo kot komuce Yiyintet kot kusyem ci ake tokol.
- <sup>14</sup>Ntene cesyeme cito ye kuperperit oṅnkocut cerokyinotet nyenyi nkit.
- <sup>15</sup>Yoto kuye mosukusic cerokyinotet kupuswek okoy kuyi miyotyet, nteye kaner miyotyet kuwoyit, yoto kuyi met.
- <sup>16</sup>Mpo yeya camamnik koromun! Monte ciperperak.
- <sup>17</sup>Kokotutyet nye tilil tokol kunye cone torot wule mite Papa Yiyintet, nye kitoṅintet nyepo lakweyet nyepo torot, nye puryo kot kuwecwecekey, nto mpo kusut menonet, omnye kamilkey.



- <sup>18</sup>Kicitanyec acek cenyoru ḡolyontenyi nyepo manta, sukuḡet cepoyitu manta om otepto nyepo tayta om tukuk tokol ce kicitany.
- <sup>19</sup>Mpo yeya, möce oḡnket ḡalecu! Möce kulimntoy ci tokol lakwar, ntene nye mosorcini ye mokuḡalal, oḡnkupuryo kot kunyeru lakwar.
- <sup>20</sup>Omnye mosutu nerekwec cepo cito tililinto nyepo Yiyintet.
- <sup>21</sup>Kunyo möce owirte soponto ake tokol nye samis oko kopurto ake tokol nye miyat. Ocäm Yiyintet ake ḡolyontenyi nyo kicekol mukuleywekwok. ḡolyontonoto kunye muce kusopok.
- <sup>22</sup>Ntene möce oyiku pic ce yiyisyec ḡolyontet, nye puryo kot olimntoy pate kulimntan nye opeperisyi.
- <sup>23</sup>Omnye cito nyo lime ḡolyontet pate oḡnkupuryo kot kwiyisyec kukerkey nyo oko cito nye kosekey ciyoyit, kukäskey wule yunto neto nkit.
- <sup>24</sup>Kösekey yoto wule yunto nkit oḡnkuwo, yoto pakenke lakwar kuyutye wule koyunto neto.
- <sup>25</sup>Ntene ci tokol nye kakäs topon ntarastinek cepo manta co tyoce piko, oḡnkurip nye puryo kot kulimntoy pate ntene yiyisyec ḡalek ce lime, mosukunyor nyoto kupeyok om kiy ake tokol nye yiye neto.
- <sup>26</sup>Ye sote cito kule opoye tini, ntene oḡnkupuryo kot kuripe ḡelyepta nyenyi, kupuryo kot kuponto tinit nyenyi latik oḡnkuperperisyi nyoto.
- <sup>27</sup>Tinit nye tilil nyepo manta nye puryo kot ciwurta om taytap Yiyintet nye Papa kunyi kule: Ye kocerutoci ceköse lekok pononik oko musukik om toḡoḡutek ce ponto, oḡnkuripkey cito om wule mite simnyontet nyepo koret.

## Yakopo 2

- <sup>1</sup>Mpo yeya, omnye oponte akwek koyenet om Yesu Kristo Mokoryontenyi nyepo woyinto, mente cecäm piko alak oḡnkotay alak om wule yunto soponto nyimwa nyepo saḡ.
- <sup>2</sup>Nteye kaco pesyet ake tuyet nyimwoḡ cito ake nye ponto komolilyet nyepo saput oḡnkelac sirok ce toponec, oḡnkuco yec pananet ake nye kelac sarkotok.
- <sup>3</sup>Ye koḡerekyi nyo kelac sirok ce toponec oḡnkomwoci kule, “Co nyi cepure ḡeceret nyi topon!” Ntene Omwoci pananet kule, “Yoḡe nyi yun.” Nto kule “Co cepure nyi yu po kerengkowani.”
- <sup>4</sup>Kupuryo kot kalel akwek yoto omnye koporu kweyisyet oyiyisyec miyotyey?
- <sup>5</sup>Mpo yeya, olimnte! Kikwey Yiyintet pononik om koret sukuḡet kumokoren cekto om koyenet oḡnkunyor poytoyisyet nyo kikurtoci piko ce cöme neto.
- <sup>6</sup>Ntene onyile akwek pananet! ḡo co toḡonyok akwek oḡnkukwerok kok wokuwosontyok? Mokorenik coto!



- <sup>7</sup>Coto kuce ñolole kwapi kaynet nye topon nyo kicemulok cekurenok akwek.
- <sup>8</sup>Mosayiy akwek topon ye kayitite ntarastit nyepo poytoyisye nyo kicesil silutekap Yiyintet kule, “Cäm latyeñuñ kuyu wulo cömntoykey nyi nkit.”
- <sup>9</sup>Ntene ye kacäm akwey piko kuyu wule yunto soponwek cepo sañ, yoto kuye kalel ayiy miyotyet, oñnkumutwok ntarastinek musankut kule koyiri ntarastinek.
- <sup>10</sup>Omnye ci tokol nye kalel kwiri ntarastit akenke kunye kalel nyoto kwiri ntarastinek tokol.
- <sup>11</sup>Omnye neto nyo kimwoy kule, “Mente ayiy sakwayanat.” Kunye nyoto akenke mpo nyo kimwoy kule “Mente oporisye.” Ye mneyiy sakwayanat, ntene oñkiporisye kukeyiri yoto ntarastinek.
- <sup>12</sup>Kunyo añalal oñnkoyiyisye kuyu piko ce mocemutyi musankut kuyu wule yunto ntarastinek ce tyoce piko.
- <sup>13</sup>Omnye puryo komuce Yiyintet kukalya cito nye mutyini musankut cito nye puryo kot kukolyoyisyi, ntene pëlisyi kokolyoyisye kupël musankut.
- <sup>14</sup>Mpo yeya, toponiyo ne ye komwoy cito kule, oponte koyenet. Ye puryo kot kuporu yisyonutekyi? Muce ra koynenyi kusop neto?
- <sup>15</sup>Nteye mite yeya ake nye moron nto korko nye moponto sirok oñnkupuryo kot kuponto omik ce kam.
- <sup>16</sup>Topon pa ye kocemwoci kule, “Opurte kalyet, ololonjitu oñnkoyomisye opiyonknye. Ye puryo kot koci cekto omik cepo porto ce kam?”
- <sup>17</sup>Kunyo ye koyenet nkit pate nye puryo kot kumite yisyonutek; kukerkey nye kime koyenet nyoto.
- <sup>18</sup>Ntene mosukumwoy cito ake kule, “Oponte ani koyenet, iponte nyi yisyonutek ce toponec.” Mosawec ani omwowu kule, “Porwo ani pa, muce ra kuponto cito koyenet oñnkurok kupuryo kot kuponto yisyonutek? Kuye mosoporuñ ani koyenet nyimwani oko yisyonutek.”
- <sup>19</sup>Yeni nyi so kule mite Yiyintet akenke nkit? Topon! Kunyo yene mpo oyik kuyunyoto, oñnkuyweyisyi mpecek.
- <sup>20</sup>Yiku nyi solwo! Möce nyi kule ciporuñ kule puryo kot kuponto koyenet latik nye moponto yisyonutek?
- <sup>21</sup>Asot pa kukonyo Apram wule kicesatita kunyol om wule mite Yiyintet om yisye nyi nye kikwi omnye kikoyto werinyi Isaka om otepto nye cepele korosek.
- <sup>22</sup>Puryo kot oköse akwek kule koyenet nyenyi oko yisyonutek kuce kikwi nyi wanak? Yoto kuye kicekwil kupoyit manta koyenet nyenyi om yisye nyi nye kikwi neto.





<sup>23</sup>Kwitita yoto kupoyit manta silutekap Yiyintet ce mwowec kule, “Kiyentyi Apram Yiyintet, sukuṅet kucām Yiyintet kule po manta Apram okoy cekure corwetap Yiyintet.”

<sup>24</sup>Kunyo kokās kule cesate kunyol cito om wule mite Yiyintet om yisyet nye yiye, ntene puryo kot om koyenet nyenyi nkit pate.

<sup>25</sup>Kuyunyoto om wule mite korket nyo kicemoroniyo Rakap. Kisatakay neto kunyol om wule mite Yiyintet om yisyet nye kikwiyy omnye kiṅerekyi wotik Yutayek oṅnkukalya kuwuny okoy kumwey kurup aret ake.

<sup>26</sup>Kunyo kuyu porto nye kime nye moponto soponto, kuyunyoto mpo koyenet nye moponto yisyonutek kunye kime mpene.

### **Yakopo 3**

<sup>1</sup>Mpo yeya, puryo kot kuroke oyiku konetik piko ce caṅ om akwek, omnye oṅket kule acek co ciku konetik kuce mucemutwec musankut nyewo kupḗl piko alak.

<sup>2</sup>Omnye kyie acek tokol leliswek aret ce caṅ. Kunyo ye mite ci nye puryo kot kulele kenysis om ṅalek ce ṅolole, kunye nyoto nyepo manta nye muce kurip soponto nyenyi tokol.

<sup>3</sup>Cikocini karnet kutitap Farasit sukuṅet kulimwec, kunyo cimuci cekwer kuwo wulyo tokol wule ce möce.

<sup>4</sup>Akās pa mpo Rapet, nka kot ku kiy nyewo koromun, ntene kosute yomet nyewo, ntene yiyisye kito nye miniṅ nye pire peko oṅnkukwer cito nyo kwere kuyu wule moktoy.

<sup>5</sup>Kuyunyoto mpo ṅelyepta, kiy nye miniṅ koromun, ntene oṅnkusilekey koromun om tukuk ce woyec. Akās pa woket nye muce kulay kupok kukapel mata nye kisic!

<sup>6</sup>Kerkey ṅelyepta oko mata, ṅelyepta kunye koret nyepo miyotyeyet nye mitowune wule ce mite. Mitowune porto nyinyo, oṅku nye pciytoy miyotyeyet kunām porto tokol. Neto kunye kocini kunām mata nye cone kapkompic porto nyinyacek tokol.


<sup>7</sup>Muce cito kunet tyoṅik, kunyo kikonet kot kunay tyoṅik tokol oko toritek oko erenok, oko tyoṅik cepo peko okoy kucōmis kopur topon.

<sup>8</sup>Ntene puryo ci nye muce kenysis kot kurip kunet okoy kopur ṅelyepta topon. Ḍelyepta kunye miyat, nye sokoran oṅnkuponto mwonet nyewo.

<sup>9</sup>Cecupisye ṅelyepta, cikaste Mokoryontet oṅku Papa, oṅkyyisye cecup mpo yeya ce kicitany om tonto nyepo Yiyintet.

<sup>10</sup>Kutit kunye akenke nye kwone ṅalek ce cikoste oko ce cecupisye. Mpo yeya, puryo kot kuroke kuyuyit nyo.

<sup>11</sup>Memuce kot kukosune yeto akenke peko ce misyontet oko ce toponec.



<sup>12</sup>Mpo yeya, puryo kot kwiye mokoywet sapipunek, oṅnkupuryo kot kwiye sapipunek omik ce mokoyek. Kunyo puryo mpo kot kuwecekey peko ce misyontet kwek peko ce toponec.

<sup>13</sup>Mite pa cito ake om wule omite akwek nye ṅom nye nkete ṅolyo? Möce koporune soponto nyenyi nye topon om yisyonutek ce yiye om toṅoṅutek oko ṅomnonet.

<sup>14</sup>Ntene ye ponte corokyinotet nye mwa oko soynonet nye mite mukuleyṅuṅ, kupuryo kot kuroke silkey kwinyi nkit mwowu mwiynanet kerekte ṅalek cepo manta.

<sup>15</sup>Puryo kot kucone ṅomnonet nyoto torot, cone koret, nye puryo kot ku topon oṅnkupo oyik.

<sup>16</sup>Omnye! wule mitowune corokyinotet oko soynonet, kumite wuloto cokurotet oko miyotyoniwok wok tokol.

<sup>17</sup>Ntene mpo yeya, tilil ṅomnonet nyepo torot, ponto kalyet, sikenotet oko corwantit, oṅnkuponto kakalyayatet nyewo nye konu Mokoryontit nyepo yisyonutek ce toponec, puryo kot kuponto kweyatet oko koperperisyo.

<sup>18</sup>Nto kupuswek cepo toponiyet kuce kole piko co sutu kalyet.

#### **Yakopo 4**

<sup>1</sup>Cone ono poryet oko wokutyet nyo oponte akwek? Cone corokyinotet nyimwoṅ nye omöce ṅerekwek ce mite kuportos om porwonikwok orit.

<sup>2</sup>Omöce tukuk ntene puryo kot onyuru, yoto kuye oyiye wokutyet oko poryet. Monyuru tukuk ce omöce omnye puryo kot osome Yiyintet.

<sup>3</sup>Puryo kot onyuru ye kosom omnye puryo kot osome topon, osome tukuk kule kyiyisye om ṅerekwekwok nkit.


<sup>4</sup>Akwek piko co mocikenekey! Puryo kot oṅnket kule, ye keyiku corwet nyepo koret yoto kuye keyiku puniyontetap Yiyintet? Ci ake tokol nye möce kule oyiku corwetap koret, kunye yiku nyoto puniyontet nyepo Yiyintet.

<sup>5</sup>Monte cisot kule po püc pate silutekap Yiyintet ce mwowu kule: “Soponto nyepo Yiyintet nye konec acek, kunye ponto corokyinotet nyeker koromun.”

<sup>6</sup>Ntene poypoyet nye konu Yiyintet kunye ponto yec swamet kupëlis. Kuyu wulo mwowu silutekap Yiyintet kule, “Toye Yiyintet piko co silekey, ntene kocini kupeyok co toloyec.”

<sup>7</sup>Kunyo okoytekey akwek ape wule mite Yiyintet. Otay Setani nyewo nyepo oyik yoto kuye kumweyenok.

<sup>8</sup>Akwa alekityi Yiyintet, yoto kuye kunok kulekitit om wule omite akwek. Awun yewuniyek cikwok piko co oponte miyotyoniwok! Awec Mukuleywek cikwok piko co oyiku kaperperot!



<sup>9</sup>Onyeru yawut, orirye, omesye, awec roryet nyimwoŋ kwek mesyet! Awec ŋerekwek kwek nerekwek ce caŋ.

<sup>10</sup>Onetkey otoloyitu om taytap Mokoryontet, mosukulaŋntak.

<sup>11</sup>Mpo yeya, monte cerenyenkey akwek kwakwek nkit. Ci tokol nye karen yeyanyi kunye karen nyoto ntarastit oŋnkumutyi musankut. Ye kemutyi musankut ntarastinek kuye kemerupe ntarastinek coto, ntene mutyini pate musankut.

<sup>12</sup>Yiyintet nkit kunye konu ntarastinek oŋnku ketintet. Neto mpo kunye sope oŋnkwaranta. Nyi kuŋo nye mucu kot mutyi musanku cito ake nye akerkeyekey.

<sup>13</sup>Alim pa piko co mwowu kule, “Moscipe yawut nto tun okoy moŋet nyi nto nyin, wule mwocipur kenyt akenke kyiy kamonkesyantit okoy cenyoru latik ntene akany.”

<sup>14</sup>Puryo kot oŋnketi ŋolyontet nyepo pesyet nyepo tun, oko wule mosukopurto soponto nyeŋuŋ. Akerkeyekey akwek cekwerut nye con lakwar oŋnkupot yec lakwar.

<sup>15</sup>Ntene roke omwowu kule, “Ye kacäm Mokoryontet ye tocesoptosi mosaiyy nyi nto nyin.”

<sup>16</sup>Kunyo osilekey akwek yawut, oŋosekey kunyo miyotylo silotet nyoto tokol.

<sup>17</sup>Ye nkete cito kwiy ŋalek cepo manta, oŋnkurok kupuryo kot kwiy, kakwiy cito nyoto ce miyotec.

## **Yakopo 5**

<sup>1</sup>Akwek mokorenik ce oponte tukuk, alim pa yawut! Orirye oyome mnyat om toŋoŋutek ce karik kukwontyok!

<sup>2</sup>Kinuntyo mokoryontinekwok oŋnkwan solopik sirok cikwok.

<sup>3</sup>Kukurwotyeci Sapunek oko karik cepo pesanik cikwok. Wule kerwotyeci ku wule mosukwek muncururwanik ce wosontyok akwek. Mosukwan panyek cepo porwonik cikwok kuyu mata. Kworuruc akwek mokoryontit om pesyosyek cepo letut ye karik ye ŋete koret.

<sup>4</sup>Monokoci akwek musyaret piko ce kipote mparenikwok. Alim mpa rirek cikwa! Kupunto yitikap Mokoryontet nyepo kamukeywek tokol rirek cepo piko co kisisyi om mparenikwok.

<sup>5</sup>Kwopur koret oponte soponto nye topon oko ŋerekwek. Kwoyokwoyitu sukuŋet opoyitu pesyet nye cetilenok.

<sup>6</sup>Kwomutyi musankut oŋnkapakäc cito nye moponto lelis nye memuce kot kuporyenok kuyetkey.

<sup>7</sup>Kunyo mpo yeya, omuytoci okoy kuco Mokoryontet. Akäs wule muytocini kopotintet okoy kwiy mparenyi omik ce toponec. Muytocini neto okoy kuteryec koret kuropen ropta nyepo tayta oko ropta nyepo yo karik kwek kemey.



- <sup>8</sup>Misyini omuytoci mpo akwek. Osat topon mukuleywekwok, omnye karik pesyetap Mokoryontet.
- <sup>9</sup>Mpo yeya, monte ciḡunyḡunyi akwek kwakwek, nkit, sukuḡet mente cemutwok musankut. Mite ketintet yuteyu keyoḡe yepo kurket.
- <sup>10</sup>Mpo yeya, möce asot workoyik ce kiḡolole om kaynetap Mokoryontet. Möce kwek cekto kito nye ceköse om muytocinotet ye mite toḡoḡutek.
- <sup>11</sup>Cekure acek kule ponto cekto kupeyoy omnye kimuytoci. Kyolim kule kimuytoci Yopu, oḡnketi kule kikoci Yiyintet neto tukuk om letut. Omnye ponto Mokoryontet poypoyet nyewo oko kalyet.
- <sup>12</sup>Mpo yeya, kito nye pële tokol kunyi kule, monte ciwolyikey koret torot, nto mpo koret ḡony. Ye owolikey kawalet ake tokol. Omwowu pate kule, “Puryo” ye puryo kupoyit manta. Oḡnkomwowu kule, “Yunyoto” ye yunyoto kupoyit manta, sukuḡet mente kot kuwosontyok Yiyintet.
- <sup>13</sup>Mite pa cito ake om akwek nye ponto wuyinto? Kuroke kusom. Mite pa cito nye ḡerekat? Roke nyoto kutum tumwonik ce kostoyisye.
- <sup>14</sup>Mite pa cito nye mnyone? Roke nyoto kukur poyik cepo pikap Yiyintet, ce mosukusomnci cicoto oḡnkuḡape mwayta om kaynetap Mokoryontet.
- <sup>15</sup>Sayet nye kacesay om koyenet kunye mosukusop cito nye mnyone. Mokusop Yiyintet cito nyoto kukalya ye kikwiyy miyotyeyet.
- <sup>16</sup>Kunyo oḡoḡu oporcinikey miyotyoniwkwo akwek kwakwek oḡnkosomncinikey kwakwek nkit sukuḡet osopce. Ponto Swamet nyewo koromun sayet nye topon.
- <sup>17</sup>Eriya kunye ci nye kikerkey oko acekto. Kisom koromun kule mente kuropen ropta. Yoto kutay moropen ropta kuwany kenyisyek somok ok orok lö.
- <sup>18</sup>Oḡnkusom yec, yoto kuropen ropta okoy kupityo omik.
- <sup>19</sup>Mpo yeya, ye kotepe kot kumasakay cito ake om akwek marup aret nyepo manta, oḡnkuwec cito ake kot kuketkey yec,
- <sup>20</sup>kuroke kunket ḡolyontet nyi kule, ci tokol nye kawec cito nye miyat kwasta lelisto nyenyi mosukusop soponto nyepo cito nye miyat oḡnkusut mpo kokolyoyisyyet nyepo miyotyoniwkwo ce caḡ.



## 1 Petero

### 1 Petero 1

- <sup>1</sup>Cone parwani wule amite ani Petero kiyokintetap Yesu Kristo. Osilwok akwek kweyanikap Yiyintet ce miñisyi kuyu wuwen ce kiseretyi korosyek cepo Ponto, oko Kalatiya oko Kapontokiya oko Asia oko Pisiniya.
- <sup>2</sup>Kicekweyak akwek kuyu wule moktoy Yiyintet Papa. Kicesatak oyiku piko cetililec kupunte Muyet Nyetilil nyepo Yiyintet, sukuñet aywey Yesu Kristo oñnkowunok om korotiky. Kunyo kutosyikey poypoyet oko kalyet om wule omite akwek.
- <sup>3</sup>Möce cikaste acek Yiyintet Papa kwanitap Mokoryontenyo Yesu Kristo! Omnye kikonec acek soponto nyelel om kokolyoyisyenyi nyewo omnye kiñet kotutune met Yesu. Konec acek ñaleca kokenotet nye sopot.
- <sup>4</sup>Kunyo cemite cekonye kule cenyoru kupeyok ce cañ ce kikonorci Yiyintet pikyi. Kikonorwok akwek kupeyocu om torot wule puryo kununtos nto kuwuryo nto mpo kupoty.
- <sup>5</sup>Ripok topon swamet nyepo Yiyintet omnye kyocäm Yiyintet, kunyo mosaicisopok om pesyet nyepo letut ye poru ñalek cepo kosopenyi.
- <sup>6</sup>Möce añrec om ñalecoto, nka kot kuroke orirye yawut kuminiñ om toñoñutewok ce cañ ce otoñoñyi.
- <sup>7</sup>Poru toñoñutecoto kule po manta koyenet nyimwoñ. Muce saput kuwur kupot, ntene cesyeme cepele mata sukuñet cekäs kule topon. Kunyo yunyoto mpo koyenet nyimwoñ nyepo latik kupël Saput, misyini cesyem sukuñet kutitir, sonyoru akwek kakastayet oko woyinto oko koyweyisyet om pesyet nye ciñoñu kutok Yesu Kristo.
- <sup>8</sup>Ocöme akwek neto nka kot kupuryo kot okäs, Oyeni neto nka kot kupuryo kot oköse yawut; oñerekyini om ñerekwek ce cañ koromun.
- <sup>9</sup>Omnye omite onyuru musyaret nyepo koyenemwoñ, nyoto kukosopotet nyepo mukuleywekwok.
- <sup>10</sup>Kosopet nye yunyitenyi kunyo kicenye workoyik koromun oñnkuñor kokotutecutecu mosukukonok akwek Yiyintet.
- <sup>11</sup>Kiñor Muyet Nyetilil nyepo Kristo nye kimate wule mite workoyik. Toñoñutek ce mosukunyor Kristo oko woyinto nye mosukuco om letut. Ntene kisyem cek kule cinket pesyo ne pesyonoto oñnku mosukuco kulene.
- <sup>12</sup>Kiñany kuporci Yiyintet workoyik yisyet nye kikwiye cek, kunyo kipuryo kot kupo toponiyet nyimwacek nkit. Yoto kuye kiñolole cek ñalek cenöme ñalecu kwalim akwek yawut kukwane wule mite kiyokik cepo lokoywek ce toponec. Kimwoy cekto ñalecato om swametap Muyet Nyetilil nye kiciyok om torot. Ñalecutecu kuce möce mpo malaykanik kule nto cinket.



- <sup>13</sup>Kunyo oripkey oṅomekitu om kasoteywekwok, oṅkokasekey kupeyok ce mosicekonok akwek pesyet nye ciporu Yesu Kristo.
- <sup>14</sup>Aywey Yiyintet. Monte kupaytak yec kopurto nyimwoṅ nyepo corokyinotet nyo kyoponte ye kitompo kot osowu.
- <sup>15</sup>Möce otillitu om tukuk tokol ce oyiye kuyu wulo tilil Yiyintenyö.
- <sup>16</sup>Mwowu silutekap Yiyintet kule “Misyini otillitu akwek omnye oyiku ani tilil.”
- <sup>17</sup>Okure akwek neto kule Papa ye osome Yiyintet, Yiyintet kunye mutyini piko tokol musankut koyoyec wule yunto yisyet nye kikwi y cito. Kunyo misyini opur koret om aret nye oyweyi neto.
- <sup>18</sup>Omnye oṅket akwek kito nye kikyale sukuṅet cityakenak wule mite soponto nye moponto latik nyo kikonok mpo kukomwoṅ. Kipuryo kot kukiy nye wure kuyu pesya nto Saput.
- <sup>19</sup>Kicityacak kyalenak korotikap Kristo ceponto latik. Kicikoyto neto kuyu lekwap kecir nye moponto tisyet nto mpo simnyontet.
- <sup>20</sup>Kicekwey Yesu kupoyit ṅalecu kutompo kot citany koret, kunyo kucipor om pesyosyecu po letut kupo toponiyet nyimwakwek.
- <sup>21</sup>Kyoyen akwek Yiyintet kupunte wule mite neto. Yiyintet kunye kiṅet neto kotutune met oṅnkukoci woyinto, sonyoru akwek koyenet oko kokenotet om wule mite Yiyintet.
- <sup>22</sup>Kunyo yawut omnye kwopukte akwek simnyontet nyepo mukuleywekwok, oṅnkoywey ṅalek cepo manta, oṅnkocäm nkey akwek nkit kupoyit manta, kuroke kwek cömisyet nyimwoṅ kiy nye yiyisyi oṅnkucone mukuleywekwok orit.
- <sup>23</sup>Kuceyiyok aret nyepo oyeny kupunte ṅolyontet nye sopot nye mopoku nyepo Yiyintet. Kunyo oyiku lekoka Papa nye sope okokoy nye puryo kot kume.
- <sup>24</sup>Kuyu wule mwowu silutekap Yiyintet kule: “Kerkey piko tokol suswek, kerkey woyinto nyepo cito taptok cepo samiyita! Yamntos suswek, kulelece taptok.
- <sup>25</sup>Ntene pure ṅolyontetap Mokoryontet kenysis ce mopoku.” Dolyontonoto ku lokoywek ce toponec co kicemwowok akwek.

## 1 Petero 2

- <sup>1</sup>Kunyo awirte onumunekey akwek nkit miyotyoni tokol, oko mwiynanet, oko koperperisyet oko corokyinotet oko cupisyet.
- <sup>2</sup>Kuyu lekoy ce rwerun ce möce ceko pate, kuyunyoto mpo akwek roke omäc ceko ce tililec cekwone torot, sukuṅet onerye oṅnkosopce.
- <sup>3</sup>Kuyu wulo mwowu silutekap Yiyintet kule, “Kwacemcem akwek nkit tolosyetap Mokoryontet.”



- <sup>4</sup>Kunyo akwa wule mite Mokoryontet nye rwantet nye sopot nye kitay piko kule puryo kot ku topon cetekse, ntene kikwey Yiyintet kule topon.
- <sup>5</sup>Akwa akerkeyitu oko rwontok ce ponto soponto oṅkokany cetektak cetekenak kayta nye tilil nyepo kotap Yiyintet, wule mosoyiyisye akwek kuyu tisik ce tililec cecöme Yiyintet. Punte korosecoto wule mite Yesu Kristo.
- <sup>6</sup>Omnye mwowu silutekap Yiyintet kule, “Akäs mosokoci Siyon rwantet nye kweyan, rwantet nyoto kunye ponto latik koromun, puryo kot kolilone ci tokol nye kacäm neto.
- <sup>7</sup>Ponto rwantani latik ce caṅ koromun om wule omite akwek piko co cömisysi; ntene om wule mite piko co puryo kot kucömisysi kucu kule, Rwantet nyo kitoye tekik kule puryo kot kuponto latik kunye kiweckey kwek rwantet nye pële tokol nye tiye koto tapan.”
- <sup>8</sup>Mwowu silutekap Yiyintet yec kule, “Rwantanitenyi kunye noce piko koputis, Kitawet nye mosikonoc piko koputis.” Mosicinoc cekto omnye kipuryo kot kuyen ṅolyontet. Kicäm Yiyintet kule kopur cek kuyunyoto.
- <sup>9</sup>Ntene oyiku yemet nye kweyat, oyiku tisikap kinko, oyiku yemet nye tilil, oyiku piko cepo Yiyintet ce kicekweyak sukuṅet oporu yisyetap Yiyintet nyepo kakitat. Yiyintet kunye kikurok akwane wule mite menonet kwonyoru lakweyenyi nye cikite.
- <sup>10</sup>Kipuryo kot oyiku akwek ikye om pesyosyek alak pikap Yiyintet ce kweyotin, ntene kunyo oyiku yawut pikyi. Kipuryo kot oṅket akwek ikye wule yunto tolosyetap Yiyintet, ntene kunyo kwonyoru yawut tolosyenyi.
- <sup>11</sup>Coronutekwani, osomok ani akwek kuyu pic ce toyek oṅkuwuwen om koroni! Ntene monte cecäm tukuk ce cöme porto, ce mite kwak kuportos oko soponto.
- <sup>12</sup>Möce opurte kopurto nye topon om kwenutap piko co menket Yiyintet. Sukuṅet nka mpo ye kowosontyok akwek kule oyiye miyotyey kuye kukäs cekto yoto yisonutek ce toponec, oṅnkukasta cek Yiyintet om pesyet nye conicokumut musankut.
- <sup>13</sup>Aywey akwek kamukeywek cepo ci tokol nyewo om kaynetap Mokoryontet. Aywey mpo Kinko nyewo nye pëlisyi om kamukeywek.
- <sup>14</sup>Aywey mpo poytoyik ce kikoyok neto cokutaṅany piko ce yiye miyotyey oṅkokaste piko co yiye ce toponec.
- <sup>15</sup>Omnye möce Yiyintet kule akerekte akwek ṅalalet nyepo piko co perper om ṅalek ce toponec ce oyiye.
- <sup>16</sup>Möce kule opur kuyu pic ce tyokotin. Monte ciyisye katyakatet nyo oponte kwek siret nye yene miyotyey, ntene opur kuyu mutworik cepo Yiyintet.
- <sup>17</sup>Aywey piko tokol, acäm piko cikwok co kikoyen. Aywey Yiyintet oṅkaywey Kinko nyewo
- <sup>18</sup>Möce akwek mutworik aywey mokorenikwok, oṅkoporci kayweyisyet nyepo manta, nka mpo ye toponec oṅkutoloyec nto mpo ye wusisyi.





- <sup>19</sup>Omnye ye nkete cito kule opontekey Yiyintet oṅnkumuytoci wuyinwek nka mpo ye kopuryo kot kumisyini kunyuru cicitenyi kupeyokap Yiyintet.
- <sup>20</sup>Omnye monyuru kakastayat ne, ye komuytoci pirisyet nye misyini, roke onyuru omnye kwalel? Ntene ye kwomuytoci toṅoṅutek omnye kwayiy ḡolyo nyepo manta, mosukukonok Yiyintet kupeyok om ḡolyontonoto.
- <sup>21</sup>Kicekurcok akwek ḡolyontonoto. Omnye kitany Yesu Kristo kupo akwek oṅnkupokokwok pelutyet sukuṅet arup akwek neto letut.
- <sup>22</sup>Kipuryo kot kwiy neto miyoty, oṅnkupuryo ḡolyo mpo akenke nyepo mwiynan nye kicone kutinyi.
- <sup>23</sup>Kipuryo kot kuwec kucupis ye kicecupe. Kipuryo kot kunyer neto ye kitoṅonye, ntene kikokenekey Yiyintet nye ketintet nyepo manta.
- <sup>24</sup>Kristo nkit kunye kikesen miyotyonik kyacek om murtowontet, sukuṅet cepoku acek nye komokyiye miyoty et oṅnkyesopce om ḡalek cepo manta. Kunyo mwayok ceci kuce kisopok akwek.
- <sup>25</sup>Kyokerkeyekey akwek kecir ce kipoty aret nye pete, kunyo kiceketwok kwarup mesewontet oko ripintet nyepo saponwekwok.

### 1 Petero 3

- <sup>1</sup>Kunyo mpo akwek koruk möce aywey sanikwok. Nteye mite sanikwok alak ce puryo kot kucöme ḡolyontetap Yiyintet, kuye kucömis omnye kakäs cek kopurto nye topon nye oponte akwek. Puryo kot omuci akwek kot omwowu ḡolyo,
- <sup>2</sup>omnye mosukukäs cekto wule yunto tililinto oko koyweyisyyet nye oponte akwek.
- <sup>3</sup>Puryo kot kuroke otase toponiyet nyimwoṅ tukuk ce ciloce, kuyu putek ce kacilet oko sonoyek oko raranik oko sirok.
- <sup>4</sup>Möce kuporkey toponiyet kwine nkit om mukuleyto nye paypay nye cone soponto nyepo cito orit. Puryo kot kumite kito nye muce kot kowurta soponto nyoto, oṅnkuponto latik ce caṅ om taytap Yiyintet.
- <sup>5</sup>Omnye kikwiyy kuyunyoto koruk cepo keny ce kikoyen ce kikenekey Yiyintet. Kitililitu cek kuyunyoto kuywey sanikwa.
- <sup>6</sup>Kiyunyoto Sara, omnye kiywey neto Apram omnye kikure, mokoryontenyu. Oyiku akwek yawut tipikiye ye kayiy ḡalek ce toponec nye puryo kot omuye kiy ake.
- <sup>7</sup>Mpo akwek Moronik, möcö opurte poypoyet oko korukwok om soponto nyepo kamütisyyet. Misyini oṅnket kule puryo kot kuponto cek swamet nye kerkey moronik. Kunyo misyini aywey omnye mosukunyor mpecek tokol kuyu akwek kokotutyet nyepo soponto nye konu Yiyintet. Ayiy kuyunyoto sukuṅet mente kot kukerekta kito ake somset nyimwoṅ.



- <sup>8</sup>Dolyontet nyepo letut, möce kule oponte akwek tokol kasoteywek ce kerkey, acämncy akwek nkit kuyu mpo yeya. Möce opoyoyitu akwek kwakwek nkit.
- <sup>9</sup>Monte ceyokune miyotyey ake miyotyey ake, nto koyokune cupisyey ake. Ntene möce ayakte osomnci kupeyok, omnye kikirkyok Yiyintet kupeyok ye kikurok.
- <sup>10</sup>Kuyu wulo mwowu silutekap Yiyintet kule, “Ye möce cito kule anjerekyi soponto; onnkunyor soponto nye topon, kumöce kurip njelyepnyi mañalal njolyo nye miyat, onnkuripkey mañalal kutinyi mwiynan.
- <sup>11</sup>Misyini kwasta kuwecekey wule mite miyotyey onnkwiye ce toponec, puryo kot kuroke kucas ye cene kalyet.
- <sup>12</sup>Omnye ripe Mokoryontet kuköse piko co toponec, Onnkulime somset nye some picoto, Ntene tukiye patay piko co yiye ce miyotec.”
- <sup>13</sup>Do nye muce kowurtak ye omöce akwek kule kyiy njalek ce toponec?
- <sup>14</sup>Ntene nka mpo ye kotanjany ye omite oyiye njalek cepo manta, kumöce anjerec monte cemuye piko, monte cisot!
- <sup>15</sup>Aywey Kristo om mukuleywekwok, onnkokoci kwek Mokoryontemwoñ. Ayiytekey pesyosyek tokol sukuñet owekyi ci tokol nye katepenak kule ororwo kokenotet nye oponte akwek.
- <sup>16</sup>Ntene möce ayiy kuyunyoto om tolosyet oko koyweyisyey. Möce oponte njomnonet nye topon sukuñet soponto nyimwoñ nye oponte om Kristo kusutyi kolilonis piko co njololenok kwapi.
- <sup>17</sup>Topon ye kacetañany ye kyiy ce toponec ye möce Yiyintet kule kwiyokey kuyunyoto, kusir ye kakyiy miyotyey.
- <sup>18</sup>Omnye kime Kristo nkit kumeci miyotyonyik cikwakwek aret akenke onnkuwany kupok. Kime cito nye topon kumeci piko ce miyotec, sukuñet kuntowok akwek ape wule mite Yiyintet. Kicepakac neto kume met nyepo porto, ntene kotutune met om Muyet.
- <sup>19</sup>Kiwo muyenyi nye sopot wokuñololyi oyik ce kimite mopositap met.
- <sup>20</sup>Oyik cutecu kupo piko co kipuryo kot kuywey Yiyintet ye kimuytocini neto om pesyosyek co kitece Nuwa rapet. Kisopce peko yoto piko ce njeri pate ce kipuntoy sisit ce kimite rapet.
- <sup>21</sup>Poru pecu patisanet, nto patisanani kunye sopok akwek yawut. Kunyo puryo kot kunumu simnyontet nyepo porto, ntene sopok kurtoyey nye kacemwoy om wule mite Yiyintet kucone mukuleyto nye topon orit. Sopok patisanet kupunte kotutunetap met nyepo Yesu Kristo,
- <sup>22</sup>nye kiwo torot, nye mite yawut kukepure yewutap tay nyepo Yiyintet kupoytoy malaykanik tokol oko kamukeywek oko swamet nyepo torot.



## 1 Petero 4

- <sup>1</sup>Kitaŋany Kristo toŋoŋutek cepo porto, kunyo misyini otitir mpo akwek kuyunyoto oŋnkarup kosoteywekyi, omnye ye kataŋany cito om porto nyenyi, kuye yoto ye komokwiye miyotyeyet.
- <sup>2</sup>Kunyo kuceke yawut kuwo tay, ye tomite koret misyini soponto nyimwoŋ kwek soponto nye poytoy Yiyintet nye puryo kot kupoytok corokyinotet nyepo porto nyepo cito.
- <sup>3</sup>Kyawany akwek pesyos ce caŋ co kitil oyiye ŋalek co yiye piko co menket Yiyintet, kyopurtoy soponto nye kyoyiye sakwayanatet oko corokyinotet oko pokitet oko arosyek ce miyotec oko sokwonutek cepo pokitet oko sayet nye miyat nye osoye kerkeyik.
- <sup>4</sup>Kunyo kukukite picoto yawut ye puryo kot kukosök akwek opontekey oko cekto om soponto nye miyat nyo yiye cek kucupok akwek.
- <sup>5</sup>Ntene mosukuror kumwoy musankut nyepo ŋalek cikwa om taytap Yiyintet nye mosukumutyi musankut piko co kipok oko ce soptos.
- <sup>6</sup>Kicemwoci lokoywek ce toponec piko co kipok sukuŋet kopur soponto nyimwa nyepo muyet kuyu wule moktoy Yiyintet, nka kot kicemutyi porwonikwa musankut kuyu piko tokol.
- <sup>7</sup>Karik pesyet nye pekune tukuk tokol. Misyini oripkey akwek nkit oŋnkopoypoyitu sukuŋet omuc osome.
- <sup>8</sup>Ntene kupëlis möce acämŋkey owoŋŋkyi akwek kwakwek nkit, omnye yene cömisyet miyotyonyik ce caŋ.
- <sup>9</sup>Atorockey akwek om korikwok nye puryo kot oŋunyŋunyi.
- <sup>10</sup>Kikokoci Yiyintet ci ake tokol om akwek kokotutyet nyenyi nkit, kunyo möce oyiyisye okokoy kuyu ripikap tukuk ce toponec ce kikonok Yiyintet.
- <sup>11</sup>Ye ponto ci tokol ŋolyo nye möce kule omwowu, kumisyini kuŋalal ŋolyontet nyepo Yiyintet. Nteye mite cito kukolyoyisyi, kumöce kwiysisye swamet nye kocini Yiyintet neto, sukuŋet cikasta Yiyintet om tukuk tokol kupunte wule mite Yesu Kristo nyo ponto woyinto oko swamet okokoy oko okokoy. Yunyonto.
- <sup>12</sup>Coronutekwani, monte cikite mata nyepo mwoninto nyo otoŋonyi, kuyu nye mite kwiyoctos ŋolyo nye monket akwek. Yiyoktos ŋaleca kusyemak akwek.
- <sup>13</sup>Ntene möce aŋerec omnye otoŋonyi toŋoŋutek ce kipo Kristo sukuŋet kuyemak ŋerekwek om pesyet nye ciporu woyinto nyenyi.
- <sup>14</sup>Möce osutkey kule ceponte kupeyoy ye kacecupok omnye oyiku konomik cepo kristo. Omnye poru ŋalecato kule Muyet Nyetilil nyewo nyoto, kunye Muyet nyepo Yiyintet nye mitowune wule omite akwek.



<sup>15</sup>Puryo kot kuroke kutanjany ci ake tokol om akwek omnye koporis nto omnye corin nto omnye sokoran, nto omnye wutekey njalek cepo piko alak.

<sup>16</sup>Ntene ye yiku Kristoyin onnkitañany mente alilan, kaste Yiyintet omnye ponte kaynetap Kristo.

<sup>17</sup>Kapunto pesyet kucec musankunek. Mosicenyosye cewosontyi piko cepo Yiyintet. Kunyo ye kacecenec acek, mosiciwannta ra kulene om wule mite piko co puryo kot kucöme lokoywek ce toponec cepo Yiyintet.

<sup>18</sup>Kuyu wulo mwowu silutekap Yiyintet kule, “Korom koromun ye mosisop piko ce toponec, kunyo mosukwiyakay kulene om wule mite piko co menket Yiyintet, oko piko co ponto miyotyet?”

<sup>19</sup>Kunyo piko co toñonye kuyu wule moktoy Yiyintet, kuce misyini kutosyikey kwiyy njalek ce toponec onnkukenekey Kotoñintemwa nyo yititoy kurtoyenyi.

## 1 Petero 5

<sup>1</sup>Osomwok akwek poyik cepo pikap Yiyintet ce mite wule omite akwek, onjololi mpo ani kuyu Pontet. Kyakäs toñonutec cepo Kristo, kunyo okeni kule mosonyoru woyinto nye mosicinon. Osomwok kule,

<sup>2</sup>oyiku mesewek cepo kecirek cepo Yiyintet ce kicekonok orip. Orip topon kuyu wule maktowok Yiyintet, ntene nye puryo ku kule omnye omöce musyaret, ntene omnye omöce kule kyi.

<sup>3</sup>Monte cepayte kwapi piko co kicekonok, ntene oporci kopurto nye topon nye kakäsenak.

<sup>4</sup>Nteye kopunto pesyet nye porukek kutok Mesewontet Nyewo, kuye sonyoru mpo akwek musyaret nyepo woyinto nye mopoku.

<sup>5</sup>Kunyo möce aywey mpo akwek, oyiperik poyik cikwok cewoyec. Möce alac akwek tokol siret nyepo tolosyet onnkokalayekey yisyonutec. Omnye mwowu silutekap Yiyintet kule, “Toye Yiyintet piko co silekey, ntene onnkukoci kupeyok piko co poypoyec.”

<sup>6</sup>Kunyo opoypoyitu oyem opurune yewutap Yiyintet nye ponto swamet, sukuñet koñetak onetye om pesyet nye kikwey neto.

<sup>7</sup>Ye osoti koromun, owirci kasoteywekwok coto oponte wule mite neto, omnye ripok.

<sup>8</sup>Okösu onnkorikey! Mite puniyontet nyimwon Setani nyewo nyepo oyik kuwesetoti kutule kuyu ñetuny kuceñoti cito nye möce kule atakum ayam.

<sup>9</sup>Okwilokisye om koyenet nyimwon onkotay oyinot cekwol yitik, omnye onket kule mite mpo yeya mwon alake om koret tokol ce mite kutoñonye toñonutec ce kerkey cikwok.



<sup>10</sup>Ntene om letut kuminiŋ ye katanany, mosikusatak Yiyintet nkit nyepo kupeyok tokol nyo kikurok akwek kwonyoru woyinto nye mopoku om koyomotet nye oponte oko Kristo, oŋnkukonok swamet oko kwilatet oŋnkotitirok.

<sup>11</sup>Kopurune swamet wule mite neto okokoy oko okokoy. Yunyoto.

<sup>12</sup>Kosilwok ani parwani nwac kusir wule mite Silifano yeya nye oŋnket oŋnkokenekey. Omöce ani kule akwilak akwek oŋnkomwowok ŋalek cikwani kule kokotutyetap Yiyintet nyitenyi nyepo manta. Okwilokisye koromun om ŋolyontoni.

<sup>13</sup>Kesupayak akwek pikap Yiyintet cepo Papulon ce kikwey Yiyintet mpecek kuyu akwek, oŋnkusupayak werimwani Marko.

<sup>14</sup>Asupaykey akwek nkit om ŋatutet nye poru cömisyet nyepo Kristayek. Kante kopurune kalyet tokol wule omite akwek co opoye Kristo.



## 2 Petero

### 2 Petero 1

- <sup>1</sup>Cone parwani wule amite ani Simon Petero, mutworintet oŋnku kiyokintetap Yesu Kristo. Osilwok ani akwek piko ce ponto koyenet nyepo latik nye kerkey nyinyacek. Omnye Yiyintet nyinyacek oko kosopintenyono Yesu Kristo om yisyenyi nyepo manta kunye kikonec acek tokol koyenoni.
- <sup>2</sup>Kutosyikey poypoyet oko kalyet kupunte ŋomnonet nye oŋnket Yiyintet oko Kristo Mokoryontenyono.
- <sup>3</sup>Kikonec acek swametap Yiyintet tukuk tokol ce cemöce, sukuŋet cipur kopurto nyepo Yiyintet oŋnkyinket Kristo nyo kikurec acek kwocenyoru woyinto nyenyi oko toponiyet.
- <sup>4</sup>Om aret nyeyu nyitenyi kuye kikonec kokotutek ce woyec ce toponec ce kikurto, sukuŋet kukalyak akwek kokotutecutecu ocilile arantayet nyepo corokyinotet nye mite koret, oŋnkwonyoru soponto nye kerkey nyepo Yiyintet.
- <sup>5</sup>Om ŋolyontoni, kumöce asyem koromun otosyi toponiyet om wule mite koyenet nyimwoŋ, otosyi ŋomnonet om wule mite toponiyet nyimwoŋ.
- <sup>6</sup>Otosyi ŋomnonet nyimwoŋ om ripotetapkey, oŋnkotosyi muytocinotet, oŋnket Yiyintet oŋnkotosyi cömisyet nyepo tupcet nye oponte kuyu mpo yeya.
- <sup>7</sup>Nto om tupcet kuyu mpo yeya, otosyikey ocäm piko tokol.
- <sup>8</sup>Ye oponte akwek kopurto nyeyu nyitenyi nye mite kutosyinikey okokoy, kuye mosukukunok oyiyisyeno om swamet opoyitu latik oŋnkukonok onyoro ŋomnonet nye yeme om wule mite Mokoryontenyono Yesu Kristo.
- <sup>9</sup>Ntene korat nye memuce kukästa ci ake tokol nye moponto kopurto nyoto oŋnkiyutye kule kiciwun miyotyonyiki co kipo tay.
- <sup>10</sup>Kunyo mpo yeya, asyem oyiyisyeno swama koromun akwil kursyet nyo kicekurok oko kweyatet nyo kikweyak Yiyintet, puryo kot osutoy akwek mpo kisic ye kayiy kuyunyoto.
- <sup>11</sup>Om aret nye yunyoto kuye mosicekonok akwek kamukeywek ce owute poytoyisyet nye mopoku nyepo Mokoryontenyono oŋnku Kosopintenyono Yesu Kristo.
- <sup>12</sup>Kunyo mososilwok ani ŋalecutecu okokoy nka kot conket akwek, oŋnkokwilokisyeno om ŋalek cepo manta ce kyonyoru.
- <sup>13</sup>Asoti ani kule ŋolyo nye topon ye kasotwok kulelakitu ŋalecu om kasoteywekwok ye tosope.
- <sup>14</sup>Oŋnket kule om pesyos ce ŋeri mosawirte porto nyitenyi nune kuyu wulo kikurtowo kumwowo Mokoryontenyono Yesu Kristo.



- <sup>15</sup>Kunyo mosasyem koromun okonok akwek ye omuci kot osot ñalecu om pesyosyek tokol ye kamey ani.
- <sup>16</sup>Puryo kot kyiyisye acek tyonkocok ye cemwowok kamukeywek cepo ye coni Mokoryontenyo Yesu Kristo. Kicekäs woyinto nyenyi om konyekyo.
- <sup>17</sup>Kicemite acek yeto ye kikocini Yiyintet Papa neto Woyinto oko kakitatet, ye kicone kutit wule mite Yiyintet nyepo woyinto nye kimwoy kule, “Nyi kunye Werimwani Camanet, nye oñerekyini Koromun!”
- <sup>18</sup>Kicelim acek nkit kutit nyitenyi kucone torot ye kicepontekey acek oko neto om tulwet nyetilil.
- <sup>19</sup>Kunyo cikenekey koromun ñolyontet nye kimwoy workoyik. Mosayiy akwek topon ye kotepe kot alimnte ñalecato, omnye kerkey ñaleca oko tarit nye kwenye menonet okoy korir koret, oñnkukweny mukuleywekwok kokelyet nyepo ye kayec koret.
- <sup>20</sup>Ntene nye pëlisyi kunyi, möce oñnket kule puryo ci nye muce kuror wule yunto ñorsyet nyepo silutekap Yiyintet.
- <sup>21</sup>Omnye puryo kot kumite workoyonti nye kicemwoy kenys om cömisyet nyepo cito. Ntene kintoci Muyet Nyetilil piko ye kiñolole lokoywek ce kwone wule mite Yiyintet.

## 2 Petero 2

- <sup>1</sup>Kuyu wulo kimate mpo kenye workoyik ce mwiynec ce kipontokey piko, kuyunyoto mosukutok konetik cepo mwiynanet om wule omite akwek. Mosukusut cek konetisyet nye sutu arantayet nyewo. Mosukutuckey kutay Mokoryontet nye kisope cekto, kunyo mosukusutyikey kwarantakey cek nkit lakwar.
- <sup>2</sup>Kunyo mosukurup piko ce cañ kapurto nyepo picoto miyotec, mosukuñalale piko kwapi aret nyepo manta kukesac ñalek ce oyiye akwek.
- <sup>3</sup>Om corokyinotet nyimwa kuye mosukunyor latik om wule omite akwek koneticutecu po mwiynan omnye komwowok ñalek cepo koperperisyo pate. Kicemutyi cek musankut kenye, kunyo mite ceiytoy aranet nyimwa.
- <sup>4</sup>Kipuryo kot kusop Yiyintet malaykanik co kikwiye miyotyey, ntene kiwirta kupa tokol wule mite mata nye momise, wule kiceroty wule mite menonet kukonye pesyet nyepo musankut.
- <sup>5</sup>Kipuryo kot kusop Yiyintet koret nyepo kenye, ntene kikon peko ce kilum koret nyo kipo piko ce menket Yiyintet. Kisop yoto cito akenke, nyoto ku Nuwa nye kimwoytoy ñalek cepo manta, wanak oko piko alak tisap.
- <sup>6</sup>Kimutyi Yiyintet musankut moñosyek cepo Sotom oko Komora oñnkwaranta kupele mata kwek aryantet pate. Kikwiye kuyunyoto sukuñet kwek kaporunot om wule mite piko co menket Yiyintet kuyu wule mosiciyita cekto om letut.





- <sup>7</sup>Kisor Yiyintet Lot omnye ki cito nye topon nye kisenkere miyotyey nyepo sakwayanat nyepo piko ce kiwuryo.
- <sup>8</sup>Kiminye Lot wule mite picoto, kunyo kilime oṅnkukās ṅalek tokol okoy kunerec mukuleynyi nye kitopon om ṅalek ce miyotec ce kikwiye picoto.
- <sup>9</sup>Kunyo nkete Yiyintet wule soruntoy piko cepo Yiyintet om wule mite syemutok, oṅnkunket wule mokuripto piko ce miyotec om wule mite toṅoṅutek okoy pesyet nyepo musankut.
- <sup>10</sup>Nto piko ce nyoru musankut nyewo kuco rupe corokyinotet nye samis nyepo porwonikwa oṅnkunyl kamukeywekap Yiyintet. Nyikon koromun koneticutecu mwiynot, oṅnkunylisi nye puryo kot kuyweye cepo torot; cupe pate,
- <sup>11</sup>Nka mpo malaykanik co ponto swamet nye pēle nyepo picutecu mwiynot kuce puryo kot kucupisyi ye cewosontyini om taytap Mokoryontet.
- <sup>12</sup>Kunyo kerkey picutecu oko tyoṅin cepo samiyita ce kicitany kule sicetece oṅnkyepakāce kupok. Cupe tukuk ce puryo kot konket cekto. Mosikyaranta cek kuyu tyoṅin cepo samiyta.
- <sup>13</sup>Mosukuyokune ṅalecato toṅoṅutek kupo toṅoṅutek cek kikon cekto. Derekwec ce ponto cekto pate kuye kayiy ye pet kwen ṅolyo nye ṅerece corokyinotet nyepo porwonikwa. Konok kalilan oko sornon ye koyomisyē akwek oko cekto, omnye ṅerekyini cek orosyek cepo mwiynanet ye yiye kuyunyoto.
- <sup>14</sup>Puryo kot kumōce kule nto cekās kiy ake tokol, ntene mōce kule cekās pate koruk cemonisyek. Puryo kot kupoku mucesta ye mokwiy miyotyey. Ntocini cek piko co moponto swamet kupa wule mite musatit! Kicinet mukuleywekwa kucām corokyinotet. Kicup Yiyintet cekto!
- <sup>15</sup>Kikwasta aret nye rotat, kunyo kipotyī aret. Kirup pate aret nye kiwete Palam weritap Peori nyo kicōme pesanik ce kinyor om aret nyepo miyotyey.
- <sup>16</sup>Kunyo kicepolyi celel neto om miyotyonyiki. Kiṅalal sikiryet nyenyi nyo moṅolole, kuyu cito okoy kukereka punmetyontit nyepo workoyontet.
- <sup>17</sup>Kerkey picu oko koṅik co kosune peko ce kiteny, kerkey oko polik ce wuse yomet. Kikonorci Yiyintet cekto otepto nyimwa om mwenet orit wule mite menonet.
- <sup>18</sup>Dolole cek ṅalek cesilekey oṅnkuperperisyi oṅnkwiye corokyinotet nyepo sakwayanatet nyepo porwonik sukuṅet kutec kunām co kucec kule cemweye wule mite piko co purtoy kopurto nye masat.
- <sup>19</sup>Kurtocini cekto piko cut kule monyoru kalyet oṅnkurok yec ku mutworik cekto nkit cepo miyotyey, omnye mutworin cito nyepo tukuk co kipayta cito nyoto.
- <sup>20</sup>Kicilile piko miyotyonyik ce mite koret kupunte ṅomnonet nyepo Mokoryontenyo oṅnku kosopintet Yesu Kristo; oṅnkuketyikey kupayta yec tukucoto picoto, kuporkey kule mosukuwur soponto nyepo picoto nyepo letut kupēl soponto nye kipo tay.



<sup>21</sup>Kitopon nto kipuryo kot konket cek kenyis aret nyepo manta kusir ye kinkoket cek oṅnkuweckey kutay ntarastit nyetilil nye kicikoci.

<sup>22</sup>Tukuk ce kikwiyokis om wule mite cekto kuce poru kule po manta tyonkoconi mwowu kule, “Ketyinikey ṅokit kwam kuṅuṅtak ce keṅuṅu nkit.” Mwowu yec kule, “Ketitoykey nkururwet nye kociwun wokomilmile yec sakatyet.”

## 2 Petero 3

<sup>1</sup>Coronutekwani! Parwemwani nyitenyi nyepo oyeny nye kwosilwok akwek. Kwasyem om poronok tukway kule osowu kasoteywek cikwok cepo manta omnye kwasotwok ṅalecu.

<sup>2</sup>Omöce ani asot akwek ṅalek co kiṅalale workoyik cetililec ikye keny oko ntarastit nyepo Mokoryontet oṅnku Kosopintet nyo kimwowok akwek kiyokik.

<sup>3</sup>Nyepo tayta, möce oṅnket kule om pesyosyek cepo letut mosukutok piko alake ce poytoy saponwek cikwa corokyinotet nyepo porwonikwa. Mosukucasenekey akwek kucupok.

<sup>4</sup>Mosukumwoy kule, “Kikurtoci neto cek kule mosaco. Ano yawut? Kipok mpo kukonyacek, kunyo mite kiy ake tokol kuyu wulo kiyunto kuceke kicitany koret!”

<sup>5</sup>Toye cek macäm ṅalek cepo manta kule kiṅalal Yiyintet ikye keny, yoto citany wulin po torot oko ṅony. Kitanyakay koret kucone wule mite peko om kwenutap peko.

<sup>6</sup>Kunyo peko mpo yec kuce kiyin kwaranta koret nye kipo tay.

<sup>7</sup>Ntene ṅolyontetap Yiyintet nyoto akenke kunye mite kuripe koret nyi mite yawut, sukuṅet kyarante koret mata nye loye. Cemite ceripe okoy pesyet nye mosicemutyine musankut piko co miyotec oṅnkyaranta.

<sup>8</sup>Coronutekwani! Ntene monte ceyutye ṅolyontoni akenke kule, kerkey pesyet akenke oko kenyisyek elifut akenke om wule mite Mokoryontet, oṅnkukerkey kenyisyek alifut akenke oko pesyet akenke.

<sup>9</sup>Puryo kot kwiye Yiyintet möt ṅolyo nye kikurto kuyu wulo sotitoy piko alake, ntene muytocini om wule omite akwek, omnye puryo kot kumöce kule kupot ci ake tokol, ntene möce kule kurenkenkey ci tokol kwasta miyotyoni.

<sup>10</sup>Ntene mosukuco pesyetap Mokoryontet kuyu corin. Om pesyonoto kuye mosukupot wulin po torot om karumnta nyewo koromun. Mosukulayo kupoty kokelik om torot om mata nye loye, oṅnkupot koret oko kiy ake tokol nye mite orit.

<sup>11</sup>Kunyo ye kacaranta tukuk tokol ce mite koret kuyunyitenyi, mosoyeku akwek piko ceyune? Misyini kutililitu saponwekwok oṅnkoywey Yiyintet,

<sup>12</sup>omite okonye pesyetap Yiyintet. Asyem koromun sukuṅet kuco lakwar. Pesyet nyoto kuye mosicepël wulin po torot oṅnkyaranta kuloy kupoty kokelik om torot om mata nye loye.



- <sup>13</sup>Ntene cekonye acek ce kikirto Yiyintet, coto ku koret nyelel nyepo torot oko koret nyelel nyepo nyony, wule mosukopurune toponiyet nyepo tililinto.
- <sup>14</sup>Kunyo coronutekwani, ye omite okonye pesyonoto, kumöce asyem opur otillitu nye moponte lelis om taytap Yiyintet oñkopurte kalyet oko neto.
- <sup>15</sup>Akäse muytocinotet nyepo Mokoryontet kuyu poroyinto nye kikonok akwek sukuñet cisopok kuyu wulo kisilwok akwek yeyanyo Paulo kwiyisye ñomnonet nye kiñonkyi Yiyintet.
- <sup>16</sup>Ñalecutecu kuce mwowu neto om poronokyi tokol ye sile ñalek ce nöme ñolyontoni. Mite ñalek cewuyec ce mite poronokyi. Ñolole piko co perper ce puryo kot kukwilotin kwiyisye mwiynanet kuyu wulo mostoy cek mpo ñalek alak cepo silutekap Yiyintet. Kunyo mokwarantakey cek nkit.
- <sup>17</sup>Ntene akwek coronutekwani, kicisowok akwek kenye ñalecutecu, kunyo oripkey sukuñet mente kot kumasak piko co yirye ntarastinek okoy otay aret nyimwoñ nye kwilat nyepo manta.
- <sup>18</sup>Ntene otosyikey onerye om poypoyet oko ñomnonet nye oñket Mokoryonteny oñku Kosopintet Yesu Kristo. Kopurune woyinto wule mite neto kuceke yawut oko okokoy okoy okokoy. Yunyoto.



## 1 Yowana

### 1 Yowana 1

- <sup>1</sup>Cesilwok acek ñalek ce nōme ñolyontet nyepo soponto nye kimate kuceke towunot. Kicelim oñnkyekās acek om konyekyacek kirotote, oñnkyename yewuniyekyo.
- <sup>2</sup>Ciñoj cipor soponto okoy cekās acek, ce nōme soponto nye mopoku nye kiciporwec nye mitowune wule mite Papa.
- <sup>3</sup>Kunyo cemwowok acek akwek kito nye kicekās oñnkyelim, sukuñet oyomekey akwek oko acek om koyomotet nye ceponte acek oko Papa oko Werinyi Yesu Kristo.
- <sup>4</sup>Cesilwok acek ñalecu sukuñet kuyemec ñerekwek.
- <sup>5</sup>Kunyo ñolyontet nye kicelim acek kucone wule mite Werinyi nye cemwowok acek kunyi kule, Yiyintet kunye lakweyet, puryo kot kumite menonet mpo kisic om wule mite neto.
- <sup>6</sup>Kunyo ye kacemwowu kule ceponte koyomotet oko Yiyintet oñnkurok yec cemite wule mite menonet, kuporkey kule coperperisiyi pate om ñalek ce cemwowu oko yisyet nye kyiye.
- <sup>7</sup>Ntene ye kicipurte lakweyet, kuyu wulo ponto neto lakweyet kuye mosicipurte acek koyomotet kwacek nkit, yoto kuye mosukowunec korotikap Werinyi Yesu kunum miyotyoni tokol.
- <sup>8</sup>Ye kacemwowu acek kule moceponte miyotyoy, kaciperperkey acek nkit oñnkupuryo kot ceponte ñalek cepo manta.
- <sup>9</sup>Ntene ye kacerenynkey cemwoci Yiyintet miyotyonikeyo, mosukukalyec oñnkuwunec om wule mite miyotyoni tokol, omnye Yiyintet kunye po manta oñnkwiye ñalek cepo manta ce toponec okokoy.
- <sup>10</sup>Ye kacemwowu kule mnakyiy kutoku kule kociperperisiye oñnkuporkey kule puryo kot kumitowune ñolyontetap Yiyintet wule cemite acek.

### 1 Yowana 2

- <sup>1</sup>Lekokwani, kosilwok ani ñalecu sukuñet mente kot ayiy miyotyoy. Ntene ye kotepe kot kwiy citake miyotyoy, ceponte Yesu Kristo nye mite kuyetyewec acek om wule mite Papa.
- <sup>2</sup>Yesu Kristo nkit kunye aret nye cikolyenec acek miyotyonikeyo, nye puryo kot ku miyotyonikeyo cicacek nkit pate, ntene oko mpo miyotyonikeyo cepo koret tokol.
- <sup>3</sup>Ye kacerup ntarastinekap Yiyintet kuye sukuporkey kule cinket acek neto kupoyit manta.



- <sup>4</sup>Ye kotepe kot kumwoy citake kule, oṅket Yiyintet, oṅnkurok yec kupuryo kurupe cicoto ntarastinek cepo Yiyintet, kuporkey kule mwiyny cico oṅnkupuryo kot koponto ṅalek cepo manta.
- <sup>5</sup>Ntene ci ake tokol nye rupe ṅolyontet nyepo Yiyintet kunye cito nyo nye kicām Yiyintet kuwoṅnkyi.
- <sup>6</sup>Ye komwoy citake kule opoye Yiyintet kumisyini kurup cicoto kopurto nye kipo Kristo.
- <sup>7</sup>Coronutekwani, puryo kot osilwok ani ntarastit nyelel, ntene ntarastini kunye po keny nye kyolim akwek kuceke keny. Ntarastit nyepo keny ku lokoywek co kyolim ikye.
- <sup>8</sup>Ntene yec ntarastit nyi osilwok ani kunye lel, nto ṅalek cepo manta ce mite ntarastini kunye ceköse kule mitowune wule mite Kristo oko wule omite akwek. Omnye mite kutile menonet kunyo mite koluwu yawut lakweyet.
- <sup>9</sup>Ye komwoy citake tokol kule oponte lakweyet oṅnkurok yec kusenkere cicoto yeyanyi kutokumite cito nyoto wule mite menonet okoy mpo pantanyi.
- <sup>10</sup>Ci ake tokol nye cöme yeyanyi kunye ponto nyo lakweyet oṅnkupuryo kot kuponto kiy nye muce kusokyi citake kwiyy miyotyeyet.
- <sup>11</sup>Ntene mitowune menonet wule mite ci ake tokol nye senkere yeyanyi, wesetote cicoto menonet orit oṅnkupuryo kot konkete wule weti, omnye kikokor menonet konyek ceci.
- <sup>12</sup>Osilwok ani akwek lekokwani, omnye cikolyoy miyotyonyikwok om kaynetap Kristo.
- <sup>13</sup>Osilwok ani akwek mpo Papa, omnye oṅket akwek neto nye kimite kuceke towunot. Osilwok ani akwek oyiperik omnye kyopël akwek oyinot cekwol yitik!
- <sup>14</sup>Kosilwok ani kwek lekok omnye oṅket akwek Papa. Kosilwok ani akwek mpo papa, omnye oṅket akwek neto nye kimite kuceke towunot. Kosilwok ani akwek oyiperik, omnye oponte akwek swamet oṅnkumitowune Yiyintet wule omite akwek, kunyo kyopël akwek oyinot cekwol yitik.
- <sup>15</sup>Monte cecām koret nto mpo tukuk ce mite koret. Ye kacām citake koret, kupuryo kot kumitowune cömisyetap Papa wule mite neto nyoto.
- <sup>16</sup>Om kiy ake tokol nyepo koret, kuyu corokyinotet nyepo miyotyeyet, oko tukuk ce köse piko oṅnkumäc, oko tukuk tokol cepo koroni ce silekey piko, kuce puryo kukwone tukucoto mpo akenke wule mite Papa, ntene kwone pate koret.
- <sup>17</sup>Mite kupote koret oko kiy ake tokol nye corokyini piko. Ntene musukusop okokoy cito nye yiye yisyyet nye möce Yiyintet.



- <sup>18</sup>Lekokwani, karik ye n̄ete koret! Kicemwowok akwek kule musukuco puniyontet nyepo Kristo; kutok yawut punikap Kristo ce caṅ, kunyo cinketi kule karik ye n̄ete koret.
- <sup>19</sup>Kipuryo kot kupo picu luket nyinyacek, nto kipure wule cemite acek, kunyo kipete cek wule cemite acek sukuṅet kuporkey kule puryo kot kupo cek luket nyinyacek.
- <sup>20</sup>Ntene kiṅapenak Kristo Muyet Nyetilil, kunyo oṅket ṅalek cepo manta.
- <sup>21</sup>Kosilwok ani akwek nye puryo kot ku kule omnye monket akwek ṅalek cepo manta, ntene omnye oṅket akwek ṅalecato po manta, oṅkonket mpo kule puryo ṅolyo nyepo mwiynan nye muce kenyis kucone wule mite ṅalek cepo manta.
- <sup>22</sup>Kunyo ṅo nye mwiyn? Cito nyoto kunyo toye kumwowu kule Yesu kunye puryo kot ku Kristo. Cito nyoto kunye puniyontet nyepo Kristo. Toye cico Papa oko Werit.
- <sup>23</sup>Omnye ci ake tokol nye katay Werit kukatay mpo cicoto Papa. Nto ci ake tokol nye kacäm Werit, kupontokey cicoto mpo oko Papa.
- <sup>24</sup>Kunyo orip topon om mukuleywekwok lokoywek co kyolim akwek keny. Ye korip akwek ṅalek co kyolim kuceke keny, kuye mosopurte koyomotet oko Werit oko Papa.
- <sup>25</sup>Kito nye kikurtowec acek Kristo nkit ku soponto nye mopoku.
- <sup>26</sup>Kosilwok ani ṅalecu ce nöme piko co syem kule cemasak akwek.
- <sup>27</sup>Ntene akwek nkit kuce kiṅapenak Kristo Muyet Nyetilil. Ye tokopurune Muyet Nyetilil wule omite akwek, kupuryo kot omöce akwek citake nye kenetak. Omnye nete Muyet Nyetilil ṅolyo ake tokol, oṅku ṅolyo nyepo manta ṅolyo ake tokol nye nete neto nye puryo mwiynan. Kunyo arup konetisyet nyepo Muyet Nyetilil oṅkopurune wule mite Kristo.
- <sup>28</sup>Kunyo lekokwani, opurune wule mite Kristo cekwilokisye om pesyet nye cone neto nye puryo kot ceponte kalilan nye cewunyekey.
- <sup>29</sup>Oṅket akwek kule po manta Kristo, kunyo misyini oṅket kule ci tokol nye yiye ṅalek ce toponec kunye lekwetap Yiyintet cito nyoto.

### 1 Yowana 3

- <sup>1</sup>Akäs pa, kicämec acek Papa koromun! Cemosi koromun cömisyet nyenyi, sukuṅet cekurenec lekoky. Kunyo ciku lekoky cepo manta. Kunyi kito nye kisac sukuṅet menketec acek koret, omnye kipuryo kot konket koret Yiyintet.
- <sup>2</sup>Coronutekwani, ciku acek yawut lekopak Yiyintet, ntene puryo kot cipor kutok topon wule mosicipurte. Cinket acek kule pesyet nye toku Kristo kuye mosicekerekeyitu oko neto, omnye mosicekäs wule yunto neto nkit.
- <sup>3</sup>Ci ake tokol nye kosekey Kristo kunye misyini kutililkey kuyu wule tilil Kristo.
- <sup>4</sup>Ci ake tokol nye yiye miyotyet, kunye ponto lelisto nye kokwiri ntarastinekap Yiyintet, omnye ye kakyiy miyotyet kukerkey nye kokyiri ntarastit.



- <sup>5</sup>Oṅnket akwek kule kico Kristo, sukuṅet kunum miyotyoniḱ cepo piko, oṅnkonket kule puryo kot kuponto neto miyotyoyo.
- <sup>6</sup>Kunyo puryo kot kwiye miyotyoyo ci ake tokol nye ponto soponto nyepo Kristo, ntene ci ake tokol nye kotosyikey kwiye miyotyeyet kunye tompo kot kukäs nto mpo konket cicoto neto.
- <sup>7</sup>Lekocu! Mente kot kumasak citake. Po manta ci tokol nye yiye ṅalek ce toponec.
- <sup>8</sup>Nto cito nye tosyinikey kwiye miyotyeyet kupo cito nyoto Setani nyewo nyepo oyik, omnye kikwiy Setani nyewo nyepo oyik miyotyeyet kuceke towunot. Kunyo kico Weritap Yiyintet wule mite neto cicoto.
- <sup>9</sup>Puryo kot kwiye miyotyeyet omnye kikwek lekwetap Yiyintet.
- <sup>10</sup>Dalek ce poru kupoyit manta pcyatet om wule mite lekok cepo Yiyintet oko cepo Setani nyewo nyepo oyik kucu kule, ci tokol nye puryo kot kwiye ṅalek cepo manta nto nye puryo kot kucöme yeyanyi kunye puryo kot ku lekwetap Yiyintet cito nyoto.
- <sup>11</sup>Lokoywek ce kyolim akwek kuceke kenye kucu kule, misyini cecämnykey acek kwacek nkit.
- <sup>12</sup>Puryo kot kuroke cekeyitu acek oko Kain nye kipo oyinot cekwol yitik, omnye kihar mutakwam. Omne sukupar Kain mutakwam? Omnye kikwiy neto tukuk ce puryo kot kupo manta, ntene kwiye mutakwam tukuk ce kipo manta.
- <sup>13</sup>Kunyo mpo yeya, monte cikite ye kotepe kot kusenkerak koret.
- <sup>14</sup>Kicinket acek kule kicekwane met oṅnkyekwa wule mite soponto, cinket kuyunyoto omnye cecöme acek mpo yeyanyo. Ci ake tokol nye puryo kot kucömisyi, kuminye nyo wule mite met.
- <sup>15</sup>Porin ci tokol nye senkere yeyanyi, kunyo oṅnket akwek kule, puryo kot kuponto ci nye porin soponto nye mopoku.
- <sup>16</sup>Kito nye porwec cömisyet kunyi, kikoyto Yesu soponto nyenyi kumeccece acek. Kunyo misyini cikoyte mpo acek sponwek cico cepokyi mpo yeya!
- <sup>17</sup>Ye mokoryo citake nye ponto tukuk ce caṅ oṅnkuköse yeyanyi nye moponto kiy oṅnkurok kutukyi yeyanyi patay, komuce cicoto kulene kumwoy kule ocöme Yiyintet om mukuleynyi?
- <sup>18</sup>Lekokwani, puryo kot kuroke kwek cömisyet nyinyecek ṅalek ce ceṅololi pate, ntene misyini kwek cömisyet nyepo manta nye poru yisyet nye kyieye.
- <sup>19</sup>Kunyo ye kakyiy yisyet nyeyunyitenyi kuye sicinket kule cepoye acek manta, oṅnkyekwilokisye om taytap Yiyintet.
- <sup>20</sup>Ye komutwec acek mukuleywekyo musankut, kunyo cinket kule nyewo Yiyintet kupël mukuleywek kyacek oṅnkunket kiy ake tokol.





<sup>21</sup>Kunyo Coronutekwani, ye puryo kot kumutwec acek mukuleywekyo musankut, kuye ceponte titiret om taytap Yiyintet.

<sup>22</sup>Oŋnkyenyoru acek kiy ake nye kucesom, omnye cerupe ntarastinyi oŋnkyiye ŋalek ce ŋerekyini neto.

<sup>23</sup>Ntarastit nye kikonec kunyi kule ciyen acek kaynetap Werinyi Yesu Kristo oŋnkyecämkey acek nkit kuyu wulo kimwowec neto.

<sup>24</sup>Ye karup ci ake tokol ntarastitap Yiyintet kopurune Yiyintet wule mite neto. Cimuci acek cinket kulene kule mitowune Yiyintet wule cemite acek? Cinket omnye porwec Muyet Nyetilil nye kikonec neto.

## 1 Yowana 4

<sup>1</sup>Coronutekwani, monte ciyen ŋalek cepo piko tokol ce sutekey kule ceponte Muyet Nyetilil, ntene asyem okoy oŋnket kule cone Muyet nye ponto picoto wule mite Yiyintet. Omnye kuseretyi koret wulyo tokol workoyik cepo mwiynanet.

<sup>2</sup>Ye sonket akwek kule cöne Muyet nyoto wule mite Yiyintet kuye kaŋalal cito kupor kule; kico Yesu koret kuyu cito.

<sup>3</sup>Nto ci tokol nye kotoyis macäm kuyunyoto kunye puryo kot koponto cito nyoto Muyet nyepo Yiyintet oŋnkupuniyontet nyewo nyepo Kristo nyo kyolim akwek kule musukuco. Kunyo mite yawut koret.

<sup>4</sup>Lekokwani, opoye akwek Yiyintet kunyo kyopël workoyik co mwiynec, omnye Yiyintet nyo mitowune wule omite akwek kunye ponto swamet nyewo kupël puniyontet nyewo nyepo Kristo nye mite koret.

<sup>5</sup>Dolole workoyik cepo mwiynanet ŋalek cepo koret, kunyo limncini koret ŋalek, omnye po cekto koret.

<sup>6</sup>Ntene cepoye acek Yiyintet. Limwec acek ci ake tokol nyepo Yiyintet. Puryo kot kulimwec acek ci ake tokol nye puryo kot kupo Yiyintet om aret nye yunyitenyi kuye sicinket acek pciyatet nyepo Muyet Nyetilil nyepo manta oko nyepo mwiynanet.

<sup>7</sup>Coronutekwani! Akany cecamnkey acek kwacek nkit, omnye cone cömisyet wule mite Yiyintet. Lekwatap Yiyintet ci ake tokol nye ponto cömisyet oŋnkunket Yiyintet.

<sup>8</sup>Puryo kot kunket cito nye moponto cömisyet Yiyintet, omnye Yiyintet kunye cömisyet,

<sup>9</sup>Kiporwec Yiyintet cömisyet nyenyi, omnye kiyok Werinyi nye akenke kuco koret sukuŋet cenyoru acek soponto kupunune wule mite neto.

<sup>10</sup>Cömisyet kunyi kule, kipuryo kot ku kule omnye kicecäm acek Yiyintet ntene omnye kicämece acek oŋnkuyok Werinyi sukuŋet kwek korosyontet nyepo miyotyoniik cicacek.



- <sup>11</sup>Coronutekwani, ye kicämec acek Yiyintet kuyunyoto, kunyo misyini cecämnekey mpo acek kwacek nkit.
- <sup>12</sup>Puryo ci nye kikäs Yiyintet kenysis. Kunyo ye kacecämnekey acek kwacek nkit, kuye sukopurune Yiyintet wule cemite acek oṅnkwitita cömisyenyi om wule cemite acek.
- <sup>13</sup>Cinket kule cemitowune acek wule mite Yiyintet, oṅnkumitowune neto wule cemite acek, omnye kikonec Muyet Nyetilil.
- <sup>14</sup>Kicekäs acek kunyo cemwocini piko alak kule kiyok Papa Werinyi cokwek kosopintet nyepo koret.
- <sup>15</sup>Ye ketor citake tokol kumwoy kule Yesu kunye Weritap Yiyintet, kopurune Yiyintet wule mite cito nyoto oṅnkopurune cicoto wule mite Yiyintet.
- <sup>16</sup>Cinket acek nkit cömisyet nye ponto Yiyintet om wule cemite, kunyo kicecämec. Yiyintet ku cömisyet, nto ci tokol nye ponto cömisyet kunye mitowune cicoto wule mite Yiyintet oṅnkopurune Yiyintet wule mite cicoto.
- <sup>17</sup>Kikyiy kwitita kunyol cömisyet om wule cemite acek sukuṅet cetitir om pesyet nyepo musankut, omnye kerkey soppnwek cicacek om koroni oko nyepo Kristo.
- <sup>18</sup>Puryo kot kumite muyotet om wule mite cömisyet. Kwete cömisyet nye kinyol muyotet ake tokol. Kunyo puryo kot kunyolu cömisyet om wule mite cito nye muye, omnye sutu muyotet toṅoṅutek.
- <sup>19</sup>Cecömisyi acek, omnye kinyosyo Yiyintet kucämec acek.
- <sup>20</sup>Ye komwoy, citake kule, “Ocöme Yiyintet.” Oṅnkurok yec kusenker yeyanyi, kokwek cicoto mwiyn. Omnye puryo kot komuce neto kucäm Yiyintet nyo tompo kot kukase konyekyi ye puryo kot kucöme yeyanyi nye köse konyekyi.
- <sup>21</sup>Kunyo ntarastit nye kikonec acek Kristo kunyi kule, Misyini ci nye cöme Yiyintet kucäm mpo yeyanyi.

## 1 Yowana 5

- <sup>1</sup>Lekwetap Yiyintet ci ake tokol nye yene kule Yesu kunye ṅapanet. Nto ci ake tokol nye cöme Papa kucöme mpo lekwenyi.
- <sup>2</sup>Aret nye sicinket kule cecöme acek lekopak Yiyintet kuye kacecäm Yiyintet oṅnkyerup ntarastinekyi.
- <sup>3</sup>Cömisyet nye cecöme acek Yiyintet kunye poru kule cerupe ntarastinekyi, Puryo kot ku wuyec ntarastinekyi om wule cemite acek.
- <sup>4</sup>Omnye ci ake tokol nye lekwetap Yiyintet kunye kukupël koret. Cimuce acek kot cipël koret om koyenenyo nye ceponte.
- <sup>5</sup>Do nye mucce kupël koret? Cito nyoto kunye yene kule Yesu kunye Weritap Yiyintet.




- <sup>6</sup>Yesu kunye cito nye kico, kicono peko cepo patisanenyi oko korotik cepo met nyenyi. Kipuryo kot kuconto peko nkit pate, ntene kicono peko oko korotik. Kunyo Poru Muyet Nyetilil kule po manta n̄alecu.
- <sup>7</sup>Mite muncururwanik somoku.
- <sup>8</sup>Coto ku Muyet Nyetilil oko peko oko korotik, kunyo yicintos cutecu ku somok.
- <sup>9</sup>Ye cecāme acek kule manta n̄alek ce mwowu piko, ntene woyec kupēlis n̄alek ce mwowu Yiyintet. Kimwoy Yiyintet n̄alek ce nōme Werinyi.
- <sup>10</sup>Kunyo ponto ci tokol nye cōme Yiyintet n̄alecu om moyenyi. Ntene ci ake tokol nye puryo kot kuyene Yiyintet kunye mwiyn, omnye puryo kot kucām n̄alek ce kimwoy Yiyintet ce nōme Werinyi.
- <sup>11</sup>Dalek cepo Yiyintet cepo manta kucu kule, kikonec acek neto soponto nye mopoku, kunyo mitowune soponto nyoto wule mite Werinyi.
- <sup>12</sup>Ponto sponoto ci ake tokol nye kupoyit Werit oṅkupuryo kot kuponto sponoto ci ake tokol nye puryo kot kupontokey Werit.
- <sup>13</sup>Osilwok ani n̄alecu akwek piko co cōme kaynetap Werit nyepo Yiyintet sukuṅet oṅket kule ceponte soponto nye mopoku.
- <sup>14</sup>Cikenekey acek neto, omnye cinket kupoyit manta kule limwec ye kocesom kiy ake tokol kuyu wulo moktoy neto.
- <sup>15</sup>Nteye cinket acek kule limwec okokoy ye kacesom ku yoto ye cinketi mpo yec kule cenyoru kiy ake tokol nye kacesom acek neto.
- <sup>16</sup>Ye kakās citake tokol kwiye yeyanyi miyotyey nye puryo kot kupo ṅokis, kuroke kusomnci Yiyintet sukuṅet kunyor cicoto soponto. Nōme n̄alecu piko co puryo kot kwiye miyotyey nyepo ṅokis. Mite miyotyey ye sutu met, kunyo puryo kot omwowok ani kule osom Yiyintet om miyotyey nyeyunyo.
- <sup>17</sup>Miyotyey ye kakyiy ṅolyo ake tokol nye miyat, ntene kumite miyotyey nye puryo kot kupo ṅokis.
- <sup>18</sup>Cinket acek kule puryo kot kumite lekwetap Yiyintet nye tosyinikey kwiye miyotyey, omnye ripe Yiyintet neto topon, oṅkupuryo kot komuce kowurta oyinoto neto nyoto.
- <sup>19</sup>Cinket kule cepoye acek Yiyintet nka kot kupoytoy oyinoto cekwol yitik koret tokol.
- <sup>20</sup>Cinket kule kico Weritap Yiyintet, kunyo kikonec ṅomnonet sukuṅet cinket Yiyintet nyepo manta. Mitowune sponnwec cicacek wule mite Yiyintet nyepo manta oko wule mite Werinyi Yesu Kristo. Nyitenyi kunye Yiyintet nyepo manta, nyitenyi kunye soponto nye mopoku.
- <sup>21</sup>Lekokwani, oripkey akwek topon om wule mite yiyinwek cepo mwiynan!



## 2 Yowana

### 2 Yowana 1

- <sup>1</sup>Ani nyo Pontet, osilyini parwani Cepyosyet nye kikwey Yiyintet oko lekokyi ce ocöme ani kupoyit manta. Puryo kot ku ani nkit nye ocöme, ntene oñnkucöme mpo piko tokol ce nkete ñalek cepo manta.
- <sup>2</sup>Omnye mosukopurune ñalek cepo manta wule cemite acek. Mosicipurte okokoy okoy okokoy.
- <sup>3</sup>Kante kukonec acek Yiyintet nye Papa oko Werinyi Yesu Kristo poypoyet oko cömisyet oko kalyet. Kante kopur soppnwewek kyacek ñaleca kupoyit manta om cömisyet.
- <sup>4</sup>Kyanyoru ani ñerekwek ce cañ koromun yu kowo oñnket kule purtoy lekoc cekuk alake ñalek cepo manta kuyu wulo kimwowec acek Papa.
- <sup>5</sup>Kunyo, cepyos puryo kot osilun ani nyi yawut ntarastit nyelel, ntarastit nyitenyi kunye po kenye nye mwowu kule misyini cecämkey acek kwacek nkit.
- <sup>6</sup>Cömisyet nyi oñolole ani kunye poru kule misyini cipurte acek kopurto kuyu wule yunto ntarastinekap Yiyintet. Ntarastit nye kyolim akwek kuceke kenye kunyi mwowu kule, misyini opurte akwek tokol cömisyet.
- <sup>7</sup>Mite piko kaperperik ce cañ ce kuseretyi koret, picoto kuce puryo kot kucöme kule kico Yesu Kristo kuyu cito. Cito nye mwowu kuyunyoto kunye perperisiy oñnku puniyontet nyewo nyepo Kristo.
- <sup>8</sup>Kunyo oripkey akwek mente kupotwok tukuk cepo yisyet nye kyayiy sukuñet onyuru musyaret nye yemok.
- <sup>9</sup>Ci ake tokol nye weti tay kot kukeyte konetisyet nyepo Kristo, kunye moponto cito nyoto Yiyintet. Nto ci nye ripe konetisyenyi kunye pontokey nyoto Papa oko Werit.
- <sup>10</sup>Kunyo ye kaco ci ake tokol wule omite akwek nye puryo kot kusutu konetisyet nyitenyi, monte cetoroc cico kuco korikwok, monte mpo cisupay.
- <sup>11</sup>Omnye ci ake tokol nye kesupay kunye yicintos oko neto om ñalek ce miyotec ce yiye.
- <sup>12</sup>Oponete ani ñalek ce cañ ce omöce kule omwowok akwek, ntene puryo kot omoce kule osilunenok karatasit oko winet, ntene mosoco ani okoy kwocenalal kuyemec om ñerekwek.
- <sup>13</sup>Kesupayin lekocap cekwomet nye kikwey Yiyintet. Kesupayin koromun.



## 3 Yowana

### 3 Yowana 1

- <sup>1</sup>Ani nyo Pontet, Osilyini parwani Kayo nye ocöme kupoyit manta
- <sup>2</sup>Arenyo corwenyu. Osome ani kule roke pur topon om kiy ake tokol, oñkosom kule roke purte nyi soponto nyepo porto kuyu wulo ponte soponto nye topon om mukuleyto nyeñuñ.
- <sup>3</sup>Kyañerrec ani koromun omnye kukwa mpo yeya oñnkukwomwoy kule ponte nyi koyenet nye kwilat nyepo ñalek cepo manta. Omnye purtoy nyi ñalek cepo manta.
- <sup>4</sup>Puryo ñolyo nye ñereco ani kupël ye kalim kule purtoy lekokwani kapurto nyepo manta.
- <sup>5</sup>Corwenyu, ponte nyi koyenet nyewo koromun om yisyet nye yicini mpo yeya, nko mpo toyek.
- <sup>6</sup>Kiñalalenij nyi cekto topon om wuli om taytap pikap Yiyintet. Kunyo kalye nyi cekto kutosyikey kupa tay om aret nye ñerece Yiyintet.
- <sup>7</sup>Omnye kucäm cek kule cipe tay om yisyet nyepo Kristo nye puryo kot kumöce kule cenyoru kokolyoyisyet nye cone wule mite piko co puryo kot kuyen.
- <sup>8</sup>Kunyo cikalye acek piko ceyucutecu sukuñet ciyomekey tokol oñnkyiy yisyet nyepo manta.
- <sup>9</sup>Kyosilyi parwet pikap Yiyintet, ntene Tiotrepe nye möce kule oyiku kantoyintet nyimwa kunye puryo kot kulime ñalek cicacek.
- <sup>10</sup>Kunyo ye kaco ani kuye mosoporwok ñalek ce miyotec ce cikite cepo mwiynan ce ñolonenec acek. Ntene puryo kot kwiy pate ñalek coto, puryo mpo kot kutoroce mpo yeya ye kakwa, oñnkukerektoy mpo yeya alak ce möce kule ceñerekyi picoto oñnkusyem kule cekwet picoto kupete wule mite pikap Yiyintet.
- <sup>11</sup>Corwenyu, mente arup kiy ake tokol nye miyat, ntene rup muste kiy nye topon. Ci ake tokol nye yiye ce toponec kunye po nyoto Yiyintet.
- <sup>12</sup>Dolole ci tokol topon Temetrio, poru mpo ñalek cepo manta wule yunto neto. Cetosyini mpo acek kule topon neto, kunyo nketi kule cemwowu acek ñalek cepo manta.
- <sup>13</sup>Oponte ñalek ce cañ ce omöce kule omwowok akwek, ntene puryo kot omöce kule oyiysisye kalamut oko winet.
- <sup>14</sup>Asoti ani kule mosakasiñ lakwar, kunyo yoto kuye mosiceñalal tukway.
- <sup>15</sup>Opurte kalyet, Kesupayinj coronutekuk ce mite wuli. Osupoywec coronutek cicacek tokol.



## Yuta

### Yuta 1

- <sup>1</sup>Cone parwani wule mite Yuta, nye mutworintetap Yesu Kristo oṅku mutakwametitap Yakopo. Osilwok akwek piko co kikir Yiyintet, piko coto kuce kikopurto cömisyetap Yiyintet Papa oko ripset nyepo Yesu Kristo.
- <sup>2</sup>Kante opurte akwek kuyemak kokolyoyisyet oko kalyet oko cömisyet.
- <sup>3</sup>Coronutekwani, kwasyem koromun kule osilwok ṅalek ce nöme kosopotet nyo ceponte acek tokol okoy asot kule misyini otitirok akwek yawut sukuṅet oporyeci koyenotet nyo kikokoci Yiyintet kowoṅkyi pikyi.
- <sup>4</sup>Omnye kukwa piko alake kucorkey okoy kwokowut wule omite akwek. Piko coto kuco wece lokoywek ce nöme poyoyetap Yiyintenyö sukuṅet kwiy ṅalekwa cepo sakwayanat oṅkutay cekto Yesu Kristo nye konetintenyö oṅku Mokoryontenyö nye akenke pate. Kiṅor silutekap Yiyintet ikye keny musankut nye mosukunyor cekto.
- <sup>5</sup>Amöce ani kule osotwok akwek ṅalek alak ce kyonket tokol. Dalecato kuco kisope Mokoryontet Yiyintet kusor piko kukwane Misiri oṅkwaranta om letut piko co kipuryo kot kuyen neto.
- <sup>6</sup>Amöce ani mpo yec kule osotwok ṅalek ce nöme malaykanik co kipuryo kot kurip wule ṅete kamukeywek cikwa, yoto kwasta wule kiminye. Kirate Yiyintet cek nyororok om wule mite menonet nyepo okokoy sukuṅet cewosontyi ye kopunto pesyet nyewo.
- <sup>7</sup>Asot pa Sotom oko Komora moṅosyek ce kilekitec, kuce kikwiy mpecek sakwayanatet; kunyo kinyor toṅoṅutek om wule mite mata nye momise sukuṅet kwek kasowunot om wule mite piko tokol.
- <sup>8</sup>Om aret nye kerkey mpo nyoto, kunye ponto piko cutecu ṅoṅutok ce wece cek sukuṅet kwiy miyotyeyet kowurta porwonik cikwa. Nyile kamukeywek cepo Yiyintet, cupe cek cewoyec ce mite torot.
- <sup>9</sup>Nka mpo malayket nyewo Mikael om tintenotet nye kiponto oko Setani nyewo nyepo oyik om ṅalek ce nöme kule ṅo nye mosut musto nyepo Moses. Kipuryo kot kusyem Mikael kule acup Setani nyewo nyepo oyik, ntene kimwoy pate kule, “Kuwosontyiṅ Yiyintet.”
- <sup>10</sup>Ntene cupe picutecu tukuk ce puryo mpo kot konkete cek nkit, nto mpo tukuk co nket kuyu wulo nketitoy tyoṅik cepo samiyita, kuce tukuk coto ce wurtoy kwaranta cekto.
- <sup>11</sup>Mite picoto kwapi koromun! Kurup cek aret nyo kirupe Kain. Kukukoytokey cek nkit kurup aret nyepo leliswek kuyu wulo kikwiyta Palam. Kwesokyi cekto pesanik. Kutoyis kuyu wulo kitoyisyi Kora, kunyo kukwaran kuyu Kora.



- <sup>12</sup>Kerkey cek simnyontet nye kilekenit om omikwok cepo sakwetap koyomotet. Omisye cekto mesanikwok nye moponto kalilan. Sötekey cek nkit pate. Kerkey oko polik co sute yomet ntene onkupuryo kot kuropene. Kerkey ketik ce puryo kot kwiye omik, kuyu ketik cepo yo karik kwek kemey koret ce kicikor oñnkuyom.
- <sup>13</sup>Kerkey cekto peko cepo ruretyet ce wuse yomet om ñalekwa cepo kililan cetoku kuyu pukantet. Kerkey cekto oko kokelik ce mutukey ce kiyiytoci Yiyintet otepto nye mite wule mite menonet nye tuyi.
- <sup>14</sup>Enok nye mucokoretap Atam, pinta nyepo tisap nyepo Atam kunye kiñor ñalecu nöme cek kumwoy kule, “Akäs! Kaco Mokoryontet oko malaykanikiyi ce tililec
- <sup>15</sup>ce cañ cokuwosontyi piko tokol. Oñnkumutyi musankut piko ce menkete Yiyintet ce ponto miyotyoni om yisonutekwa ce miyotec ce kikwi, oko om ñalek tokol ce miyotec ce kiñalale cekto neto kwapi.”
- <sup>16</sup>Picutecu kuce ñunyñunye kwak oñnkureny piko alak. Rupe pate corokiyinetet nye miyat nyepo porwonik cikwa. Sutekey kuñalal ñalek cepo silotet oñnkuperper piko alak kule sukuñet cenyoru aret nye möce cekto nkit.
- <sup>17</sup>Ntene akwek coronutekwani, möce asot ñalek co kimwowok kiyokikap Mokoryontet Yesu Kristo.
- <sup>18</sup>Kimwowok kule, “Ye kopunto pesyosyek nyepo letut, mosukutok piko ce kencururok, piko coto kuce puryo kot kopunto tini, ntene rupe pate corokiyinetet nyepo porwonik cikwa nkit.”
- <sup>19</sup>Picutecu kuce sutu pciyatet. Kipayta picutecu corokiyinetet nye kiceyito nye puryo kot kupo Muyet Nyetilil.
- <sup>20</sup>Ntene akwek coronutekwani, möce onerye akwek nkit om koyenet nye tilil koromun, oñnkosom om swamet Muyet Nyetilil.
- <sup>21</sup>Misyini opurte akwek nkit cömisyet nyepo Yiyintet, oñnkoken soponto nye mopoku nye mosukukonok Mokoryonteny Yesu Kristo om kokolyoyisyenyi.
- <sup>22</sup>Mite piko alake ce mocömntoy topon, oporci piko coto poypoyet,
- <sup>23</sup>Oporci yec piko alak poypoyet nye oripkey, ntene asenker sirok cikwa ce kimolokonitu om miyotyoni cepo corokiyinetet.
- <sup>24</sup>Kunyo om wule mite neto nyo muce kuripok akwek mente kot osute, oñnkupartak oñjereci nye moponte lelis om taytap woyin nyi.
- <sup>25</sup>Om wule mite Yiyintet akenke kosopinteny, kupunte wule mite Yesu Kristo Mokoryonteny. Kopurune Woyinto oko koyweyisyet oko swamet oko kamukeywek om kenyisyek ce kitil oko yawut oko okokoy oko okokoy! Yunyoto.





## Ŋoŋutok

### Ŋoŋutok 1

- <sup>1</sup>Dalecu kuce ŋoŋutokap Yesu Kristo ce kikoci Yiyintet sukuŋet nyo kuŋoŋkyi kuporci mutworikyi tukuk ce mosukwiyokis lakwar. Kimwoy Yesu ŋalecu omnye kiyok malaykenyi kuco wule mite mutworintenyi Yowana.
- <sup>2</sup>Yowana kunye mwowu ŋalek tokol ce kikäs. Dalecutecu kuce po manta ce nöme lokoywek ce kwone wule mite Yiyintet oko ŋalek cepo manta ce kiŋoŋ kupor Yesu Kristo.
- <sup>3</sup>Ponto kupeyoy nye sumone ŋalecu po workoyontini oŋnkuponto kupeyoy co lime oŋnkurup ŋalek ce mite kitapuni, omnye karik pesyet nye yitite ŋalecu.
- <sup>4</sup>Ani Yowana nye osilyini lukosyek tisap cepo co kikoyen ce mite koretap Asia. Kwek cikwok poypoyet oko kalyet ce kwone wule mite neto nye mite, oŋnku nye kimite, oŋnku nye mosukuco, oŋnku kwone wule mite mukuleywek tisapu ce mite ŋeceratap poytoyisyet om taytap Yiyintet.
- <sup>5</sup>Oŋnkukwone wule mite Yesu Kristo, nye muncururwet nyepo manta, oŋnku nye kipoyit tayta kotutune met, oŋnku nye poytoy kinkonik cepo koret. Kristo kunye kicämec oŋnkutyacec cekwane wule mite miyotyoni kyacek om korotikyi.
- <sup>6</sup>Kunyo kikonec ciku poytoyik ce tisik cepo Yiyintet Papanyi. Kopurune woyinto oko swamet wule mite Yesu Kristo okokoy okoy okokoy! Yunyoto.
- <sup>7</sup>Akäs, mite kucontoykey polyok! Mosukukäs ci tokol neto oŋnkukäs mpo piko tokol co kipore neto ŋotit. Mosukumesyö kurire piko tokol neto. Kunyo Kuyuyit nyoto! Yunyoto.
- <sup>8</sup>Mwowu Mokoryontet nyepo kamukeywek tokol kule, “Oyiku ani nyepo tayta (omeka) oŋnkoyiku nyepo letut,” (olufa) nye mite oŋnku nye kimite, oŋnku nye mosukuco.
- <sup>9</sup>Ani nyo yeyamwoŋ Yowana nye ceyemntoy oko akwek toŋoŋutek oko muytocinotet nyo nyoru co po poytoyisyenyi nyewo om Kristo Yesu. Kyomite ani koret nye kikwen peko nyepo Patmo omnye kikyamwayte wuloto ŋolyontetap Yiyintet nyepo manta nye kuŋoŋ kopur Yesu.
- <sup>10</sup>Ye kipesyetap Mokoryontet kowuto anyoru ani swametap Muyetap Mokoryontet, yoto alim om pataymwani kutit nyewo nye kerkey kontit.
- <sup>11</sup>Nye kimwoy kule, “Silyi kitaput tukuk ce kekäs nyi, oŋnkikoyite kitaput kuwo wule mite luket nyepo piko co kikoyen cepo moŋosyecu tisap: Efeso, Simurna, Perkamani, Siyatira, Sortes, Filatelfia oko Laotikea.”
- <sup>12</sup>Yoto owekyikey ani kule akäs cito nye kiŋololwo, akäs sokotik tisap cepo Sapunek ce yoŋe tarinek.



<sup>13</sup>Nto om kwenutap sokoticoto, kimite cito nye kerkey Weritap Cito nye kelac siret nye puntoy kerengkok, oṅnkurate teket nyenyi porowet nyepo Saput.

<sup>14</sup>Kilel metit nyenyi kuyu siret nyelel piw. Kukerkey konyek ceci oko mata nye rekitite.

<sup>15</sup>Kukerkey kerengkok ceci oko tayet nye kiciloci mata oṅnkyesit kulecec. Kikerkey polotet nyenyi oko karumnta nyepo peko ce caṅ ce sururtoy.

<sup>16</sup>Kunäme yewunyi nyepo tay kokelik tisap, kucone kutit nyenyi rotwetap cok nye ṅatip koromun. Oṅnkulelit tokoyta nyenyi kuyu asista nyepo pet kwen.

<sup>17</sup>Nteye kotoköse ani neto; yoto oputyi yepo kerengkoyi kuyunye kamey. Ntene kunämena yewunyi nyepo tay oṅnkumwoy kule, “Mente omuyi! Oyiku ani nyepo tayta oṅnko yiku nyepo letut.

<sup>18</sup>Oyiku nye sopot! Kikyamey, ntene käs pa oyiku sopot kenysis okoy kenysis. Oponte kamukeywek cepo met oko kapkompic.

<sup>19</sup>Kunyo sil yawut tukuk ce kwekäs, ce mite kwiyoktos yawut oko ce mosukutok om letut.

<sup>20</sup>Kito nye wuṅat nye poru kokelik tisapu ce köse nyi ce mite yewumwani nyepo tay, oko sokotik tisap cepo Sapunek ce yoṅe tarinek kucu kule; Kokelik tisap kuce malaykanik tisap cepo lukosyek cepo pikap Yiyintet tisap. Nto sokotik tisap cepo Sapunek ce yoṅe tarinek, kuce lukosyek tisap cepo pikap Yiyintet.”

## **ṅoṅutok 2**

<sup>1</sup>“Dalek cepo malayket nyepo pikap Yiyintet cepo Efeso silyi kule; “Kwone ṅalecu wule mite neto nyo nöme kokelik tisap om yewunyi nyepo tay, oṅnkuwesetote kwenutap sokotik tisap cepo Sapunek ce yoṅe tarinek.

<sup>2</sup>Oṅnket ani yisyonutekuk tokol, oṅnkonket swamet nyeṅuṅ, oko muytocinetet nyeṅuṅ. Oṅnketi kule puryo kot muytocini nyi piko co miyotec, oṅnkwesyem piko co kurekey kule ciku kiyokik oṅnkurok yec kupuryo kot ku kiyokik cekto, okoy nyoru kule mwiynot pate.

<sup>3</sup>Oṅnketi kule muytocini nyi oṅnkitaṅany kupo kaynemwani, ntene mopoku swamet.

<sup>4</sup>Ntene ponte ṅolyontet nye onyercineniṅ kunyi kule, puryo icömo ani nyi yawut kuyu wulo kiyunte kunyo.

<sup>5</sup>Kunyo möce sot co kiwurte! Oṅnkirenykey iyiyisye kuyu wulo kiyunte kunyo. Nteye puryo kot renykey mosaco ani oṅnkyonumu sokotyete nyeṅuṅ nyepo Saput nyo mite sokotik tisap co yoṅe tarinek.

<sup>6</sup>Ntene ponte ṅolyontet akenke nye topon nyi kule senkeri tukuk ce yiye piko co rupe Nikolaitanik, kuyu wulo osenkeri mpo ani nkit.



7“Kunyo nye ponto yitik ce limnte, kunye misyini kulimnta ñalek ce mwocini Muyet lukosyek cepo pikap Yiyintet! “Nto co koporyo kot kupëlis, mosokoci kwam omik cepo ketit nyepo soponto nye kipite mparetap Yiyintet.”

8“Nto malayket nyepo pikap Yiyintet cepo Simurna silyi kule, “Kwone lokoywecu wule mite neto nyepo tayta oñnkupo letut, nye kime oñnkusop yec.

9Oñnketi ani toñoñutek cekuk oko pananiyantit nyenñu, ntene yiku mokoryo kopoyit manta! Oñnketi ñalek ce miyotec ce ñololeniñ co kurekey kule ciku Yutayek, oñnkurok yec kupuryo ku Yutayek cekto; ntene luket nyepo setanit!

10Mente omuye mpo kisic om kiy ake tokol nye karik otañanye. Limnte! Mosukusyemak Setani nyewo nyepo oyik; kukertak mopusi alak om akwek, mosotañany kuwany pesyosyek taman. Otitir om swamet nka kot mpo koyek met, mosokonok ani soponto kwek kokotutyet nye kopëlisye.

11“Kunyo nye ponto yitik ce limnte, kunye misyini kulimnta ñalek ce mwocini Muyet lukosyek cepo pikap Yiyintet! “Puryo kot kutoñonye met nyepo oyeny piko co kiporyo kot kupëlis.”

12“Nto malayket nyepo pikap Yiyintet cepo Perkamo, silyi kule, “Kwone lokoywecu wule mite neto nyo ponto rotwetap cok nye ñatip koromun.

13Oñnketi ani wule minye nyi, minye wule mite ñeceretap poytoyisyetap Setanit. Ntene kipuryo kot taya om koyenet nye ponte om wule ani, nka mpo yo kicepoköce Antipa muncururwet nyimwani nye cikenekey nyo kicepakäce kayta nyewo wule minye Setanit.

14Ntene oponte ani ñalek tukusic ce osenkereniñ: mite om akwek piko alak ce rupe konetisyetap Palam nye kinet sukuñet kwiy pikap Israel miyotyeyet kwam omik ce kicesoci oyik kerkeyik oñnkwiw sakwayanadet.

15Kunyo mpenyi ponte piko alak ce rupe konetisyet nyepo Nikolaitanik.

16Renynkey yaste miyotyonikey cekuk! Nteye puryo, mosoaco lakwar okoy wule mite oñnkoporye cekto oyiyisye ñotipcet nyi cone kutimwani.

17“Kunyo nye ponto yitik ce limnte, kumisyini kulimnta ñalek ce mwocini Muyet lukosyek cepo pikap Yiyintet! “Mosokoci nye koporyo kot kupëlis Mana nye wuñat. Mosokoci ci ake tokol om cekto rwantet nye miniñ nyelel nye kicesil kaynet nyelel nye menkete ci tokol, nkete pate cito nyo kinyor.”

18“Nto malayket nyepo pikap Yiyintet cepo Siyatira, silyi kule: “Kwone lokoywecu wule mite Weritap Yiyintet nyo loytos konyek ceci kuyu mata, nye lekecectos krenkokyi kuyu tayet nye kacesit.

19Oñnketi ani ñalekuk tokol ce iyiye nyi, oñnketi cömisyeyet nyenñu, koyenet nyenñu, oko yisyyet oko muytocinotet. Oñnketi kule yiye yawut yisyonutek ce cañ kusir ce kipo tay.



<sup>20</sup>Ntene oponte ñolyontet akenke nye osenkereniñ kunyi kule, muytocini korkono cekure Yesepel, nye kurekey kule oyiku kiyokintetap Yiyintet. Neto kunye nete oñnkumas pikwani okoy kwiy sakwayanatet.

<sup>21</sup>Kwokoci neto poroyinto kurenynkey kwasta miyotyonyiki, ntene mocöme kule ayaste sakwayanatet.

<sup>22</sup>Kunyo mosowirci neto kwiririt wule mosukutañany koromun oko piko co yiye sakwayanatet oko neto. Mosayiy ñolyontoni tos pate ye karenynkey cekto kwasta miyotyonyik ce kikwiye oko neto.

<sup>23</sup>Mosapakäc mpo piko co rupoti neto, sukuñet lukosyek tokol cepo pikap Yiyintet konket kule ani kunye oñnketi kasoteywekap piko tokol oko tukuk ce möce. Mosokoci ci ake tokol om akwek kuyu wule tento yisyet nye kiyiy.

<sup>24</sup>“Ntene akwek piko alak cepo Siyatira ce puryo kot orupe konetisyet nyoto. Akwek co puryo anetkey ñalek ce kure alake kule, ‘Ñalek ce wuñotin cepo Setanit.’ Komwowok kule puryo kot akonok nyikisinto ake.

<sup>25</sup>Möce akwil koromun ñalek co oponte yawut okoy opunu ani.

<sup>26-28</sup>Co kepëlis oko co kakwil kwiy yisyonutekwani okoy pesyet nyepo letut, kuce mosokoci kupayta yemosyek, kuyu wulo kikono ani Papanyu kamukeywek. Mosukupoytoyis kwiyisyepo kipoket nyepo karnet oñnkutitir cekto kuyu terenik cepo menonik. Mosokoci ani neto nyoto kokelyet tapoyantet nyepo kororn.

<sup>29</sup>“Kunyo nye ponto yitik ce limnte, kunye misyini kulimnta ñalek ce mwocini Muyet lukosyek cepo pikap Yiyintet!”

### Ñoñutok 3

<sup>1</sup>“Nto malayket nyepo pikap Yiyintet cepo Sarte, silyi kule; “Kwone lokoywecu wule mite neto nyo ponto mukuleywek tisap cepo Yiyintet oko kokelik tisap. Oñnketi yisyonutek tokol ce yiye nyi, ponte kaynet nye toku kule yiku sopot oñnkurok yec kimey!

<sup>2</sup>Kunyo ñet oñnkinäm kwil ce teponte kutompo kupok kuwoñnkey, omnye kwakäs kule puryo kot kunyolunot yisyet nyeñuñ om taytap Yiyintemwani.

<sup>3</sup>Kunyo möce sot ñalek co kicinetiñ oko ce kilim, rip coto oñnkirenyynkey om miyotyonyikuk. Ye puryo kot ñet käste mosocontyiñ kuyu corin, nye menketi sawet nye acone ani.

<sup>4</sup>Ntene ponte om Sarte piko ce ñeri ce tompo kot kowurta sirokwa konyinye sakatyet. Mosukupesetat coto oko ani kukakolac sirok ce lelac, omnye yeme kwiy kuyunyoto.

<sup>5</sup>Cito nye kepëlis kunye mosicilokyiki siret nyelel kuyunyoto. Nye puryo kot apuci anumu ani kaynokwa kukwane kitaput nyepo soponto. Mwsomwowu otoru om taytap Papamwani oko taytap malaykanik kule cikwani picoto.



6“Kunyo nye ponte yitik ce limnte kunye misyini kulimnta ñalek ce mwocini Muyet lukosyek cepo pikap Yiyintet!”

7“Nto malayket nyepo pikap Yiyintet cepo Filatelfia, silyi kule: “Kwone lokoywecu wule mite neto nyo tilil oñnkupo manta, nye ponto Funkuwet nye kipo Tauti. Yote neto ntene puryo nye muce kot kuker, Kere ntene puryo nye muce kuyat.

8Oñnketi yisyonutekuk tokol, oñnket mpo kule ponte swamet nye kisic, ntene kwerup ñalekwani oñnkiyeno kunyo koyotuñ kurket om tayñuñ nye memuce ci kot kuker.

9Alimnte pa! Nto luket nyepo luket cepo Setanit, ce mwiynot ce sutekey kule ciku Yutayek oñnkurok yec kumo Yutayek, mosokweru kukwa taymwoñ oñnkokutumwoñ sukuñet konket cekto tokol kule ocömok ani.

10Omnye kwerip ntarastimwani muytoci, kunyo mosoripiñ ani om wule mite syemutok, ce musukukwontyi koret tokol sukuñet cesyem piko cepo koret.

11Aconi ani lakwar. Kunyo kwil topon tukuk ce ponte, sukuñet mente kot kunumuneniñ citake kokotutyet nye pëlisye.

12Mosokoci ani co kepëlis kwek tolocta nyepo kotap Yiyintemwani, puryo kot kukwone koyoto orit kenysis. Mososil ani porto nyenyi kaynetap Yiyintemwani, oñnkosil kaynetap moñetap Yiyintemwani, nyoto ku Yerusalem nyelel nye mosukucone torot wule mite Yiyintemwani. Mososil mpo porto nyenyi kaynemwani nyelel.

13“Kunyo nye ponto yitik ce limnte misyini kulimnta ñalek ce mwocini Muyet lukosyek cepo pikap Yiyintet.”

14“Nto malayket nyepo pikap Yiyintet cepo Laotikea, silyi kule: “Kwone lokoywecu wule mite neto nye cekure, ‘Yunyoto’. Nye ponto koyenet oñnku muncururwet nyepo manta. Neto kunye towunot nyepo kiy ake tokol nye kitany Yiyintet.

15Oñnketi yisyonutekuk tokol, oñnketi kule puryo kot yiku nyi kaytit oñnku puryo kot yiku layat, kweroke yiku akenke om coto oyeny, nye yiku kaytit nto layat!

16Ntene omnye yiku purkey pate, nye puryo kot yiku kaytit nto layat, kunyo mosañuñuñ!

17Mwowu kule, ‘Oyiku mokoryo, amite topon, oponte tukuk tokol, kunyo puryo kiy nye omöce.’ Ntene menketi kule amite kwapi koromun! Yiku puren, nye möce cikalyiñ, panan nye korat nye moponto sira.

18Kunyo kakoniñ ñomnonet kule iyalena ani Saput nye kicepel kulelit topon, sukuñet mokoren. Yal mpo sirok celelac sukuñet lac kuyen porto nyenñuñ nyepo kalilan. Yal mpo sakityek siñet yile konyek cekuk sikäste.

19Osowu oñnketi ani topon piko co acöme ani, kunyo titir, oñnkirenykey.

20Limnte pa! Koyoñe ani kurket oñnkokonynkony, nteye kalim citake kutimwani oñnkuyat kurket mosowut konyi oñnkyomisye tukway.



<sup>21</sup>Cito nye kepëlis kunye mosokoci kamukeywek cipure tukway ñeceremwani nyepo poytoyisyet, kuyu wulo kyopëlisye ani okoy opure oko Papa, ñeceret nyepo poytoyisyet.

<sup>22</sup>“Kunyo, nye ponto yitik ce limnte, kumisyini kulimnta ñalek ce mwocini Muyet lukosyek cepo pikap Yiyintet!”

#### **Ñoñutok 4**

<sup>1</sup>Nto om letutap coto ceñoñwo akäs kurket nye kayatakay om torot. Nto kutit nyo kikyelim kuñololwo om tayta nyo kikerkey kontit kunye kimwowo kule, “Iloñu co wuli, moporuñ ani tukuk ce mokwiyokis cerupe ñalecu.”

<sup>2</sup>Yoto pakenke kucontyo Muyet, akäs ñeceret nyepo poytoyisyet om torot nye kimite kukepure cito ake.

<sup>3</sup>Nyoto kipure ñeceranato kunye kikerkey tokoyta nyenyi rwantet nye nyalil kwarra nye cekure Yaspo oko sarutyo, oñnkomut ñeceranato cekwalasyet nye kerkey oko rwantet nye nyalil nye cekure Sumariti.

<sup>4</sup>Kimite mpo ñecerok alak ce ki tiptem ok amwan ce kimut ñeceranato. Kipure ñecerocoto poyik tiptemu ok amwan ce kelac sirok ce lelac oñnkulac kutonok cepo Sapunek.

<sup>5</sup>Yoto kucone ñeceranato po poytoyisyet kaweket nye wece oko karumnta oko tulotet. Kimite tarinek tisapu ce loytos om taytap ñaceranato, coto ku mukuleywek tisap cepo Yiyintet.

<sup>6</sup>Kimite taytap ñeceranato nye kerkey oko ruretyet nyepo kilasit nye lekecece kuyu kitake nye cekure Kristalit. Nto komut ñeceranato po poytoyisyet, om komoswokik tukway kimite yec tyoñik tisapu ce soptos ce kiponto konyek ce cañ ce kimite tay oko sekeronok.

<sup>7</sup>Kikerkey tyonynto nyepo tayta oko ðetuny; kukerkey nyepo oyeny oko Yeyito; kuponto tyonynto nyepo somok metit nye kerkey nyepo cito. Kukerkey nyepo amwan oko Ploñoniyet nye terertoy.

<sup>8</sup>Kiponto tyoñicoto amwanu kepepok lö ce kiponto konyek om kepepocoto sañ oko orit. Kitume pet oko komoy nye memunye kumwowu kule: “Tilil, tilil, tilil, ku Mokoryontet Yiyintet nyepo kamukeywek tokol, Nye kimite, nye mite yawut, Oñku nye mosukuco.”

<sup>9</sup>Kitume tyoñicoto amwanu tumwonik cepo woyinto oko kakastayet oko koyweyisyet kutumncini neto nye kepure ñeceret, nye sope okokoy. Nteye katum kuyunyoto.

<sup>10</sup>Yoto kukutuny poyik tiptemu ok amwan co mite taytap neto nye kepure ñeceret oñnkusay neto nyo sope okokoy okoy okokoy. Wircini cekto yoto kutonokwa cepo Sapunek taytap ñeceret kumwowu kule:





<sup>11</sup>“Mokoryontet Yiyintet nyinyo! Kunye misyini ciyweye oṅkyilaṅnta woyinto nyenyi oko swamet. Omnye kitany nyi tukuk tokol, kicitany oṅkunyor soponto kuyu wulo kicāmnta neto.”

## **Ṗoṅutok 5**

<sup>1</sup>Yoto akās kuponto kitaput om yewunyi nyepo tay neto nye kepure ṅeceret nyepo poytoyisyet nye kicesil orit oko saṅ oṅkyitinye muwurunek tisap.

<sup>2</sup>Akās yoto malayket nyepo swamet nye kikirto om kutit nyewo kumwoy kule, “Do nye yeme, nye muce kupetec muwurut oṅkuṅany kitaput?”

<sup>3</sup>Ntene kipuryo ci mpo akenke om torot nto om koret, nto om kapkompic nye kimuc kot kuṅany kitaput oṅnkukās orit.

<sup>4</sup>Arir ani koromun omnye kipuryo mpo akenke nyepo latik nye kicenyor nye kaṅany kitaput oṅnkukās orit.

<sup>5</sup>Kumwowo pontet akenke kule, “Mente arir, kās pa! Detunynto nye cone kotap Yuta, nye keseniyantetap Tauti nyewo, nye kakopēlis, kunye muce kupetec muwurunek tisap oṅkuṅany kitaput.”

<sup>6</sup>Yoto akās Lekwetap Kecir nye keyoṅe kwenutap ṅeceret nyepo poytoyisyet, nye kepur komut neto yoto tyoṅik ce soptos amwanu oko poyik. Kerkey Lekwap Kecir yoto nye kacetil kume. Kiponto kuyinok tisap oko konyek tisap, coto ku mukuleywek tisap cepo Yiyintet ce kikoyto kupa koret tokol.

<sup>7</sup>Kuwo Lekwetap Kecir oṅnkunum kitaput kunumune yewutap tay nyepo neto nye kepure ṅeceret nyepo poytoyisyet.


<sup>8</sup>Nteyu kowo kunumu, yoto kukutuny koputyi ṅony tyoṅik ce soptos amwanu oko poyik tiptemu ok amwan om taytap Lekwetap Kecir. Kiponto ci tokol om cekto pukantit oko pokulit nyepo Saput nye nyitat mwayta nye poṅu. Coto kuce somset cepo pikap Yiyintet.

<sup>9</sup>Yoto kutum cekto tumnto nyelel nyi kule: “Misyiniṅ nyito numu kitaput oṅkipetec muwurunekyi. Omnye kicetiliṅ, kunyo om korotikuk, kiyal nyi kukwa wule mite Yiyintet: piko cepo arosyek, yemosyek oko ṅelyepik.

<sup>10</sup>Kikwey nyi cekto kwek Kinkonik cepo tisik, kuyici yisyet Yiyintenyo kunyo mokupoytoyis om koret.”

<sup>11</sup>Akaste yec, alim polotet nyepo malaykanik ce caṅ ce mociyite, Elifunek oko Elifunek. Kiyōṅe cekto komut ṅeceret nyepo poytoyisyet oko tyoṅik amwan ce soptos oko poyik.

<sup>12</sup>Oṅnkutum om kutit nyewo kule: “ Lekwap Kecir nyo kicepokōce, kunye misyini kunyor poytoyisyet oko Mokoryontit, oko ṅomnonet oko kakastayet, oko swamet, woyinto oko kupeyok.”





<sup>13</sup>Alim yoto Tyonjik tokol cepo torot, oko cepo koret, oko cepo nyony, oko tyonjik tokol cepo ruretyet, oko tyonjik cepo koret tokol kumukul kutume kule: “Wule mite neto nyo kepure neceret nyepo poytoyisyyet, oko Lekwap Kecir, kupoyit kupeyok, oko koyweyisyyet, oko woyinto, oko swamet okokoy oko okokoy!”

<sup>14</sup>Yoto kuwec tyonjik amwanu ce soptos kumwoy kule, “Yunyoto!” Kuputyi poyik nyony onkusay.

## **Ŋonutok 6**

<sup>1</sup>Yoto akäs ani Lekwap Kecir kupetec muwurut nyepo tayta om muwurunek tisap, onkalim tyonynto akenke om tyonjik ce soptos amwan kupol om kutit nyewo kutul kuyu ilet kumwoy kule, “Co!”

<sup>2</sup>Akäs ani yoto yec Farasit nyelel, kiponto kiyantta cito nye kiwete Farasinato, yoto cikoci cicoto kutwet; kuwo kuworennot nye kokopëlis onkutosityikey kupëlis.

<sup>3</sup>Kupetec Lekwap Kecir muwurut nyepo oyeny, alim ani yoto tyonynto nyepo oyeny kumwoy kule, “Co!”

<sup>4</sup>Kuco yec Farasit ake nye kyarra. Cikoci cito nye kuwete Farasinato kamukeywek kunum kalyet nye kimite koret, sukuŋet kuparkey piko kwicek nkit, onkyikoci cicoto rotwetap cok nyewo.

<sup>5</sup>Akäs kupetec Lekwap Kecir muwurut nyepo somok, alim kumwoy tyonynto nye po somok kule, “Co!” Nto opere akäs yoto akäs Farasit nye tuy. Kiponto cito nye kiwete Farasinato om yewunyi kilet nye cepimonisye.

<sup>6</sup>Alim yoto kutit nye kerkey nye cone kwenutap tyonjik amwan ce soptos nye kimwoy kule, “Litet akenke nyepo nkanuk om musyaret nyepo pesyyet, nto litanik somok cepo nkanuk sayirinek kupo musyaret nyepo pesyyesyek somok. Ntene mente awurte mwayta oko Finyonik!”

<sup>7</sup>Kupetec Lekwap Kecir muwurut nyepo amwan, yoto alim ani tyonynto nyepo amwan kumwoy kule, “Co!”

<sup>8</sup>Nto opere akäs yoto akäs Farasit nye tolelyo, nto cito nye kiwete Farasinato kunye cekure met, onkarupe let kurikiyi kapkompic. Cikoci cekto kamukeywek kupayta akenke om amwan nyepo piko cepo koret, sukuŋet kupakäce poryet oko rupet oko porwonik oko tyonjikap samiyita cepo koret.

<sup>9</sup>Kupetec Lekwap Kecir muwurut nyepo mut, akäs yoto ce kimite otepto nyetilil nyony, mukuleywek cepo piko co kicepakäc omnye kimwaytat nyolyontet oko nlek ce kiparta.

<sup>10</sup>Kupol picoto kukurto om kutit nyewo kumwoy kule, “Mokoryontet nyepo kamukeywek tokol, nyetilil onkupo manta! Mese pur nyi okokoy pesyo ne ye semutyi musankut onkipakäc pikap koret omnye kipakäcec acek?”



- <sup>11</sup>Cikoci ci ake tokol om cekto siret nyelel, oñkyemwoci kopur komuny kuloyit kuminiñ okoy kupunto coñinto nyepo mutworik oko mpo yeya ce kerkey cekto ce mosicepakäc kuyu wulo kicopoköce cekto.
- <sup>12</sup>Akäs yec Lekwap Kecir kupetec muwurur nyepo lö.
- <sup>13</sup>Yoto kuriñriñ koret, kutuyit asista kuyu siret nye tuy mis, kusalakay arawet kwek koroti, kosuwune kokelik parak kuyu mokoyek ce mnoruryo ce kelucluc yomet.
- <sup>14</sup>Kupot koret wulin po torot kuyu kartasit nye kaciriny. Cinum cinate tulonok oko korosyek ce kikwen peko kukwane ye kimate.
- <sup>15</sup>Yoto kuñet kinkonik cepo koret oko piko cewoyec oko cewoyec cepo poryet, oko piko ce mokoren oko piko ce ponto swamet, oko piko alak tokol, ce mutwor oko ce puryo kot ku mutwor. Kuwunynkey yoto picoto kuwuñenkey tulonok oko kepenonik ce mite rwontok.
- <sup>16</sup>Kukurtoy kumwoci tulonok oko rwontok kule, “Olulcec acek awunyec mente kot kukäsenec konyek neto nyo kepure ñeceret nyepo poytoyisyyet oko nerekwepak Lekwap Kecir.
- <sup>17</sup>Omnye kopunto pesyemwa nyepo nerekwek, ño nye muce kuyonje tayta nyenyi?”

## **Ñonutok 7**

- <sup>1</sup>Nto om letutap coto, yoto akäs ani malaykanik amwan ce keyonje toponutepak koret, ce kanäm kuyonnto yomotik amwan cepo koret, sukuñet mente kukut yomet koret oko ruretyet, nto ket ake tokol.
- <sup>2</sup>Akäs malayket ake nye cone koñasis wule cone asista kuponto muwururap Yiyintet nye sope. Kukurto om kutit nyewo kumwoci malaykanik amwan co kukukoci Yiyintet kamukeywek kowurta koret oko ruretyet.
- <sup>3</sup>Kumwoci kule, “Monte ciwurte koret nto ruretyet nto mpo ketik okoy ye kocikoci muwurur tokoywekap mutworik cepo Yiyintet.”
- <sup>4</sup>Yoto cemwowo wule tento coñinto nyepo piko co kucikoci muwurur tokoywekwa kucu kule, Piko elifunek pokol akenke oko artam ok amwan cepo werikap Israel ce kicekwere muwurur.
- <sup>5</sup>Oko elifunek taman ok oyeny cepo kotap Yuta, oko elifunek taman ok oyeny cepo kotap Rupen, oko elifunek taman ok oyeny cepo kotap Kati,
- <sup>6</sup>oko elifunek taman ok oyeny cepo kotap Asyer, oko elifunek taman ok oyeny cepo kotap Nafutali, oko elifunek taman ok oyeny cepo kotap Manase,
- <sup>7</sup>oko elifunek taman ok oyeny cepo kotap mpo Simiyon oko Elifunek taman ok oyeny cepo kotap mpo Lefi, oko elifunek taman ok oyeny cepo kotap Isakar,



<sup>8</sup>oko elifunek taman ok oyeny cepo kotap Isakar, oko elifunek taman ok oyeny cepo mpo kotap Sapulon, oko elifunek taman ok oyeny cepo kotap mpo Yosep, oko elifunek taman ok oyeny cepo mpo kotap Penyamin.

<sup>9</sup>Nto om letutap ñalecato, yoto akäs ani luket nyepo piko ce memuce ci kot koyit! Kwone piko coto yemosyek tokol, oko orosyek tokol oko piko tokol oko ñelyepik tokol. Kimite cekto yoto kukeyoñe taytap ñeceret nyepo poytoyisyet oko taytap Lekwap Kecir nye kelac sirok ce lelac oñnkunäme picoto sosik yewuniyekwa.

<sup>10</sup>Kikurtoy om polotet nyewo kumwowu kule, “Cone kosopotet wule mite Yiyintenyonye kepure ñeceret, oñnkucone wule mite Lekwap Kecir!”

<sup>11</sup>Kuyoye yoto komut ñeceret malaykanik tokol oko poyik oko tyoñik amwan ce soptos. Yoto koputyi ñony om taytap ñeceret oñnkusay cekto Yiyintet,

<sup>12</sup>kumwoy kule, “Yunyoto! Kupeyok oko woyinto oko swamet oko ñomnonet, oko kakastayet, oko konyitotet, oko swamet kuce kupoyit coto tokol Yiyintenyonye okokoy okoy okokoy! Yunyoto!”

<sup>13</sup>Kuñololwo yoto pontet akenke kutep kule, “Do picu kelac sirok ce lelac? Oñnkukwone cekto ono?”

<sup>14</sup>Owekyi ani omwoci kule, “Mokoryontet, nyi nye nketi.” Kumwowo kule, “Picu kuce kipunune toñoyutek cewoyec koromun. Kunyo kisit sirokwa kulelakitu kusite korotikap Lekwap Kecir.

<sup>15</sup>Mite yawut kukeyoye taytap ñeceret nyepo Yiyintet sukwicini yisyet om konyi pet oko komoy. Kunyo ripe neto nyo kepure ñeceret cekto.

<sup>16</sup>Puryo kot kwome rupet kenysis oñnkupuryo kot kwome melelya, oñnkupuryo mpo kot kupele asista nye mwa.

<sup>17</sup>Omnye Lekwap Kecir nyo mite kwenumwa kunye mesewontet nyimwa nye mosukuntoci okoy wule kosune peko cepo soponto. Mosukopuc Yiyintet lokik tokol ce mite konyek cikwa.”

## **Ñoyutok 8**

<sup>1</sup>Nteyu kowo kupetec Lekwap Kecir muwurut nyepo tisap. Kuis kiy ake tokol yoto om torot kuwany kwenutap sawet akenke.

<sup>2</sup>Nto om letut akäs ani malaykanik tisap co yoye taytap Yiyintet. Cikoci cekto yoto kontinek tisap.

<sup>3</sup>Kuco yoto malayket ake cokuyoye yepo otepto nye cepele Korosek, kipontonu pokulit nyepo Saput nyepo Korosek ce poñu. Cikoci neto korosek ce poñu ce cañ sukuñet kuyomo oko somset cepo pikap Yiyintet oñnkukoyito om otepto nye cepele Korosek nyepo saput nyo yoye taytap Yiyintet.

<sup>4</sup>Kuñet yoto yetit nyepo korosek ce poñu oko somset nyepo pikap Yiyintet om yewutap malayket okoy kupunto wule mite Yiyintet.



<sup>5</sup>Kunäm malayket pokulit nyepo Korosek ce poŋu oŋnkunyit orit mata, oŋnkunumune otepto nye pele Korosek kosuci koret, Yoto Kowec koret, oko karumnta nyewo, oŋnkutul ilet, oŋnkuriŋriŋ koret.

<sup>6</sup>Yoto kuyiytakey malaykanik tisapu kule cekut kontinek tisap co koponto.

<sup>7</sup>Kukut malayket nyepo tayta kontit nyenyi, kutumnkey koyantet oko mata nye kilinyokey oko korotik, oŋnkyewirci kosuci koret. Cepel Yoto kulay kereryantet akenke om somok nyepo koret oko kereryantet akenke om somok nyepo ketik, oko suswek tokol ce nyolilec.

<sup>8</sup>Yoto kukut malayket nyepo oyeny kontit nyenyi, cewirta wokutyic ruretyet kitake nye kerkey tulwet nyewo nye kiloye,

<sup>9</sup>kuwec kereryantet akenke om somok nyepo ruretyet kwek koroti oŋnkupok kereryantet akenke om somok nyepo tyoŋik tokol ce mite ruretyet oko raposyek nye mite ruretyet.

<sup>10</sup>Yoto kukut malayket nyepo somok kontit nyenyi, kusuwune torot kokelyet nyewo nye loye kuyu tocit, kusuci kereryantet akenke om somok nyepo oyinosyek oko koŋwekap peko.

<sup>11</sup>Cekure kaynetap kokelyanato, “Mwa sekeleyti.” Yoto kumwonekitu peko cepo kereryantet akenke om somok okoy kupakäc piko ce caŋ ce kaye peko ce komwonekitu.

<sup>12</sup>Kukut malayket nyepo amwan kontit nyenyi, cipuryet kereryantet akenke om somok nyepo Asista, oko kereryantet akenke om somok nyepo arawet oko kereryantet akenke om somok cepo kokelik, yoto kupot komo kwiyisi kereryantet akenke om somok nyepo kiy ake tokol. Kutuyit yoto kwek menon kuwany kereryantet akenke om somok nyepo pet oko kereryantet akenke om somok nyepo komoy.

<sup>13</sup>Akäste ani yoto, oŋnkalim ploŋoniyet nye terertoy om parak sukupole om kutit nyewo kumwowu kule, “Mite kwapi! Mite kwapi! Mite kwapi piko ce mite koret, ye kakut malaykanik co somoku co karik kukut kontinek!”

## **Ŋoŋutok 9**

<sup>1</sup>Yoto kukut malayket nyepo mut kontit nyenyi. Akäs ani kosuwune kokelyet torot kosuci koret. Cikoci kokelyanato funkuwet nyepo mwenet nye moponto ye ŋete.

<sup>2</sup>Kuyat malayket mwenet nye moponte ye ŋete, kucone orit yetit nyewo nyepo oŋonyntit nyewo, kuker yetit nye cone mwenet orit kutuyit koret oko asista.

<sup>3</sup>Yoto kuco koret talamwet kupunune yetit. Cikoci cekto swamet nye kerkey oko swamet nyepo keneyisyek cepo koret.

<sup>4</sup>Cemwoci kule, “Monte ciwurte suswek oko ketik, nto kiy ake tokol nye pite. Möce cekto kowurta pate piko ce moponto muwurut nyepo pelutyetap Yiyintet om tokoywekwa.”



- <sup>5</sup>Kipuryo kot cecömnci talamwet kupakäc piko, ntene kutañany pate kuwany orok mut. Kinyor cito nye kowut mwoninto nye kerkey yo kowut cito keneyontet.
- <sup>6</sup>Om orocoto mut, musukusyem picoto kule cecenye met, ntene monyoru. Musukumac kule cepoku ntene musukumweye met wule mite cekto.
- <sup>7</sup>Kukerkeyitu talamik oko Farasinek ce kaciyiyta kule kupa poryet, kiponto om metewok cikwa ce kerkey kutonok cepo Sapunek, kukerkey metewok cikwa oko cepo piko.
- <sup>8</sup>Kukerkey putek cikwa oko putek cepo koruk, oñnkukerkey kelak cikwa cepo ñetumwek.
- <sup>9</sup>Kiponto teketik cikwa karik ce kicekerekte, nto karumnta nyepo kepepok cikwa kuce kikerkey oko karumnta nyepo Farasinek ce cañ ce cute karinek ce rwoye kupa poryet.
- <sup>10</sup>Kuponto sarurak ce wutisye ce kerkey keneyisyek, kuponto sarurak cikwa mwonet nye toñonye piko kuwany orok mut.
- <sup>11</sup>Kiponto kinko nye poytoy cekto, nyoto ku malayket nyo ripe mwenet nye moponto wule ñete. Cekure kaynenyi om ñelyeptap Puraniyek ku “Apatoni” Nye cekure yec om ñelyeptap Kirikik kule, “Apolyon” (nye poru kaynana kule “Orontoyintet”)
- <sup>12</sup>Kutil yawut toñonutek cepo tayta, koñet toñonutek oyenku ce mokukwa.
- <sup>13</sup>Yoto kukut malayket nyepo lö kontit nyenyi, Alim kutit nye cone toponutek amwan ce mite otepto nye cepele korosek nyepo Saput nye yoñe taytap Yiyintet.
- <sup>14</sup>Kuñalal kutit kumwoci malayket nyepo lö kule, “Tyakte malaykanik amwan co kiceroty oyinet nyewo Efurate!”
- <sup>15</sup>Cityakta yoto malaykanik amwan ce kikiceyiyta kule sukuñet kupakäc piko cepo kereryantet akenke om somok cepo koret om sawanato om pesyonitenyi, om arawanitenyi oko keniyitenyi.
- <sup>16</sup>Cemwowo ani wule tento coñinto cepo sikarek, ce milioninek pokolwokik oyeny.
- <sup>17</sup>Yoto ceñonwo ciporwo Farasinek oko piko ce kipete parak. Kiponto picoto loñanikap teket cepo karik ce orornec kuyu mata, oñnkworusec kuyu Sapiret oñnkutolelyonec kuyu Salpur. Kikerkey metewokap Farasinek oko metewok cepo ñetumwek. Kunyo kikwone metewok cikwa mata oko yetit oko nyolilyet.
- <sup>18</sup>Toñonutek cutecu somok, mata, oko yetit oko Salpur ce kikwone kutuwakap Farasinek kuce kipakäc kereryantet akenke om somok nyepo piko cepo koret.
- <sup>19</sup>Omnye kimitowune swameta Farasinek kutuwak cikwa oko sarurak cikwa. Kikerkey sarurak cikwa erenok ce ponto metewok, kunyo kikwiyisye metewok coto kutañanye piko.
- <sup>20</sup>Piko tokol cepo koret ce kiñet ce kipuryo kot kupakäc toñonutek coto somoku, kuce kipuryo kot kurenynkey kwasta cekikwiye cekto, kipuryo kot kwasta komo kusoye



oyik, oko kerkeyik cepo Sapunek, oko cepo karik ce lelac, cepo toyok, oko cepo rwontok oko cepo ketik, ce puryo kot kuköstoy nto kulimntoy, nto mpo kupesetoti.

<sup>21</sup>Kipuryo mpo kot kurenynkey picoto om porisyet nye kikwi, nto ponisyet, nto sakwayanatet, nto corsyet.

## **Ñoñutok 10**

<sup>1</sup>Yoto akäs ani malayket ake yec nyepo swamet kureku kucone torot, kikilac polyet oko cekwalasyet nye komut metinyi. Kikerkey metit nyenyi oko Asista, kikerkey kerenkoyi oko tolocik cepo mata.

<sup>2</sup>Kiponto om yewunyi kitaput nye miniñ nye tyakat nye silot. Kikoci kuyone kerenkenyi nyepo tay ruretyet, kuyone nyepo let koret.

<sup>3</sup>Kutul kukurto om kutit nyewo nye ciye kuyu ñetuny nye kotul. Nteyu kowo kukurto kuyunyoto, yoto kuyentyi kutul ilotik tisapu.

<sup>4</sup>Nteyu kowo kutul ilotik, amäc ani kule osil. Ntene alim kutit nye kañalal kucone torot kumwowo kule, “Rip kuwoñokis, mente kot osil ñalek co komwoy ilotik tisapu.”

<sup>5</sup>Yoto malayket nyo koköse kukeyone ruretyet oko koret kunömnci yewunyi nyepo tay torot,

<sup>6</sup>oñkuwal Yiyintet nye sope okokoy nye kitany torot oko tukuk ce mite orit, oñkutany ruretyet oko tukuk tokol ce mite orit, kumwoy kule, “Komo kumite yec kule cililennkey!

<sup>7</sup>Ntene ye kakut malayket nyepo tisap kontit nyenyi, yoto ye mosukoyitita Yiyintet yisyenyi nye wuñat nye kiyiyta kuyu wulo kimwoci mutworiky workoyik.”

<sup>8</sup>Yoto kuñololwo yec kutit nye kyalim kucone torot kumwoy kule, “Iwo wenumu kitaput nye tyakat nyo mite yewutap malayket nyo katyic kerenket ake ruretyet, kutyic ake koret.”

<sup>9</sup>Awo ani wule mite malayket oñkosom kukono kitaput. Kumwowo yoto kule, “Oñyi yam, mosukumwanit kat om moyeñuñ, ntene mosukwanyinyit om kutiñuñ kuyu kumnyatet.”

<sup>10</sup>Onumu ani kitaput nye kimite yewutap malayket oñkayam, kwanyinyit kuyu kumnyatet om kutimwani, ntene yu kawoluñuyi kumwanit kat om moyet orit.


<sup>11</sup>Cemwowo ani kule, “Misyini mwayte lokoywekap Yiyintet ce nöme yemosyek, oko piko oko ñelyepik oko kinkonik.”

## **Ñoñutok 11**

<sup>1</sup>Cekono yoto korokto nye kerkey tekantet nye cepimonisye oñkyemwowo kule, “Det wepiman kotap Yiyintet oko otepto nye cepele korosek oñkiyit piko ce soye orit.



- <sup>2</sup>Ntene yaste mente apiman tekewut om saɲntap kotap Yiyintet, omnye kicikoci wuloto lamek ce mosukutyikta cekto moɲet Nyetilil kuwany orok artam ok oyeny.
- <sup>3</sup>Mosoyoku ani muncururwanikwani oyeny. Mosukulac sirok sarkatineƙ oɲnkumwayta lokoywekap Yiyintet kuwany pesyosyek elifut akenke oko pokolwokik oyeny ok tomonwokik lö.’’
- <sup>4</sup>Piko muncururwanik coto oyeny, ku ketik Seituninek oyeny oko sokotik oyeny cepo tarinek ce yoɲe taytap Mokoryontet nyepo koret.
- <sup>5</sup>Ye kasyem citake kule awurte cekto, mosukucone mata kutuwakwa oɲnkwaranta punik cikwa. Mosukupakäc kuyunyoto ci tokol nye kasyem kule awurte apakäc cekto.
- <sup>6</sup>Ponto picoto kamukeywek ce muce kuker koret parak nye memuce kot kuropen ropta om pesyosyek ce cemwoytoy lokoywekap Yiyintet. Oɲnkuponto yec kamukeywek ce muce kuwec peko kwek korotik, oɲnkukoci kunäm koret porwonik wok alake tokol ye komöce cekto.
- <sup>7</sup>Nteye kakuwany cekto kumwayta lokoywek, mosukuco tyonynto nye cone mwenet nye moponto ye ɲete oɲnkuporye cekto, mosukupël tyonyoto cekto oɲnkupakäc kupok.
- <sup>8</sup>Mosukuseretyi muswek cikwa orustunwekap moɲet nyewo wule kicewuyitocine Mokoryontemwa murtowontet. Kaynet nyepo moɲonoto kuyu tyonkoc ku Sotom nto Misiri.
- <sup>9</sup>Mosukukäs piko cekwone yemosyek, pororyosyek, ɲelyepik oko piko tokol muswek cepo picoto kuwany pesyosyek somok ok kwenut, oɲnkupuryo kot kucöme kule cemuy muswecoto.
- <sup>10</sup>Mosukuɲerec piko cepo koret omnye kopok picoto oyenku. Mosukwam sakwet oɲnkukocinkey kokotutek, omnye kitaɲany koromun workoyik cutecu oyenku piko cepo koret.
- <sup>11</sup>Nto om letutap pesyosyek somok ok kwenut, mosukuco soponto nye cone wule mite Yiyintet oɲnkuco kowut porwonico, yoto kuɲetyo kuyon, kunyo kupotpotenis piko ce kiköse picoto.
- <sup>12</sup>Kulim workoyik coto oyenku kutit nyewo nye cone torot nye komwoci kule, “Akwa torot yu!” Kupa cekto torot kupete polyet kuköse punik cikwa.
- <sup>13</sup>Pakenke yoto kuriɲriɲ koret, okoy kuturpup kwaran kereryantet nyepo akenke om taman nyepo moɲet oɲnkupok piko elifunek tisapu ce kipakäc koriɲriɲetap koret. Kumuyo kupotpotenis piko ce koɲet oɲnkukasta woyinto nyepo Yiyintet nyepo torot.
- <sup>14</sup>Kutil yawut taɲanynta nyepo oyeny, ntene käs pa! Mosukuco lakwar taɲanynta nyepo somok.
- <sup>15</sup>Yoto kukut malayket nyepo tisap kontit nyenyi, celim polotet om torot nye mwowu kule, “Kupoyit yawut poytoyisyet nyepo koret Mokoryontet oko ɲapanenyi, kunyo mosukupoytoyis okokoy okoy okokoy!”





<sup>16</sup>Yoto poyik co tiptem ok amwan co pure ñecerokwa cepo poytoyisyet om taytap Yiyintet,

<sup>17</sup>Kukutuny oñnkusay Yiyintet kumwoy kule, “Cikostiñ acek, Mokoryontet Yiyintet nyepo kamukeywek tokol, nye kimite oñnkumite yawut! Omnye yiyisi swamet nyenun nyewo. Kunyi kecec poytoyisye!

<sup>18</sup>Kinerekis kinyer koromun piko cepo yemosyek, omnye kopunto pesyet kuco nyerunotenun, oñnkumutyi musankut piko co kipok, kopunto pesyet ceyokyi cikoci musyaret mutworikuk workoyik oko pikuk tokol, oko piko cewoyec oko ce minkec ceyweye kaynenun. Kopunte pesyet kyaranta co orontoy koret.’’

<sup>19</sup>Yoto ceyat kotap Yiyintet om torot, kutok santukut nye cekonore kirotyet om kotap Yiyintet orit. Kowec yoto kaweket, oko karumnta, oko ilotik, oko koriñriñet, oko ropta nyewo nyepo koyantet.

## **Ñoñutok 12**

<sup>1</sup>Kutok yoto om torot pelutyet nyewo nyepo kakitat. Kutok korko nye kilac Asista, oko arawet nye katyike kerekokyi, oñnkulac om metinyi kutwet nye ponto kokelik taman ok oyeny.

<sup>2</sup>Kikoyat lekwenyi, kurir om mwoninto nyepo lekwet nye kimöce kucämñkey.

<sup>3</sup>Kutok yec pelutyet ake om torot. Om yoto kutok Cesosum nyewo koromun nye kyarra nye kiponto metewok tisap, oko kuyñok taman oko kutonok tisap om metinyi.

<sup>4</sup>Kwiyisye saruryenyi kopukto kokelik cepo torot cepo kereryantet akenke om somok kupa koret ñony. Yoto kuyone Cesosum taytap korket nyo kikirik kucämñkey kule sañet ayam pakenke lekwet ye koceyi.

<sup>5</sup>Kuyi korkonoto lekwet werit nye mosukupayta yemosyek tokol kwiyisye kipoket nyepo karnet. Ntene cesar lekwet cesut kuwo wule mite Yiyintet wule mite ñecerenyi nyepo poytoyisyet.

<sup>6</sup>Kumwey korkonoto okoy kitela wule kikwiytoci Yiyintet kule muce ceripune kuwany pesyosyek elifut akenke ok pokolwokik oyeny ok tomonwokik lö.

<sup>7</sup>Yoto kucec poryet om torot, kuporye Mikael oko malaykaniki tyonynto Cesosum nyewo, kutitir kuporye Cesosum oko malaykaniki.

<sup>8</sup>Ntene cipel Cesosum okoy komo kuponto oko malaykaniki otepto om torot.

<sup>9</sup>Cewir Cesosum nyewo kuco ñony, nyoto ku Erenet nyepo keny nye cekure Setanit nyewo nyepo oyik nyo kiperper koret. Cewir kuco ñony kupontokey oko malaykaniki tokol.

<sup>10</sup>Yoto alim ani polotet nyewo nye cone torot nye mwowu kule, “Kaco yawut kasopotet nyepo Yiyintet, kakupor yawut Yiyintet kamukeywekyi kuyu Kinko! Kakupor yawut Ñapanenyi kamukeywekyi! Omnye kacewir kuco ñony neto nyo wosontyi pet oko komoy mpo yeyanyo om wule mite Yiyintet.



<sup>11</sup>Kwepëlis mpo yeyanyo kupël neto om korotikap Lekwetap Keciryet oko om ñalek cepo manta ce kimwoy oñnkucämnta kukoyto sopenwekwa kupok.

<sup>12</sup>Kunyo ñerec nyi wuli po torot oko tukuk tokol ce mite orit! Ntene mite kwapi koromun koret oko ruretyet! Omnye kacontyok Setani nyewo nyepo oyik kuponto nerekwec ce cañ, omnye nkete kule oponte pesyosyek ce ñeri pate ce koñet.’’

<sup>13</sup>Nteyu kowo konket Cesosum kule kacewirco koret ñony, yoto kucec kurup kuceny korket nyo koyiye lekwet werit.

<sup>14</sup>Ntene cikoci korkonoto kepepok oyeny cepo ploñoniyet nyewo sukuñet kutererta kuwo otepto nyenyi om kitela wule mowoceripune kuwany kenysisyek somok ok orok lö wule memuce kunyor Cesosum.

<sup>15</sup>Yoto kuwosune Cesosum kutinyi mukutyantet nyepo peko ce cañ korupe korkonoto kule kusut.

<sup>16</sup>Ntene kuco koret cokusor korkonoto, kuñany kutit nyenyi oñnkuye peko co kowosune Cesosum kutinyi.

<sup>17</sup>Kunyerici Cesosum korkonoto, kunomen kuwo wokuporye kesenisyekap korkonoto cut alak oko piko tokol ce rupe ntarastinekap Yiyintet, ntene kukwilokis om koyenet nye kiporci Yesu Kristo.

<sup>18</sup>Kuyonje Cesosum ruretyet tapan.

### **Ñoñutok 13**

<sup>1</sup>Yoto akäs ani tyonynto nye loñune ruretyet nye kiponto kuynok taman oko metewok tisap. Kiponto kutonok ce kimite kuynok. Kimite kuynocoto kuynok alak ce miyotec ce kicesil cepo morisyo.

<sup>2</sup>Tyonynto nye kyakäs ani kunye kikerkey oko melilyo. Kikerkey kerencok cepo tyonynto nye cekure tuput, oñnkukerkey metit nyepo ñetunynto. Kukoci Cesosum tyonynto kamukeywek ce cañ oko ñecerenyi nyepo poytoyisyet.

<sup>3</sup>Yoto Kikerkeyit nye ponto mwayet nyewo nye miyat nye mite metit ake nyepo tyonynto, ntene oñnkisop mwayet nyoto miyat. Kukite koret tokol tyonyoto, oñnkulimnci.

<sup>4</sup>Kusay ci tokol Cesosum omnye kikoci kamukeywekyi tyonyoto. Kusay cekto tyonynto oñnkutep kimwoy kule, “Do nye kerkey oko tyonynto? Do nye muce kuporye neto?”

<sup>5</sup>Yoto kyasta tyonyoto kuñalal ñalek ce miyotec cepo morisyo kucup Yiyintet, oñnkyikoci kamukeywek kuwany orok artam ok oyeny.

<sup>6</sup>Kuñany kutit oñnkucec kucup Yiyintet oñnkumor kaynenyi oko otepto wule minye, oko piko tokol ce minye torot.



<sup>7</sup>Kicecömnci mpo kuporye pikap Yiyintet okoy kupël, oñkyikoci kamukeywek kupayta piko cepo yemosyek tokol, oko arosyek tokol, oko ñelyepik tokol.

<sup>8</sup>Mosukusay piko tokol ce minye koret tyonyoto, tos pate piko co silotin kaynakwa kitaput nyepo soponto nyepo Lekwap Kecir. Kaynocoto kuce kicesil kuceke ye kicitany koret.

<sup>9</sup>“Kunyo nye ponto yitik kumisyini Kulimnta!

<sup>10</sup>Co kicemöce kule mosicenäm oñkyiwu kuce mosicenäm kuyunyoto. Nto co kicemöce kule mocepare rotwetap cok kuce mosicepare rotwetap cok kuyunyoto. Kunyo möce kule kumuytoci oñkuyene pikap Yiyintet om ñalecutecu.”

<sup>11</sup>Yoto akäs ani tyonynto ake nye kicone ñony. Kiponto kuynok oyeny ce kerkey cepo menkit keciryet oñkuñalole kuyu Cesosum.

<sup>12</sup>Kiponto nyoto kamukeywek ce cañ cepo tyonynto nyo kipo tayta, kwiyisye yoto kamukeywek coto om tayta tyonynto nyin. Kuker koñ om koret tokol oko tukuk tokol ce mite orit kule kusay tyonynto nyo kiponto mamitet nye miyat nyepo mwayet nye kisop.

<sup>13</sup>Kwiy tyonynto nyoto po oyeny cepo kakitat ce woyec okoy kucone mata torot kuco ñony om taytap piko tokol.

<sup>14</sup>Kuperper yoto piko tokol ce minye koret kwiyisye tukuk cepo kakitat ce kicecömnci kwiy kuköse tyonynto nyepo tayta. Kumwoci tyonynto piko tokol cepo koret kwiy kerkeyinto nye ciyweye tyonynto nyo kicepore rotwetap cok oñnkurok kusope.

<sup>15</sup>Cecömnci tyonynto nyepo oyeny komuñkyi soponto kukerkeyit nyepo tyonynto nyepo tayta, okoy komuc kuñalal kerkeyinto oñnkupakäc piko tokol ce puryo kot kusoye kerkeyinto.

<sup>16</sup>Kusimnci kukerci koñ tyonyoto piko tokol, ce minkec, oko cewoyec, oko ce mokoren, oko ce ponon, ce mutwor, oko ce momutwor, cikoci cekto pelutyet nye kocikoci yewuniyek cepo tay nto tokoywek cikwa.

<sup>17</sup>Kuyete ci ake tokol kwolyoyis nto kwolis kiy ake tokol, tos pate ci nyo kicikoci pelutyet, nyoto kunye kaynet nto nampetap kaynetap tyonyoto.

<sup>18</sup>Möce ñalecu ñomnonet om yuteyu, möce cito nye ponto ñomnonet kunket Nampet nyepo tyonynto, omnye nampet nyitenyi kunye po cito. Nampet nyoto kunye po pokolwokik lö ok tomonwokik lö ok lö

## **Ñoñutok 14**

<sup>1</sup>Yoto akäs ani Lekwap Kecir nye keyoñe tulwetap Siyon parak. Kupontokey piko elifunek pokol akenke ok artam ok amwan ce kicesil kaynenyi oko nyepo kwan tokoywekap picoto tokol.



- <sup>2</sup>Alim kutit nye cone torot nye kerkey oko karumnta nyepo peko cepo kasururtit oko karumnta nyepo ilet nye wece. Kikerkey polotet nye kyalim oko tumnto nyepo piko ce pire kirancinekwa.
- <sup>3</sup>Kuyonj piko co elifunek pokol akenke ok artam ok amwan taytap nəceretap poytoyisyet oko tyonjik amwan ce soptos oko poyik. Kutume tumnto nyelel nye memuce konetkey tumoto piko alake, tume pate cekto co elifunek pokol akenke ok artam ok amwan co kicirarac kukwane koret.
- <sup>4</sup>Picoto kuce kipuryo kot kowurtakey kwiy sakwayanat oko koruk, ce kiripkey kutililitu ce menket moron. Coto kuce rupoti pate Lekwap Kecir om wulyo tokol wule kowo. Coto kuce kikyal kicisop om wule mite piko kwek kupuswek cepo tayta cepo Yiyintet oko Lekwap Kecir.
- <sup>5</sup>Kitompo kot kuñalal cekto kenysis mwiynan om kutuwakwa, ce moponto kenysis lelis.
- <sup>6</sup>Yoto akäs ani malayket ake yec nye terertoy om torot, kuponto lokoywek ce toponec ce mopoku ce möce kule omwoci piko cepo koret, piko, orosyek punonik, ñelyepik, oko yemosyek.
- <sup>7</sup>Kukurto om kutit nyewo kule, “Aywey Yiyintet oñnkokaste woyinto nyenyi! Omnye kopunto sawet kumut musankut. Osay neto nye kitany torot oko ñony, ruretyet oko wule kosune peko!”
- <sup>8</sup>Kuco kurup malayket nyepo oyeny malayket nyepo tayta, kumwowu kule, “Kalul! Kalul! Papulon nyewo! Nye kikoci yemosyek tokol kuye komek cepo mwonet nyepo sakwayanatet nyenyi!”
- <sup>9</sup>Kurup malayket nyepo somok cut oyeny co kopo tay oñnkupol kumwoy kule, “Ci ake tokol nye kasay tyonynto oko kerkeyinto nyenyi oñnkucäm cikoci pelutyet tokoyni nto yewunyi,
- <sup>10</sup>kunye mosukuye neto nyoto nkit komek cepo nerekwepak Yiyintet, ce koronkyi cikompet nyepo nerekwepak Yiyintet ce mocetose peko. Kunye mosicitananye nyoto mata oko rwontok ce loytos sulphur om taytap malaykanik ce tililec oko taytap Lekwap Kecir.
- <sup>11</sup>Mosukutusken kuweti parak yetit nye toñonye cekto kenysis okoy kenysis. Picoto kuco kisoye tyonynto oko kerkeyinto nyenyi oñnkyikoci pelutyet nyepo tyonyoto, ce puryo kot komunye pet oko komoy.”
- <sup>12</sup>Mwowu ñalecu kule kumuytoci pikap Yiyintet, coto kuco yweye ntarastinekap Yiyintet oñnkuyene cekto Yesu.
- <sup>13</sup>Yoto alim ani kutit nye cone torot nye mwowu kule, “Sil ñalecu; ñerekotin kuponto kupeyoy kuceke yawut piko co poku kuponto Mokoryontet.” Komwoy Muyet Nyetilil kule, “Po manta! Derekotin cekto mosukunjerac om komuñnto nyepo toñonjutekwa, omnye mosukurup yisyet nye kikwiw kupetakey cekto.”



<sup>14</sup>Yoto akäs ani okoy akäs polyet nyelel oko tyony nye kerkey cito nye kepure polyet, oṅnkuponto om metinyi kutwet nyepo Saput, oṅnkuponto mukotiyet nye ṅatip om yewunyi.

<sup>15</sup>Kucone malayket ake kotap Yiyintet oṅnkukurci kumwoci om kutit nyewo kumwoci nye kepure polyet kule, “Yiyisye mukotiyenṅuṅ kisisye omnye kopunto pesyosyek korur koret möce kisisye!”

<sup>16</sup>Yoto kuwec malayket nyo kepure polyet mukotiyet kutokyi koret. Cekis yoto cepo koret.

<sup>17</sup>Kucone yoto kotap Yiyintet om torot malayket ake yec, kiponto mpo nyoto mukotiyet nye ṅatip.

<sup>18</sup>Kuco yec malayket nye cone otepto nyetilil, nyoto kunye ponto kamukeywek nye poytoy mata, oṅnkukurci om kutit nyewo malayket nyo ponto mukotiyet nye ṅatip kule, “Yiyisye mukotiyet nyeṅuṅ, yep matuntanik cepo sapipunek cepo koret omnye koruryo Sapipunek!”

<sup>19</sup>Yoto kuwec malayket mukotiyet nyenyi kutokyi koret, oṅnkuyep matuntanik cepo Sapipunek, oṅnkuwirci wule mite kito nye rurunye, nye nerekwepak Yiyintet.

<sup>20</sup>Yoto ciruruny matuntanik cepo Sapipunek om kito nye cirurunye om saṅntap moṅet. Kukwane korotik kito nye cirurunye omik cepo Sapipunek ce kipuntoy koyinto nyepo kilomitanik pokolwokik somok, oṅnkupunto mitanik pokolwokik oyeny kuwo ṅony.

## **ṅoṅutok 15**

<sup>1</sup>Yoto akäs ani kito ake nyepo kakitat nye mite torot, kiy nyewo nye cikite koromun. Kimite yoto malaykanik tisapu ce kiponto toṅoṅutek tisap cepo letut, coto kuce nerekwepak Yiyintet cepo letut.

<sup>2</sup>Akäs yec kiy nye kerkey ruretyet nyepo kilasit nye ponto mata. Akäs mpo piko co kiporye kupël tyonynto oko kerkeynnyi oṅnkupël mpo neto nyo cekonu kaynenyi kiyisye nampet. Kimite cekto kukeyoṅe tapantap ruretyet nyepo kilasit, kuponto kirancinek ce kikoci Yiyintet cekto.

<sup>3</sup>Kitume tumntap Moses kiyokintetap Yiyintet oko tumntap Lekwap Kecir kumwowu kule: “Mokoryontet Yiyintet nyepo kamukeywek tokol, po kakitat koromun yisionutekuk! Kinko nyepo yemosyek tokol, toponec oṅnkupo manta orustunwekuk!”

<sup>4</sup>Mokoryontet, ṅo nye meyweyiṅ nyi? Do nye metorore kayneṅuṅ? Yiku nyi tilil nkit. Mosukukwa yemosyek tokol kwokusayiṅ nyito, omnye kucekäs kutok yisionutekuk cepo manta.”

<sup>5</sup>Nto om letutap ṅalecu, yoto akäs ani kotap Yiyintet om torot nye yatat, oko wemet nye poru wule purune Yiyintet orit.



<sup>6</sup>Kukwane kotap Yiyintet orit malaykanik tisapu co ponto toñojutek tisap. Kiloce cekto sukanik celelac celekecectos, oñnkuponto misipinek cepo Sapunek ce koroty teketikwa.

<sup>7</sup>Yoto kuñet tyonynto akenke om tyonjik amwan ce soptos, kukoci malaykanik tisap pokulinec tisap cepo Sapunek ce kinyitotin orit nerekwepak Yiyintet nye sopot okokoy okoy okokoy.

<sup>8</sup>Kunyyi kotap Yiyintet orit yetit nye cone wule mite woyinto oko swameta Yiyintet. Puryo ci nye kimuc kowut kotap Yiyintet orit okoy kupok toñojutek tisapu co kisutu malaykanik tisapu.

## **Ñoñutok 16**

<sup>1</sup>Yoto alim ani kutit nyewo nye cone kotap Yiyintet orit nye kimwoci malaykanik tisap kule, “Ape wowosyi koret nerekwepak Yiyintet co mite pokulinec tisap!”

<sup>2</sup>Kuwo malayket nyepo tayta wokuwasta pokulit nyenyi kuwosyi koret, kunäm mwoyok ce mwonec ce miyotec piko tokol co kiponto pelutyet nyepo tyonynto oñnkusoye kerkeyintap tyonyoto.

<sup>3</sup>Kuwasta malayket nyepo oyeny pokulit nyenyi kuwosyi ruretyet, kwek ruretyet koroti, kokerkeyit korotik cepo cito nye kame. Kume kiy ake tokol nye kimite ruretyet.

<sup>4</sup>Yoto kuwasta malayket nyepo somok pokulit nyenyi, kuwosyi oyinosyek oko wule kosune peko, kuweckey co kwek koroti.

<sup>5</sup>Alim malayket nye ripe peko kumwowu kule, “Poye manta wule kemutite musankut nyenñ! Nyi Nyetilil! Nye mite yawut, Nye kimite ikye.

<sup>6</sup>Omnye kiwasta cekto korotik cepo pikuk oko cepo workoyik, kunyo kekoci kuye korotik. Kanyor ce yeme!”

<sup>7</sup>Yoto alim kutit nye cone otepto nye cepele korosek kumwowu kule, “Mokoryontet Yiyintet nyepo kamukeywek tokol! Manta añnkupo manta wule mutitoy musankunek!”

<sup>8</sup>Yoto kuwasta malayket nyepo amwan pokulit nyenyi kuwosyi asista, kupel asista piko om mata nye kiloye koromun.

<sup>9</sup>Kucup picoto kaynetap Yiyintet nyo poytoy toñojutececutecu tokol. Ntene nye kipuryo kot kurenynkey cekto kwasta miyotyoni kwa oñnkukasta Yiyintet.

<sup>10</sup>Kuwasta malayket nyepo mut pokulit nyenyi kuwosyi ñeceretap tyonynto, kulum menonet poytoyisyyet nyepo tyonynto. Kunyyi piko ñelyepik om mwoninto,

<sup>11</sup>kucup cekto Yiyintet nyepo torot om mwoninto oko om mwoyok ce kiponto. Ntene kipuryo kot kurenynkey om orustunwekwa ce miyotec ce kikwi.



- <sup>12</sup>Yoto kuwasta malayket nyepo lö pokulit nyenyi kuwosyi oyinet nyewo Efurate. Kuteny peko ceci, kusoty aret kinkonik ce kwone kojasis.
- <sup>13</sup>Yoto akäs ani oyik ce miyotec somok ce kerkey mororocok ce kikwone kutitap Cesosum oko kutitap tyonynto oko kutitap workoyontet mwyntet.
- <sup>14</sup>Cutecu kuce oyik ce miyotec ce yiye tukuk cepo kakitat. Oyik cutecu somok kuce peti wule mite kinkonik om koret tokol kumukul wokoruruce wanak kupo poryet nyewo om pesyet nyepo Yiyintet nyepo kamukeywek tokol.
- <sup>15</sup>“Alim pa! Aconi ani kuyu corin! Derekat cito nye pure kukösu oñkulakat sirokyi, sukujet monte kot kuwesetot pöc oñkolilan om wule mite piko!”
- <sup>16</sup>Yoto koruruc oyik kinkonik koruruky otepto nye cekure om nyelyeptap Puraniyek, “Arimuketon”
- <sup>17</sup>Yoto kuwasta malayket nyepo tisap pokulit nyenyi kuwosyi parak, kucone kutit nyewo neceret nye mite kotap Yiyintet orit kumwowu kule, “Kakyiy!”
- <sup>18</sup>Yoto kowec ilotik, oñkorum, oñkutul, oñkoriñriñ koret koromun, nye kitompo kot koriñriñ koret kuyunyoto kuceke ye kitany Yiyintet cito. Koriñriñet nyitenyi nye miyat kupël tokol!
- <sup>19</sup>Kukerer moñet nyewo kupciwunekey somok, kyaranta moñosyek cepo piko cepo yemosyek alak. Kusot Yiyintet moñetap Papulon nyewo, yoto kukoci kuye komek cepo cikompet nyepo nerekweyi ce cañ.
- <sup>20</sup>Kupoty korosyek tokol co kikwen peko, oñkupoty tulonok tokol.
- <sup>21</sup>Kosowune torot koyantet nye nyikis nye kipuntoy akenke kilonok konom kosuci piko. Kunyer kucup piko Yiyintet om toñojutek cepo koyantet omnye kikoyantet nyoto nye miyat koromun.

## **Ñoñutok 17**

- <sup>1</sup>Yoto kuco wule aomite ani malayket akenke om cut tisap co kiponto pokulinec tisap oñkumwowo kule, “Co, mosoporuñ ani toñojutek cepo korket cemoroniyontet nyewo, nyoto ku moñet nye kicetec kulekite peko ce cañ.
- <sup>2</sup>Kikwiy kinkonik cepo koret sakwayanatet oko cemoroniyontet nyewo, kupokit piko cepo koret omnye kiye komek cepo sakwayanatet nyenyi.”
- <sup>3</sup>Yoto kunäma ani Muyet Nyetilil oñnkukwero malayket okoy kitela, akäs korket nye kepure tyonynto nye arra. Kicesil porto nyenyi tokol kaynok ce miyotec. Kiponto tyonyoto metewok tisap oko kuynok taman.
- <sup>4</sup>Kiloce korkonoto sirok ce mur kworronec oñnkyiyile Sapunek, oko rwontok ce piciyec oko lulunek. Kiponto om yewunyi cikompet nyepo Saput nye kinyitat orit tukuk ce miyotec, oko simnyontet nyepo sakwayanatenyi.





- <sup>5</sup>Kicesil tokoyta nyenyi kaynet nye poru ñalek ce wuñotin kule, “Papulon Nyewo. Kametitap cemonisyyek oko miyotyonyok tokol cepo koret.”
- <sup>6</sup>Akäs kupokite korkonoto korotik cepo pikap Yiyintet oko cepo piko ce kicepakäc omnye kiyen Yesu. Nteyu kowo akäs korkonoto akite koromun.
- <sup>7</sup>Ntene kumwowo malayket kule, “Omne sekite nyi? Mosoporun ñalek cewuñotin ce nöme korket oko tyonynto nyo ponto metewok tisap oko kuynok taman, nyo wesetote korkonoto.
- <sup>8</sup>Kisope tyonyoto nyo keköse nyi, ntene kime yawut kimo kusope, kunyo karik kuloñune mwenet nye moponto ye ñete, oñkwokyaranta yec. Mosukokite koromun piko ce mite koret ye kakäs cekto tyonyoto. Picoto kuce tompo kot cesil kaynokwa om kitaput nyepo soponto kutompo kot citany koret. Omnye kisope tyonyoto, kunyo kimo kusope yawut, ntene mosukutok yec.
- <sup>9</sup>“Möce ñalecu kasoteywek oko ñomnonet. Metewok tisap kuce tulonok tisap co kepure korket,
- <sup>10</sup>oñnku Kinkonik tisap. Om kinkonocoto, kipoty mut, kumite akenke, kutompo kot kuco ake, nteye kaco nyoto, mosukupur kuminiñ pate,
- <sup>11</sup>Nto tyonynto nye kisope, ntene nye kimo kusopot yawut, kunye kinko nyoto nyepo sisit nye kipo co tisap cepo tayta oñnku nye mowokyaranta.
- <sup>12</sup>“Nto kuynok taman co kikäs nyi kuce kinkonik ce tompo kot kupoytoyis. Ntene mosicikoci kamukeywek kwek kinkonok kupoytoyis oko tyonynto kuwany sawet akenke.
- <sup>13</sup>Ponto cutecu tokol ku taman kito akenke nye tyikyini, kule, kukoci cekto tyonynto swamet oko kamukeywek cikwa tokol.
- <sup>14</sup>Mosukuporye cekto Lekwap Kecir, mosukupëlis Lekwap Kecir oko pikyi co cekure kweyanik oko konomiki ce kikoyen, kupël cekto, omnye Neto kunye Mokoryontet nyepo mokorenik oñnku Kinko nyepo kinkonik.”
- <sup>15</sup>Kumwowo ani malayket mpo yec kule, “Peko co kwekäs nyi kukepure Cemoniyontet, kuce piko ce cañ, yemosyyek oko ñelyepik.
- <sup>16</sup>Nto oko kuynok taman co kwekäs nyi oko tyonynto kuce mosukusenker Cemoniyontet, mosukonemune kiy ake tokol nye ponto oñnkupakakta kopur muncarata, mosukwam panyek ceci oñnkwaranta kupele mata.
- <sup>17</sup>Omnye kikukoci Yiyintet mukuleywekwa kito nye kiyitita, sukuñet kwiyy kucömcin cekto kwek akenke oñnkukoci tyonynto kamukeywek kupoytoyis okoy kupunto kupoyit manta ñolyontetap Yiyintet.
- <sup>18</sup>“Nto korket nye kwekäs nyi ku moñet nyewo nye poytoy kinkonik cepo koret.”

## Ñoñutok 18



- <sup>1</sup>Om letutap ñalecu, yoto akäs ani malayket ake nye reku kucone torot. Kiponto kamukeywek ce woyec koromun. Kukweny woyinto nyenyi koret tokol kumukul.
- <sup>2</sup>Kukurto om swamet nyewo kule, “Koturpup! Koturpup Papulon moñet Nyewo. Kukwek kayta nye minye oyik ce miyotec ce cesenkere. Oñnkuminye orit tukuk tokol ce somis oko toritek tokol ce cesenkere.
- <sup>3</sup>Omnye kiye kupokit yemosyek tokol komek ce mwonec cepo sakwayanatet nyenyi. Kikwiyy kinkonik sakwayanatet oko neto, oñnkwiyy cekto kamonkesyentit nyepo koret kumokoren om sakwayanatet nyenyi nye moponto ye ñete.”
- <sup>4</sup>Yoto alim ani kutit ake nye cone torot, nye kimwoy kule, “Pikwani! Akwane wule mite neto, sukuñet monte kot ayiy miyotyey oko neto. Monte kot onyuru toñoñutek ceci!
- <sup>5</sup>Omnye kicitul miyotyonyiki kwek tulwo nye kipunto torot, kunyo kukusot Yiyintet orustunwekyi co miyotec.
- <sup>6</sup>Oyici akwek neto kuyu wulo kikwiwok akwek, oyokyi aret oyeny kucanjit om ce kikwiyy. Anyit kunyiy cikompet nyenyi komek ce mwonec aret oyeny kupël co kikonok akwek neto.
- <sup>7</sup>Okoci neto toñoñutek oko mesyet ce cañ ce oyecin cete sutetapkey oko soponto nyepo ñerekwek ce miyotec ce kiponto, omnye mwowu kule, ‘Opuri ani kuyu kinko nye korko, puryo kot oyiku musuk, puryo kot omesyi kenysis!’
- <sup>8</sup>Kunyo om pesyet akenke, mosukunäm neto porwonik oko toñoñutek oko Rupert. Omnye mosicepele mata kulay, omnye nyewo nyepo kamukeywek Yiyintet nye mosukumutyi musankut neto.”
- <sup>9</sup>Kunyo mosukuriryo kinkonik cepo koret co kikwiye sakwayanatet oñnkupur soponto nye topon oko neto, ye kakäs yetit nyepo mata nye pele moñoñoto.
- <sup>10</sup>Mosukuyoñe cekto wule low, omnye keywey kunyokoritu toñoñutekyi oñnkumwoy cekto kule, “Opo! Opo! Po kakitat! Mite kwapi Papulon moñet nyewo nye tokunot! Kocewosontyiñ cemutuñ kulotiñ musankut lakwar om sawet akenke pate!”
- <sup>11</sup>Mosukuriryo oñnkumesye kamonkesisyek cepo koret tokol neto, omnye komo kwole ci yec terekokwa.
- <sup>12</sup>Puryo nye tokwole Sapunek oko pesanik, oko rwontok ce piciyec, oko sirok celelac, oko sirok ce orornec oko sirok cepo ntororok, oko ce murwonec, oko terekok alak tokol cepo ketik ce motoku, oko tukuk tokol ce kicitanye kelekap Pelek, oko ketik cepo latik, oko toyok, oko karik, oko rwontok ce lelac.
- <sup>13</sup>Oko tukuk ce poñu, oko ce citoye nkuyek, oko pupaninek, oko korosek ce poñu, oko Miranik, oko Frankinek, oko komekap Sapipunek, oko mwayta oko pusek oko nkanuk oko toka oko kecirek oko Farasinek oko Karinek oko mutworik, oko mpo sponwekap piko.



- <sup>14</sup>Kumwoci kamonkesisyek neto kule, “Kupotyö tukuk tokol co kwemöce nyi, kupot mpo mokoryontit oko ñerekwek nye kemenyöru yec kenysis.”
- <sup>15</sup>Mosukuyöñe wule low kamonkesisyek co kikwiye kamonkesyantit oko neto om tukucuteçu kuriryö oñnkumesyi, kupole koromun omnye kanyoköritu om toñöñutepak korkonoto.
- <sup>16</sup>Kumwowu kule, “Opo! Opo! Mite kwapi koromun moñet nyewo. Nye kiloce ikye sukanik, oko sired nye mur kwarra oko nye arra, nye kikasekey karik cepo Sapunek oko lulunek!
- <sup>17</sup>Kunyo kupote mokoryontinöñ sawet akenke pate!” Kuyöñe wule low piko tokol co poytoy raposyek, oko co pete raposyek, oko co sute raposyek, oko piko tokol co yiye kamonkesyantit om ruretyet.
- <sup>18</sup>Kupol cekto yo kowo kukäs yetit nye kacepele moñonoto kumwoy kule, “Puryö moñet ake nye kerkey oko moñet nyewo nyitenyi!”
- <sup>19</sup>Yoto kuwasta cekto tertit kuwosyi metewok cikwa, kuriryö kumwoy kule, “Opo! Opo! Mite kwapi koromun nyi moñet nyewo! Omnye neto kunye kimokorene piko tokol ce ponto raposyek! Kunyo kupotyö tukuk tokol ce kuponto sawet akenke pate!”
- <sup>20</sup>Akante kuñerec wulin po torot! Añerec akwek pikap Yiyintet kiyökik oko workoyik! Oñerec om arantayet nyenyi kamutyi Yiyintet musankut alot akwek neto om ñalek ce kikwiwok!
- <sup>21</sup>Yoto kunäm malayket nyepo swama rwantet nyewo nyete rwantetap paka oñnkuwirci ruretyet orit kumwoy kule, “Mosowirci moñet Papulon kuwo ruretyet om swamet kuyunyi nye komo kutoku yec kenysis!
- <sup>22</sup>Tumwonik cepo piko co pire kirancinek oko piko cepo tumwonik oko co kute kurerunek oko co kute kontinek kuce komo celime yec kenysis om wule mite nyi! Komo kutokune kenysis wule mite ci nye yiyisi nye muswokin. Komo celime kenysis rwantetap paka nye ceñoye om wule mite!
- <sup>23</sup>Komo ceköse kenysis tarit nye loye om wule mite, komo celime yec korko oko moron ce kemütkey ce ñolole om wule mite. Piko cekuk cepo kamonkesyantit kuce kiwoyec om koret tokol, kuce kiperper pikap koret tokol kwiysisye ponisyet nyenöñ!”
- <sup>24</sup>Kicitanöñy Papulon omnye kicenyorta orit korotikap workoyik oko cepo pikap Yiyintet. Manta korotikap piko tokol ce kicepakäc om koret.

## **Ñoñutok 19**

- <sup>1</sup>Nto om letut alim ani polotet nye kerkey polotet nyepo piko ce cañ om torot ce kipole kule, “Cikaste Yiyintet! Po Kosopotet Yiyintet, oko Woyinto oko swamet!
- <sup>2</sup>Po manta wule mutitoy neto musankunek! Kacemut musankut kulot Cemoroniyontet nyewo nye kikowurta koret om sakwayanatet nyenyi, kwetanöñy Yiyintet neto omnye kipakäc neto mutworikap Yiyintet.”



- <sup>3</sup>Kupol yec kumwoy kule, “Cikaste Yiyintet! Weti torot kenysis oko kenysis yetit nyepo mojet nyewo.”
- <sup>4</sup>Yoto kukutuny poyik tiptemu ok amwan oko tyonjik amwan ce soptos ce mite taytap neceret onkusay cekto Yiyintet nye kepure neceret kumwoy kule, “Yunyoto! Cikaste Yiyintet!”
- <sup>5</sup>Yoto kucone kutit wule mite neceret kumwoy kule, “Akaste Yiyintet, akwek mutworiki tokol oko piko cewoyec oko ce minkec co yweye neto!”
- <sup>6</sup>Yoto alim ani polotet nye kerkey nyepo piko ce caŋ, nye kerkey mpo peko cepo kasururtit, nye kerkey ilet nye kaciy. Alim kumwowu kule, “Cikaste Yiyintet! Omnye Mokoryonteny Yiyintet nyepo kamukeywek tokol kunye Kinko!”
- <sup>7</sup>Akente cejerec acek onkyikaste cikoci woyinto, omnye kopunto pesyet nye mutisiyi Lekwap Kecir, kunyo kuyiytakey cepto nye cimute.
- <sup>8</sup>Kocikoci kulac siret nyelal nye topon koromun” (Siret suket nyelal ku yisyonutek ce toponec cepo manta cepo pikap Yiyintet).
- <sup>9</sup>Yoto kumwowo ani malayket kule, “Sil ŋalecu, Derekotin nye ponto kupeyoy piko co kucekur kukwa sakwetap kamutisiyet nyepo Lekwap Kecir.” Onkutosyi malayket kumwoy kule, “Dalekap Yiyintet cutecu cepo manta.”
- <sup>10</sup>Oputyi ani yepo krenkokyi asay neto, ntene kumwowo kule, “Mente ayiy kuyunyi! Oyiku ani mutworin nye kerkey oko nyito oko mpo yeyanun co nome kukwil ŋalek cepo manta ce kinon Yesu. Say Yiyintet!” Omnye ŋalek cepo manta ce nonu Yesu kuce kikoci workoyik kunjalal kunorsyo.
- <sup>11</sup>Yoto akas kuyatakay wulin po torot, okoy akas Farasit nyelal. Cekure cito nye kiwete, Nyepo manta nye cikenekey. Yiyisy ŋalek cepo manta ye mute musankunek onkuporye cepo manta.
- <sup>12</sup>Kerkey konyek ceci mata nye loye onkuloce kutonok ce caŋ om metinyi. Kuponto kaynet nye kicesil nye puryo ci nye kikonket, neto nkit pate nye nkete.
- <sup>13</sup>Kiloce siret nye koy nye kiciyile korotik. Nto kaynetap nyoto kunyi, “Dolyontetap Yiyintet.”
- <sup>14</sup>Kurup neto sikarek cepo luketap torot ce kipete Farasinek ce lelac onkuloce sirok ce toponec ce lelac.
- <sup>15</sup>Cone kutit nyenyi rotetap cok nye natip nye mosukupele yemosyek tokol. Mosukupayta kwiyisy korokto nyepo karnet. Mosukoruruny Finyonik kwiyisy kito nyo cirurune Finyonik cepo nerekwepap Yiyintet nyepo kamukeywek tokol.
- <sup>16</sup>Kicesil siret nyenyi oko catit nyenyi kaynet kule, “Kinko nyepo kinkonik. Mokoryontet nyepo mokorenik.”



<sup>17</sup>Yoto akäs ani malayket nye keyoŋe Asista, kupol kukurto om kutit nyewo kukurci toritek ce kiterertoy om parak kule, “Akwa kworurukikey sakwet nyewo nyepo Yiyintet!

<sup>18</sup>Kwayam panyek cepo porwonik cepo kinkonik, oko cepo cewoyec cepo sikarek, oko cepo co coponto swamet, oko panyek cepo Farasinek oko cepo piko co pete, oko panyek cepo piko tokol co tokunotin oko co momutwor oko co mutwor oko cepo piko cewoyec oko ce minkec.”

<sup>19</sup>Yoto akäs ani tyonynto nyin ake oko kinkonik cepo koret oko sikarek cekwa ce keruruckey kule ceporye cito nyo wete Farasit oko sikarek ceci.

<sup>20</sup>Cenäm tyonyoto kwek mopusyo wanak oko workoyontet nyepo mwiynan nye kikwiye tukuk ce cikite om taytap tyonyoto. (Kikwiysisi tyonyoto tukucoto cikite sukuŋet kuperper piko co ponto pelutyet nyepo tyonyoto.) Cewirci kusoptos ruretyet nyepo mata nyepo rwontok ce loytos Sulfa.

<sup>21</sup>Cepakäc sikarek cikwa cepare rotwetap cok nyo cone kutitap cito nye wete Farasit. Kwam toritek panyek cikwa.

## **Ñoŋutok 20**

<sup>1</sup>Yoto akäs ani malayket nye reku kucone torot, nye kiponto om yewunyi Funkuwet nyepo mwenet nye moponto ye ñete oŋnkuponto nyororet nyewo.

<sup>2</sup>Kunäm malaykanato Cesosum nyoto ku Erenet nyepo kenye nye cekure Setani nyewo nyepo oyik oŋnkurat kopur kuwany kenysisyek elifut akenke.

<sup>3</sup>Kuwirci malayket kowute Cesosum mwenet nye moponto ye ñete, oŋnkukerta orit kukoci pelutyet sukuŋet komo komuce kot kumas kuperper yemosyek okoy kupok kenysisyek elifut akenke. Mosityac kopur kuminiŋ ye kapok kenysisyek coto.

<sup>4</sup>Yoto akäs ñecerok cepo kamukeywek oko piko ce kepure, ce kicikoci kamukeywek kumut musankunek. Akäs mpo yec mukuleywek cepo co kiceyep metewok omnye kimwoy kutor Yesu oŋnkumwoy kupor ñolyontetap Yiyintet. Kipuryo kot kusay picoto tyonynto nto mpo kerkeyinto nyenyi, oŋnkupuryo kot cepirci pelutyetap tyonynto tokoywek cikwa oko yewuniyek cikwa. Kotutune met cekto kusopco oŋnkupoytoyis oko Kristo kuwany kenysisyek elifut akenke.

<sup>5</sup>(Kipuryo kot kotutune met piko cut alake okoy kupok kenysisyek elifut akenke) nyitenyi kunye kotutunetap met nyepo tayta.

<sup>6</sup>Derekotin ce ponto kupeyoy co nyoru kotutunetap met nyepo tayta. Puryo kot kuponto kamukeywek met nyepo oyeny om wule mite cekto coto, ntene mosukwek coto tisik cepo Yiyintet oko Kristo, oŋnkupoytoyis oko neto kuwany kenysisyek elifut akenke.

<sup>7</sup>Nteye kapok kenysisyek elifut akenke, mosityac Setanit kucone mopusi nyi.



<sup>8</sup>Mosukuco saŋ, mosukucec kuperper yemosyek ce mite taponutek amwan cepo koret, coto ku Koku oko Makoku, mosukoruruc Setanit cekto kunām poryet, mosukucanjit cekto koromun cete ŋaynet nyepo ruretyet tapan.

<sup>9</sup>Yoto kupa kuseretyi koret tokol oŋnkomut kayta nyepo pikap Yiyintet oko moŋetap Yiyintet nye topon. Ntene kucone mata torot oŋnkupël kwaranta cekto.

<sup>10</sup>Cewirci yoto Setani nyewo oyik nyo kiperper cekto wule mite tampayayet nyepo mata nye kicepel kipiritit wule mite tyonynto oko workoyontet mwiyntet; mosukutaŋany cekto komoy oko pet okokoy okoy okokoy.

<sup>11</sup>Yoto akäs ani Deceret nyewo nyelel nyepo poytoyisyyet oko cito nye kepure. Kumwey koret wuli po ŋony oko koret torot om tayta nyenyi, oŋnkupoty nyekomocököse yec.

<sup>12</sup>Akäs piko cewoyec oko ce minkec ce kipok ce keyoŋe tayta ŋeceret. Ceŋany kitapunek, yoto ceŋany mpo kitaput ake, Kitaput nyoto kunye po soponto, cemutyi musankut piko ce kipok kuyu wule yunto yisyonutekwa om ŋalek ce kicesil kitapunek.

<sup>13</sup>Kukon ruretyet piko ce kipok ce kimite orit. Kukon met oko kapkompic piko ce kipok ce kimite orit. Cemutyi ci tokol musankut kuyu wule yunto yisyonutekyi.

<sup>14</sup>Cewirta met oko kapkompic cewirci tampayayet nyepo mata. (Tampayayet nyepo mata kunye met nyepo oyeny.)

<sup>15</sup>Ye puryo kot cenyorta kaynetap ci tokol nye kicesil kitaputap Soponto, cewirci nyo wule mite tampayayet nyepo mata.

## **Ŋoŋutok 21**

<sup>1</sup>Yoto akäs ani torot nyelel oko koret nyelel, omnye kupok koret wulin po torot oko koret wuli po ŋony cepo tayta. Kimo kumite yec ruretyet.

<sup>2</sup>Akäs moŋet nyetilil Yerusalem nyelel kureku kucone torot wule mite Yiyintet, nye kicesat kunyol topon kukerkeyit korko nye kacimüt nye kacilac topon sukuŋet kutuyo oko santenyi.

<sup>3</sup>Alim yoto kutit nye cone ŋeceretap kamukeywek kupol kumwoy kule, “Akäs pa! Kakukoci Yiyintet konyi kopure kwenutap piko, mosukuminjis wule mite cekto, mosukwek pikyi, oŋnkwek neto Yiyintet nyimwa.

<sup>4</sup>Mosukopuc Yiyintet lokik tokol ce mite konyekwa, komo kumite yec met, oŋnku komo kumite mesyyet, nto mpo rirek, nto mwoninto, omnye kutil tukuk co kipo kenyyet.”

<sup>5</sup>Kumwoy Neto nye kepure ŋeceretap kamukeywek kule, “Akäs pa! Kawec yawut kulelakitu tukuk tokol!” Kumwowo yec kule, “Sil ŋalecu, omnye po manta ŋalecu oŋnkyikenekey.”





- <sup>6</sup>Kumwowo kule, “Kakwitita! Oyiku Omeka oko Alufa. Nyepo tayta oko nyepo Letut. Mosokoci ani ci ake tokol nye ome melelya peko ce puryo kot kwole ce kosune wule mite soponto.
- <sup>7</sup>Ci tokol nye kepëlis kunye mosikonti cutecu tokol, Mosoyeku ani Yiyintenyi oṅkwek neto lekwemwani.
- <sup>8</sup>Ntene piko co nyokorec, co meyene, oko co ṅomntoyot, oko co kiwuryo, oko porik, oko co sakwoyone, oko co mwiynot tokol, oko co yiye sokeyek, oko co soye kerkeyik oko co perperisiyi, otepto nyimwa ku tampayayet nye loye, oko mata, oko rwontok ce loytos Salfa, nyoto kunye met nyepo oyeny.”
- <sup>9</sup>Yoto kuco wule omite ani malayket akenke om malaykanik tisap co ponto pokulinec tisap ce nyitotin porwonik tisapu cepo letut, oṅkuṅololwo kumwoy kule, “Co yu! Mosoporuj Mureret korket nyepo Lekwap Kecir.”
- <sup>10</sup>Kunāma yoto malayket Nyetilil oṅnkukwero okoy tulwet nye koy koromun. Kuporwo moṅet nyewo Nyetilil, nyoto ku Yerusalem nye kicone torot wule mite Yiyintet.
- <sup>11</sup>Kulekecec om Woyinto nyepo Yiyintet, kuyu rwantet nye piciy oṅku kerkey rwantet nye lekecec Cespa, oṅkutoku kuyu ciyoyit Krestol.
- <sup>12</sup>Kiponto moṅet totet nyewo nye kicetec komut oko kurkotik taman ok oyeny oko malaykanik taman ok oyeny ce ripe kurkoticoto. Kicesil kurkoticoto kaynok taman ok yeny cepo lekokap Israel co taman ok oyeny.
- <sup>13</sup>Kimite komoswokik tokol ku amwan kurkotik somoku. Kimite somoku koṅasis, kumite somoku tö, kumite somoku makentany, kumite somoku tinkey.
- <sup>14</sup>Kicetec totet nyepo moṅet kuyoye rwontok tolocik taman ok yeny ce kicesil kaynokap Kiyokik cepo Lekwap Kecir.
- <sup>15</sup>Kiponto malayket nye kiṅololwo korokto nyepo Saput nye cepimonisye wule tento moṅet oko kurkotik oko totet.
- <sup>16</sup>Kicetec moṅet kwek sukweya kwoyecin koyinto nyepo komoswokik tokol ku amwan. Kuyoyec malayket moṅonoto kwiyisye korokto nyenyi. Kipuntoy koyinto kilomitanik Elifunek oyeny oko pokolwokik oyeny. Kyoyecin koyinto oko poroyinto oko koyinto kuwo parak nyepo moṅet.
- <sup>17</sup>Kuyoyec malayket mpo moṅet, kipuntoy mitanik tomonwokik lö ok mut. Om koyoyeket nyepo cito.
- <sup>18</sup>Kicetece totetap moṅet rwontok ce lekecectos. Nto moṅet nkit kunye kicetece Saput nkit pate nye lekecece kuyu ciyoyit.
- <sup>19</sup>Tolocik ce kiyoye totet nyepo moṅet kuce kiciyile tokol rwontok ce piciyec wok ce caṅ. Tolcta nyepo tayta ku rwantet nye ararra Yasipi, nto nyepo oyeny ku cepo Sapiro, nto nyepo somok ku Kaluteton, nto nyepo amwan ku cepo Samarakito,





<sup>20</sup>nto nyepo mut ku cepo sarntoniki, nto nyepo lö ku cepo sarutiyo, nto nyepo tisap ku cepo krisolito, nyepo sisit ku cepo Perulo, nyepo sokol ku cepo Topasiyo, nyepo taman ku cepo Krisopraso, nyepo taman ok akenke ku cepo Yakinto, nyepo taman ok oyeny ku cepo Ametusito.

<sup>21</sup>Nto kurkotik taman ok oyeny ku cepo Lulunek taman ok oyeny. Kicitanye kurket ake tokol Lulunek. Nto aret nyewo nyepo moñet kunye kicemale Sapunek pate nye kilekecec kuyu ciyoyit.

<sup>22</sup>Kipuryo kot akäs kotap Yiyintet kumite moñet, omnye Mokoryontet Yiyintet nyepo kamukeywek tokol oko Lekwap Kecir kunye kotap Yiyintet nyepo moñonoto.

<sup>23</sup>Puryo kot kumöce moñonoto asis nto arawet nye keluci, omnye lucini pate woyinto nyepo Yiyintet, nto Lekwap Kecir kunye tarit nyenyi.

<sup>24</sup>Mosukupesetate piko cepo koret lakweyet nyenyi, mosukusut kinkonik cepo koret mokoryontinekwa kukwa moñonoto.

<sup>25</sup>Puryo kot cekere kenysis kurkotik ceci pet oko komoy, omnye puryo kot kumite wuloto ye komoy.

<sup>26</sup>Mosicesut woyinto oko mokoryontinek cepo pikap koret tokol kukwa moñonoto.

<sup>27</sup>Memuce kot kowut moñonoto kiy ake tokol nye miyat, nto mpo ci nye yiye cepo kalilan, nto nye perperisiyi. Piko pate ce kicesil kaynokwa kitaput nyepo soponto nyepo Lekwap Kecir ce wute moñet orit.

## **Noñutok 22**

<sup>1</sup>Yoto kuporwo ani malayket oyinet nyepo peko cepo soponto nye kilekecece kuyu ciyoyit, ce kirotune ñeceretap poytoyisyetap Yiyintet oko nyepo Lekwap Kecir.

<sup>2</sup>Kurot oyinet kupunte aret nyepo kwenutap moñet. Kipite tapantap oyinet pitoni ketit nyepo Soponto nye yiye omik aret taman ok oyeny om keniyit akenke, nye yiy omik kila arawet akenke. Kyiyisyse sokek ceci cisope piko cepo yemosyek.

<sup>3</sup>Puryo kot cenyortoy moñonoto kiy nye kicup Yiyintet. Mosukupurune moñonoto ñeceretap poytoyisyetap Yiyintet oko nyepo Lekwap Kecir, musukusay mutworikiyi neto.

<sup>4</sup>Mosukukäs cekto tokoyta nyenyi, mosicesil kaynet nyenyi tokoytap picoto,

<sup>5</sup>nye komo kumite yec menonet nyepo komoy, puryo kot kumöce cekto lakweyet nyepo tarit nto mpo nyepo asista, omnye mosukwek Mokoryontet Yiyintet lakweyet nyimwa. Mosukupoytoyis cekto okokoy okoy okokoy.

<sup>6</sup>Yoto kumwowo ani malayket kule, “Ñalecu kuce po manta ce cikenekey. Kunyo Yiyintet nyo kocini mukuleynyi workoyik kunye kokuyok malaykenyi cokuporci mutworintenyi ce mosukwiyokis lakwar.”



- <sup>7</sup>Komwoy Yesu kule, “Alimnte! Aconi ani Lakwar, ñerekotin nye ponto kupeyoy co ripe ñalecu po ñorsyet ce mite Kitapuni!”
- <sup>8</sup>Ani Yowana kunye kyalim aṅnkakās, tukucu tokol. Nteyu kowo alim, aṅnkakās yoto oputyi yepo kerekokap malayket nye kiporwo ani tukucutecu tokol aṅnkasay.
- <sup>9</sup>Ntene kumwowo kule, “Mente ayiy kuyunyo! Oyiku ani mutworin nye akerkeye nyito oko mpo yeyañuñ workoyik oko piko tokol ce yiye ñalek ce mite kitapuni orit. Say Yiyintet!”
- <sup>10</sup>Kumwowo yec kule, “Mente orip iwuny kuwoṅokis ñalek cepo ñorsyet ce mite kitapuni, omnye karik pesyet nye kweyat.
- <sup>11</sup>Yaste kwiyy miyotyey cito nyo yiye miyotyey, kutosyikey kusomisitu kasoteywek cepo cito nyo somisec kasoteywek, kutosyikey kutoponit cito nyo topon, oṅnkutosyikey kutililit cito nyo tilil.”
- <sup>12</sup>Kumwoy Yesu kule, “Alimnte! Aconi ani lakwar, mosutu kokotutyemwani sokoci ci ake tokol kuyu wule yunto yisyet nye kikwiyy.
- <sup>13</sup>Oyiku ani Alufa oko Omeka, nyepo tayta oko nyepo letut.”
- <sup>14</sup>Ponto kupeyoy piko co site kutililitu sirokwa, omnye mosukunyor kamukeywek kwam matuntyantet nyepo ketit nyepo soponto, oṅnkunyor kamukeywek kowut kurkotik cepo moṅet.
- <sup>15</sup>Ntene mosukopurune moṅet sañ ṅokik, co kimosokis, oko ponik, oko co sekwayane, oko porik, oko co soye kerkeyik, oko tokol co cōme oṅnkwiye mwiynanet.
- <sup>16</sup>“Ani Yesu nye koyoku malayket nyimwani sukuṅet kumwowok ñalecu om wule mite pikap Yiyintet tokol. Oyiku ani mucukoret nyepo kotap Tauti. Oyiku kokelyet tapoyantet nyepo yo kayec koret.”
- <sup>17</sup>Komwoy Muyet Nyetilil oko Mureret kule, “Co!” Mōce kumwoy ci tokol nye lime ñalecu kule, “Co!” Mōce kuco ci tokol nye ponto melelya, ci tokol nye mōce peko cepo soponto kumōce kunyor pōc pate nye puryo kot kwole mpo kisic.
- <sup>18</sup>Ani nyo Yowana kunye asowu ci ake tokol nye lime ñalek cepo ñorsyet ce mite kitapuni. Ci tokol nye kotosyi ṅolyontet ake wule mite ñalecu, mosukutosyi Yiyintet toṅoṅutek cepo porwonik cu kicesil kitapuni.
- <sup>19</sup>Nteye kotepe kot kunum citake tokol ṅolyontet ake tokol om wule mite ñalek cepo ñorsyet ce mite kitapuni, musukunumune Yiyintet neto nyoto omik ce kotonyoru om ketit nyepo soponto, oko otepto nyenyi om moṅet Nyetilil nye cemwowu om kitapuni.
- <sup>20</sup>Cito nye mwowu ñalecutecu tokol kunye mwowu kule, “Aconi ani Lakwar kupoyit manta!” Yunyoto Mokoryontet Yesu, Co!
- <sup>21</sup>Kopurune poypoyetap Mokoryontenyo Yesu Kristo wule mite pikap Yiyintet tokol.



## Esclarecimento

Trata-se de iniciativa particular, com os seguintes objetivos: (i) colaborar para divulgação dos diversos textos bíblicos disponíveis, e, (ii) facilitar o acesso a esses textos, inclusive por meio de download.

Todo esforço em tornar a Palavra de Deus acessível a todos, em quaisquer localidades e falantes das mais diversas línguas, precisa ser um objetivo de todos os que são guiados pelo Espírito Santo. Ele inspirou o profeta Jeremias a dizer “não ensinará jamais cada um ao seu próximo, nem cada um ao seu irmão, dizendo: Conhece ao SENHOR, porque todos me conhecerão, desde o menor até ao maior deles, diz o SENHOR” (Jer. 31:34).

Jesus, também, falou assim: “e será pregado este evangelho do reino por todo o mundo, para testemunho a todas as nações” (Mat. 24:14).

Muitas organizações foram constituídas com o propósito de fazer a Bíblia disponível nas diversas línguas. Não é uma tarefa simples. Anos de trabalho, dedicação e entrega são necessários para esta tão extraordinária missão.

O texto deste trabalho está disponível na internet, em páginas eletrônicas de organizações que produzem ou divulgam bíblias, sem acréscimos de notas ou comentários. Assim, reconhecendo e respeitando os direitos que possuem sobre seus trabalhos, incumbe a todos os que amam a Palavra de Deus, o esforço em contribuir para amplificar sua divulgação.

Se possível, faça download do texto, para que sejamos, também, guardiões da Bíblia, e, com isso, preservando-a para as futuras gerações.

Divulga a Palavra de Deus, ela mostra o Caminho e permite a todos, que se conheça Sua vontade, em todos os lugares e épocas.

Marcel da Glória Pereira  
2021, Vitória/ES - Brasil